

# **DIŽA' CHAWE' KUB**

**El Nuevo Testamento**

**en el zapoteco de Yatee**



**La Liga Bíblica**

*Las Sagradas Escrituras para Todos*

El Nuevo Testamento  
en el zapoteco de Yatee

La Liga Bíblica 4C primera edición 2002 [zty]  
La Liga Bíblica versión electrónica 2009

Publicado por

© La Liga Bíblica 2002

Se permite copiar, distribuir y comunicar públicamente esta obra bajo las siguientes condiciones:

- Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- No comercial. No puede utilizar esta obra para fines lucrativos.
- Sin obras modificadas. No se puede alterar, transformar o generar una obra a partir de ésta.

# ACLARACIONES

## SOBRE EL ALFABETO ZAPOTECO

Muchas de las letras con las que se escribe el idioma zapoteco son las mismas que las del español, pero fue necesario añadir otras letras para simbolizar todos los sonidos del zapoteco.

La letra ' sirve para escribir **da'a** “petate”, **yí'** “lumbre”, **la'** “mi nombre”, etc.

La letra j sirve para escribir **chej** “irá”, **yej** “piedra”, **yeje** “flor”, **bzoje'** “escribió”, etc.

La letra ž sirve para escribir **ža** “día”, **yež** “pueblo”, **žo'o** “nosotros”, etc.

La letra ʐ sirve para escribir **za** “ropa”, **zen** “grande”, **wʐí'a** “recibí”, etc.

La letra x sirve para escribir **xti** “rato” y **bxin** “espectro”, “fantasma”.

La letra ʐ sirve para escribir **xna** “rojo”, **xil** “ala”, **xa'** “mi padre”, etc.

Algunas letras no tienen el mismo sonido que en español. La letra z siempre es sonora (*que suena*) en contraste con la letra s que es sorda (*que no suena*), por ejemplo: **zoa'** “estoy” y **soa'** “estaré”, **za'a** “elote” y **sa'a** “andaré”, etc.

La letra l tiene dos formas: l y ɿ. La letra l se usa para escribir el sonido suave y ɿ para escribir el sonido fuerte. La letra l sirve para escribir **la** “nombre”, **li** “verdadero”, **le'** “tú”, etc. La ɿ sirve para escribir **la** “caliente”, **li** “derecho”, **le'** “él”, etc.

La letra **n**, que es suave, contrasta con la doble **nn** que es fuerte como en las palabras **na'** “allí, eso” y **nna** “dirá”, **bene'** “hizo” y **benne'** “dio, persona”, etc.

Los sonidos del español “ca”, “que” y “qui” en zapoteco se escriben “ka”, “ke” y “ki”, y “gue” y “gui” se escriben “ge” y “gi”; y “ge” y “gi” se escriben “je” y “ji”, tal como se escribe el zapoteco en los libros escolares. Para las letras “v” y “z” en palabras tomadas del español se usan “b” y “s”. Los sonidos “ci” y “ce” en palabras tomadas del español se escriben “si” y “se”.

## Índice

MATÍO .....	1
MARKOS .....	65
LUKAS.....	105
ZWA.....	171
HECHOS .....	219
ROMANOS .....	284
1 CORINTIOS .....	312
2 CORINTIOS.....	338
GÁLATAS.....	354
EFESIOS .....	364
FILIPENSES.....	373
COLOSENSES.....	379
1 TESALONISENSES .....	386
2 TESALONISENSES .....	392
1 TIMOTEO.....	395
2 TIMOTEO.....	403
TITO .....	408
FILEMÓN .....	412
HEBREOS.....	414
ŽEDW.....	433
1 BEDW .....	440
2 BEDW .....	448
1 ZWA.....	453
2 ZWA.....	459
3 ZWA.....	460
JUDAS .....	462
APOKALIPSIS.....	465



# DIŽA' CHAWE' DA' BZOJ MATÍO

---

**Xa xna' gole wdé ka' che Jesús**  
(Lk. 3:23-38)

- 1** Zzoja' le'e yiche ni lagak xa  
xna' gole wdé ka' che Jesús,  
Benne' Criston', Bennen' nake' za'só  
Dabí, na' lezka' za'só Bran, benne'  
ka' wnníta'gake' ža ni'te.
- 2** Bran na' goke' xa Isak.  
Isak na' goke' xa Jakob.  
Jakob na' goke' xagak Judá len  
benne' biche'e ka'.
- 3** Judá na' goke' xagak Fares len  
Sara. Tamar goke' xna'gak  
chope' ki.  
Fares na' goke' xa Esrom.  
Esrom na' goke' xa Aram.
- 4** Aram na' goke' xa Aminadab.  
Aminadab na' goke' xa Nasón.  
Nasón na' goke' xa Salmón.
- 5** Salmón na' goke' xa Bos, na'  
Rahab goke' xne'e.  
Bos na' goke' xa Obed, na' Rut  
goke' xne'e.  
Obed na' goke' xa Isaí.
- 6** Isaí na' goke' xa Dabí.  
Dabín' wnná bi'e benách Israel ka',  
na' bchag ná'lene' no'len' zga'ale  
goke' zo'le Urías. Dabín' len no'len'  
gókgake' xa xna' Salomón.
- 7** Salomón na' goke' xa Roboam.  
Roboam na' goke' xa Abías.

- Abías na' goke' xa Asa.  
**8** Asa na' goke' xa Josafat.  
Josafat na' goke' xa Joram.  
Joram na' goke' xa Usías.  
**9** Usías na' goke' xa Jotam.  
Jotam na' goke' xa Akás.  
Akás na' goke' xa Esekías.  
**10** Esekías na' goke' xa Manasés.  
Manasés na' goke' xa Amón.  
Amón na' goke' xa Josías.  
**11** Josías na' goke' xagak Jekonías  
len benne' biche'e ka'.  
Benne' ki wnníta'gake' ža na' katen'  
benne' Babilonia ka' bché'gake'  
benne' Israel ka' zej nžeje' gan nbab  
Babilonia na'.
- 12** Jekonías na' goke' xa Salatiel.  
Salatiel na' goke' xa Sorobabel.
- 13** Sorobabel na' goke' xa Abiud.  
Abiud na' goke' xa Eliakim.  
Eliakim na' goke' xa Asor.
- 14** Asor na' goke' xa Sadok.  
Sadok na' goke' xa Akim.  
Akim na' goke' xa Eliud.
- 15** Eliud na' goke' xa Eleasar.  
Eleasar na' goke' xa Matán.  
Matán na' goke' xa Jakob.
- 16** Jakob na' goke' xa Jwsé.  
Jwsén' goke' benne' byo che Lia. Lian'  
goke' xna' Jesús, Benne' Criston',  
Bennen' žxen láže'gak benne' judío  
ka' le'e nich nna bi'e légake'.

<sup>17</sup>Ki goken, gokgak xda' kwe' zi'n sógake' kate' wzó law wzóá Bran, na'zejte wzóá Dabí. Lezka' gokgak yexdá' kwe' zi'n sógake' kate' wzó law wzóá Dabín', na'zejte bche'gak benne' Babilonia ka' benne' Israel ka'zej nžeje'. Lezka' gokgak yexdá' kwe' zi'n sógake' kate' wzó law bché'gake' légake', na'zejte ža bla' Benne' Criston'.

**Da' goken katen' bla' Jesús, Benne'  
Cristo**

(Lk. 2:1-7)

<sup>18</sup>Ki goken kate' bla' Jesús, Benne' Criston'. Katen' ba bchebe laže' Lia, xna' Jesús, Benne' Criston', wchág ná'lene' Jwsé, na' kate' bi na' wchág ná'lene'-be', wyó'o to bi'do' le'be'. Ki goken ni'a che yela' wak che Dios Be' La'y. <sup>19</sup>Nak Jwsén', benne' byo che Lian', benne' chawé', san bi gónele' yesbage'e-be' zia lawgak benách ka'. Gónele' wsane'-be' ži žize. <sup>20</sup>Kate' ne zza' laže' Jwsén' kan gone', bla' law to wbás che ya'abá lo bichgale gan de Jwsén', na' goče' le':

—Jwsé, za'só Dabí. Bi žebo' si'o Lian', nich gakbe' zo'lo', dan' bi' byodon' za' galjbe', yo'obe' le'be' ni'a che yela' wak che Dios Be' La'y. <sup>21</sup>Galj to bi' byodo' chebe', na' go'o labe' Jesús, dan' yeslabe' benách chebe' ka' lo dola' da'zej nbage'e.

<sup>22</sup>Ki goken, bžin dan' wnná Xanžo Dios lo na' benne' bchalje' lo wlaze' Le', katen' wnné':

<sup>23</sup>Le wia nga, to xkwide' no'le, wa'be' bi'do' le'be', na' galj to bi' byodo', na' wégake' labe' Emanuel.

Emanuel naken to diža' hebreo dan' znnan: "Zoalen Dios žo'o."

<sup>24</sup>Kate' bebán Jwsé lo bichgalen', bene' kan gož wbás che ya'abán' le', na' wzi'e Lian', na' gokbe' zo'le'. <sup>25</sup>Bi wzóalene'-be' na'zejte golj bi' byodo' chebe', bi' nežw chebe', na' bzóagake' labe' Jesús.

**Benne' žejn'i'il ka' zedjwíagake'  
xkwide' Jesús**

**2** Kate' golj Jesusen' lo yež Belén, yežen' nbaben Judea, znna bia' Herodes ga na'. Kate' ža na' bžingak benne' žejn'i'il ka' lo yež Jerusalén, benne' ka'zej nžoje' to yež zi'to' da'žen' zaka' gan zla' wbíž. <sup>2</sup>Wnnabgak benne' ka', na' wnnágake':

—¿Gazen' zoa xkwiden' žala' nna bia'be' benne' judío ka', xkwiden' za' goljbe'? Katen' wzoato' gan zla' wbíž ble'elo' belj baní' da'nak bian' ba goljbe'. Za'to' nga nich wká'n zento'-be'.

<sup>3</sup>Kate' Herodes, bennen' znna bi'e, benle' da'ni, gok zedle'. Lezca' gok zédgekle yógo'te benne' ka' wnnítá'gake' yež Jerusalén. <sup>4</sup>Naž Herodes na' bliže' yógo'te bxoz wnná bia' ka' len benne' yodo' wsedle ka', na' wnnable' légake' gaze žala' galj Benne' Criston', Bennen' žxen láže'gak benne' judío ka' le'e nich nna bi'e légake'.

<sup>5</sup>Góžgake' le':

—Lo yež Belén, da'nbaben Judea. Ki naken dan' bzoj to benne' bchalje' lo wláz Dios da'znnan ki:

<sup>6</sup>Yež Belén, da'nbaben Judá, bi nakžen ka'ze law Dios, kazej nak yež blo ka'zej nnitan' yežlyó nga,

dan' lo yež Belén na' galj to  
Benne' gake' blo,  
Bennen' gape chi'e benách chia'  
ka', benne' Israel ka'.

<sup>7</sup>Naž Herodes na' bliže' benne'  
žejn'i'l ka' ſi žize, na' wnnable'  
légake' nich nnezele' binlo gáka'te  
ba gok katen' bla' law beljen' da'  
blé'egekle'. <sup>8</sup>Naž bſele'e légake'  
chjake' lo yež Belén. Gože' légake':  
—Le chej ga na', na' le chejnnáb  
binlo kan nak che xkwiden.

Kate' ba bežél-lele-be', le da nich  
wloé'elete neda', nich lezka' cha'a  
neda', chejká'n zena'-be'.

<sup>9</sup>Wdé béngekle benne' žejn'i'l  
ka' dan' wnná Herodes na', jake' ga  
na', na' beljen' da' blé'egekle' katen'  
wnníta'gake' lážgake', wyejen  
láwlegake', na' bejsóan ža'le gan  
de xkwiden'. <sup>10</sup>Kate' blé'egekle'  
beljen', bebéle'egekle'. <sup>11</sup>Kate'  
wyó'ogake' lo yo'on', blé'egekle'  
bi' byodon', zóal'enbe' Lia, xna'be'.  
Naž bzoa zíbgake' lawle gan debe',  
na' bka'n zéngake'-be'. Wdé na'  
bsáljwgake' kakdo' ka' chégake', na'  
bnézjwgake'-be' oro, na' yale, na'  
neždo' da' zla' zix che yag mirra.  
<sup>12</sup>Dan' ba bzejn'i'l Dios légake' lo  
bichgale nich bi yeyéjgake' gan  
zoa Herodes na', che len beyéjgake'  
lážgake' nez yoble.

### Jwsé len Lia želchi'e xkwide' Jesús lo yežlyó Egípto

<sup>13</sup>Wdé beza'gak benne' žejn'i'l  
ka' ga na', naž bla' law to wbás che  
ya'abá lo bichgale gan ztas Jwsé, na'  
gože' le:

—Wyase. Bche' xkwiden' len  
xna'be', na' bzonnj nga. Wyéj lo  
yežlyó Egípto. Ga'no' ga na' kate'

yapža' neda' le' yetó. Ki gono' dan'  
yeyílj Herodes xkwide' ni nich  
gote'-be'.

<sup>14</sup>Naž wyase Jwsén', kate' ne  
nak žel, na' bchi'e xkwiden len  
xna'be', na' jake' lo yežlyó Egípto.  
<sup>15</sup>Bgá'ngake' ga na' na' zejtje got  
Herodes na'. Ka' goken, bžin da'  
wnná Xanžo Dios lo na' benne'  
bchalje' lo wlaze' Lé, katen' wnné':  
“Lo yežlyó Egípto bliža' Zí'na.”

### Herodes žſele'e benne' ka' nich gótgake' xkwide' ka'

<sup>16</sup>Kate' gókbe'ele Herodes bi  
bengak benne' žejn'i'l ka' kan gože'  
légake', naž bže'e, na' bſele'e benne'  
ka' chjake' ga na' nich gótgake'  
yógo'te bi' byodo' ka' nníta'gakbe'  
lo yež Belén, na' do zente gan že'  
Belén na', xkwide' ka' ba žóngakbe'  
chopiz, len bi'do' ka' zej nžé'nžebé'.  
Ki ben Herodes na' kan bsaka'  
yenne'e, kan gok ža katen' bla' law  
beljen', ža na' bzejn'i'igekle benne'  
žejn'i'l ka' le'. <sup>17</sup>Ka' goken, bžin da'  
wnná Jeremías, bennen' bchalje' lo  
wláz Dios ža ni'te, katen' wnné':

<sup>18</sup>Lo yež Ramá žéngekle chi'igak  
benne' ka' zbéžegake', na' zbeže  
nyáche'gake'.

Rakel zbeže' ni'a chegak za'sóe'  
ka'.

Bi gak no benne' gon zene' le',  
dan' zej natbe'.

<sup>19</sup>Wdé got Herodes na', naž bla'  
law wbás che ya'abán' lo bichgale  
gan zoa Jwsén' lo yežlyó Egípto,  
<sup>20</sup>na' gože' le:

—Wyase. Beché' bi' byodon' len  
xna'be', na' beyéj gan nbab Israel,  
dan' ba gotgak benne' ka' gónegekle'  
gótgake' bi' byodo' ni.

**2<sup>1</sup>** Naž wyase Jwsén', na' bechi'e bi' byodon' len xna'be', na' beyéjgake' gan nbab Israel. **2<sup>2</sup>** Benle Jwsén' znna bia' Arkelao gan nbab Judea dan' ba got Herodes na', xa Arkelaon'. Che len bžebe Jwsén' yeyeje' ga na'. Kate' bzejn' il Dios le' lo bichgale, wyeje' gan nbab Galilea. **2<sup>3</sup>** Kate' bžine' ga na', bejsóe' lo yež Nasaret. Ki goken, bžin da' bzojgak benne' ka' bcháljgake' lo wláz Dios že na' te kan žala' gak che Jesusen', nnagak benách ka' nake' Benne' Nasaret.

**Zwa, bennen' bezóe' benách ka' nis,  
zchalje' lo latje dach**

(Mr. 1:1-8; Lk. 3:1-9, 15-17; Jn. 1:19-28)

**3** Kate' ža ka' bla' law Zwa, bennen' bezóe' benách ka' nis, na' bchalje' lo latje dach gan nbab Judea. **2<sup>4</sup>** Zwan' wnné':

—Le yeyát laže', dan' za' žin ža kate' Dios, Bennen' zoe' ya'abá chie', yedjnná bi'e lo yežlyó nga.

**3** Kan nak che Zwan', bzoj Isaías, bennen' bchalje' lo wláz Dios že na' te, da' znnan ki:

Ženl chi'i to benne' zbéžeyi'e  
zižje lo latje dach, znne':  
“Le gon chawe' nez nich la'  
Xanžon' gan zoale.

Le yebéj li nez las gan tie!”

**4** Gokw Zwan' laže' da' nžaben len yicha' bia ka', na' nžeje li'e to bayw yid. Žawé' biche' zo ka', na' že'je' china' bezdo. **5** Benne' Jerusalén ka' len benne' ka' zej nžoje' dot gan nbab Judea, na' dot kwit gan zde yego Jordán, blá'gake' gan zoa Zwan'. **6** Kate' bexóalapagake' dola' da' zej nbage'e, Zwan' bezóe' légake' nis lo yego Jordán na'.

**7** Kate' Zwan' ble'ele' benne' zan ka', benne' yodo' fariseo ka' len benne' yodo' saduseo ka', želžine' gan zoe' nich yezóagake' nis, gože' légake':

—Le'e, lježgak bele snia ka'. **8** Zoa no benne' bzejni'ile' le'e wzonnje dan' za' chog Dios chegak benách ka' gátgake'? **8** Le gon da' gak bia' ba beyát láže'le. **9** Bi kwek yichjle, bi nnale nakle chawe' dan' nakle za'só Bran, dan' žapa' le'e, wak gon Dios ga yeyakgak yej ki za'só Bran na'. **10** Ba zbez ya wage nich chogen yag ka', dan' zloe'elen kan gak chele. Yógo'te yag ka' da' bi želbían da' zej naken zix, chóggaken, na' chéygaken. **11** Da' li neda' žezóa' le'e nis lo nis, nôlele ba beyát láže'le, san Bennen' za' ze'e kate' te chia' neda', Le' gone' da' zloé'ezele yela' žezúa nis ni, dan' wchize' le'e Dios Be' La'y, len yi' chie'. Bennen' nakže' blo ka neda', na' neda' bi naka' zi kweja' ūzele'. **12** Noxe' da' žzenle' yi', na' wlobe' zoa' stribé chie'. Yezí'e zoa' stribé chien' lo yo'o gan gape chi'en, san wzeye' beb chen lo yi', na' yin' bi yeyolen.

**Jesús žezóe' nis**

(Mr. 1:9-11; Lk. 3:21-22)

**13** Naž bezá' Jesusen' gan nbab Galilea, na' bžine' zoa'a yego Jordán gan zoa Zwa, nich yezóe' nis lo na' Zwan'. **14** Zwan' gónele' wsejwe' xneze', na' gože' Jesusen':

—Neda' žala' yezóá' nis lo no'o Le'. **15** Znnabkzlo' neda' yezóá' Le' nis?

**15** Bechebe Jesusen', na' gože' le':

—Be' latje na'a, dan' ki žala' gonžo dot da' naken chawe' law Dios.

Naž Zwan' bene' kan wnná

Jesusen'. **16** Kate' ba bezóá Jesusen'

nis, la' bežojtie' lo nis. Naž wyaljw ya'abá láwe'le gan zoe', na' bla' law žetj Dios Be' La'y. Bžine' gan zoe', znne'e ka to plomdo'. <sup>17</sup>Naž benle chi'i Benne' zchalje' ya'abá che Dios, na' wnné':

—Benne' ni nake' Zi'na'. Nži'ilá Le', na' žaz laža'a Le'.

### Žénele da' xiwe' gonen ga baga' Jesús dola'

(Mr. 1:12-13; Lk. 4:1-13)

**4** Naž Dios Be' La'y la' bche'tie' Jesusen' lo latje dach nich gata' latje si' bia' da' xiwe' Le'.

<sup>2</sup>Choplalj ža choplalj yele bi be bdaw Jesusen'. Wdé na' zdone'. <sup>3</sup>Naž bla' da' xiwen' gan zoa Jesusen', dan' žonen ga bága'gak benách ka' dola', na' gožen Jesusen':

—Cha' nako' Le' Zi'n Dios, gož yej ki yeyákgaken yet xtil.

<sup>4</sup>Bechebe Jesusen', na' gožen':

—Nyejw le'e yiche la'y da' znnan: "Kégeze yet xtil zbánłengak benách ka', san lezka' len yógo'te xtiža' Dios žak bángake."

<sup>5</sup>Naž bche' da' xiwen' Jesusen' lo yež la'y Jerusalén, gan bžian Le' yichjo'o yodo' gan nak sibe. <sup>6</sup>Naž da' xiwen' gožen Le', na' wnnán:

—Cha' nako' Le' Zi'n Dios, bexite' žé'lele, dan' nyejw le'e yiche la'y da' znnan:

Dios sele'e wbás che ya'abá ka' nich gape chí'igake' Le', na' góxwgake' Le' len ná'gake', nich bi chejchego' yej, na' bi gono' zi' ni'o.

<sup>7</sup>Bechebe Jesusen', na' gožen':

—Yetó da' nyejw le'e yiche la'y žen' benách ka', dan' znnan: "Bi nna bi'o Xano' Dios."

<sup>8</sup>Naž da' xiwen' bchen' Jesusen' gan nak to law ya'a sibe, gan bloe'elen Le' yógo'te yež ka' jež nnitan' yežlyó nga len yógo'te yela' wnni'a chégaken. <sup>9</sup>Naž gožen Le':

—Yógo'te da' ki gonna' chio' cha' wzóa zibo' xni'a, na' gapo' neda' ba la'ne.

<sup>10</sup>Jesusen' gožen':

—Beyéj, da' xiwe', dan' nyejw le'e yiche la'y da' žen' neto', dan' znnan: "Xano' Dios wká'n zeno', na' toze xchine' Le' gono'!"

<sup>11</sup>Naž bezá' da' xiwen' gan zoa Jesusen'. Naž bla'gak wbás che ya'abá ka' gan zoe' nich gákłengake' Le', na' bnéžjwgake' da' bdawe'.

### Zzo law Jesús zzie' xtiže'e gan nbab Galilea

(Mr. 1:14-15; Lk. 4:14-15)

<sup>12</sup>Kate' benle Jesusen' nyejw Zwan' liž ya, wyeje' gan nbab Galilea.

<sup>13</sup>Bezé'e lo yež Nasaret, na' bejsóe' lo yež Kapernaum gan naken žoa'a nisdo', lo bza' gan nbab Sabulón, na' gan nbab Neftalí. <sup>14</sup>Ki goken, bžin da' wnná Isaías, bennen' bchajle' lo wláz Dios ža ni'te, katen' wnné':

<sup>15</sup>Gan nbab Sabulón, na' gan nbab Neftalí,

lo nez žoa'a nisdo' gan zoa yechelá'a yego Jordán zaka' gan zla' wbíž, gan nbab Galilea, gan jež nnita' benách ka' bi jež nake' benne' judío ka'.

<sup>16</sup>Benách ka' jež nchol yichj lázdo'gake', benne' nnítá'gake' ga na', blé'egekle' baní', na' benne' ka' jež nake' ka benne' gat ka', bla' baní' chégake'.

<sup>17</sup>Katen' wzó law Jesusen' zzie' xtiže'e, gože' benne' ka':

—Le yeýát laže', dan' za' la' Dios,  
Bennen' ze'e ya'abá chie', na' nna  
bi'e lo yežlyó nga.

**Jesús žliže' tape benne' nich  
gónlengake' Le' tzen**  
(Mr. 1:16-20; Lk. 5:1-11)

<sup>18</sup>Kate' wdé Jesusen' žoa'a nisdo'  
che gan nbab Galilea, błe'ele' chope  
benne'. Toen' lie' Smon, bennen'  
lezka' lie' Bedw. Ndres, benne' biche'  
Bedon', žónlene' le' tzen. Žoptie'  
zzál'agake' yixjw bel chégake' lo  
nisdon', dan'zej nake' benne' wzén  
bel ka'. <sup>19</sup>Jesusen' gože' légake':

—Le gonlen neda' tzen, na' gona'  
ga yedjwa'le benách ka' nich  
gákake' chia' neda', gonle kan  
žonle kate' zzenle bel ka'.

<sup>20</sup>Žoptie' la' bká'ntegake' yixjw bel  
ka' chégake', na' jáklene' Jesusen'.

<sup>21</sup>Kate' Jesusen' wdíe' yelate' na'le,  
ble'ele' yechope benne' ka'. Toen'  
lie' Jakob, na' Zwa, benne' biche'e  
žónlene' le' tzen. Zej nake' zi'n  
Sebedeo. Yóogake' lo barkw, gan  
žónlengake' Sebedeo, xágake', tzen,  
na' zeyágake' yixjw bel chégake'  
ka'. Naž Jesusen' bliže' žoptie'  
nich gónlengake' Le' tzen. <sup>22</sup>La'  
belka'ntie' barkwn', len xágaken', na'  
jáklene' Jesusen'.

**Jesús žsedle' benne' zan**  
(Lk. 6:17-19)

<sup>23</sup>Wdé Jesusen' dot gan nbab  
Galilea, gan bsedle' benách ka' gan  
nak lo yo'o ka' gan zdobgak benne'  
judío ka' nich yéngakle' xtiža' Dios.  
Bchalje' diža' chawen' ga na' kan  
za' yedjnná bia' Dios lo yežlyó nga,  
na' beyone' yógo'te benne' yižwé'  
ka' kanzej nak yižwé' ka' chégake'.

<sup>24</sup>Wzé diža' che yela' wak che  
Jesusen', na' béngekle benách ka'  
dot gan nbab Siria. Bedjwágake'  
yógo'te benne' ka'zej de'e da' zan  
yižwé' ka', na' želzáka'li'e, nich  
wnnítal'gake' benne' we' ka' xni'a  
Jesusen'. Zá'gake'zej noe'e benne' ka'  
ga na', benne' ka' yóogake' be' xiwe'  
ka', len benne' ka'zej de'e chon, na'  
benne' ka' bi žak sá'gake'. Jesusen'  
beyone' yógo'te benne' ka'. <sup>25</sup>Benne'  
zan žjáklene' Jesusen', benne' ka'zej  
nžoje' gan nbab Galilea, len benne'  
ka'zej nbabe' yež Dekápolis ka', na'  
benne' ka'zej nbabe' yež Jerusalén,  
na' gan nbab Judea, na' benne' yež  
ka'zej nnitan' yechelá'a yego Jordán  
zaka' gan zla' wbíž.

**Da' bchalj Jesús law ya'ado'**  
(Lk. 6:20-23)

**5** Kate' ble'el Jesusen' benne' zan  
zá'lengake' Le', wžene' to law  
ya'ado' gan nak sibe, na' law ya'adon'  
wži'e. Naž bdobgak benne' wsedle'  
chie' ka' gan zoe'. <sup>2</sup>Wzó lawe' žsedle'  
légake', na' wnné':

<sup>3</sup>—Ba nez zen naken chegak  
benne' ka' žákbe'gekle' želyáz'jele'  
da'zej naken che Dios, dan' de latje  
chégake' gan znna bia' Dios, Bennen'  
zoe' ya'abá chie'.

<sup>4</sup>'Ba nez zen naken chegak benne'  
ka' žak nyache' láže'gake' dan'zej  
nbage'e dola', dan' Dios na'kze gon  
zene' légake'.

<sup>5</sup>'Ba nez zen naken chegak benne'  
ka'zej nake' gaxjw laže' law Dios,  
dan' gata' yežlyó nga chégake'.

<sup>6</sup>'Ba nez zen naken chegak benne'  
ka' zdan láže'gake' da' naken chawé'  
law Dios, na' žékgekle' ni'a chen  
kan žékgekle benne' ka' želdone', na'

želbile' nis, dan' gon Dios ga sí'gake' dan' zdan láže'gake'.

<sup>7</sup>'Ba nez zen naken chegak benne' ka' žeyache' láže'gekle' ljéžgake' ka', dan' Dios yeyache' láže'le' légake'.

<sup>8</sup>'Ba nez zen naken chegak benne' ka' nak chawe' yichj lázdo'gake', na' bi be da' zia zej nbage'e, dan' lé'gekle' Dios.

<sup>9</sup>'Ba nez zen naken chegak benne' ka' zzoa žígake' diža' bizjw, dan' si' lágake' zi'n Dios.

<sup>10</sup>'Ba nez zen naken chegak benne' ka' ūsaka' zi'gak benách ka' légake' dan' žóngake' da' nak chawe', dan' de latje chégake' gan znna bia' Dios, Bennen' zoe' ya'abá chie'.

<sup>11</sup>'Ba nez zen gaken chele le'e kate' wlíž zi'gak benách ka' le'e, na' kwia láže'gake' le'e, na' lo yela' wen láže' chégake' nnégake' chele dan' žónlenle neda' tzen. <sup>12</sup>Le yebél, na' le chaž láže', dan' gak da' cháwe'le'e chele kate' žinle ya'abá che Dios. Kan žaken chele, lezka' goken chegak benne' ka' bcháljgake' lo wláz Dios, benne' ka' wnnít'a'gake' zgá'alegake' ka le'e, dan' lezka' wzía láže'gak benách ka' légake'.

### Benách ka' che Jesús nákgake' ka zede', na' ka baní'

(Mr. 9:50; Lk. 14:34-35)

<sup>13</sup>Lezka' wnná Jesusen':

—Le'e nakle ka zede' lo yežlyó nga, san cha' wnít zeden' yela' sna'a chen, bi gak yeyonžon sna'a. Biž bi zakan', san ba naken da' cho'nžon, na' benách ka' wléjaken'.

<sup>14</sup>'Le'e nakle ka baní' lo yežlyó nga nich wloé'elele law da' nakle che Dios. Gakle ka to yež da' žen' to law ya'a, dan' bi gak gache'

yežen'. <sup>15</sup>Kate' wzaljžo yi', bi zkáche'žon zan kak, san zzoažon sibe nich wza'nín' yógo'te benne' ka' nnít'a'gake' lo yo'on'. <sup>16</sup>Kan nak baní', lezka' gakle le'e, dan' gonle ga gak bia' da' nakle láwlegak yógo'te benách ka', nich kate' lé'gekle' da' nak chawe' da' žonle, naž wkán zéngake' Xale Dios, Bennen' zoe' ya'abá.

### Žsedle Jesús che da' wnná Dios lo na' Moisés

<sup>17</sup>Lezka' wnná Jesusen':

—Bi géklele bla'a neda' nich yeká'a da' ka' wnná Moisés o da' ka' bsédekle benne' ka' bcháljgake' lo wláz Dios. Bla'a neda', kege nich yeká'a da' ka', san bla'a nich gona' dot da'zejlasgak da' ka'. <sup>18</sup>Da' li žapa' le'e. Kate' ne de ya'abá, na' yežlyó nga, bi te ka'ze nitó diža'do', na' nitó da' wnná Dios kate' gakže yógo'te da' wnné' žala' gaken. <sup>19</sup>Che len, nóteteze benne' wka'ne' ca'ze to da' do'ze da' znna dižan', na' cha' wsedle' benne' ka' góngake' ki, benne' ni ga'nže' ka'ze ka yógo'te benne' ka' nnít'a'gake' gan znna bia' Dios, Bennen' zoe' ya'abá chie', san bennen' gone' kan nak da' znna dižan', na' cha' wsedle' benne' ka' góngake' ki, benne' ni gakže' benne' blo gan znna bia' Dios, Bennen' zoe' ya'abá chien'.

<sup>20</sup>Lezka' žapa' le'e: cha' bi gonle da' nakže chawe' ka da' žongak benne' yodo' wsedle ka', len ka žongak benne' yodo' fariseo ka', batkle cho'ole gan znna bia' Dios ya'abá chien'.

### Žsedle Jesús kan nak che no benne' žže'le'jež'e

(Lk. 12:57-59)

<sup>21</sup>Lezka' wnná Jesusen':

—Ba bénlele kan wnnagak benne' wnná bia' ka' katen' góžgake' xa xto'le ka', na' wnnágake': “Bi gotle benách ka'. No benne' nake' wet benne' ka', nbage'e zia, na' chog Dios chie' gate.”<sup>22</sup> Na'a, neda' žapa' le'e: no benne' zže'e lježe' nbage'e zia, na' chog Dios chie' gate'. Lezka' no benne' znnie' che lježe' nbage'e zia, na' chog benne' yolawe' chie' sake'e. Lezka' no benne' nnie' che lježe', na' nne': “Bia bi be nnezlba” nbage'e zia, na' wak chog Dios chie' chejchoé'e lo yí gabíl.

<sup>23</sup> Ki naken, cha' le' zoa ko'o lo bkog la'y bi da' wnežjo' law Dios nich yenít lawe' le', na' cha' chejsá' lažo' ga na' zoa biz chen zža'a lježo' le',<sup>24</sup> bka'n dan' no'o na'ze, na' beyéj ližo'. Zga'ale bejká'n chawé' da' beno' che lježo' nich yenít lawe' le'. Naž da, wnežjo' dan' no'o.

<sup>25</sup> Cha' zoa no benne' yennable' le' bi da' zbago'o chie', na' chie' le' gan wchi'a laže' no benne' le'e, begán' chawé' len bennen' kate' ne yo'ole nez, nich bi wdíe' le' lo na' bennen' wchi'a laže'e le', na' bennen' wdíe' le' lo na' benne' žejwe' liž ya, na' le' wsejwe' le' liž yan'.<sup>26</sup> Da' li žapa' le', bi yežojo' ga na' na' zejte chizjo' dot da' nbago'o chie'.

### Žsedle Jesús che da' zka'n ka'ze yela' zchag na'

<sup>27</sup> Lezka' wnná Jesusen':

—Ba bénlele kan wnnágake': “Bi gono' dola' da' zka'n ditjen yela' zchag na'.”<sup>28</sup> Na'a, neda' žapa' le'e: nóté teze benne' zwie' to no'le lo yela' zdan laže' da' sban, ba benlene' le' dola' lo yichj lázda'we'.

<sup>29</sup> Che len, cha' yej lawo' li ža gonen ga gono' dola', wlejen, na'

wžo'nen. Gakže chawé' chio' wnito' to yej lawo', na' kege dotio' chazen lo yí gabíl.<sup>30</sup> Cha' no'o li ža gonen ga gono' dola', bchogen, na' wžo'nen. Gakže chawé' chio' wnito' to no'o, na' kege dotio' chazen lo yí gabíl.

### Žsedle Jesús kan nak che no benne' žežo'ne' zo'le'

(Mt. 19:9; Mr. 10:11-12; Lk. 16:18)

<sup>31</sup> Lezka' wnná Jesusen':

—Lezka' wnnágake': “Nóté teze benne' žénele' yežo'ne' zo'le', žala' wnežjwe' to yiche chie' da' znnan žežo'ne' le'.”<sup>32</sup> Na'a, neda' žapa' le'e, cha' zoa no benne' žežo'ne' zo'le', na' bi znnna' bi da' žon no'len', naž gon bennen' ga gon zo'len' dola' da' zka'n ditjen yela' zchag na' cha' wchág ná'lene' benne' byo yoble, na' benne' byon', bennen' si'e no'len', lezka' gone' dola' da' zka'n ditjen yela' zchag na'.

### Žsedle Jesús che no benne' gon choche' xtiže'e

<sup>33</sup> Lezka' wnná Jesusen':

—Lezka' bénlele kan wnnagak benne' wnná bia' ka' katen' góžgake' xa xto'le ka', na' wnnágake': “Bi gon lažo' kate' gon chocho' xtižo'o ni'a che Dios, san žala' gono' ni'a che Xanžo Dios dot dan' znnno' gono' katen' gon chocho' xtižo'o ni'a chie' Le'.”<sup>34</sup> Na'a, neda' žapa' le'e, bi gon chochle xtiža'le, bi gonlen ni'a che ya'abá che Dios, dan' naken gan že' znnna bia' Diosen'.<sup>35</sup> Cha' gon chochle xtiža'le, bi gonlen ni'a che yežlyó nga, dan' nak yežlyó nga gan Dios zzoe' ni'e, na' bi gonlen ni'a che yež Jerusalén, dan' naken laž Dios,

Benne' zente, Bennen' znna bi'e.

**36** Bi gon chocho' xtižo'o ni'a che yichjo', dan' bi gak gono' ga yeyák chich o gasj nitó yicha' yichjo'.

**37** Žala' nnázele: "o" o nnázele: "o'o" dan' nak che da' xiwe' da' zdetlen kan nak diža' ni.

### Žedle Jesúš kan nak che no benne' žezi'e wzón lježe'

(Lk. 6:29-30)

**38** Lezka' wnná Jesusen':

—Ba bénlele kan nak da' wnná

Moisés, katen' wnné': "No benne' bi da' žone' che yej law lježe', lezka' le yebí'i chie', na' no benne' bi da' žone' che laye' lježe', lezka' le yebí'i chie'."

**39** Na'a, neda' žapa' le'e: bi wži'ile che no benne' gone' le'e da' zia, na' cha' no benne' kape'e xago' li ža, be' latje kape'e yetó xago' yegle. **40** Cha' zoa no benne' gone' ga wchi'a laže' to benne' le', na' kweje' zo', lezka' bnežjw chie' laže' da' žxoa xkožo'o.

**41** Cha' no benne' nzi' lo ne'e gon byene' go'o ywa' chie' gachje hora, wyejlen bennen' dot to hora. **42** No benne' bi da' nnable' le', bnežjwn chie', na' no benne' bi da' nnable' le' xtido', bi yi'o-ne' bi be de.

### Žedle Jesúš žala' ži'ilžo no benne' bi de žo'o chawe'

(Lk. 6:27-28, 32-36)

**43** Lezka' wnná Jesusen':

—Lezka' bénlele dan' wnnágake': "Žala' ži'ilo' no benne' nži'ile' le', na' žala' žo'o no benne' bi de le' chawe'." **44** Neda' žapa' le'e, le ži'il benne' ka' bi jez de le'e chawe'. Le nnable Dios gon chawe'e benne' ka' žliž zí'gake' le'e. Le gon da' naken chawe' chegak benne' ka' zbia

láže'gake' le'e, na' le wchajlen Dios, nnáblele-ne' gon chawe'e benne'

ka' znnégake' chele, na' žóngake' le'e zia. **45** Cha' gonle ki, gakle le'e zí'n Xažo Dios, Bennen' zoe' ya'abá, dan' žone' Le' ga zza'ní' wbíz chie' gan zej nnita' benne' wen da' zinnj ka', na' gan zej nnita' benne' chawe' ka'. Žsel'e nis yejw chegak benne' chawe' ka', na' chegak benne' wen da' zinnj ka'. **46** Cha' nží'izelele benne' ka' nží'igekle' le'e, žon byenen no benne' wká'n žene' le'e? Lezka' žongak benne' ka' bi jez nake' chawe', benne' ka' zchížjwgake' benách ka' lo wláz yeži'to', dan' nží'igekle' ljéžgake' ka'. **47** Cha' žaple ba la'ne ljéžzele ka', žbize žonle da' nakže chawe'? Lezka' žongak benne' ka', benne' bi jez nónbi'e Dios.

**48** San le'e, le gak dot chawe', kan nak Xažo Dios, Bennen' zoe' ya'abá, nake' dot chawe'.

### Žedle Jesúš kan žala' gáklenžo benách ka'

**6** Lezka' wnná Jesusen': —Le we' laže' gak dot li laže' kan zka'n ženle Dios. Bi góñzele ki nich lé'gekle benách ka' kan žonle. Cha' ki góñzele, Xažo Dios, Bennen' zoe' ya'abá, bi be da' chawe' yebi'e chele. **2** Kate' bi da' wnežjo' che no benne' zoa bi da' žiážjele', bi wloe'elo' law dan' žono' kan žongak benne' ka', benne' zloé'ezele chawe' kwíngake' gan nak lo yo'o gan zdobgak benne' judío ka' nich yéngekle' xtiža' Dios, na' gan nak lawe' ya'a. Ki žóngake' nich gapgak benách ka' légake' ba la'ne. Da' li žapa' le'e, ka'ze nak yela' ba la'ne da' gatan' chégake'. **3** San le', kate'

bi da' wnežjo' che no benne' zoa  
 bi da' žiážjele', bi go'o nitó benne'  
 latje nnezlen'. <sup>4</sup>Na'a, dan' wnežjo',  
 ngáche'ze žala' wnežjon', na' Xažo  
 Dios, Bennen' zle'ele' dan' žono'  
 ngáche'ze, yebi'e chio'.

### Žsedle Jesús kan žala' wcháljenžo Dios

(Lk. 11:2-4)

<sup>5</sup>Lezka' wnná Jesusen':

—Kate' wcháljenle Dios, bi gonle  
 kan žongak benne' ka', benne'  
 zloé'ezele chawé' kwíngake', dan'  
 kate' žližgake' Dios zdan láže'gake'  
 zzégake' gan nak lo yo'o gan  
 zdobgak benne' judío ka' nich  
 yéngekle' xtiža' Dios, na' gan nak  
 lawe' ya'a, nich l'égekle benách ka'  
 légake'. Da' li žapa' le'e, ka'ze nak  
 yela' ba la'ne da' gatan' chégake'.

<sup>6</sup>San le'e, kate' wcháljenle Dios, le  
 cho'o ližle, na' le wsejw yo'o chele.  
 Le wlíž Dios, na' le wchajlen Xažo  
 Dios, Bennen' zóalene' le'e gan zoale  
 chézele, na' Xažo Dios, Bennen'  
 zle'ele' da' žonle ngáche'ze, Le'  
 yebi'e chele.

<sup>7</sup>'Katen' wcháljenle Dios bi  
 yeži'ile žop yonnze kan žongak  
 benne' ka', benne' bi zej nónbi'e  
 Dios, dan' žékgekle' wzé nag  
 Dios chégake' dan' žež'i'gake' žop  
 yonnze. <sup>8</sup>Bi gonle kan žóngake'  
 légake'. Xažo Dios, zga'ale kate'  
 bi da' nnáblele-ne', ba nnézkzele'  
 da' ka' žiážjelele. <sup>9</sup>Che len, žala'  
 wcháljenle Dios, na' nnale ki:

Xato' Dios, zo' ya'abá, ga'n zen  
 Lo'.

<sup>10</sup>Da, nna bi'o yežlyó nga.

Žénelto' gaken yežlyó nga kan  
 žaz lažo'o Le'

kan žaken ya'abá chio'.

<sup>11</sup>Benn da' gawto' na'a ža.

<sup>12</sup>Benít law cheto' da' zinnj da'  
 žonto',

kan ženít lawto' che no benne'  
 žone' cheto' da' zinnj.

<sup>13</sup>Bi go'o latje gon da' xiwe' ga  
 bága'to' dola',  
 san beslá neto' lo na' da' žonen,  
 dan' zej nak chio' dot yela' wnná  
 bia',  
 na' dot yela' wak, na' dot yela'  
 zen,  
 da' ka' náptezo'. Ka'kze gaken.

<sup>14</sup>Cha' yenít lawle chegak lježle ka',  
 benne' žóngake' le'e da' zinnj, lezka'  
 Xažo Dios, Bennen' zoe' ya'abá, yenít  
 lawe' chele le'e. <sup>15</sup>Cha' bi yenít law  
 chegak lježle ka', bi yenít law Xažo  
 Dios chele le'e dola' da' nbágale.

### Žsedle Jesús kan žala' gonžo wbás

<sup>16</sup>Lezka' wnná Jesusen':

—Kate' gonle wbás, bi gonle  
 nyache' lawle kan žongak benne' ka',  
 benne' zloé'ezele chawé' kwíngake',  
 dan' žóngake' nyache' láwgake' nich  
 l'égekle benách ka' žóngake' wbás.  
 Da' li žapa' le'e, ka'ze nak yela' ba  
 la'ne da' gatan' chégake'. <sup>17</sup>San le'e,  
 kate' gonle wbás, le wpá yichjle,  
 na' le chib lawle, <sup>18</sup>nich bi l'égekle  
 benách ka' žonle wbás. Ngáche'ze  
 žala' gonle wbás, na' Xažo Dios,  
 Bennen' zóalene' le'e gan zoale  
 chézele, yebi'e chele.

Ya'abá che Dios naken gan žala'

wtobžo da' zaka' chežo

(Lk. 12:33-34)

<sup>19</sup>Lezka' wnná Jesusen':

—Bi wtoble da' zaka' lo yežlyó nga,  
 gan beldo' chen wtébgakban', na'

žbia yin', na' gan cho'ogak benne' wbán ka', nich kwángaken'. <sup>20</sup>San le wtób da' zaka' chele ya'abá che Dios, gan bi galj beldo' chen, bia wtébgakban', na' bi cwia yin', na' gan bi gak cho'ogak benne' wbán ka', nich bi gak kwángaken'. <sup>21</sup>Gan de da' zaka' chele, we' láže'le žinle.

### **Da' zza'ní' lo yichj lázdo'žo**

(Lk. 11:34-36)

**22**Lezka' wnná Jesusen':

—Yej lawžo zej naken ka to da' zza'ní' lo yichj lázdo'žo. Che len, cha' yej lawle zej naken chawé', cho'o yichj lázdo'le da' naken baní'. <sup>23</sup>Cha' yej lawle bi zej naken chawé', yichj lázdo'le gaken chol. Che len, cha' baní' da' zóalenen le'e ba beyaken da' naken chol, ba nakl'e'e chol yichj lázdo'le.

### **Dios, na' mežw**

(Lk. 16:13)

**24**Lezka' wnná Jesusen':

—Bi gak no benne' gone' xchingak chope xane', dan' wzóe' chela'ale toen', na' yetóen' ū'ilé' le', o gá'nłene' toen', na' yetóen' kwej yichje' le'. Bi gak wká'n zenle Dios, na' mežw.

### **Dios žape chi'e benne' chie' ka'**

(Lk. 12:22-31)

**25**Lezka' wnná Jesusen':

—Lezka' žapa' le'e: bi kwe' zéidle ni'a che da' gawle o ni'a che da' ye'jle, da' ka' nbánlenle, o ni'a che laže' da' gákwle. Záka'le'eze yela' nban chele ka da' ye'j gawle, na' záka'že bela' žen chele ka laže' da' gákwlé. <sup>26</sup>Le wia kan žak chegak byínnedo' ka', bia zlágakba' ya'abá. Bi žázgakba', na' bi žel-lapba', na'

bi ztóbgakba' da' gape chí'igakba', san Xažo Dios, Bennen' zoe' ya'abá, zwawkze' légakba'. Záka'žeze le'e ka byínnedo' zan. <sup>27</sup>¿Noz benne' ládjwle le'e gak gone' ga soe' nbane' yetó chí'ido'ze dan' že' zedle' nich gak ki chie'?

<sup>28</sup>'¿Bíz chen' že' zéidle ni'a che da' gákwlé? Le wia nga kan želgole yéjedo' ka' že'gaken ladjw yixe'. Bi žóngaken žin, na' bi žóngaken do xlaže'. <sup>29</sup>Neda' žapa' le'e, Salomón, bennen' wnná bi'e, la'kze góta'le'e yela' wnná a chie', laže' da' gokwe' bi gokžen xtan ka žnna'gak yéjedo' ka'. <sup>30</sup>Dios na'kze žone' xtan yeje yíxe'do' ka', da' že'gaken ladjw yixe', na' zej žian na'a ža, na' wxé wiž chéygaken lo yi'. Žone' légaken xtanle'e. Cha' ki že' laže'ye yeje yíxe'do' ka', lezka' da' zenle'e gone' chele le'e, la'kze bi žeje'le chie' dot láže'le. <sup>31</sup>Che len, bi kwe' zéidle, na' bi nnale: "¿Bízkze gawto?" o "¿Bízkze ye'jto?" o "¿Bízkze gákwtó?" <sup>32</sup>Benne' ka' nníta'gake' yežlyó nga že' láže'gake' chegak yógo'te da' ki, san zoa Xažo Dios ya'abá, na' Le' nnézkzele' cha' žiážjelele bíte'zeze da' ki. <sup>33</sup>Na'a, le we' laže' nna bia' Dios le'e, na' le gon da' nak chawé' lawe' Le', na' Le' ko'e xnezle yógo'te da' ki da' žiážjelele.

<sup>34</sup>Che len, bi kwe' láže'le che da' gak wxé wiž, dan' gak kwe' láže'le wxé wiž che da' gaken chele ža na'. Tža tža žak da' ka' žala' kwe' láže'le chen ža na'.

### **Bi žala' chog bia'žo che lježžo**

(Lk. 6:37-38, 41-42)

**7** Lezka' wnná Jesusen':

—Bi chog bia'le chegak lježle ka', nich bi chog bia' Dios chele le'e,

<sup>2</sup>dan' chog bi'e chele le'e tlébeze kan zchog bia'le chegak lježle ka', na' kan zzixle che lježle ka' lezkan' gonkze Dios chele le'e. <sup>3</sup>¿Biz chen' zwio' bebdo' da' yo'on yej law lježo', na' bi zákbe'lo' to da' zenle'e yo'on yej lawo' le'? <sup>4</sup>¿Yi'o lježon': "Wleze, nich kweja' bebdon' da' yo'on yej lawo'" na' le', da' zenle'e yo'on yej lawo' le'? <sup>5</sup>Le', benne' zloé'ezele chawe' kwino'. Zga'ale wléj da' yo'on yej lawo' le', nich gak le'elo' binlo nich kwejo' bebdon' da' yo'on yej law lježon'.

<sup>6</sup>Bi cho'nle da' zej naken la'y nich gaw beko' ka' len, ka chéchjgakba', na' gáwy'a'agakba' le'e. Bi cho'nle da' záka'le'en chele nich gaw koch ka' len, ka wléj chóchjgakban'.

**Le nnab, na' le chilj, na' le wlíž ža yo'o**

(Lk. 11:9-13; 6:31)

<sup>7</sup>Lezka' wnná Jesusen':

—Le nnab, na' Dios gonnен' chele. Le chilj, na' gonne' latje žél-lelen. Le wlíž ža yo'o, na' le' wsaljwe' chele. <sup>8</sup>No benne' bi da' znabne', gatan' chie', na' benne' bi da' žilje', žel-len', na' benne' žiliže' ža yo'o, yaljwn chie'.

<sup>9</sup>Cha' zoa no benne' ládjwle le'e, zoa xkwide' chie', cha' nnablbe'-ne' yet xtil, čwnejzjwe' yej chebe'? <sup>10</sup>Cha' nnablbe'-ne' to bel, čwnejzjwe' bele snia chebe'? <sup>11</sup>le'e bi nakle chawe', san nnézlele wnézjwle da' naken chawe' chegak zi'nle ka'. Wak wxén láže'le Xale Dios, Bennen' zoe' ya'abá, gonne' da' naken chawe' chegak benne' ka' bi da' nnábgekle' Le'.

<sup>12</sup>'Che len, kan žénelele le'e gongak benne' ka' chele, lezka' le

gonte chégake'. Ki znna da' bchi'le Moisés ū'o, na' da' wnnagak benne' ka' bcháljgake' lo wláz Dios.

**To gan žala' težo ga nak to lyido'**

(Lk. 13:24)

<sup>13</sup>Lezka' wnná Jesusen':

—Le cho'o gan žo'ogak benách ka' ga nak to lyido. Laga' nak gan žo'ogak, na' nez zen naken da' žjaklen benne' ka' gan kwia yí'gake'. Žo'ogak benne' zan ga na'. <sup>14</sup>Lyido' nak gan žo'ogak, na' nez las naken da' žjaklen benne' ka' gan gata' yela' nban da' zejlí kanne chégake', na' babze benne' ka' žežélgeklen'.

**Da' žonžo nak bian' kan nakžo**

(Lk. 6:43-45)

<sup>15</sup>Lezka' wnná Jesusen':

—Le gape chi'i kwinle nich bi gon láže'gekle benne' wen láže' ka' le'e, benne' ka' znágake' zcháljgake' lo wláz Dios. la'gak benne' ka' gan zoale, benne' ca' wloé'l kwíngake' gaxjw láže'do' kan zej nak zíla'do' ka', san lo yichj láždo'gake' zej nake' ka beko' yixe' snia ka'. <sup>16</sup>Da' ka' žóngake' zej nak bian' kan zej nake'. Bi zchibžo da' zbia lba uba lo yag yeche', na' bi zchibžo da' zbia yag higo lo yixe' laye'. <sup>17</sup>Ki naken, yógo'te yag zix želbían da' zej naken zix, na' to yag yixe' zbian da' bi zej naken zix. <sup>18</sup>Yag zix na' bi gak kwian da' zej naken ka'ze, na' yag yixen' bi gak kwian da' zej naken zix. <sup>19</sup>Bíte'zeze yag da' bi zbian da' naken zix, chóggaken', na' wzéygaken' lo yi'. <sup>20</sup>Ki naken, da' ka' žongak benne' ka' zej nak bian' kan zej nake'.

**No benne' ka' bi gak chejnnít'a'gake' gan znna bia' Dios**

(Lk. 13:25-27)

<sup>21</sup>Lezka' wnná Jesusen':

—Benne' zan yé'gake' neda': “Xan, Xan” san kege yógo'tegake' cházgake' gan znnna bia' Dios ya'abá. Légakze benne' ka' žóngake' da' žénele Xažo Dios, Bennen' zoe' ya'abá, chejnnita'gake' ga na'. <sup>22</sup>Kate' žin že ze lawte že ka' che yežlyó nga, benne' zan yé'gake' neda', na' nnágake': “Xan, Xan, bcháljto' xtiža' Dios ni'a che lo' Le'. Bkonlto' žin lo' nich bebejto' be' xiwe' ka', na' bkonlto' žin lo' nich bento' da' zan yela' wak žen ka'!” <sup>23</sup>Naž neda' yapa' lémake': “Bi nónbi'a le'e. Le kwas ga zoa' ni, le'e, benne' wen da' zinnj ka'.”

### Chope kan nak gan gak chíxjwžo len yo'o

(Lk. 6:47-49; Mr. 1:22)

<sup>24</sup>Lezka' wnná Jesusen': —Lezka', no benne' ženle' xtiža'a ni, na' žone' kan znnan, nake' ka to benne' žejni'ile', benne' bene' liže' gan že' lo yej xe. <sup>25</sup>Kate' gok yéjwsio', bedób nis wbá'a, na' gok be', na' wdíb nisen' kwit yo'on', san bi wbixen, dan' žen' lo yej xe. <sup>26</sup>Na'a, no benne' ženle' xtiža'a ni, na' bi žone' kan znnan, benne' ni nake' ka to benne' bi žejni'ile', benne' bene' liže' lo yo yach. <sup>27</sup>Kate' gok yéjwsio', bedób nis wbá'a, na' gok be', na' wdíb nisen' kwit yo'on', na' wbixen, na' la' wbía yi'ten.

<sup>28</sup>Kate' beyóž Jesusen' bcháljlene' lémake' da' ni, bebán láže'gak benne' zan ka' kan nak da' žsedle', <sup>29</sup>dan' žsedle' lémake' kan žon to benne' nzi' lo ne'e yela' wnná bia', kege kan žongak benne' yodo' wsedle chégake' ka.

### Žeyák to benne' de'e yižwé' leže

(Mr. 1:40-45; Lk. 5:12-16)

**8** Kate' betj Jesusen' law ya'a na', benne' zan zjáklene' Le'. <sup>2</sup>To

benne' de'e yižwé' leže bžine' gan zoa Jesusen'. Bzoa zíbe' xni'e, na' gože' Le':

—Xan, cha' žénelo', wak yeyono' neda'.

<sup>3</sup>Naž Jesusen' la' blite ne'e, na' wdane' le'. Gože' le':

—Žénela!. Yeyako' chawé'.

La' benitte yižwé' che bennen'.

<sup>4</sup>Naž Jesusen' gože' le':

—Bwia nga, bi yi'o nitó benne' da' ni, san beyéj, bejloé'el kwino' law bxoz, na' bejnezjw dan' bchi'le Moisés le'e, dan' wloé'elen benách ka' ba beyako'.

### Jesús žeyone' bi' wen žin che to benne' Roma

(Lk. 7:1-10)

<sup>5</sup>Wyáz Jesusen' lo yež Kapernaum, na' bla' to benne' ga na', benne' zchi'e to gaywá' benne' ka' žjake' lo wdile. Bžine' gan zoa Jesusen', na' góta'yoele' Le', <sup>6</sup>na' wnné':

—Xan, zoa to bi' wen žin chia', debe' lo yo'o. Bi žak sa'be', na' zzáka'le'ebe'.

7Jesusen' gože' le':

—Sa'a neda', yeyona'-be'.

<sup>8</sup>Bechebe benne' wnná bian', na' gože' Jesusen':

—Xan, bi naka' neda' zi cho'o liža', san cha' nnazo', yeyák bi' wen žin chian'. <sup>9</sup>Lezka' neda', zoa to benne' znnna bi'e neda', na' zej nnita' benne' ka' žjake' lo wdile, benne' ka' znnna biá'gaka'-ne'. Kate' žapa'-ne' toe': “Wyéj ga na” žeje!. Kate' žapa'-ne' yetóe!: “Da ni” žide!. Kate' žapa' benne' wen žin chia': “Ben žin ni” la' žontie' žin na’.

<sup>10</sup>Kate' benle Jesusen' da' ni, bebanle', na' gože' benne' ka' žónlengake' Le' tzen, na' wnné':

—Da' li žapa' le'e, gan zej nnita' benne' Israel ka', bi na' chejxaka'a nitó benne' žejli'e chia' neda' kan žon benne' ni. <sup>11</sup> Lezka' žapa' le'e: žojgak benne' zan zaka' gan zla' wbíž, na' zaka' gan ženen, na' kwélengake' tzen Bran, na' Isaak, na' Jakob, gan znna bia' Dios ya'abá chie', <sup>12</sup> san benne' ka' ba wžekze Dios nich chejnnít'a'gake' gan znna bi'e Le', wsejwe' légake' na'le gan nak chol, gan kwéžegake', na' wxéj láye'gake' lo yela' nyache' laže' chégake'.

<sup>13</sup> Naž Jesusen' gože' bennen' zchi'e benne' ka' žjake' lo wdile, na' wnné':

—Beyéj ližo'. Kan žejli'o chia', ka' gaken chio'.

La' na'ze beyakte bi' wen žin chien'.

### Jesús žeyone' xna' zo'le Bedw

(Mr. 1:29-31; Lk. 4:38-39)

<sup>14</sup> Bžin Jesusen' liž Bedw, gan ble'ele' xna' zo'le Bedon' die' lo da'a, na' yoe'e da' la. <sup>15</sup> Jesusen' wdane' na' no'lén', na' la' bežojte da' la dan' yoe'e. Naž beyás no'lén', na' bsíni'e da' bdáwgake'.

### Jesús žeyone' benne' zan, benne' yižwé' ka'

(Mr. 1:32-34; Lk. 4:40-41)

<sup>16</sup> Kate' za' žale ža na', za'gak benne' ka' zej noe'e benne' zan gan zoa Jesusen', benne' yó'ogake' be' xiwe' ka', na' len yela' znneze chie' bebeje' be' xiwe' ka', na' beyone' yógo'te benne' yižwé' ka'. <sup>17</sup> Ki goken, bžin dan' wnná Isaías, benne' bchalje' lo wláz Dios ža ni'te, katen' wnné': "Le' beyone' da' ka' wzákalo', na' beké'e yižwé' ka' chežo."

Benne' ka', benne' žénegekle'  
gónlengake' Jesús tzen  
(Lk. 9:57-62)

<sup>18</sup> Kate' ble'el Jesusen' zej nnita' benne' zan ka' dot kwite', gože' benne' wsedle chie' ka' tégake' yechela'ale nisdo'. <sup>19</sup> To benne' yodo' wsedle bžine' gan zoa Jesusen', na' gože' Le':

—Benne' wsedle, gónlena' Le' tzen gáte'ze gan chejo'.

<sup>20</sup> Jesusen' gože' le':

—Beza' ka' zej de zan yej chégakba', na' byínnedo' ka', zej žia xó'ngakba', san neda', Benne' Golje' Benách, bi de gan chixjw yichja'.

<sup>21</sup> Yetó benne' wsedle che Jesusen' gože' Le':

—Xan, benn latje yeyá'a liža' na' zejte wkacha'a xa'.

<sup>22</sup> Jesusen' gože' le':

—Da len neda'. Be' latje benne' žátgake' wkáche'gake' ljéžgake' ka', benne' žátgake'.

### Jesús zzoa žie' be' wale da' žakle'en

(Mr. 4:35-41; Lk. 8:22-25)

<sup>23</sup> Wžén Jesusen' lo barkw, na' benne' wsedle chie' ka' žónlengake' Le' tzen. <sup>24</sup> Naž gok to be' wale lo nisdo', na' žasle'e nisdon', na' zejte žaz nis lo barkwn'. Jesusen' die' ztase' lo barkwn'. <sup>25</sup> Naž benne' wsedle chie' ka' wbíga'gake' gan die', na' besbángake' Le', na' góžgake' Le':

—Xan, beslá neto'. Za' gatžo lo nis.

<sup>26</sup> Bechebe Jesusen', na' gože' légake':

—¿Biz chen' zžébele? Láte'ze žejle'le che Dios.

Naž wyase Jesusen', na' bliže' ben' da' žaken, na' nisdon', na' la'

wzé'tegaken ži. <sup>27</sup>Bebán láže'gak benne' ka', na' wnnágake':

—čBiz napkze benne' ni? Znneze', na' be' žaken, na' nisdo' žóngaken kan znne'.

**Benne' Gadara ka', benne' yó'ogake'  
be' xiwe' ka'**

(*Mr. 5:1-20; Lk. 8:26-39*)

<sup>28</sup>Kate' bžin Jesusen' yechelá'a nisdo' gan nbab yež Gadara, bžojgak chope benne' ka' lo bloj ka' gan jez že' ba chegak benne' gat ka', na' bžíngake' gan zoa Jesusen'. Snále'e jez nake', na' bi gok nitó benne' tie' lo nezen'. <sup>29</sup>La' wzézey'aagak žoptie' zižje, na' wnnágake':

—čBiz nbága'to' chio', Jesús, Zi'n Dios? čZo'o nga nich wsaka' zi'o neto' kate' bi na' žin ža?

<sup>30</sup>Gan nnítá'gake' jez nnita' koch zan, bia želdaba' žáwgakba', na' jez že'ba' late' gan nak zi'to'. <sup>31</sup>Wnné nyáche'gak be' xiwe' ka', na' góžgaken Jesusen':

—Cha' yebejo' neto', be' latje chejžo'oto' yichj lázdo'gak koch zan ka'.

<sup>32</sup>Naž Jesusen' gože' légaken:

—Le chej.

La' bežójtegak be' xiwe' ka', na' bejžó'ogaken yichj lázdo'gak koch zan ka'.

Naž ka' gaze jak yógo'te koch zan ka', na' bejbíxjgakba' gan nak to le'e ya'a yej, na' bejchágzakba' lo nisdo', gan wyépgakba' nis, na' gótgakba'.

<sup>33</sup>Bžébegak benne' ka', benne' wdape chí'igake' koch ka', na' bzónnjgake'. Kate' bžíngake' lo yež, bzéngekle' benách ka' yógo'te da' gókgaken chegak benne' ka'

wyó'ogake' be' xiwe' ka'. <sup>34</sup>Naž bžojgak benne' lo yež ka', nich bejchággake' Jesusen'. Kate' blé'egekle' Le', góta'yoegakle' Le' yezé'e lo yežlyó chégake'.

**Jesús žeyone' to benne' bi žak se'e  
(*Mr. 2:1-12; Lk. 5:17-26*)**

**9** Naž bebén Jesusen' lo barkw, na' wdíe' yechelá'a nisdon', na' bežine' gan nak laže'. <sup>2</sup>Bžingak benne' ka' ga na' jez noe'e to benne' bi žak se'e, na' bdíxjwgake' le' xni'a Jesusen', zoe' lo yag gant. Kate' ble'el Jesusen' kan žeje'gak benne' ka' chie' Le', gože' bennen' bi žak se'e, na' wnné':

—Ben choch lažo'o, zí'na'do'. Ba benít lawa' chio' dola' da' nbago'o.

<sup>3</sup>Lezka' jez nnita' benne' yodo' wsedle ka' ga na'. Wzá' láže'gake', na' wnnágake':

—Da' zchalj benne' ni zzoan Dios chela'ale.

<sup>4</sup>Kate' gókb'e'ele Jesusen' da' zza' láže'gake', gože' légake':

—čBiz chen' zza' láže'le da' kegle?

<sup>5</sup>Bi nak zede cha' no benne' yí'aze' benne' ni: “Dola' da' nbago'o ba benít lawa'” san nak zede gone' ga yeyase', na' yezé'e. <sup>6</sup>Na'a, neda', Benne' Golje' Benách, wloe'ela' le'e nzi' lo na'a yela' wnná bia' lo yežlyó nga yenít lawa' dola'.

Naž Jesusen' gože' bennen' bi žak se'e, na' wnné':

—Beyás. Bchis yag gant chion', na' beyéj ližo'.

<sup>7</sup>Naž la' wyaste bennen' bi gok se'e, na' beyeje' liže'. <sup>8</sup>Kate' benne' ka' nnítá'gake' ga na' blé'egekle' da' ni, bebángekle', na' bka'n zéngake' Dios dan' bnežjwe' yela' wak ki chegak benách ka'.

### Jesús žiliže' Matíó

(Mr. 2:13-17; Lk. 5:27-32)

**9** Kate' bezá' Jesusen' ga na', ble'ele' to benne' lie' Matíó, ži'e gan zchizjwe' benách ka' lo wláz yež zi'to', na' Jesusen' gože' le':

—Benlen neda' tzen.

Naž la' wzó ža'te Matíón', na' bénlene' Jesusen' tzen.

**10** Yetó da' goken, kate' ne že' Jesusen' žawe' to lo yo'o, benne' zan, benne' wechizjw ka' na' benne' gaxjw ka', bžíngake' gan zoe', na' wžé'lengake' Jesusen' na' benne' wsedle chie' ka'. **11** Kate' benne' yodo' fariseo ka' blé'egekle' da' ni, wnnábgekle' benne' wsedle ka' che Jesusen', na' wnnágake':

—¿Biz chen' bennen' žsedle' le'e žawlene' benne' wechizjw ka', na' len yezika' benne' dola' ka' tzen?

**12** Kate' benle Jesusen' da' ni, gože' légake':

—Benne' ka' nnítá'gake' chawe', bi žon byenen chjake' gan zoa benne' žeyone' benách ka', san benne' ka' bi nnítá'gake' chawe' žon byenen chjake' gan zoa bennen' žeyone' benách ka'. **13** Le chej, na' le wsedle da' nyejw le'e yiche la'y, da' znnan ki: "Žénela' yeyache' láže'gakle benne' ka' ljé'gake' ka', kege gógtake' bia beže ka' lo bkog la'y chia!." Bla'a neda' nga, kege nich wliža' benne' chawe' ka', san nich wliža' benne' dola' ka' nich yeyát láže'gake'.

### Žsedle Jesús kan žala' gonžo wbás

(Mr. 2:18-22; Lk. 5:33-39)

**14** Naž benne' ka' žónlengake' Zwa tzen, bennen' bezóe' benách ka'

nis, blá'gake' gan zoa Jesusen', na' wnnábgekle' Le', na' wnnágake':

—Neto' žonto' wbás zan chi'i, na' lezka' žongak benne' yodo' fariseo ka'. ¿Biz chen' benne' wsedle chio' ka' bi žóngake' wbás?

**15** Bechebe Jesusen', na' gože' légake':

—¿Wak benne' ka' nnítá'gake' lni che yela' zchag na' gak nyache' láže'gake' kate' benne' zchag ne'e ne zóalene' légake'? Za' ža kate' kwas bennen' zchag ne'e gan nnítá'gake'. Za na' góngake' wbás.

**16** Bsaka' lebe Jesusen', na' wnné':

—Bi yeyón nitó benne' to laže' gole len laže' kobe, dan' wxónnj laže' koben' da' ngo'e lo laže' golén', na' chéza'že laže' golén'. **17** Lezka' bi ka'a nitó benne' xis uba kobe to lo že'e gole da' naken yid, dan' gak bžina' xis uba koben', na' wlán že'e golén' da' naken yid, na' cwia yi' xis uba na', na' lezka' kwia yi' že'e na' da' naken yid. Zga'ažo xis uba kobe to lo že'e kobe da' naken yid, na' da' chopten žak chí'igaken.

### Žebán xkwide' no'le che Jairo, na' žeyák to no'le

(Mr. 5:21-43; Lk. 8:40-56)

**18** Kate' Jesusen' ne zcháljlene' légake', to benne' znnna bi'e benne' judío ka' ble'e gan zoe', na' bzoa zibe' xni'e, na' gože' Le':

—Xkwide' no'le chia' za' gotbe'. Da, xoa no'o lebe', nich yebanbe'.

**19** La' wzó ža'te Jesusen', na' wyéjlene' le', tzen len benne' wsedle chie' ka'.

**20** Naž bžin to no'le ba gok chežinno yiz de'e yižwé'. Bi zbez žen chie' da' žaken chégakkze no'le

ka'. Wbige'e zaka' xkože'l Jesusen', na' wdane' laže' da' nakwe'. <sup>21</sup>Ki bene' dan' wzá' laže'e, na' wnné': "Cha' kanza' ze', yeysaka'." <sup>22</sup>Naž byechj Jesusen', na' bwie' le', na' gože' le':

—Ben choch lažo'o, zí'na'do'. Ba beyaktio' dan' žeji'o chia' neda'.

La' na'ze beyaktie'.

<sup>23</sup>Kate' bžin Jesusen' liž benne' wnná bian', ble'ele'zej nnita' benne' zan ga na', benne' ka' zkwéžegake' bžejw, na' benne' ka' želbeže nyache'e. <sup>24</sup>Jesusen' gože' légake':

—Le kwas ga ni, dan' bi nat xkwide' no'le ni. Ztászebe'.

Naž benne' ka' nnítá'gake' ga na' bka'n dítjekle' Le'.

<sup>25</sup>Kate' Jesusen' ba bebeje' benne' ka' na'le, wyo'e lo yo'o, na' bexwe' na' xkwide' no'len', na' la' wyástebe'.

<sup>26</sup>Wzé diža' kan gok da' ni, na' benách ka' nnítá'gake' dot yežlyón' béngeklen'.

Jesús žeyone' benne' lo chole ka'

<sup>27</sup>Kate' bžoj Jesusen' ga na', chope benne' lo chole ka' wnáwgake' Le'. Wžéye'a'gake' zižje, na' wnnágake':

—Beyache' laže'l neto', Le', za'só Dabí.

<sup>28</sup>Kate' wyó'o Jesusen' lo yo'o, žopte benne' lo chole ka' bžíngake' gan zoe'. Naž Jesusen' wnnable' légake', na' wnné':

—čžeje'le chia' neda', gak yeysaka' le'e?

Légake' wnnágake':

—O', Xan.

<sup>29</sup>Naž Jesusen' wdane' yej láwgake', na' wnné':

—Kan žeje'le, ka' gaken chele.

<sup>30</sup>La' beyáljwte yej láwgake'. Naž Jesusen' bchi'le' légake', na' wnné':

—Le wia bi we'le latje no benne' nnezle' da' ni.

<sup>31</sup>Kate' bežójgake', la' bzétegake' diža' dot yežlyón' kan nak da' ben Jesusen'.

Jesús žeyone' to benne' bi žak nnie'

<sup>32</sup>Kate' Jesusen' bežójlene' benne' wsedle chie' ka' tzen lo yo'on', bžingak benne' ka' gan zoa Jesusen', benne' ka' zedjwá'gake' to benne' gan zoe' Le', benne' bi žak nnie' dan' yoe'e be' xiwe'. <sup>33</sup>Kate' bebéj Jesusen' be' xiwen', la' wnnete bennen' bi gok nnie'. Bebán láže'gak benne' ka' nnítá'gake' ga na', na' wnnágake':

—Bi na' le'elto' da' ki gan nnítá'gak benne' Israel ka'.

<sup>34</sup>Naž benne' yodo' fariseo ka' wnnégake' chie', na' wnnágake':

—Benne' ni žebeje' be' xiwe' ka' len yela' wak che xangak be' xiwe' ka'.

Jesús žak nyache' laže'e ni'a chegak benne' zan ka'

<sup>35</sup>Wdá Jesusen' dot kwit gan zej že' yež zen ka', na' yeždo' ka', na' gan nak lo yo'o gan zdobgak benne' judío ka' nich yéngekle' xtiža' Dios, na' bsedle' benách ka' nnítá'gake' ga na', na' bchalje' diža' chawen' kan znna bia' Dios. Beyone' yógo'te benne' ka' zoa bi da' želzake'e, benne' ka' nnítá'gake' lo yež ka'.

<sup>36</sup>Kate' ble'el Jesusen' benne' zan ka', beyache' láže'le' légake', dan' želzake'e, na' žedó láže'gake' kan žak chegak zila' ka' bi zoa benne' gape chí'igake'-ba'. <sup>37</sup>Naž Jesusen'

gože' benne' wsedle chie' ka', na' wnné':

—Da' li, zen nak yel, san babze benne' ka' nníta'gake' nich lápgaken'.  
**38** Che len, le gáta'yoel Dios, Bennen' nake' Xan yelen', na' nnáblele-ne' sele'e benne' wen žin ka', nich lápgaken'.

**Jesús zbie' chežinno benne' nich gákgake' wbás chie' ka'**

(Mr. 3:13-19; Lk. 6:12-16)

**10** Naž bliž Jesusen' chežinnote benne' wsedle chie' ka', na' bdie' lo ná'gake' yela' wnná bia' nich yebéjgake' be' xiwe' ka' yo'ogak benách ka', na' nich yeyóngake' yógo'te benne' yižwé' ka', na' yógo'te benne' ka' zoa bi da' želzake'e.

**2** Ki legak chežinnote wbás ka' wžé Jesusen':

Smon, (lezka' lie' Bedw).

Ndres, (biche' Smon na').

Jakob, (zi'n Sebedeo).

Zwa, (biche' Jakob na').

**3** Lip.

Bartol.

Mas.

Matío, (benne' wechizjw).

Jakob, (zi'n Alfeo).

Lebeo, (lezka' lie' Tadeo).

**4** Smon, (benne' že' laže'e yež Israel).

Judas Iskariote, (bennen' wdíe' Jesusen' lo na'gak benne' ka' gótgake' Le').

**Jesús žsele'e wbás chie' ka' nich chejzégake' xtiže'e**

(Mr. 6:7-13; Lk. 9:1-6)

**5** Naž Jesusen' bsele'e chežinnote benne' wsedle chie' ka' nich

chejzégake' xtiže'e, na' bchi'le' légake', na' wnné':

—Bi chejle gan zej nnita' benách ka' bi zej nake' judío, na' bi chazle lažgak benách ka' nníta'gake' gan nbab Samaria. **6** Le chej gan zej nnita' benách Israel ka', benne' zej nake' ka zíla'do' ka', bia ka' zej nnitlba'. **7** Le wchálj diža' chawen', na' nnale: "Za' žin ža la' Bennen' zoe' ya'abá che Dios nich nna bi'e lo yežlyó nga." **8** Le yeyón benne' yižwé' ka'. Le yeyón benne' ka' zej de'e yižwé' leže. Le yesbán benne' gat ka'. Le yebéj be' xiwe' ka' yo'ogak benách ka'. Bennza' yela' wnná bia' ni chele. Le wkonlen žin, na' bi be wchízjwle.

**9** Bi be wa'le lo bzod chele, cha' mežw oro, o mežw plat, o mežw lasdo'. **10** Bi wa'le yixjw yet chele da' gawle lo nez. Toze laže' da' xoa yenle wa'le, na' bi wa'le zel-le, o bar chele, dan' wželkzle benne' wen žin da' gawe'.

**11** Gáte'zeze yež zen, o yeždo' gan žinle, le nnab cha' zoa no benne' ga na' nake' li laže', na' ga'nle liž bennen' na' zejte yežojle lo yežen'.

**12** Kate' cho'le to yo'o, le gape "Padiox" benne' ka' nníta'gake' yo'on', na' nnáblele Dios wnežjwe' chégake' da' wzóa žin yichj láždo'gake'. **13** Cha' zej nak zi benne' ka' nníta'gake' yo'on', na' da' zzoa žin yichj láždo'žo gá'nlenen légake', san cha' bi zej nak zi benne' ka', nnable bi ga'nlen légake' dan' zzoa žin yichj láždo'žo. **14** Gáte'zeze gan žinle gan bi gápegak benách ka' le'e ba la'ne, na' bi wzé nággake' xtíža'le, le yežojo lo yo'on', o lo yežen', na' le kwib bixte yo da' dan' lable, da' wlo'e'len

légake' zej nbage'e zia. <sup>15</sup>Da' li žapa' le'e, kate' žin že chog Dios chegak benách ka' sáka'gake', sáka'žegak benách ka' nníta'gake' lo yežen' ka sáka'gak benách ka' wnníta'gake' lo yež Sodoma, na' lo yež Gomorra, yež ka' bchinny Dios.

Benne' yežlyó ka' wsaka'  
zí'gake' benne' ka' che Jesúš

<sup>16</sup>Lezka' wnná Jesusen':

—Le wia nga, neda' žsela'a le'e, na' gakle ka zíla'do' ka' želdaba' gan zej nnita' beko' yixe' snia ka'. Le gak ban laže' kan zej nak bele snia ka', san lezka' le gak gaxjw laže' kan zej nak plomdo' ka'. <sup>17</sup>Le gape chi'i kwinle chegak benách ka', dan' wdégake' le'e lo na'gak benne' yolawé' ka', na' chíngake' le'e gan nak lo yo'o gan zdobgak benne' judío ka' nich yéngakle' xtiža' Dios. <sup>18</sup>Lezka' wché'gake' le'e gan že'gak benne' blo ka', na' gan že'gak benne' wnnábia' ka', dan' žónlenle neda' tzen. Ki gaken nich gak wchaljle xtiža'a gan že'gak benne' ka', na' gan že'gak benne' ka' bi zej nake' judío. <sup>19</sup>Naž kate' wdégake' le'e lo na'gak benne' wnnábia' ka', bi gek zédlele biz nnale, dan' wchíz Dios yichj láždo'le la' ža na'ze da' nnale, o kan wchaljle. <sup>20</sup>Kege l'ézele wchaljle, san Dios Be' La'y, Bennen' selá' Xažo Dios chele, Lekze' sóalene' le'e, na' wchaljle'.

<sup>21</sup>'Zej nnita' benách ka' wdégake' bíche'gake' ka' lo na'gak benne' ka' gótgake' légake', na' lezka' benne' ka' zej nake' xagak xkwide' ka' wdégake' zí'ngake' ka', na' zej nnita' benne' ka' kwej yichjgake' xágake' ka', na' góngake' ga gátgake'. <sup>22</sup>Yógo'te

benách wzóagake' le'e chela'ale dan' žónlenle neda' tzen, san yelá no benne' ga'ne' choch na' zejte že ze lawte že ka'. <sup>23</sup>Kate' wsaka' zi'gak benách ka' le'e to lo yež, le wzóonnj ga na', na' le chej yetó yež, dan' žapa' le'e, yelá'a neda', Benne' Golje' Benách, zga'ale kate' yejóz wzele xtiža'a gan zej nnita' yógo'te yež ka' chegak benách Israel ka'.

<sup>24</sup>'Nóte'zeze benne' nake' benne' wsedle bi nakže' blo ka bennen' žsedle' le', na' lezka' no benne' nake' wen žin bi nakže' blo ka xane'.

<sup>25</sup>Bennen' nake' benne' wsedle žala' yebele' cha' sáke'le' gake' kan nak bennen' žsedle' le', na' benne' wen žin na' žala' yebele' cha' gake' kan nak xane'. Cha' neda' naka' ka benne' xan yo'o, na' znnágake' chia', znnágake' naka' Belzebú da' xiwe', lezka' da' zí'teže nnégake' chegak benách ka' žónlenle neda' tzen.

### No Benne' žala' žébežo

(Lk. 12:2-9)

<sup>26</sup>Lezka' wnná Jesusen':

—Che len, bi žébele benách ka'. La' law yógo'te da' ka' žaken ži žize, na' gak bia' yógo'te da' zej ngache'.

<sup>27</sup>Da' zcháljlena' le'e gan nak chol, le wchaljen gan nak lo baní', na' da' žapa' le'e gan ngache', le nne zižje gan nak kwáselo. <sup>28</sup>Bi žébele benne' ka', benne' žótgake' bela' žen chegak benách ka', san bi gak wchínnjgake' be' nákkzežo. Le žebe Dios, Bennen' gak gote' bela' žen chele, na' lezka' gak cho'ne' be' nákkzele lo yi' gabíl.

<sup>29</sup>'Želdó'o chope byínnedo' len to mežw lasdo', san bi bixe nitoba' lo yo cha' bi žonn Xažo Dios latje gaken. <sup>30</sup>Lezka' yógo'te yicha'

yichjle ba blab Dios. <sup>31</sup>Che len, bi žébele. Záka'žele le'e law Dios ka záka'gak bia zan byínnedo' ka'.

### **Benne' ka' ɺnnágake' žónlengake'**

#### **Benne' Cristo tzen**

(Lk. 12:8-9)

<sup>32</sup>Lezka' wnná Jesusen':

—No benne' nne' žónlene' neda' tzen lawgak benách ka', lezka' neda' nnia' žonlen bennen' neda' tzen law Xa', Bennen' zoe' ya'abá. <sup>33</sup>Benne' ka', benne' ɰbej yichjgake' neda' lawgak benách ka', na' ɺnnágake' bi žónlengake' neda' tzen, lezka' neda' kwej yichja' lágake' law Xa', Bennen' zoe' ya'abá.

### **Jesús nake' ka to da' gonen ga la'a lazgak benách ka'**

(Lk. 12:51-53; 14:26-27)

<sup>34</sup>Lezka' wnná Jesusen':

—Bi gekle za'a neda' nich ko'a yežlyó nga da' gonen ga gakgak benách ka' toze. Bi za'a nich gona' ga gakgak benách ka' toze, san za'a nich ko'a da' gonen ga la'a lazgak benách ka'. <sup>35</sup>Za'a nga, na' gona' ga kwej yichjgak benách ka' xágake', na' lezka' no'le ka' kwej yichjgake' xnágake'. Lezka' no'le zoa ližgak ka' kwej yichjgake' xto zí'ngake' ka'. <sup>36</sup>Ki gaken, la' lježgak benách ka' wsaka' zí'gake' lágake'.

<sup>37</sup>'No benne' nží'ižele' xa xne'e ka nží'ile' neda', bi nake' zi gónlene' neda' tzen, na' no benne' nží'ižele' xkwide' byo chie' o xkwide' no'le chie' ka nží'ile' neda', bi nake' zi gónlene' neda' tzen. <sup>38</sup>No benne' bi si' lo ne'e gake' ka to benne' zejté'e le'e yag kroze, na' gónlene' neda' tzen, bi nake' zi gake' chia' neda'.

<sup>39</sup>No benne' že' laže'e gape chi'e yela' nban chie', wniten', san no benne' wnite' yela' nban chie' dan' žónlene' neda' tzen, yelá bennen'.

### **Da' ka' Dios yebi'e chežo**

(Mr. 9:41)

<sup>40</sup>Lezka' wnná Jesusen':

—No benne' gape' le'e ba la'ne, lezka' gape' neda' ba la'ne, na' bennen' gape' neda' ba la'ne, lezka' gape' ba la'ne Xažo Dios, Bennen' bsele'e neda'. <sup>41</sup>No benne' gape' ba la'ne to benne' zchalje' lo wláz Dios dan' zchalje' lo wlaze' Le', si' bennen' la' lébeze kan nak da' wnežjw Dios che bennen' zchalje' lo wlaze' Le'. Lezka' no benne' gape' ba la'ne to benne' chawe' dan' nake' benne' chawe', si' bennen' la' lébeze kan nak da' wnežjw Dios che benne' chawen'. <sup>42</sup>Nóte'teze benne' wnežjwe' to zbíndo'ze nis che to bénne'do' ki dan' nake' benne' wsedle chia' neda', da' li žapa' le'e, si'kze bennen' da' wnežjw Dios chie'.

### **Benne' ka' bsela' ɰwa želžine' gan zoa Jesús**

(Lk. 7:18-35)

**11** Kate' beyóž Jesusen' bzejni'ile' benne' wsedle chie' ka', bezé'e ga na', na' wyeje' žejsedle' benách ka', na' žejchalje' xtiže'e lo yež ka' chegak benne' ka'.

<sup>2</sup>Kate' že ka' ɰwa, bennen' bezóe' benách ka' nis, nyejwe' liž ya, na' benle' kan nak da' žon Jesusen'. Naž ɰwan' bsele'e chope benne' ka' žónlengake' le' tzen, na' bžíngake' gan zoa Jesusen'. <sup>3</sup>Žoptie' wnnábgekle' Jesusen', na' wnnágake':

—¿Nako' Le' Benne' Criston',  
Bennen' žala' le'e yežlyó nga, o žala'  
kwezto' na' zejte la' yetó benne'?

<sup>4</sup>Bechebe Jesusen', na' gože'  
légake':

—Le chej chejzenle Zwan' dan'  
žénlele, na' dan' zlé'elele. <sup>5</sup>Le yi'e  
kan žaken, želé'egekle benne' ka'  
gókgake' lo chole, na' žeza'gak benne'  
ka' bi gok sá'gake'. Ba beyakgak  
chawe' benne' ka' wdá'gake' yižwé'  
leže, na' žeyéngakle benne' kwezw  
ka'. Ba bebangak benne' ka' gógtake',  
na' nníta'gak benne' ka' zzéngekle'  
benne' yache' ka' diža' chawen'. <sup>6</sup>Ba  
nez žen gaken che bennen' bi gak  
chope laže'e, na' bi kwej yichje' neda'.

<sup>7</sup>Kate' ba beza'gak benne' ka'  
žónlengake' Zwan' tzen, naž wzó  
law Jesusen' zcháljlene' benách ka'  
nníta'gake' ga na' kan nak che Zwan',  
na' gože' lágake':

—¿Biz gónelele lél'elele katen'  
wyejle lo latje dachen'? ¿Gónelele  
lél'elele to benne' nake' ka to ya  
xtildó' da' zzechj be'? <sup>8</sup>Cha' kege,  
¿biz gónelele lél'elele? ¿Gónelele  
lél'elele to benne' nakwe' laže' da'  
záka'le'en? Nnézkzelele benne'  
ka' jez nakwe' laže' da' záka'le'en  
nníta'gake' ližgak benne' wnná bia'  
ka'. <sup>9</sup>Yetó na', ¿biz gónelele lél'elele?  
¿Gónelele lél'elele to benne' zchalje'  
lo wláz Dios? Ka' naken, žekla'  
neda'. Žapa' le'e, blé'elele to benne'  
nák'le'e'že' blo ka yezika' benne' ka'  
bcháljgake' lo wláz Dios. <sup>10</sup>Ki naken  
dan' nak Zwan' bennen' nyejw kan  
nak chie' le'e yiche la'y, da' znnan:

Bwia nga, žsel'a benne' wbás  
chia', bennen' cheje' zga'ale'  
ka Le'.

Le' gon chawe'e nez gan tio'.

<sup>11</sup>Da' li žapa' le'e. Dot yežlyó nga, bi  
zoa nitó benne' nakže' blo ka Zwan',  
bennen' bezóe' benách ka' nis, san  
no benne' nakže' gaxjw laže' gan  
znna bia' Dios, Bennen' zoe' ya'abá,  
nakže' blo ka Zwan'.

<sup>12</sup>Katen' wzó law bezóa Zwan'  
benách ka' nis, na' zejte na'a ža,  
de chgi' želžó'o benách ka' gan  
znna bia' Dios, Bennen' zoe' ya'abá,  
na' benne' wechóg laže' ka' žon  
byéngake' chó'ogake' ga na'. <sup>13</sup>Kate'  
bla'te ža na' wzóa Zwan', da' bchi'le  
Moisés le'e, na' da' bzojgak yógo'te  
benne' ka' bcháljgake' lo wláz Dios  
blo'egaklen kan znna bia' Dios,  
Bennen' zoe' ya'abá. <sup>14</sup>Cha' žénelele  
si' lo na'le da' ki, žala' nnézlele  
Zwan' nake' Lías, bennen' bchalje' lo  
wláz Dios ža ni'te, na' nake' bennen'  
wnná Dios žala' yelé'e da' yoble ža  
ni zoažo na'a. <sup>15</sup>No benne' zoa nage',  
na' ženle', žala' wzé nage'.

<sup>16</sup>¿Biz wsaka' leba' kan jez nak  
benne' ka' nníta'gake' ža ni zoažo  
na'a? Jez nake' ka xkwide' ka'  
želbe'be' lawe' ya'a. Zbéžeya'agakbe',  
na' žližgakbe' ljéžgakbe' ka', <sup>17</sup>na'  
želnnabe': "Zkwéžeto' chele  
bžejw. ¿Biz chen' bi za'ale? Žol  
nyáche'to' chele. ¿Biz chen' bi  
zbeže nyáche'le?" <sup>18</sup>Ki nakle, dan'  
bla' Zwan', na' dan' bi bdawé' kan  
žawle le'e, wnnale chie', wnnale:  
"Da' xiwe' žónlennen le' tzen." <sup>19</sup>Naž  
bla'a neda', Benne' Golje' Benách, na'  
že'j žawa', na' znnale chia', znnale:  
"Nake' benne' wawle'e, na' benne'  
že'je'. Nake' lježgak benne' wechizjw  
ka', na' yezika' benne' wen dola' ka'."

Yela' žejn' il che Dios nak bian' ni'a  
che da' žongak benne' ka' nzi' lo  
ná'gaken'.

**Da' gak che no benne' bi gone' kan  
znna xtiža' Dios**  
(Lk. 10:13-15)

**20** Naž wzó law Jesusen' zdile'  
benne' ka' nníta'gake' lo yež ka' gan  
bene' da' zan yela' wak zen ka', dan'  
bi beyát láže'gake'. **21** Gože' légake':  
—Da' nyáche'le'e gaken chele le'e,  
benách ka' che yež Korazín. Da'  
nyáche'le'e gaken chele le'e, benách  
ka' che yež Betsaida. Chela' gokgak  
yela' wak zen ka' lo yež Tiro, na'  
lo yež Sidón ka da' ka' bena' gan  
zoale, ža ni'tel yeyát láže'gak  
benne' ka' che yež Tiro na', na' che  
yež Sidón na', na' gákwgake' laže'  
zeche', na' wzíagake' de yichjgake',  
da' wloe'elen žeyát láže'gake'.  
**22** Na'a, neda' žapa' le'e, kate' žin  
ža chog Dios chegak benách ka'  
sáka'le'egake', sáka'žele le'e kan  
sáka'gak benne' ka' che yež Tiro  
na', na' che yež Sidón na', yež ka'  
bchinnj Dios. **23** Le'e, benne' ka'  
che yež Kapernaum, čékelele le'e  
cho'ole ya'abá che Dios dan' blé'elele  
da' ka' bena' neda'? Yetjle lo yi'  
gabíl. Chela' gokgak yela' wak zen  
ka' lo yež Sodoma, ka da' ka' bena'  
gan zoale, ga'ngak benne' yežen',  
na' zejte na'a ža. **24** Na'a, neda' žapa'  
le'e, kate' žin ža chog Dios chegak  
benách ka' sáka'le'egake', sáka'žele  
le'e kan sáka'gak benne' ka' che yež  
Sodoma na'.

**Znna Jesús: "Le gonlen neda' tzen,  
na' yeží láže'le"**  
(Lk. 10:21-22)

**25** Kate' ža na' bchalj Jesusen', na'  
wnné':

—Zka'n zena' Le', Xe, nako' Xan  
ya'abá, na' Xan yežlyó nga, dan'  
bkacho'o da' ki, nich bi lē'egeklen  
benne' ka' žejní'igekle', san bloe'elo'  
benne' ka' zej nake' ka xkwide' ka'  
da' ki. **26** Ka'kze gaken, Xe, dan'  
ki wyáz lažo'o Le'. **27** Ba bde Xan'  
yógo'te lo na'a neda'. Bi nonbia' no  
benne' neda', Zi'n Dios, san toze  
Xažo Dios, na' bi nombia' no benne'  
Xažo Dios, san toza' neda', Zi'n Dios,  
na' lezka' benne' ka' žénela' wloe'ela'  
légake' Xažo Dios. **28** Le gonlen  
neda' tzen yógo'tele žejxáke'le dan'  
žóntezle žin che yodo', na' nwa'le  
ywa' zi'i che da' zchi'le yodo', na'  
neda' gona' ga yeží láže'le. **29** Lo  
yela' gaxjw laže' chele le gon  
xchina', gakle ka go'n ka', bia ka'  
želzi'ba' yogo' chégakba'. Le wsedle  
da' nnia' neda', dan' naka' gaxjw  
laže', na' kwide' laže', na' žél-lele  
yela' žezí' laže', na' ga'n ži yichj  
lázdo'le. **30** Yogan' dan' xoa' le'e, dan'  
naken da' wchi'la' le'e, bi naken  
zede, na' ywa' wa'a le'e da' naken da'  
žsedla', žá'ado'ze naken.

**Benne' ka' che Jesús želké'e bisto zoa'  
stribe ža la'y**

(Mr. 2:23-28; Lk. 6:1-5)

**12** Kate' ža na', da' naken ža  
la'y chegak benne' judfo ka',  
wdé Jesusen' gan de yele zoa' stribe.  
Želdón benne' wsedle chie' ka', na'  
wzó láwgake' želké'e bisto gan žia  
zoa' striben', na' žáwgaken!. **2** Kate'  
benne' yodo' fariseo ka' blé'egekle'  
da' ni, góžgake' Jesusen':

—Bwia nga, žongak benne' wsedle  
chio' ka' da' bi žala' gonžo ža la'y.

**3** Naž Jesusen' gože' légake':

—¿Bi bel-le le'e yiche la'y kan nak da' ben Dabí katen' wdone', na' lezka' wdongak benne' ka' wnníta'lengake' le'? <sup>4</sup>Wyoé'e lo yo'o che Dios, na' bdawe' yet xtíl ka'zej nkwe'e lo bkog la'y, dan' bi žala' gawe' le', na' bi žala' gawgak benne' ka' wnníta'lengake' le', san toze bxoz ka' de latje gáwgaken'. <sup>5</sup>¿Bi bel-le da' wnná Moisés wak gongak bxoz ka' ža la'y ka'? Žóngake' žin li'a yodo' ža la'y ka', na' bi želbage'e dola'. <sup>6</sup>Na'a, neda' žapa' le'e, zoa' neda' nga, na' naka' benne' nakže' blo ka yodo'. <sup>7</sup>Bi žejni'ilele dan' nyejw le'e yiche la'y, da' znnan: "Žénela' yeyache' láže'lele lježle ka', na' kégeze gotle bia beždo' ka', bia ka' zzeyle lo bkog la'y chia'." Chela' žejni'ilele da' ki, bi besbágale benne' ka' zia, benne' ka' bi želbage'e zia. <sup>8</sup>Ka' naken, dan' naka' neda', Benne' Golje' Benách, Xan ža la'y.

### Jesús žeyone' to benne' nžeke' ne'e

(Mr. 3:1-6; Lk. 6:6-11)

<sup>9</sup>Naž bezá' Jesusen' ga na', na' wyoé'e lo yo'o gan zdobgak benne' judío ka' nich yéngakle' xtíza' Dios. <sup>10</sup>Lo yo'on' wzóa to benne' nžeke' ne'e, na' dan' ženegekle benne' judío wnná bia' ka' žélgekle' to da' gak yesbágake' Jesusen' zia, che len wnnágakle' Le', na' wnnágake': —¿De latje yeyonžo no benne' yižwé' kate' nak ža la'y?

<sup>11</sup>Bechebe Jesusen', na' gože' légake':

—No benne' ládjwle le'e, cha' zoa to zila' chie', na' cha' bixbá' toba' lo yežw kate' nak ža la'y, čbi chejleje' ba'? <sup>12</sup>Záka'že to benne' ka to zila'. Che len, de latje gonžo da' nak

chawe' chegak benách ka' kate' nak ža la'y.

<sup>13</sup>Naž Jesusen' gože' benne' yižwén': —Bli no'o.

Kate' bli ne'e, la' beyakten chawe' kan nak yechelá'a ne'e.

<sup>14</sup>Naž bežachjgak benne' yodo' fariseo ka', na' béngake' xtíza'gake' nich gótgake' Jesusen'.

### To benne' bchalje' lo wláz Dios ža ni'te bchalje' che Jesús

<sup>15</sup>Kate' gókbe'ele Jesusen' da' ni, bezé'e ga na', na' benne' zan jáklene' Le' tzen. Naž Jesusen' beyone' yógo'te benne' yižwé' ka', benne' nníta'gake' ládjwak benách ka', <sup>16</sup>na' bchi'le' légake' bi wzéngakle' benách ka' no nake' Le'. <sup>17</sup>Kate' bcháljlene' légake' gok da' wnná Isaías, bennen' bchalje' lo wláz Dios ža ni'te, katen' wnné':

<sup>18</sup>Le wia nga, Bennen' nake' wen žin chia',

Bennen' wžekza' neda'.

Nži'ilá' Le', na' žaz laža'a Le'.

Wchiza' Le' Be' La'y.

Le' wzenle' yógo'te benách kan gona', wchi'a laža'a légake'.

<sup>19</sup>Bi til diže'e len no benne', na' bi nnie' zižje,

na' bi yenle no benne' chi'e gan nak zi'to'.

<sup>20</sup>To ya xtildo' da' zoa be bi chichjwen', na' to yi' da' za' yolen, bi wsolen', kate' wzoože' da' nak chawe' chie'.

<sup>21</sup>Yógo'te benách ka' wzén  
láže'gake' Le'.

### Znnágake': "Da' xiwe' žónlenen Jesús tzen"

(Mr. 3:19-30; Lk. 11:14-23; 12:10)

<sup>22</sup>Naž bla'gak benne' ka'zej noe'e to benne' lo chole gan zoa Jesusen',

bennen' bi žak nnie', dan' yoe'e be' xiwe', na' Jesusen' beyone' le'. Ki goken, bennen' goke' lo chole, na' bi gok nnie', na'a zle'ele, na' zchalje.  
**23**Che len bebán láže'gak yógo'te benne' ka' nnítá'gake' ga na', na' wnnágake':

—¿Nak benne' ni za'só Dabí, bennen' žala' le'e?

**24**Kate' béngekle benne' yodo' fariseo ka' da' ni, wnnágake':

—Benne' ni žebeje' be' xiwe' ka', dan' Belzebú, da' xiwe', dan' naken xangak be' xiwe' ka', žónlenen Le' tzen.

**25**Žákbe'ele Jesusen' dan' zza' láže'gake', na' gože' légake':

—Gáte'teze gan znna bia'gak benách ka', cha' žoj chóplegak benne' ka', na' cha' tíl-lengake' ljéžgake' ka', kwia yi' yela' wnná bia' chégake'. Lezka', cha' žoj chóplegak benách ka' nnítá'gake' to yež o to yo'o, na' cha' tíl-lengake' ljéžgake' ka', bi gak dia'gak benne' ka' nnítá'gake' lo yežen' o lo yo'on'. **26**Lezka', cha' kwej da' xiwe' la' ljéžekzen, na' cha' tíl-lengak be' xiwe' ka' la' légakkzen, čnakxkze gak dia' yela' wnná bia' che da' xiwen'? **27**Znnele chia', na' znrale žebeja' be' xiwe' ka' dan' Belzebú da' xiwe' žónlenen neda' tzen. Cha' neda' žona' ki, čnoz benne' žónlene' tzen benne' ka' žónlengake' le'e tzen kate' žebéjgake' be' xiwe' ka'? Che len, da' žóngakkze' nak bian' nchíxelele le'e. **28**Na'a, cha' neda' žebeja' be' xiwe' ka' dan' zoalen yela' wak che Dios Be' La'y neda', da' li yela' wnná bia' che Dios ba blan' ga zoale ni.

**29**¿Gak no benne' choe'e liž to benne' wale, na' kweje' yela' wnni'a

da' žen' liže', cha' zga'ale bi wcheje' benne' walen'? Naž gak choe'e nich wtache' liž benne' walen'.

**30**'No benne' bi žónlene' neda' tzen, zbej yichje' neda', na' lezka' no benne' bi ztóblene' neda' tzen, žóslase'.

**31**'Che len žapa' le'e, yógo'te dola' da' žongak benách ka', na' diža' zi' ka' da' znnégake' che Dios, yenít law Dios chégake', san no benne' nne zi'e che Dios Be' La'y, batkle yenít law Dios chie'. **32**Lezka', cha' no benne' nnie' chia' neda', Benne' Golje' Benách, Dios yenít lawe' chie', san no benne' nnie' che Dios Be' La'y, batkle yenít law Dios chie'. Bi yenít lawe' chie' ža ni zoažo na'a, na' bi yenít lawe' chie' ža zezán'.

### Da' žonžo nak bian' kan nakžo

(Mt. 7:15-19; Lk. 6:43-45)

**33**Lezka' wnná Jesusen':

—Cha' nak zix to yag, kwian da' zix, san cha' bi nak zix bi kwian da' zix. Ki naken, da' zbia to yag nak bian' kan naken. **34**Le'e, lježgak bele snia nakle. ¿Nakx gak wchaljle da' naken chawé', cha' bi nakle chawé'? Kan nak da' zza' láže'gak benách ka', lezka' zcháljgake'. **35**Zchalj to benne' chawé' da' nak chawé' dan' yo'o da' naken chawé' lo yichj lázda'we', san zchalj no benne' bi nake' chawé' da' bi nak chawé', dan' yo'o da' bi naken chawé' lo yichj lázda'we'. **36**Che len žapa' le'e, kate' žin ža chog Dios chegak benách ka' sáka'gake', wchi'a laže'e benách ka' ni'a chegak yógo'te diža' da' wnnágakkze' ka'ze. **37**Kan nak da' znno', wchi'a laže'e le', na' yežojo' chawé' o bago'o zia ni'a che dižan' da' wnnó'.

**Znnábgakle' Jesús gone' to da' gak  
bian' no nake'**

(Mr. 8:12; Lk. 11:29-32)

**38** Naž beži'igak benne' yodo'  
fariseo ka' len benne' yodo' wsedle  
ka', na' góžgake' Jesusen':  
—Benne' wsedle, žénelto' le'elto' to  
da' gono' da' gak bian' gan za' yela'  
wnná bian' da' napo'.

**39** Bechebe Jesusen', na' gože'  
légake':

—Benne' ki, benne' wen da' zinnj  
ka', na' bizej nake' dot li laže',  
znnábgakle' neda' gona' to da' gak  
bian' no naka'. Bi be da' gak bian'  
lé'egakle', san toze da' nak bia' kan  
gok che Jonás, bennen' bchalje' lo  
wláz Dios. **40** Kan gok che Jonasen',  
bga'ne' le'e bel zen chonne ža  
chonne yele, lezka' gaken chia'  
neda', Benne' Golje' Benách, dan'  
chonne ža chonne yele ga'na' zan  
yo. **41** Benne' ka' wnníta'gake' lo  
yež Nníibe chásagake' ža na' kate'  
chog Dios chegak benách ka' da'  
gone' chégake', katen' wchi'a laže'e  
benách ka' nníta'gake' ža ni zoažo  
na'a, na' da' bengak benne' ka' che  
yež Nníibe na' yesbagan' benách ki  
zia dan' beyát láže'gak benne' ka'  
che yež Nníibe na' katen' Jonasen'  
bzenle' légake' xtiža' Dios, na' na'a  
zoa' neda' nga, na' nákle'eža' zen ka  
Jonasen'. **42** Lezka' no'len' wnná bi'e  
yežen' da' žen' zaka' gan zde wbíž  
byo' zag ka' chase' ža na' kate' chog  
Dios chegak benách ka' da' gone'  
chégake' kate' wchi'a laže'e benách  
ka' nníta'gake' ža ni zoažo na'a, na'  
da' ben no'len' yesbagan' légake' zia,  
dan' bžoj no'len' gan nákle'e zi'to'  
nich yenle' diža' sina' da' bchalj

Salomón, na' na'a zoa' neda' nga, na'  
nákle'eža' zen ka Salomón na'.

**Kate' žežín be' xiwe' latje chen**

(Lk. 11:24-26)

**43** Lezka' wnná Jesusen':  
—Kate' žežój be' xiwe' yo'o to  
benne', zdan gan nbiž, na' žiljen gan  
yezi' lažen'. Cha' bi wžel-len gan  
yezi' lažen', **44** naž nnan: "Yeyá'a latje  
chia' gan bžoja!" Kate' yežinen gan  
bžojen, chejxakan' bennen', nake' ka  
to yo'o ndachen, na' nloan, na' ba  
nba'an nich chejsóa no benne' ga  
na'. **45** Naž chej be' xiwen', na' chejxín'  
yegaže be' xiwe' ka', be' yež nakžen  
xiwe' ka len, na' chó'ogaken yógo'ten,  
na' chejnníta'gaken lo yichj lázdo'w  
bennen', na' ga ze law gakže nyache'  
che bennen' kan goken chie' zga'ale.  
Lezka' gaken chegak benách ki,  
benne' wen da' zinnj ka'.

**Xna' Jesús, na' benne' biche'e ka'**

(Mr. 3:31-35; Lk. 8:19-21)

**46** Kate' Jesusen' ne zcháljlene'  
benách ka' da' ni, bžin xne'e  
len benne' biche'e ka' ga na'.  
Wnníta'gake' la' lí'ale, na' gónegekle'  
wcháljlengake' Jesusen'. **47** Naž to  
benne' bzenlen' Jesusen', na' wnné':

—Bwia nga, zoa xno'o len benne'  
bicho'o ka' la' lí'ale, na' žénegekle'  
wcháljlengake' Le'.

**48** Bechebe Jesusen', na' gože'  
bennen' bzenle' Le' da' ni, na' wnné':

—čNnézlele no benne' nake' xna'a,  
na' no benne' ka' yež nake' benne'  
bícha'ado' ka'?

**49** Naž bli ne'e, na' bloe'ele' benne'  
wsedle chie' ka', na' wnné':

—Bwia nga, benne' ki yež nake' ka  
xna'kza', na' benne' bíche'kza' ka'.

**50**Nóte'teze benne' žone' kan žénele Xa',  
Bennen' zoe' ya'abá, benne' ni nake' bi'  
bíche'kza', na' bi' zankza', na' xna'kza'.

**Žsaka' lebe Jesús kan nak che to  
benne' žaz**

(Mr. 4:1-9; Lk. 8:4-8)

**13** La' ža na'ze bžoj Jesusen' lo  
yo'o, na' bejsóe' žoa'a nisdo'.  
<sup>2</sup>Dan' bdobgak benne' zan gan  
zoa Jesusen', wžene' to lo barkw,  
na' wži'e ga na', na' benne' zan ka'  
wnnítia'gake' lo yo biž žoa'a nisdon'.  
<sup>3</sup>Naž Jesusen' bcháljlene' légake',  
na' da' zan da' bsedle' légake', da' ka'  
bsaka' lebe', na' wnné':

—Le wia nga, bžoj to benne' žaz,  
yjeze' bínbedo' ka'. <sup>4</sup>Kate' ne zjeze',  
béxjwgak bale bínbedo' ka' žoa'a  
nez, na' bžingak byínnedo' ka', na'  
bdáwgakban'. <sup>5</sup>Béxjwgak yebale  
bínbedo' ka' lo yo gan že' yej, gan  
de láte'ze yo, na' la' blá' tegaken, dan'  
de láte'ze yo ga na'. <sup>6</sup>Naž kate' bla'  
wbíž, la' wbižte dan' goze', dan' bi'  
zoa gan gon lwen. <sup>7</sup>Béxjwgak yebale  
bínbedo' ka' gan bela'gak lba yeche'  
ka'. Belgóle'le e lba yeche' ka', na'  
bdóbgaken dan' goze', na' bžia yí'gaken  
légaken. <sup>8</sup>Béxjwgak yebale bínbedo'  
ka' gan nak lo yo beb, na' bnéžjwgaken.  
Bnéžjwgak bale dan' goze' yetó gaywá'  
ka'. Bnéžjwgaken yebalen yechonnalj  
ka', na' bnéžjwgaken yebalen yechí'  
žoa ka'. <sup>9</sup>No benne' zoa nage', na' ženle',  
žala' wzé nage'.

**Da' žénele Jesús gongak da' ka' bsaka'  
lebe'**

(Mr. 4:10-12; Lk. 8:9-10)

<sup>10</sup>Naž bžingak benne' wsedle  
ka' che Jesusen' gan zoe', na'  
wnnábgekle' Le', na' wnnágake':

—¿Biz chen' zcháljleno' benách ka'  
da' ka' žsaka' lebo'?

<sup>11</sup>Bechebe Jesusen', na' gože' légake':

—Dios žonne' le'e latje chejn'iilele  
da' ngache' kan znna bi'e Le' ya'abá  
chie', san benne' ki bi žénegekle'  
chejn'iigekle'. <sup>12</sup>No benne' zzi'e xtiža'  
Dios, Dios wnezwjwe' chie' yelate',  
na' gáta'le'en chie', san no benne' bi  
zzi'en, da' do'ze dan' ba nzi'e yegá'n.  
<sup>13</sup>Che len zcháljlena' légake' da'  
ka' žsaka' leba', dan' zwíagake' san  
bi zlé'gekle'. Želenle' san bi zze  
nággake', na' bi žejn'iigekle'. <sup>14</sup>Ki  
žaken, zžin da' wnná Isaías, bennen'  
bchalje' lo wláz Dios, katen' wnné':

Da' li yénlele san bi chejn'iilele.

Wíale'ele san bi lé'elele da'  
nakken.

<sup>15</sup>Ki naken dan' nak zide yichj  
lázdo'gak benne' ki,  
na' bi be žaz lo yichj nággake'.  
Nyejw yej láwgake',  
na' bi zlé'gekle' len yej láwgake'  
ka'.

Bi zze nággake'  
na' bi zzejn'iigekle' yichj  
lázdo'gake',

na' bi žeyákgake' chia' neda',  
nich gak yeyona' légake'.

<sup>16</sup>'Na'a, ba nez zen naken chele  
le'e, dan' zlé'gekle yej lawle ka', na'  
žengekle nagle ka'. <sup>17</sup>Da' li žapa' le'e,  
benne' zan, benne' bcháljgake' lo wláz  
Dios, na' benne' chawé' ka', gónegekle'  
lélégekle' da' zlé'elele le'e, san bi  
blé'geeklen'. Gónegekle' yéngekle' da'  
žénlele le'e, san bi béngeklen'.

**Zloe'el Jesús da' žsedle da' bsaka'  
lebe'**

(Mr. 4:13-20; Lk. 8:11-15)

<sup>18</sup>Lezka' wnná Jesusen':

—Le wzé nag da' žsedle da' bsaka' leba' che benne' žaz. <sup>19</sup>Nóte'teze benne' ženle' diža' kan znnna bia' Dios ya'abá, na' bi žejni'ilen', žak che diža' da' benlen' kan gok che bínbedo' ka' békjwgaken žoa'a nez. La' za'te da' xiwe', na' žeká'n dižan' da' wyazen lo yichj lázdo'w bennen'. <sup>20</sup>Bínbedo' ka' békjwgaken lo yežlyón' gan že' yej žsédgeklen kan žak che no benne' ženle' dižan', na' la' zze nagtien' lo yela' žebél chie', <sup>21</sup>san kan bi wdia'gak bínbedo' ka' dan' bi gota' gan góngaken lwen, lezka' žaken che bennen'. Kate' žin to da' žsaka' zin' le', na' kate' zbia láže'gak benách ka' le' dan' nzi' lo ne'e dižan', la' gakte chope laže'e. <sup>22</sup>Bínbedo' ka' békjwgaken gan bególegak lba yeché' ka' žsédgeklen kan žak che bennen' ženle' dižan', san zdan laže'e da' ka' jez nnitan' yežlyó nga, na' da' ka' žon láže'geklen bennen' dan' zdan laže'e yela' wnni'a che yežlyó nga. Da' ki žóngaken ga kwia yi' dižan', na' bi gak gonen žin lo yichj lázda'we. <sup>23</sup>Bínbedo' ka' békjwgaken lo yo beb žsédgeklen kan žak che bennen' ženle' dižan', na' žejni'ilen', na' žon žin dižan' lo yichj lázda'we. Zej nak bale benách ka' ka bínbedo' ka' bnéžjwgaken yetó gaywá' ka'. Zej nak yebale benách ka' ka bínbedo' ka' bnéžjwgaken yechonn<sup>lalj</sup> ka', na' jez nak yebale benách ka' ka bínbedo' ka' bnéžjwgaken yechí žoa ka'.

Yíxe'do' ka'ze da' znnan' kan znnna' yele zoa' stribé

<sup>24</sup>Naž bsaka' lebe Jesusen' yetó, na' gože' légake:

—Kan gak gan žin da' znnna bia' Dios ya'abá naken kan gok che bínbedo' chawe' ka' da' goz to benne' gan nak lo yežlyó chie'. <sup>25</sup>Kate' ne ztasgak benne' ka' nnít'a'gake' liže', bla' to benne' ga na', benne' bi zle'ele' le' chawe', na' yjeze' lo yežlyó chien' bínbedo' ka' che yixe' ka'ze dan' znnan' kan znnna' yele zoa' stribé, na' beyeje' latje chie'. <sup>26</sup>Kate' bla' zoa' striben', na' wzé' bisto chen gan žia zoa' striben', naž gok bia'gak yíxe'do' ka'ze ka'. <sup>27</sup>Naž bžingak benne' wen žin ka' gan zoa benne' xan yežlyón', na' góžgake' le': “Xan, cha' gozo' bínbedo' chawe' ka' lo yežlyó chion', čnakx goken bla'gak yíxe'do' ka'ze ka?” <sup>28</sup>Xan yežlyón' gože' légake', na' wnné': “To benne' bi zle'ele' neda' chawe' bene' ki.” Naž benne' wen žin ka' wnnábgekle' le', na' wnnágake': “Žénelo' chejto' chejlážo'to' yíxe'do' ka'ze ka?” <sup>29</sup>Naž xángake' gože' légake': “O'o. Kate' wlážo'le yíxe'do' ka'ze ka', lezka' wlážo'lentele yele zoa' stribé ka'. <sup>30</sup>Gakže chawe' gonnle latje gólegaken tzen na' zejte chejtobžon, na' naž yapá' benne' ka' wtóbaken': le wtób zga'ale yíxe'do' ka'ze ka', na' le wchejen chejxónn weje nich wzeyžon, na' naž wtoble zoa' striben' lo yo'o chia.”

Žsaka' lebe Jesús kan nak che to bínbedo' mostasa

(Mr. 4:30-32; Lk. 13:18-19)

<sup>31</sup>Yetó da' bsaka' lebe Jesusen', na' gože' légake':

—Kan gak gan žin da' znnna bia' Dios ya'abá, gaken kan gok che to bínbedo' mostasa, dan' goz to benne' gan nak lo yežlyó chie'. <sup>32</sup>Da'

li bínbedo' mostasa na' nakžen da' do'ze ka zej nak yógo'te bínbedo' yezika' ka', san kate' ba nazen, zgóležen ka yógo'te yixe' kwan ka', na' žaken ūen kan nak to yag, na' želžín byínnedo' ka', na' žóngakba' xó'ngakba' ka' lo ni'a nen'.

### Žsaka' lebe Jesús che kwa zichj che yet xtil

(Lk. 13:20-21)

**33** Yetó da' bsaka' lebe Jesusen', na' gože' légake':

—Kan gak gan žin da' znna bia' Dios ya'abá gaken ka ben kwa zichj che yet xtil, dan' bchixé to no'le len chonne lbix yezje zoa' stribé, na' wyache' dot kwa na'.

### Da' žénele Jesús gongak da' ka' žsaka' lebe

(Mr. 4:33-34)

**34** Yógo'te da' ki bsaka' lebe Jesusen', da' ka' bcháljlene' benách ka' nníta'gake' ga na', na' bi bcháljlene' légake' da' bi bsaka' leben'. **35** Ki bene', na' bžin dan' bzoj to benne' bchalje' lo wláz Dios ža ni'te, katen' wnné':

Wchalja' da' ka' wsaka' leba'. Nnia' da' bgache' katen' wzó law žata' yežlyó.

### Da' žsedle da' bsaka' lebe Jesús che yíxe'do' ka'ze

**36** Naž Jesusen' bzele diž'e' benách ka' nníta'gake' ga na', na' besele'e légake', na' Le' beyoé'e yo'o. Naž bžingak benne' wsedle chie' ka' gan zoe', na' góžgake' Le':

—Bloe'el neto' da' žsedle dan' bsaka' lebo' che yíxe'do' ka'ze dan' znna' kan znna' yele zoa' stribé.

**37** Bechebe Jesusen', na' gože' légake':

—Benne' žaze' bínbedo' chawé' naka' neda', Benne' Golje' Benách. **38** Ga na' goze' bínbedo' ka' naken yežlyó nga, na' bínbedo' chawé' ka' zej naken benne' ka' zej nbabe' gan znna bia' Dios. Yíxe'do' ka'ze ka' dan' znna' kan znna' yele zoa' stribé zej naken benne' ka' zej nake' che da' xiwe'. **39** Bennen' bi zle'ele' chawé' xan yežlyón', na' goze' yíxe'do' ka'ze ka', da' xiwe'kze naken. Ža na' katen' wtóbgaken' naken ža ze lawte ža ka' che yežlyó nga, na' benne' ka' ztóbgaken' zej nake' wbás che ya'abá ka'. **40** Kan goken, btóbgake' yíxe'do' ka'ze ka', na' bzéygaken' lo yi', lezka' gaken kate' yeyóž che yežlyó nga. **41** Neda', Benne' Golje' Benách, sela'a wbás la'y chia' ka', na' kwéjgake' yógo'te benne' ka' gan znna bia' Dios, benne' ka' žóngake' ga žongak ljéžgake' ka' dola', na' lezka' benne' ka' žóngake' da' kegle. **42** Wbás che ya'abá ka' chó'ngake' benne' ka' lo yi' gabíl, benne' wen da' zinnj ka', na' kwéžegake', na' wxéj láye'gake'. **43** Naž benách chawé' ka' chépgake' yes baní', na' gákgake' kan nak wbž gan znna bia' Dios ya'abá chie'. No benne' zoa nage', na' ženle', žala' wzé nage'.

### Žsaka' lebe Jesús che to yela' wnni'a ngache'

**44** Lezka' bsaka' lebe Jesusen', na' wnné':

—Da' znna bia' Dios ya'abá chie' naken ka to yela' wnni'a, da' ngache' to lo yežlyó. Katen' to benne' bžellen', bekache'en gan bgachen', na' lo yela' žebél chie' wye'e', na' bete'e

yógo'te da' nape', na' go'we' yežlyón'  
nich gata' yela' wnni'a na' chie' le'.

**Žsaka' lebe Jesús che to  
bga da' záka'le'en**

**45** Lezka' wnná Jesusen':

—Kan žala' dan láže'le da' znna bia' Dios ya'abá chie' naken kan ben to benne' ža'we', na' žote'e, na' žilje' bga zaka' ka'. **46** Kate' bžel'le' to bga da' záka'le'en, wyeje', na' bete'e dot da' nape', na' go'we' bgan'.

**Žsaka' lebe Jesús che to yixjw bel**

**47** Lezka' wnná Jesusen':

—Kan gak gan žin da' znna bia' Dios ya'abá chie', gaken kan žon to yixjw bel da' bzál'a'gak benne' ka' lo nisdo', dan' bejxenen bel zan. **48** Katen' ba bežá' yixjwn', na' bebéjgaken' lo yo biž žoa'a nisdon', gan wžé'gake', na' bnníta'gake' bel chawe' ka' lo xkwite ka', na' bel ka'ze ka' wžó'ngake' légakba'.

**49** Lezka' gaken kate' yeyóz che yežlyó nga. Žojgak wbás che ya'abá ka', na' kwéjgake' cheze benne' chawe' ka', na' yekwásgake' légake' laduw benne' wen da' zinnj ka'.

**50** Naž chó'ngake' benne' wen da' zinnj ka' lo yi' gabíl, gan kwéžegake', na' wxéj láye'gake'.

**Yela' wnni'a gole, na' da' kobe**

**51** Naž Jesusen' wnnable' benne' wsedle chie' ka', na' wnné':

—¿Žejní'ilele yógo'te da' ki?  
Bechébegake', na' góžgake' Le':  
—O', Xan.

**52** Jesusen' gože' légake':

—Katen' to benne' yodo' wsedle ba nzi' lo ne'e da' znna bia' Dios ya'abá chie', nake' ka to benne' xan yo'o,

benne' žebeje' laduw yela' wnni'a chie' da' kobe, na' da' gole, da' ka' zej naken chawe', da' ka' žebélenlen'.

**Da' ben Jesús lo yež Nasaret**

(Mr. 6:1-6; Lk. 4:16-30)

**53** Kate' beyóž bsaka' lebe Jesusen' da' ki, bezé'e ga na'. **54** Kate' bežine' gan nak laže', bsedle' benne' ka' nníta'gake' lo yo'o gan zdobgak benne' judío ka' nich yéngakle' xtiža' Dios, na' bebángekle', na' wnnágake':

—¿Gaz bsedle benne' ni yela' žejni'il ni? ¿Nakx naken, žone' da' zan yela' wak ki? **55** Benne' ni nake' zi'n benne' zkonle' žin blag ka', na' xne'e lie' Lia. Nake' bíche'gak Jakob, na' Jwsé, na' Smon, na' Judas. **56** Lezka' no'le zane' ka' nníta'lengake' žo'o nga. ¿Gaz bsedle' yógo'te da' ki?

**57** Che len gok chope láže'gake', na' bebéj yíchjgake' Le'. Naž Jesusen' gože' légake':

—Yógo'te benách ka' žápegake' ba la'ne no benne' zchalje' lo wláz Dios, san benách wláz chie' ka', na' benne' ka' nníta'gake' liže' bi žápegake' le' ba la'ne.

**58** Che len bi ben Jesusen' da' zan yela' wak ka' ga na', dan' bi žejlé'gake' chie'.

**Ka bétgake' Žwa, bennen' bezóe'  
benách ka' nis**

(Mr. 6:14-29; Lk. 9:7-9)

**14** Kate' ža ka', benle Herodes, bennen' znna bi'e gan nbab Galilea, kan zej nak yela' wak ka' da' žon Jesusen'. **2** Herodes na' gože' ni'a ne'e ka', na' wnné':

—Bennen' nake' Žwa, bennen' bezóe' benách ka' nis. Ba bebane' lo

yela' got. Che len nzi' lo ne'e yela'  
wak zen na'.

<sup>3</sup>Ki wnná Herodes na' dan'  
bséla'kze' benne' ka' békwgake'  
Zwan'. Bchéjgake' le' do ya, na'  
bséjwgake' le' liž ya dan' gónele  
Herodías gaken ki. Herodías  
na' goke' zo'le Lip, benne' biche'  
Herodes na'. <sup>4</sup>Ki ben Herodes  
na', dan' Zwan' gože' le': "Bi žala'  
sóáleno' zo'le benne' bicho'o."

<sup>5</sup>Che len gónele Herodes na' gote'  
Zwan', san bžebe' wži'igak benne'  
wláž ka' chie', dan' žékgekle' nak  
Zwan' benne' zchalje' lo wláz Dios.  
<sup>6</sup>Naž kate' gok lni che že wyé'el yiz  
Herodes na', bžoj xkwide' no'le che  
Herodías na', na' bya'abe' gan že'gak  
benne' ka' nníta'gake' lni na', na'  
wyáz laže' Herodes na' da' benbe'.  
<sup>7</sup>Bchebe laže' Herodes na', na' ben  
choche' xtiž'e wnežjwe' chebe'  
bít'e'teze da' nnablbe' le'. <sup>8</sup>Dan' ba  
bsedle xna'be' lebe' zga'ale, gožbe'  
le':

—Benn chia' na'a to lo ziga' zen  
yichj Zwa, bennen' bezó' benách  
ka' nis.

<sup>9</sup>Naž gok nyache' laže' Herodes  
na', san dan' ba ben choche' xtiž'e'e,  
na' dan' békgekle benne' ka' chie' le',  
benne' ka' že'j žawłengake' le' tzen,  
che len gože' to benne' chejnezjwe'-  
be' yichj Zwan'. <sup>10</sup>Ki goken, bsele'e  
to benne' chejchoge' yen Zwan' gan  
nyejwe' liž ya. <sup>11</sup>Bennen' bsele'e  
beyoé'e yichj Zwan' to lo ziga' zen,  
na' bnežjwen' che xkwide' no'len', na'  
lebe' bnéžjwben' che xna'be'.

<sup>12</sup>Naž benne' ka' bénłengake' Zwan'  
tzen bžíngake' ga na', na' beché'gake'  
le', na' bejkáche'gake' le'. Wdé na',  
bezéngekle' Jesusen' kan gok da' ki.

Jesús zwawe' gayo' mil benách ka'

(Mr. 6:30-44; Lk. 9:10-17; Jn. 6:1-14)

<sup>13</sup>Kate' benle Jesusen' da' goken  
che Zwan', bezé'e ga na', na' wžene'  
to lo barkw, na' wyeje' toze' to latje  
dach. Katen' békgekle benách ka'  
zeje' ga na', bžójgake' lo yež ka', na'  
belzé'e lo ní'agake', na' jake' gan  
žala' žin Jesusen'. <sup>14</sup>Kate' bežój  
Jesusen' lo barkw, ble'ele'zej nnita'  
benách zan ka' ga na', na' beyache'  
láže'le' légake', na' beyone' benne'  
yižwé' ka', benne' nníta'gake'  
ládjwgake'. <sup>15</sup>Kate' ba za' žale ža na',  
wbíga'gak benne' wsedle chie' ka'  
gan zoe', na' góžgake' Le':

—Ba za' žale na'a, na' dache nak  
latje ni. Besela' benách ki nich  
chjake' gan že'gak yeždo' ka' nich  
gáwgake' da' gáwgake'.

<sup>16</sup>Naž Jesusen' gože' légake':

—Bi žon byenen chjake'. Le  
wnežjw le' e dan' gáwgake'.

<sup>17</sup>Naž góžgake' Le':

—Gáyo'ze yet xtil den, na' chopze  
bel ka', bia deba' cheto' nga.

<sup>18</sup>Jesusen' gože' légake':

—Le yedjwán' nga.

<sup>19</sup>Naž Jesusen' wnné' kwe'gak  
benne' ka' gan yo'o daka!. Wdé na'  
bexwe' da' gayo' yet xtil ka', na'  
chop bel ka', na' bchis lawe', bwie'  
zaka' ya'abá. Gože' Dios: "Žóxkeno!"

Naž bzozje' yet xtil ka', na' bdie'  
da' ka' lo na'gak benne' wsedle  
chie' ka', na' légake' wdísgake'  
da' ka' gan že'gak benne' zan  
ka'. <sup>20</sup>Bdáwgake' yógo'tegake', na'  
béljegekle'. Naž betóbgake' da' bizjw  
ka' da' begá'ngaken, na' beschá'gake'  
chežinno xkwit ka'. <sup>21</sup>Benne' byo ka',  
benne' bdáwgaken', gókgake' gayo'

mílgake', san bi blab no benne' no'le ka', na' xkwide' ka'.

### Jesús zde' lawe'l nisdo'

(Mr. 6:45-52; Jn. 6:16-21)

**22**Naž la' bente Jesusen' ga bebengak benne' wsedle chie' ka' lo barkw nich chjake' zgá'alegake' ka Le', na' tégake' yechelá'a nisdon', katen' yesele'e Le' benne' zan ka', benne' nníta'gake' ga na!. **23**Katen' Jesusen' ba besele'e benne' ka', wžene' to law ya'ado' gan bejsóe' toze'. Naž bcháljlene' Dios. Katen' ba gole, toze' zoe' ga na!. **24**Barkwn' gan zej nnita' benne' wsedle chie' ka' zden gachje láwe'le nisdon', na' žxite' barkwn' dan' žas nisdon', na' ben' žaken zzagan' barkwn'. **25**Wdé gachje yelen', wbiga' Jesusen' žoa'a gan nníta'gake', zde' lawe'l nisdon'. **26**Kate' blé'egekle benne' wsedle chie' ka' Le', zde' lawe'l nisdon', gok zédgekle' dan' zžébegake'. Wžézeya'agake', na' wnnágake':

—To be' bxin'.

**27**Naž Jesusen' la' bližtie' lágake', na' wnné':

—Le gon choch láže'le. Nedan'. Bi žébele.

**28**Naž bechebe Bedw, na' gože' Jesusen':

—Xan, cha' nako' Le', wnné neda' sa'a gan zo' lawe'l nisen'.

**29**Jesusen' gože' le':

—Da.

Naž betj Bedon' lo barkwn', na' wzé'e lawe'l nisdon', zeje' gan zoa Jesusen'. **30**Naž kate' blé'el Bedon' kan zta be' nisdon', bžebe'. Wzó lawe' žetje' lo nisen', na' wžézeyi'e. Blíže' Jesusen', na' wnné':

—Xan, beslá neda'.

**31**Jesusen' la' blíte ne'e. Bexwe' le', na' gože' le':

—Láte'ze žejlí'o chia'. īBiz chen' gok chope lažo'o?

**32**Kate' wžén Jesusen' lo barkwn', wžé' ži ben' žaken. **33**Naž benne' ka' nníta'gake' lo barkwn' bka'n zéngake' Jesusen', na' wnnágake':

—Da' li, Zi'n Dios nako'.

### Jesús žeyone' benne' yižwé' ka' lo yež

Genesaret

(Mr. 6:53-56)

**34**Kate' ba wdégake' yechelá'a nisdon', la' bžíntegake' gan nbab yež Genesaret. **35**Kate' benne' yežen' ka' beyónbia'gake' Jesusen', bséla'gake' diža' dot lo yežlyón', na' bžingak benách ka' zej noe'e yógo'te benne' yižwé' ka' gan zoa Jesusen'. **36**Góta'yoegkle' Jesusen' we'e lágake' latje kágakze' laže' da' nakwe', na' la' beyáktekak yógo'te benne' ka', benne' wdángake' ze'.

Da' ka' žóngaken ga bi nakžo chawé'

law Dios

(Mr. 7:1-23)

**15** Naž benne' yodo' fariseo ka' len benne' yodo' wsedle ka', benne' ka' zej nžoje' lo yež Jerusalén, bžíngake' gan zoa Jesusen', na' góžgake' Le':

— īBiz chen' žongak benne' wsedle chio' ka' da' zdetlen kan zej nak da' žónuze žonžo kan bengak xa xtožo ka'? Bi želyíb ná'gake' kan nak che yodo' kate' za' gáwgake'.

**3**Bechebe Jesusen', na' wnnable lágake', na' wnné':

— īBiz chen' lezka' le'e zzoale chela'ale da' bchi'le Dios le'e, nich gonle da' žónuze žonle? **4**Nak

bia' žonle ki dan' gož Dios le'e, na' wnné': "Wdape ba la'ne xa xno'o" na' lezka' wnné': "No benne' nne zi'e che xa xne'e, le got bennen!." <sup>5</sup> San le'e znnale: "Cha' no benne' yi'e xa xne'e: Bi be gak wnežjwa' chele dan' ba bchebe laža'a wnežjwa' che Dios yógo'ten!" <sup>6</sup> Naž znnale biž žon byenen bi da' gon bennen' che xa xne'e. Ki žonle, zzoale chela'ale dan' bchi'le Dios le'e, nich gonle da' žóneteze žonle. <sup>7</sup> Le'e, benne' zloé'ezele chawe' kwinle, nak dot da' li da' wnná Isaías, bennen' bchalje' lo wláz Dios, kan nakle, katen' wnné':

<sup>8</sup> Benne' ki, žoá'agakze' žápegake' neda' ba la'ne, kege dot láže'gake.

<sup>9</sup> Dáche'ze nak kan zka'n zéngake' neda' dan' zsédgekle' da ka' zchí'igekle benách ka'.

<sup>10</sup> Naž Jesusen' bliž'e benne' ka' nníta'gake' ga na', na' gože' légake:

—Le wzé nag da' yapa' le'e, na' le chejní'ilen. <sup>11</sup> Kege da' žaz žoa'a to benne' žonen ga bi nake' chawe' law Dios, san da' žjojen žoe'e žonen ga bi nake' chawe' law Dios.

<sup>12</sup> Naž benne' wsedle ka' che Jesusen' wbíga'gake' gan zoe'. Wnnábgekle' Le', na' wnnágake': —¿Nnezlo' bža'agak benne' yodo' fariseo ka' katen' béngekle' dan' bchaljo'?

<sup>13</sup> Naž bchebe Jesusen', na' gože' légake:

—Yógo'te da'zej nazen, da' bi goz Xa', Bennen' zoe' ya'abá, yelážo'gaken dot lwen. <sup>14</sup> Le wká'n-gake'. Zej nake' lo chole, na' želchi'e benne' lo chole ka'. Cha' to benne'

lo chole chi'e yetó benne' lo chole, žoptie' bíxgake' to lo bloj.

<sup>15</sup> Naž bchebe Bedw, na' gože' Jesusen':

—Bzejní'il neto' da' ni žsaka' lebo'.

<sup>16</sup> Jesusen' gože' légake:

—¿Lezka' le'e bi žejní'ilele?

<sup>17</sup> Nnézlele žaz le'žo yógo'te da' žazen žoá'ažo, na' žežojen le'žo.

<sup>18</sup> Na'a, da' žežojen žoá'ale, lo yichj lázdo'le zan', na' da' ki žóngaken ga bi nakle chawe' law Dios. <sup>19</sup> Ki žaken dan' zla'gak lo yichj lázdo'le da' kegle ka' da' zza láže'le, da' gonen ga gotle benách ka', na' da' gonen ga wká'n ditjle yela' zchag na', na' da' gonen ga gonle da' zinj, na' da' gonen ga se láže'le bi da' kwanle, na' da' gonen ga nnele che lježle da' bizej naken da' li, na' da' gonen ga nne yálele. <sup>20</sup> Da' ki žóngaken ga bi nak chawe' to benne' law Dios, san cha' bi chibe' ne'e kan nak che yodo' kate' bi da' gawe', da' ni bi gonen ga bi nake' chawe' law Dios.

To no'le yež zi'to' žejli'e che Jesús

(Mr. 7:24-30)

<sup>21</sup> Naž bezá' Jesusen' ga na', na' wyeje' gan zej nbab yež Tiro, na' yež Sidón. <sup>22</sup> To no'le nbabe' to yež da' nbaben Kanaán bžoje' lo yežen'. Wnnié' zižje, na' gože' Jesusen':

—Xan, za'só Dabí, beyache' laže'l neda'. Xkwide' no'le chia' zzáka'le'ebe' dan' yo'obe' be' xiwe'.

<sup>23</sup> Bi be bchebe Jesusen'. Naž wbíga'gak benne' wsedle chie' ka' gan zoe'. Góžgake' Le', na' wnnágake':

—Besele' le', dan' ze'e zkóže'lžo na' zbéžeyi'e.

<sup>24</sup> Naž bchebe Jesusen', na' gože' no'len':

—Dios bsele'e neda' nich gáklena' benne' Israel ka', benne' zej nake' ka zíla'do' ka' zej nnitlba'.

**25** Naž wbiga' no'len' gan zoa Jesusen'. Bzoa zibe' xni'e, na' gože' Le':

—Xan, goklen neda'.

**26** Bechebe Jesusen', na' wnné':

—Bi nak chawe' yeka'ažo yet chegak xkwide' ka', na' cho'nžon nich gawgak bék'o'do' ka' len.

**27** Naž no'len' gože' Jesusen', na' wnné':

—O', Xan, san žawgak bék'o'do' ka' da' bizjw ka', da' žéxjwgaken zanle gan žawgak xángakba'.

**28** Naž bechebe Jesusen', na' wnné':

—Nó'ledo'. Dot li laže' nak kan žejl'i'o chia'. Gak chio' kan žénelo'.

La' na'ze beyakte xkwide' no'le chien'.

**Jesús žeyone' benne' zan,  
benne' yižwé' ka'**

**29** Naž bezá' Jesusen' ga na', na' wdíe' gan nak žoa'a nisdo' che gan nbab Galilea. Wžene' gan nak to law ya'ado', gan wži'e. **30** Benne' zan bžíngake' gan zoa Jesusen', benne' ka' zá'gake' zej noe'e benne' ka' bi žak ságake', na' benne' lo chołe ka', na' benne' ka' bi žak nnégake', na' benne' ka' zej nžog ni'a ná'gake', na' benne' zanže, benne' yižwé' ka', na' wdíxjwgake' légake' xni'a Jesusen', na' Le' beyone' légake'. **31** Bebán láže'gak benne' ka' kan nak da' ben Jesusen', dan' blé'egekle' znnagak benne' ka' bi gok nnégake', na' beyakgak benne' ka' bžoggak ni'a ná'gake', na' zza'gak benne' ka' bi gok ságake', na' zlé'egekle benne' ka' gókgake' lo chołe. Che len bka'n

zéngake' Dios chegak benne' Israel ka'.

**Jesús zwawe' tap mil benne' ka'**

(Mr. 8:1-10)

**32** Naž Jesusen' bliže' benne' wsedle chie' ka', na' gože' légake':

—Žeyache' láže'la' chegak benne' zan ki, dan' ba zej chonne ža zá'lengake' neda', na' bi be de da' gáwgake'. Bi žénela' yesela' légake' lížgake' želdonze' ka', dan' yedó láže'gake' lo nez.

**33** Naž benne' wsedle chie' ka' góžgake' Le', na' wnnágake':

—¿Gaz žél-leto' yet xtil zan lo latje dach nga, nich wawto' benne' zan ki?

**34** Jesusen' wnnable' légake', na' wnné':

—¿Balx yet xtil de chele?

Bechébegake', na' wnnágake':

—Gaže, na' lezka' babze bel deba' cheto' nga.

**35** Naž Jesusen' gože' benne' zan ka' kwé'gake' lo yo. **36** Bexwe' gaže yet xtil ka' len bel ka', na' gože' Dios:

“Zóxkeno.” Naž bzozjen', na' bnezjwen' chegak benne' wsedle chie' ka', na' légake' wdísgaken' gan že'gak benne' zan ka'. **37** Bdáwgake' yógo'tegake', na' béljegekle'. Wdé na' betóbgake' da' bizjw ka' da' begá'ngaken, na' beschá'gake' gaže xkwit ka'. **38** Zej nnita' tap mil benne' byo ka', benne' ka' bdáwgake', san bi blábgake' no'le ka', na' xkwide' ka'. **39** Naž Jesusen' besele'e benne' ka' lížgake', na' wžene' lo barkwn', na' jake' gan nbab yež Magdala.

**Znnábgekle' Jesús gone' to da' gak  
bian' no nake'**

(Mr. 8:11-13; Lk. 12:54-56)

**16** Naž benne' yodo' fariseo ka' len benne' yodo' saduseo

ka' bžíngake' gan zoa Jesusen' nich si' biá'gake' Le', na' wnnábgekle' Le' gone' to da' gak bian' gan za' yela' wnná bia' chien'. <sup>2-3</sup>Bechebe Jesusen', na' gože' légake':

—Nnézkzele dan' znnagak benách, znnágake': “Kate' že' bejw kwele, wak yejw.” Lezka' znnagake': “ Kate' žechj be' bi gak yejw.” iBenne' bi nnezle ka! iŽak nneya'ale da' gon lawe' ža, san bi žákbe'elele nbágale žia ni'a che da' žónkzelele! <sup>4</sup>Benne' ka', benne' žóngake' da' kegle, na' bi zoa dot li láže'gake', želnnable' neda' gona' to da' gak bian' no naka', san bi be da' gak bian' l'égekle'. Toze dan' gok bian' kan gok che Jonás, bennen' bchalje' lo wláz Dios, l'égeklen'.

Naž Jesusen' bkwase' gan nnítal'gake', na' beyeje'.

**Da' naken ka kwa zichj che yet xtil**  
(Mr. 8:14-21)

<sup>5</sup>Kate' bžíngake' yechelá'a nisdon', gókbe'egakle benne' wsedle ka' che Jesusen' gol láže'gake' wá'gake' da' gáwgake'. <sup>6</sup>Naž Jesusen' gože' légake':

—Le wia nga. Le gape chi'i kwinle che da' naken ka kwa zichj che yet xtil chegak benne' yodo' fariseo ka', na' chegak benne' yodo' saduseo ka'.

<sup>7</sup>Naž benne' wsedle chie' ka' bcháljlengake' ljéžgake' ka', na' wnnágake':

—Znne' ki dan' bi nwa'žo yet xtil.

<sup>8</sup>Žákbe'ele Jesusen' da' ni, na' gože' légake':

—Biž chen' žon xtíža'le dan' bi nwa'le yet xtil? Láte'ze žeje'le chia'. <sup>9</sup>Bi žejní'ilele, na' bi žeza' láže'le kan gok chegak gayo' yet

xtil ka', dan' bdawgak gayo' mil benne' ka', na' kan xkwit zan ka' betoble? <sup>10</sup>čLezka' bi žejsá' láže'le kan gok chegak gaže yet xtil ka', dan' bdawgak tap mil benne' ka', na' kan xkwit zan ka' betoble? <sup>11</sup>Bi žejní'ilele? Bi bchalja' che yet xtil katen' goža' le'e gape chi'i kwinle che da' naken ka kwa zichj che yet xtil chegak benne' yodo' fariseo ka', na' chegak benne' yodo' saduseo ka'.

<sup>12</sup>Naž bejní'igekle' Jesusen' bi gože' légake' gape chi'i kwíngake' che kwa zichj che yet xtil, san žala' gape chi'i kwíngake' che da' žsédgakle benne' yodo' fariseo ka', na' benne' yodo' saduseo ka'.

**Bedw zinne' Jesús nake' Benne' Cristo**

(Mr. 8:27-30; Lk. 9:18-21)

<sup>13</sup>Kate' bžin Jesusen' gan nbab yež Sesarea, gan znnna bia' Filipo, wnnable' benne' wsedle chie' ka', na' wnné':

—čNoz znnagak benne' ka' naka' neda', Benne' Golje' Benách?

<sup>14</sup>Bechébegake', na' wnnágake':

—Bale' znnágake': “Zwa nako', bennen' bezóe' benách ka' nis.” Yebale' znnágake': “Líás nako', bennen' bchalje' lo wláz Dios ža ni'te.” Yebale' znnágake': “Jeremías nako', o to benne' yoble, benne' bchalje' lo wláz Dios ža ni'te.”

<sup>15</sup>Naž Jesusen' gože' légake':

—Cheze le'e, čnoz znnale naka' neda'?

<sup>16</sup>Bechebe Smon Bedw, na' gože' Le':

—Le' nako' Benne' Criston', Zí'n Dios ban.

<sup>17</sup>Bechebe Jesusen', na' gože' le':

—Ba nez zen naken chio', Smon, zí'n Jonás, dan' bi bloe'el no benne'

le' da' ni, san Xa', Bennen' zoe' ya'abá, bloe'ele' le' da' ni. <sup>18</sup>Neda' žapa' le', le' nako' Bedw, na' lo yej ni chixjwa' benne' ka' zej nake' chia', na' yela' wnná bia' che da' xiwe' bi gak wzagan' xnézgake'. <sup>19</sup>Wdía' lo no'o zi'n ya ka' che latje gan znna bia' Dios, Bennen' zoe' ya'abá chie'. Da' wžono' lo yežlyó nga, lezka' ba bžon Dios, Bennen' zoe' ya'abá chie', na' da' go'o latje gaken lo yežlyó nga, ba be' latje gaken Dios, Bennen' zoe' ya'abá chie'.

<sup>20</sup>Naž Jesusen' bchi'le' benne' wsedle chie' ka' bi wzéngkle' nitó benne' nake' Le' Benne' Criston'.

### Jesús zloe'ele' kan za' gótgake' Le' (Mr. 8:31—9:1; Lk. 9:22-27)

<sup>21</sup>La' ža na'ze wzó law Jesusen' zloe'ele' benne' wsedle chie' ka' žon byenen cheje' Jerusalén, gan bxoz wnná bia' ka' len benne' gole ka', na' benne' yodo' wsedle ka', wsaka' zí'gake' Le', na' naž gótgake' Le', san kate' gak chonne ža, yebane' lo yela' got. <sup>22</sup>Naž Bedw bchi'le' Jesusen' cheł'a'le, na' wzó lawe' zdile' Le', na' wnné':

—Xan, bi gonn Dios latje. Bi gak chio' kan znno'.

<sup>23</sup>Naž beyéchj Jesusen', na' gože' Bedon':

—Bkwas na'le. Žono' le' kan žon da' xiwe'. Žono' ga gak chope laža'a dan' kan zza' lažo'o le' bi naken kan zza' laže' Dios, san kan zza' láže'gak benách ka'.

<sup>24</sup>Naž Jesusen' gože' benne' wsedle chie' ka', na' wnné':

—Cha' zoa no benne' žénele' gónlene' neda' tzen, žala' wzó'e' cheł'a'le da' ka' zdan' laže'le, na'

gake' ka to benne' noe'e yag kroze, na' zeje' zejté'e le'e yag krozen'. Naž gak gónlene' neda' tzen. <sup>25</sup>No benne' žénele' gape chi'e yela' nban chie', wniten', san benne' wnite' yela' nban chie' dan' žónlene' neda' tzen, gata' yela' nban da' zejlí kanne chie'. <sup>26</sup>Bi be da' chawe' gaken che to benne' cha' wtobe' yógo'te da' den yežlyó nga san wnite' yela' nban chie'. Bi be gak wneżjw bennen' nich gata' yela' nban da' zejlí kanne chie'. <sup>27</sup>Ki znna', dan' yelá'a neda', Benne' Golje' Benách, tzen len yela' baní' che Dios, Xa', na' che wbás che ya'abá chia' ka'. Naž yebi'a che to to benne' kan zej nak da' ka' bene'. <sup>28</sup>Da' li žapa' le'e: bi gatgak bałe benne' ka', benne' nnítā'gake' nga, na' zejté lé'egekle' yedjnná bi'a neda', Benne' Golje' Benách.

### Zcha' kan znna' law Jesús

(Mr. 9:2-13; Lk. 9:28-36)

**17** Wdé xope ža, Jesusen' bchi'le' Bedw na' Jakob, na' Zwa, benne' biche' Jakoben', na' jake' cheze gan nak to law ya'a sibe. <sup>2</sup>Kate' ne nnítā'gake' ga na' bža' kan znna' law Jesusen' láwgake'. Wyép yes baní' law Jesusen' kan ža'ní' wbíž, na' beyák zíla'do'ze laže' nakwe', na' wnnán' ka baní'. <sup>3</sup>Naž blé'egekle' benne' wsedle chie' ka' kate' bła' lawgak Moisés na' Lías, zcháljlengake' Jesusen'. <sup>4</sup>Naž Bedon' gože' Jesusen':

—Xan, ba nez zen naken chežo zoažo nga. Cha' žénelo', gona' chonne yo'o laga' ka' nga, to chio', na' yetó che Moisés, na' yetó che Lías.

<sup>5</sup>Kate' ne zchalj Bedon' da' ni, la' wže'te to bejw baní' ga na', da'

bkachen' légake', na' lo bejwn' benle chi'i to benne' wnné':

—Benne' ni nake' Zi'nkza'. Nži'ila'-ne', na' žaz laža'a Le'. Le wzé nag da' wchalje'.

<sup>6</sup>Kate' béngekle benne' wsedle ka' che Jesusen' chi'i na', belyechwe' lo yole, na' bžébegake'. <sup>7</sup>Naž wbiga' Jesusen' gan nnítá'gake', na' wdane' légake', na' wnné':

—Le chas. Bi žébele.

<sup>8</sup>Kate' bchis láwgake', na' bwíagake', nitože no benne' blé'egakle', san toze Jesusen'.

<sup>9</sup>Kate' ne žétjgake' law ya'a na', Jesusen' bchi'le' légake', na' wnné':

—Bi ye'le nitó benne' kan gok dan' blé'elele kate' yebanža' lo yela' got neda', Benne' Golje' Benách.

<sup>10</sup>Naž wnnábgekle benne' wsedle chie' ka' Le', na' wnnágake':

—¿Bíz chen' znnagak benne' yodo' wsedle ka' žon byene la' law Lías zga'ale' kate' la' law Benne' Criston?

<sup>11</sup>Bechebe Jesusen', na' gože' légake': —Da' li la' law zga'ale Líasen', na' wká'n chawe'e yógo'te. <sup>12</sup>Na'a neda' žapa' le'e: ba bla' law Líasen', san bi beyónbia'gake' le', na' yógo'te da' znnaze chégake' le'e yiche la'y béngeake' chie'. Lezka' góngake' chia' neda', Benne' Golje' Benách, dan' wsaka' zí'gake' neda'.

<sup>13</sup>Naž bejn'i'gekle benne' wsedle chie' ka', zcháljlene' légake' kan gok che Zwa, bennen' bezó'e benách ka' nis.

**Jesús žeyone' to xkwide' byo da'be' chon**

(Mr. 9:14-29; Lk. 9:37-43)

<sup>14</sup>Kate' bežíngake' gan zej nnita' benne' zan ka', wbiga' to benne' gan

zoa Jesusen'. Bzoa zibe' xni'e, <sup>15</sup>na' gože' Le':

—Xan, beyache' laže'l xkwide' byo chia', dan' da'be' chon, na' zzáka'le'ebe', na' zan chi'i zže'be' lo yi', na' lo nis. <sup>16</sup>Bedjwá'a-be' gan nnítá'gak benne' wsedle chio' ka', san bi gok yeyóngake'-be'.

<sup>17</sup>Bechebe Jesusen', na' wnné':

—Le'e, benne' ka' bi žejle'le che Dios, na' bi nakle li laže'. ¿Gáka'tega žala' sóalena' le'e nich chejle'le che Dios? ¿Gáka'tega žala' gaka' zen laže' chele le'e? Le yedjwá'-be' nga.

<sup>18</sup>Naž Jesusen' bdile' be' xiwen' yo'obe', na' la' bežojten lebe', na' la' na'ze beyakte xkwide' byodon'.

<sup>19</sup>Naž wbíga'gak benne' wsedle ka' che Jesusen' gan zoe' cheze. Wnnábgekle' Le', na' wnnágake':

—¿Bíz chen' bi gok yebelito' neto' be' xiwen'?

<sup>20</sup>Jesusen' gože' légake':

—Bi gokle dan' bi žejle'le che Dios dot láže'le. Da' li žapa' le'e, la'kze láte'ze nak kan žejle'le che Dios, cha' nakzen ka to bínbedo' mostasa, wak ye'le ya'ado' nga: “Bkwas nga, na' bejsóa na'le” na' la' wkwasten. Bi be zoa da' bi gak gonle cha' chejle'le che Dios dot láže'le. <sup>21</sup>Na'a, to be' xiwe' ki gak yebeljen toze cha' wcháljlene Dios, na' gonle wbás.

**Da' yoble znná Jesús kan za' gótgake'  
Le'**

(Mr. 9:30-32; Lk. 9:43-45)

<sup>22</sup>Kate' ne zda Jesusen' gan nbab Galilea, gože' benne' wsedle chie' ka', na' wnné':

—Zoa no benne' wdíe' neda', Benne' Golje' Benách, lo na'gak benách ka'. <sup>23</sup>Gótgake' neda', san

kate' gak chonne ža Dios yesbane'  
neda'.

Naž benne' wsedle chie' ka' gok  
nyache' láže'gake.

### Jesús žizjwe' laze' che yodo'

<sup>24</sup>Kate' bžin Jesusen' len benne'  
wsedle chie' ka' lo yež Kapernaum,  
benne' ka', benne' zchízjwgake'  
benách ka' lázgake' che yodo',  
bžíngake' gan zoa Bedw, na'  
wnnábgekle' le', na' wnnágake':  
—¿Bi žizjw bennen' žsedle' le'  
laze' che yodo'?

<sup>25</sup>Bechebe Bedon', na' wnné':  
—O', žizjwe.

Kate' beyó'o Bedon' lo yo'o, naž  
Jesusen' la' bližtie' le', na' wnné':

—¿Biz znno' le', Smon? Benne' ka'  
znna biá'gake' yežlyó nga, ¿noz  
benne' ka' zchízjwgake' da' zízjwgak  
benách ka'? ¿Zchízjwgake' benne'  
wláž chégake' ka' o benne' zi'to' ka'?  
—Bechebe Bedon', na' gože' Le:

—Benne' zi'to' ka zchízjwgake.

Naž Jesusen' gože' le:

—Che len, bi žon byenen chizjwa'  
laza' che yodo' dan' naka' Zi'n Dios,  
kan bi be žízjwgak benne' ka' zej  
nake' benne' wláž che bennen'  
zchizjwe'. <sup>27</sup>Na'a, nich bi gonžo ga  
ža'a nitó benne', wyéj žoa'a nisdo',  
na' bezale lo nisen' dan' zzenlo' bel  
ka', na' bel nežw da' seno', wzí'-  
ban'. Kate' wsaljo' žoa'aba', žel<sub>lo</sub>' to  
mežw lasdo'. Wžín', na' bdizjw laza',  
na' lazo'.

### No benne' gake' blo, benne' zoe' ládjwgake'

(Mr. 9:33-37; Lk. 9:46-48)

La' ža na'ze benne' wsedle  
ka' che Jesusen' wbíga'gake'

gan zoe'. Wnnábgekle' Le', na'  
wnnágake':

—¿Noz benne' ládjwto' gake'  
benne' blo gan znna bia' Dios ya'abá  
chie'?

<sup>2</sup>Naž bliž Jesusen' to xkwide'  
byodo', na' bzoe'-be' gachje láwe'le  
gan nnítá'gake'. <sup>3</sup>Naž gože' légake':

—Da' li žapa' le'e, cha' bi yeyakle  
kan zej nak xkwide' ki, bi gak  
cho'ole gan znna bia' Dios ya'abá  
chie'. <sup>4</sup>Che len, no benne' gake'  
gaxjw laže', na' yeyake' kan nak  
xkwide' ni, bennen' gake' blo gan  
znna bia' Dios ya'abá chien'. <sup>5</sup>No  
benne' gape' ba la'ne to xkwide' ki  
dan' nakbe' chia', gape' nedkza' ba  
la'ne.

### Da' ka' žóngaken ga bága'žo dola'

(Mr. 9:42-48; Lk. 17:1-2)

#### 6 Lezka' wnná Jesusen':

—No benne' gone' ga gon to  
xkwide' ki dola', xkwiden' żejle'be'  
chia' neda', gakže chawé' che  
bennen' cha' wcheje' to yej wetw  
yene', na' chejžixje kwine' lo nisdo'.

<sup>7</sup>Da' nyáče' le'e gaken chegak  
benne' ka' nnítá'gake' yežlyó nga,  
benne' ka' žóngake' ga bága'gak  
ljéžgake' ka' dola'. Nnítá'tezgak da'  
ka' žóngaken ga bága'gak benách  
ka' dola', san da' nyáče' le'e gaken  
che bennen' žone' da' gonen ga no  
benne' bage'e dola'.

<sup>8</sup>Che len, cha' no'o, o ni'o gonen  
ga bago'o dola', bchogen', na'  
wžo'nen'. Gakže chawé' chio' žino'  
gan so' nbano' la'kze bi gak so'o, cha'  
nžog ni'a no'o, na' kege zoa chope  
no'o, na' chope ni'o, na' chejchó'o lo  
yi' gabíl da' batkle yolen'. <sup>9</sup>Cha' yej  
lawo' gonen ga bago'o dola', wlejen',

na' wžo'nen'. Gakže chawe' chio' žino' gan so' nbano', la'kze zoa toze yej lawo', na' kege zoa chope yej lawo', na' chejchó'o lo yi' gabíl.

**Da' žsaka' lebe Jesús che to zila'  
nnitlba'**  
(Lk. 15:3-7)

**10** Lezka' wnná Jesusen':

—Le gape chi'i kwinle nich bi wzoale chela'ale nitó xkwide' ki. Neda' žapa' le'e, nníta'tezgak wbás che ya'abá ka' gan že' Xa', Bennen' zoe' ya'abá chie', na' žape chí'igake' légakbe'. **11** Neda', Benne' Golje' Benách, bla'a nga nich yeslá' no benne' nnittle'.

**12**? Biž znnale le'e? No benne',zej nnita' to gaywá' zila' chie' ka', na' cha' ntile toba', čbi wka'ne' taplalj to galjba' ka', na' cheje' gan nak law ya'a, chejdilje' zíla'don', bian' wnitlba'? **13** Cha' wežel-le'-ba', da' li žapa' le'e, yebézele' che zíla'don' kan gone' chegak yetaplalj to galjba' ka', bia ka' bi wnítgekiba'. **14** Lezka' Xažo Dios, Bennen' zoe' ya'abá chie', bi žénele' ntile nitó xkwide' ki.

**Kan žala' yenít lawžo lježžo ka'**  
(Lk. 17:3)

**15** Lezka' wnná Jesusen':

—Cha' lježo' gone' le' zia, beyéj, bejgá'nlene' chawe' la' le'ezele. Cha' wzé nage' chio', ba beyono' bennen' lježo'. **16** Cha' bi wzé nage' chio', bche' yetó benne', o yechope' nich yežój li xtížo'o gan že'gak chope chonne benne', benne' ka' gak wzóa lígake' xtíža'le. **17** Cha' bi wzé nage' chégake', gož benne' ka' zdóbgake' che Dios, na' cha' bi wzé nage' chegak benne' ka', naž gak bennen'

lo' le' ka to benne' bi žeji'e che Dios, na' ka to benne' zchizjwe' lo wláz yež zi'to'.

**18**' Da' li žapa' le'e, yógo'te da' wži'ilele gan nak lo yežlyó nga, naken da' ba bchi'le Dios ya'abá chie', na' yógo'te da' gonnle latje lo yežlyó nga, naken da' ba benn Dios latje ya'abá chie'.

**19**' Lezka' žapa' le'e, cha' chótzele gonle toze xtíža'le lo yežlyó nga kan nak to da' nnáblele Dios, Xakza' Dios, Bennen' zoe' ya'abá chie', gonen' chele. **20** Gan zej nnita' chope chonne benne', benne' ka' zej ndobe' chia' neda', zoakza' neda' gachje láwe'le gan nníta'gake'.

**21** Naž wbiga' Bedw gan zoa Jesusen'. Wnnable' Le', na' wnné':

—Xan, čbal chi'i žala' yenít lawa' che lježa', bennen' žone' chia' da' zia? ?Gaže chi'i ka'?

**22** Jesusen' gože' le':

—Neda' žapa' le', kege gážeze chi'i ka', san chonnalaj chi kwe' da' zej naken gaže chi'i ka'.

**Žsaka' lebe Jesús che to benne'  
bi benít lawe' che lježe'**

**23** Lezka' wnná Jesusen':

—Ka gon Bennen' znnna bi'e ya'abá che Dios naken kan ben to benne' wnná bia', benne' gónele' wká'nlene' chawe' benne' wen žin chie' ka'.

**24** Kate' wzó lawe' zká'nlene' légake' chawe', bžingak benne' wen žin chie' ka', na' bedjwá'gake' to benne' gan zoe', benne' nbage'e chie' da' zan gaywá' mežw ka'. **25** Dan' bi gok chizjwe', wnná xane' to'e le' len no'le chie', na' xkwide' chie' ka', na' lezka' yógo'te da' nape', na' ki gazjw dan' nbage'e che xanen!. **26** Naž benne'

wen žin na' bzoa zibe' xni'a xane', na' wnnáb nyache'e le', na' wnné': "Xan, ben zen lažo'o neda'. Chízjwkza' le' yógo'ten." <sup>27</sup> Naž xanen' beyache' láže'le' benne' wen žin chien', na' benít lawe' chie' dan' nbage'e chie', na' bsane' le'. <sup>28</sup> Kate' bežój benne' wen žin na' ga na', la' bejchagtie' to benne' žónlene' le' tzen žin, na' bennen' nbage'e chie' láte'ze mežw. Naž bexwe' le', na' wženje' yene', na' gože' le': "Wdízjwte dan' zbago'o chia'." <sup>29</sup> Naž bennen' bzoa zibe' xni'a lježen', na' wnnáb nyache'e le', na' wnné': "Ben zen lažo'o neda'. Chízjwkza' le' yógo'ten." <sup>30</sup> Bi gónele benne' wen žin na', na' bsejwe' le' liž ya na' zejte chizjwe' dan' zbage'e chie'. <sup>31</sup> Kate' yekika' benne' wen žin ka' béngekle' da' ni, gok nyache' láže'gake' ni'a chie', na' bejzéngekle' xángake' yógo'te dan' goken. <sup>32</sup> Naž xángake' bliže' benne' wen žin na', na' gože' le': "Le', wen žin bi nako' chawe'. Yógo'te mežwn' dan' wbago'o chia' benít lawa' chio'. Bsola' dan' wbago'o chia' dan' wnnáb nyacho'o neda'. <sup>33</sup> Bi žala' yeyache' láže'lo' lježo' kan bena' neda' chio', beyache' láže'la' le'?" <sup>34</sup> Naž xane' bzá'alie', na' bdie' le' lo na'gak benne' ka' wsaka' zí'gake' le' kate' chízjwže' dot dan' zbage'e chie'.

<sup>35</sup> Naž wnná Jesusen':

—Lezka' Xa', Bennen' zoe' ya'abá chie', gone' chele le'e cha' bi yenít lawle dot láže'le da' žongak lježle ka'.

**Kan nak chegak benne' ka' želá'agake'  
yela' zchag na'**

(Mr. 10:1-12; Lk. 16:18)

**19** Kate' beyóž bchalj Jesusen' da' ni, bezé'e gan nbab

Galilea, na' bžine' gan nbab Judea gan de yechelá'a yego Jordán zaka' gan zla' wbíž. <sup>2</sup> Benne' zan zjáklene' Jesusen', na' beyone' légake' ga na'.

<sup>3</sup> Naž bałe benne' yodo' fariseo ka' blá'gake' gan zoa Jesusen' nich si' biá'gake' Le'. Wnnábgekle' Le', na' wnnágake':

—¿De latje to benne' byo nžag ne'e wsane' zo'le' ni'a che bíteteze da' žaken?

<sup>4</sup> Bechebe Jesusen', na' gože' légake':

—¿Bi bel-le da' nyejw le'e yiche la'y kan ben Dios benách ka' katen' bene' yežlyó? Benne' byo, na' no'le bene' légake'. <sup>5</sup> Ki wnná Dios: "Che len, benne' byon' žala' kwáslene' xa xne'e, na' chejgá'nlene' zo'le', na' žoptie' yeyákgake' ka toze benne'." <sup>6</sup> Ki naken, biž zej nake' chópgake' san toze benne' ba beyákgake'. Che len, bi žala' yela'agak benách ka' légake', benne' ka' Dios bene' légake' toze.

<sup>7</sup> Naž benne' yodo' ka' wnnábgekle' Jesusen', na' wnnágake':

—¿Biž chen' Moisés gože' légake' da' žonnen to benne' byo latje wnežjwe' zo'le' to yiche da' znnan želá'alene' le', na' naž gak wsane' zo'len'?

<sup>8</sup> Jesusen' gože' légake':

—Ki ben Moisés dan' nak zižje yichj láždo'le, bi'e le'e latje wsanle no'le chele ka', san kate' wzó law žata' yežlyó nga, bi goken ki. <sup>9</sup> Neda' žapa' le'e, cha' no benne' byo wsane' zo'le', na' bi wdálene' benne' byo yoble, na' cha' wchág ná'lene' no'le yoble, bage'e dola' da' zka'n ditjen yela' zchag na'. Lezka', cha' no benne' byo yoble wchág ná'lene'

no'len' bsan benne' byo chie' le',  
bage'e dola' da' zka'n ditjen yela'  
zchag na'.

10 Naž benne' wsedle chie' ka'  
góžgake' Jesusen', na' wnnágake':  
—Cha' ki naken che no benne' byo,  
benne' nžag ná'lene' to no'le, gakže  
chawe' chie' chela' bi wchág ne'e, na'  
ga'ne' toze'.

11 Bechebe Jesusen', na' gože'  
légake':

—Bi gak si' lo na'gak yógo'te  
benách diža' ni, san toze no benne'  
byo Dios zzejni'ile' le'. 12 Zej nnita'  
benne' byo ka' bi zchag ná'lengake'  
to no'le dan' bi jez nake' dot benne'  
byo, dan' ki gólgake', na' yebale  
benne' byo ka' bi zchag ná'lengake'  
to no'le dan' bséjwgak benne' ka'  
xnézgake', na' yebale benne' byo ka'  
bi zchag ná'lengake' to no'le nich  
gak góngake' xchin Dios, Bennen'  
znna bi'e ya'abá chie'. No benne'  
gak si' lo ne'e diža' ni žala' si' lo  
ne'en.

Jesús žliž chawe'e zkwide' ka'

(Mr. 10:13-16; Lk. 18:15-17)

13 Naž benne' ka' jez nake' xa  
xna'gak zkwide' ka', bedjwá'gake'  
légakbe' gan zoa Jesusen' nich xoa  
ne'e légakbe', na' nnable' Dios gon  
chawe'e légakbe', san bséjwgak  
benne' wsedle chie' ka' xnézgake'.  
14 Naž Jesusen' gože' légake', na'  
wnnén:

—Le we' zkwide' ki latje  
bíga'gakbe' gan zoa', na' bi wséjwle  
xnézgakbe', dan' benne' ka' jez nake'  
ka zkwide' ki nzí'gake' latje gan  
znna bia' Dios ya'abá chie'.

15 Naž Jesusen' bxoa ne'e légakbe',  
na' bezé'e ga na'.

To benne' wnni'a, benne' zeje' babze  
yiz

(Mr. 10:17-31; Lk. 18:18-30)

16 To benne' byo, benne' zeje'  
babze yiz, bedjwíe' Jesusen', na'  
gože' Le':

—Benne' wsedle dot chawe'. ¿Bíz  
da' naken chawe' žala' gona' nich  
gata' yela' nban da' zejlí kanne  
chia'?

17 Bechebe Jesusen', na' gože' le':

—¿Nnezlo' dan' znno' chia' kate'  
znno' naka' dot chawe'? Bi zoa no  
benne' nake' dot chawe'. Toze Dios  
nake' dot chawe'. Cha' žénelo' gata'  
yela' nban da' zejlí kanne chio', ben  
kan wnnakze Dios gonle.

18 Naž bennen' gože' Jesusen', na'  
wnnén:

—¿Bízle da' ka' wnné'?

Jesusen' gože' le':

—Da' wnnakze Moisés katen'  
wnnén:

Bi goto' benách ka'.

Bi gono' dola' da' zka'n ditjen  
yela' zchag na'.

Bi kwano'.

Bi nnio' che lježo' da' wen laže'.

19 Wdape ba la'ne xa xno'o.

Bži'il lježo' ka' kan nži'il kwino'.

20 Naž bennen' zeje' babze yiz  
gože' Jesusen', na' wnné':

—Yógo'te da' ki žona' kate' wzó law  
naka' zkwide'. ¿Zoa yetó da' žala'  
gona'?

21 Jesusen' gože' le':

—Cha' žénelo' gako' chawe' law  
Dios, wyéj, yjete' da' napo', na'  
mežwn' da' si'o, bnežjwn chegak  
benne' yache' ka'. Ki gata' yela'  
wnni'a chio' ya'abá che Dios. Naž da,  
benlen neda' tzen.

**22**Kate' bennen' zeje' babze yiz  
benle' da' ni, beyeje', na' žak nyache'  
laže'e dan' náplie' yela' wnni'a.

**23**Naž Jesusen' gože' benne'  
wsedle chie' ka', na' wnné':

—Da' li žapa' le'e, gak zede cho'o to  
benne' nape' yela' wnni'a gan znna  
bia' Dios ya'abá. **24**Yetó žapa' le'e,  
nakže zede che bennen' nape' yela'  
wnni'a choe'e gan znna bia' Dios ka  
te to bia nwa'ba' ywa' lo nag yeche'.

**25**Kate' béngekle benne' wsedle chie'  
ka' da' ni, bebángekle', na' wnnágake':  
—¿Noz̄kze benne' gak yelé', cha'?

**26**Bwia Jesusen' légake', na' wnné':  
—Bi gak gongak benách ka' ki, san  
Dios gak gone' yógo'te.

**27**Naž bechebe Bedw, na' gože'  
Jesusen':

—Bwia nga, neto' ba bka'nto' yógo'te,  
na' zá'lento' Le'. ¿Bizzé gata' cheto'?

**28**Jesusen' gože' légake':

—Da' li žapa' le'e, ža na' katen' wkób  
yežlyó nga, na' kwí'a gan nna bi'a nedá,  
Benne' Golje' Benáč, gan gaka' Benne'  
Blo, le'e na' žónlenle neda' tzen na'a,  
kwe'le chežinno latje ka' gan nna bia'le,  
na' wchi'a laže'le chežinno kwe'te yež  
ka' chegak za'só Israel. **29**No benne'  
žka'ne' liže', o biche'e ka', o zane' ka', o  
xe', o xne'e, o zo'le', o zi'ne' ka', o yežlyó  
chie' ka', nich gone' xchina', si' bennen'  
yetó gaywá'teže ka', na' lezka' gata' yela'  
nban da'zejlí kanne chie'. **30**Benne'  
zan, benne'zej nake' benne' blo na'a,  
gá'ngake' ka'ze, na' benne' ka'zej  
nga'ne' ka'ze na'a, gá'gake' benne' blo.

Žsaka' lebe Jesús kan žongak  
benne' wen žin ka'

**20** Lezka' wnná Jesusen':  
—Kan gon Dios, Bennen'  
znna bi'e ya'abá chie', naken ka ben

to benne' xan yo'o. Bžoje' zildo', na'  
bejtilje' benne' wen žin ka' nich  
góngake' žin lo yežlyó chie' gan  
naze' lba uba ka'. **2**Kate' ba bgá'nlene'  
benne' wen žin ka' chawé', chizjwe'  
légake' to mežw da' naken lazjw  
to benne' che to ža, bsele'e légake'  
chjéngake' žin lo yežlyó chien'. **3**Kate'  
bežoje' xsile, ble'ele' yebale benne'  
ka' nnítá'gake' ka'ze lawe' ya'a. **4**Gože'  
légake': “Lezka' le'e, le chej lo yežlyó  
chian', na' chizjwa' le'e da' naken  
chawé!” La' jaktie' légake'. **5**Bežój  
benne' xan yo'on' da' yoble wawbíž,  
na' lezka' kate' žedá chonne, na'  
tšebe ka bene', bsele'e benne' ka' lo  
yežlyó chien', benne' ka' bejxake'e  
ga na'. **6**Lezka' bežoje' katen' yelate'  
zoa wbíž, na' bejxake'e yebale benne'  
ka' nnítá'gake' ka'ze ga na', na' gože'  
légake': “¿Bíz chen' zoale nga ka'ze  
dot ža, na' bi be žin žonle?” **7**Benne'  
ka' góžgake' le', na' wnnágake': “Nitó  
benne' bi benne' xchinto.” Naž gože'  
légake': “Lezka' le'e, le chej lo yežlyó  
chian', na' chizjwa' le'e da' naken  
chawé!” **8**Kate' za' žale, benne' xan  
yo'on' gože' bennen' yo'ogak lo ne'e  
benne' wen žin ka', na' wnné': “Bliž  
benne' wen žin ka' nich wnezjo'  
lážjwgake', na' chizjo' zgá'ale benne'  
ka' bžíngake' ze lawte. Te na' chizjo'  
benne' ka' bžíngake' zgá'alegake'.”

**9**Naž bžíngak benne' ka' yjéngake' žin  
katen' yelate' zoa wbíž, na' wzí'gake'  
to weje' to mežw da' naken lazjw  
to benne' che to ža. **10**Kate' bžíngak  
benne' ka' yjéngake' žin zgá'alegake',  
gókgakle' sí'gake' da' zenže, san  
lezka' wzí'gake' to weje' to mežw  
da' naken lazjw to benne' che to ža.  
**11**Kate' wzí'gaken', wnnégake' che  
benne' xan yo'on', **12**na' wnnágake':

“Benne' ka' bžíngake' kate' ze lawte, to chí'ido'ze béngake' žin, na' toze ka wdizjo' légake' ka neto', na' neto' bento' žin dot ža, na' wyéyele'eto' lo wbá.” <sup>13</sup>Bechebe xan yo'on', na' gože' toe: “Bicha'a, bi be žona' chio' da' bi naken chawé. ¿Bi bga'n cháwe'žo si'o to mežw da' naken lazjw to benne' che to ža? <sup>14</sup>Wzí' lazjo', na' beyéj ližo'. Neda' žénela' chizjwa' benne' ki, benne' yjéngake' žin kate' ze lawte toze kan žizjwa' le'. <sup>15</sup>¿Bi nzi' lo na'a wconla' žin da' naken chia' ka žénela'? ¿Zge'elo' lježo' dan' žónnli'a chie'?” <sup>16</sup>Ki naken, bałe benne', benne' ka' zka'ngak benách ka' légake' ka'ze, gákake' blo, na' bałe benne', benne' ka'zej nake' blo na'a, gá'ngake' ka'ze. Benne' zan žliža' san babze benne' ka' nbégake'.

### Jesús znne' da' yoble kan za' gótgake' Le' (Mr. 10:32-34; Lk. 18:31-34)

<sup>17</sup>Kate' Jesusen' ne yoe'e nez, zeje' lo yež Jerusalén, bchi'e cheze chežínnote benne' wsedle chie' ka', na' gože' légake':

<sup>18</sup>—Le wia nga, yo'ožo nez zejžo yež Jerusalén, gan soa to benne' wdí'e neda', Benne' Golje' Benách, lo na'gak bxoz wnná bia' ka', na' lo na'gak benne' yodo' wsedle ka', na' chóggake' chia' gata'. <sup>19</sup>Wdégake' neda' lo na'gak benne' zi'to' ka', benne' ka' gon dítjekle' neda'. Chíngake' neda', na' wdá'gake' neda' le'e yag kroze, san kate' gak chonnie ža, Dios yesbane' neda' lo yela' got.

### Da' wnnáb xna'gak Jakob, na' Žwa (Mr. 10:35-45)

<sup>20</sup>Naž xna'gak Jakob, na' Žwa, zí'n Sebedeo ka', bžínlene' chope' ka'

law Jesusen', na' bzoa zibe' xni'e Le', na' wnnable' Le' to da' gonze' chie'.

<sup>21</sup>Jesusen' wnnable' le', na' wnné':

—¿Biz žénelo'?

Gože' Le':

—Wnná kwe' to zilna' ni kwito' li ža, na' yetobe' kwe'be' kwito' yegle gan nna bi'o.

<sup>22</sup>Bechebe Jesusen', na' gože' légake':

—Bi nnézlele da' znnable. ¿Wak sóelele da' saka'a neda', na' yezoale nis kan yezó'a neda' nis lo yela' got?

Góžgake' Le':

—Gakto'.

<sup>23</sup>Naž Jesusen' gože' légake':

—Da' li da' žala' saka'a neda', lezka' gaken chele, na' da' žala' yezó'a' neda' nis, lezka' yezoale le'e nis, san nich kwe'le kwita' li ža, o kwita' yegle, bi nzi' lo na'a kwia' no benne' gonnán' chie', san gata' chegak benne' ka' Xa' ba bkwezen' chégake'.

<sup>24</sup>Kate' béngekle yechí benne'

wsedle ka' che Jesusen' da' ni,

bžá'agake'. <sup>25</sup>Naž Jesusen' bliže' légake', na' wnné':

—Nnézkzelele kan žongak benne' ka', benne' znnna biá'gake' benne' zi'to' ka', kan zdítleche znnna biá'gake' légake', na' benne' ka'zej nakže' blo zkóngekle' la' ljéžgakkze' ka' žin.

<sup>26</sup>Bi gaken ki chele. Nótetezle le'e,

benne' žénele' gake' zen gan zoale,

žala' gone' žin che yezíka'le. <sup>27</sup>Lezka',

nótetezle le'e, benne' yénele' gake' blo,

žala' gake' ka to benne' ndo'w che yezíka'le. <sup>28</sup>Lezka' neda', Benne'

Golje' Benách, bla'a nga, kege nich

gon no benne' xchina', san nich

gáklena' benách ka', na' wdía' yela'

nban chia', da' chizjwa' lo wlazgak

benne' zan nich yelágake'.

**Žeyón Jesús chope benne' lo chole ka'**  
(*Mr. 10:46-52; Lk. 18:35-43*)

**29** Kate' ne zežójgake' lo yež Jerikó, benne' zan zjáklene' Jesusen'. **30** Zej nnita' chope benne' lo chole ga na', benne' ka' žé'gake' žoa'a nez. Kate' béngekle' zde Jesusen' ga na', wnnégake' zížje, na' wnnágake': —Xan, za'só Dabí, beyache' laže'l neto'.

**31** Benne' zan ka' bchí'igekle' légake' gá'ngake' žize, san wnnégake' zížjeze, na' wnnágake': —Xan, za'só Dabí, beyache' laže'l neto'.

**32** Naž wléz Jesusen', na' bliže' légake'. Wnnable' légake', na' wnné': —¿Biz žénelele gona' chele?

**33** Góžgake' Jesusen': —Xan, žénelto' gono' ga yeyaljw yej lawto'.

**34** Naž beyache' laže'l Jesusen' légake', na' wdane' yej láwgake'. La' beyálwjtegak yej láwgake', na' jáklenе' Jesusen'.

**Zka'n zéngake' Jesús kate' ne žoe'e lo yež Jerusalén**

(*Mr. 11:1-11; Lk. 19:28-40; Jn. 12:12-19*)

**21** Kate' bžin Jesusen' len benne' ka' žónlengake' Le' tzen gawze gan že' yež Jerusalén, na' nnítagake' gan že' yež Betfagé zan Ya'a Yag Olibo, bsele'e Le' chope benne' wsedle chie' ka', **2**na' gože' légake':

—Le chej lo yeždon' da' žen' lawle ga zoažo ni, na' chejžáka'le to burro wná' da'ba' ga na', len to burro byodo' cheba'. Le chejseže'-ba', na' le yedjwá'-ba' chia'. **3** Cha' no benne' bi da' yi'e le'e, le ye'e: "Xanžon' žénele'-ba'." Naž sele'e'-ba' chia'.

**4**Ki goken, bžin da' bzoj bennen' bchajle' lo wláz Dios, katen' wnné':

**5** Le ye' benne' ka' nnítagake' yež Sión:

"Le wia nga, Benne' nna bi'e le'e ze'e chele.

Lo yela' gaxjw laže' chie' ži'e xkože' to burro.

Ži'e xkože' to búrrodo' che to bia žwa'ba' ywa!"

**6**Naž jak benne' wsedle chie' ka' ga na', na' béngeake' kan gož Jesusen' légake'. **7** Beché'gake' burro wná' na' len burro byodon', na' bxóagake' laže' yicha' chégake' ka' xkóže'ba', na' wžé' Jesusen' law laže' ka'.

**8**Lezka' wnnítagak benne' zan ga na', na' bchílgake' laže' ka' žxoá yéngake' lo nez. Yebale' bchíbgake' zin da' bxóagake' lo nez. **9**Zížje wnnegak benne' ka' zjake' lawle, na' benne' ka' zjáklene' Jesusen', na' wnnágake':

—iGa'n zen Le', za'só Dabí! iBa nez zen naken che benne' ni ze'e ni'a che La Xanžo! iGa'n zen Dios!

**10** Kate' wyáz Jesusen' lo yež Jerusalén, yógo'te benne' che yežen' béngeake' žo'osbé. Benne' zan góžgake' ljéžgake' ka', na' wnnágake':

—¿Noz bennen'?

**11** Yezika' benne' ka' wnnágake':

—Benne' ni Jesús, bennen' zchalje' lo wláz Dios. Nak laže' Nasaret gan nbab Galilea.

**Jesús zchache' li'a yodo'**

(*Mr. 11:15-19; Lk. 19:45-48; Jn. 2:13-22*)

**12** Kate' wyáz Jesusen' lo li'a yodo' che Dios, blage' na'le yógo'te benne' ka' žóte'gake' na' benne' ka' žá'wgake' lo li'a yodon!. Lezka' bžixe'

blag ka' chegak benne' ka' zchá'gake' mežw che yež zi'to' ka', na' da' ka' želbe'le benne' ka' žóte'gake' plomdo' ka'. <sup>13</sup>Naž gože' lágake':

—Nyejw le'e yiche la'y da' znnan: "Liža' sin' yo'o gan wcháljlengak benách ka' Dios" san le'e ba benlen kan nak to yo'o chegak benne' wbán ka'.

<sup>14</sup>Kate' ne zoa Jesusen' lo zchil yodo', bale benne' lo chole ka' len benne' ka' bi žak sá'gake', wbíga'gake' gan zoe', na' Le' beyone' lágake'. <sup>15</sup>Kate' bxoz wnná bia' ka' len benne' yodo' wsedle ka', blé'egekle' yela' wak ka' da' žon Jesusen', na' lezka' béngekle' znnegak zižje xkwide' ka' lo zchil yodo', na' znnágakbe': "iGa'n zen za'só Dabí!" <sup>16</sup>naž bžá'agake', na' góžgake' Jesusen':

—¿Bi ženlo' da' želnná xkwide' ki? Bechebe Jesusen', na' wnné':

—O', ženlan'. ¿Batkle bel-le da' nyejw le'e yiche la'y da' znnan kikze žala' gaken? Ki znnan: "Beno' Le' ga žolgak xkwide' ka', na' bi' že'n ka', bi' ka' ne žáze'gakbe', da' žoe láwgakbe' neda' da' naken dot li laže'."

<sup>17</sup>Naž Jesusen' bezé'e gan mnítal'gake', na' bežoje' lo yež Jerusalén. Wyej' lo yež Betania gan bga'ne' dot yele.

### Jesús zdile' to yag higo

(Mr. 11:12-14, 20-26)

<sup>18</sup>Kate' za' ža'ní', na' zeyéj Jesusen' lo yež Jerusalén, zdone'. <sup>19</sup>Ble'ele to yag higo da' žen' kwit nez, na' wbige'e gan žen', san bi be bžel-le' da' zbian. Xláge'ze žian. Naž Jesusen' gožen':

—Biž kwia da' zix chio'.

Naž la' wbižte yag higon'. <sup>20</sup>Kate' blé'egekle benne' wsedle chie' ka' da' ni, bebángekle'. Wnnábgekle' Jesusen', na' wnnágake':

—¿Nakx goken, la' wbižte yagen'? <sup>21</sup>Bechebe Jesusen', na' gože' lágake':

—Da' li žapa' le'e, cha' chejle'le che Dios, na' bi gak chope láže'le, kägeze wak gonle kan bena' che yagen', san cha' ye'le ya'a nga: "Bkwas na'le, na' bejsóa lo nisdo'" gaken kan nnale. <sup>22</sup>Lezka', yógo'te da' nnable kate' wcháljlénle Dios, cha' chejle'le che Dios gonen' chele, si'le dan' nnable.

### Yela' wnná bia' da' nzi' lo na' Jesús

(Mr. 11:27-33; Lk. 20:1-8)

<sup>23</sup>Wyáz Jesusen' lo zchil yodo', na' kate' ne žsedle' benách ka' nnítal'gake' ga na', bxoz wnná bia' ka' len benne' gole ka', wbíga'gake' gan zoe'. Wnnábgekle' Le', na' wnnágake':

—¿Biz yela' wnná bia' nzi' lo no'o, žono' da' ki? ¿Noz benne' bdie' lo no'o yela' wnná bian'?

<sup>24</sup>Bechebe Jesusen', na' gože' lágake':

—Lezka' neda' nnablal'e'e to. Cha' ye'le neda' kan naken, neda' yapa' le'e bi yela' wnná bia' nzi' lo na'a žona' da' ki. <sup>25</sup>¿Noz benne' bsele'e Zwan' nich bezóe' benách ka' nis? ¿Dios bsele'e le', o bséla'gak benne' ka' le'?

Naž wzó láwgak benne' yodo' ka' znnágake' la' lágakze':

—Cha' nnažo: Dios bsele'e le', la' ye'tie' žo'o: "¿Biz chen' bi bejle'le chie'?" <sup>26</sup>San cha' nnažo: bséla'gak benne' ka' le', žébežo da' gongak benne' wláž ka', dan'

žejlél'gake' yógo'tegake' bchalj Zwan' lo  
wláz Dios.

<sup>27</sup>Che len bež'i'gake', na' góžgake'  
Jesusen':

—Bi nnezlto'.

Jesusen' gože' légake':

—Lezka' neda' bi yapa' le'e bi yela'  
wnnábia' nzi' lo na'a žona' da' ki.

### Žsaka' lebe Jesús kan nak chegak chope xkwide' byo ka'

<sup>28</sup>Naž Jesusen' gože' benne' yodo' ka':  
—¿Bíz nnale le'e? Wzóa to benne'  
wnnítagak chope xkwide' byo chie'.  
Gože' to xkwide' chien', na' wnné: "Zi'na',  
wyéj na'a chjeno' žin lo yežlyó chia' gan  
naza' lba uba ka'." <sup>29</sup>Bež'i' xkwiden', na'  
gožbe'-ne: "Bi ženela' cha'a." Wdé na'  
beyát láže'be', na' yjenbe' žin na'. <sup>30</sup>Naž  
bennen' gože' yetó xkwide' chien', na'  
toze kan wnné. Bež'i' xkwiden', na'  
gožbe'-ne: "O', xe. Cha'a." San bi wyéj  
xkwiden'. <sup>31</sup>¿Nole xkwide' chope ka'  
benbe' da' žaz láže' xabe'?

Bež'i'igake', na' góžgake' Jesusen':

—Bi' nežw.

Naž Jesusen' gože' légake':

—Da' li žapa' le'e: benne' wechizjw  
ka', benne' žóngake' da' kegle, na' no'le  
le'e ka', chjake' zgáalegake' ka le'e, na'  
chóogake' gan zwna bial Dios. <sup>32</sup>Ki  
gaken dan' Zwa, bennen' bezóe' benách  
ka' nis, blé'e gan zoale, na' bsdle' le'e  
da' naken chawé' kan žala' gonle, na' le'e  
bi bejle'le chie', san benne' wechizjw ka'  
na' no'le le'e ka', bejlé'gake' chie'. Lá'kze  
blé'elele da' ni, bi beyát láže'le nich  
chejle'le chie'.

### Ka nak chegak benne' wen žin ka' bi zej nake' chawé'

(Mr. 12:1-12; Lk. 20:9-19)

<sup>33</sup>Lezka' wnná Jesusen':

—Le wzé nag yetó da' wsaka'  
leba'. Wzóa to benne' xan yo'o, na'  
beyaze' lba uba ka' lo yežlyó chie'.  
Wbeke' to le'je chen, na' bche'ne'  
to bloj lo yej gan wsíe' xis uba ka'.  
Lezka' bene' to yo'o ža'le gan gak to  
benne' wie' dot yežlyó chien'. Naž  
bdie' yežlyón' lo na'gak benne' wen  
žin ka', nich sí'gake' late' weje, na'  
wyeje' to yež z'i'to'.

<sup>34</sup>Kate' bžin ža wchíbgake' uba  
ka', xan yežlyón' bsele'e bałe ni'a  
ne'e gan zej nnita' benne' wen žin  
ka' nich sí'gake' da' žeyala' chie'.

<sup>35</sup>Naž benne' wen žin ka' békxwgake'  
ni'a ne'e ka'. Béngake' toe' we',  
na' yetóe' bétgake' le', na' yetóe'  
bžé'egake' le' yej. <sup>36</sup>Da' yoble xan  
yežlyón' bsele'e yebałe ni'a ne'e ka',  
na' gókgake' benne' zanže ka benne'  
ka' bsele'e zga'ale, na' tlebe bengak  
benne' wen žin ka' chégake'.

<sup>37</sup>Kate' ze lawte, bsele'e zi'ne'  
gan nnítagake'. Wzá' láže'e, na'  
wnné: "Gápegake' xkwide' chia' ba  
la'ne." <sup>38</sup>Kate' benne' wen žin ka'  
blé'egekle' zi'ne' na', la' wnnátegake'  
la' légakze': "Xkwide' ni gak chebe'  
yežlyó nga. Le cho'o, gotžo-be', na'  
da' žala' gak chebe' gaken chežo."

<sup>39</sup>Naž békxwgake'-be'. Bebjégake'-be'  
na'le lo yežlyón' gan zej naz lba uba  
ka', na' bétgake'-be'.

<sup>40</sup>Naž Jesusen' wnnable' benne'  
yodo' ka', na' wnné:

—Kate' yelá' benne' xan yežlyón',  
čnakx gone' chegak benne' wen žin  
ka'?

<sup>41</sup>Bež'i'igak benne' yodo' ka', na'  
góžgake' Jesusen':

—Wzía yi'e benne' wen da' zinnj  
ka', na' yežlyó chien' wdíe' lo na'gak  
yebałe benne' wen žin ka', benne'

wnéžjwgake' da' žeyala' chie' kate'  
žin ža chíbgake' uba ka'.

<sup>42</sup>Naž Jesusen' gože' légake':  
—čBatkle bel-le dan' nyejw le'e  
yiche la'y kan nak da' ni? Ki znnan:  
Yej na' da' bzoa chela'ale benne'  
wen yo'o ka',  
na'a naken yej len yo'o blo che  
ze'e.  
Xanžo na'kze bene' ga naken ki,  
na' naken to da' žonen ga  
žebanlžo.

<sup>43</sup>Che len žapa' le'e, latje chele  
gan znna bia' Dios yeké'n chele, na'  
gatan' chegak benne' ka' góngake'  
kan žala' gon no benne' nzi'e latjen'.  
<sup>44</sup>No benne' wtope' lo yej na', la'  
kwinze' wzia yi'e, na' cha' yej na'  
chejbagan' no benne', wzozjen le'.

<sup>45</sup>Kate' bxoz wnná bia' ka'  
len benne' yodo' fariseo ka'  
béngekle' dan' bsaka' lebe Jesusen',  
gókbe'egekle' bchalje' kan nak  
chégake'. <sup>46</sup>Gónegekle' góxwgake'  
Le', san bžébegake' benne' zan  
nnítal'gake' ga na', dan' žejl'gake'  
nak Jesusen' to benne' zchalje' lo  
wláz Dios.

Žsaka' lebe Jesús kan nak  
che lni che yela' zchag na'

**22** Da' yoble Jesusen'  
bcháljlene' benne' ka'  
žónlengake' Le' tzen. Bsaka' lebe', na'  
wnné:

—Kan gak chegak benne' ka',  
benne' chó'ogake' gan znna bia' Dios  
ya'abá chie', naken kan gok chegak  
benne' ka', bliž to benne' wnná bia'  
légake' kate' bene' lni che ža zchag  
na' xkwide' byo chie'. <sup>3</sup>Bsele'e ni'a  
ne'e ka' nich chejxí'gake' benne' ka'  
ba bliže' nich yídgake' lni chebe',

san bi gónegekle' yídgake'. <sup>4</sup>Naž  
bsele'e yebaše ni'a ne'e ka', na' gože'  
légake': "Le chejzenle benne' ka'  
ba bliža', na' ye'le légake': Le wia  
nga, ba nzí'ni'a da' gawžo. Ba betto'  
xpeža' ka', na' lezka' bia beže ženne'  
chia' ka'. Yógo'te ba wzí'ni'a. Le  
da, soažo lni che xkwide' chia', bin'  
zchag na'be'!" <sup>5</sup>Benne' ka' bejlížgake'  
bi wdápegake' légake' ba la'ne, na'  
jake' che chégake'. Toe' yjene' žin,  
na' yetóe' wyeje' chje'w chjete'.

<sup>6</sup>Yebaše' béxwgake' ni'a ne'e ka', na'  
ben zí'gake' légake', na' bétgake'  
légake'. <sup>7</sup>Kate' benne' wnná bian'  
benle' da' ni, bže'e, na' bsele'e benne'  
chie' ka', benne' žjake' lo wdile, na'  
bétgake' benne' wet benách ka', na'  
bzéygake' lážgake'. <sup>8</sup>Naž benne'  
wnná bian' gože' ni'a ne'e ka', na'  
wnné: "Da' li ba wzí'ni'a che lni na',  
san benne' ka' bliža' bi gókgake' zi  
yedjénlengake' neda' tzen lni. <sup>9</sup>Le  
chej na'a gan nak lo nez ka', na' le  
wlíž yógo'te benne' ka' chejxáka'le  
ga na' nich yídgake' lni che xkwide'  
chia', bin' zchag na'be'!" <sup>10</sup>Naž  
bžojgak ni'a ne'e ka', na' jake' gan  
nak lo nez ka', na' btóbgake' yógo'te  
benne' ka' bejxáka'gake' ga na',  
benne' chawé' ka' na' benne' wen da'  
kegle ka', na' gan žak lni wža'ten  
benách ka'.

<sup>11</sup>'Kate' wyó'o benne' wnná bian'  
ga na' nich wie' benne' ka'zej ndobe'  
ga na', ble'ele' to benne' bi nakwe'  
laže' zaka' dan' bnezjwe' chegak  
benne' ka' nnítal'gake' lni na'. <sup>12</sup>Naž  
gože' bennen': "Bicha'a, čzo' nga, na'  
bi nako' laže' zaka' dan' bnezjwa'  
chegak benne' ka' nnítal'gake' lni?"  
Bennen' wzóa žize'. <sup>13</sup>Naž benne'  
wnná bian' gože' ni'a ne'e ka', na'

wnné': "Le wchéj ni'a na' bennen', na' le chejžo'n-ne' na'le gan že' chol, gan kweže', na' wxéj laye'e lo yela' nyache' laže' chie."

<sup>14</sup>Naž Jesusen' gože' benne' yodo' ka':

—Benne' zan bliža', san babze benne' ka' nbégake'.

### Zchalj Jesús che da' žízjwžo lazžo

(Mr. 12:13-17; Lk. 20:20-26)

<sup>15</sup>Naž beza'gak benne' yodo' fariseo ka' ga na', na' béngake' xtíža'gake' nich góngake' ga nna Jesusen' to nich gak yesbága'gake' Le' zia. <sup>16</sup>Nich góngake' ki bséla'gake' bale benne' ka' žónlengake' légake' tzen gan zoa Jesusen', len benne' ka' žónlengake' Herodes tzen. Benne' ka' góžgake' Jesusen':

—Benne' wsedle, nnezlto' zchaljo' Le' káteze naken, na' nak dot da' li da' žsедlo' kan naken che Dios, na' bi zzi'o da' znnázegak benách kan nak chio', dan' bi zchi'a lažo'o benách ka' kan nak da' želnnaze'. <sup>17</sup>Bzenle neto'. ¿Bíz znnó' le'? ¿Žon byenen o bi žon byenen chízjwto' lazto' che benne' Sésar, bennen' yež zi'to', bennen' zwna bi'e žo'o?

<sup>18</sup>Žákbe'ele Jesusen' žénegekle' kwéjgake' Le' diža', nich gak yesbága'gake' Le' zia, na' gože' légake':

—Le'e, benne' ka' zloé'ezele chawe' kwinle, ¿biž chen' znnale da' wzóan neda' žoa'a ya'a? <sup>19</sup>Le wloé'el neda' to mežw da' žízjwle lazle.

Naž bloé'egekle' Le' to mežw che yež Roma. <sup>20</sup>Jesusen' wnnable' légake', na' wnné':

—¿Noz benne' da' ni lawe', na' noz benne' nyejw le' le'e mežw ni?

<sup>21</sup>Góžgake' Le':

—Che benne' Sésar da' ka'.

Naž Jesusen' gože' légake':

—Le chizjw benne' Sésar da' zej naken che benne' Sésar, na' Dios da' zej naken che Dios.

<sup>22</sup>Kate' béngekle' da' ni,

bebángekle' kan nak diža' chawen' da' bchalj Jesusen'. Belka'ne' Le', na' la' bezá'tegake' ga na'.

### Želnnable' Jesús kan žala' yebangak benne' gat ka'

(Mr. 12:18-27; Lk. 20:27-40)

<sup>23</sup>La' ža na'ze benne' yodo' saduseo ka', benne' ka' znnágake' bi yebangak benne' gat ka', wbíga'gake' gan zoa Jesusen'. Wnnábgekle' Le', <sup>24</sup>na' wnnágake':

—Benne' wsedle, Moisés wnné': "Cha' gat to benne' zoa zo'le, na' bi zoa no xkwide' chie, bi' biche' bennenn' žala' wchág nálenbe' zo'le', nich soa za'só benne' biche'ben', bennenn' gote'." <sup>25</sup>Wnnítá'gak gaže bi' byo ka' zej nak biche'gakbe' gan zoato'. Bi' byo nežw bchag nálenbe' to no'le, na' gotbe'. Dan' bi wzóa no xkwide' chebe', xkwide' bežopen' bchag nálenbe' no'le wzeben' che bi' biche'ben'. <sup>26</sup>Lezka' goken che xkwide' bežopen', na' lezka' che xkwide' beyonnen', na' toze kan goken chegak gážtebe', dan' gótgakbe' yógo'tebe'. <sup>27</sup>Kate' ze lawte lezka' got no'len'. <sup>28</sup>Na'a, kate' žin ža yebangak benne' gat ka', nbole bi' gaže ka' gak no'len' chebe', dan' yógo'tebe' bchag nálengakbe' no'len'?

**29** Naž bechebe Jesusen', na' gože' légake':

—Nchíxele le'e dan' bi žejni'ilele da' nyejw le'e yiche la'y, na' dan' bi nónbia'le yela' wak che Dios. **30** Kate' žin že yebangak benne' gat ka', biž gak yela' zzoalen no'le, na' bi wchág ná'gake', san gákgake' kan zej nak wbás la'y ka' che Dios, wbás ka' nnít'a'gake' ya'abá chie'. **31** Cha' yebangak benne' gat ka', čbi na' gol-le dan' gožkze Dios le'e? **32** Ki wnné': "Neda' naka' Dios che Bran, na' Dios che Isaak, na' Dios che Jakob." Dios bi nake' Dios chegak benne' gat ka', benne' nátgake' to chi'ize, san nake' Dios chegak benne' ban ka', benne' nnít'a'gake' nbángake' la'kze gótgake' že ni'te.

**33** Kate' béngekle benne' ka' nnít'a'gake' ga na' da' ni, bebángekle' ni'a che dan' žedle Jesusen' légake'.

**Da' bchi'le Dios gonžo da' naken blo**  
(Mr. 12:28-34)

**34** Kate' gókbe'egekle benne' yodo' fariseo ka' da' ben Jesusen', kan bnnita' zie' benne' yodo' saduseo ka', naž bdóbgake' yógo'tegake' gan zoe'. **35** Zoa to benne' ládjwgake' ga na', benne' nsedle' da' bsedle Moisés, na' gónele' si' bi'e Jesusen'. **36** Che len wnnable' Jesusen', na' wnné':

—Benne' wsedle, čibzle dan' bchi'le Dios gonžo naken blo?

**37** Jesusen' gože' le':

—Bži'il Xano' Dios dot lažo'o, na' lo dot yichj lazdo'o, na' lo dot yela' žejni'il chio'. **38** Da' ni naken da' bchi'le Dios da' naken blo, na' nakžen zen. **39** Da' bchi'le Dios da' naken da' bežope, naken tlebe, na' ki znnan: "Bži'il lježo' kan nži'il

kwino!." **40** Da' chopen ki, da' ka' bchi'le Dios, zej naken gan zegak yógo'te da' bchi'le Dios, na' yógo'te da' bsédgekle benne' ka' bcháljgake' lo wláz Dios.

**čNož benne' nak Benne' Cristo zi'ne'?**

(Mr. 12:35-37; Lk. 20:41-44)

**41** Katen' zej nnita' tzen benne' yodo' fariseo ka', Jesusen' wnnable' légake', **42** na' wnné':

—čBiz znnale le'e che Benne' Criston'? čNož benne' nak Benne' Criston' zi'ne'?

Beži'igake', na' wnnágake':

—Za'só Dabí nake'.

**43** Naž Jesusen' gože' légake':

—čBiz chen' Dabí na'kze bchalje' kan nak chie', na' wnné': "Xana"?" Ki wnné' katen' bchalje' lo wláz Dios Be' La'y, na' wnné':

**44** Xanžo Dios gože' Xana':

"Wžé' kwita' li že,  
na zejte gona' ga wzóa zibgak  
benne' ka' xni'o, benne' bi  
zlé'egekle' Le' chawe!"

**45** Cha' Dabín' wnné' nake' Xane', čnakxkze naken, znnale le'e nake' za'só Dabín'?

**46** Bi gok no benne' yeži'e, na' kate'  
wzó law že na', bi bežogle no benne'  
bi da' nnable' Le'.

**Jesús žesbage'e benne' yodo' ka' zia**

(Mr. 12:38-40; Lk. 11:37-54; 20:45-47)

**23** Naž Jesusen' bcháljlene'  
benne' wsedle chie' ka', len  
benne' ka' nnít'a'gake' ga na'. **2** Na'  
gože' légake':

—Benne' yodo' fariseo ka' na'  
benne' yodo' wsedle ka'zej že' latje  
che Moisés, nich wsédgekle' benách  
ka'. **3** Che len, le gon yógo'te da'

yé'gake' le'e, san bi gonle le'e kan žóngake', dan' to da' znnágake', na' yetó da' žóngake'. <sup>4</sup>Da' zchí'igekle' benách ka' naken ka to ywa' zí'ile'e da' bi gak no benne' we'e, na' zgó'ogaken' ža' yengak benách ka', san légake' bi žénegekle' wchá'gaken', kege len toze xben ná'gake'. <sup>5</sup>Žóngake' yógo'te da' žóngake' nich lé'egekle benách ka' légake'. Žéngake' da' zchéjgake' yen ná'gake', na' žoa'a xgágake' gan nyejw to da' nyejwn le'e yiche la'y, na' ztónngake' lože laže' da' zej nakwe', da' zloe'elen žápgake' Dios ba la'ne. <sup>6</sup>Žénegekle' kwé'gake' gan nak latje blo gan zdóbgake' žáwgake' tzen, na' gan nak latje blo lo yo'o gan zdóbgake' nich yéngekle' xtiža' Dios. <sup>7</sup>Lezka', žénegekle' gópegak benách ka' légake' ba la'ne kate' žápegake' légake' "Padiox" gan nnítá'gak benách ka', na' žénegekle' ye'gak benách ka' légake': "Padiox, benne' wsedle."

<sup>8</sup>'San le'e, bi žala' gonle ga no benne' yi'e le'e: "Benne' wsedle" dan' zoa toze Benne' nake' Benne' wsedle chele, neda', Benne' Cristo, na' yógo'tele nakle lježle tole yetole. <sup>9</sup>Bi ye'le nitó benne' yežlyó nga, bi nnale: "Xe" dan' zoa toze Benne' nake' Xale, Bennen' zoe' ya'abá chien'. <sup>10</sup>Bi gonle ga no benne' yi'e le'e: "Xan" dan' zoa toze Benne' nake' Xanle, neda', Benne' Cristo. <sup>11</sup>No benne' zoe' ládjwle, benne' žone' xchinle yezíka'le, benne' ni gake' blo gan zoale. <sup>12</sup>Cha' no benne' gon kwine' benne' blo, ka'ze ga'ne', san no benne' nake' gaxjw laže', gake' benne' blo.

<sup>13</sup>'Da' nyáche'le'e naken chele le'e, benne' yodo' wsedle ka', na' chele

le'e, benne' yodo' fariseo ka', benne' zloé'ezele chawé' kwinle. Žséjwle xnezgak benách ka' žénegekle' žíngake' gan znnna bia' Dios ya'abá chien'. Le'ekzle bi žo'ole ga na', na' bi žonnle latje cho'ogak benne' ka' žénegekle' chó'ogake' ga na'!

<sup>14</sup>'Da' nyáche'le'e naken chele le'e, benne' yodo' wsedle ka', na' chele le'e, benne' yodo' fariseo ka', benne' zloé'ezele chawé' kwinle. Zka'le ližgak no'le wzebdo' ka', na' nich wloé'ezele chawé' kwinle, scha žližle Dios. Che len, zenle'e gak da' choge' chele da' sáka'le.

<sup>15</sup>'Da' nyáche'le'e naken chele le'e, benne' yodo' wsedle ka', na' lezka' chele le'e, benne' yodo' fariseo ka', benne' zloé'ezele chawé' kwinle. Zdele dot lo nisdo', na' dot lo yežlyó nga nich gonle ga wká'n zen Dios to benne' ka žonle le'e, na' katen' ba bžél-lele-ne', žonle ga nbága'že' zia ka dan' nbága'le le'e, dan' gonen ga chejchazle lo yi' gabíl.

<sup>16</sup>'Da' nyáche'le'e naken chele. Nakle lo chole, na' žénelele wloé'elele benách ka' nez. Ki naken chele dan' znnale: "Kate' bi da' zchebe laže' no benne', cha' gon choche' xtiže'e ni'a che yodo', bi žon byenen, san cha' gon choche' xtiže'e ni'a che ya oro da' žen' lo yodo', na' gon byenen." <sup>17</sup>Le'e, benne' lo chole ka', na' bi žejn'ile. ¿Bízle nakže blo? Oron' o yodon' da' žon la'yen oron'? <sup>18</sup>Lezka' znnale: "Cha' no benne' gon choche' xtiže'e ni'a che bkog la'y, bi gon byenen, san cha' gon choche' xtiže'e ni'a che mežw da' zoan lawle bkogen', na' gon byenen." <sup>19</sup>Le'e, benne' nzide yichj lázdo'le, na' nakle lo chole.

¿Bízle nakžen blo? ¿Mežw da' zoan lawlen, o bkog la'yen' da' žon la'yen mežwn'? <sup>20</sup>Che len, cha' no benne' gon choche' xtiže'e ni'a che bkog la'y, žonen' ni'a che bkog la'yen', na' lezka' ni'a che yógo'te da' žen' lawlen. <sup>21</sup>Lezka', cha' no benne' gon choche' xtiže'e ni'a che yodo', žonen' ni'a che yodon', na' lezka' ni'a che Dios, Bennen' žonkze' latje chie' ga na'. <sup>22</sup>Lezka', cha' no benne' gon choche' xtiže'e ni'a che ya'abá che Dios, žonen' ni'a che latje gan že' znnna bia' Dios, na' lezka' ni'a che Dios na'kze, Bennen' ži'e ga na'.

<sup>23</sup>'Da' nyáche'le'e naken chele le'e, benne' yodo' wsedle ka', na' chele le'e, benne' yodo' fariseo ka', benne' zloé'ezele chawe' kwinle. Ki naken chele dan' zízjwle che yodo' to kwe' che to chi kwe' da' zzi'le che yixe' weje, na' che yixe' anís, na' che komino yela' waw, san zka'nle da' nakže blo da' bchi'le Dios, dan' bi žonle da' naken chawe', na' bi žeyache' láže'lele lježle ka', na' bi žejle'le che Dios. Da' ki žon byenen gonle, na' lezka' bi žala' wka'nle yezika' da' ka' žonle, da' ka' zízjwle che yodo'. <sup>24</sup>Le'e, benne' lo chole ka', na' ženelele wloé'elele benách ka' nez. Dan' žonle naken ka zdèle da' že'jle to yeso' da' zde ya, nich kwejle bi'a lasdo' ka', san že'jle to bia zen dan' želbía benne' ka'.

<sup>25</sup>'Da' nyáche'le'e naken chele le'e, benne' yodo' wsedle ka', na' chele le'e, benne' yodo' fariseo ka', benne' zloé'ezele chawe' kwinle. Nakle ka to zíga'do' da' že'jlenle, na' ka to ye'n da' žawlenle. Žible da' sban da' nwa' kwitle, san yichj lázdo'le nžan' da' zbanle, na' da' kegle ka' da' žonle.

<sup>26</sup>Le'e, benne' yodo' fariseo ka', benne' lo chole ka'. Zga'ale le gon chawe' da' yo'on yichj lázdo'le, na' lezka' gakle chawe' kwitle.

<sup>27</sup>'Da' nyáche'le'e naken chele le'e, benne' yodo' wsedle ka', na' chele le'e, benne' yodo' fariseo ka', benne' zloé'ezele chawe' kwinle. Ki naken chele dan' nakle ka yežw ba ka' chegak benne' gat ka', da' ka'zej naken zíla'do'ze kwitle, na' da' li xtan znná'gaken, san nžá'gaken žit chegak benne' gat ka', na' yógo'te da' zgot. <sup>28</sup>Lezka' nakle le'e. Da' li láwzele zloé'el kwinle chawe' lawgak benách ka', san yichj lázdo'le nža'ten da' zloé'ezele chawe' kwinle, na' da' kegle ka' da' žonle.

<sup>29</sup>'Da' nyáche'le'e naken chele le'e, benne' yodo' wsedle ka', na' chele le'e, benne' yodo' fariseo ka', benne' zloé'ezele chawe' kwinle. Zzoale yo'o xtando' ka' lo ba ka' gan zej ngache' benne' ka' bcháljgake' lo wláz Dios, na' lezka' žonle xtan gan zej ngache' benne' chawe' ka'. <sup>30</sup>Lezka' znnale: "Chela' wzoato' ža ni'te katen' wnníta'gak xa xto'to' ka', bi gónlento' lágake' tzen katen' bétgake' benne' ka' bcháljgake' lo wláz Dios." <sup>31</sup>Dan' znnale ki, le'ekzle zzoa lile nakle za'sógak benne' ka' bétgake' benne' ka' bcháljgake' lo wláz Dios. <sup>32</sup>Ki naken, žesbaga' kwinle zia dan' wbága'gak xa xto'le ka'.

<sup>33</sup>'Le'e nakle ka bele snia ka', na' lezka' ka lježgak bele snia ka'. Da' likze bi yelale lo da' wsaka' zin' le'e lo yi' gabíl. <sup>34</sup>Che len, neda' sel'a' chele benne' ka' wcháljgake' lo wláz Dios, na' benne' ka' žejn'i'igekle', na' benne' wsedle ka'. Benne' ki, gotle

bale', na' wda'le yebale' le'egak yag kroze ka', na' chinle yebale' gan nak lo yo'o gan zdoble nich yenle xtiž'a' Dios, na' wlagle légake' to yetó yež. <sup>35</sup>Ki gaken, bága'le le'e zia che yógo'te žen chegak benne' chawé' ka', da' wlaljen lo yo, kate' wzó law wzóa bennen' bete' Abel, zi'n Adán, benne' chawen', na' na' zejte bétgake' Secría, zi'n Berekías, bennen' bétgake' gachje láwe'le gan že' yodo', na' gan že' bkog la'y, gan zzéygake' bia beždo' ka' law Dios. <sup>36</sup>Da' li žapa' le'e, yógo'te da' ki bága'gak benne' ki, benne' nníta'gake' ža ni zoažo na'a.

**Jesús zbeže' ni'a che yež Jerusalén**  
(Lk. 13:34-35)

<sup>37</sup>Lezka' wnná Jesusen': —Benne' Jerusalén ka', le'e na' žotle benne' ka' zcháljgake' lo wláz Dios, na' zže'ele yej benne' ka' bsela' Dios gan zoale. Zan chi'i gónela' wtoba' le'e chia', kan žon zkoko', bia ztobba' bríse'do' ka' zan xilba', san bi gónelele. <sup>38</sup>Le wia nga, ka'ze ga'n ližle. <sup>39</sup>Ki gaken, dan' žapa' le'e, na'a so law biž l'é'elele neda' kate' nnázele: "La'y nak Benen' ze'e lo wláz Xanžo Dios."

**Znna Jesús ka za' wchínnjgake' yodo'**  
(Mr. 13:1-2; Lk. 21:5-6)

**24** Bžoj Jesusen' lo zchil yodo', na' kate' ne zze'e ga na' wbíga'gak benne' wsedle chie' ka' gan zoe', na' bloégekle' Le' kan nak ze'e na', da' nyechjen yodon'. <sup>2</sup>Bechebe Jesusen', na' gože' légake': —¿Zl'é'elele yógo'te da' ki? Da' li žapa' le'e, bi ga'n to yej da' nbagan' lježen nga, dan' biž doten.

**Da' ka' gak biá'gaken za' žin ža ze lawte ža ka'**

(Mr. 13:3-23; Lk. 21:7-24; 17:22-24)

<sup>3</sup>Kate' ne že' Jesusen' gan nak law Ya'a Yag Olibo, wbíga'gak benne' wsedle chie' ka' gan zoe' cheze', na' góžgake' Le':

—Blo'el neto', ¿Batx gakgak da' ki, na' biz gak bia' ža yel'óo, na' za' žin ža ze lawte ža ka' che yežlyó nga?

<sup>4</sup>Bechebe Jesusen', na' gože' légake':

—Le wia kwinle nich bi gon láže'le no benne' le'e, <sup>5</sup>dan' la'gak benne' zan, benne' ka' si' lágake' kan lia' neda'. Nnágake' jez nake' Benne' Criston', na' gon láže'gekle' benne' zan. <sup>6</sup>Yénlele žak wedile, na' da' zchaljgak benne' ka' che wedile, san bi kwe' zéidle, dan' žon byenen gakgak yógo'te da' ki zga'ale kate' žin ža ze lawte ža ka'. <sup>7</sup>Benne' ka' nníta'gake' to yež til-lengake' benne' ka' nníta'gake' yetó yež, na' benne' ka' zoa to benne' znna bi'e légake' til-lengake' benne' ka' zoa yetó benne' znna bi'e légake'. Galj yižwé' žen ka', na' gak wbín, na' latje zan xo' yežlyó. <sup>8</sup>Yógo'te da' ki jez naken da' so láwgaken, da' ka' sáka'gak benách ka'.

<sup>9</sup>Naž wdegak benách ka' le'e lo na'gak benne' ka' wsaka' zí'gake' le'e. Yógo'te benách ka' wzóagake' le'e chela'ale, dan' žónlenle neda' tzen, na' gótgake' bálele le'e. <sup>10</sup>Kate' gak da' ki, benne' zan gak chope láže'gake', na' yebéj yíchjgake' neda', na' toe' yetóe' wdíe' lježe', na' toe' yetóe' wzóe' lježe' chela'ale. <sup>11</sup>Naž la' lawgak benne' zan, benne' gon láže'gake', na' wloé'el kwíngake'

ka benne' ka' zcháljgake' lo wláz Dios, na' gon láže'gakle' benne' zan. <sup>12</sup>Gónle'egake' da' kegle, na' che len biž ží'igekle' ljéžgake' ka'. <sup>13</sup>No benne' gake' Dios toze na' zejte ža ze lawte ža ka', yelá bennen!. <sup>14</sup>Se diža' chawen' kan znna bia' Dios dot yežlyó nga nich yéngekle yógo'te benách zi'to' ka', na' naž žin ža ze lawte ža ka'.

<sup>15-16</sup>'No benne' gole' da' ki žala' wzejní'i laže'e. Wnná Daniel, bennen' bchalje' lo wláz Dios ža ni'te, na' wnné: "Da' bi zle'el Dios chawe', dan' zchinnjen, cho'on latje la'y che Dios." Kate' lé'elele gak da' ni, naž benne' ka' nníta'gake' gan nbab Judea žala' wzónnjgake' zaka' law ya'ado' ka'. <sup>17</sup>No benne' žone' žin yíchjo'ole bi žala' yetje' nich bi da' chejxi'e da' nape' lo yo'o, san žala' wzonnjie!. <sup>18</sup>No benne' zoe' žin yixe', bi žala' yeyeje' liže' nich chejxi'e laže' chie'. <sup>19</sup>Da' nyáche' le'e gaken chegak no'le ka', no'le zej noe'e bi'do' ka' chégake', na' lezka' no'le ka' zgáze'gake' bi' žé'ndo' ka' chégake' kate' žin ža na'. <sup>20</sup>Le wchaljlen Dios, na' le nnable' nich bi žin ža na' žala' wzonnje kate' žak byo' zag o kate' nak ža la'y, <sup>21</sup>dan' sáka'žegak benne' ka' ža ka', ka wzáka'gak benách ka' ža ni'te kate' za'gota' yežlyó nga, na' zejte na'a ža, na' kege ža zezá' bi sáka'gake' ki. <sup>22</sup>Kate' žin ža na', cha' Dios bi gone' babze ža ka', bi yelá nitó benne', san ni'a chegak benne' ka' wžekze' Le' gone' babze ža ka', nich gáklene' légake.

<sup>23</sup>'Che len bi chejle'le cha' no benne' le'e gan zoale, na' yi'e le'e: "Le wia nga, zoa Benne' Criston'

nga", o nne': "Zoe' ga na!." <sup>24</sup>La' lawgak benne' zan, benne' wen laže' ka', na' nnágake' zej nake' Benne' Criston', o nnágake' zcháljgake' lo wláz Dios. Góngake' da' ka' gak biá'gaken, na' da' ka' góngaken ga yebángekle benách ka', na' gon láže'gakle' benne' ka' wžekze Dios cha' sáke'gakle'. <sup>25</sup>Le wia nga, ba gožkza' le'e yógo'te da' ki zga'ale kate' gákgaken. <sup>26</sup>Che len, bi chejle'le cha' la'gak benne' ka' gan zoale, benne' yé'gake' le'e: "Le wia nga, zoa Benne' Criston' lo latje dach." Lezka', bi chejle'le cha' nnágake': "Le wia nga, zoe' lo yo'o". <sup>27</sup>Kan žak kate' žep yes gan zla' wbíž, na' zza'ní' gan ženen, lezka' gaken kate' yelá'a neda', Benne' Golje' Benách. <sup>28</sup>Gakte ki, kan znnagak benách ka': "Gáte'zeze gan de to da' nat, dóbgakkze lab ka' ga na!"

### Da' gak kate' yelá' Benne' Golje' Benách

(Mr. 13:24-37; Lk. 21:25-33; 17:26-30, 34-36)

<sup>29</sup>Lezka' wnná Jesusen':

—Kate' te ža na' katen' sáka'gak benách ka' ki, wchól wbíž, na' byo' bi gonnem baní' chen. Yindjgak belj ka', na' zizgak da' ka' zej nla' ya'abá, da' ka' zej napen yela' zen. <sup>30</sup>Naž la' dan' gak bia' ya'abá yelá'a neda', Benne' Golje' Benách, na' kweže nyáche'gak yógo'te benách ka' nníta'gake' yežlyó nga, katen' lé'egekle' neda', Benne' Golje' Benách, zezá'a lo bejw ya'abá, na' nzi' lo na'a yela' wnná bia' zen, na' yela' baní'. <sup>31</sup>Naž sela'a wbás che ya'abá chia' ka'. Wkwéžegake' zižje lozgak bia ka', na' wtóbgake' benne'

ka' ba wžekza' chia', benne' ka' nníta'gake' dap la'ate yežlyó nga, na' yógo'te latje zan ya'abá.

<sup>32</sup>'Le chejn'il da' žsedle da' žak che yag higo. Katen' žela'gak ni'a nen' že'ndo' ka', na' ba žebía xlagen že'n ka', nnézlele za' žin byo' wbá.

<sup>33</sup>Lezka', kate' lē'ele žakgak yógo'te da' ki, nnézlele za' žin že ze lawte že, na' ba zla' lawn. <sup>34</sup>Da' li žapa' lē'e, yógo'te da' ki gákgaken zga'ale kate' gatgak benách ka' nníta'gake' že na'. <sup>35</sup>Te che ya'abá, na' che yežlyó nga, san xtiža'a ka' bi tégaken ka'ze.

<sup>36</sup>'Kate' žin že na' bi nnezle nitó benne'. Bi nnézgekle wbás che ya'abá ka' che Dios, na' bi nnezla' neda', Zi'n Dios, san toze Xažo Dios nnezlen'.

<sup>37</sup>'Kan gok že na' katen' wzóa Noé, lezka' gaken kate' yelá'a neda', Benne' Golje' Benách. <sup>38</sup>Kate' že ka' zga'ale kate' bžin nis yejw da' bchinnjen yežlyó nga, we'j bdáwgake', na' bchag ná'gake', na' bdégake' zí'ngake' ka' lo yela' zchag na' na'zejte že wyó'o Noén' le'e barkw zen na', dan' bene', <sup>39</sup>na' bi gókbe'egekle' kate' bžinte nis yejw dan' bchinnjen yežlyó nga, na' bžia yí'gake' yógo'tegake'. Lezka' gaken katen' yelá'a neda', Benne' Golje' Benách, dan' bi gákbe'le nitó benne'. <sup>40</sup>Kate' že na' kate' yelá'a, cha' žongak chope benne' ka' žin yixe, toe' yedži'a-ne' chia', na' yetóen' wka'na'-ne'. <sup>41</sup>Cha' chope no'le ka' nníta'gake' wetw, toe' yedži'a-ne' chia', na' yetóen' wka'na'-ne'.

<sup>42</sup>'Le soa ban laže' dan' bi nnézlele biz že yelá'a neda', Xanle. <sup>43</sup>Na'a, le chejn'il da' ni. Chela' nnezle

xan yo'o bi že yid benne' wbán, na' nná'zele' dot yele, na' bi we'e latje no benne' chidjwe' ze'e nich kwane' da' de liže'. <sup>44</sup>Che len, le soa ban laže' le'e, dan' yelá'a neda', Benne' Golje' Benách, to že bi zbezle neda'.

**Benne' wen žin chawe', na' benne'  
wen žin bi nake' chawe'**

(Lk. 12:41-48)

<sup>45</sup>Lezka' wnná Jesusen':

—¿Noz benne' wen žin, benne' nake' chawe', na' žejni'ile', wdé xane' lo ne'e benne' ka' nníta'gake' liže' nich wnezwje' da' gáwgake' kate' gale'? <sup>46</sup>Ba nez zen gaken che benne' wen žin na' nake' chawe', cha' kate' yelé'e xane', yedžxake'e le' zone' dot da' bde xane' lo ne'e. <sup>47</sup>Da' li žapa' lē'e, yógo'te da' nap xane', wdíe' lo na' benne' wen žin zone' ki. <sup>48</sup>Cha' to benne' wen žin ki yeyake' benne' wen da' zinnj, na' sa' laže'e, na' nne': "Wžél xana', na' bi yelá' zie'", <sup>49</sup>na' cha' so lawe' wsaka' zí'e benne' ka' zónlengake' le' tzen žin, na' so lawe' ye'j gáwlene' benne' ka' želzožle', <sup>50</sup>naž yelá' xan benne' wen žin na' to že kate' bi zoe' zbeze', o to yele žekle' bi la'te xanen'. <sup>51</sup>Naž xanen' wsaka' zí'e benne' wen žin na', na' gone' ga gak chie' kan žala' gak chegak benne' ka' zloé'ezele chawe' kwíngake'. Naž kweže nyache'e, na' wxéj laye'e.

**Žsaka' lebe Jesús kan gok  
chegak chi xkwide' no'le ka'**

**25** Lezka' wnná Jesusen':

—Kan gak chegak benne' ka' chó'ogake' gan znna bia' Dios ya'abá, naken kan gok chegak chi xkwide' no'le ka'. Wzí'gakbe' broke

ka' chégakbe', na' bžójgakbe' nich chejchágakbe' benne' zchag ne'e. <sup>2</sup>Gáyo'be'zej nakbe' ban laže', san yegáyo'be'zej nakbe' nat laže'. <sup>3</sup>Xkwide' no'le nat laže' ka' wží'gakbe' broke chégakbe' ka', san bi biá'gakbe' yelate' set da' žeyen. <sup>4</sup>Xkwide' no'le ban laže' ka' biá'gakbe' set da' žeyen lo bégado' chégakbe' ka' len broke chégakbe' ka'. <sup>5</sup>Dan' wžél benne' zchag ne'e, wdé yele láwgakbe', na' wtásgakbe'. <sup>6</sup>Kate' bžin gachje yele, benle chi'i to benne' wnnié' zižje, na' wnné': "Za' benne' zchag ne'e. Le žoj chejhagle-ne'." <sup>7</sup>Naż wyasgak yógo' te xkwide' no'le ka', na' bkwézgakbe' broke chégakbe' ka'. <sup>8</sup>Xkwide' no'le nat laže' ka' góžgakbe' xkwide' no'le ban laže' ka', na' wnnágakbe': "Le gonn láte'do' set cheto' che set da' žeyen chele, dan' zgolgak broke cheto' ka'." <sup>9</sup>Bechébegak xkwide' no'le ban laže' ka', na' wnnágakbe': "Bi gaken dan' bi be gaň cheto', na' chele. Le chej gan zdó'w set da' žeyen na' chjé'wle chele." <sup>10</sup>Kate' ne zkakbe' zejk'gakben', bžin benne' zchag ne'e. Xkwide' no'le ban laže' ka', xkwide' ka' želbezbe' le', wyó'olengakbe' le' tzen gan žak lni che yela' zchag na', na' la' bséjwte yo'o. <sup>11</sup>Wdé na' bžingak yezika' xkwide' no'le ka' ga na'. Blížgakbe'-ne', na' wnnágakbe': "Xan, Xan, bsaljw cho'oto." <sup>12</sup>Le' beži'e, na' wnné': "Da' li žapa' le'e, bi nónbi'a le'e." <sup>13</sup>Naž Jesusen' gože' benne' ka': —Le gak ban laže', dan' bi nnézlele bi ža, o bi yele yelá'a neda', Benne' Golje' Benách.

**Žsaka' lebe Jesús kan nak  
che mežw zen ka'**

<sup>14</sup>Lezka' wnná Jesusen':

—Kan gon Bennen' znna bi'e ya'abá che Dios naken kan ben to benne' za' cheje' zi'to'. Bliže' benne' wen žin chie' ka', na' bdie' lo ná'gake' da' nape'.

<sup>15</sup>'To benne' wen žin na', bdie' gayo' kwe' mežw zen ka' lo ne'e, na' yetóen' bdie' chope kwe' mežw zen ka' lo ne'e. Yetóen' bdie' to kwe' mežw zen lo ne'e. To toen' bdie' lo ná'gake' ka da' žákgekle'. Naž la' wzá'tie' gan nak zi'to'. <sup>16</sup>Wyéj benne' wen žin na', bennen' wži'e gayo' kwe' mežw zen ka', na' bejtíljlene' da' ka' yegayo' kwe' mežw zen ka'. <sup>17</sup>Lezka', bennen' wži'e chope kwe' mežw ka', bejtíljlenen' yechope ka'. <sup>18</sup>Bennen' wži'e to kwe' mežwn' wyeje', na' bejche'ne' lo yo, na' bkache'e mežwn' che xane' lo yon'.

<sup>19</sup>'Kate' ba gok scha, xangak benne' wen žin ka' bel'e, na' bgá'nlene' légake' chawé'. <sup>20</sup>Kate' wzó law bžinte bennen' wži'e gayo' kwe' mežw zen ka', noe'e yegayo' kwe' mežw ka', na' gože' xane': "Xan, gayo' kwe' mežw ka' bdio' lo na'a. Nga de yegayo' kwe' mežw ka' dan' bejtíljlenan." <sup>21</sup>Xanen' gože' le': "Nak chawé". Nako' benne' wen žin dot li laže'. Cháwe'do' beno' katen' wyó'o láte'do'ze lo no'o. Na'a da' zénle'eze wdía' lo no'o. Wyó'o ga zoa' ni, na' yebélenlo' neda' tzen." <sup>22</sup>Wdé na' bžin benne' wen žin na', bennen' wži'e chope kwe' mežw zen ka', na' wnné': "Xan, chope kwe' mežw bdio' lo na'a. Nga de yechóp kwe' mežw ka' da' bejtíljlenan!" <sup>23</sup>Naž xanen' gože' le': "Nak chawé". Nako' benne' wen žin dot li laže'. Cháwe'do' beno' katen' wyó'o lo no'o láte'do'ze. Na'a, da' zenle'eze wdía' lo

no'o. Wyó'o ga zoa' ni, na' yebélenlo' neda' tzen." <sup>24</sup>Naž kate' bžin benne' wen žin na', bennen' wzi'e to kwe' mežw žen na', wnné: "Xan, nnezla' nako' benne' bizjw, dan' zlapo' gan bi gozo', na' ztoba' gan bi bchiljo". <sup>25</sup>Che len bžeba' le', na' wyá'a, na' bejkacha'a mežw chion' lo yo. Nga de dan' naken chio!" <sup>26</sup>Naž bež'i'i xane', na' gože' le': "Nako' benne' wen žin bi nake' chawe', na' za'wede. Nnálezkzelo' zlapa' gan bi goza', na' ztoba' gan bi bchilja'. <sup>27</sup>Che len, gakže chawe' la' bnežjo' mežw chian' lo na'gak benne' ka' wkóngeklen' žin, nich chíljengaken' yelate', nich kate' yelá'a neda', yezi'a dan' naken chia' len yichjen." <sup>28</sup>Naž xanen' gože' benne' ka' nnítal'gake' ga na', na' wnné: "Le yeká'a mežwn' lo na' benne' ni, na' le wnežjwn lo na' bennen' nape' chi kwe' mežw ka'." <sup>29</sup>Nóte'teze benne' zkonle' chawe' žin da' nzi' lo ne'e, wdégake' lo ne'e yelate', na' gata' da' zenže chie', san bennen' bi zkonle' chawe' žin da' nzi' lo ne'e, da' do'ze da' nape' yekén'. <sup>30</sup>Na'a, benne' wen žin ni, benne' bi nake' chawe', le chejžo'ne' na'le gan nak chol, gan kweže nyache'e, na' wxéj laye'e.

### Benne' Cristo wchi'a laže'e benách ka'

<sup>31</sup>Lezka' wnná Jesusen':

—Katen' yelá'a neda', Benne' Golje' Benách, tzen len yógo'te wbás che ya'abá chia' ka', nich nna bi'a, kwi'a lo latje chawe' chia', gan wchi'a laža'a benách ka'. <sup>32</sup>Yógo'te benne' ka' nnítal'gake' yežlyó nga dóbgake' gan kwi'a neda', na' wnnítal'gaka'ne' chelá'a weje kan žon to benne' wape zila' ka', benne' znnite'e

chelá'a weje chibo ka', na' zila' ka'.

<sup>33</sup>Wnnite'e zila' ka' kwite' li ža, na' wnnite'e chibo ka' kwite' yegle.

<sup>34</sup>Naž, neda', benne' wnná bian', yapa' benne' ka' nnítal'gake' kwita' li ža, na' nnia': "Le da ga zoa' ni, le'e wléj Xa' le'e cheze'. Gata' latje chele gan znna bi'e, dan' bkweze' chele ža ni'te katen' bdixjwe' yežlyó nga. <sup>35</sup>Ki žaken chele dan' wdona', na' bennle da' bdawa'. Wbilá', na' bennle da' we'ja'. Goka' ka to benne' zde' zi'to', na' wlo'le neda' ližle.

<sup>36</sup>Byažje da' gakwa', na' bwákwlé neda' da' ka' žákwle. Bi wzó'a' chawe', na' bedjwíale neda'. Byejwa' liž ya, na' bedjwíale neda'." <sup>37</sup>Naž yečébegak benne' chawe' ka', na' yégake' neda': "Xan, ¿batx ble'elto' Le' wdono', na' bwawto' Le'? ¿Batx wbilo', na' bennto' da' we'jo'? <sup>38</sup>¿Batx ble'elto' Le' bejdío' zi'to', na' wlo'to' Le' ližto'? ¿Batx byažje laže' gako', na' bwákwlé Le' da' ka' žákwto'?

<sup>39</sup>¿Batx ble'elto' Le' bi wzó' chawe', o wyejo' liž ya, na' bedjwíato' Le'?"

<sup>40</sup>Yecheba' neda', benne' wnná bian', na' yapa' légake': "Da' li žapa' le'e, dan' benle ki che to benne' ljéža'do' ki, la'kze nake' benne' ka'ze, lezka' chia' nedkza' benlen!"

<sup>41</sup>Naž yapa' benne' ka' nnítal'gake' kwita' yegle, na' nnia': "Le kwas ga zoa' ni, le'e na' nbága'le zia, na' chejchazle lo yi', da' bi yeyolen, dan' bkwez Dios che da' xiwe', na' chegak wbás ka' žónlengaken len tzen.

<sup>42</sup>Ki gaken chele dan' wdona', na' bi bennle da' gawa'. Wbilá', na' bi bennle da' ye'ja'. <sup>43</sup>Goka' ka benne' zde' zi'to', na' bi wlo'le neda' ližle. Byažje da' gakwa', na' bi bwákwlé neda' da' ka' žákwle. Bi wzó'a'

chawe', na' lezka' byejwa' liž ya, na' bi bedjwiale neda'." <sup>44</sup>Naž nnagak benne' ka', na' ye'gake' neda': "Xan, čbatx ble'elto' Le' wdono', o wbilo', o goko' ka to benne' zde' zi'to', o byaže da' gako', o bi wzó' chawe', o wyejo' liž ya, na' bi góklenko' Le'?" <sup>45</sup>Naž yecheba' neda', benne' wnná bian', na' yapa' lágake': "Da' li žapa' le'e, dan' bi be benle che to benne' zoe' ladjw benne' ka' nníta'gake' nga, la'kze nake' benne' ka'ze, bi be benle chia' neda'." <sup>46</sup>Naž benne' wen da' zinnj ka' la' chejcháztegake' gan sáka'le'egake', san benne' chawe' ka' gata' yela' nban da' zejlí kanne chégake'.

### **Benne' yodo' ka' žóngake' toze diža' séngake' Jesús**

(Mr. 14:1-2; Lk. 22:1-2; Jn. 11:45-53)

**26** Kate' beyóž bchalj Jesusen' da' ni, gože' benne' wsedle chie' ka', <sup>2</sup>na' wnné':

—Nnézkzelele žin Lni Pasko' yechóp že ka', na' kate' že na' wdégake' neda', Benne' Golje' Benách, lo na'gak benne' ka' wdá'gake' neda' le'e yag kroze.

<sup>3</sup>La' na'ze bxoz wnná bia' ka' na' benne' yodo' wsedle ka', na' benne' gole ka', bdóbgake' gan nak li'a liž bxoz blo, bennen' lie' Kaifás.

<sup>4</sup>Béngake' toze diža' séngake' Jesusen' lo yela' wen laže' chégake', nich gótgake' Le'. <sup>5</sup>Wnnágake':

—Bi gak gonžon že lni, nich bi gongak benach ka' žo'osbé.

### **To no'le zko'e yichj Jesús da' zla' zix**

(Mr. 14:3-9; Jn. 12:1-8)

<sup>6</sup>Katen' wzóa Jesusen' lo yež Betania lo liž Smon, bennen' wdé'e

yižwé' leže, <sup>7</sup>wbiga' to no'le xkóže'le Jesusen', noe'e to béga'do' da' naken yej zaka', na' nžan' to da' zla' zix da' záka'le'en. Wloé'en yichj Jesusen' kate' ne že'e žawe'. <sup>8</sup>Kate' blé'egekle benne' wsedle ka' che Jesusen' da' ni, bzá'agake', na' wnnágake':

—¿Biz chen' wnitle da' ni? <sup>9</sup>Gok no benne' gote'en, na' si'e mežw zan nich gáklenžo benne' yache' ka'.

<sup>10</sup>Kate' benle Jesusen' da' ni, gože' lágake':

—¿Biz chen' zinnele che no'le ni? Nak chawe' da' bene' chia'. <sup>11</sup>Benne' yache' ka' nníta'lentezgake' le'e, san neda' bi gánteza' gan zoale le'e. <sup>12</sup>Da' ben no'le ni katen' wloé'e neda' da' zla' zixen', naken to da' zpa'an neda' che že gacha'a lo yežw ba. <sup>13</sup>Da' li žapa' le'e, gáte'teze lo yežyó nga gan wcháljgake' diža' chawe' ni, lezka' wzéngekle' benach ka' da' ben no'le ni chia' neda' nich chejsá' láže'gake' chie'.

### **Zchebe laže' Judas wdíe' Jesús lo na'gak benne' yodo' ka'**

(Mr. 14:10-11; Lk. 22:3-6)

<sup>14</sup>Naž Judas Iskariote, to benne' žónlene' tzen yechiné' benne' wbás ka' che Jesusen', wyeje' gan zej nnita' bxoz wnná bia' ka', <sup>15</sup>na' gože' lágake':

—¿Biz gonnle chia' neda' cha' wdíá' Jesusen' lo na'le?

Bgá'nlenle' le' chawe' chízjwgake' le' chi žoa mežw plat. <sup>16</sup>Naž wzó law Judas na' žilj loj laže'e wdíe' Jesusen' lo ná'gake'.

### **Da' žawžo nich chejsá' láže'žo kan got Xanžo**

(Mr. 14:12-25; Lk. 22:7-23;

Jn. 13:21-30; 1 Ko. 11:23-26)

<sup>17</sup>Kate' nak že zzo law lni chegak benne' judío ka' katen' žáwgake' yet

xtil da' bi nzi' kwa zichj, wbíga'gak benne' wsedle ka' che Jesusen' gan zoe', na' gózgake' Le':

—¿Gaz žénelo' chejsí'ni'ato' zíla'do' chežo, bian' gawžo že' Lni Pasko?

<sup>18</sup>Jesusen' gože' légake':

—Le chej lo yežen' gan zoa to benne', bennen' nónbia'žo, na' le yi'e: "Benne' žsedle' neto' znne': Za' žin ža chia' gata'. Lo ližo' gáwlena' benne' wsedle chia' ka' tzen zíla'do' že' Lni Pasko!"

<sup>19</sup>Naž bengak benne' wsedle chie' ka' kan gože' légake', na' bsí'ni'gake' da' gáwgake' že' Lni Pasko'.

<sup>20</sup>Kate' ba gole ža na', Jesusen' wžé'lene' chežínnote benne' wsedle chie' ka', na' wzó láwgake' žáwgake'.

<sup>21</sup>Kate' ne žáwgake', Jesusen' gože' légake':

—Da' li žapa' le'e, to benne' ládjwle le'e wdíe' neda' lo na'gak benne' yodo' ka'.

<sup>22</sup>Naž gok nyache' láže'gake', na' wnnábgekle' Jesusen' to toze', na' wnnágake':

—Xan, ɿneda' gonan'?

<sup>23</sup>Bechebe Jesusen', na' wnné':

—Bennen' zžín'lene' neda' tzen lo ye'n, bennen' wdíe' neda' lo na'gak benne' ka'. <sup>24</sup>Da' li neda', Benne' Golje' Benách, cha'a gan gak kan nyejw le'e yiche la'y kan žala' gaken chia', san da' nyáche'le'e gaken che bennen' wdíe' neda' nich gógtake' neda'. Gakže chawe' che bennen' chela' bi golje'.

<sup>25</sup>Naž beží'i Judas, bennen' wdíe' Jesusen', na' wnné':

—Benne' wsedle, ɿneda' gonan'? Jesusen' gože' le':

—O', le' na'.

<sup>26</sup>Kate' ne žáwgake', Jesusen' bexwe' to yet xtil, na' gože' Dios: "Žóxkeno." Naž bzožjen', na' bnežjwen' chegak benne' wsedle chie' ka', na' wnné':

—Le sin', le gawn. Da' ni naken bela' žen chia'. Kan bena' che yet xtil ni zlœ'elen kan gak che bela' žen chian'.

<sup>27</sup>Lezka' bexwe' to zíga'do', na' gože' Dios: "Žóxkeno." Naž bnežjwen' chégake', na' wnné':

—Le ye'jen yógo'tele. <sup>28</sup>Da' ni naken xchena' da' žon chochen diža' kobe da' zka'n chawen'. Xchenan' laljen ni'a chegak benne' zan nich gak yenít law Dios dola' da' zej nbage'e. <sup>29</sup>Lezka' žapa' le'e, biž ye'ja' xis da' zbia lba uba ki kate' žinže ža na' yé'jlena' le'e to da' kobe gan znna bia' Xažo Dios.

Jesús znne' nna Bedw bi nónbi'e Le'  
(Mr. 14:26-31; Lk. 22:31-34; Jn. 13:36-38)

<sup>30</sup>Kate' beyóž bél'gake' da' zka'n ūzenen Dios, jake' zaka' Ya'a Yag Olibo. <sup>31</sup>Naž Jesusen' gože' légake':

—Yógo'tele gak chope láže'le, na' wka'nlle neda' na'a že' ni, dan' nyejw le'e yiche la'y kan gak chia', da' znnan: "Gona' ga gat Benne' Wape Zila' Ka', na' gásłasgak zila' ka'."

<sup>32</sup>Katen' yebana' lo yela' got, naž cha'a zga'ala' ka le'e zaka' gan nbab Galilea.

<sup>33</sup>Naž bechebe Bedw, na' gože' Jesusen':

—La'kze yógo'tegake' gak chope láže'gake', na' wká'ngake' Le', neda' bi gak chope laža'a, bi wka'na' Le'.

<sup>34</sup>Jesusen' gože' le':

—Da' li žapa' le', na'a že' ni, zga'ale kate' kweže leko', le' nnio' chonne chi'i bi nónbi'o neda'.

**35** Naž Bedon' gože' Jesusen':

—La'kze gátlena' Le' tzen, bi nnia' bi nónbi'a Le'.

Lezka' wnnagak yógo'te benne' wsedle chie' ka'.

### Jesús zcháljlene' Dios lo yežlyó

#### Jetsemaní

(Mr. 14:32-42; Lk. 22:39-46)

**36** Naž Jesusen' bžínlene' benne' wsedle chie' ka' tzen yežlyón' nzin' Jetsemaní. Gože' légake', na' wnné':

—Le kwe' nga kate' cha'a yelate' na'le, gan chejcháljlene' Dios.

**37** Jesusen' bchi'e Bedw len chope zi'n Sebedeo, na' wzó lawe' žak nyache' laže'e, na' žek lázda'we'.

**38** Naž Jesusen' gože' légake':

—Žak nyache' laža'a, na' žatkza' lo yela' žek lázda'wa'. Le ga'n nga, na' le nna'ze dot yele tzen len neda'.

**39** Wdé Jesusen' yeláte'do' na'le, gan byechwe'. Bzechw lawe' lo yo, na' bcháljlene' Dios, na' wnné':

—Xe, cha' wak, ben ga bi gon byenen saka'a ki, san kege kan žénela' neda', san kan žénelo' Le' gono'.

**40** Kate' bežín Jesusen' gan zej nnita' benne' wsedle chie' ka', bejxake'e légake' ztásake', na' gože' Bedon':

—Bi gok nnáleno' neda' tzen yele to chí'ido'ze? **41** Le nna'ze dot yele, na' le wchaljlen Dios, na' le nnable-ne' gáklené le'e, nich bi gata' latje gon da' xiwe' ga gonle dola'. Zóateze be' nákkzele ban laže', san lo bela' žen chele žedó láže'le.

**42** Naž wyéj Jesusen' da' bežope chi'i, na' bcháljlene' Dios. Wnné':

—Xe, cha' bi gono' ga bi saka'a da' ki, ben kan žak lažo'o Le'.

**43** Kate' beyeje', da' yoble bedjxake'e lágake' ztásake' dan' ndele'e yele yej láwgake'. **44** Naž bekwás Jesusen' gan žé'gake'. Wyeje' da' yoble, na' bcháljlene' Dios da' beyonne chi'i, na' tlebe kan wnné' zga'ale wnné'. **45** Da' yoble beyeje' gan zej nnita' benne' wsedle chie' ka', na' gože' légake':

—¿Ztasle na'a, na' žezi' láže'le? Le wia nga, ba golein. Neda', Benne' Golje' Benáč, ba ndia' lo na'gak benne' dola' ka'. **46** Le chas, le cho'o. Le wia nga, bennen' zdie' neda' ba ze'e nga.

### Želchi'e Jesús nžeje'

(Mr. 14:43-50; Lk. 22:47-53; Jn. 18:2-11)

**47** Kate' ne zchalj Jesusen' da' ni, Judas, bennen' nbábłene' benne' chežinnoe' ka', la' bžintie' ga na', na' žónlengak benne' zan le' tzen, benne' ka' zej noe'e ya ntoche' ka', na' yag ka'. Bxoz wnnábia' ka' na' benne' gole ka', bséla'gake' légake'. **48** Judas na', bennen' zdie' Jesusen', ba bлоe'le' légake' to da' gone' da' gak bian' no benne' nake' Jesusen'. Wnné':

—Bennen' wchág lawa'-ne', Len' Jesusen'. Le sene'.

**49** Naž wbiga' Judas na' gan zoa Jesusen', na' wnné':

—Padiox, Benne' Wsedle.

Naž la' bchag lawtie' Le'.

**50** Jesusen' gože' le':

—Bicha'a, čbiz žono' nga?

Naž wbíga'gak benne' ka', na' békwgake' Jesusen'. **51** To benne' zólalene' Jesusen' wlechje' ya ntoche' chie', na' bene' we', bchoge' yid nag to benne' wen žin che bxoz blo. **52** Jesusen' gože' le':

—Begó'o ya ntoche' chion' ližen.

Yógo'te benne' ka' zkóngekle' žin ya ntoche' nich gótgake' benách, lo ya ntoche' gátgake'. **53** Bi nnezlo' gak nnabla' Xa', na' Le' la' séla'tie' chia' da'

zánle'eže ka chežinno kwe' wbás che ya'abá ka', da'zej naken da' zan gaywé'e to to kwen'? <sup>54</sup> San cha' gona' ki, čnakx gak žin da' nyejw le'e yiche la'y, da' znnan žala' gaken chia' ki?

<sup>55</sup> Naž Jesusen' gože' benne' ka': —Za'le nwa'le ya ntoche' ka', na' yag ka', nich senle neda' kan žonle katen' zzenle benne' wbán ka'. Yógo'te že wži'a lawle gan nak lo žchil yodo', gan bṣedla' benách ka', san bi wženle neda'. <sup>56</sup> Na'a žaken ki nich žin da' nyejw le'e yiche la'y, dan' wnnagak benne' ka' bcháljgake' lo wláz Dios.

Naž yógo'te benne' wsedle ka' che Jesusen' bsángake' Le', na' bezónnjgake' ga na'.

### Zžin Jesús gan že'gak benne' yodo' ka'

(Mr. 14:53-65; Lk. 22:54-55,  
63-71; Jn. 18:12-14, 19-24)

<sup>57</sup> Naž benne' ka', benne' zej nzene' Jesusen', bché'gake' Le', na' bejzégake' Le' law Kaifás, bxoz blo, gan jez ndobe benne' yodo' wsedle ka' len benne' gole ka'. <sup>58</sup> Bedw bejnawe' Jesusen' zi'to' zi'to', na' wyoé'e gan nak li'a liž bxoz blon', nich le'ele' nakx gak che Jesusen'.

<sup>59</sup> Bxoz wnná bia' ka' len benne' gole ka', na' benne' yodo' wchi'a laže' ka', wdíljgake' no benne' yesbage'e Jesusen' zia la'kze gon laže'e, nich gak chóggake' chie' gate'. <sup>60</sup> No no bžélgekle' la'kze bžingak benne' zan, benne' wnnégake' chie' da' wen laže'. Kate' ze lawte bžingak chope benne', na' lo yela' wen laže' chéggake' wnnégake' chie', <sup>61</sup> na' wnnágake': —Benne' ni wnné': "Gak wchinnja' yodo' che Dios, na' yechonne žaze ka' yechisan!"

<sup>62</sup> Naž wzó ža' bxoz blon', na' gože' Jesusen':

—čBi be žechebo'? čBíz da' ni da' znnegak benne' ki chio' Le'?

<sup>63</sup> Jesusen' bi be wnné'. Naž bxoz blon' gože' Le':

—Ni'a che Xanžo Dios ban znnabla' Le' nnio' da' li. Bloe'el neto' cha' nako' Le' Benne' Criston', Zi'n Dios.

<sup>64</sup> Jesusen' gože' le':

—Kan znnno' naka'. Da' li žapa' le'e, le'elele neda', Benne' Golje' Benách, ži'a kwit li že che Dios, gan nzi' lo na'a yela' wnná bia'. Yida' lo bejw ya'abá, na' la'a gan soale.

<sup>65</sup> Naž bxoz blon', lo yela' zža'a chie' wcheze' laže' da' nakwe', na' wnné':

—Benne' ni znnie' da' zka'n ka'ze Dios. čNozže benne' žiázjelžo nich nnie' che benne' ni? Ba bénkzelele kan wnnié' che Dios. <sup>66</sup> čBize znnale le'e?

Bež'igake', na' wnnágake':

—Nbage'e zia, na' žala' gate'.

<sup>67</sup> Naž bžé'egake' zene' law Jesusen', na' ben zí'gake' Le'. Bale' wdápegake' xage'e, <sup>68</sup> na' gózgake' Le':

—čNakkzo' Le' Benne' Criston'? Wnnýea'a na'a. čNoz bennen' wdape'e Le'?

### Bedw znnie': "Bi nónbi'a Jesusen"

(Mr. 14:66-72; Lk. 22:56-62;  
Jn. 18:15-18, 25-27)

<sup>69</sup> Kate' ne žakgak da' ki, že' Bedw la' lí'ale. Wbiga' to no'le wen žin gan zoe', na' wnnabe':

—Lezka' le' wdáleno' Jesusen', benne' Galilean'.

<sup>70</sup>Beží'i Bedon' chebe' gan nnít'a'gak benne' ka', na' wnné':  
—Bi nnezla' no bennen' zchaljo' chien'.  
<sup>71</sup>Katen' bžoj Bedon' gan žó'ogake' li'a na', yetó no'le b̄le'ele' le'. Gože' benne' ka' nnít'a'gake' ga na', na' wnné':

—Lezka' benne' ni bénlene' Jesusen', benne' Nasaret na' tzen.

<sup>72</sup>Da' yoble beží'i Bedon' chen. Ben choche' xtiže'e ni'a che Dios, na' wnné':

—Bi nónbi'a Bennen'.

<sup>73</sup>Yeláte'do'ze wžé, wbíga'gak benne' ka' nnít'a'gake' ga na' gan zoa Bedon', na' góžgake' le':

—Da' li le' žónleno' lágake' tzen dan' yela' znzeze chio' nak bian' ga benne' le'.

<sup>74</sup>Naž wzó lág Bedon' žesbaga' kwine' zia. Ben choche' xtiže'e ni'a che Dios, na' wnné':

—Bi nónbi'a Bennen'.

La' na'ze wžézete leko'. <sup>75</sup>Naž bejsá' laže' Bedon' dan' gož Jesusen' le', katen' wnné': "Zga'ale kate' kweže leko', chonne chi'i nnio' bi nónbi'o neda!." Bžoj Bedon' ga na', na' wžéze nyache'e.

### Zdégake' Jesús lo na' Pilato

(Mr. 15:1; Lk. 23:1-2; Jn. 18:28-32)

**27** Kate' za' ža'ní' ža na', yógo'te bxoz wnná bia' ka' len benne' gole ka', bénge'ake' toze diža' nich góžgake' Jesusen'. <sup>2</sup>Bché'gake' Jesusen' nžjeje, na' bdégake' Le' lo na' Ponsio' Pilato, bennen' znnna bi'e.

### Žat Judas

<sup>3</sup>Kate' wnnezle Judas, bennen' bdie' Jesusen' lo na'gak benne' yodo'

ka', ba nžog che Jesusen' gate', gok nyache' laže'e, na' bejwé'e chi žoa mežw plat ka' lo na'gak bxoz wnná bia' ka', na' benne' gole ka'. <sup>4</sup>Judas na' gože' lágake':

—Nbaga'a dola' dan' bdia' to benne' chawe' nich gate'.

Naž góžgake' Le':

—Bi žonen ga gek zédleto' neto'.

Da' benkzo' le' naken.

<sup>5</sup>Naž wžó'n Judas na' mežw plat ka' gan nak lo zchil yodo'. Bežé'e ga na', na' bejsí yene' lo yag.

<sup>6</sup>Bezi'gak bxoz wnná bia' ka' mežw plat ka', na' wnnágake':

—Bi gonn ko'žo mežw ki gan zko'žo mežw che yodo', dan' naken lazjw to benne' wet benách ka'.

<sup>7</sup>Naž bénge'ake' toze diža', na' len mežwn' gówgake' to yežlyó che to benne' wen ye'n nich gaken gan gáče'gak benne' zi'to' ka'. <sup>8</sup>Che len, lo ža na' belzóe' la latjen', Yo Žen. <sup>9</sup>Ki goken, bžin dan' wnná Jeremías, bennen' bchalje' lo wláz Dios, katen' wnné': "Beká'agake' chi žoa mežw plat ka', kan nak dan' bzoagak benne' Israel ka' da' zaka' Le', <sup>10</sup>na' len mežw ka' gówgake' to yežlyó che to benne' wen ye'n. Da' ni blo'e'l Xana' Dios neda!"

### Zžin Jesús gan že' Pilato

(Mr. 15:2-5; Lk. 23:3-5; Jn. 18:33-38)

<sup>11</sup>Kate' bejzégake' Jesusen' gan že' Pilato, bennen' znnna bi'e, le' wnnable' Jesusen', na' gože' Le':

—¿Nako' Le' Benne' Nna Bi'e Benne' Judío Ka'?

Jesusen' gože' le':

—Da' li znnno'.

<sup>12</sup>Kate' bxoz wnná bia' ka', na' benne' gole ka' besbága'gake'

Jesusen' zia, Le' bi be beži'e chégake'. <sup>13</sup>Naž Pilaton' gože' Jesusen':

—¿Bi ženlo' da' zan ka' da'  
znnégake' chio'?

<sup>14</sup>Jesusen' bi be bechebe'. Ka'  
goken, bebanle benne' wnná bian'.

### Zchóggake' che Jesús gate'

(*Mr. 15:6-20; Lk. 23:13-25; Jn. 18:38—19:16*)

<sup>15</sup>Kate' žak Lni Paskon', de to da'  
žónteze žon Pilato, benne' wnná  
bian', žsane' no benne' želnnáb  
benne' ka', to benne' nyejwe' liž ya,  
nóte'teze benne' ženegekle' wsane'  
le'. <sup>16</sup>Kate' ža ka' nyejw to benne' liž  
yan', benne' wen da' zinnj, bennen'  
lie' Barrabás. <sup>17</sup>Kate' bdobgak  
benne' zan ga na', Pilaton' wnnable'  
légake', na' wnné:

—¿Nole' ženelele wsana' chele?  
¿Barrabás o Jesús, Benne' Criston'?

<sup>18</sup>Ki wnná Pilaton' dan' žákbe'le'  
bdegak benne' yodo' ka' Jesusen' lo  
ne'e dan' zgé'gekle' Le'.

<sup>19</sup>Kate' ne že' Pilaton' gan zchi'a  
laže'e, zo'le' bsele'e to benne' chjape'  
le', na' wnné:

—Bi be gono' che benne' chawen',  
dan' bžébeli'a wdé yele to lo  
bichgale ni'a chie' Le'.

<sup>20</sup>San bxoz wnná bia' ka' len  
benne' gole ka', bersedle' benne' zan  
ka' nich nnábgekle' Pilaton' wsane'  
Barrabasen', na' gote' Jesusen'. <sup>21</sup>Da'  
yoble bchalj benne' wnná bian', na'  
gože' légake':

—¿Nole' benne' chope ki ženelele  
wsana'-ne' chele?

Wnnágake':

—Barrabasen'.

<sup>22</sup>Naž Pilaton' wnnable' légake',  
na' wnné:

—¿Biz gona' che Jesusen', Benne'  
Criston'?

Yógo'tegake' wnnágake':

—Bde'e le'e yag kroze.

<sup>23</sup>Naž benne' wnná bian' gože'  
légake':

—¿Biz da' zia nbage'e?

Zížježe belbéži'e, na' wnnágake':

—Bde'e le'e yag kroze.

<sup>24</sup>Kate' žákbe'le' Pilaton' bi zzoele  
xtiže'e, san bénjakže benách ka'  
žo'osbé, naž wzí'e nis, na' wdíb ne'e  
láwgake', na' wnné:

—Bi be zia nbaga'a neda' ni'a che  
yela' got che benne' chawe' ni. Da'  
žónkzele le'e da' ni.

<sup>25</sup>Beži'igak yógo'te benne' ka', na'  
wnnágake':

—Yela' got che bennen' bága'to'  
neto' na' bága'gak zi'nto' ka'.

<sup>26</sup>Ka' goken, Pilaton' bsane'  
Barrabasen' lo ná'gake'. Naž gože'  
benne' ka', benne' žjake' lo wdile,  
chíngake' Jesusen', na' wdé na' bdie'  
Le' lo ná'gake' nich wdá'gake' Le' le'e  
yag kroze.

<sup>27</sup>Naž benne' ka' žjake' lo wdile,  
benne' ka' nnítá'gake' lo na' benne'  
wnná bian', bché'gake' Jesusen' lo  
yolawen' nzin' pretorio, gan btóbgake'  
yógo'te ljéžgake' ka' gan zoa Jesusen',  
na' nnítá'gake' ga na'. <sup>28</sup>Naž bká'agake'  
laže' da' nakw Jesusen', na' bwákwgake'  
Le' to laže' xna, kan žákwgak benne'  
wnná bia' ka'. <sup>29</sup>Béngake' to da' naken  
ni'a na' yag yeche' dan' bxóágake' yichj  
Jesusen', na' bzóágake' to ya xtildo'  
lo ne'e li ža dan' zlöe'elen kan nak  
to bar che benne' yolawe'. Naž bzoa  
zíbgake' xni'e, na' ben dítjgekle' Le', na'  
wnnágake':

—iGa'n zen Le', benne' znnna bi'o  
benne' judfo ka'!

<sup>30</sup>Naž belžé'e Le' zene', na' beká'agake' ya xtilen', na' bdíngaken' yichje'. <sup>31</sup>Wdé ben dítjgekle' Jesusen', beká'agake' laže' xna dan' nakwe', na' begákwgake' Le' laže' chekze'. Naž bché'gake' Le' nich chejdá'gake' Le' le'e yag kroze.

### Zdá'gake' Jesús le'e yag kroze

(Mr. 15:21-32; Lk. 23:26-43; Jn. 19:17-27)

<sup>32</sup>Katen' bžojgak benne' ka' žjake' lo wdile, na' bejxáka'gake' Smon, to benne' yež Sirene, na' béngake' ga bi'e yag kroze che Jesusen'.

<sup>33</sup>Kate' bžíngake' latjen' nzin' Gólgota, da' znnan len diža' xiža', Ya'a Žit Yichjžo, <sup>34</sup>byé'jgake' Jesusen' nop zichj da' nchixen da' sla' che bia yixe'. Kate' Jesusen' bnixen', bi gónele' ye'jen'.

<sup>35</sup>Kate' ba bdá'gake' Le' le'e yag kroze, wdísgake' laže' da' gokwe', na' btítjgake' lawlen nich gak bia' nole' gaken chie'. Ki goken, bžin dan' wnná benne' bchalje' lo wláz Dios že ni'te, katen' wnné': "Wdísgake' laže' da' gokwe', na' btítjgake' lawlen da' gak bian." <sup>36</sup>Naž wžé'gake' ga na', na' bwíagake' Jesusen'. <sup>37</sup>Lezka' bdá'gake' le'e yag krozen' gan nak yichjle Jesusen' to diža' da' zloe'elen zia da' nbage'e, da' znnan ki: "Jesús, Bennen' Znna Bi'e Benne' Judío Ka'."

<sup>38</sup>Gan da' Jesusen', lezka' bdá'gake' chope benne' wbán ka' le'egak yag kroze ka'. Toe' bdá'gake' kwite' li že, na' yetóen' kwite' yegle. <sup>39</sup>Wdegak benne' ka' ga na', na' bliž zí'gake' Jesusen'. Bta yíchjgake', na' ben dítjgekle' Le', <sup>40</sup>na' wnnágake':

—O', Le' wchinnjo' yodon', na' chonne žaze ka' yechison'. Beslá kwino' na'a cha' nako' Le' Zi'n Dios. Betj na'a le'e yag krozen'.

<sup>41</sup>Lezka' bxoz wnná bia' ka' len benne' yodo' fariseo ka', na' benne' gole ka', ben dítjgekle' Le', na' wnnágake':

<sup>42</sup>—Bennen' beslé' benne' yoble ka', san bi gak yeslá kwine'. Cha' nake' Benne' Nna Bi'e Benne' Israel Ka', žala' yetje' na'a le'e yag krozen', na' chejle'to' chie'. <sup>43</sup>Le' bxen laže'e Dios. Na'a Dios yeslakze' Le' cha' nak da' žaz laže'e, dan' wnné': "Zi'n Dios naka'."

<sup>44</sup>Lezka' benne' wbán ka', benne' ka' dá'gake' le'egak yag kroze ka' gan da' Jesusen', bliž xíwe'gake' Le'.

### Žat Jesús

(Mr. 15:33-41; Lk. 23:44-49; Jn. 19:28-30)

<sup>45</sup>Kate' bžin wawbíž, bechól dot yežlyó, na' zejte žedá chonne.

<sup>46</sup>Žedá chonnen', wnné zižje Jesusen', na' wnné':

—Elí, Elí, člama sabaktani?

Da' ni znnan len diža' xiža': "Dios chia', Dios chia', čbiž chen' bebéj yichjo' neda?"

<sup>47</sup>Kate' béngekle benne' ka' nníta'gake' ga na' da' ni, wnnágake':

—Bennen' žliže' Lías, bennen' bchalje' lo wláz Dios že ni'te.

<sup>48</sup>Naž la' wxíte' te to benne' zoe' ládjwgake', na' bexwe' to da' naken blol da' žzopen nis. Bxopen' nop zichj, na' bzoen' to lawle ya xtil, na' bchagen' žoa'a Jesusen' nich xopen'.

<sup>49</sup>Naž yebale benne' ka' wnnágake':

—Wléz na'a. Wíážo cha' yid Líasen' nich wzetje' Le'.

<sup>50</sup>Da' yoble wžéžeya'a zižje Jesusen'. Bžojte be' nakkze', na'

la' gottie'. <sup>51</sup>La' na'ze bžéza'te laže' da' nałan' lo yodo'. Bžojen chople, da' wzó lawn yichjlen, na'

bžinten xní'alen. Naž wzó' yežlyó, na' wla'gak yej ka'. <sup>52</sup>Wyáljwgak yežw ba ka' chegak benne' gat ka', benne' ka' bejlé'gake' che Dios, na' bebángake'. <sup>53</sup>Wdé bebán Jesusen', naž benne' ka', benne' bežójgake' lo yežw ba ka' chégake', wyázgake' lo yež la'y, yež Jerusalén, gan blé'egekle benne' zan lágake'.

<sup>54</sup>Naž bennen' zchi'e benne' ka' žjake' lo wdile, benne' ka' zwíagake' Jesusen', kate' ble'ele' wzó' yežlyó, na' da' ka' gókgaken, bžebe', na' wnné':

—Da' li benne' ni goke' Zi'n Dios.

<sup>55</sup>Wnníta'gak no'le zan zí'to'ze ga na', no'le ka' wdálengake' Jesusen' katen' bezé'e gan nbab Galilea, na' béngake' xchine', na' bnézjwgake' da' bdawgak Jesusen' na' benne' ka' zónlengake' Le' tzen. Wnníta'gake' ga na', zwíagake' Jesusen'. <sup>56</sup>Lia Madlen na' Lia, xna'gak Jakob na' Jwsé, wnníta'gake' ládjwgake'. Lezka' wzóa xna'gak zi'n Sebedeo ka' ga na'.

### Zkáche'gake' Jesús lo yežw ba da' nadjen le'e ya'a yej

(Mr. 15:42-47; Lk. 23:50-56; Jn. 19:38-42)

<sup>57</sup>Kate' za' žale ža na', bla' Jwsé ga na'. Nake' benne' yež Arimatea, benne' wnní'a, na' lezka' bénlene' Jesusen' tzen. <sup>58</sup>Benne' ni bejwíe' Pilato, na' wnnabe' latje we'e Jesusen'. Pilaton' wnné' wdégake' Jesusen' lo na' Jwsén'. <sup>59</sup>Bzetz Jwsén' Le', na' bchelé' Le' laže' da' zaka'. <sup>60</sup>Naž bkáche'gake' Le' to lo yežw ba kobe da' bchach Jwsén' le'e ya'a yej. Bde'e to yej blag zen da' wbagan' gan zó'ogake' lo yežw ba na', na' beyeje' liže'. <sup>61</sup>Wzóa

Lia Madlen len yetó Lia ga na', na' wzé'gake' žoa'a yežw ban'.

### Žape chí'igake' yežw ba che Jesús

<sup>62</sup>Kate' za' ža'ní' yetó ža, wdé bpá'gake' che ža la'y chegak benne' judío ka', bxoz wnná bia' ka' len benne' yodo' fariseo ka' blá'gake' gan že' Pilato. <sup>63</sup>Naž góžgake' Pilaton':

—Benne', žejsá' láže'to' dan' wnná benne' wen lažen', dan' wnné' katen' wzóe' nbane'. Wnné': "Kate' gak chonne ža, yebana' lo yela' got."

<sup>64</sup>Che len bselá' benne' ka' gape chí'igake' yežw ban', na' zejte ža chonne ža, nich bi yidgak benne' ka' želes, benne' ka' bénlengake' Le' tzen, na' bi yebéjgake' Le'. Naž bi gak ye'gake' benách ka': "Bebán Jesusen' lo yela' got." Cha' ki gaken, diža' wen laže' ni gonžen da' zinnj ka ben diža' wen lažen' dan' bcháljgake' zga'ale.

<sup>65</sup>Naž Pilaton' gože' lágake':

—Zej nnita' benne' ka' žjake' lo wdile nga. Le ché'-gake' len le'e. Le chej, na' le gape chi'i yežw ban' kan sáke'le gonle.

<sup>66</sup>Naž jake' ga na', na' bséjwgake' binlo yežw ban', na' bzóagake' to yej da' zbagan' gan zó'ogake' lo yežo ban'. Bdá'gake' le'e yej na' to da' gak bian' cha' saljwn, na' bnníta'gake' benne' ka' žjake' lo wdile ga na' nich gape chí'igaken'.

### Žebán Jesús lo yela' got

(Mr. 16:1-8; Lk. 24:1-12; Jn. 20:1-10)

**28** Kate' ba wdé ža la'y na' chegak benne' judío ka', na' za' ža'ní' ža nežw, Lia Madlen na' yetó Lia bejwíagake' yežw ba che

Jesusen'. <sup>2</sup>La' na'ze wzó' yežlyó. Ki goken dan' betj to wbás che ya'abá ga na'. Ble'e žoa'a yežw ban', na' bkwase' yej blag žen na', na' wzí'e lo yej na'. <sup>3</sup>Znna' law wbás che ya'abán' ka yes baní', na' zíla'do'ze nak laže' da' nakwe'. <sup>4</sup>Kate' benne' ka' žjake' lo wdile, benne' ka' žape chí'igake' yežw ban', blé'egekle' le', bžébegake', na' wzízgake'. Belbíxjgake' lo yo, na' gókgake' ka benne' gat ka'. <sup>5</sup>Naž wbás che ya'abán' gože' no'le ka', na' wnné':

—Bi žébele. Nnezla' žeyiljle Jesús, bennen' bdá'gake' le' yag kroze. <sup>6</sup>Bi zoe' nga dan' ba bebane' kan ba wnnakze' Le'. Le da, wíale gangota' Xanžon'. <sup>7</sup>Le chej na'a, na' le chjap benne' wsedle chie' ka' ba bebán Jesusen' lo yela' got, na' Lekze' cheje' zga'ale' ka le' zaka' gan nbab Galilea. Yelé'elele-ne' ga na'. Ba goža' le' dan' bde Dios lo na'a.

<sup>8</sup>Naž Ia' bezá'tegake' žoa'a yežw ban'. Zžébegake', na' žebégekle', na' taría tarágake' žjake' nich chejzéngake' benne' wsedle chie' ka' da' ni. <sup>9</sup>Kate' ne zjake', bejxaka' Jesusen' légake', na' gože' légake':

—Padiox.

Naž wbíga'gake' gan zoa Jesusen'. Byéla'gake' ni'e, na' bka'n zéngake' Le'. <sup>10</sup>Naž Jesusen' gože' légake':

—Bi žébele. Le chej, na' le chjap ljéža'do' ka' nich chjake' zaka' gan nbab Galilea, gan yelé'egekle' neda'.

### Da' wnnagak benne' ka' žjake' lo wdile

<sup>11</sup>Kate' ne zjak no'le ka', benne' ka' žjake' lo wdile, benne' ka' wdape chí'igake' yežw ban', bežíngake' lo

yežen', na' bzéngekle' bxoz wnná bia' ka' yógo'te dan' goken. <sup>12</sup>Kate' ba bdbogak benne' gole ka', béngake' chawe' diža'. Naž bnéžjwgake' mežw zan chegak benne' ka' žjake' lo wdile. <sup>13</sup>Góžgake' légake':

—Ki nnale: “Benne' ka' bénlengake' le' tzen bžíngake' želes, na' bebéjgake' Le' kate' ne ztasto!”

<sup>14</sup>Cha' yenle benne' wnná bian' da' ni, neto' wzejni'ilto' le', na' gonto' ga bi be gone' chele.

<sup>15</sup>Naž benne' ka' žjake' lo wdile wzí'gake' mežwn', na' yjéngake' kan ba nsédgekle'. Ki goken, znnagak benne' judío ka' ki na' zejte na'a ža.

**Jesús žsele'e benne' wbás chie' ka'  
chejzégake' xtiže'e**

(Mr. 16:14-18; Lk. 24:36-49; Jn. 20:19-23)

<sup>16</sup>Naž chinejte benne' ka', benne' bénlengake' Jesusen' tzen, jake' gan nbab Galilea, na' bžíngake' law ya'adon', dan' ba blo'eel Jesusen' légake'. <sup>17</sup>Kate' belé'egekle' Jesusen', bka'n zéngake' Le', san bale' gok chope láže'gake'. <sup>18</sup>Naž wbiga' Jesusen' gan nníta'gake', na' gože' légake':

—Dios ba bdie' lo na'a yógo'te yela' wnná bia' lo ya'abá chie', na' lo yežlyó nga. <sup>19</sup>Che len le chej, na' le chejsedle yógo'te benách zi'to' ka', benne' ka' nníta'gake' dot yežlyó nga. Le yezóa légake' nis, wkónlele žin La Xažo Dios, na' La Dios Zi'n, na' La Dios Be' La'y. <sup>20</sup>Le wsedle légake' góngake' yógo'te dan' goža' le' gonle. Le wia nga, nedkza' zóalena' le' yógo'te ža na' zejte ža ze lawte ža ka' che yežlyó nga. Ka'kze gaken.

# DIŽA' CHAWE' DA' BZOJ MARKOS

**Da' bchalj Žwa, bennen' bezóe'  
benách ka' nis**

(Mt. 3:1-12; Lk. 3:1-9, 15-17; Jn. 1:19-28)

**1** Ki wzó law diža' chawen' kan  
nak che Jesús, Benne' Criston',  
Zi'n Dios.

2 Goken kan bzoj Isaías, bennen'  
bchalje' lo wláz Dios že ni'te, da'  
wnná Dios nich yeyón chawen'  
yichj lázdo'gak benách ka' nich si' lo  
ná'gake' Benne' Criston'. Ki wnné':

Bwia nga. Žsel'a' benne' wbás  
chia', benne' nežwe' ka Le'.

Le' wpé'e nez gan tio'.

3 Yenle chi'i to benne' nnie' zižje  
latje dach, na' nne':  
"Le soa ban laže' dan' za' Xanžon'  
gan nnítale."

Le yebéj li nez las gan tie!"

4 Ki goken dan' bla' Žwa latje dach,  
na' bchalje' nich yezoagak benách  
ka' nis, benne' ka' yeyát láže'gake'  
nich yenít law Dios légake' che dola'  
da'zej nbage'e. 5 Bžojgak benne' zan  
yógo'te yež ka' gan nbab Judea, na'  
lezka' lo yež Jerusalén, na' jake' gan  
zoa Žwan', na' Žwan' bezóe' légake'  
nis lo yego Jordán, benne' ka'  
bexóalapgake' dola' da'zej nbage'e.

6 Gokw Žwan' laže' dan' nžaben  
yicha' za bia yixe', na' to bayw yid

nžejen lie. Bdawe' biche' zo ka', na'  
we'je' bžina' che bezdo' ka'. 7 Bchalj  
Žwan', na' wnné':

— Za' to benne' te na'a, bennen'  
napžé' yela' wnná bia' ka neda'. Bi  
naka' neda' zi yechwa', nich kweja'  
zele'. 8 Neda' žezóa' lee nis, dan'  
zloe'elen nzi' lo na'le xtiža' Dios, san  
Le' gone' da' zloe'ezele yela' žezúa  
nis ni, dan' wchize' lee Dios Be' La'y,  
dan' wloe'elen nzi' lo na' Dios lee.

## Žezúa Jesús nis

(Mt. 3:13-17; Lk. 3:21-22)

9 Kate' že na' bžoj Jesusen' yež  
Nasaret gan nbab Galilea, na' Žwan'  
bezóe' Le' nis lo yego Jordán. 10 Kate'  
bežój Jesusen' lo nisen', la' na'ze  
ble'ele' beyaljw ya'abá, na' žetj Dios  
Be' La'y. Žnne'e ka to plomdo', na'  
bedjsóalene' Le'. 11 Benle chi'i Benne'  
zchalje' ya'abá, na' wnné':

— Le' nako' Zi'na'. Nži'ilä' Le', na'  
žaz laža'a Le'.

## Ženele da' xiwe' gonen ga baga' Jesús dola'

(Mt. 4:1-11; Lk. 4:1-13)

12 Naž Dios Be' La'y bchi'e Jesusen'  
de chgi' lo latje dach. 13 Wzúa Jesusen'  
latje dachen' chopalj ža, na' gónele  
da' xiwe' gonen ga baga' Jesusen'

dola'. Wzóá Jesusen' gan zej nnita' bia yixé' ka', bia želdaba' ya'ado'. Wbás che ya'abá ka' góklengake' Jesusen', na' bwáwgake' Le'.

### Jesús źsedle' benách ka' gan nbab Galilea

(Mt. 4:12-17; Lk. 4:14-15)

<sup>14</sup>Wdé bséjwgake' Žwa liž ya, wyéj Jesusen' gan nbab Galilea. Bchalje' diža' chawen' dan' zan' lo na' Dios.

<sup>15</sup>Ki wnné':

—Ba bžin ža. Za' yedjnná bia' Dios nga. Le yeyát laže', na' le chejlé' diža' chawe' ni.

### Žliž Jesús tape benne' wzén bel

(Mt. 4:18-22; Lk. 5:1-11)

<sup>16</sup>Kate' ne zde Jesusen' žoa'a nisdo' che gan nbab Galilea, blé'ele' Smon, na' Ndres, benne' biche' Smon na'. Zej nake' benne' wzén bel ka', na' želzale' yixjw bel chégake' law nisen'.  
<sup>17</sup>Jesusen' bliže' légake', na' wnné':

—Le gonlen neda' tzen, na' gona' ga yedjwa'le benách ka' chia', gonle kan žonle kate' zzenle bel ka'.

<sup>18</sup>La' bká'ntegake' yixjw ka' chégake', na' jáklene' Jesusen'.

<sup>19</sup>Wdé Jesusen' yeláte'do' na'le, gan blé'ele' Jakob len Žwa, benne' ka'zej nake' zi'n Sebedeo, na' nníta'gake' lo barkw chégake' gan žeyágake' yixjw bel ka' chégake'.  
<sup>20</sup>Jesusen' la' bližtie' légake', na' bká'ngake' Sebedeon', xágake', gan zóalene' benne' wen žin chie' ka' lo barkwn', na' jáklene' Jesusen'.

### To benne' yoe'e be' xiwe'

(Lk. 4:31-37)

<sup>21</sup>Bžin Jesusen' len benne' ka' žónlengake' Le' tzen yež

Kapernaum. Kate' gok ža la'y chegak benne' judío ka', wyó'o Jesusen' yo'o gan zdobgak benne' judío ka' nich yéngakle' xtiža' Dios, na' wzó lawe' źsedle' benne' ka' zej ndobe' ga na'. <sup>22</sup>Bebángekle' kan źsedle Jesusen', dan' źsedle' kan žon to benne' nzi' lo ne'e yela' wnná bia', na' kege kan žongak benne' yodo' wsedle ka'. <sup>23</sup>Lezka' wzóá to benne' yoe'e be' xiwe' lo yo'o gan zej ndobe', na' wžéžeyi'e, <sup>24</sup>na' wnné':

—¿Biz nbága'to' chio', Jesús, benne' Nasaret? ¿Zo'o nich wzía yi'o neto'? Nónbi'a Le'. Nako' Benne' La'y che Dios.

<sup>25</sup>Naž Jesusen' wdilen', na' wnné':

—Wzóá žize, na' bežój lo bennen'.

<sup>26</sup>Naž be' xiwen' wžibe sisen bennen', na' wžéžeya'an zižje, na' la' bežojten. <sup>27</sup>Bebán láže'gak yógo'te benne' ka' nníta'gake' ga na', na' wnnábgekle' ljéžgake' toe' yetóe', na' wnnágake':

—¿Bízkze da' ni? ¿Žsedle' to da' kobe? Len yela' wnná bia' zchi'le' be' xiwe' ka', na' žóngaken kan znen'.

<sup>28</sup>La' wzete diža' che yela' wak che Jesusen', na' béngekle benách ka' dot gan nbab Galilean' kan nak chie'.

### Zeyón Jesús xna' zo'le Bedw

(Mt. 8:14-15; Lk. 4:38-39)

<sup>29</sup>Naž bežój Jesusen' lo yo'o gan zdobgak benne' judío ka' nich yéngakle' xtiža' Dios, na' la' wyéjlentie' Jakob, na' Žwa, na' bžíngake' ližgak Smon, na' Ndres.

<sup>30</sup>De xna' zo'le Bedw, bennen' lie' Smon, lo yo'on', na' yoe'e da' la. La' belzénte' Jesusen' kan žak che no'len'. <sup>31</sup>Naž wbiga' Jesusen', na'

bexwe' ne'e, na' bechise' le'. La'  
bežoje da' la da' yoe'en, na' bsí'ni'e  
da' bdáwgake'.

### Žeyón Jesús benne' yižwé' zan

(Mt. 8:16-17; Lk. 4:40-41)

<sup>32</sup>Kate' za' žale, kate' za' wžén wbiž,  
la' bžíntegak benne' ka'zej noe'e

benne' yižwé' ka' gan zoa Jesusen', na'  
lezka' benne' ka'zej yoe'e be' xiwe' ka'.

<sup>33</sup>Yógo'te benne' yež ka' bdóbdii'gake'  
kwit yo'o gan yo'o Jesusen'. <sup>34</sup>Le'  
beyone' benne' yižwé' zan, benne'  
ka'zej de'e yižwé' zan che chégake'.

Lezka' bebeje' be' xiwe' zan, be' ka'zej  
yo'o benne' ka'. Bi bi'e latje nnegak be'  
xiwe' ka' dan'zej nonbian' Le' No nake'.

### Zchalj Jesús gan nbab Galilea

(Lk. 4:42-44)

<sup>35</sup>Zildo' wyase Jesusen', kate' ne  
nak chol. Bežoje' lo yežen', na' wyeje'  
to latje dach, gan bcháljlene' Dios.

<sup>36</sup>Smón len benne' ka' mnítá'lengake'  
le' bejdílgake' Jesusen'. <sup>37</sup>Kate'  
bejxák'a'gake' Le', belyi'e Le':

—Yógo'te benách žeyílgake' Le'.

<sup>38</sup>Naž Jesusen' gože' légake', na'  
wnné':

—Le cho'o yež gawze ka', nich  
wchalja' xtiža' Dios ga na'. Che len  
bežoja'.

<sup>39</sup>Ka' goken, wdé Jesusen' dot gan  
nbab Galilea, na' bchalje' lo yo'o ka'  
gan zdobgak benne' judío ka' nich  
yéngekle' xtiža' Dios, na' bebeje' be'  
xiwe' ka' yo'ogak benách ka'.

### Žeyón Jesús to benne' da' bela' žen chie' yižwé' ležé

(Mt. 8:1-4; Lk. 5:12-16)

<sup>40</sup>To benne' da' bela' žen chie'  
yižwé' ležé bžine' gan zoa Jesusen'.

Bzoa zibe' lawe', na' góta'yoelé' Le',  
na' wnné':

—Cha' žénelo', wak yeyono' neda'.

<sup>41</sup>Jesusen' beyache' láže'le' bennen'.

Bli ne'e, na' wdane' le', na' gože' le':

—Žénela'. Ba beyako'.

<sup>42</sup>Katen' wnné' da' ni, la' benitte  
yižwén' dan' de'e, na' beyake'  
cháwe'do'. <sup>43</sup>Naž Jesusen' bchi'le'  
bennen', na' la' beséla'tie' le'. <sup>44</sup>Ki  
gože' le':

—Bi wzenlo' no benne' kan bena'  
chio', san wyéj, bejloé'el kwino' law  
bxoz, na' bejnezjw che da' beyako'  
le' che yodo' kan wnná Moisés, dan'  
wloe'elen benách ka' ba beyako'.

<sup>45</sup>Bežój bennen', na' wzó lawe'  
zznenle' benne' zan dan' goken chie'.  
Dan' bzie' diža' ni, biž gok chaz  
Jesusen' kwáselo lo yež, san wzoaze'  
na'le gan nak latje dach. Benách  
yógo'te yež bžíngake' gan zoe' Le'.

### Benne' yižwé', benne' bi žak se'e

(Mt. 9:1-8; Lk. 5:17-26)

**2** Wdé chope chonnie ža, beyáz  
Jesusen' lo yež Kapernaum, na'  
wzé diža' zoe' lo yo'o. <sup>2</sup>La' bdóbtegak  
benne' zan gan zoa Jesusen', na'zejte  
biž gok chejnnítá'gake' ga na', na'  
kege ža yo'o, na' Jesusen' bcháljlene'  
légake' xtiže'e. <sup>3</sup>Naž bžingak tape  
benne' ka' gan zoa Jesusen',zej noe'e  
to benne' yižwé', benne' bi žak se'e.

<sup>4</sup>Bi gok zíngake' law Jesusen' dan'  
zej nnita' benne' zan ka' ga na'. Che  
len bsáljwgake' yichjo'o gan nak law  
Jesusen'. Katen' beyóž bsáljwgaken',  
blétjgake' da' dele benne' yižwén' ga  
na'. <sup>5</sup>Kate' gókb'e'ele Jesusen' kan  
žejlé'gake' chie', gože' benne' yižwén':

—Zi'na', ba benít lawa' le' che dola'  
da' nbago'o.

6 Že'gak bale benne' yodo' wsedle ka' ga na'. Wzá' láže'gake', na' wnnágake': <sup>7</sup> ¿Biž chen' zchalj bennen' ki? Zzoe' Dios cheła'ale. Bi gak no benne' yenít lawe' che dola'. Toze Dios gak gonen!'' <sup>8</sup> Jesusen' la' gókbe'etele' da' zza' láže'gake', na' gože' légake':

—¿Biž chen' zza' láže'le ki? <sup>9</sup> Bi nak zede cha' no benne' ye'ze' benne' yižwé' ni ba benít lawe' che dola' da' nbage'e, san nak zede gone' ga yeyase', na' we'e da' dele', na' se'e. <sup>10</sup> Na'a gona' da' gak bia' neda', Benne' Golje' Benách, nzi' lo na'a yežlyó nga yenít lawa' che dola' da' zej nbaga' benách ka'.

Naž Jesusen' gože' benne' yižwén':

<sup>11</sup> —Žapa' le': Wyase. Beká'a da' delo', na' beyéj ližo'.

<sup>12</sup> La' wyaste benne' yižwén', na' beké'e da' góte'le', na' bežoje' lawgak yógo'te benne' ka' nníta'gake' ga na'. Bebángekle' yógo'tegake', na' bka'n zéngake' Dios, na' wnnágake':

—Batkle na' le'elto' da' ki.

### Jesús žliže' Lebí

(Mt. 9:9-13; Lk. 5:27-32)

<sup>13</sup> Bežój Jesusen' lo yež Kapernaum, na' wdíe' da' yoble žoa'a nisdon'. Bedobgak benne' zan gan zoe', na' Le' bsedle' légake'. <sup>14</sup> Kate' ne zde Jesusen' ga na', ble'ele' Lebí, zi'in Alfeo, zi'e gan zchizjwe' lo wláz yež zi'to'. Jesusen' gože' le':

—Benlen neda' tzen.

La' wzó ža'te Lebín', na' wyéjlene' Jesusen'.

<sup>15</sup> Wdé gok da' ni, benne' zan, benne' wechizjw ka' len yebale benne' gaxjw ka' žé'gake' tzen len Jesusen', na' len benne' wsedle chie'

ka' gan žáwgake' lo liž Lebín'. Ki goken dan' benne' zan žjáklene' Jesusen'. <sup>16</sup> Kate' benne' yodo' ka', benne' wsedle ka' len benne' fariseo ka', blé'egekle' Le' ži'e žawe' tzen len benne' wechizjw ka', na' len yebale benne' gaxjw ka', naž bely'i'e benne' wsedle ka' che Jesusen', na' wnnágake':

—¿Bižen' žone'? Že'j žáwlene' tzen benne' wechizjw ka', na' benne' dola' ka'.

<sup>17</sup> Benle Jesusen' da' ni, na' gože' légake':

—Benne' ka' nníta'gake' chawé' bi žon byenen chjake' law benne' žeyone' benách ka', san benne' yižwé' ka' žon byenen chjake' law benne' žeyone' benách ka'. Za'a neda', kege nich wliža' benne' chawé' ka', san nich wliža' benne' dola' ka', nich yeyát láže'gake'.

### Zchalj Jesús che yela' žon wbás

(Mt. 9:14-17; Lk. 5:33-39)

<sup>18</sup> Kate' ža na' benne' ka' žónlengake' Zwa tzen, na' benne' ka' žónlengake' benne' yodo' fariseo ka' tzen, žóngake' wbás, na' bla'gak bale benne' ka' gan zoa Jesusen', na' wnnábgekle' Le', na' wnnágake':

—Benne' ka' žónlengake' Žwan' tzen, na' benne' ka' žónlengake' benne' yodo' fariseo ka' tzen, žóngake' wbás. ¿Biž chen' benne' ka' žónlengake' Le' tzen bi žóngake' wbás?

<sup>19</sup> Naž bechebe Jesusen', na' gože' légake':

—¿Wak gonle ga gongak wbás benne' ka' nníta'gake' lni che benne' zchag ne'e kate' le' ne zóalene' légake'? Kate' bennen' zchag ne'e ne

zóalene' légake', bi góngake' wbás.  
**20** Žin že kate' kwas bennen' zchag ne'e, na' biž sóalene' légake'. Ža na' góngake' wbás.

**21** Bi wdá' nitó benne' to laže' kobdo' lo laže' gole nich yeyonen', dan' yedobe laže' koben', na' wžezan' laže' gole', na' chéza'že laže' gole'.  
**22** Lezka', nitó benne' bi ke'e xis uba kobe lo že'e biž da' naken yid, dan' gak bla'a xis uba koben', na' wlá'a že'e bižen' da' naken yid, na' lalje xis uban', na' gak ditje že'e na' da' naken yid. Žala' ka'žo xis uba kobe lo že'e da' naken yid kobe.

### Zká'gake' bisto zoa' stribre že la'y

(Mt. 12:1-8; Lk. 6:1-5)

**23** To že la'y chegak benne' judío ka', wdé Jesusen' gan de yele zoa' stribre, na' benne' wsedle chie' ka' wzó lágake' zká'gake' bisto gan žia zoa' striben', na' žáwgaken'. **24** Naž benne' yodo' fariseo ka' belyi'e Jesusen', na' wnnágake':

—Bwia nga. Benne' ka' žónlengake' Le' tzen žóngake' da' bi žala' gonžo že la'y.

**25** Jesusen' gože' légake':

—Bi bel-le kan ben Dabí katen' wdone', na' byažje da' gawe' le' len benne' ka' wnnítalengake' le'?

**26** Wyo'e lo yo'o che Dios katen' gok Abiatar bxoz blo, na' bdawe' yet xtil da' zkó'ogake' law Dios, dan' bi nzi' lo na' no benne' gawen', san toze bxoz ka' nzi' lo ná'gake' gáwgaken'. Lezka' bnejzwe' da' bdawgak benne' ka' wnnítalengake' le'.

**27** Naž Jesusen' gože' légake':

—Dios bene' že la'y nich yebélengeklen benách ka', kege bene' benách ka' nich góngake'

xchin že la'y. **28** Che len, neda', Benne' Golje' Benách, naka' xane že la'y.

### Jesús žeyone' to benne' nžeke' ne'e

(Mt. 12:9-14; Lk. 6:6-11)

**3** Da' yoble wyó'o Jesusen' to yo'o gan zdobgak benne' judío ka' nich yéngekle' xtiža' Dios, na' lezka' zoa to benne' nžeke' ne'e ga na'. **2** Benne' yodo' ka' bwíagake' Jesusen' cha' yeyone' bennen' že la'y, dan' žénegekle' yesbága'gake' Le' zia. **3** Naž Jesusen' gože' bennen' nžeke' ne'e, na' wnné:

—Wzó že', na' wzé lágak benne' ki.

**4** Jesusen' wnnable' benne' ka', na' wnné:

—De latje gonžo da' nak chawé' kate' nak že la'y, o gonžo da' zinnj? De latje gape chi'ižo yela' nban chegak benách ka', o wzía yi'žon?

Wnnítalengake' žize benne' ka'. **5** Naž Jesusen', lo yela' zža'a chie', bwie' benne' ka', benne' nnítalengake' dot kwite', na' gok nyache' laže'e dan' nak zide yichj lázdo'gake'. Naž gože' bennen' nžeke' ne'e, na' wnné:

—Bli no'o.

Bennen' bli ne'e, na' la' beyakten chawé'do'. **6** Naž bežojgak benne' yodo' fariseo ka', na' la' béntegake' tzen diža' len benne' ka' žónlengake' Herodes tzen nich gak yesbága'gake' Jesusen' zia, na' gótgake' Le'.

### Zdobgak benne' zan žoa'a nisdo'

**7** Bezá' Jesusen' ga na' tzen len benne' ka' žónlengake' Le' tzen, na' bžine' žoa'a nisdo', na' benne' zan jáklene' Le', benne' ka' zej nžoje' gan nbab Galilea, na' gan nbab

Judea. <sup>8</sup>Lezka' bžingak benne' zan gan zoa Jesusen', benne' ka' zej nžoje' Jerusalén, na' gan nbab Idumea, na' gan nbab yechelá'al yego Jordán, na' yež ka' zej nnitan' dot kwit gan zej nnita' yež Tiro, na' yež Sidón. Ki béngekale' dan' béngekle' kan zej nak da' zen ka' da' žon Jesusen'. <sup>9</sup>Che len Jesusen' gož' benne' ka' žónlengake' Le' tzen wkwéztezegake' to barkw gan gak kwene', nich bi wchigak benne' zan ka' Le'. <sup>10</sup>Ka' goken dan' ba beyone' benne' zan, benne' yižwé' ka', na' wbíga'gak benne' zan ka' gan zoe' nich kágake' Le'. <sup>11</sup>Kate' be' xiwe' ka' yo'ogak benách ka' blé'egeklen Jesusen', btínnegaken benne' ka' xini'a Jesusen', na' wžézeya'agaken, na' wnnágaken:

—Nako' Le' Zi'n Dios.

<sup>12</sup>Jesusen' bchi'le' be' xiwe' ka', nich bi wzéngeklen benách ka' No nake' Le'.

**Jesús zbie' chežinno benne' nich gákgake' wbás chie' ka'**

(Mt. 10:1-4; Lk. 6:12-16)

<sup>13</sup>Naž wžén Jesusen' to law ya'ado', gan bliž'e' benne' ka' žénele'. Wbíga'gak benne' ka' dot kwite'.

<sup>14</sup>Wžé Jesusen' chežinno benne' ki, nich gónlengake' Le' tzen, na' nich sele'e legake' chejzéngakle' benách ka' xtiže'e. <sup>15</sup>Bdie' lo nágake' yela' wnná bia' nich yeyóngake' benne' yižwé' ka', na' nich yebéjgake' be' xiwe' ka' yo'ogak benách ka'. <sup>16</sup>Ki lágake':

Smon, (bzoa Jesusen' yetó le', Bedw),

<sup>17</sup>Jakob,

Zwa, (benne' biche' Jakob, na' zej nake' Zi'n Sebedeo.

Chope' ki, Jesusen' bezóe' yetó lágake', Boanerjes, da' zejlásen len diža' xiža': Benne' wale ka' ka' wzió'),

<sup>18</sup>Ndres,

Lip,

Bartol,

Matío,

Mas,

Jakob, (Zi'n Alfeo),

Tadeo,

Smon, (benne' že' laže'e yež chie'),

<sup>19</sup>Judas Iskariote, (benne' wdíe' Jesusen' lo na'gak benne' ka' gótgake' Le').

**Znnágake' da' xiwe' žónlenen Jesús tzen**

(Mt. 12:22-32; Lk. 11:14-23; 12:10)

Wdé na' bežín Jesusen' len benne' ka' žónlengake' Le' tzen to yo'o.

<sup>20</sup>Da' yoble bdobgak benne' zan gan zoa Jesusen', na' biž gota' latje bi da' gaw Jesusen' len benne' chie' ka'.

<sup>21</sup>Kate' béngekle benne' bíche'kze Jesusen' ka' kan žak chie', bžíngake' ga na' nich yeché'gake' Le', na' wnnágake': "Žak yal yichje'."

<sup>22</sup>Lezka' benne' yodo' wsedle ka', benne' zej nžoje' yež Jerusalén, wnnégake' chie', na' wnnágake':

—Belzebú, xangak be' xiwe' ka', žónlenen Le' tzen, na' len yela' wnná bia' chen žebeje' be' xiwe' ka'.

<sup>23</sup>Naž Jesusen' bliž'e' benne' yodo' wsedle ka', na' bsaka' lebe', na' wnné':

—¿Yebéj da' xiwe' la' kwinzen?

<sup>24</sup>Cha' benne' ka' nnítá'gake' to yež la'a lágake', na' cha' tíl lengake' ljéžgake' ka', bi gak dia' yežen'. <sup>25</sup>Lezka' cha' benne' ka'

nníta'gake' to yo'o la'a lázgake', na' cha' tíl-lengake' ljéžgake' ka', bi gak diá'gake'. <sup>26</sup>Che len, cha' da' xiwe' tíl-lenen lježen ka', na' cha' la'a lázgaken, bi gak dia' yela' wnnábia' chen, san za' yejóz chen.

<sup>27</sup>'Bi gak nitó benne' choe'e liž to benne' wałe, nich kweje' yela' wnnia' chie' cha' bi wcheje' benne' walén' zga'ale, na' naž sake'e kweje' da' de liž bennen'.

<sup>28</sup>'Da' li žapa' le'e: gak yenít law Dios benách ka' che yógo'te dola' da'zej nbage'e, na' che yógo'te diža' xiwe' da' znnágake', <sup>29</sup>san cha' no benne' nnie' che Dios Be' La'y, batkle yenít law Dios bennen'. To chi'ize nbage'e zia'.

<sup>30</sup>Ki wnná Jesusen' dan' benne' yodo' wsedle ka' wnnágake' chie', na' wnnágake': "Da' xiwe' žónlenen Le' tzen."

### No benne' nake' xna' Jesús, na' benne' biche'e

(Mt. 12:46-50; Lk. 8:19-21)

<sup>31</sup>Naž benne' biche' Jesusen' ka' len xne'e bžíngake' gan zoe'. Wnníta'gake' la' lí'ale, na' bséla'gake' to benne' chejliže' Jesusen'. <sup>32</sup>To benne' ladjw benne' zan, benne' ka' žé'gake' dot kwit Jesusen' gože' Le', na' wnné':

—Benne' bicho'o ka' len xno'o, nníta'gake' la' lí'ale, na' žližgake' Le'.

<sup>33</sup>Bechebe Jesusen', na' gože' légake':

—¿Nnézlele no benne' nake' xna'a, na' no benne' ka'zej nake' bicha'a ka'?

<sup>34</sup>Naž bwie' benne' ka' žé'gake' dot kwite', na' wnné':

—Le wia nga. Benne' kizej nake' ka xna'a, na' benne' bicha'a ka'. <sup>35</sup>No benne' žone' kan žénele Dios, benne' ni nake' ka benne' bicha'a, na' ka no'le zana', na' řezka' ka xna'a.

### Žsaka' lebe Jesús kan nak che benne' žaz

(Mt. 13:1-9; Lk. 8:4-8)

**4** Da' yoble wzó law Jesusen' žsedle' benne' ka' gan nak žoa'a nisdo'. Bdobgak benne' zan gan zoe', na' wzén Jesusen' to lo barkw da' žen' lo nisen', na' wži'e ga na', na' yógo'te benne' ka' wnníta'gake' lo yo žoa'a nisen'. <sup>2</sup>Jesusen' bsedle' légake' da' zan, da' bsaka' lebe'. Kate' ne žsedle' légake', wnné':

<sup>3</sup>—Le wzé nag da' ni. Bžoj to benne' žaz, zjeze' bínnedo' ka'. <sup>4</sup>Kate' ne zjeze', békjwgak bále bínnedo' ka' to lo nez las. Bžingak byínnedo' ka', na' bdáwgakban'. <sup>5</sup>Yebále bínnedo' ka' békjwgaken gan že' yej, gan de láte'ze yo. Bayenze bla'gak bínnedo' ka' dan' de láte'ze yo ga na'. <sup>6</sup>Naž kate' bla' wbíž, la' wbížtegaken dan' bi nóngaken lwen gže'.

<sup>7</sup>Yebále bínnedo' ka' békjwgaken gan begolgak lba yeche' ka'. Kate' bla'gak bínnedo' ka', řezka' bela'gak lba yeche' ka', na' bdóbgaken da' ka' goze', na' da' ka' bi be bnézjwgaken.

<sup>8</sup>Yebále bínnedo' ka' békjwgaken gan nak yo bebe, na' blá'gaken, na' gó'l-le'egaken. Bnézjwle'egak da' ka' goze'. To yag da' goze' bnežjwn yechí žoa bínnedo' ka'. Yetón bnežjwn yechonnlalj bínnedo' ka', na' yetón bnežjwn yetó gaywá' bínnedo' ka'.

**9** Naž Jesusen' gože' légake', na' wnné':

—No benne' zoa nage', na' ženle', žala' wzé nage'.

### Zloe'el Jesús biž chen' žsaka' lebe'

(Mt. 13:10-17; Lk. 8:9-10)

**10** Kate' Jesusen' ba bga'ne' toze', benne' zan, benne' ka' nníta'gake' ga na' bžíngake' gan zoe', tzen len chežinno benne' wsedle chie' ka', na' wnnábgekle' Le' biž žsedle dan' bsaka' lebe'. **11** Jesusen' gože' légake', na' wnné':

—Dios žonne' le'e latje chejní'ilele da' ngache' kan znna bi'e, san benne' ka', benne' bi žónlengake' žo'o tzen, yógo'te zcháljlengaka'-ne' da' žsaka' leba'. **12** Ki žona' dan' žak kan nyejw le'e yiche la'y, da' znnan:

Wíagake', san bi légekle'.

Wzé nággake', san bi

chejní'igekle',

na' bi yeyát láže'gake' nich gak

yenít lawá' chégake'

dola' da' zej nbage'e.

### Zloe'el Jesús da' žsedle dan' bsaka' lebe'

(Mt. 13:18-23; Lk. 8:11-15)

**13** Lezka' Jesusen' gože' benne' ka' žónlengake' Le' tzen, na' wnné':

—¿Bi žejní'ilele dan' bsaka' leba'?

¿Nakx gak chejní'ilele yezika'

da' wsaka' leba'? **14** Benne' žazen'

nake' benne' z zie' diža'. **15** Zej nak

bale benne' ka' ka binnedo' ka' bějwgaken to lo nez. Želyenle'

xtiža' Dios, san kate' želenlen', la'

za'te da' xiwe', na' zka'n dižan' da'

béngekle'. **16** Zej nak yebale benne'

ka' ka binnedo' ka' bějwgaken gan že' yej. Želyenle' dižan', na' len

yela' žebél chégake' želzi'en. **17** San bi žazen lo yichj lázdo'gake', na' to chí'ido'ze zzí'gaken'. Kate' bi da' žak chégake' o cha' zoa benne' žbia laže'e légake' dan' zze nággaken', la' žsan láže'tegaken'. **18** Zej nak yebale benne' ka' ka binnedo' ka' bějwgaken gan žegolgak lba yeche' ka'. Želyenle' dižan', **19** san že' láže'gake' da' naken che yežlyó nga. Žon láže'len légake' dan' zej nzí'iile' yela' wnni'a, na' zdan láže'gake' yela' gape. Yógo'te da' ki želyazen lo yichj lázdo'gake', na' zntile dižan', na' bi žonen žin lo yichj lázdo'gake'. **20** Zej nak yebale benne' ka' ka binnedo' ka' bějwgaken lo yo bebe. Želyenle' dižan', na' zzi' lo ná'gaken', na' žonen žin lo yichj lázdo'gake'. Zej nak bale benne' ki ka binnedo' ka' bnéjwgaken yechí žoan. Zej nake' yebale' ka binnedo' ka' bnéjwgaken yechónnlaljen, na' zej nak yebale' ka binnedo' ka' bnéjwgaken yetó gaywán'.

### Žsaka' lebe Jesús che to da' zgo'on baní'

(Lk. 8:16-18)

**21** Lezka' Jesusen' gože' benne' ka' žónlengake' Le' tzen, na' wnné':

—Kate' zwála'žo yi', čzdóse'žon to

kak, o zgo'ožon zane gan žáta'žo?

Bi žonžo ki, san zzoažon ža'le

gan ko'on baní'. **22** Yógo'te da' zej

ngachen' yelá' láwgaken, na' yógo'te

da' zákgaken gan nak chol žójgaken

lo baní'. **23** No benne' zoa nage', na'

ženle', žala' wzé nage'.

**24** Lezka' gože' légake':

—Le we' laže' che da' žénlele. Kan

nak da' zžíxele, tlebe wžíx Dios

chele, na' wnežjwe' yelate' chele.

**25**No benne' nzi'e xtiže'e, we'e yelate' chie', san no benne' bi nzi'e xtiže'e, da' láte'do'ze da' benle', yegán.

**Žsaka' lebe Jesús kan  
zgole yele zoa' stribé**

**26**Lezka' wnná Jesusen':

—Kan žak yela' wnná bia' che Dios yežlyó nga naken kan žak kate' to benne' žaze' zoa' stribé lo yežlyó chie'. **27**Yele ztase', na' žeyasse' kate' za' ža'ní'. Zla' yag zoa' striben', na' zgolen, san le' bi nnezle' nakx žak zgolen. **28**La' yežlyón' žzenen da' nazen lo yežlyón'. Zga'ale za' xyazen, naž za' bisto chen, na' te na' kwia zoa' stribé wale lo bisto chen. **29**Kate' ba naše zoa' striben', la' chejtie' chejchoge' bizton' dan' ba bžin ža si'e zoa' striben'.

**Žsaka' lebe Jesús kan žak che  
bínnedo' mostasa**

(Mt. 13:31-32; Lk. 13:18-19)

**30**Lezka' wnná Jesusen':

—¿Bíz nnia' kan žak yela' wnná bia' che Dios yežlyó nga? ¿Bíz wsaka' leba' kan žaken? **31**Žaken kan žak che to bínnedo' mostasa. Kate' žazen lo yo naken to bínnedo' da' nakžen kwíde'do' ka yógo'te bínnedo' ka' žé'gaken lo yo, **32**san kate' ba nazen, zlan', na' žé'ntežen ka yógo'te yixe' kwan da' žé'gaken yežlyó. Kan žon yana' ni'a nen', gak žingak byínnedo' ka', na' wžíagakba' xó'ngakba' lo zol chen.

**Ka zkonle žin Jesús da' žsaka' lebe'**

(Mt. 13:34-35)

**33**Ka' goken, Jesusen' bsedle' légake', na' da' zanže da' bsaka' lebe' kan gok chejn'i'gekle'. **34**Yógo'te da'

bcháljlene' benne' ka', bzaka' leben', na' yógo'te da' ki bzejni'ile' légakze benne' wsedle chie' ka'.

**Jesús zzoa žie' to be' wale**

(Mt. 8:23-27; Lk. 8:22-25)

**35**La' ža na'ze, kate' za' žale, Jesusen' gože' benne' ka' žónlengake' Le' tzen, na' wnné':

—Le cho'o, težo yechelá'a nisdo' nga.

**36**Naž bkwásgake' gan nníta'gak benne' zan ka', na' bsá'gake' barkwn' gan ba že' Jesusen'. Lezka' wnníta'gak yebale barkw ka' ga na', da' ka' zjáklenen légake'. **37**Wzó law žak to be' wale lo nisen', na' wdá'a nis lo barkwn'. Ka' goken, zej zcha' nis lo barkwn'. **38**Jesusen' die' ztase' lo zkogwe' gan nak ža'le lo barkwn', na' besbángake' Le', na' belyi'e Le':

—Benne' wsedle. ¿Bi žeklo' cheto'? Gatzko' zan nis nga.

**39**Naž wyase Jesusen', na' bliže' ben' žaken, na' wnné':

—Wzó ži.

Lezka' gože' nisen', na' wnné':  
—Žize wzóá.

Wzó ži ben' goken, na' wžé' ži nisdon'. **40**Naž Jesusen' gože' benne' ka' žónlengake' Le' tzen, na' wnné':

—¿Bíz chen' zžébele ki? ¿Bi na' chejle'le che Dios?

**41**Ne zžébegake', belyi'e ljéžgake' toe' yetóe':

—¿Bízke nak benne' ni? Be' žaken, na' nisdo' žóngaken kan znna xtiže'e.

**Benne' Gadara, benne' yoe'e be' xiwe'**

(Mt. 8:28-34; Lk. 8:26-39)

**5**Naž bžin Jesusen' len benne' ka' žónlengake' Le' tzen

yechełá'a nisdo' gan nbab che yež Gadara. <sup>2</sup>Kate' bežój Jesusen' lo barkwn', la' bžintę to benne' lawe' Le', benne' bžoje' to lo bloj gan zej ngache' benne' gat ka', na' yoe'e be' xiwe'. <sup>3</sup>Benne' ni zzoe' gan zej ngache' benne' gat ka'. Bi gok nitó benne' wcheje' le', kege len do ya. <sup>4</sup>Zan chi'i bzóagake' bayw ya yen ne'e, na' ni'e, na' bchégake' le' do ya ka'. Ble'e do ya ka', na' bzozje' bayw ya ka'. Bi gok no benne' nna bi'e le'. <sup>5</sup>Zdáteze' zbežeyi'e dot ža dot yele gan zej ngache' benne' gat ka', na' gan nak law ya'ado' ka', na' žon we' kwine' lo yej ka' zej žen' ga na'. <sup>6</sup>Kate' ble'ele' za' Jesusen' zít'o le, taría taría wyeje' gan ze'e, na' bzoa zibe' lawe'. <sup>7</sup>Wnné' zižje, na' gože' Jesusen':

—¿Bíz nbaga'a chio', Jesús, Zí'n Dios, Benne' zente? Ni'a che Xanžo Dios žáta'yoela' le', bi wsaka' zí'o neda'.

<sup>8</sup>Ki wnné' dan' Jesusen' ba gože' be' xiwen':

—Le', be' xiwe', bežój lo bennen'.

<sup>9</sup>Jesusen' wnnablen', na' wnné':

—¿Bi lio'?

Beží'i be' xiwen', na' gožen Le':

—Da' Zan lia' dan' nakto' be' zan.

<sup>10</sup>Wnné yachen' law Jesusen' nich bi sele'e be' xiwe' ka' zi'to' lo yežlyón'. <sup>11</sup>Zej nnita' koch zan law ya'ado' na'ze, želdaba' žawgakba' ga na'. <sup>12</sup>Be' xiwe' ka' wnné yáche'gaken law Jesusen', na' wnnágaken:

—Bselá' neto' gan zej nnita' koch zan ka'. Benn neto' latje chejžó'ogakto'-ba'.

<sup>13</sup>Jesusen' la' be'tie' légaken latje, na' bežojgak be' xiwe' ka',

na' bejžó'ogaken koch zan ka', na' bxíte'gak koch ka', na' bejbíxjgakba' gan nak žoa'a ya'a, na' bejcházgakba' lo nisdo', gan wyépegakba' nis, na' gótgakba'. Gókgakba' ka chop milba'.

<sup>14</sup>Naž bzonnjgak benne' ka' žape chíigake' koch ka', na' bejzéngakle' benne' yež ka', na' lezka' benách ka' nnítá'gake' yixen'. Bžojgak benne' yež ka', nich chejwíagake' bizen' goken ga na'. <sup>15</sup>Kate' bžíngake' gan zoa Jesusen', blé'egakle' bennen' zga'ale yoe'e be' xiwe' ka'. Že' bennen' ga na', na' nakwe' laže', na' zoe' cháwe'do', na' bžébegak benne' ka'. <sup>16</sup>Ki goken dan' benne' ka', benne' blé'egakle' da' ben Jesusen' bzéngekle' benne' ka' bžójgake' lo yež kan goken che bennen' zga'ale yoe'e be' xiwe' ka', na' lezka' kan gok chegak koch ka'. <sup>17</sup>Naž wzó lawgak benne' ka' žáta'yoegakle' Jesusen' yežoje' lo yežlyó chégake'.

<sup>18</sup>Kate' bebén Jesusen' lo barkw, bennen' zga'ale yoe'e be' xiwe' ka', góta'yoelé' Jesusen' we'e le' latje chéjlene' Le' tzen. <sup>19</sup>Jesusen' bi bi'e le' latje, san gože' le':

—Beyéj ližo'. Bejzenle lježo' ka' da' zen da' bena' chio' neda', naka' Xano', na' ka beyache' láže'la' le'.

<sup>20</sup>Beyéj bennen', na' wzíe' diža' lo yež Dekápolis ka' kan nak da' zen da' ben Jesusen' chie', na' bebán láže'gak yógo'te benne' ka' nnítá'gake' yež ka'.

Xkwide' no'le che Jairo, na' no'len' wdane' za Jesús

(Mt. 9:18-26; Lk. 8:40-56)

<sup>21</sup>Kate' bežín Jesusen' yechelá'a nisdon', naž bedobgak benne' zan gan zoe' žoa'a nisdon'. <sup>22</sup>Lezka' to

benne' lie' Jairo, benne' blo che yo'o gan zdobgak benne' judío ka' nich yéngekle' xtiža' Dios, ble'e gan zoa Jesusen'. Katen' ble'ele' Le', bzoa zibe' lawe'. <sup>23</sup>Góta'yoele' Le', na' wnné':

—Za' gat xkwide' no'le chia'. Da, xoa no'o lebe' nich yeyakbe', na' bi gatbe'.

<sup>24</sup>Jesusen' wyéjlene' le', na' benne' zan zjáklene' Jesusen', na' zchígake' Le'. <sup>25</sup>Lezka' zoa to no'le ga na', ba zej chežinno yiz de'e yižwé'. Bi žebežížen chie' che we' chégakkze no'le ka'. <sup>26</sup>Ba wzáka'li'e lo na'gak benne' zan, benne' ka' žeyóngake' benách ka'. Dáche'ze ba btie' dot da' wdape', na' bi be góklenen le', san žyála'žen chie'. <sup>27</sup>Kate' benle' zchaljgak benách ka' kan nak che Jesusen', wdíe' ládjwle benne' zan ka', na' bžine' zaka' xkožel' Jesusen', na' wdane' laže' da' nakwe'. <sup>28</sup>Ki bene' dan' wnné': "Cha' kanza' ze', yeyaka!." <sup>29</sup>La' bebižte žen chie', na' gókbe'ele' ba beyake' che da' goken chie'.

<sup>30</sup>La' gókbe'etel Jesusen' ben žin yela' wak chie', na' beyechje'. Bwie' benne' zan ka', na' wnné':

—¿Noz benne' wdane' neda?

<sup>31</sup>Naž benne' ka' zej nake' toze len Le' góžgake' Le', na' wnnágake':

—Zlé'ekzel' benne' zan ki zchígake' Le', na' znno': "¿Noz benne' wdane' neda?"

<sup>32</sup>Naž bwia Jesusen' dot kwite' nich le'ele' bennen' wdane' Le'.

<sup>33</sup>Naž no'len' wbige'e lawe'. Zžebe', na' žzize', dan' nnezle' dan' goken chie'. Bzoa zibe' law Jesusen', na' gože' Le' dot dan' goken. <sup>34</sup>Naž Jesusen' gože' le':

—Nó'ledo'. Ba beyako' dan' žejli'o chia'. Binlo beyéj ližo'. To chi'ize beyako' che dan' goken chio'.

<sup>35</sup>Kate' ne zchalj Jesusen' da' ki, benne' ka' zej nžoje' liž benne' blon' che yo'o gan želenle' xtiža' Dios, bžíngake' ga na', na' belyi'e bennen':

—Ba got xkwide' no'le chio'. Biž wpižo' benne' wsedle.

<sup>36</sup>Bi be' laže' Jesusen' dan' wnnágake', san gože' benne' blon', na' wnné':

—Bi žebo'. Bejle'ze che Dios.

<sup>37</sup>Jesusen' bi bnežjwe' yezika' benne' ka' latje chjáklene' Le', san lěgakze Bedw, na' Jakob, na' Zwa, benne' biche' Jakoben'. <sup>38</sup>Katen' bžine' liž benne' blon' che yo'o gan želenle' xtiža' Dios, ble'ele' žak žaxto', na' zej nnita' benne' ka' zbežegake' ga na', na' lezka' benne' ka' zbeže nyáche'gake'. <sup>39</sup>Wyó'o Jesusen' ga na', na' gože' lěgake':

—¿Biz chen' žonle žaxto', na' zbežele ki? Bi nat xkwide' no'len'. Ztászebe'.

<sup>40</sup>Naž ben dítjgekle' Jesusen', san Le' bebeje' yógo'te benne' ka' na'le. Bchi'e xa xna' xkwide' no'len', na' lezka' benne' ka' žónlengake' Le' tzen, na' wyoé'e gan debe'. <sup>41</sup>Bexwe' na' xkwide' no'len', na' gože'-be':

—Talita, kumi.

Diža' hebreo ni znnan len diža' xiža': "Xkwide' no'le, wyase." <sup>42</sup>La' wyaste xkwide' no'len', na' bezabe'. Ba zejbe' chežinno yiz. Bebán láže'gak benne' ka' nnítagake' ga na'. <sup>43</sup>Naž Jesusen' bchi'le' lěgake' bi wzéngekle' nitó benne' dan' goken. Na' gože' lěgake':

—Le gonn da' gaw xkwide' no'le ni.

**Žežín Jesús yež Nasaret, yežen'  
naken laže'**

(Mt. 13:53-58; Lk. 4:16-30)

**6** Naž bezá' Jesusen' ga na', na' bežine' laže', na' benne' ka' žónlengake' Le' tzen wzálengake' Le' tzen. <sup>2</sup>Kate' bžin že la'y chegak benne' judío ka', wzó law Jesusen' žedle' benne' ka' gan zdóbgake' nich yéngekle' xtiža' Dios. Wnníta'gak benne' zan ga na', benne' ka' želenle' chie'. Bebágekle', na' wnnágake': —¿Gaz bsedle bennen' da' ki? ¿Biz yela' žejni'il na' da' nape'? ¿Nakx žone' da' ka'zej nak bian', da' ka' zá'gaken zaka' ya'abá che Dios? <sup>3</sup>Benne' ni nake' benne' zkoni'le' žin blag ka', zil'n Lia. Nake' bíche'gak Jakob, na' Jwsé, na' Judas, na' Smon. Lezka' no'le zane' ka' nníta'lengake' žo'o nga.

Che len bzóagake' Le' chela'ale.

<sup>4</sup>Naž Jesusen' gože' légake', na' wnné':

—Gáte'teze žápegake' ba la'ne to benne' zchalje' lo wláz Dios, san benne' wláž chie' ka', na' lježe' ka', na' benne' ka' nníta'gake' liže' bi žápegake' le' ba la'ne.

<sup>5</sup>Che len Jesusen' bi gok gone' nitó yela' wak zen ga na'. Toze beyone' babze benne' yižwé' ka', kate' bxoa ne'e légake'. <sup>6</sup>Bebán laže'l Jesusen' dan' bi žejlé'gake' chie'. Wdé na' wdíe' yeždo' ka'zej žen' dot kwit ga na', na' bsdle' benne' ka' ga na'.

**Žsela' Jesús benne' chie' ka' nich  
chejzégake' xtiže'e**

(Mt. 10:5-15; Lk. 9:1-6)

<sup>7</sup>Naž Jesusen' bliže' benne' chežinno ka', benne' žónlengake' Le'

tzen, na' wzó lawe' žsele'e légake' chope chópegake'. Bdje' lo ná'gake' yela' wnná bia' kwéjgake' be' xiwe' ka' yo'ogak benách ka'. <sup>8</sup>Bchi'le' légake' bi be wá'gake' lo nez, kege yižjw, na' kege yet, na' kege mežw bi kó'ogake' lo bzode chégake', san toze yagdo' chjwá'gake'. <sup>9</sup>Žala' chjwá'gake' zélgake', san kege yetó laže' da' xoan yéngake'. <sup>10</sup>Lezka' gože' légake':

—Gáte'teze gan cho'ole to yo'o, le soa yo'on' kate' yezá'žele yežen'. <sup>11</sup>Cha' chazle to yež gan benne' ka' bi gápegake' le'e ba la'ne, na' bi wzé nággake' xtíža'le, le yežój ga na', na' le wchinnj bixte yo da' dan' lable. Da' ni gak bian'zej nbage'e zia. Da' li žapa' le'e, kate' žin že chog Dios chegak benách ka', naž sáka'žegak benne' ka' che yežen' ka sáka'gak benne' ka' che yež Sodoma, na' benne' ka' che yež Gomorra, yež ka' bchinij Dios.

<sup>12</sup>Naž bžojgak benne' ka' žónlengake' Le' tzen, na' bejzéngekle' benách ka' žala' yeyát láže'gake'. <sup>13</sup>Lezka' bebéjgake' be' xiwe' zan yo'ogak benách ka'. Wló'ogake' set lawgak benne' zan, benne' yižwé' ka', na' beyákgake' cháwe'do'.

**Ka bétgake' Žwa, bennen' bezóe'  
benách ka' nis**

(Mt. 14:1-12; Lk. 9:7-9)

<sup>14</sup>Benle Herodes, benne' znnna bi'e, kan nak da' žon Jesusen', dan' zze diža' gáte'teze che yela' wak chie'. Bale' benne' ka' znnágake':

—Nake' Žwa, bennen' bezóe' benách ka' nis. Ba bebane' lo yela' got. Che len nape' yela' wak žone' da' ki.

**15** Yeba<sub>le</sub> benne' ka' znnágake':

—Nake' Lías, bennen' bchalje' lo wláz Dios ža ni'te.

Yeba<sub>le</sub>' znnágake':

—Nake' to benne' zchalje' lo wláz Dios kan gokgak benne' ka' wnnít'a'gake' ža ni'te, benne' ka' bcháljgake' lo wlaze' Le'.

**16** Kate' benle Herodes da' ki, wnné':

—Nake' Zwa, bennen' bžixa' yene'. Ba bebane' lo yela' got.

**17** Ki wnná Herodes na' dan' lekze' bsele'e benne' ka' yjéxjwgake' Zwan', na' bchéjgake' le' len do ya lo yo'o liž ya. Ki ben Herodes na' dan' zža' Herodías Zwan'. Herodías na' nake' no'en' goke' zo'le Lip, benne' biche' Herodes na'. Herodes na' bekwase' Herodías na', na' bchag nálene' le'.

**18** Zwan' gože' Herodes na':

—Bi žala' sóalen' zo'le benne' bicho'o.

**19** Dan' gónele Herodías na' bi da' gone' che Zwan' nich gote' le', che len gónele' gata' latje chie', san bi be wzáka'le', **20** dan' Herodes na' zžebe' Zwan', dan' nnézkzele' nak Zwan' chawe', na' la'y. Che len wdape chi'e le', na' bze nage' chie' dot laže'e la'kze dan' wnná Zwan' benen ga wžé' zedle Herodes na'. **21** Naž bžin to ža wzáka'le Herodías na', da' naken ža žon lni Herodes na' che ža wye'ele' yiz. Bsí'ni'e da' ye'j gawgak benne' ka' nzi' lo ná'gake' lo wlaze' le', na' benne' ka' zché'gake' benne' ka' žjake' lo wdile, na' lezka' benne' ka'zej nake' blo gan nbab Galilea.

**22** Wyáz xkwide' no'le che Herodías na' gan že'j žáwgake', na' bya'abe' láwgake'. Wyáz laže' Herodes na' kan žonbe', na' lezka' wyáz láže'gak

benne' ka' že'j žáwlengake' le' tzen. Naž Herodes na' gože' xkwide' no'en', na' wnné':

—Wnnáb bi da' žénelo' wnezjwa' chio', na' gonan'.

**23** Ben choche' xtiže'e, na' gože'-be':

—Ni'a che Xanžo Dios wnezjwa' chio' bíte'ze da' nnablo' neda', na' zejte gachje gan znnna bi'a.

**24** Naž bežobje', na' gožbe' xna'be':

—¿Bíz nnaba'?

Le' gože'-be':

—Yichj Zwa, bennen' bezóe' benách ka' nis, nnabo'.

**25** La' beyáztebe' gan zoa Herodes na', na' gožbe'-ne':

—Žénela' wxó' chia' na'a lo ye'n zen yichj Zwa, bennen' bezóe' benách ka' nis.

**26** Gok nyache' laže' Herodes na', san dan' ben choche' xtiže'e ni'a che Dios, na' dan' béngekle benne' ka' žáwlengake' le' tzen dan' wnné', na' bi gónele' yinnj xtiže'e da' bchebe laže'e chebe'. **27** Naž Herodes na' la' bséla'tie' to benne' žeje' lo wdile, benne' zoe' žape chi'e ga na', na' gože' le' chejxi'e yichj Zwan'.

**28** Bennen' žeje' lo wdile wyeje' liž ya, na' bežjixe' yen Zwan', na' bechi'e yichje', dan' bxoe' to lo ye'n zen. Wdien' lo na' xkwide' no'en', na' lebe' bnéjzwben' che xna'be'.

**29** Kate' benne' ka'zej nake' Zwan' toze béngekle' dan' goken, bžíngake' ga na', na' beché'gake' le', na' bejkáche'gake' le'.

Jesús zwawe' benne' zanže ka gayo' mile'

(Mt. 14:13-21; Lk. 9:10-17; Jn. 6:1-14)

**30** Wdé na' bela'gak benne' wbás ka' che Jesusen' gan zoe', na' bzéngekle'

Le' yógo'te da' béngake', na' da' ka' bsédgekle' benách ka'. <sup>31</sup>Benne' zan, benne' ka' zá'gake', na' benne' ka' zjake', wnníta'gake' ga na'. Ka' goken na' zejte biž de latje bi da' gaw Jesusen' len benne' ka' žónlengake' Le' tzen. Che len Jesusen' gože' légake', na' wnne':

—Le cho'o. Chejžo žo'oze gan nak latje dach, na' yež' láže'zo to chi'i.

<sup>32</sup>Naž jake' légakze' to lo barkw, na' bžíngake' to latje dach.

<sup>33</sup>Blé'egekle benne' zan ka' zjake' ga na', na' gókbe'egekle' žezá' Jesusen'. Che len benne' yógo'te yež ka' wzá' ní'agake', na' taríaze jake' ga na'. Bžíngake' ga na' zgá'alegake' ka Jesusen' len benne' ka' žónlengake' Le' tzen. <sup>34</sup>Kate' bežój Jesusen' lo barkwn', ble'ele' benne' zan ka', na' beyache' láže'le' légake' dan'zej nake' ka zíla'do' ka' bi zoa benne' žape chi'e légakba'. Wzó lawe' žsede' légake' da' zan. <sup>35</sup>Kate' za' žale ža na', benne' ka' žónlengake' Jesusen' tzen bžíngake' gan zoe', na' belyi'e Le':

—Za' žale, na' latje dach naken nga. <sup>36</sup>Besela' benne' zan ki, nich chjake' yo'odo' ka', na' yeždo' ka'zej žen' gawze nga, nich chjé'wgake' yet, dan' bi be de nga da' gáwgake'.

<sup>37</sup>Bechebe Jesusen', na' gože' légake':

—Le wnežjw le'ekze da' gáwgake'.

Naž belyi'e Le':

—Chela' napto' lázjwto' che xono' byo' wen žin, wak chjé'wto' yet xtil, na' wnéžjwto' dan' gáwgake'.

<sup>38</sup>Naž Jesusen' gože' légake':

—¿Bal yet xtil de chele? Le chejwía.

Kate' ba nnézgekle', belyi'e Le':

—Gáyo'ze yet xtil den, na' chopze bel deba'.

<sup>39</sup>Naž wnná Jesusen' góngake' ga kwe'gak benne' zan ka' to kwe' to kwé'gake' gan nak lache' lo daka'.

<sup>40</sup>Wžé'gake' to kwe' to kwé'gake', to gaywá' to gaywá'gake', na' chiyón chiyóngake'. <sup>41</sup>Naž bexw Jesusen' da' góyote yet xtil ka', na' da' chope bel ka'. Bwie' ya'abale, na' gože' Dios: "Žóxkeno." Naž bzozje' yet xtil ka', na' bnežjwen' chegak benne' wsedle chie' ka' nich chísgaken' chegak benne' zan ka'. Lezka' wdise' da' chope bel ka' chegak yógo'te benne' ka'. <sup>42</sup>Bdáwgake' yógo'tegake', na' béljegekle'. <sup>43</sup>Naž betóbgake' da' bižjw ka' chegak yet xtil ka', na' chegak bel ka', na' beschá'gake' chežinno xkwite ka'. <sup>44</sup>Benne' ka' bdáwgake' ga na' gókgake' ka gayo'mil benne' byo ka'.

### Zda Jesús láwe'le nisdo'

(Mt. 14:22-27; Jn. 6:16-21)

<sup>45</sup>La' bente Jesusen' ga wžengak benne' ka' žónlengake' Le' tzen law barkw, nich wnéžwgake' Le', na' chejtégake' lo nisdon', nich žíngake' lo yež Betsaida, katen' Le' yesele'e benne' zan ka' lížgake'. <sup>46</sup>Kate' beyóž besele'e légake', wyeje' to law ya'ado', gan bcháljlene' Dios. <sup>47</sup>Katen' ba golein,zej barkwn' gachje láwe'le nisdon', na' zoa Jesusen' toze' lo yo bižen'. <sup>48</sup>Jesusen' ble'ele' légake', na' žejxáke'gekle' žsá'gake' barkwn' dan' žak be' da' za' gan želdié'. Wdé gachje yele bžin Jesusen' gan nníta'gake', zde' láwe'le nisdon', na' gónele' teze' gan nníta'gake'. <sup>49</sup>Kate' blé'egekle' Le' zde' láwe'le nisdon', gókgekle' to bxin nake', na'

wzéžeya'agake', <sup>50</sup> dan' yógo'tegake' blé'egekle' Le', na' bžébegake'. Naž Jesusen' la' bližtie' légake', na' wnné': —Le gon choch láže'le. Nedkzan'. Bi žébele.

<sup>51</sup> Wžén Jesusen' lo barkwn' gan nníta'gake', na' wzé' ži ben' žaken, na' légake' bebánle'egekle'. <sup>52</sup> Bi žejn'igekle' da' zloel dan' ben Jesusen' che yet xtilen'. Ne nak zide yichj lázdo'gake'.

**Zeyón Jesús benne' yižwé' ka' lo yež Jenesaret**  
(Mt. 14:34-36)

<sup>53</sup> Wdé Jesusen' len benne' ka' žónlengake' Le' tzen yechelá'a nisdo', na' bžíngake' gan nbab yež Jenesaret. Bžíga'gake' barkwn' lo yo bižen'. <sup>54</sup> Kate' bežójgake' lo barkwn', benne' ka' nníta'gake' ga na' la' beyónbia'tegake' Jesusen'. <sup>55</sup> Taríaze jak benne' ka' yógo'te yeždo' ka' žé'gaken gawze ga na', na' wzó láwgake' žedjwá'gake' yógo'te benne' yižwé' ka' gan zoa Jesusen', benne' dégake' da' žáta'gakle', na' bžíngake' gáte'ze želyenle' zoa Jesusen'.

<sup>56</sup> Gáte'ze gan zde Jesusen', lo yeždo' ka', na' yež zen ka', na' yo'odo' ka', bedjwá'gake' benne' yižwé' ka' chégake' gan nak lo nez, na' gan nak lawe' ya'a. Góta'yoegakle' Le' wnežjwe' légake' latje kángakze' laže' da' nakwe'. Yógo'te benne' ka' wdángaken' la' beyáktegake' cháwe'do'.

**Da' ka' žóngaken ga bi nakžo chawe' law Dios**  
(Mt. 15:1-20)

**7** Naž bałe benne' yodo' fariseo ka' len bałe benne' yodo'

wsedle ka', benne' ka'zej nžoje' yež Jerusalén, bdóbgake' gan zoa Jesusen'. <sup>2</sup> Benne' yodo' ki blé'egekle' benne' wsedle ka' che Jesusen' žáwgake' yet, na' bizej nak chawe' ná'gake', dan' znnan: bizej nyiben kan žónteze žongak benne' yodo' ka'. Che len wnnégake' chégake'. <sup>3</sup> Benne' yodo' fariseo ka', na' yezika' benne' judío ka', žóngake' kan bénenteze bengak xa xtó'gake' ka', na' cha' bi želyibe' ná'gake' zan chi'i kan žónteze žóngake', bi be žáwgake'. <sup>4</sup> Kate' bi da' žjé'wgake' lawe' ya'a, na' žežíngake' ližgake', cha' bi želyibe' da' ka' kan žónteze žóngake', bi be žáwgake'. Da' zanže da' ka' žóngake', da' žónteze žóngake', kan želyibe' ziga' ye'n ka', na' ziga' ya ka', na' da' ka' žáta'gakle'. <sup>5</sup> Che len benne' yodo' fariseo ka' len benne' yodo' wsedle ka' wnnábgekle' Jesusen', na' wnnágake':

—čBi žongak benne' wsedle chio' ka' kan bénenteze bengak xa xto'žo ka', san žáwgake' yet, bizej nak chawe' ná'gake'?

<sup>6</sup> Bechebe Jesusen', na' gože' légake': —Le'e, benne' zlo'ezele chawe' kwinle. Nak da' li dan' bzoj Isaías, bennen' bchalje' lo wláz Dios, kan nak chele. Bzoje' da' znnan:

Benách ki, len žoá'agakze'  
žápegake' xtiža'a ba la'ne,  
kege dot láže'gake'.

<sup>7</sup> Dáche'ze nak kan zka'n zéngake'  
neda'  
dan' zsédgakle' da' znnázegak  
benách ka',

kege da' wnnikza' neda'.

<sup>8</sup> Ki naken, dan' zzoale chela'ale da'  
wnná Dios, na' žonle da' ka' nzi'le lo  
na'gak benách ka'.

**9**Lezka' gože' légake':

—Da' li zka'nle ka'ze dan' wnnakze Dios nich gonle kan zej nak da' ka' žónteze žonle. **10**Ki wnná Dios lo na' Moisés: "Wdape ba la'ne xa xno'o." Lezka' wnné: "Nóte'zeze benne' nne zi'e che xa xne'e, le got bennen!"

**11**San le'e znnale ki: "Cha' no benne' yi'e xe' o xne'e: bi gak bi da' wnezjwa' chele, dan' naken Korbán" (dan' znnan len diža' xiža': dan' ba bchebe laza'a wnezjwan' che Dios), **12**naž znnale: "Bi žon byenen bi da' gon bennen' chegak xa xne'e." **13**Ki naken, zzoale chela'ale xtiža' Dios nich gonle dan' žónteze žonle, da' ka' zdele lo na'gak zi'n za'sóle ka'. Zanže da' ki žonle.

**14**Naž Jesusen' bliže' benne' zan ka' nnítia'gake' ga na', na' gože' légake':

—Le wzé nag da' nnia', yógo'tele, na' le chejni'ilen. **15**Bi be de da' žazen lo benne' da' gak gonen ga bi nake' chawe' law Dios, san da' žežojen le', da' ni gak gonen ga bi nake' chawe' law Dios. **16**Cha' zoa nagle, na' cha' žénlele, le wzé nag.

**17**Kate' Jesusen' belá'alene' benne' zan ka', wyo'e to yo'o, na' benne' wsedle chie' ka' wnnábgakle' Le' kan nak dan' bsaka' lebe!. **18**Naž Jesusen' gože' légake':

—¿Lezka' žiažje yela' žežn'il chele? ¿Bi žežn'ilele? Yógo'te da' žazen lo benne', bi gak gonen ga bi nake' chawe' law Dios. **19**Ki naken dan' bi žazen lo yichj lázda'we', san le'ze' žazen, na' žežojen li'e.

Kate' wnná Jesusen' da' ni, bloe'ele' žo'o zej nak chawe' yógo'te da' že'j žawžo. **20**Lezka' wnná Jesusen':

—Da' žežojen lo benne' žonen ga bi nake' chawe' law Dios. **21**Ki naken, dan' lo yichj lázdo'gak benne' ka' želžoj da' kegle ka' da' zzz' láže'gake'. Che len:

Žóngake' dola' ka' da' zej naken sban.

Zbángake', na' žótgake' benách ka'.

**22**Žóngake' dola' da' zka'n ditjen yela' zchag na'.

Zze láže'gake' da' de che ljéžgake' ka'.

Žóngake' da' kegle ka', na' žon láže'gake'.

Zgé'egakle' ljéžgake' ka', na' znnégake' chégake'.

Zka'n zen kwíngake', na' žon yálzegake'.

**23**Yógo'te da' kegle ki želžojen lo yichj lázdo'w no benne', na' žóngaken ga bi nake' chawe' law Dios.

### To no'le zi'to' žežli'e che Jesús

(Mt. 15:21-28)

**24**Naž Jesusen' bezé'e ga na', na' bžine' gawze gan zej že' yež Tiro, na' yež Sidón. Wyo'e to yo'o ga na', na' gónele' bi nnezlen nitó benne', san bi gok wkache' kwine'. **25**To no'le, zoa to xkwide' no'le chie', na' yo'obe' be' xiwe', benle' ba bla' Jesusen' ga na', na' la' wyejtie' gan zoe', na' bzoa zibe' lawe' Le'. **26**No'len' bi nake' benne' judío, san nbabe' benách Sirofenisia ka'. Góta'yoele' Jesusen' yebeje' be' xiwen' yo'o xkwide' no'le chien'. **27**Naž Jesusen' gože' le', na' wnné:

—Benn latje yéljegekla zgá'alegak benne' ka' zej nake' ka zi'n xan yo'o, dan' bi naken chawe' yekažo yet

chegak xkwide' ka', na' cho'nžon lawgak bék'o'do' ka'.

**28** Bechebe no'len', na' gože' Jesusen':

—O', Xan, san bék'o'do' ka', bia nníta'gakba' zanle gan žáwgakbe', žáwgakba' da' bižjw ka' da' žéxjwgaken zanle gan žáwgakbe'.

**29** Naž Jesusen' gože' le', na' wnné':

—Dan' wnnó' ki, gak yejejo'. Ba bežój be' xiwen' wyó'o xkwide' no'le chion'.

**30** Kate' no'len' bežine' liže', ble'ele' xkwide' no'le chien', debe' lo da'a, na' ba bežój be' xiwen' wyo'obe'.

### Žeyón Jesús to benne' kwežw, benne' bi gok nnie'

**31** Bežój Jesusen' latjen' da' nbaben yež Tiro, na' wdí'e gan nbab yež Sidón, na' yež Dekápolis ka', na' bžine' žoa'a nisdó' che gan nbab Galilea.

**32** Benne' ka' nníta'gake' ga na' bedjwá'gake' to benne' kwežw gan zoa Jesusen', benne' bi žak nnie', na' góta'yoegekle' Le' xoa ne'e le'. **33** Naž Jesusen' bebeje' bennen' chela'ale laduw benne' zan ka', na' bni'e xben ne'e yežw nag bennen'. Bž'e zéne'do', na' wdane' lož'e'. **34** Naž bwie' ya'abale, na' bka'le'e chie', na' wnné':

—Efata.

Diža' hebreo ni znnan len diža' xiža': "Beyaljw."

**35** La' beyáljwte nage', na' la' bevitje lož'e', na' wnnetie' binlo.

**36** Naž Jesusen' gože' légake' bi wzéngeklen' nitó benne', san kan bchí'ižele' légake', bzéžegake' diža' che dan' žone'. **37** Bebán láže'gake', na' wnnágake':

—Cháwe'do' žone' yógo'te. Žone' ga žeyéngekle benne' ka' gókgake'

kwežw, na' žechaljgak benne' ka' bi gok nnégake'.

### Jesús zwawe' benne' zanže ka tape mile'

(Mt. 15:32-39)

**8** Kate' ža na' bedobgak benne' zan gan zoa Jesusen'. Dan' bi be de da' gáwgake', Jesusen' bliže' benne' wsedle chie' ka', na' bcháljlene' légake': **2** Gože' légake':

—Žeyache' láže'la' benne' zan ki dan' ba zej chonне ža nníta'lengake' neda' nga, na' bi be de da' gáwgake'. **3** Cha' yesela'a légake' lížgake' želdonze' ka', yedó láže'gake' lo nez, dan' za'gak bale' zi'to'.

**4** Beži'igak benne' wsedle chie' ka', na' belyi'e Le':

—¿Biz wawžo benne' zanle'e ki ga ni nak latje dach?

**5** Naž Jesusen' wnnable' légake', na' wnné':

—¿Bal yet xtil de chele?

Belyi'e Le':

—Gážeze.

**6** Naž Jesusen' gože' benne' zan ka' kwé'gake' lo yo. Bexwe' gaže yet xtil ka', na' gože' Dios: "Žóxkeno". Naž bzozjen', na' bi'en chegak benne' wsedle chie' ka' nich chísgaken' lawgak benne' zan ka'. **7** Lezka' gota' chégake' chope chonне bel ka'. Naž Jesusen' gože' Dios: "Žóxkeno" na' gože' légake' chísgake'-ba' lawgak benne' zan ka'. **8** Bdawgak yógo'te benne' ka', na' béljegekle'. Naž betóbgake' da' bižjw ka' da' begá'ngaken, na' beschá'gake' gaže xkwite ka'. **9** Benne' ka' bdáwgake' zej nyángake' ka tape mile!. Wdé na' Jesusen' besele'e légake' lížgake', **10** na' bejžene' lo barkw tzen len

benne' wsedle chie' ka', na' bžíngake'  
gan nbab yež Dalmanuta.

**Znnábgekle' Jesús gone' to da' gak  
bian' ga benne' Le'**

(Mt. 16:1-4; Lk. 12:54-56)

**11** Naž benne' yodo' fariseo ka'  
wbíga'gake' gan zoa Jesusen', na'  
wzó lágake' zdił díža'gake' len  
Le. Gónegekle' wžíxgake' Jesusen'.  
Che len wnnábgekle' Le' gone' to da'  
gak bian' da' zan' ya'abá che Dios.

**12** Bka'le'e chi'i Jesusen', na' wnné':  
—Želnnable benne' ki neda' gona'  
to da' gak bian' da' zan' ya'abá che  
Dios. Da' li žapa' le'e, bi lé'elele nitó  
da' gak bian' da' zan' ya'abá che  
Dios.

**13** Naž bezé'e gan zej nnita' benne'  
ka', na' bejžene' law barkw, na'  
wyeje' yechelá'a nisdo'.

**Da' ūsédgake benne' yodo' ka' naken  
ka kwa zichj che yet xtil**

(Mt. 16:5-12)

**14** Gol láže'gak benne' wsedle ka'  
che Jesusen' wá'gake' da' gáwgake',  
na' toze yet xtil den lo barkwn'.

**15** Naž bchi'le Jesusen' légake', na'  
wnné':

—Le wia binlo. Le gape chi'i  
kwinle nich bi si'le da' naken ka  
kwa zichj che yet xtil chegak benne'  
yodo' fariseo ka', na' che Herodes.

**16** Wzó lawgak benne' wsedle chie'  
ka' zcháljlengake' ljéžgake' ka', na'  
wnnágake':

—Znne' ki dan' bi de yet xtil da'  
gawžo.

**17** Žákbe'ele Jesusen' dan'  
znnágake', na' gože' légake':

—¿Bíz chen' znnale naken dan' bi  
de yet xtil da' gawžo? ¿Bi žejn'ilele,

na' bi žákbe'elele? ¿Nak zide yichj  
lázdo'le? **18** ¿Zia yej lawle san bi  
zíl'elele, na' zia yid nagle san bi  
žénlele? ¿Bi žejsá' láže'le? **19** Katen'  
bzozja' gayo' yet xtil ka', da' ka'  
bdawgak gayo' mil benne' ka', ibał  
xkwite ka' bescha'le da' bižjw ka', da'  
ka' betoble?

Wnnágake':

—Chežinno.

**20** Lezka' wnná Jesusen':

—Katen' bzozja' gaže yet xtil ka',  
da' ka' bdawgak tape mil benne' ka',  
ibał xkwite ka' bescha'le da' bižjw  
ka', da' ka' betoble?

Wnnágake':

—Gaže.

**21** Naž Jesusen' gože' légake':

—¿Bi žejn'ilele na'a, bchalja' che  
da' ūsédgake benne' ka'?

**Jesús žeyone' to benne' lo  
chołe, benne' yež Betsaida**

**22** Kate' bžin Jesusen' len benne'  
ka' zónlengake' Le' tzen lo yež  
Betsaida, bla'gak bale benne' gan  
zoe', nwá'gake' to benne' lo chołe  
ga na', na' góta'yoegake' Le' kane'  
bennen'. **23** Jesusen' bexwe' na'  
benne' lo cholen', na' bchi'e le' na'le  
žoa'a yežen'. Naž bzie' zene' yej  
lawe', na' bxoa ne'e le'. Naž wnnable'  
le', na' wnné':

—¿zle'elo' late'?

**24** Bennen' goke' lo chołe bwie', na'  
wnné':

—zle'ela' benách ka', na' znná'gake'  
ka yag ka', san želdá benne' ka'.

**25** Da' yoble Jesusen' bxoa ne'e yej  
lawe', na' bwia bennen' goke' lo chołe,  
na' ba beyakte cháwe'do' yej lawe'.  
Na'a zle'ele' binlo yógo'te. **26** Naž  
Jesusen' besele'e le' liže', na' wnné':

—Bi chejo' lawe' yež, na' bi wzenlo' no benne' lo yežen' dan' bena'.

### **Bedw znne' Jesúus nake' Benne' Cristo**

(Mt. 16:13-20; Lk. 9:18-21)

**27** Wdé na' bezá' Jesusen' len benne' wsedle chie' ka' ga na', na' wdégake' yeždo' ka'zej nbaben yež Sesarea, gan znna bia' Filipo. Kate' ne yó'ogake' nez, Jesusen' wnnable' benne' wsedle chie' ka', na' wnné':

—¿No benne' znnagak benách ka' naka' neda'?

**28** Bechébegake', na' wnnágake':

—Znnagak bałe benne' nako' Žwa, bennen' bezóe' benách ka' nis. Znnágake' yebale' nako' Lías, bennen' bchalje' lo wláz Dios ža ni'te. Znnágake' yebale' nako' yetó benne' bchalje' lo wláz Dios ža ni'te.

**29** Naž Jesusen' wnnable' légake', na' wnné':

—Chize le'e, no benne' znnale naka' neda'?

Bechebe Bedw, na' wnné':

—Le' nako' Benne' Criston', bennen' bchebe laže' Dios sele'e nga.

**30** Naž Jesusen' bchi'le légake' bi wzéngekle' nitó benne' no nake'.

### **Jesús zchalje' kan za' gótgake' Le'**

(Mt. 16:21-28; Lk. 9:22-27)

**31** Naž wzó law Jesusen' zzejní'ile' benne' ka' žónlengake' Le' tzen, na' wnné':

—Žon byenen sáka'li'a neda', Benne' Golje' Benách. Benne' gole ka', na' bxoz wnná bia' ka' len benne' yodo' wsedle ka' wzóagake' neda' chela'ale. Gótgake' neda', san kate' gak chonnie ža yebana'.

**32** Kwáselo bcháljlene' légake'.

Naž Bedw bchi'le Jesusen' chela'ale,

na' wzó lawe' zdile' Le'. **33** Byechj Jesusen', na' bwie' yezika' benne' wsedle chie' ka', na' bdile' Bedon', na' wnné':

—Bkwas kwita' nga. Nako' ka da' xiwe'. Da' zza' lažo'o bi naken che Dios, san kan zza' láže'gak benách ka' naken.

**34** Naž Jesusen' bliže' benne' wsedle chie' ka' len benne' ka' nníta'gake' ga na', na' gože' légake':

—Cha' ženele no benne' gónlene' neda' tzen, žala' wzóe' chela'ale da' žénekzele', na' gake' ka to benne' noe'e yag kroze chie' nich chejté'e le'e yag krozen', na' naž gak gónlene' neda' tzen. **35** No benne' že' laže'e yela' nban chie', wniten', san bennen' wnite' yela' nban chie' dan' žónlene' neda' tzen, o dan' nzi' lo ne'e diža' chawe' chian', gata' yela' nban da' zejlí kanne chie'.

**36** čBíz da' chawe' gata' che to benne' cha' wtobe' yógo' te da' že' yežlyó nga, san wnít kwine'? **37** Bi be gak wnežjw to benne' nich yeslá kwine'. **38** Cha' no benne' žedoe'ele' chia' neda', na' che xtiža'la lawgak benách ki, benne' ka' žbej yichjgake' Dios, na' žóngake' dola', lezka' neda', Benne' Golje' Benách, yedoe'ela' che bennen' kate' yelá'a len yela' baní' che Xa', na' gónlengak wbás che ya'abá ka' neda' tzen.

**9** Jesusen' bcháljlene' benne' ka' žónlengake' Le' tzen, na' wnné':

—Da' li žapa' le'e, zej nnita' benne' ka' nga, benne' bi gátgake' kate' lě'ežegakle' ža yedjnná bia' Dios yežlyó nga, na' la' law yela' wnná bia' zen chie'.

### **Zcha' kan znna' law Jesúus**

(Mt. 17:1-13; Lk. 9:28-36)

**2** Kate' ba wdé xope ža, Jesusen' bchi'le Bedw len Jakob, na' Žwa, na'

légakze' jake' to law ya'a sibe, gan bcha' kan znnna' law Jesusen' lawgak yonne' ka'. <sup>3</sup> Wyép yes baní' laže' da' nakw Jesusen', na' goken chíchele'e. Zíla'do'ze goken, na' no benne' žibe' laže' yežlyó nga, bi gak gone' laže' zíla'do'ze kan gok zen'. <sup>4</sup> Bla' lawgak Lías, na' Moisés gan nnítá'gake', zcháljlengake' Jesusen'. <sup>5</sup> Naž Bedon' gožé' Jesusen':

—Benne' wsedle, ba nez zen naken chežo zoažo nga. Gona' chonne yo'o laga' nga, to chio', na' yetó che Moisés, na' yetó che Lías.

<sup>6</sup>Ki wnná Bedon' dan' bi nnezel' dan' znné. Ka' goken dan' zžébegak benne' wsedle ka' che Jesusen'. <sup>7</sup> Naž wžé' to bejw da' wló'on zol légake', na' benle chi'i to benne' zchalje' lo bejw na', na' wnné':

—Benne' ni nake' Zí'na'. Nži'ilá' Le'. Le wzé nag chie'.

<sup>8</sup> La' bwíategake' san biž no benne' blé'gekgle'. Toze Jesusen' zóalene' légake'.

<sup>9</sup> Kate' ne yó'ogake' nez, žétjgake' law ya'a siben', Jesusen' bchi'le' légake' bi wzéngekle' no benne' kan gok dan' blé'geklen', kate' yebanže' Le', Benne' Golje' Benách, lo yela' got. <sup>10</sup>Che len bzoa chóchzegake' dan' wnné' lo yichj láždo'gake', na' la' légakze' belnnable' ljéžgake' biz zejlás dan' wnné' kate' wnné' yebane' lo yela' got. <sup>11</sup>Wnnábgekgle' Jesusen', na' wnnágake':

—¿Biz chen' znnagak benne' yodo' wsedle ka' žon byenen la' Lías zga'ale' kate' la' Benne' Criston'?

<sup>12</sup>Bechebe Jesusen', na' wnné':

—Da' li la' Líasen' zga'ale', na' yecá'n chawé'e yógo'te kan žala' gákgaken. Na'a, ¿biz chen' nyejw

le'e yiche la'y da' znnna žon byenen Benne' Golje' Benách sáka'lí'e, na' wzoagak benách ka' Le' chela'ale? <sup>13</sup>Žapa' le'e: ba bla' Líasen', na' béngake' chie' kan gónegekle', kan nyejw le'e yiche la'y kan žala' gaken chie'.

### Jesús žeyone' to xkwide' byo yo'obe' be' xiwe'

(Mt. 17:14-21; Lk. 9:37-43)

<sup>14</sup>Kate' bežín Jesusen' len benne' ka' nnítá'lengake' Le' tzen gan zej nnita' yezíka'gak benne' wsedle chie' ka', blé'gekgle' zej nnita' benne' zan ga na', na' benne' yodo' wsedle ka' želdíl diž'e' len benne' wsedle chie' ka'. <sup>15</sup>Kate' benne' zan ka' blé'gekgle' Jesusen', bebángekle', na' taríaze wzá'gake' gan zi'e, na' wdápegake' Le': "Padiox."

<sup>16</sup>Naž Jesusen' wnnable' benne' wsedle chie' ka', na' wnné':

—¿Biz dan' zdíl-lenle légake'?

<sup>17</sup>Bechebe to benne' zoe' ladjw benne' zan ka', na' wnné':

—Benne' wsedle, bedjwá'a xkwide' byodo' chia' chio' Le', dan' yo'obe' be' xiwe' da' žonen ga bi znnabe'.

<sup>18</sup>Kate' žo'o be' xiwen' lebe', zžix zlolen lebe' lo yo, na' zbia bžina' zide' žoa'abe', na' žzej láye'be'. Che len zej zžitbe'. Wnnabla' benne' wsedle chio' ka' yebéjgake' be' xiwen', san bi wzáke'gekgle'.

<sup>19</sup>Bechebe Jesusen', na' wnné':

—Le'e, benne' bi žeje'le che Dios. ¿Gáka'xtekze gon byenen sóalena' le'e? ¿Gáka'xtekze gon byenen gaka' zen laže' len le'e? Le yedjwá'-be' chia'.

<sup>20</sup>Zá'gake' zej noe'e-be' gan zoa Jesusen'. Kate' be' xiwen' blé'elen

Le', la' bxizten lebe'. Wže'be' lo yo, na' bžix blolen lebe', na' wžia bžina' zide' žoa'abe'. <sup>21</sup>Naž Jesusen' wnnable' xa xkwiden', na' wnné':

—¿Gáka'zte ba goken žaken ki chebe'?

Wnná xaben':

—Na' náktebe' xkwíde'do' žak ki chebe'. <sup>22</sup>Zan chi'i zžen' lebe' lo yi', na' zan nis nich gotten lebe'. Che len, cha' žako' late', beyache' laže'l neto', na' goklen neto'.

<sup>23</sup>Jesusen' gože' le':

—Cha' gak chejli'o che Dios, yógo'te waken cha' chejli'o chie'.

<sup>24</sup>La' wnnete zižje xa xkwiden', na' wnné':

—Žejli'a chie'. Goklen neda' nich chejle'ža' chie'.

<sup>25</sup>Kate' błe'el Jesusen' za'gak benne' zan ka', zchígake' Le', gože' be' xiwen', na' wnné':

—Le', be' xiwe', be' žonen ga bi znnagak, na' bi žéngekle benách ka', na'a zchi'la' le' yežojo' lo xkwiden', na' biž chazo' lebe'.

<sup>26</sup>Wžézeya'a be' xiwen', na' bžix blol-le'en lebe'. Naž la' bežojten, na' bka'nen lebe' ka to xkwide' gat. Ka' goken, bchaljgak benne' zan ka', na' wnnágake':

—Ba natbe'.

<sup>27</sup>Naž Jesusen' bexwe' na'be', na' bechise'-be', na' beyás xkwiden'.

<sup>28</sup>Naž wy'o Jesusen' to yo'o, na' la' lágakze benne' wsedle chie' ka' wnnábgekle' Le', na' wnnágake':

—¿Biz chen' bi gok yebijo' neto' be' xiwen'?

<sup>29</sup>Jesusen' gože' légake':

—Bi gak yebije ka'ze be' xiwe' ki, san toze cha' wcháljlenle Dios, na' gonle wbás.

Jesús zloe'ele' da' yoble kan za' gótgake' Le'

(Mt. 17:22-23; Lk. 9:43-45)

<sup>30</sup>Kate' bezá' Jesusen' len benne' ka' žónlengake' Le' tzen ga na', wdégake' gan nbab Galilea. Gónele Jesusen' bi nnezle no benne' gan zoe', <sup>31</sup>dan' žedle' benne' wsedle chie' ka'. Gože' légake':

—Wdégake' neda', Benne' Golje' Benách, lo na'gak benne' ka' gótgake' neda', san te gata', kate' tegak chonnie ža, yebana'!

<sup>32</sup>Bi bejní'igekle' da' ni da' gože' légake', na' dan' zžébegake', bi be wnnábgekle' Le'.

Nólake' gake' benne' blo

(Mt. 18:1-5; Lk. 9:46-48)

<sup>33</sup>Naž bžin Jesusen' len benne' ka' žónlengake' Le' tzen lo yež Kapernaum, na' kate' ne nnítá'gake' to yo'o, Jesusen' wnnable' légake', na' wnné':

—¿Biz dan' wdíl-lenle lježle kate' ne yo'ole nez?

<sup>34</sup>Naž légake' wnnítá'gake' žize dan' wdíl-lengake' ljéžgake' lo nezen' cha' nólake' gake' benne' blo. <sup>35</sup>Naž wžé' Jesusen', na' bliže' chežínote benne' wsedle chie' ka', na' gože' légake':

—No benne' žénele' gake' benne' blo ládjwle le'e žala' gake' ka to benne' kwíde'ze, na' lezka' žala' gake' ka ni'a na'le yógo'tele.

<sup>36</sup>Naž Jesusen' bexwe' to xkwide', na' bzoe'-be' gachje láwe'le gan nnítá'gake'. Wdele'e-be', na' gože' légake':

<sup>37</sup>—No benne' si' lo ne'e to xkwide' ki dan' nakbe' chia', lezka' si' lo ne'e

neda', na' no benne' si' lo ne'e neda', kege nedza' si' lo ne'e, san lezka' si' lo ne'e Xa', Bennen' bsele'e neda'.

**Cha' bi zži'i to benne' chežo ž'o,  
žáklene' ž'o**

(Mt. 10:42; Lk. 9:49-50)

**38** Naž Zwa gože' Jesusen':

—Benne' wsedle, błe'elto' to benne' žebeje' be' xiwe' ka' yo'ogak benne' ka', na' zkonle' žin lo'. Bchi'leto'-ne' biž gonen', dan' bi žónlene' ž'o tzen.

**39** Naž Jesusen' gože' le':

—Bi wchí'lele-ne', dan' cha' zoa no benne' žone' to yela' wak da' zan' ya'abá che Dios, na' zkonle' žin la', bi gak nne zi'e chia'. **40** Ki naken, no benne' bi zži'e chežo, žáklen bennen' ž'o. **41** No benne' wneżjwe' chele to zíga'do' nis da' ye'jle dan' žónlenle neda', Benne' Criston', tzen, si'kze' da' žeyala' chie'.

**Gak chežo da' zia cha' gonžo ga gon  
no benne' dola'**

(Mt. 18:6-9; Lk. 17:1-2)

**42** Lezka' wnná Jesusen':

—No benne' gone' ga gon to xkwide' ki dola', xkwiden' žejle'be' chia', gakže chawé' che bennen' cha' wcheje' to yiche žotw yene', na' chejžó'n kwine' lo nisdo'. **43** Cha' to no'o gonen ga gono' dola', bchogen'. Gakže chawé' chio' chejo' gan so' nbano' zoa toze no'o, kege zoa chope no'o, na' chejchó'o lo yi' gabíl, gan bi yole yi' chen. **44** Lo latjen' bi gatgak bzoga' ka' yo'ogak benne' gat ka', benne' ka' chejnníta'gake' ga na', na' yin' bi yolen. **45** Lezka', cha' to ni'o gonen ga gono' dola', bchogen'. Gakže chawé' chio', chejo' gan so' nbano' zoa toze ni'o, kege zoa chope

ni'o, na' chejchó'o lo yi' gabilen', gan bi yole yi' chen. **46** Lo latjen' bi gatgak bzoga' ka' yo'ogak benne' gat ka', benne' ka' chejnníta'gake' ga na', na' yin' bi yolen. **47** Lezka' cha' to yej lawo' gonen ga gono' dola', wlejen. Gakže chawé' chio' chejo' gan znna bia' Dios zoa toze yej lawo', kege zoa chope yej lawo', na' chejchó'o lo yi' gabilen'. **48** Lo latjen' bi gatgak bzoga' ka' yo'ogak benne' gat ka', benne' ka' chejnníta'gake' ga na', na' yin' bi yolen.

**49** Nich gape chi'ižo beła' zwázježon zede', na' zgála'žon žoa'a yi', nich bi kwia yin', na' zwázjegake' zede' yógo'te biado' ka' zzéygake'-ba' lo bkog la'y che Dios. Da' ni źedlen ž'o kan ga'ngak chawé' yógo'te benách chie' ka'. **50** Nak chawé' zede', san cha' yenít yela' sna'a chen, čnakx gak yeyonžon sna'a? Le gak la' lél'ezele ka zede' chawé', na' bga'n chawé'do' tole len yetole.

**Ka nak che no benne' byo zle'e yela'  
žchag na' chie'**

(Mt. 19:1-12; Lk. 16:18)

**10**

Bezá' Jesusen' lo yež Kapernaum, na' wyeje' gan nbab Judea, na' wdí'e yechelá'a yego Jordán zaka' gan zla' wbíz, ga na' bedobgak benne' zan gan zoe' da' yoble, na' bsedle' légake' da' yoble kan žónteze žone'. **2** Naž bzingak benne' yodo' fariseo ka' gan zoa Jesusen', na' gónegekle' góngake' ga bi da' nna Jesusen' nich gak yesbága'gake' Le' zia. Wnnábgekle' Le', na' wnnágake':

—¿De latje no benne' byo, benne' nžag ne'e, wsane' zo'le'?

**3** Bechebe Jesusen', na' wnné':

—*¿Biz bchi'le Moisés le'e?*

<sup>4</sup>Wnnágake':

—Moisés bnežjwe' latje no benne'  
byo wzoje' to yiche da' znnan  
zlá'alene' zo'le', na' naž gak wsane'  
zo'len'.

<sup>5</sup>Bechebe Jesusen', na' wnné':

—Moisés bchi'le' le'e da' ni dan'  
nak zide yichj lázdo'le', <sup>6</sup>san kate'  
wzó law žata' yežlyó nga, Dios  
bene' légake' benne' byo, na' no'le.

<sup>7</sup>Wnné': "Che len wká'n benne' byo  
xa xne'e, na' chejgánlene' zo'le', <sup>8</sup>na'  
chope' yeyákgake' ka toze benne'."  
Che len biž zej nake' chope' san toze'  
ba zej nake'. <sup>9</sup>Lezka', no benne' nake'  
benachze bi žala' wlé'e benne' ka' ba  
ben Dios légake' toze.

<sup>10</sup>Kate' Jesusen' beyoé'e yo'o,  
benne' wsedle chie' ka' wnnábgekle'  
Le' kwáselo kan nak dan' bchalje'.

<sup>11</sup>Jesusen' gože' légake':

—Cha' to benne' byo zlá'alene'  
zo'le', na' zchag nálene' to no'le  
yoble, žone' dola' da' zka'n ditjen  
yela' zchag na', na' žesbage'e zo'le'  
dola', no'len' zóalene' na'a. <sup>12</sup>Lezka'  
cha' to no'le wsane' benne' byo chie',  
na' si'e to benne' byo yoble, lezka'  
gone' dola' da' zka'n ditjen yela'  
zchag na'.

**Jesús žliž chawe'e xkwide' ka'**

(Mt. 19:13-15; Lk. 18:15-17)

<sup>13</sup>Naž bžingak benne' ka' zej  
no'e xkwide' ka' chégake' gan zoa  
Jesusen', na' ženegekle' xoa ne'e  
légakbe', san wzó lawgak benne'  
wsedle chie' ka' zdílgake' benne' ka'  
zej noe'e légakbe'. <sup>14</sup>Kate' Jesusen'  
ble'ele' da' ni, bže'e, na' gože' légake':  
—Le we' latje xkwide' ki yídgakbe'  
chia'. Bi wséywle xnézgakbe', dan'

gata' chegak benne' ka' zej nake' ka  
xkwide' ki latje gan znnna bia' Dios.

<sup>15</sup>Da' li žapa' le'e: no benne' bi si' lo  
ne'e da' znnna bia' Dios kan žon to  
xkwide' ki, bi cho'o bennen' gan  
znnna bie'.

<sup>16</sup>Naž Jesusen' wdele'e xkwide'  
ka', na' bxoa ne'e légakbe', na' bliž  
chawe'e légakbe'.

**Benne' zeje' babze yiz, na' nápli'e  
yela' wnni'a**

(Mt. 19:16-30; Lk. 18:18-30)

<sup>17</sup>Kate' Jesusen' beyoé'e nez,  
taríaze bžin to benne' ga na'. Bzoa  
zibe' lawe', na' wnnable' Le', na'  
wnnē':

—Benne' wsedle, dot chawe', žiž žala'  
gona' nich gata' yela' nban da'  
zejlí kanne chia'?

<sup>18</sup>Jesusen' wnnable' le', na' wnné':

—*¿Biz chen' ži'o nedá, znnno':* dot  
chawe'? Bi zoa nitó benne' nake' dot  
chawe'. Toze Dios nake' dot chawe'.

<sup>19</sup>Ba nnézkzelo' da' ka' bchi'le Dios.  
Wnné:

Bi gono' dola' da' zka'n ditjen  
yela' zchag na'.

Bi goto' benách ka'.

Bi kwano'.

Bi nnio' che lježo' da' wen laže'.  
Bi be kwéjlano'.

Wdape ba la'ne xa xno'o.

<sup>20</sup>Bechebe bennen', na' gože'  
Jesusen':

—Benne' wsedle, yógo'te da' ki  
žonteza' kate' naktia' xkwide'.

<sup>21</sup>Jesusen' bwie' le' len yela' nži'il  
chie', na' wnné':

—To da' žiažjen chio'. Wyéj, yjete'  
yógo'te da' de chio', na' bnežjw da'  
yezi'o chegak benne' yache' ka', na'  
gata' yela' wnni'a chio' ya'abá che

Dios. Naž wak yežino' chia', na' gako' ka to benne' noe'e yag kroze chie', na' zejté'e le'e yag krozen', na' ki gónleno' neda' tzen.

<sup>22</sup>Kate' benle' diža' ni, gokle', na' zeyeje'. Gok nyache' laže'e dan' dele'e yela' wnni'a chie'.

<sup>23</sup>Naž bwia Jesusen' dot kwite', na' gože' benne' wsedle chie' ka':

—Zedle'e gaken cho'ogak benne' ka' de yela' wnni'a chégake' gan znna bia' Dios.

<sup>24</sup>Bebán láže'gak benne' wsedle chie' ka' kan nak xtiže'e, na' da' yoble Jesusen' gože' légake':

—Le'e, zí'na'do' ka', zedle'e gaken chegak benne' ka' že' láže'gake' yela' wnni'a chégake' chó'ogake' gan znna bia' Dios. <sup>25</sup>Gakže zede cho'o no benne' de yela' wnni'a chie' gan znna bia' Dios, ka te to bia nwa'ba' ywa' lo nag yeche'.

<sup>26</sup>Kate' béngekle' da' ni, bebánle'egekle', na' wnnágake' la' légakze':

—¿Nožkze benne' gak yelé', cha'?

<sup>27</sup>Bwia Jesusen' légake', na' wnné':

—Bi gak gon no benne' da' ni, san gak Dios, dan' zzáka'le Dios yógo'te.

<sup>28</sup>Naž Bedw gože' Le':

—Xan, neto' ba bka'nto' yógo'te, na' žónlento' Le' tzen.

<sup>29</sup>Bechebe Jesusen', na' wnné':  
—Da' li žapa' le'e, no benne'  
wka'ne' liže', o biche'e ka', o zane'  
ka', o xe', o xne'e, o zo'le', o zi'ne' ka',  
o yežlyó chie', dan' žone' xchina',  
o dan' zzenle' benách ka' diža'  
chawe' chian', <sup>30</sup>bennen' yezi'e yetó  
gaywá'teže ka' ža ni zoažo na'a, liže'  
ka', na' biche'e ka', na' zane' ka', na'  
xne'e ka', na' zi'ne' ka', na' yežlyó  
chie' ka', tzen len da' kwia láže'gak

benách ka' le', na' lo yežlyó da' za'  
gata' yela' nban da' zejlí kanne chie'.

<sup>31</sup>Benne' zan, benne'zej nake' blo  
na'a, wéxjwgake' ga na', san benne'  
ka'zej nake' gaxjw na'a, gákgake'  
benne' blo ka' ga na'.

### Da' yoble zloe'el Jesús kan za' gótgake' Le'

(Mt. 20:17-19; Lk. 18:31-34)

<sup>32</sup>Kate' ne yó'ogake' nez, želbene'  
zjake' lo yež Jerusalén,zej Jesusen'  
lawgak benne' wsedle chie' ka'.  
Nítgekle', na' lo yela' žzize zjáklene'  
Le'. Da' yoble Jesusen' bchi'e benne'  
chežinno ka' cheze. Wzó lawe'  
zchájlene' légake' ka nak da' žala'  
gaken chie', <sup>33</sup>na' wnné':

—Zlé'ekzelele zbenžo, zejžo lo yež  
Jerusalén gan soa to benne' wdí'e neda',  
Benne' Golje' Benách, lo na'gak bxoz  
wnná bia' ka', na' lo na'gak benne' yodo'  
wsedle ka'. Chóggake' chia' gata', na'  
wdégake' neda' lo na'gak benne' zi'to'  
ka'. <sup>34</sup>Gon dítjgekle benne' ka' neda', na'  
gónle'egake' neda' zi'. Wžé'egake' neda'  
zene'. Naž gótgake' neda', san kate' gak  
chonne ža, yebana' lo yela' got.

### Jakob, na' Žwa znnábgekle' Jesús to da' gone' chégake'

(Mt. 20:20-28)

<sup>35</sup>Naž Jakob len Žwa, benne' ka'  
zej nake' zi'n Sebedeo, wbíga'gake'  
law Jesusen', na' belyi'e Le':

—Benne' wsedle, žénelto' gono'  
cheto' da' nnablto' Le'.

<sup>36</sup>Jesusen' gože' légake':

—¿Biz žénelele gona' chele?

<sup>37</sup>Naž belyi'e Le':

—Kate' žin ža kwi'o gan nna bi'o,  
ben ga kwe'to' toto' kwito' li ža, na'  
yetoto' kwito' yegle.

**38** Naž Jesusen' gože' légake':  
—Bi nnézlele da' znnable. ¿Gak si'le' da' žala' si'a neda', da' naken da' sáka'li'a? ¿Gak yezoale nis kan yezó'a neda' nis lo yela' got?

**39** Bechébegake', na' wnnágake':  
—Gakto'.

Jesusen' gože' légake':  
—Da' li, da' saka'a neda', lezka' gaken chele, na' kan yezó'a neda' nis, lezka' yezoale le'e nis, **40** san bi nzi' lo na'a kwia' no benne' kwi'e kwita' li ža, na' no benne' kwi'e kwita' yegle. Dios wnežjwe' chegak benne' ka' ba bkweze' chégake' latje ka'.

**41** Kate' yechí benne' wsedle chie' ka' béngekle' da' ni, bžá'agake' Jakob na', na' Zwan'. **42** Naž Jesusen' bliže' légake', na' wnné:

—Nnézkzelele kan žongak benne' ka' znnna biá'gake' yež ka', kan zkóngekle' benne' ka' žin, na' benne' ka' zej nake' blo ládjwgake' znnna biá'gake' ljéžgake' ka'. **43** Bi gak chele ki, san no benne' yénele' gake' zen gan zoale, žala' gone' xchinle yezíka'le, **44** na' no benne' ládjwle, benne' yénele' gake' benne' blo, žala' gake' ka to benne' ndo'w chele yógo'tele. **45** Ki žala' gonle dan' bla'a neda', Benne' Golje' Benách, kege nich gon no benne' xchina', san nich gona' xchingak benách ka', na' nich wdía' yela' nban chia', nich yeya'wa' benne' zan.

### Jesús žeyone' Bartimeo, benne' lo chole

(Mt. 20:29-34; Lk. 18:35-43)

**46** Naž bžin Jesusen' len benne' ka' žónlengake' Le' tzen lo yež Jerikó. Kate' ne žežój Jesusen' lo yežen',

benne' wsedle chie' ka' zjáklene' Le', tzen len benne' zanže ka'. Žoa'a nezen' že' to benne' lo chole, bennen' lie' Bartimeo, zil'n Timeo. Znnable' no benne' bi da' gonnze' chie'. **47** Kate' benle Bartimeon' zde Jesúš, benne' Nasaret, ga na', wzó lawe' znnie' zižje, na' wnné:

—Jesús, Za'só Dabí. Beyache' laže'l neda'.

**48** Benne' ka' želdié' ga na' bdílgake' le', na' belyi'e le':

—Wzóža ži.

Naž zižje wnné', na' wnné:

—Za'só Dabí. Beyache' laže'l neda'.

**49** Naž wzé žize Jesusen', zbeze', na' gože' benne' ka':

—Le wliže'.

Blížgake' benne' lo cholen', na' belyi'e le':

—Ben choch lažo'o. Wyase. Znnie' le'.

**50** Naž bsie' chela'ale laže' nxoa yene'. La' wzó zá'tie', na' wbige'e law Jesusen'. **51** Jesusen' wnnable' le', na' wnné:

—¿Biz žénelo' gona' chio'?

Bechebe benne' lo cholen', na' wnné:

—Benne' wsedle, žénela' gono' ga yeýak yej lawa'.

**52** Jesusen' gože' le':

—Beyéj ližo'. Ba beyako' dan' žejl'i o chia'.

La' beyáljwte yej lawe', na' wyéjlene' Jesusen'.

### Žaz Jesús lo yež Jerusalén

(Mt. 21:1-11, Lk. 19:28-40; Jn. 12:12-19)

**11** Bžin Jesusen' len benne' ka' žónlengake' Le' tzen, gawze gan že' yež Jerusalén, gan zej nnita' yež Betfagé, na' yež Betania, gan že'

Ya'a Yag Olibo. Naž Jesusen' bsele'e chope benne' wsedle chie' ka', <sup>2</sup>na' gože' légake':

—Le chej yeždo' da' žen' lawžo, na' kate' cho'ole lo yežen', chejxáka'le to burrodo' nježba' ga na', na' bi na' kwia-ba' no benne'. Le sež-ba', na' le yedjwá'-ba' chia'. <sup>3</sup>Cha' no benne' bi da' yi'e le'e dan' žonle ki, le yi'e: "Xanžon' žénele'-ba', na' la' yeséla'tie'-ba' chio."

<sup>4</sup>Naž jake', na' bejxáka'gake' búrrodon', nježba' gan žo'ogak benách ka' li'a to yo'o da' žen' zoa'a nez, na' bséžgake'-ba'. <sup>5</sup>Benne' ka' nníta'gake' ga na' bely'i'e légake':

—¿Biz da' žonle? ¿Biz chen' zsežle búrrodon'?

<sup>6</sup>Bechébegak benne' wsedle ka' che Jesusen', na' bely'i'e légake' kan ba gožke Jesusen' légake', na' benne' ka' bnéžjwgake' légake' latje. <sup>7</sup>Naž bché'gake' búrrodon' gan zoa Jesusen!. Bxóagake' laže' chégake' xkóže'ba', na' Jesusen' wžié'-ba'. <sup>8</sup>Wnníta'gak benne' zan ga na', na' bchíljgake' laže' chégake' gan nak lo nez. Yebale benne' ka' bdíchjgake' zin da' bxóagake' lo nezen'.

<sup>9</sup>Wzó lawgak znnegak zižje benne' ka' zjake' law Jesusen', na' benne' ka' zá'gake' xkóže'le', na' wnnágake':

—iGa'n zen Dios! iDios gon chawe'e Benne' ze'e nga, Bennen' bsela' Xanžo Dios Le'! <sup>10</sup>iDios gon chawe'e Bennen' za' nna bi'e kan wnná bia' xá xto'žo Dabí! iGa'n zen Dios!

<sup>11</sup>Ka' goken, bžin Jesusen' lo yež Jerusalén, na' wyo'e la' li'a yodo'. Kate' beyóž bwie' yógo'te da'zej den dot kwitle, bežoje' zaka' yež Betania dan' za' žale, na' zjaklen benne' wsedle chie' ka' Le'.

### Jesús zdile' yag higo

(Mt. 21:18-19)

<sup>12</sup>Kate' za' ža'ní' yetó ža, na' zežój Jesusen' len benne' ka' žónlengake' Le' tzen, lo yež Betania, zdone'.

<sup>13</sup>Zi'to'le ble'ele' to yag higo da' žian xlage'. Wbige'e gan zoa yagen' cha' chejxake'e late' da' zbian. Kate' bžine' ga na', bi be bejxake'e da' zbian. Xláge'ze žian dan' bi na' žin ža kwian. <sup>14</sup>Naž bdile Jesusen' yagen', na' wnné':

—Biž gaw no benne' da' zbia chio'.

Béngekle benne' wsedle chie' ka' da' ni.

### Jesús zchache' li'a yodo'

(Mt. 21:12-17; Lk. 19:45-48; Jn. 2:13-22)

<sup>15</sup>Kate' bžin Jesusen' len benne' ka' žónlengake' Le' tzen lo yež Jerusalén, wyo'e la' li'a yodo', na' wzó lawe' zbeje' na'le benne' žote' ža'w ka' la' li'a yodo'. Bžixe' blag ka' chegak benne' ka' zchá'gake' mežw che yež zi'to' ka', na' lezka' da' ka' žé'gekle benne' ka' žote'gake' plomdo' ka'. <sup>16</sup>Lezka' bi bi'e latje no benne' bi da' we'e, na' kege no benne' wzóe' nez la' li'a yodo'.

<sup>17</sup>Jesusen' bsedle' benne' ka' nníta'gake' ga na', na' wnné':

—Nyejw le'e yiche la'y da' znnan: "Liža' sin', yo'o gan benne' zá'gake' dot yežlyó nga wcháljlengake' Dios." Le'e ba benlen kan nak ližgak benne' wbán ka'.

<sup>18</sup>Kate' bxoz wnná bia' ka', na' benne' yodo' wsedle ka' béngekle' da' ni, na' wzó lawgake' žíljgake' nakx gótgake' Jesusen', san dan' zžébegake' benne' yež ka', bi be béngeake' chie', dan' žebángekle

yógo'te benne' ka' kan nak da'  
žsedle Jesusen'. <sup>19</sup>Kate' za' žale ža  
na', bežoje' lo yežen'.

### Zbiž yag higo dan' bdile Jesús

(Mt. 21:20-22)

<sup>20</sup>Kate' za' ža'ní' yetó že, wdé  
Jesusen' len benne' ka' žónlengake'  
Le' tzen, gan že' yag higo dan' bdile  
Le', na' blé'egeklen', ba nbižen dot  
lwen. <sup>21</sup>Naž bezá' laže' Bedw dan'  
goken, na' gože' Jesusen':

—Benne' wsedle, bwia nga. Yag  
higon' da' bdilon' neje, ba nbižen.

<sup>22</sup>Bechebe Jesusen', na' gože'  
légake':

—Le chejlé' che Dios. <sup>23</sup>Da' li žapa  
le'e, cha' no benne' yi'e ya'ado' ni:  
“Bkwas nga, na' bejsóa lo nisdo”  
na' cha' bi gak chope laže'e, san  
dot laže'e chejli'e che Dios gone'  
kan wnné, na' gaken. <sup>24</sup>Che len  
žapa' le'e: yógo'te da' nnable kate'  
wcháljenle Dios, le chejlé' che Dios  
ba benne' chele dan' znnable, na'  
gonnen' chele. <sup>25</sup>Katen' zcháljenle  
Dios, cha' zoa no benne' zža'le,  
bennen' zoa bi da' bene' chele, le  
yenít law che bennen', nich lezka'  
Xale, Bennen' zoe' ya'abá chie', yenít  
lawe' chele le'e dola' da' nbágale.  
<sup>26</sup>Cha' bi yenít lawle chegak benách  
ka', Xale, Bennen' zoe' ya'abá chie',  
bi yenít lawe' chele le'e dola' da'  
nbágale.

### Yela' wnná bia' da' nape Jesús

(Mt. 21:23-27; Lk. 20:1-8)

<sup>27</sup>Naž beyéj Jesusen' len benne'  
ka' žónlengake' Le' tzen lo yež  
Jerusalén. Kate' ne zda Jesusen'  
gan nak lo zchil yodo', bxoz wnná  
bia' ka' len benne' yodo' wsedle ka',

na' benne' gole ka', bžíngake' gan  
zoe'. <sup>28</sup>Wnnábgekle' Jesusen', na'  
wnnágake':

—¿Biz yela' wnná bia' nzi' lo no'o  
žono' da' ki? ¿Noz benne' bdie' lo  
no'o yela' wnná bian'?

<sup>29</sup>Bechebe Jesusen', na' gože'  
légake':

—Lezka' neda' nnabla' le'e to. Cha'  
yechébele chia', yapa' le'e bi yela'  
wnná bia' napa' žona' da' ki. <sup>30</sup>¿Noz  
benne' bdie' lo na' Zwa bezóe'  
benách ka' nis? ¿Dios o to benne'?  
Le nne na'a.

<sup>31</sup>Wzó láwgake' žóngake'  
xtíža'gake' la' légakze', na'  
wnnágake':

—Cha' nnažo Dios bsele'e le', yi'e  
žo'o: “¿Biz chen' bi bejle'le chie'?”

<sup>32</sup>¿Yé'ažo-ne', bséla'gak benne' ka' le'?  
Ki bezá' láže'gake' dan' zžébegake'  
benne' yež ka' nníta'gake' ga na',  
dan' žékgekle yógo'te benne' ka'  
bchalj Zwan' lo wláz Dios. <sup>33</sup>Che  
len bely'e Jesusen':

—Bi nnezlto'.

Naž Jesusen' gože' légake':

—Lezka' neda' bi yapa' le'e bi yela'  
wnná bia' napa' žona' da' ki.

Žsaka' lebe Jesús chegak benne' wen  
žin ka'

(Mt. 21:33-46; Lk. 20:9-19)

**12** Naž wzó law Jesusen'  
zcháljenle' benne' ka'  
žónlengake' Le' tzen da' žsaka' lebe',  
na' wnné:

—Wzóá to benne' beyaze' lba uba  
ka' gan nak lo yežlyó chie'. Bzoe'  
to le'je chen, na' bche'ne' to yežw  
yej gan wsíe' xis uba ka'. Bene' to  
yo'o gope gan nak ža'le gan wak to  
benne' wie' da' ka'.

'Naž bdie' yežlyó chien' lo na'gak benne' wen žin ka', nich sí'gake' gachje da' wnežjwen, na' wyeje' yež zi'to'. <sup>2</sup>Kate' bžin ža wchíbgake' da' zbian, bsele'e to bi' wen žin chie' chejxi'be' lo na'gak benne' wen žin ka' dan' zeyala' che xanbe' che da' wbíagak lba uba ka'. <sup>3</sup>Naž benne' wen žin ka' békxwgake' xkwiden', na' béngake'-be' zi'. Beséla'gake'-be' ká'zebe'. <sup>4</sup>Naž xan yežlyón' bsele'e yetó bi' wen žin chie', na' xkwide' ni bžé'egake'-be' yej, na' bla'gake' yichjbé'. Béngake'-be' zi'. <sup>5</sup>Naž xan yežlyón' bsele'e yetó bi' wen žin chie', na' xkwide' ni bétgake'-be'. Lezka' bsele'e xkwide' zanže bi' wen žin chie' ka', na' bénle'egake' balbe' zi', na' bétgake' yebałbe'.

<sup>6</sup>Biž wzóa no benne' nga'ne' che xan yežlyón'. Nga'nze to xkwide' byo chie', na' nží'ile'ele'-be'. Kate' wzé lawte bsele'e zi'ne', na' wnné': "Gápegake' zi'na' ba la'ne." <sup>7</sup>Naž benne' wen žin ka', la' légakze' wnnágake': "Xkwide' ni zeyala' chebe' yežlyó nga. Le cho'o, gotžobe', na' ga'n yežlyó nga chežo." <sup>8</sup>Che len békxwgake'-be', na' bétgake'-be'. Bžó'ngake'-be' na'le lo yežlyón' gan degak lba uba ka'.

<sup>9</sup>Naž Jesusen' wnnable' benne' ka', benne' nnít'a'gake' dot kwite', na' wnné':

—¿Nakx gon benne' xan yežlyón'? Yide', na' gote' benne' wen žin ka', na' wdíe' yežlyón' lo na'gak benne' yoble.

<sup>10</sup>?Bi bel-le da' nyejw le'e yiche la'y? Ki znnan:

Yej na' da' bzoagak benne' wen ze'e ka' chela'ale,  
na'a naken yej len blo che ze'e.

<sup>11</sup>Xanžo Dios bene' ga naken ki, na' žebán láže'žo kan nak da' zle'elžo.

<sup>12</sup>Naž gónegekle' séngake' Jesusen' dan' nnézgekle' bsaka' lebe' ki kan nak chégake', san zžébegake' benne' yež ka', benne' nnít'a'gake' ga na', na' che len belka'ne' Le', na' beyéjake'.

**Ka nak da' zchízjwgake' benách ka'  
lo wláz benne' Sésar**  
(Mt. 22:15-22; Lk. 20:20-26)

<sup>13</sup>Wdé na' benne' yodo' wnnábia' ka' bséla'gake' gan zoa Jesusen' bale benne' yodo' fariseo ka' len benne' ka' zónlengake' Herodes tzen, nich góngake' ga bi da' nna Jesusen' nich gak yesbága'gake' Le' zia. <sup>14</sup>Benne' ka' bžíngake' gan zoa Jesusen', na' bely'i'e Le':

—Benne' wsedle, nnezlto' zchaljo' da' naken dot da' li. Bi žeklo' da' želnnaze benách ka', dan' bi zwíazo' da' zloé'ezele kwingak benách ka', na' lo da' naken da' li žsedlo' da' ženele Dios gongak benách ka'. ¿Zonn da' bchi'le Moisés neto' latje chizjw lazto' da' zchízjwgake' lo wláz Benne' Sésar, benne' zi'to', bennen' znnábi'e? ¿Wyízjwton' o bi chízjwton'?

<sup>15</sup>Žákbe'ele Jesusen' znnábgekle' Le' ki dan' zénegekle' yesbága'gake' Le' zia, na' gože' légake':

—¿Bíz chen' zžixle neda'? Le wloé'el neda' to mežw da' zkónlele žin nich le'elan'.

<sup>16</sup>Bloé'egekle' Le' ton, na' Jesusen' wnnable' légake', na' wnné':

—¿Noz benne' da' ni lawe', na' le'? Bež'igake', na' wnnágake':

—Che benne' Sésar da' ka'.

<sup>17</sup>Naž Jesusen' gože' légake', na' wnné':

—Le wne<sub>z</sub>jw che benne' Sésar da' naken che benne' Sésar, na' che Dios da' naken che Dios.

Bebán láže'gekle' che dan' bechebe Jesusen'.

**Kan nak che yela' žebán lo yela' got**  
(Mt. 22:23-33; Lk. 20:27-40)

**18**Naž bla'gak bale benne' yodo' saduseo ka' gan zoa Jesusen'. Benne' ki znnágake' bi yebangak benne' gat ka'. Che len belyi'e Jesusen', **19**na' wnnágake':

—Benne' wsedle, Moisés bzoje' cheto' cha' gat to benne' byo, bi zoa zkwide' chie', na' cha' ga'n no'le chie', bi' biche' bennen' žala' wchág ná'lenbe' no'le wzeben', nich wzoabe' to zkwide' gakbe' zkwide' che bíche'ben'. **20**Wnnítá'gak gaže bi' bíche'gakbe'. Zkwide' byo nežw bchag ná'lenbe' to no'le, san gotbe', bi wzóa zkwide' chebe'. **21**Zkwide' byo bežope bchag ná'lenbe' no'le wzeben', san lezka' gotbe', bi wzóa zkwide' chebe'. Lezka' goken che zkwide' byo beyonne. **22**Ka' goken, yógo'tebe' bchag ná'lenbe' no'len', na' bi wzóa no zkwide' chégakbe'. Kate' ze lawte, lezka' got no'len!. **23**Na'a, kate' yebangak benne' gat ka', žNózlgakbe' gak no'len' chebe', dan' gážetebe' bchag ná'lengakbe' le'?

**24**Bechebe Jesusen', na' gože' légake':

—Zchíxlele dan' bi nónbia'le da' nyejw le'e yiche la'y, na' bi nnézlele kan nak yela' wak che Dios. **25**Kate' yebangak benne' gat ka', bi wchág ná'gake', na' benne' byo ka' bi sóalengake' no'le ka', san gákgake' kan jez nak wbás la'y ka' che Dios, wbás ka' nnítá'gake' ya'abá chie'.

**26**Na'a, kan nak chegak benne' gat ka' cha' yebángake', ēbi na' gol-le dan' bzoj Moisés? Zchaljen kan Dios bliže' le' lo yag yéche'do' da' žeyen, na' gože' le': “Neda' naka' Dios che Bran, na' Dios che Isaak, na' Dios che Jakob.” Dan' wnné' ki chégake', nak bia'zej nbane' la'kze gótgake' zga'ale. **27**Dios nake' Dios chegak benne' ban ka', kege chegak benne' gat ka', benne' ka' nátgake' to chi'ize. Zchíxlele.

**Da' bchi'le Dios žo'o da' naken blo**  
(Mt. 22:34-40)

**28**Lezka' bžin to benne' yodo' wsedle gan zoa Jesusen'. Benle' che Jesusen' dan' bcháljlene' légake', na' nnezle' cháwe'do' bechebe'. Che len wnnable' Jesusen', na' wnné':

—čBíz da' bchi'le Dios žo'o nakžen blo ka yógo'te da' ka' bchi'le' žo'o gonžo?

**29**Bechebe Jesusen', na' gože' le':

—Da' bchi'le Dios le'e da' nakžen blo ka yógo'te naken da' znnan:

Le yenle, benne' Israel ka'.

Xanžo Dios, toze' Le' nake' Xanžo.

**30**Žala' ži'ilo' Xano' Dios dot lažo'o, na' len dot yichj lažd'o'o, na' len dot yela' žejní'il chio', na' len dot yela' wak chio'.

Da' ni naken da' bchi'le Dios le'e da' naken blo. **31**Da' bchi'le Dios le'e da' naken bežope, toze kan naken. Ki znnan:

Žala' ži'ilo' lježo' kan nži'il kwino'. Bi zoa yetó da' bchi'le Dios le'e da' nakžen blo ka da' chope ki da' wnnakze' Le'.

**32**Naž benne' yodo' wsedlen' gože' Jesusen', na' wnné':

—Cháwe'do' wnnó', benne' wsedle. Da' nak dot da' li znnó'. Toze nak Dios, na' bi zoa nitože no nak Dios.

**33** Na' cha' nží'ilžo Dios dot láže'žo, na' len dot yela' žejn' il chežo, na' len dot yichj láždo'žo, na' len dot yela' wak chežo, na' cha' nží'ilžo lježžo kan nží'il kwinžo, da' ki zálka'žegaken ka yógo'te biado' ka' žotžo-ba' lo bkog la'y che Dios, na' lezka' ka yógo'te biado' ka' zzeyžo-ba' lo bkogen'.

**34** Kate' benle Jesusen' ka cháwe'do' bechebe bennen', gože' le', na' wnné':

—Yeláte'ze žiažje chio' nich si'o da' znnna bia' Dios.

Bi bežogle nitože benne' bi da' nnable' Jesusen'.

¿Nož benne' nak Benne' Cristo zí'ne'?

(Mt. 22:41-46; Lk. 20:41-44)

**35** Kate' ne žsedle Jesusen' benách ka' gan nak lo zchil yodo', wnné':

—¿Bíž chen' znnagak benne' yodo' wsedle ka' Benne' Criston' nake' za'só Dabí? **36** Lekze Dabín' bchalje', zoalen Dios Be' La'y le', na' wnné':

Xanžo Dios gože' Xana':

“Wžé' kwita' li ža

kate' gonža' ga wzóa zibgak lawo' benne' ka' bi zlé'egekle' Le' chawé'”

**37** ¿Nak Benne' Criston' za'só Dabí cha' lekze Dabín' wnné' nake' Xane'?

Benne' zan, benne' ka' nníta'gake' ga na' wyáz láže'gake' da' ni, na' bze nággake' chie'.

Jesús žesbage'e benne' yodo' wsedle ka' zia

(Mt. 23:1-36; Lk. 11:37-54; 20:45-47)

**38** Kate' ne žsedle Jesusen' benne' ka' zónlengake' Le' tzen, gože' légake':

—Le gape chi'i kwinle chegak benne' yodo' wsedle ka'. Zdan láže'gake' zdágake' nile na'le, zej nakwe' laže' tonn ka'. Lezka' zdan láže'gake' wližgak benách ka' légake' cháwe'do' gan nak lawe' ya'a. **39** Zbé'gake' latje blo ka' lo yo'o gan zdobgak benách ka' nich yéngekle' xtiža' Dios, na' gan že'ž zawgake' tzen. **40** Zká'agake' ližgak no'le wzebe ka', na' nich wloé'ezele chawé' kwíngake', scha zcháljgake' law Dios. Benne' ki, wsaka' zi'že Dios légake'.

**Da' bnezjw to no'le wzebe che Dios**

(Lk. 21:1-4)

**41** Kate' ne že' Jesusen' lo zchil yodo' gan zoa kak gan zgo'ogak benách ka' mežw che yodo', zwie' kan žongak benne' ka' zgó'ogake' mežw lo kaken'. Benne' ka' dele'e yela' wnni'a chégake' zgó'ogake' mežw zan. **42** Naž bžin to no'le wzebe yache' ga'ni, na' wloé'e chope mežw lasdo' lo kaken', da' ka' záka'gaken láte'do'ze. **43** Naž Jesusen' bliže' benne' wsedle chie' ka', na' gože' légake':

—Da' li žapa' le'e, no'le wzebe yache' ni wlo'ože' ka dan' wlo'ogak yógo'te benne' ka' wló'ogake' mežw lo kak che yodo'. **44** Yógo'te benne' ka' zgó'ogake' che da' nga'nze chégake', san no'le ni, lo yela' yache' chie' wloé'e dot da' do' deze chie', dan' žala' gáwlene'.

Znna Jesúsa kan za' wchínnjgake' yodo'

(Mt. 24:1-2; Lk. 21:5-6)

**13** Kate' bežój Jesusen' lo zchil yodo', to benne' wsedle chie' gože' Le', na' wnné':

—Benne' wsedle, bwia nga ka zen golezej nak yo'o ki, na' ka zen golezej nak yej ka' zej žian le'e ze'e chégaken.

<sup>2</sup>Bechebe Jesusen', na' gože' le':

—Zle'elo' yo'o zen ki, san bi ga'n to yej law lježen nga, dan' wchinnjgak benách ka' légaken.

**Da' ka' gak biá'gaken kate' za' yeyóž che yežlyó**

(Mt. 24:3-28; Lk. 21:7-24; 17:22-24)

<sup>3</sup>Naž wyéj Jesusen' len benne' ka' žónlengake' Le' tzen law Ya'a Yag Olibo, da' žen' lawle gan de yodo'. Kate' Jesusen' ba ži'e ga na', naž la' légakze Bedw len Jakob, na' Žwa, na' Ndres, góžgake' Le', <sup>4</sup>na' wnnágake':

—Wnná neto' batx gak da' ki. <sup>5</sup>Biz gak bian' za' gakgak yógo'te da' ki?

<sup>5</sup>Bechebe Jesusen', na' bsdle' légake', na' wnné:

—Le gape chi'i kwinle nich bi gon láže'gekle' le'e. <sup>6</sup>La'gak benne' zan, benne' légake' kan lia' neda', na' nnágake' zej nake' Benne' Criston'. Ki gon láže'gekle' benne' zan.

<sup>7</sup>Kate' yénlele žak wdile nile na'le, bi žébele. Yógo'te da' ki žala' gákgaken, san bi na' žin že ze lawte že ka'. <sup>8</sup>To yež til'-len yetó yež, na' benách ka' to gan znna bia' to benne' chejtíl-lengake' benách ka' yetó gan znna bia' yetó benne'. Da' zan latje xo' lo yo, na' gak wbín. Gongak benách ka' žo'osbé. Da' ki gákgaken da' so law sáka'gak benách ka' nnítá'gake' že ka'.

<sup>9</sup>'Naž le gape chi'i kwinle, dan' wdégake' le'e lo na'gak benne' yolawe' ka'. Chíngake' le'e gan zdobgak benne' judío ka' nich

yéngekle' xtiža' Dios. Wzégake' le'e lawgak benne' ka' znna biá'gake' lažle, na' lawgak benne' ka' znna biá'gake' yež zi'to' ka'. Góngake' ki chele dan' žónlenle neda' tzen, san ki gata' latje wzóa lile chia' neda'.

<sup>10</sup>Zga'ale kate' žin že ze lawte že ka' žon byenen chejzéngekle' benách ka' dot yežlyó nga diža' chawé' chian'. <sup>11</sup>Katen' wché'gake' le'e, na' wdégake' le'e lo na'gak benne' yolawe' ka', bi gek zédlele ni'a che da' žala' nnale. La' že na'ze Dios wnežjwe' chele da' wchaljle, na' dan' nnale. Katen' wchaljle, kege le'ezele na' nnale, san Dios Be' La'y nne'. <sup>12</sup>Wdegak benách ka' la' bíche'gakkze' ka' lo na'gak benne' ka' gótgake' légake'. Benne' ka' zej nnita' xkwide' ka' chégake' wdégake' la' zí'ngakkze', na' zí'ngake' ka' wdégakbe' la' xa xná'gakkze' ka' lo na'gak benne' ka' gótgake' légake'.

<sup>13</sup>Yógo'te benách ka' wzóagake' le'e chela'ale dan' žónlenle neda' tzen, san nólele sóelele da' gaken na' zejte že ze lawte že, yelale.

<sup>14</sup>'Benne' ka' žolgake' da' ni žala' chejn'igeklen'. Bzoj Daniel, bennen' bchalje' lo wláz Dios že ni'te, da' znnañ ki: "Cho'o to da' nakan xiwe' da' yesniten gan bi žala' cho'on." Kate' žin že na', benne' ka' nnítá'gake' gan nbab Judea žala' wzóonnjgake', na' chjake' gan nak law ya'a ka'. <sup>15</sup>No benne' zoe' yichjo'o že na' žala' wzóonnjtie', na' bi yetje' zan yo'o nich chejxi'e bi da' de chie' lo yo'on'. <sup>16</sup>No benne' zoe' yixe' žala' wzóonnjtie', na' bi yeyeje' liže' nich chejxi'e laže' da' xoа yene'. <sup>17</sup>Da' nyáché'le'e gaken chegak no'le ka' že na', no'le ka' zej

noe'e xkwide' ka', na' lezka' no'le ka' zgáze'gekle' bi' že'n ka'. <sup>18</sup>Le wlíž Dios, na' nnáblele-ne' bi gon byenen wzonnjle kate' nak byo' zag. <sup>19</sup>Kate' ža ka' sáka'žegak benách ka' ka da' gok zga'ale katen' bi na' gata' yežlyó nga, da' ben Dios na'zejte na'a ža, na' ža ka' da' zá'gaken bi gaken ki. <sup>20</sup>Chela' bi gon Dios ga gakgak babze ža ka', bi yelá no benne', san dan' nži'ile' benne' ka' ba wžekze', ba bene' chie' gone' ga gakgak babze ža ka'.

<sup>21</sup>'Na'a, cha' no benne' yi'e le'e: "Le wia nga, zoa Benne' Criston' nga" o nnie: "Le wia nga zoe' ga na" bi chejle'le che bennen'. <sup>22</sup>La'gak benne' zan, benne' ka' gon láže'gekle' benách ka', na' nnágake' jez nake' Benne' Criston', na' nnágake' jez nake' benne' ka' zcháljgake' lo wláz Dios. Wloé'gekle' da' ka' gak biá'gaken, na' góngake' yelá' wak zen ka'. Lezka' gon láže'gekle' benne' ka' wžekze Dios cha' sáke'gekle'. <sup>23</sup>Na'a le'e, le soa ban laže'. Yógo'te da' ki ba goža' le'e zga'ale ka gákgaken.

### Kan gak kate' yelá' Benne' Golje' Benách

(Mt. 24:29-35, 42-44; Lk. 21:25-36)

<sup>24</sup>Lezka' wnná Jesusen': —Kate' ža ka', te gak da' ki, kate' sáka'gak benách ka' ki, choł wbíz, na' bi cha'ní' byo'. <sup>25</sup>Yinnjgak belj ya'abá ka', na' xizgak da' ka' jez nlan', da' ka' jez naken zen ya'abán!. <sup>26</sup>Naž l'é'gekle' neda', Benne' Golje' Benách, za'a lo bejw ya'abá, napa' yela' wak zen, na' yela' baní' chia'. <sup>27</sup>Sela'a wbás chia' ka' che ya'abá, na' wtóbgake' benách ka' wžia'

nedkza', benne' ka' nníta'gake' dap la'ate yežlyó nga, gan so lawte yo biž, na'zejte gan so lawte ya'abá.

<sup>28</sup>'Le chejn'il da' žedle yag higo le'e. Kate' so law gonen ni'a ne'ndo' ka', na' žebían xlage' že'ndo' ka', nnézlele za' žin byo' wbá ka'. <sup>29</sup>Lezka', kate' lé'elele žakgak da' ki, nnézlele za' žin ža ze lawte ža na', na' za' la' lawn. <sup>30</sup>Da' li žapa' le'e, yógo'te da' ki gákgaken zga'ale kate' gatgak benne' ka', benne' sóagake' nbángake' ža na!. <sup>31</sup>Te che ya'abá, na' che yežlyó nga, san xtíža'a batkle te chen.

<sup>32</sup>Kate' žin ža na' o yel na', bi nnezle nitó benne'. Bi nnézgekle wbás che ya'abá ka', na' bi nnezla' neda', Zi'n Dios. Toze Dios Xa' nnezlen'. <sup>33</sup>Che len, le soa lez, na' le soa ban laže', na' le wchaljlen Dios dan' bi nnézlele bi ža gakgak da' ki. <sup>34</sup>Gaken kan žak kate' chej to benne' zi'to'. Kate' za' wzé'e liže', wdíe' lo na'gak benne' wen žin chie' ka' da' de chie'. Che chégake' we'e xchíngake', na' nne' soa lez benne' zoe' žape chi'e ža yo'o. <sup>35</sup>Le soa lez dan' bi nnézlele batx yelá' xan yo'o, cha' kate' za' žale, o gachje yele, o kate' zbeže leko', o zildo'. <sup>36</sup>Le gon ki, nich bi yedjxake'e le'e ztasle cha' kon yela'kze'. <sup>37</sup>Da' ni da' žapa' le'e, lezka' žapa' yógo'te benách: le soa ban laže'.

### Benne' yodo' ka' žóngake' xtíža'gake' séngake' Jesús

(Mt. 26:1-5; Lk. 22:1-2; Jn. 11:45-53)

**14** Yechóp ža ka', gak Lni Pasko' kate' žejsá' láže'gak benne' judío ka' kan ben Dios kate' beslé' xa xtó'gake' ka' lo yežlyó

Egipto, da' naken lni kate' žáwgake'  
yet xtil da' bi nzin' kwa zichj chen.  
Bxoz wnná bia' ka' len benne' yodo'  
wsedle ka', wdílgake' kan séngake'  
Jesusen' ži žize nich gótgake' Le'.  
**2**Wnnágake':

—Bi žala' senžo-ne' ža lni dan'  
gongak benách ka' žo'osbé.

**To no'le zlalje' da' zla' zix yichj Jesús**  
(Mt. 26:6-13; Jn. 12:1-8)

**3**Kate' ža na' wzóa Jesusen' lo  
yež Betania, lo liž Smon, to benne'  
wdé'e yižwé' leže. Kate' ne že'j  
žaw Jesusen', wyáz to no'le, noe'e  
to béga'do' da' naken yej zaka', na'  
nža' da' zla' zix che yeje susén las  
da' naken dot li laže', na' záka'le'en.  
Ble'e béga'don', na' wloé'e da' zla' zix  
yichj Jesusen'. **4**Bža'agak bale benne'  
ka' nnít'a'gake' ga na', na' wnnágake'  
la' légakze':

—¿Biz chen' gok ditje da' zixen'?

**5**Chela' no benne' gote'en, siže' ka  
lážjwžo che to yiz, na' gak chise'  
mežwn' chegak benách yache' ka'.  
Wnnéle'egake' che no'len'.

**6**Naž bchajl Jesusen', na' wnné':

—Le we'e latje. ¿Biz chen' znnle  
chie'? Nak chawe' dan' bene' chia'.

**7**Benách yache' ka' nnít'a'leñtezgake'  
le'e, na' bátte'teze yénelele, gak  
gonle chégake' da' chawe', san neda'  
bi sóateza' gan zoale. **8**Ben no'le ni  
ka da' wzake'e. Blalje' da' zla' zix ni  
neda', na' ki bpe'e neda' zga'ale kate'  
gacha'a lo yežw ba. **9**Da' li žapa'  
le'e, gáte'teze gan wcháljgake' diža'  
chawe' chian' dot yežlyó nga, lezka'  
soa no benne' wzóa lie' da' ben  
no'le ni chia'. Ki gaken nich chejsá'  
laže'gak benách ka' le'.

**Judas zchebe laže'e wdíe' Jesús lo  
na'gak benne' yodo' ka'**  
(Mt. 26:14-16; Lk. 22:3-6)

**10**Naž bžoj Judas Iskariote,  
bennen' nbáble' benne' chežinno,  
benne' ka' žónlengake' Jesusen'  
tzen, na' wyeje' gan zej nnita' bxoz  
wnná bia' ka' nich wdíe' Jesusen'  
lo ná'gake'. **11**Kate' béngekle' xtiža'  
Júdas na', bebégekle', na' bchebe  
láže'gake' chížjwgake' le' mežw. Naž  
wzó law Judas na' žilje' kan wdíe'  
Jesusen' lo ná'gake'.

**Da' že'j žawžo nich chejsá' láže'žo  
kan got Xanžo**

(Mt. 26:17-29; Lk. 22:7-23;  
Jn. 13:21-30; 1 Ko. 11:23-26)

**12**Nak ža zzo law žak lni kate'  
žáwgake' yet xtil da' bi nzin' kwa  
zichj chen, ža na' žótgake' zíla'do',  
bian' žáwgake' Lni Paskon', kate'  
žejsá' láže'gake' kan ben Dios katen'  
beslé' benne' judío ka' lo yežlyó  
Egipto. Naž benne' wsedle ka'  
che Jesusen' wnnábgekle' Le', na'  
wnnágake':

—¿Gaz žénelo' chejto' chejsí'ni'ato'  
da' gawžo xche' che Lni Pasko'?

**13**Naž Jesusen' bsele'e chope  
benne' wsedle chie' ka', na' gože'  
légake':

—Le chej lo yež, gan chejxáka'le to  
benne' noe'e to že'e nis. Le chéjlene'.

**14**Gan choe'e, le ye' xan yo'on':  
“Znna Benne' wsedle: ¿Gaz zoa yo'o  
gan gáwlena' benne' wsedle chia'  
ka' xche' che Lni Pasko'?” **15**Naž  
wlo'e'le' le'e to yo'o zen gan nak da'  
chope kwia gan ba nba'a. Le wsí'ni'a  
da' gawžo ga na'.

**16**Bžojgak benne' wsedle chie' ka', na' bžíngake' lo yež, na' bejxáka'gake' yógo'te kan ba gož Jesusen' légake'. Bsí'ni'agake' da' gáwgake' ga na' che Lni Paskon'.

**17**Kate' ba golen, bžin Jesusen' ga na', na' benne' chežinno, benne' wsedle chie' ka', zá'lengake' Le' tzen. **18**Kate' ne že'j žáwgake', bchalj Jesusen', na' wnné':

—Da' li žapa' le'e, zoa to benne' ladjwle le'e, benne' že'j žáwlene' neda' tzen. Le' wdíe' neda' lo na'gak benne' yodo' ka'.

**19**Naž gok nyache' láže'gake', na' wzó láwgake' že'gake' Le' to toe':

—čNaken neda?

Lezka' yetóe' wnné':

—čNedan'?

**20**Bechebe Jesusen', na' gože' légake:

—Nake' to benne' ladwj chežínnole ki, bennen' zžínlene' neda' tzen lo ye'n. **21**Cha'a gan gótgake' neda', Benne' Golje' Benách, kan nyejw le'e yiche la'y kan gaken chia', san da' nyáche'le'e gaken che bennen' wdíe' neda' lo na'gak benne' ka' gótgake' neda'. Gakže chawé' che bennen' chéla'kze bi golje'.

**22**Kate' ne že'j žáwgake', Jesusen' bexwe' yet xtil. Gože' Dios: "Žóxkeno." Bzožen', na' bi'en chégake', na' wnné':

—Le gawn. Da' ni naken bela' žen chia'.

**23**Lezka' bexwe' to zíga'do', na' gože' Dios: "Žóxkeno." Naž bi'en chégake', na' yógo'tegake' wé'jgaken'. **24**Jesusen' gože' légake:

—Da' ni naken xchena' da' žon chochen diža' kobe da' zka'nen chawé', dan' žon Dios len benách ka'.

Xchena' na' laljen ni'a chegak benne' zan. **25**Da' li žapa' le'e, biž ye'ja' xis uba ki na' zejte ye'ja' da' kobe gan znna bia' Dios.

**Znna** Jesús nna Bedw bi nónbi'e Le' (Mt. 26:30-35; Lk. 22:31-34; Jn. 13:36-38)

**26**Wdé bélgake' da' belwé láwgake' Dios, bžójgake', na' jake' law Ya'a Yag Olibo. **27**Naž Jesusen' gože' légake', na' wnné':

—Yógo'tele gak chope láže'le, na' yebéj yichjile neda' na'a že', dan' nyejw le'e yiche la'y da' znnan: "Gota' benne' žape chi'e zila' ka', na' gás<sub>sl</sub>asgakba!" **28**Te yebana' lo yela' got, cha'a gan nbab Galilea zga'ala' ka le'e.

**29**Naž Bedw gože' Jesusen', na' wnné':

—La'kze yógo'tegake' gak chope láže'gake', na' yebéj yíchjgake' Le', bi gak chope laža'a neda'.

**30**Jesusen' gože' le', na' wnné':

—Da' li žapa' le', la' yel nize, zga'ale kate' kweže leko' chope chi'i, chonne chi'i nnio' bi nónbi'o neda'.

**31**Naž Bedon' ben choche' xtiže'e ni'a che Dios, na' wnné':

—La'kze gátlentia' Le' tzen, bi nnia' bi nónbi'a Le'!

Lezka' wnnágake' yógo'tegake'.

**Jesús** zcháljlene' Dios lo yežlyón' nzin' Jetsemaní

(Mt. 26:36-46; Lk. 22:39-46)

**32**Naž bžin Jesusen' len benne' ka' žónlengake' Le' tzen lo yežlyón' nzin' Jetsemaní, na' gože' légake', na' wnné':

—Le kwe' nga, kate' cha'a neda', chejcháljlena' Dios.

**33**Bchi'e Bedw len Jakob, na' Zwa, na' wzó lawe' žekle', na' žak nyache'

laže'e. <sup>34</sup>Jesusen' gože' légake', na' wnné':

—Gatkza' lo yela' žak nyache' laže' chia'. Le kwez nga, na' le nna'ze dot yele.

<sup>35</sup>Naž Jesusen' wzé'e yeláte'do' na'le, na' bzechw lawe' lo yo, na' bcháljlene' Dios. Wnnable' Le', cha' wak, kwase' chie' da' žala' sáka'lí'e ža na'. <sup>36</sup>Kate' ne zcháljlene' Dios, wnné':

—Xe, yógo'te gak gono' Le'. Bekwás da' žala' sáka'lí'a, san kege kan žénela' neda', san kan žénelo' Le', gono'.

<sup>37</sup>Naž Jesusen' beyeje' gan zej nnita' benne' wsedle chie' ka', na' bejxake'e légake' ztásake'. Gože' Bedon':

—Smon, ¿ztaso' na'a? ¿Bi zbejo' bichgale yej lawo' to chí'ido'ze? <sup>38</sup>Le nna'ze dot yele, na' le wchaljlen Dios, na' le nnable' bi si' latje da' xiwe' chen' le'e cheł'a'le. Da' li be' nákkzele zoakzen ban laže', san lo yela' benách chele žedó láže'le.

<sup>39</sup>Naž da' yoble wyéj Jesusen', na' bcháljlene' Dios, na' la' tlebe kan wnné'. <sup>40</sup>Kate' beyeje' da' yoble gan nnít'a'gake', bejxake'e légake' ztásake' dan' yo'o bichgale yej láwgake'. Bi wnnézgekle' bi da' yé'gake' Le'.

<sup>41</sup>Kate' beyeje' da' chonne chí'i gan nnít'a'gake', gože' légake':

—¿Ztasle? ¿Žezí' láže'le? iKá'teze! iBa bžin ža! Le wia nga, neda', Benne' Golje' Benách, ba ndia' lo na'gak benne' doł'a' ka'. <sup>42</sup>iLe chas! iLe cho'o! Le wia nga, za' bennen' wdíe' neda' lo na'gak benách ka'.

### Želzene' Jesús

(Mt. 26:47-56; Lk. 22:47-53; Jn. 18:2-11)

<sup>43</sup>Kate' ne zcháljl Jesusen' da' ni, bla' Judas, bennen' nbáblene'

yechinéj benne' ka' žónlengake' Le' tzen, na' zá'lengak benne' zan le' tzen, benne' ka' zej noe'e ya ntoche' ka', na' yag ka'. Bxoz wnná bia' ka' len benne' yodo' wsedle ka', na' benne' gole ka', bséla'gake' légake'.

<sup>44</sup>Judas na', bennen' zdie' Jesusen' lo ná'gake' ba bloe'ele' légake' to da' gone' da' gak bian' no benne' nake' Jesusen', na' wnné':

—Bennen' wchág lawa'-ne', Lekze' Jesusen'. Le sene', na' le chi'e. Le wia binlo nich bi yelé'.

<sup>45</sup>Kate' bžin Judas na' ga na', la' wbíga'tie' gan zoa Jesusen', na' gože' Le':

—Benne' wsedle, Benne' wsedle.

Naž bchag lawe' Jesusen'. <sup>46</sup>Naž békxwgate' Jesusen', na' bché'gake' Le' njeje'.

<sup>47</sup>Naž to benne' žónlene' Jesusen' tzen wleje' ya ntoche', na' bene' we' bi' wen žin che bxoz blo, na' bchoge' yid nagbe'. <sup>48</sup>Jesusen' gože' benne' ka', na' wnné':

—¿Bžojle nwa'le ya ntoche' ka', na' yag ka' nich senle neda', kan žonle kate' zzenle to benne' wbán? <sup>49</sup>Kate' ža ka' wzóalena' le'e, na' bsedla' benne' ka' gan nak lo zchil yodo', bi wzenle neda', san žaken ki nich gak da' nyejw le'e yiche la'y.

<sup>50</sup>Naž yógo'te benne' wsedle ka' che Jesusen' bebéj yíchjgake' Le', na' bzónnjgake'.

### Žzonjj to xkwide' byo

<sup>51</sup>Lezka' wzóá to xkwide' byo ga na', nawbe' Jesusen', na' nxoaze kwinbe' to laže' laga'. Benne' ka' zej nchi'e Jesusen' békxwgate'-be',

<sup>52</sup>san bsanbe' lažen', na' gal yídzebe' bzonnjbe'.

**Zché'gake' Jesús lawgak benne'**  
yolawe' blo che yodo'  
(Mt. 26:57-68; Lk. 22:54-55,  
63-71; Jn. 18:12-14, 19-24)

**53** Bché'gake' Jesusen' law bxoz  
blo, gan zej ndobe yógo'te bxoz  
wnná bia' ka' len benne' gole ka', na'  
benne' yodo' wsedle ka'. **54** Bedw  
bejnawe' Jesusen' zí'to'le. Wyoé'e la'  
li'a liž bxoz blon', na' wžé'lene' tzen  
benne' ni'a na' ka' bxoz blon', na'  
bche'l kwine' gan nak žoa'a yi'.

**55** Bxoz wnná bia' ka' len yógo'te  
benne' yolawe' blo ka' gónegekle'  
žélgekle' to da' gak yesbág'a'gake'  
Jesusen' zia nich gak chóggake' chie'  
gate', san bi be bžélgekle'. **56** Benne'  
zan wnnégake' che Jesusen' da'  
wen laže', san bi gok tlebe dan'  
wnnégake' chie'. **57** Naž wzegak  
benne' ka' wnnégake' che Jesusen'  
da' wen laze', na' wnnágake':

**58** —Neto' benlto' da' bchalj  
bennen', na' wnné': "Wchinnja' yodo'  
nga, da' benen len ni'a na'gak benne'  
ka', na' yechonne žaze yechisa' yetó  
da' bi gonen len ni'a na'gak benne'  
ka'."

**59** Lezka' bi gok tlebe xtíža'gake'.

**60** Naž wzó ža' bxoz blon' gachje  
láwe'le benne' ka' nnítá'gake' ga na'.  
Wnnable' Jesusen', na' wnné':

—¿Bi be žechebo'? ¿Bizen' da'  
znnagak benne' ki kan naken chio'?

**61** Wzó žize Jesusen', na' bi be  
bechebe'. Da' yoble bxoz blon'  
wnnable' Le', na' wnné':

—¿Nako' Le' Benne' Criston', Zi'n  
Dios la'y?

**62** Bechebe Jesusen', na' wnné':  
—Naka'. Lezka' lé'elele neda',  
Benne' Golje' Benách, soa' kwi'a

kwit li ža che Dios, Bennen' napkze'  
dot yela' wnná bia', katen' yelá'a lo  
bejw ya'abá.

**63** Naž bxoz blon', lo yela' žž'aa  
chie' bcheze' laže' da' nakwe', na'  
wnné':

—Bi žiážjelžo no benne' wlo'e'ele'  
zia da' nbage'e. **64** Bénkzelele wnné'  
che Dios len da' wnné'. ¿Biz znnale  
le'e?

Yógo'tegake' bchóggake' che  
Jesusen' gate'.

**65** Naž bałe' wzó láwgake' zžé'egake'  
Jesusen' zene'. Bkáche'gake' yej lawe',  
na' béngake' Le' zi', na' wnnágake':

—Wnné ya'a na'a nolto'  
bwáwža'ato' Le'.

Benne' ka', benne' ni'a na' bxoz  
blon', wdáp'a'gake' žoa'a law Jesusen'.

### **Znna Bedw bi nónbi'e Jesús**

(Mt. 26:69-75; Lk. 22:56-62;  
Jn. 18:15-18, 25-29)

**66** Kate' ne zoa Bedw li'a zan yo'o,  
to xkwide' no'le, bi' wen žin che  
bxoz blon', wbíga'be' gan zoe'. **67** Kate'  
ble'elbe' Bedon' gan ži'e zche'l kwine'  
žoa'a yi', bwíabe' le', na' wnnabe':

—Lezka' le' žónleno' Jesús, benne'  
Nasaret na', tzen.

**68** Beží'i Bedon', na' wnné':

—Bi nónbi'a-ne', na' bi nnezla' bi  
dan' znnno'.

Bežój Bedon', na' bejsóe' gan  
žázgake' li'a na'. Naž wžežé leko'.

**69** Da' yoble to xkwide' no'le wen  
žin bwíabe' le', na' wzó lawbe' že'be'  
benne' ka' nnítá'gake' ga na', na'  
wnnabe':

—Benne' ni žónlene' légake' tzen.

**70** Da' yoble bžon Bedon'. Yextido',  
benne' ka' nnítá'gake' ga na' góžgake'  
Bedon', na' wnnágake':

—Da' li žónleno' légake' tzen, dan' nako' benne' Galilea. La' díža'ze zchaljo'zej nak bi'o, dan' toze kan zchajle.

<sup>71</sup>Wzó law Bedon' žzia kwine' zia, zzetje' Dios, na' wnné:

—Bi nónbi'a bennen' zchajle chie'.

<sup>72</sup>La' wzézete leko' da' chope chi'i. Naž bejsá' laže' Bedon' dan' wnná Jesusen', katen' gože' le: "Zga'ale kate' kweže leko' chope chi'i, chonne chi'i nnio' bi nónbi'o neda'." Kate' bejsá' laže'e diža' ni, wzó lawe' zbeželi'e.

### Žché'gake' Jesús law Pilato, benne' wnná bia'

(Mt. 27:1-2, 11-14; Lk. 23:1-5; Jn. 18:28-38)

**15** Kate' ne nak zildo', bxoz wnná bia' ka' len benne' gole ka', na' benne' yodo' wsedle ka', na' yógo'te benne' yolawe' blo che yodo', bénge'kake' toze diža'. Naž bché'gake' Jesusen' nžjeje', na' bdégake' Le' lo na' Pilato, bennen' wnná bian', nich choge' chie' gate'. <sup>2</sup>Pilaton' wnnable' Jesusen', na' wnné':

—¿Nako' le' benne' nna bi'e benne' judío ka'?

Bechebe Jesusen', na' wnné':

—Da' li znno'.

<sup>3</sup>Bxoz wnná bia' ka' besbága'gake' Jesusen' da' zan da' zia. <sup>4</sup>Naž Pilaton' wnnable' Le' da' yoble, na' wnné':

—¿Bi be žechebo'? Bze nag da' zan da' žesbága'gake' le'.

<sup>5</sup>Bi be bechebe Jesusen'. Ka' goken, bebán laže'l Pilaton'.

### Želchoge' che Jesús gate'

(Mt. 27:15-31; Lk. 23:13-25; Jn. 18:38-19:16)

<sup>6</sup>De to da' žónteze žon Pilaton' kate' žak lni na', žsane' to benne'

nyejwe' liž ya, nóte'teze benne' želnnáb benne' ka'. <sup>7</sup>Kate' ža ka' to benne' lie' Barrabás nyejwe' liž ya, tzen len yebaše lježe' ka', benne' ka' bdíl-lengake' benne' Roma ka', na' bétgake' baše benách ka'. <sup>8</sup>Kate' bžingak benne' zan ka' gan zoa Pilaton', wzó lágake' znnábgekle' le' gone' chégake' ka žónteze žone'. <sup>9</sup>Beží'i Pilaton', na' wnné':

—¿Zénelele wsana' bennen' chele, bennen' nna bi'e benne' judío ka'?

<sup>10</sup>Ki wnná Pilaton' dan' žákbe'ele' bxoz wnná bia' ka' bdégake' Jesusen' lo ne'e dan' zgé'gekle' Le'. <sup>11</sup>Bxoz wnná bia' ka' bzejní'igekle' benne' zan ka' nich nnábgekle' Pilaton' wsane' Barrabasen' lo ná'gake'.

<sup>12</sup>Naž Pilaton' wnnable' légake' da' yoble, na' wnné':

—¿Biz žénelele gona' che bennen' znnale lie' benne' nna bi'e benne' judío ka'?

<sup>13</sup>Wzézeya'agake' zižje, na' wnnágake':

—iBde'e le'e yag kroze!

<sup>14</sup>Pilaton' wnnable' légake', na' wnné':

—¿Biz da' zia nbage'e?

Da' yoble wzézeya'agake' zižje, na' wnnágake':

—iBde'e le'e yag kroze!

<sup>15</sup>Dan' gónele Pilaton' gone' dan' chaž láže'gak benne' zan ka', bsane' Barrabasen' lo ná'gake'. Naž gože' benne' ka' žjake' lo wdile, chíngake' Jesusen', na' bdie' Le' lo na'gak benne' ka' nich chejdá'gake' Le' le'e yag kroze.

<sup>16</sup>Naž benne' ka' žjake' lo wdile, bché'gake' Jesusen' li'a yolawe', gan btóbake' ljéžgake' ka'.

<sup>17</sup>Bwákwgake' Jesusen' to laže' xna,

na' bén̄gake' to da' bžíagake' yichj Jesusen', dan' naken len ni'a ne'e yag yeche'. <sup>18</sup>Naž wzó láwgake' žon dítjekle' Jesusen', na' wnnágake':

—iGá'n zen le', benne' znnna bi'e benne' judío ka'!

<sup>19</sup>Bdíngake' ya xtl yichje', na' bžé'egake' Le' zene'. Bzoa zíbgake' lawe', na' lo yela' žon ditjle bka'n zéngake' Le'. <sup>20</sup>Kate' beyóz ben dítjekle' Le', beká'agake' laže' xnan' da' nakwe', na' begákwgake' Le' laže' chekze'. Naž bebéjgake' Le' la' lf'ale yolawen' nich chejdá'gake' Le' le'e yag kroze.

**Zdá'gake' Jesús le'e yag kroze**  
(Mt. 27:32-44; Lk. 23:26-43; Jn. 19:17-27)

<sup>21</sup>Béxwgake' to benne' yež Sirene, benne' zdeze' ga na', na' zezé'e yixe'. Lie' Smon, na' nake' xagak Kantr, na' Rufo. Béngake' ga bi'e yag kroze che Jesusen'.

<sup>22</sup>Bché'gake' Jesusen' latjen' nzin' Gólgota, to diža' hebreo da' znnan len diža' xiža', Ya'a Žit Yichj Benne'. <sup>23</sup>Bé'gake' da' ye'j Jesusen' xis uba da' nžixen než sla' che mirra, san Le' bi we'jen'. <sup>24</sup>Naž bdá'gake' Le' le'e yag kroze, na' wdísgake' laže' da' gokw Jesusen' lo na' to to benne' ka', benne' žjake' lo wdile. Bebéjgake' da' gak bian' nich nnézgakle' dan' yejala' to toe'.

<sup>25</sup>Ne nak xsile katen' bdá'gake' Le' le'e yag kroze'. <sup>26</sup>Dižan' da' bdá'gake' le'e yag kroze yichjle Jesusen' kan nak da' žesbága'gake' Le' zia znnan ki: "Benne' znnna bi'e benne' judío ka'." <sup>27</sup>Bdá'gake' chope benne' wbán ka' le'egak yag kroze ka' tzen len Jesusen', na' de'e toe' kwite' li ža, na' yetóe' kwite' yegle.

<sup>28</sup>Ka' goken, gok kan nyejw le'e yiche la'y, da' znnan: "Wbáblene' benne' wen da' zinnj ka'."

<sup>29</sup>Benne' ka' želdíe' ga na' bliž zí'gake' Jesusen'. Bta yíchjgake', na' wnnágake':

—iO! ?Wchinnjo' yodo' che Dios, na' yechonne žaze yechison'?

<sup>30</sup>Beslá kwino' na'a, na' betj le'e yag krozen'.

<sup>31</sup>Lezka' bxoz wnná bia' ka', na' benne' yodo' wsedle ka', ben dítjekle' Le'. Belyi'e ljéžgake' toe' yetóe', na' wnnágake':

—Beslé' benne' yoble ka', san bi gak yeslá kwine'.

<sup>32</sup>Lezka' wnnágake':

—iO! ?Nako' Benne' Criston', benne' nna bi'e benne' judío ka'? Betj na'a le'e yag krozen' nich le'elton', na' chejle'to' chio'.

Lezka' benne' ka' zej de'e le'egak yag kroze ka' tzen len Le', bliž dítjekle' Le'.

**Da' goken kate' got Jesús**

(Mt. 27:45-56; Lk. 23:44-49; Jn. 19:28-30)

<sup>33</sup>Kate' bžin wawbíž, bchoł dot yežlyó nga, na' goken ki na' zejte žedá chonnie. <sup>34</sup>Kate' ne žedá chonnie, wžéžeya'a Jesusen', na' wnné':

—Eloi, Eloi, člama sabaktani?

Diža' hebreo ni znnan len diža' xiža: "Dios chia', Dios chia', ībiz chen' bsan lažo'o neda'?"

<sup>35</sup>Benne' ka' nníta'gake' ga na' béngekle' diža' ni, na' wnnágake':

—Le wzé nag. Žliž' Lías.

<sup>36</sup>Naž bxite' to benne' zoe' ládjwgake', na' besbise' to da' bole da' že'jen nis lo nop zichj. Bde'en to law ya xtildo', na' bi'en nich xop Jesusen', na' wnné':

—Kwezžo, na' wíážo cha' yid  
Líasen' nich yetinne' Lé.  
**37** Wžézeya'a Jesusen', na' la' gottie'.  
**38** Wžesa' laže' žeje da' nałan' gachje  
láwe'le lo yodo', na' bžojen chople,  
da' wzó lawn yichjlen, na' bžinten  
xní'alen. **39** Bennen' żchi'e benne' ka'  
žjake' lo wdile, na' zie' law Jesusen',  
ble'ele' kan goken, kan wžézeya'a  
Jesusen', na' la' gottie', na' wnné':  
—Da' li benne' ni goke' Zi'n Dios.

**40** Lezka' wnníta'gak no'le  
ka' ga na', na' zí'to'le zwíagake'.  
Wnníta'gak Lia Madlen, na' Salomé,  
na' Lia, xna'gak Jakob kwide', na'  
Jwsé ládjwgak no'le ka'. **41** No'le ki  
jáklene' Jesusen' katen' wdé' gan  
nbab Galilea, na' gókłengake' Le',  
na' bnézjwgake' da' bdawe' Le' len  
benne' ka' zónłengake' Le' tzen.  
Lezka' wnníta'gak yebale' no'le zan  
ga na', no'le ka' bžínłengake' Le' lo  
yež Jerusalén.

### Zkáche'gake' Jesús lo yežw ba

(Mt. 27:57-61; Lk. 23:50-56; Jn. 19:38-42)

**42** Za' žale ža zpá'gake', ža na' za'  
žin ža la'y chegak benne' judío ka'.  
**43** Che len bła' Jwsé, benne' yež  
Arimatea, ga na'. Nake' benne' blo  
ládjwgak benne' yolawe' blo che  
yodo', na' lezka' zbeze' ža nna bia'  
Dios. Dot laže'e wyo'e gan zoa  
Pilato, na' wnnable' le' wnejzwe'  
le' latje yeywé'e Jesusen'. **44** Bebán  
láže'le Pilaton' kate' wnné' ba got  
Jesusen', na' bliże' bennen' żchi'e  
benne' ka' žjake' lo wdile, na'  
wnnable' le' cha' ba nat Jesusen'.  
**45** Kate' benle' da' wnná bennen'  
żchi'e benne' ka' žjake' lo wdile,  
bneżjwe' Jwsén' latje yeywé'e  
Jesusen'. **46** Naž Jwsén' go'we' to laže'

da' záka'le'en, na' betinne' Jesusen'  
le' yag kroze, na' bchel'-le' Le' lažen'  
da' záka'le'en. Naž wló'ogake' Le' lo  
yežw ba da' nadjen to lo bloj le'  
ya'a yej. Bde'e to yej blag zen da'  
besbagan' gan žó'ogake' lo yežw ba  
na'. **47** Lia Madlen, na' Lia, xna' Jwsé,  
bwíagake' gan bdégake' Jesusen'.

### Žebán Jesús lo yela' got

(Mt. 28:1-10; Lk. 24:1-12; Jn. 20:1-10)

**16** Kate' ba wdé ža la'y  
chegak benne' judío ka',  
da' naken ža gaže ža, naž Lia  
Madlen, na' Salomé, na' Lia, xna'  
Jakob, wzí'gake' da' zla' ziż nich  
chejló'ogake' Jesusen' da' zixen'.  
**2** Kate' ne nak zildo' ža nežw, jake'  
žoa'a yežw ba che Jesusen', na'  
bžíngake' ga na' kate' za' la' wbíž.  
**3** Bely'i'e ljéžgake' ka', na' wnnágake':  
—¿Noż benne' yeké'e yej na' nich  
gak cho'ožo lo yežw ba chien'?

**4** Kate' bžíngake' ga na', bwíagake',  
na' blé'egekle' ba nkwas yej na', na'  
naken to yej zen. **5** Wyázgake' lo yežw  
ba le' ya'a yej na', na' blé'egekle' to  
xkwide' byo, wbás che ya'abá ga na'.  
Že'be' chelá'a li ža lo yežw ban', na'  
nákwbé' to laže' tonn, laže' zíla'do'ze,  
na' bžébel'egake'. **6** Naž xkwidé'  
gožbe' légake', na' wnnabe':

—Biž žébele. Žeyiljle Jesusen',  
Benne' Nasaret, Bennen' wdé'e le'  
yag kroze. Ba bebane'. Biž zoe' nga.  
Le wia ga ni bxóagake' Le'. **7** Le chej  
na'a, le chejzenle benne' wsedle  
chie' ka' da' ni, na' lezka' Bedw, na'  
ye'le légake': “Chej Jesusen' zga'ale'  
ka le' gan nbab Galilea. Yelé'elele-  
ne' ga na' kan ba gožkze' le'.”

**8** Naž bežójgake' ga na', na'  
bzónnjgake' žoa'a yežw ban' dan'

želzize' lo yela' zžebe chégake'. Bi bely'i'e no benne' da' ni dan' zžébel'e'gake'.

### Zloe'e law Jesús law Lia Madlen

(Jn. 20:11-18)

<sup>9</sup> Kate' bebán Jesusen' zildo' ža nežwn', bloe'e lawe' zga'ale law Lia Madlen, no'len' bebéj Jesusen' gaže be' xiwe' ka' wyo'e. <sup>10</sup> Wyéj Lian', na' bejenlen' benne' ka' wdálengake' Jesusen'. Benne' ki jez nak nyache' laže'e, na' zbéžgake'. <sup>11</sup> Kate' béngekle' kan nak da' bchalje', na' wnné' zoa nban Jesusen', na' blé'ekzele' Le', bi bejlé'gake' chie'.

### Chope benne' wsedle ka' che Jesús

želé'egekle' Le'

(Lk. 24:13-35)

<sup>12</sup> Wdé na', nžá'le bloe'e law Jesusen' lawgak chope benne' wsedle chie' ka', benne' yó'ogake' nez, na' zjake' gan nak nez yixe'. <sup>13</sup> Naž beyéjgake', na' bejzéngeklen' yezíka'gake', san bi bejlé'gake' xtíza'gake'.

### Da' bde Jesús lo na'gak benne' wbás chie' ka'

(Mt. 28:16-20; Lk. 24:36-49; Jn. 20:19-23)

<sup>14</sup> Kate' ze lawte, bloe'e law Jesusen' lawgak benne' chinéj,

benne' wbás chie' ka', kate' ne že'j žáwgake'. Bdile' légake' dan' bi žejlé'gake' chie', na' dan' nak zide yichj lázdo'gake', na' dan' bi bejlé'gake' xtíza'gak benne' ka' blé'egekle' Le' wdé bebane'. <sup>15</sup> Naž gože' légake', na' wnné':

—Le chej dot yežlyó nga, chejzénlele yógo'te benách diža' chawé' chian'. <sup>16</sup> Nóteteze benne' chejlí'e chia' neda', na' yezóe' nis, yelá bennen', san no benne' bi chejlí'e chia', ga'n dola' da' nbage'e. <sup>17</sup> Benne' ka' chejlé'gake' chia' neda' góngake' da' gak biá'gaken. Wkóngekle' žin la', na' yebéjgake' be' xiwe' ka' yo'ogak benách ka', na' wcháljgake' diža' yoble ka'. <sup>18</sup> Cha' góxwgake' bele snia ka' len ná'gake', o cha' yé'jgake' da' žoten benách, bi be gonen chégake'. Xoa ná'gake' benne' yižwé' ka', na' yeýaktegake'.

### Jesús žeyepe' ya'abá che Dios

(Lk. 24:50-53; Hch. 1:6-11)

<sup>19</sup> Kate' Xanžon' beyóž bcháljlene' légake' da' ki, Dios bechise' Le' ya'abá chie', gan wži'e kwit li ža che Dios. <sup>20</sup> Bžójgake' légake', na' bejzéngekle' benách yógo'te yež. Xanžon' góklenkze' légake', na' bie' légake' latje béngeake' da' jez nak bian' nak dot da' li da' zcháljgake'. Ka'kze naken.

# DIŽA' CHAWE' DA' BZOJ LUKAS

Diža' da' wló'o Lukas lo na' Teófilo

**1** Benne' zan ba ben byéngake' bzójgake' gaze lo den da' naken dot da' li, dan' goken gan zoažo,  
**2** káteze blé'egeklen' ža ni'te, na' bzéngeklen' žo'o, na' bzégake' diža' kan goken. **3** Žekla' neda' gaken chawe' wzoja' da' ki gaze lo den chio', Teófilo, benne' cháwe'do', dan' ba wdilja' binlo kan nak yógo'te dan' goken ža ni'te. **4** Zzoja' da' ni chio' nich nnezlo' nak dot da' li da' ba nsedlo'.

**Z**loe'el wbás che ya'abá kan galj  
**Z**wa, benne' yezóe' benách ka' nis  
**5** Ža ni'te katen' wnná bia' Herodes gan nbab Judea, wzóa to bxoz lie' Secría. Nbáblene' to kwe' bxoz, da' naken kwe' dan' znna bia' Abías. Lezka' Xbel, zo'le Secrían', nake' za'só Aarón, bennen' goke' bxoz blo nežw, na' benne' biche' Moisés.  
**6** Secrían' len Xbelén', zej nake' chawe' law Dios, na' dot láže'gake' žóngake' kan znna xtiža' Dios, na' lezka' da' bchi'le' Le'. Ki goken, bi gok nitó benne' nnie' chégake'. **7** Bi wzóa no xkwide' chégake', dan' nak Xbelén' no'le wbíz, na' žoptie' ba ngólgake'.

**8** Bžin byo' beyala' che kwe' bxoz ka' gan nbab Secrían' góngake' žin law Dios, lo yela' bxoz chégake'.  
**9** Kan žónete žongak bxoz ka', beyala' lo wláz Secrían' wyoé'e latje la'y che yodo' nich wzeye' yale zix law Xanžo Dios. **10** Kate' Secrían' ne zzeye' yalen', yógo'te benách ka' wnnít'a'gake' la' lí'ale, na' zcháljlengake' Dios. **11** La' na'ze bla' law to wbás che Xanžon' gan zoa Secrían', zie' chelá'a li ža che bkog la'y gan žey yalen'. **12** Katen' Secrían' blé'ele' wbás che ya'abán', gok zedle', na' bžebe'. **13** Naž wbasen' gože' Secrían', na' wnné':

—Secría, bi žebo'. Dios ba benle' da' znnablo'-ne', na' Xbel, no'le chion', soa to bi' byodo' chie', na' go'o labe' Zwa. **14** Gak yela' ba nez zen chio', na' yebéle'elo'. Benne' zan yebégekle' ni'a che xkwiden'. **15** Gakbe' zenle'e law Dios. Bi ye'jbe' xis uba, na' kege to da' žsožlen benách ka'. Dios Be' La'y yedjsóalene'-be' kate' ne yo'obe' lo le'e xna'be'. **16** Zwa ni gonbe' ga yeyakgak benne' zan, benne' Israel ka', che Xanžo Dios. **17** Lezka' cheje' zga'ale' ka Xanžon', na' Be' la'yen', na' yela' waken', da' ka' wnnít'a'lengaken Lías, bennen' bchalje' lo wláz

Dios že ni'te, sóalengaken le'. Ki gaken che Zwan' nich yerone' toze benne' jez nake' xa len zí'ngake' ka'. Wzejni'ile' benne' ka' zží'igake' che Dios, nich yeýákgake' benne' chawé ka', na' yesnisle' légake' nich gak ban láže'gake', na' gápegake' Xanžon' ba la'ne.

**18** Naž Secrían' wnnable' wbás che ya'abán', na' wnné':

—¿Bize gak bian' gakgak da' ki?  
Ba ngola' neda', na' lezka' ba ngol no'le chian'.

**19** Bechebe wbasen', na' wnné':

—Neda' lia' Gabriel. Žona' žin law Dios. Lekze' bsele'e neda' nich wcháljlene' le', na' wzenla' le' diža' chawé ni. **20** Na'a, dan' bi bejli'o da' goža' le', wkwežo', na' biž gak nnio' kate' gákžegak yógo'te da' ki, kate' žin ža.

**21** Xak gokgak da' ki, wnnítá'gak benne' ka' la lí'ale, želbeze' Secrían', na' žebángekle' dan' zžél-le'ele' lo latje la'yen'. **22** Kate' bežój Secrían', bi gok wcháljlene' légake', na' gókbe'egekle' ble'e dáwe'le' to da' bloe'el Dios le' lo latje la'yen'. Dan' bi gok nne Secrían', bloé'ezele' nich bzejni'ile' légake' dan' goken.

**23** Kate' bza'a ža ka' žala' gon Secrían' žin law Dios, naž beyeje' liže'. **24** Wdé že ka' wyó'o bi'do' lo le'e Xbel, zo'le Secrían', na' bga'ne' yo'oze gayo' byo'. Bsa' laže'e, **25** na' wnné':

—Xanžon' žone' chia' ki. Žonne' to xkwide' chia', na' žone' ga biž yedoe'ela' lawgak benách ka'.

**Wbás che ya'abán' zloe'ele'  
kan za' galj Jesús**

**26** Wdé xop byo', bla' law wbasen' che ya'abá, dan' bselá' Dios wbás

na'kze', Gabriel, nich cheje' lo yež Nasaret, dan' nbaben Galilea.

**27** Dios bsele'e le' ga na', nich chejcháljlene' to xkwide' no'le lebe' Lia. Lebe' ba bchebe láže'be' wchág ná'lenbe' to benne' byo lie' Jwsé. Le' nbabe' za'só Dabí, bennen' wnná bi'e benách Israel ka' že ni'te. **28** Kate' wyó'o Gabrielen' gan zoa Lian', gože'-be':

—Padiox. Dios že' laže'e le'. Xanžo Dios zóalene' le'. Lekze' žone' ga gakže chawé chio' ka gak chegak yógo'te no'le ka'.

**29** Kate' Lian' ble'elbe' wbás che ya'abán', wžé' zedlbe' ni'a che dan' bchaljen', na' bebanlbe' kan gože'-be'. **30** Naž wbasen' gože'-be', na' wnné':

—Lia, bi žebo', dan' Dios žon chawé'e le'. **31** Na'a, cho'o to bi'do' li'o, na' galj to xkwide' byodo' chio', na' go'o labe' Jesús. **32** Jesús ni golbe', na' gake' benne' blo, na' si' le' Zi'n Dios, Benne' žente. Xanžo Dios gone' ga nna bi'e kan ben Dabí, xa gole wdé che Jesusen', bennen' wnná bi'e že ni'te. **33** Jesusen' nna biá'teze' benne' Israel ka', na' yela' wnná bia' chien' batkle te chen.

**34** Naž Lian' wnnablbe' wbás che ya'abán', na' wnnabe':

—¿Nakxkze gak da' ki, dan' bi zóalena' benne' byo?

**35** Naž wbasen' gože'-be':

—Dios Be' La'y le'e gan zo', na' gone' ga yela' wak che Dios, Benne' žente, sóalenen le', na' gaken gan zo' ka to zoł da' zgo'o bejw. Che len bi' byodo' na', bi'don' žala' galjbe', cho'obe' lo na' Dios, na' si' labe' Zi'n Dios. **36** Lezka' Xbel, zi'n xa xto'o wdé, ba yo'o to bi' byodo' li'e la'kze

ba ngole'. Wnnégake' chie', na' wnnágake': "Nake' no'le wbíž" san ba zej xop byo' yo'o bi'don' li'e. <sup>37</sup> Bi be zoa da' bi gak gon Dios.

<sup>38</sup> Naž Lian' wnnabe':

—Nakkza' chie'. To chi'ize naka' wen žin che Xanžon'. Gak chia' kan bach wnnó' gon Dios chia' neda'.

Naž la' beza'te wbás che ya'abán' gan zoa Lian'.

### Lia zejwíabe' Xbel

<sup>39</sup> La' ža na'ze wyó'o Lia nez, na' taría taría wyejbe' gan nak law ya'ado' ka', na' bžinbe' to yež da' nbaben Judea. <sup>40</sup> Kate' bžinbe' ga na' wyo'obe' liž Secrían', na' gožbe' Xbelén: "Padiox."

<sup>41</sup> Kate' benle Xbelén' dan' wnná Lian', la' btate kwin bi'don' yo'obe' li'e, na' Dios Be' La'y bedjsóalene' le'. <sup>42</sup> Naž Xbelén' wnnié' zižje, na' wnné':

—Dios ba ben cháwe'že' le' ka yógo'te no'le ka', na' lezka' ben chawé'e bi'don' yo'obe' li'o.

<sup>43</sup> ¿Nozkze neda', dan' bla' xna' Xana' ga zoa' ni? <sup>44</sup> Katen' benla' dan' gožo' neda', lo yela' žebél chebe' la' btate kwin bi'don' yo'obe' li'a. <sup>45</sup> Ba nez zen naken chio' dan' bejl'i'o xtiža' wbás che ya'abán', na' gakkze kan gože' le' lo wláz Xanžon'.

<sup>46</sup> Naž Lian' wnnabe':

Dot laža'a zka'n zena' Xanžon',

<sup>47</sup> na' žebélenla' Dios, Benne' Weslá chian'.

<sup>48</sup> Dios na'kze be' laže'e neda'.

Yoa'a lo ne'e Le', na' to chi'ize naka' wen žin chie'.

Na'a so law, nnágake' chia':

"Ba nez zen naken che no'len!"

<sup>49</sup> Zenle'e nak da' ben Dios, Benne' zente, chia' neda'.

iGa'n zen La la'y chie'!

<sup>50</sup> Le' žeyache' láže'tezle' benne' ka' zžébegake' Le', na'a ža, na' to chi'ize.

<sup>51</sup> Da' zan yela' wak zen ka' ba bene' Le'.

Bzexjwe' benne' ka' bka'n zéngake' yela' žejn'il chégake'.

<sup>52</sup> Beké'e yela' wnná bia' chegak benne' blo ka', na' bene' ga zej nak blo benne' gaxjw láže' ka'.

<sup>53</sup> Bwawe' benne' ka' beldone', na' bka'ne' ka'ze benne' wnni'a ka'.

<sup>54</sup> Góklene' benne' Israel ka', benne' wen žin chie' ka', dan' be' laže'e légake', na' beyache' láže'le' légake'.

<sup>55</sup> Bene' da' bchebe laže'e chegak xa xtožo ka', dan' gone' chežo, dan' bchebe laže'e che Bran, na' chegak za'sóe' ka'.

<sup>56</sup> Lian' bgá'nlenbe' Xbelén' chonne byo', na' wdé na' beyejbe' ližbe'.

**Da' gok kate' golj Žwa, bennen' bezóe' benách ka' nis**

<sup>57</sup> Kate' bžin ža žala' soa xkwide' che Xbelén', golj to bi' byodo'.

<sup>58</sup> Benne' zjo'o li'a chie' ka' len lješe' ka', béngekle' kan Dios beyache' láže'le' le', na' bebélengekle' le'.

<sup>59</sup> Kate' ba gok xono' ža zoa xkwiden', bla'gak ljéžgake' ka' ga na' nich chóggake' lo bela' che bi' byodon' da' nak bian' nbabbe' che Dios, na' gónegekle' wzóagake' labe' Secría kan zoa la xabe'. <sup>60</sup> Naž bež'i Xbel, xna'be', na' wnné':

—O'o. Žwa si' labe'.

<sup>61</sup> Wnnábgekle' le', na' wnnágake': —¿Bíz chen'? Bi zoa nitó lježle, benne' lie' Žwa.

**62** Naž benne' ka' bлоé'ezegekle' nich nnábgekle' xabe' bize žénele' si' labe'. **63** Secrían' wnnabe' to blagdo', na' bzoje' lawn da' znnan: "Zwa si' labe!" Bebángekle' yógo'tegake'. **64** Ka' gaze la' beyájwte žoa'a Secrían', na' gok bechalje', na' bka'n zene' Dios. **65** Naž bebángekle yógo'te benne' zjo'o li'a chégake', na' wzé diža' kan gok da' ki yógo'te yeždo'zej nnitan' lawgak ya'ado' ka' gan nbab Judea. **66** Bza' láže'gak yógo'te benne' ka' katen' béngekle' kan goken, na' wnnágake': —čBízkzen' gon bi' byodon'? Da' likze Xanžon' zóalene'-be'.

### Da' bchalj Secría lo wláz Dios

**67** Naž Dios Be' La'y bedjsóalene' Secrían', xa Zwan', na' bchalje' lo wláz Dios, na' wnné':

**68** iGa'n zen Dios, Xangak benne' Israel ka', dan' bedjwíe' žo'o, benách chie', na' beya'we' žo'o!

**69** Bsele'e Benne' Weslá chežo ga zoažo ni, len yela' wak zen chie'. Nake' Xkwiden' za' goljbe' ládjwgak za'só Dabí, bennen' goke' wen žin che Dios ža ni'te.

**70** Ža ni'te bchebe láže'e gone' da' ki, dan' wnné' lo na'gak benne' ka' bcháljgake' lo wlaze' Le'.

**71** Bchebe láže'e yesl'é' žo'o lo na'gak benne' ka' zžá'agake' žo'o, na' lo na'gak benne' ka' bi zlé'gekle' žo'o chawé'.

**72** Bchebe láže'e yeyache' láže'le' Dabín', xa gole wdé chežon',

na' chejsá' laže'e da' bchebe laže'e, dan' naken la'y.

**73** Ben choche' xtiže'e, dan' bchebe laže'e gonen', dan' gože' Bran, xa gole wdé chežon', dan' naken to da' žala' gone' chežo žo'o.

**74** Bchebe laže'e yesl'é' žo'o lo na'gak benne' ka' bi zlé'gekle' žo'o chawé' nich biž žébežo gonžo xchine' Le',

**75** na' nich gakžo gaxjw láže', na' dot chawé' láwe' Le' yógo'te ža soažo nbanžo.

**76** Le', zí'na'do', si' lo' benne' zchalje' lo wláz Dios, Benne' zente, dan' chejo' le' zga'alo' ka Xanžon', na' gon chawo'o nez gan tie'.

**77** Wzejni'ilo' benách chie' ka' kan wak yelágake' na' kan yenít law Dios dola' da' jez nbage'e.

**78** Ki naken, Dios žeyache' láže'le' žo'o, na' gone' ga la' law Bennen' nakkze' baní' chežo.

**79** Lekze' wza'ni'e chegak benne' ka' nak chol yichj lázdo'gake', na' za' gátgake', nich yegoé' žo'o to nez gan ga'n chawé'zo.

**80** Bbole xkwide' byodon', na' gokbe' wale. Wzóazebe' gan nak latje dach kate' bžinže ža bla' lawbe' lawgak benne' Israel ka'.

### Da' goken katen' golj Jesús

(Mt. 1:18-25)

**2** La' ža na'ze Augusto, benne' Sésar, bchi'le' yógo'te benách

nnít'a'gake' yežlyó nga yéla'gake' le'e yich. <sup>2</sup>Kate' da' nežw byéla'gake' le'e yichen', wnná bia' to benne' lie' Sirenio gan nbab Siria. <sup>3</sup>Yógo'te benách ka' beyéjgake' yež che chégake' gan jez nbabe' nich yéla'gake' le'e yichen'. <sup>4</sup>Wzá' Jwsé lo yež Nasaret gan nbab Galilea, nich cheje' gan nbab Judea, na' bžine' lo yež Belén, gan golj Dabí ūn'i'te. Ki bene' dan' nbablen Jwsén' benne' ka' jez nake' za'só Dabín'. <sup>5</sup>Jwsén' wyeje' ga na' nich yéle' le'e yichen', tzen len Lian. Lian' nakbe' xkwide' no'len' ba bchebe láže'be' wchág ná'lenbe' Jwsén', na' za' galj bi'do' chebe'. <sup>6</sup>Kate' ne nnít'a'gake' lo yež Belén, bžin ūn' ūl'galj bi'do' cheben'. <sup>7</sup>Golj to bi' byodo', xkwide' nežw chie'. Bchele'-be' to láže'do', na' bdixjwe'-be' to lo yo'odo' gan žape chí'igake' da' žawgak bia ka' chegak benne' ka' yó'ogake' nez. Ki goken dan' bi bžel latje gan gá'ngake' lo yo'o gan želzín benne' ka' yó'ogake' nez.

### Zla' law wbás che ya'abá gan žape chí'igake' zila' ka'

<sup>8</sup>Gawze gan ū' yež Belén nnít'a'gak benne' ka' yixe', benne' žape chí'igake' zila' ka' žel. <sup>9</sup>La' bla' lawte to wbás che Xanžon' gan nnít'a'gake'. Wyó'o yela' baní' che Xanžon' gan nnít'a'gake', na' bžébegake'. <sup>10</sup>Naž wbás che ya'abán' gože' légake', na' wnné':

—Bi žébele. Na'a zzenla' le'e to da' gonen ga yebéle, na' yebélengeklen yógo'te benách.

<sup>11</sup>Na'a ba golj to bi' byodo' lo yež gan golj Dabí, na' gakbe' Benne' Weslá chele. Nake' benne' bsela'

Dios, na' nake' Xanžon'. <sup>12</sup>Da' ni gak bia'be' nich gónbia'le-be'. Yežel-lele-be', nželbe' láže'do', na' debe' to lo yo'odo' gan žape chí'igake' da' žawgak bia ka' chegak benne' ka' yó'ogake' nez.

<sup>13</sup>Gan wzóa wbás che ya'abán', ka' gaze bla' lawgak wbás zante che ya'abá che Dios, na' zka'n zéngake' Dios, na' wnnágake':

<sup>14</sup>iGa'n zen Dios, Bennen' zoe' ža'te! Gak da' wká'n chawen' benách yežlyó nga, benne' ka' Dios žaz laže'e légake'.

<sup>15</sup>Kate' beza'gak wbás che ya'abá ka' ga na', zeyéjgake' ya'abá, benne' ka' žape chí'igake' zila' ka' gož ljéžgake' toe' yetóe', na' wnnágake':

—Le cho'o lo yež Belén nich le'elžo cha' ba goken kan bzejní'il Xanžon' žo'o.

<sup>16</sup>Taría taría la' jaktie' ga na', na' bejxáka'gake' Lian' len Jwsén', na' xkwiden', bi'don' debe' to lo yo'odo' gan žape chí'igake' da' žawgak bia ka' chegak benne' ka' yó'ogake' nez.

<sup>17</sup>Kate' blé'egekle'-be', bžéngekle' légake' dan' wnná wbás che ya'abán', kan nak che xkwiden'. <sup>18</sup>Bebángekla yógo'te benne' bžéngekle' dan' wnnagak benne' ka' žape chí'igake' zila' ka'. <sup>19</sup>Lian' wlo'oze' da' ki lo yichj lázdá'we', na' blab laže'e kan zej naken. <sup>20</sup>Beyejgak benne' ka' žape chí'igake' zila' ka', zka'n zéngake', na' žoe láwgake' Dios ni'a che yógo'te dan' bžéngeklen', na' blé'egeklen', da' ka' gókgaken kan gož wbás che ya'abán' légake'.

### Zgó'ogake' xkwide' Jesús lo na' Dios

<sup>21</sup>Kate' ba gok xono' ža wzóa xkwide' Jesusen', belchoge' lo bela'

chebe' da' nak bian' nbabbe' che Dios, na' bzóagake' labe' Jesúš kan ba bzoakze wbás che ya'abán' labe' zga'ale kate' za' cho'obe' le'e xna'be'.

<sup>22</sup>Kate' bza'a ža che da' zpa' kwíngak no'le ka' za' bzóategake' bi'do' chégake' kan znna da' bchi'le Moisés, belchi'e xkwíde' Jesusen' lo yež Jerusalén nich kó'ogake'-be' lo na' Xanžo Dios. <sup>23</sup>Ki béngake', dan' nyejw lo da' bchi'le Xanžo Dios, dan' znnan: "Yógo'te bi' byodo', bi' nežw che xna'be', žala' kwéjgake'-be' cheze che Xanžo Dios." <sup>24</sup>Che len jake' ga na' nich gótgake' chope sintr gog, o chope plomdo' ka', na' kó'ogake'-ba' law Dios, kan znna xtiža' Xanžo Dios.

<sup>25</sup>Ža na'ze zoa to benne' lie' Smon lo yež Jerusalén, bennen' nake' chawe', na' žejl'i e che Dios. Zbeze' Bennen' sel'a' Dios, Bennen' gon chawe'e benách Israel ka'. Dios Be' La'y zóalene' Smon na', <sup>26</sup>na' ba bloe'ele' le' bi gatzie' kate' l'é'ezele' Benne' Criston', Bennen' sel'a' Xanžo Dios. <sup>27</sup>Bžin Smon na' lo zchil yodo' dan' bche' Dios Be' La'y le' ga na'. Katen' xa xna' xkwíde' Jesusen' belchi'e-be' lo zchil yodo' nich gótgake' chebe' kan znna xtiža' Dios, <sup>28</sup>Smon na' wdele'-be', na' bka'n zene' Dios, na' wnné':

<sup>29</sup>Xan, na'a wak gonnō' neda' latje gata',  
na' ga'n ži yichj lázda'wa',  
dan' ba gok dan' gožo' neda',  
wen žin chio'.

<sup>30</sup>Ba ble'ela' bi'don' bzoakzo' Le',  
bi'don' gakbe' Bennen' yeslē'  
benách ka',

<sup>31</sup>Bennen' wloe'elo' law lawgak yógo'te benách ka'.

<sup>32</sup>Nakbe' baní' dan' wza'nín' chegak benne' zi'to' ka', na' lezka' baní' chegak benách chio', benne' Israel ka'.

<sup>33</sup>Bebanle Jwsén' len Lian', xna' xkwíde' Jesusen', kan nak dan' wnná Smon na' kan nak chebe'.

<sup>34</sup>Smon na' wnnable' Dios gon chawe'e lágake', na' gože' Lian', xna' Jesusen', na' wnné':

—Bwia nga. Dios bzoe' Xkwíde' ni nich gakbe' da' gonen ga chix láže'gkak chawe' benne' zan, na' gonbe' ga yeyakgak chawe' benne' zan ládjwgak benách Israel. Gakbe' to da' gak bian', na' benách ka' nnégake' chebe'. <sup>35</sup>Gaken ki nich la' law dan' zza' láže'gak benne' zan. Da' ki gaken chio' ka to ya ntoche' da' chazen lazdo'o.

<sup>36</sup>Lezka' Ana, to no'le zchalje' lo wláz Dios, wzóe' ga na'. Nake' zi'n Fanuel, to benne' nbabe' za'só bennen' lie' Aser, zi'n Israel. Ana na' wzóalene' benne' byo chie' gaže yiz wdé goke' xkwíde' no'le, na' ba ngól-li'e. <sup>37</sup>Got benne' byo che Anan', na' bga'ne' wzebe na' zejte ba zeje' tapalaj tapiz. Bi žežoje' gan nak zchil yodon'. Dot ža dot yele, zka'n zene' Dios, na' zone' wbás, na' zcháljlene' Dios. <sup>38</sup>La' na'ze ble'e ga na', na' gože' Dios: "Žóxkeno'." Bzejni'ile' yógo'te benách kan nak che xkwíde' Jesusen', benne' ka' nnít'a'gake' lo yež Jerusalén, na' želbeze' ža la' Bennen' sel'a' Dios nich gon chawe'e benách chie' ka'.

Jwsé len Lia zeyéjgake'  
lo yež Nasaret

<sup>39</sup>Wdé ben Jwsén' len Lian'  
yógo'te dan' znna xtiža' Xanžo Dios,

beyéjgake' lážgake', yež Nasaret gan nbab Galilea. **40** Bbole xkwide' Jesusen', na' gokbe' choch. Góta'že yela' žejni'il chebe', na' zen nak da' wlóo Dios lo yichj lázdo'be'.

### Žežín xkwide' Jesús zchil yodo'

**41** Twiz twiz žjak xa xna' Jesusen' lo yež Jerusalén katen' žak Lni Pasko', kate' žejsá' láže'gak benne' judío ka' kan ben Dios, katen' beslé xa wdé chégake' lo yežlyó Egipto. **42** Kate' xkwide' Jesusen' ba zejbe' chežinno yiz, jake' lo yež Jerusalén kan žónteze žóngake' kate' žak lni na'. **43** Kate' wdé lnin', zezá'gake', na' xkwide' Jesusen' nga'nbe' lo yež Jerusalén, san Jwsén' len Lian', xna' Jesusen', bi gókbe'egeklen'. **44** Žékgakle' zeyo'obe' ladjw benne' zan ka', benne' zesa'kłene' légake', na' che len to ža besa'ke'. Naž beyílgake'-be' gan zej nnita' ljéžgake', na' gan zej nnita' benne' ka' zej nónbi'e, **45** na' bi bežélgekle'-be'. Che len beyéjgake' lo yež Jerusalén, na' beyílgake'-be' ga na'.

**46** Ža chonnie ža, bežélgekle'-be' gan nak to lo zchil yodo', že'be' ládžwgak benne' yodo' wsedle ka', na' zze nagbe' dan' žsédgakle', na' znnablbe' légake' da' zan. **47** Bebángakle yógo'te benne' béngekle' dan' bchaljbe' len yela' žejni'il chebe', na' kan nak dan' bechebbe'. **48** Kate' xa xna'be' blé'egekle'-be', bebángekle'. Xna'be' gože'-be', na' wnné':

—Zi'na', čižiž chen' beno' ki len neto'? Wžé' zedlto', na' beyiljto' le', neda' len xon'.

**49** Naž Jesusen' gožbe' légake', na' wnnabe':

—čižiž chen' beyiljle neda'? Bi nnézlele žon byenen we' laža'a da' naken che Xa'?

**50** Bi bejn'i gekle xa xna'be' dan' gožbe' légake'.

**51** Jesusen' beyéjlenbe' légake', na' bežinbe' lo yež Nasaret. Benbe' kan znnna xtíža'gak xa xna'be'. Lia, xna' Jesusen', wló' cháwe'ze' yógo'te da' ki lo yichj lázda'we'. **52** Góta'že yela' žejni'il che xkwide' Jesusen', na' bglolbe'. Bežojobe' chawe' law Dios, na' lawgak benách ka'.

### Da' bchalj Zwa, benne' bezóe' benách ka' nis

(Mt. 3:1-12; Mr. 1:1-8; Jn. 1:19-28)

**3** Kate' ba zej chi yiz znnna bia' Tiberio, benne' Sésar, dot yežlyó nga, znnna bia' Ponsio Pilato gan nbab Judea, na' Herodes znnna bi'e gan nbab Galilea, na' Lip, biche' Herodes na', znnna bi'e gan nbab Iturea, na' gan nbab Trakonite, na' bennen' lie' Lisania znnna bi'e gan nbab Abilinia. **2** Kate' ža ka' Anás len Kaifás, zej nake' bxoz blo ka', na' la' na'ze Dios bchaljlene' Zwa, zi'n Secría, kate' ne zoa Zwan' lo latje dach. **3** Wdá Zwan' do zente žoa'a yego Jordán, na' bchalje' kan žala' yezoagak benách ka'nis, benne' ka' žeýát láže'gake' nich yenít law Dios dola' da' zej nbage'e. **4** Gok da' ki kan nyejw le'e yich la'y, dan' wnná Isaías, benne' bchalje' lo wláz Dios ža ni'te, dan' znnan:

Benle chi'i to benne' wnnié' zižje lo latje dach, wnné':

“Le wpá' nez nich žin Xanžo Dios gan zoale.

Le yebéj li nez las ka' gan tie'.

**5** Le yeschá' yógo'te gan zej že' bloj ka'.

Le gon lache' yógo'te ya'a sibe  
ka', na' ya'ado' ka'.

Le yebéj li nez legw ka',  
na' le gon chawe' nez yej ka'.

<sup>6</sup> Yógo'te benách lē'egekle' bennen'  
selā' Dios, bennen' yeslē' lēgake'."

<sup>7</sup> Kate' bžojgak benne' zan lo yež  
ka' nich yezóagake' nis lo na' Zwan',  
le' gože' lēgake', na' wnné':

—Le'e, lježgak bele snia ka'. <sup>8</sup>Cheze  
chen' ženelele yezoale nis? <sup>9</sup>Zoa no  
benne' gože' le'e bi chog Dios chele  
gatle cha' yezoale nis? <sup>8</sup>Na'a, le gon  
da' gak bian' ba beyát láže'le, na' bi sa'  
láže'le, bi nnale: "Dios bi choge' cheto'  
gatto' dan' nakto' za'só Bran" dan' žapa'  
le'e, gak Dios ke'e yej ki, na' gone' ga  
yeyákgaken za'só Bran na'. <sup>9</sup>Nakle ka  
yag ka'. Ba zbez ya wage nich chogen  
yag ka'. Bíteteze yag da' bi zbian da' zix  
chen, chóggaken', na' wzéygaken' lo yi'.

<sup>10</sup>Naž benách ka' nníta'gake' ga na'  
wnnábgekle' le', na' wnnágake':

—čNakxkze gonto'?

<sup>11</sup>Bechebe Zwan', na' gože' lēgake':

—No benne' de chope ze' žala'  
wnežjwe' ton che no benne' bi de  
chie'. No benne' de da' žawe', ležka'  
žala' chisen' chegak benne' ka' bi de  
da' gáwgake'.

<sup>12</sup>Ležka' bale benne' wechizjw ka',  
benne' zchízjwgake' benách ka' lo  
wláz yež zi'to', bžíngake' ga na' nich  
yezóagake' nis. Wnnábgekle' le', na'  
wnnágake':

—Benne' wsedle, čbiž žala' gonto'  
neto'?

<sup>13</sup>Zwan' gože' lēgake':

—Bi wchízjwžele kan wnná benne'  
znna bi'e le'e.

<sup>14</sup>Ležka' bale benne' žjake'  
lo wdile wnnábgekle' le', na'  
wnnágake':

—čCheze neto', biž žala' gonto'?

Zwan' gože' lēgake':

—Biž wcheble nitó benne' nich  
ka'le bi da' de chie'. Biž nnale  
chegak benách ka' da' wen laže'  
nich gonle ga chízjwgake' le'e, san  
le chaz laže' ka da' názjwle.

<sup>15</sup>Ležka' benne' ka' želbeze'  
Bennen' selā' Dios, wnníta'gake' ga  
na', na' ūsa' láže'gake' cha' nak Zwan'  
Benne' Criston'. <sup>16</sup>Bechebe Zwan',  
na' gože' yógo'tegake', na' wnné':

—Da' li neda' žezoa' le'e nis, da'  
zloe'elen nakle ka benne' ka' ba  
gótgake', na' zej nzi'e yela' nban da'  
yoble, san za' Bennen' wchize' le'e  
Dios Be' La'y, na' da' naken yi' chie',  
na' Dios Be' La'y na' gonne' le'e yela'  
nban da' zejlí kanne. Bennen' ze'e  
napže' yela' wnná bia' ka neda', na'  
neda' bi naka' zi kweja' zele'. <sup>17</sup>Noxe'  
da' žzen yi' chie', na' wlobe' zoa'  
stribre chie', dan' zloe'elen kan gaken  
chegak benách ka'. Wtobe' zoa'  
striben', na' ko'o chawen', san bebe  
chen wzeyen' lo yi' da' batkle yolen.

<sup>18</sup>Kan zej nak diža' ki, na' yebale  
diža' zan bzejni'ile' benách ka',  
na' bzenle' lēgake' diža' chawen'.

<sup>19</sup>Zwan' bdil diže'e Herodes, benne'  
wnná bia', dan' zóalene' Herodías,  
zo'le Lip, benne' biche'e, na' dan'  
žone' da' zan da' kegle. <sup>20</sup>Naž ben  
Herodes na' to da' kegle da' zenže,  
bsejwe' Zwan' liž ya.

### Žezoa Jesús nis

(Mt. 3:13-17; Mr. 1:9-11)

<sup>21</sup>Kate' ža ka' kate' bi na' nyejw  
Zwan' liž ya, na' žezóe' benách ka'  
nis, ležka' bezóe' Jesusen' nis. Kate'  
Jesusen' ne zcháljlene' Dios, wyaljw  
ya'abá, <sup>22</sup>na' bla' law Dios Be' La'y.

Znne'e ka to plomdo', bian' betjba',  
 na' bžinba' gan zoa Jesusen'. Benle'  
 chi'i to Benne' zchalje' ya'abá che  
 Dios, na' wnné':

—Le' nako' Zi'na'. Nži'ilala' Le', na'  
 žaz laža'a Le'.

**Kanzej nak xa xna' wdé ka' che  
 Jesús  
 (Mt. 1:1-17)**

**23** Katen' Jesusen' wzó lawe' žone'  
 xchin Dios, zeje' Le' ka chi žoa yiz.  
 Žékgekle benách nake' zi'n Jwsé.  
 Jesusen' nake' za'só Elí.

Bennen' nake' xa Lia, xna'  
 Jesusen'.

**24** Elí na' goke' zi'n Matat.

Bennen' goke' zi'n Lebí.  
 Bennen' goke' zi'n Melki.  
 Bennen' goke' zi'n Jana.  
 Bennen' goke' zi'n yetó Jwsé.

**25** Jwsé ni goke' zi'n Matatías.

Bennen' goke' zi'n Amós.  
 Bennen' goke' zi'n Nahum.  
 Bennen' goke' zi'n Esli.  
 Bennen' goke' zi'n Nagai.

**26** Nagai na' goke' zi'n Maat.

Bennen' goke' zi'n yetó Matatías.  
 Bennen' goke' zi'n Semei.  
 Bennen' goke' zi'n yetó Jwsé.  
 Bennen' goke' zi'n Judá.

**27** Judá na' goke' zi'n Joana.

Bennen' goke' zi'n Resa.  
 Bennen' goke' zi'n Sorobabel.  
 Bennen' goke' zi'n Salatiel.  
 Bennen' goke' zi'n Neri.

**28** Neri na' goke' zi'n yetó Melki.

Bennen' goke' zi'n Adi.  
 Bennen' goke' zi'n Kosam.  
 Bennen' goke' zi'n Elmodam.  
 Bennen' goke' zi'n Er.

**29** Er na' goke' zi'n Josué.

Bennen' goke' zi'n Elieser.

Bennen' goke' zi'n Jorim.

Bennen' goke' zi'n yetó Matat.

**30** Matat na' goke' zi'n Lebí.

Bennen' goke' zi'n Smon.

Bennen' goke' zi'n Judá.

Bennen' goke' zi'n yetó Jwsé.

Bennen' goke' zi'n Jonán.

Bennen' goke' zi'n Eliakim.

**31** Eliakim na' goke' zi'n Melea.

Bennen' goke' zi'n Mainán.

Bennen' goke' zi'n Matata.

Bennen' goke' zi'n Natán.

**32** Natán na' goke' zi'n Dabí.

Bennen' goke' zi'n Isaí.

Bennen' goke' zi'n Obed.

Bennen' goke' zi'n Boos.

Bennen' goke' zi'n Salmón.

Bennen' goke' zi'n Naasón.

**33** Naasón na' goke' zi'n Aminadab.

Bennen' goke' zi'n Aram.

Bennen' goke' zi'n Esrom.

Bennen' goke' zi'n Fares.

Bennen' goke' zi'n yetó Judá.

**34** Judá na' goke' zi'n Jakob.

Bennen' goke' zi'n Isaak.

Bennen' goke' zi'n Bran.

Bennen' goke' zi'n Taré.

Bennen' goke' zi'n Nakor.

**35** Nakor na' goke' zi'n Serug.

Bennen' goke' zi'n Ragau.

Bennen' goke' zi'n Peleg.

Bennen' goke' zi'n Heber.

Bennen' goke' zi'n Sala.

**36** Sala na' goke' zi'n Cainán.

Bennen' goke' zi'n Arfaxad.

Bennen' goke' zi'n Sem.

Bennen' goke' zi'n Noé.

Bennen' goke' zi'n Lamek.

**37** Lamek na' goke' zi'n Matusalén.

Bennen' goke' zi'n Enok.

Bennen' goke' zi'n Jared.

Bennen' goke' zi'n Mahalalel.

Bennen' goke' zi'n yetó Cainán.

**38** Kainán na' goke' zi'n Enós.  
 Bennen' goke' zi'n Set.  
 Bennen' goke' zi'n Adán.  
 Bennen' goke' ka zi'nkze Dios.

**Gónele da' xiwe' gonen ga baga'**  
**Jesús dola'**

(Mt. 4:11; Mr. 1:12-13)

**4** Bezá' Jesusen' žoa'a yego  
 Jordán, zoalen Dios Be' La'y  
Le', na' de chgi' bchi'e Jesusen' lo  
 latje dach. **2** Wzóe' ga na' choplalj ža,  
 na' gónele da' xiwe' gonen ga baga'  
 Jesusen' dola'. Bi be bdaw Jesusen'  
 ža ka', na' wdé na' wdone!. **3** Naž da'  
 xiwen' gožen Jesusen', na' wnnán:  
 —Cha' nakkzo' Le' Zi'n Dios, wnná  
 yeýák yej ni yet xtil.  
**4** Bechebe Jesusen', na' gožen':  
 —Nyejw le'e yich da' znnan:

“Kégeze len yet xtil zej nban benách  
 ka', san lezka' zej nbánlene' yógo'te  
 xtiža' Dios.”

**5** Naž da' xiwen' bchen' Jesusen' gan  
 nak to law ya'a sibe. To chíido'ze  
 bloe'elen Le' yógo'te latje gan znnan  
 bia'gak benne' ka' dot yežlyó nga. **6** Naž  
 da' xiwen' gožen Jesusen', na' wnnán:

—Yógo'te latje chegak benne'  
 wnná bia' ka', na' yela' wnni'a  
 chégake', gonnan' chio', dan' yo'o  
lo na'a yógo'te da' ki, na' no benne'  
 žénela' wnejzwa' da' ka' chie'. **7** Cha'  
Le' wzóa zibo' lawa', na' wkán' zeno'  
 neda', yógo'te da' ki gaken chio'.

**8** Naž Jesusen' gožen':

—Kwas na'le, da' xiwe', dan' nyejw  
le'e yich la'y dan' žen' neto', dan'  
 znnan: “Xano' Dios wkán' zeno', na'  
 toze Le' gono' xchine'.”

**9** Naž da' xiwen' bchen' Jesusen' lo  
 yež Jerusalén, na' bžian Le' yichjo'o  
 yodo', na' gožen Le':

—Cha' nakkzo' Le' Zi'n Dios, bexite'  
 ga ni **10** dan' nyejw le'e yich la'y da'  
 znnan:

Dios sele'e wbás che ya'abá ka',  
 na' gáklengake' Le'.

**11** Len nágake' góxwgake' Le'  
 nich bi chejchego'o yej, na' bi  
 gak zi' ni'o.

**12** Naž Jesusen' gožen':

—Nyejw le'e yich la'y da' žen' neto':  
 “Bi wkonlo' žin Xano' Dios.”

**13** Kate' da' xiwen' bi bžel-len yetó  
 da' gonen ga baga' Jesusen' dola', na'  
 bebigan' gan zoe' to chi'ido'.

**Zzo law Jesús žone' xchine' gan nbab**  
**Galilea**

(Mt. 4:12-17; Mr. 1:14-15)

**14** Beyéj Jesusen' gan nbab Galilea,  
 na' nzi' lo ne'e yela' wak che Dios  
 Be' La'y. Wzé diža' kan nak chie',  
 na' benách ka' nníta'gake' yógo'te  
 yež dot gawze ga na' béngeklen'.

**15** Jesusen' bsedle' benách ka' gan  
 nak lo yo'o ka' gan zdobgak benne'  
 judío ka' nich yéngakle' xtiža' Dios,  
 na' yógo'te benách ka' wdápegake'  
Le' ba la'ne.

**Da' ben Jesús lo yež Nasaret, dan'**  
**naken laže'**

(Mt. 13:53-58; Mr. 6:1-6)

**16** Naž bežín Jesusen' lo yež Nasaret  
 gan bgole'. Kate' bžin ža la'y chegak  
 benne' judío ka', na' kan žóneteze žon  
 Jesusen', wyo'é lo yo'o gan zdobgak  
 benne' judío ka' nich yéngakle' xtiža' Dios,  
 na' wzíe' nich gole' to da' nyejw  
le'e yich la'y. **17** Bdégake' yichen' lo  
 na' Jesusen' gan nyejw da' wnná  
 Isaías, bennen' bchalje' lo wláz Dios  
 ža ni'te. Kate' bsaljwe' yichen', bežel-  
 le' gan nyejw da' znnan:

<sup>18</sup> Zoalen Be' La'y che Xanžon'  
neda'  
dan' wleje' neda' cheze'  
nich wzenla' benách yache' ka'  
diža' chawe'.  
Bsele'e neda' nich yeyona' benne'  
ka' žak zi' lázdo'gake',  
na' nich wzenla' benne' ka'zej  
nake' ka benne'zej nžeje' ni'a  
che dola' da' nbága'gake', kan  
gak yelágake',  
na' nich yeyona' benne' lo chole  
ka',  
na' nich yeslá' benne' ka' ūsaka'  
zi'gak benách ka' légake',  
<sup>19</sup> na' nich wzia' diža' che ža  
gaklen Xanžo Dios benách ka'.  
<sup>20</sup> Naž Jesusen' betobe' yichen',  
na' bedién' lo na' bennen' žape  
chi'e yiche la'y ka', na' bebi'e. Naž  
yógo'te benne'zej ndobe' lo yo'on',  
belwíe' Jesusen'. <sup>21</sup> Wzó law Jesusen'  
žchalje', na' gože' légake':  
—Na'a ža ni zoale le'e, ba bžinkze  
dan' nyejw le'e yichen'.  
<sup>22</sup> Yógo'tegake' wnné cháwe'gake'  
chie', na' bebángekle' kan nak diža'  
chawen' da' žchalje', na' wnnágake':  
—Kege benne' ni zi'n Jwsé?  
<sup>23</sup> Naž Jesusen' gože' légake', na'  
wnné':  
—Ye'le neda' da' znnan: "Le', benne'  
žeyón benách ka', beyón kwino."  
Lezka' ye'le neda': "Da' ka' benlto'  
beno' Le' lo yež Kapernaum, lezka'  
ben ga ni naken lažo'."  
<sup>24</sup> Lezka' wnná Jesusen':  
—Da' li žapa' le'e, cha' zoa no  
benne' žchalje' lo wláz Dios, benne'  
wláz chie' ka' bi žápegake' le' ba  
la'ne. <sup>25</sup> Da' li žapa' le'e, wnnít'a'gak  
no'le wzebe zan ža ni'te gan nbab  
Israel, ža ka' wzó Lás, bennen'

bchalje' lo wláz Dios. Kate' ža ka'  
bi gok yejw chonn yiz yo'o gachje,  
na' gok wbín lo yežlyón'. <sup>26</sup> Dios bi  
bsele'e Lásen' gan zej nnita' no'le  
wzebe ka' wnnít'a'gake' gan nbab  
Israel, san bsele'e le' gan zoa to  
no'le wzebe lo yež Sarepta, da'  
nbaben yež Sidón, to yež zi'to'.

<sup>27</sup> Lezka', wnnít'a'gak benne' zan  
ža ni'te gan nbab Israel, benne' ka'  
wdá'gake' yižwé' leže ža ka' wzó  
Eliseo, bennen' bchalje' lo wláz  
Dios. Bi beyák nitó benne' ki ladjw  
benách Israel ka', san beyák toze  
Naamán, benne' zi'to' wbabe' lo  
yežlyó Siria.

<sup>28</sup> Kate' béngekle benne' ka' da'  
ni, benne' wnnít'a'gake' lo yo'o gan  
zdóbgake' nich yéngekle' xtiža' Dios,  
na' bžá'agake'. <sup>29</sup> Naž la' wzó žá'tegake',  
na' bebéjgake' Jesusen' žoa'a yež na'le.  
Belchi'e Le' gan nak le'e ya'a yej gan že'  
lážgake' nich wzíxjgake' Le' gan nak  
le'e ya'a yej na'. <sup>30</sup> Wdé Jesusen' gachje  
láwe'le gan nnít'a'gake', na' la' beyejtie'.

**Žeyón Jesús to benne' yoe'e be' xiwe'**  
(Mr. 1:21-28)

<sup>31</sup> Naž wyéj Jesusen' lo yež  
Kapernaum gan nbab Galilea, gan  
bsedle' benách ka' kate' nak ža  
la'y ka' chegak benne' judío ka'.

<sup>32</sup> Bebángekle' kan nak dan' žsedle  
Jesusen' légake', dan' žchalje' ka to  
benne' de lo ne'e yežla' wnná bia'.

<sup>33</sup> Lezka' zoa to benne' yoe'e be'  
xiwe' lo yo'o gan zdóbgake' nich  
yéngekle' xtiža' Dios, na' wnníe'  
zižje, <sup>34</sup> na' wnné':

—Bsan neto'. ¿Biz nbága'to' chio',  
Jesús, benne' Nasaret? ¿Zo'o nga  
nich wzia' yi'o neto'? Nónbia'to' Le'  
No nako'. Benne' la'y che Dios nako'.

**35** Naž Jesusen' bdile' be' xiwen', na' gožen':

—Žize wzóa, na' bežój lo bennen'.

Naž be' xiwen' wžo'nen bennen' lo yo lawgak benne' ka' nníta'gake' ga na', na' la' bežojten lo bennen', san biž bi benen len le'. **36** Bebángekle' yógo'tegake', na' bchaljlen ljéžgake', na' wnnágake':

—čBiz diža' ni dan' zchaljen'?

Len yela' wnná bia', na' yela' wak zen zdile' be' xiwe' ka', na' la' žežójtegaken.

**37** Wzé diža' che da' žon Jesusen', na' béngekle benách nníta'gake' yógo'te yež zej žen' dot gawze.

**Jesús žeyone' xna' zo'le Smon, bennen' lezka' lie' Bedw**

(Mt. 8:14-15; Mr. 1:29-31)

**38** Naž Jesusen' la' wzó ūa'tie', na' bežoje' lo yo'o gan zdóbgake' nich yéngakle' xtiža' Dios, na' wyoé'e liž Smon. Zoa xna' zo'le Smon ga na', na' yoe'e da' la'. Góta'yoegakle' Jesusen' yeyone' le'. **39** Wbiga' Jesusen' gan die', na' bliže' da' la' da' yoe'e. La' bežojten. No'len' la' wyastie', na' bsíni'e da' bdáwgake'.

**Jesús žeyone' benne' zan, benne' yižwé' ka'**

(Mt. 8:16-17; Mr. 1:32-34)

**40** Kate' ba ben wbíž ūa' la'y na', bžingak yógo'te benne' zóalengak benne' yižwé' ka' légake', benne' ka' zej de'e yižwé' ka' che chégake'. Bedjwágake' benne' yižwé' ka' gan zoa Jesusen', na' Le' bxoa ne'e légake', na' beyone' légake'. **41** Lezka' bežojgak be' zan, be' xiwe' ka' yo'logak benách yižwé' ka'. Belbéžeya'a be' xiwe' ka', na' wnnágaken:

—Le' nako' Zi'n Dios.

Naž Jesusen' bdile' be' xiwe' ka', na' bi bi'e latje nnégañen, dan' nnézgeklen nake' Le' Benne' Criston'.

### **Zchalj Jesús diža' chawe' gan nbab Galilea**

(Mr. 1:35-39)

**42** Kate' za' ūa'ní' yetó ūa, bžoj Jesusen' lo yež Kapernaum, na' wyeje' to latje dach. Benne' zan beyílgake' Le'. Kate' bžíngake' gan zoe', gónegekle' wséjwgake' xneze', nich bi yeze'e gan nníta'gake'. **43** Naž Jesusen' gože' légake', na' wnné':

—Žon byenen cha'a gan zej nnita' yezika' yež ka', nich wchalja' diža' chawe' ga na' kan gak chó'ogake' gan znna bia' Dios. Che len bsele'e nedá' nga.

**44** Ki goken, bchalje' diža' chawen' lo yež ka' gan nbab Galilea, na' gan nak lo yo'o ka' gan želyenle benne' judío ka' xtiža' Dios.

### **Želzene' bel zan**

(Mt. 4:18-22; Mr. 1:16-20)

**5** Kate' ne zoa Jesusen' ūa'a nisdo', dan' nzin' Jenesaret, bdobgak benne' zan dot kwite', nich yéngakle' xtiža' Dios. **2** Naž Jesusen' ble'ele' chope barkw zóagaken lawe' nisdon' gan nak gawze gan de yo biž, na' benne' wzén bel ka' zej nžoje' lo barkw ka', na' žeyíbgake' yixjw bel chégake'. **3** Wžén Jesusen' to lo barkwn', dan' naken che Smon Bedw, na' wnnable' le' kweken' yeláte'do' zí'tole' gan de yo bižen'. Naž Jesusen' wži'e lo barkwn', na' že'ze' ka', bsedle' benne' zan ka' nníta'gake' lo yo bižen'. **4** Kate' beyóž bchalj Jesusen', naž gože' Smon, na' wnné':

—Bsa' barkw ni lo nisdo' gan že' zilen, na' le wzala' yixjw bel chele, na' senle bel ka'.

**5** Beží'i Smon na', na' gože' Jesusen':

—Benne' wsedle, dot yele ba bento' žin, na' nitó bel bi na' sento', san len diža' chio' wzala'to' yixjwn'.

**6** Kate' bzala'gake' yixjwn', wzéngake' bel zan, na' ba žekte žeza' yixjwn'. **7** Naž blížgake' ljéžgake' ka', benne' ka' nnita'gake' yetó lo barkwn' nich yídgake', na' gáklengake' légake'. Katen' bžíngake' ga na', beschágake' žopte barkw ka' len bel ka', na' ba žek lo'jgak barkw ka' lo nisle. **8** Kate' Smon Bedw ble'elen', naž bzoa zibe' law Jesusen', na' wnné':

—Kwas len neda', Xan, dan' naka' benne' dola'.

**9** Ki wnné' dan' zžebe Bedon' ni'a chegak bel zan ka', na' lezka' goken chegak benne' ka' žónlengake' le' tzen. **10** Lezka' bžébegak Jakob len Zwa, benne' ka'zej nake' zi'n Sebedeo, na'zej nake' ljež Smon Bedon'. Naž Jesusen' gože' Smon na', na' wnné':

—Bi žebo'. Na'a so lawo' yedjó'o benách ka' nich gákgake' chia', gono' kan žono' zzeno' bel ka'.

**11** Kate' ba besá'gake' barkw ka' gan nak yo bižen', belka'ne' yógo'ten ga na', na' jáklengake' Jesusen'.

### Jesús žeyone' to benne' de'e yižwé' ležé

(Mt. 8:1-4; Mr. 1:40-45)

**12** Kate' wzóa Jesusen' to yež, bžin to benne' de'e yižwé' ležé gan zoe'. Katen' ble'ele' Jesusen', byechwe' lo yote, na' góta'yoele' Le', na' wnné':

—Xan, cha' žénelo', wak yeyono' neda'.

**13** Naž Jesusen' bli ne'e, na' wdane' le'. Gože' le':

—Žénela!. Yeyako' chawe'.

La' bebižte yižwé' ležé da' wdá' bennen'. **14** Naž Jesusen' gože' le' bi wzenle' nitó benne' kan bene'. Gože' le':

—Wyéj, bejloé'el kwino' law bxoz, na' bejnezjw che da' žeyón le' chawe' che yodo' kan znna xtiža' Moisés, dan' wloe'elen légake' ba beyako'.

**15** Wzéle'e diža' che yela' wak che Jesusen', na' bdobgak benne' zan gan zoe' Le' nich yéngakle' xtiže'e, na' nich yeyone' légake', na' yeké'e yižwé' chégake'. **16** Naž Jesusen' bezé'e ga na', na' wyeje' to latje dach, gan bcháljlene' Dios.

### Jesús žeyone' to benne' bi žak se'e (Mt. 9:1-8; Mr. 2:1-12)

**17** Yetó ža, kate' ne žsedle Jesusen' benách ka', že'gak benne' yodo' fariseo ka' len benne' yodo' wsedle ka', ga na'. Zej nnita' benne' ka' ga na', benne' zej nžoje' yógo'te yež gan nbab Galilea, na' gan nbab Judea, na' lo yež Jerusalén. Nak bia' de lo na' Jesusen' yela' wak che Xanžo Dios dan' žeyone' benne' yižwé' ka'.

**18** Naž benne' ka'zej noe'e to da' del to benne' bi žak se'e bžíngake' ga na', na' wdíljgake' nakze góngake' nich kó'ogake' le' lo yo'o, na' chíxjwgake' le' law Jesusen'. **19** Kate' bi bžélgekle' nakze góngaken' dan' zej nnita' benách zan ga na', naž wžéngake' yichjo'o yo'on', na' bsáljwgake' yichjo'on'. Btínnegake' dan' del benne' yižwén', na' belyíxjwe' le' gachje láwe'ljak benách ka', gan

nak law Jesusen'. <sup>20</sup>Kate' gókbe'ele Jesusen' kan žejlē'gake' chie', gože' benne' yižwén':

—Benne', ba benít lawa' dola' da' nbago'o.

<sup>21</sup>Naž wzó law zza' láže'gak benne' yodo' wsedle ka' len benne' yodo' fariseo ka', na' wnnágake':

—Benne' ni znne' da' zzoan Dios chela'ale. ¿Nozkze benne' gak yenít lawe' dola'? Toze Dios gak yenít lawe' dola'.

<sup>22</sup>Žákbe'ele Jesusen' dan' zza' láže'gake', na' gože' légake':

—¿Biz chen' zza' láže'le da' ki? <sup>23</sup>Bi nak zede cha' no benne' ye'ze' benne' ni: "Ba benít lawa' dola' da' nbago'o" san nak zede gone' ga yeyase', na' se'e. <sup>24</sup>W<sub>l</sub>oe'ela' le'e nzi' lo na'a neda', Benne' Golje' Benáč, yela' wnnábia' yenít lawa' dola' yežlyó nga.

Naž Jesusen' gože' bennen' bi žak se'e, na' wnné':

—Žapa' le', wyase. Beywá' dan' delon', na' beyéj ližo'.

<sup>25</sup>L<sub>a</sub>' wyaste benne' yižwén' láwgake', na' beké'e dan' góta'len', na' zeyeje' liže', zk<sub>a</sub>n zene' Dios.

<sup>26</sup>Bebángekle' yógo'tegake', na' bka'n zéngake' Dios. Lezka' zžébegake', na' wnnágake':

—Na'a błe'elžo to da' žonen ga žebanlžo.

### Jesús žliže' Lebí, bennen' lezka' lie' Matío

(Mt. 9:9-13; Mr. 2:13-17)

<sup>27</sup>Wdé gok da' ni, Jesusen' bžoje' ga na', na' błe'ele' to benne' lie' Lebí, ži'e gan zchizjwe' lazgak benách, na' Jesusen' gože' le':

—Benlen neda' tzen.

<sup>28</sup>La' wzó ža'te Lebín', na' bka'ne' yógo'te, na' wyéjlene' Jesusen'.

<sup>29</sup>Wdé na', ben Lebín' to yela' waw che Jesusen' gan nak lo liže', na' wnnítā'gak benne' zan ga na', benne' wechizjw ka' len yebałe benne' ka' želbé'lene' légake' gan žáwgake'.

<sup>30</sup>Naž benne' yodo' wsedle ka' len benne' yodo' fariseo ka' wnnégake' chegak benne' wsedle ka' che Jesusen', na' wnnágake':

—¿Biz chen' že'j žawlenle tzen benne' wechizjw ka', na' yezika' benne' dola' ka'?

<sup>31</sup>Bechebe Jesusen', na' gože' légake':

—Benne' ka' nnítā'gake' chawé' bi žon byenen chjake' law benne' žeyone' benách ka', san benne' yižwé' ka' žon byenen chjake' law bennen' žeyone' benách ka'. <sup>32</sup>Bla'a neda', kege nich wliža' benne' chawé' ka', san nich wliža' benne' dola' ka' nich yeyát láže'gake'.

### Znnábgekle' Jesús kan nak che yela' žon wbás

(Mt. 9:14-17; Mr. 2:18-22)

<sup>33</sup>Naž benne' yodo' ka' wnnábgekle' Jesusen', na' wnnágake':

—Benne' ka' žónlengake' Zwa tzen, na' benne' ka' žónlengake' benne' yodo' fariseo ka' tzen, žónteze žóngake' wbás, na' zcháljengake' Dios. ¿Biz chen' benne' ka' žónlengake' Le' tzen že'j žáwgake'?

<sup>34</sup>Jesusen' gože' légake':

—¿Wak gonle ga gongak benne' ka' wbás, benne' nnítā'gake' Iní che yela' zchag na', kate' benne' zchag ne'e ne zóalene' légake'? <sup>35</sup>Žin ža

kate' kwas benne' zchag ne'e gan nníta'gake'. Ža na' góngake' wbás.

<sup>36</sup>Naž Jesusen' bsaka' lebe' kan nak da' ki, na' gože' légake':

—Bi chog nitó benne' to laže' kobe dan' ba ndian, nich kweje' xtaka' dan' yedé'e le'e to laže' gole. Cha' gone' ki, kégeze gak ditj laže' kobén', san láže'don' dan' bžojen le'e laže' kobén' bi gon leben laže' gole'. <sup>37</sup>Lezka', bi zga'a nitó benne' xis uba kobe lo že'e yid gole. Cha' no benne' gone' ki, xis uba kobén' wlá'an že'e gole' da' naken yid, na' lalj xis uban', na' cwia yi' že'e yid gole'. <sup>38</sup>Che len žala' ka'žo xis uba kobe to lo že'e yid kobe, na' žopten gak chí'igaken. <sup>39</sup>Cha' zoa no benne' že'je' xis uba gole, bi yénetele' ye'je' xis uba kobe, dan' nne': “Nakže dži' xis uba gole'.”

**Benne' wsedle ka' che Jesús zká'agake' bisto zoa' stribre ža la'y**

(Mt. 12:1-8; Mr. 2:23-28)

**6** Kate' nak to ža la'y chegak benne' judío ka', wdá Jesusen' gan de yel zoa' stribre, na' benne' wsedle chie' ka' zká'agake' bisto gan žia zoa' striben'. Belžoben' lo ná'gake', na' bdáwgaken!. <sup>2</sup>Naž benne' yodo' fariseo ka' wnnábgekle' légake', na' wnnágake':

—¿Bíz chen' žonle da' bi žala' gonžo ža la'y?

<sup>3</sup>Bechebe Jesusen', na' gože' légake':

—¿Bi bel-le kan ben Dabí katen' wdone', na' lezka' beldón benne' ka' wnnítalengake' le'? <sup>4</sup>Wyoé'e lo yodo' che Dios, na' wzí'e yet xtil dan' zgó'ogake' law Dios, dan' bi žala' gawžon, san de latje chégakze bxoz

ka' gáwgaken', na' Dabín' bdawen', na' lezka' bnežjwen' chegak benne' ka' bénlengake' le' tzen.

<sup>5</sup>Naž Jesusen' gože' légake', na' wnné':

—Neda', Benne' Golje' Benách, naka' Xane ža la'y.

**Jesús žeyone' to benne' nžeke' ne'e**

(Mt. 12:9-14; Mr. 3:1-6)

<sup>6</sup>Yetó ža la'y chegak benne' judío ka', wy'o Jesusen' lo yo'o gan zdóbgake' nich yéngakle' xtiža' Dios, na' bsedle' benne' ka' nníta'gake' ga na'. Lezka' zoa to benne' ga na', benne' nžeke' ne'e li ža. <sup>7</sup>Benne' yodo' wsedle ka' len benne' yodo' fariseo ka' zwíagake' Jesusen', nich l'égekakle' cha' yeyone' bennen' kate' nak ža la'y chégake', nich žélgekakle' nakle gak yesbága'gake' Le' zia.

<sup>8</sup>Žákbe'ele Jesusen' dan' zsa' láže'gake', na' gože' bennen' nžeke' ne'e, na' wnné':

—Wzó ža'. Wzé gachje láwe'le nga.

La' wzó ža'te bennen', na' wzí'e ga na'. <sup>9</sup>Naž Jesusen' gože' benne' yodo' ka', na' wnné':

—Nnabla' le'e to diža'. ¿De latje kate' nak ža la'y gonžo da' naken chawé', cha' gonžo da' zinnj? ¿De latje yeslažo yela' nban chegak benách ka', cha' yeka'ažon?

<sup>10</sup>Naž Jesusen' bwie' benne' ka' nníta'gake' dot kwite', na' gože' bennen' nžeke' ne'e:

—Bli no'o.

Naž bennen' bli ne'e, na' la' beyakten.

<sup>11</sup>Naž bža'agak benne' yodo' ka', na' bengake' toze diža' la' légakze' nich žélgekakle' bi da' góngake' che Jesusen'.

**Jesús zbie' chežinno benne' nich gákgake' wbás chie' ka'**

(Mt. 10:1-4; Mr. 3:13-19)

<sup>12</sup>Kate' ža ka' wyéj Jesusen' gan nak to law ya'ado'. Katen' bžine' ga na', bliže'.

Dios, na' dot yele bcháljlene' Le'. <sup>13</sup>Kate' za' ža'ní', bliže' benne' ka' žónlengake' Le' tzen, na' wžíe' chežinnoe' nich gákgake' wbás chie' ka!. <sup>14</sup>Bliže':

- Smon, (bennen' lezka' lie' Bedw), Ndres, (benne' biche' Bedon'), Jakob, Zwa, Lip, Bartol,
- <sup>15</sup>Matío, Mas, Jakob, (zi'n Alfeo), Smon, (benne' že' laže' yež chie'),
- <sup>16</sup>Judas, (zi'n to benne' lie' Jakob), Judas Iskariote, (benne' wdíe' Jesusen' lo na'gak benne' ka' gótgake' Le').

### Žeyón Jesús benne' zan

(Mt. 4:23-25)

<sup>17</sup>Naž Jesusen' bdínnelene' benne' wbás chie' ka' tzen law ya'adon', na' bžíngake' to gan nak lache', ganzej nnita' benne' zanže, benne' wsedle chie' ka'. Lezka' jez nnita' benne' zan ga na', benne' jez nžoje' yógo'te yež gan nbab Judea, na' lo yež Jerusalén, na' lo yeždo' ka' jez nnitan' žoa'a nisdo' gan jez nnita' yež Tiro, na' yež Sidón. Benne' ki bžíngake' ga na' nich wzé nággake' xtiža' Jesusen', na' nich yeyákgake' lo yižwé' che chégake'. <sup>18</sup>Lezka' beyakgak benne' ka' zzáka'gake' dan' yó'ogake' be' xiwe' ka'. <sup>19</sup>Gónegkaké yógo'te benne' zan ka' kágake' Jesusen' dan' žeyone' yógo'tegake' len yela' wak chie'.

### Yela' ba nez, na' da' nyáche'le'e

(Mt. 5:1-12)

<sup>20</sup>Naž bwia Jesusen' benne' wsedle chie' ka', benne' ka' nnita'gake' ga na', na' gože' légake':

—Ba nez zen naken chele le'e, nak nyache' laže' le na'a, dan' gata' latje chele gan znna bia' Dios.

<sup>21</sup>'Ba nez zen naken chele le'e zdónle na'a, dan' weljle da' naken che Dios.

'Ba nez zen naken chele le'e zbéžele na'a, dan' wzížlenle neda' tzen.

<sup>22</sup>'Ba nez zen naken chele le'e, dan' za' ža katen' benách ka' bi lé'egekle' le'e chawé', yebéjgake' le'e gan nnítia'gake', na' nnégake' chele, na' gon dítjgekle' lale, na' nnágake' naken to da' dáche'ze dan' žónlenle neda', Benne' Golje' Benách, tzen.

<sup>23</sup>Le soa lo yela' ba nez ža na', na' le yebél, dan' nak zen da' gata' chele ya'abá che Dios. Lezka' xa xna' golte chégake' ka' béngekake' da' zinjj chegak benne' ka' bcháljgake' lo wláz Dios ža ni'te.

<sup>24</sup>'Da' nyáche'le'e gaken chele le'e, benne' wnni'a ka', dan' ba de da' yebélenlele.

<sup>25</sup>'Da' nyáche'le'e gaken chele le'e, žéljelele na'a, dan' tonle.

'Da' nyáche'le'e gaken chele le'e, žžízele na'a, dan' gak nyache' laže' le, na' kwež nyáche'le.

<sup>26</sup>'Da' nyáche'le'e gaken chele le'e, znnagak yógo'te benách ka' chawé' chele. Lezka' bengak xa xna' golte chele ka', dan' wnnágake' chawé' chegak benne' wen laže' ka', benne' wnnázegake' bcháljgake' lo wláz Dios.

Žala' ži'ilžo benne' ka' bi zlé'egekle' žo'o chawé'

(Mt. 5:38-48; 7:12)

<sup>27</sup>Lezka' wnná Jesusen':

—Žapa' le'e, zoale nga, na' žénlele chia' neda', znnia':

- Le ži'il benne' ka' bi zlé'egekle'  
    le'e chawé.
- Le nnab da' chawé' chegak  
    benne' ka' zzá'agake' le'e.
- 28** Le nnable Dios gon chawé' e  
    benne' ka' žóngake' le'e zia.
- Le nnable' Le' gáklené' benne' ka'  
    znnégake' chele.
- 29** Cha' no benne' kape' chelá'a  
    xago', bze yechelá'a xagon'.  
Cha' no benne' ke'e laže' da' zoan  
    xkožo'o, lezka' be' latje ke'e  
    zon'.
- 30** Cha' no benne' nnable' le' da' de  
    chio', bnezjwn chie'.  
Cha' ke'e da' naken chio', bi  
    yennabon'.
- 31** Ka žénelele gongak benách ka'  
    chele, lezka' le gon chégake'.
- 32** Cha' nží'izelele benne' ka'zej  
nží'ile' le'e, ēbize da' nakže chawé'  
žonlen? Lezka' žongak benne'  
dola' ka',zej nží'ile' benne' ka'zej  
nží'ile' légake'. **33** Cha' žonle da'  
naken chawé' chégakze benne' ka'  
žóngake' chawé' chele, ēbize da'  
nakže chawé' žonlen? Lezka' žongak  
benne' dola' ka'. **34** Cha' znézjwzele  
chegak benne' ka' žéklele yebí'igake'  
chele, ēbize da' nakže chawé'  
žonlen? Lezka' žongak benne' dola'  
ka', zoa bi da' znézjwgake' chegak  
benne' ka' žóngake' dola', dan'zej  
nnezle' yebí'igake' dan' bnézjwgake'.
- 35** Neda' žapa' le'e: le ži'il benne'  
ka' bi zlé'egekle' le'e chawé', na' le  
gon da' naken chawé' chégake'. Le  
wnezjw chegak benách ka' la'kze  
bi žéklele yebí'igake' chele. Cha' ki  
gonle, zen nak da' yebélenlen, na'  
gakle zi'nkze Dios, Benne' zente,  
dan' žone' da' naken chawé' chegak  
benách ka', benne' bi žaz láže'gake',

na' benne' ka' žóngake' da' kegle.  
**36** Žala' yeyache' láže'lele benách ka',  
kan žon Xale Dios, žeyache' láže'le'  
yógo'te benách.

### Bi žala' nnežo che lježžo

(Mt. 7:1-5)

- 37** Lezka' wnná Jesusen':  
Bi nnele che lježle, na' bi nne no  
benne' chele.  
Bi yesbága'le lježle zia, na' bi  
yesbaga' no benne' le'e zia.  
Le yenít law che lježle, na' Dios  
yenít lawe' chele.
- 38** Le wnezjw che lježle, na' Dios  
gonne' chele.

Gónngake' chele da' wžíxgake' len  
to kak da' zžixen, dan' nak bia' li,  
dan' nyižen, na' nyiten že'lte, na'  
zo dí'aten. Kan nak da' zžixle le'e,  
ka'kze wžíx Dios chele.

**39** Bzaka' lebe Jesusen', na' gože'  
légake':  
—ēWak to benne' lo chole chi'e yetó  
benne' lo chole? Bi gake', dan' žoptie'  
bíxgake' to lo bloj. **40** Lezka', bi gakže  
blo to benne' wsedle, ka benne' žsedle'  
le', san kate' yeyóz wsedle bennen', na'  
gake' kan nak bennen' žsedle' le'.

**41** 'Bíz chen' zwo' bébedon' dan' yo'on  
yej law lježo', na' bi zlé'elo' da' zen dan'  
yo'on yej lawo' le'? **42** 'Bak yi'o lježon':  
“Bicha'a, benn latje yeba'jé bédédon'  
dan' yo'on yej lawo” na' bi zlé'elo' da'  
zen dan' yo'on yej lawo' le'? Le', benne'  
zloé'ezele chawé' kwino'. Zga'ale bebéj  
da' zen dan' yo'on yej lawo' le'. Naž  
le'elo' binlo nich gak yeba'jé bédédon'  
dan' yo'on yej law lježon'.

### Da' žonžo nak bian' kan nakžo

(Mt. 7:15-19; 12:33-37)

- 43** Lezka' wnná Jesusen':

—To yag zaka' bi zbian da' bi nak zix, na' to yag ka'ze bi gak kwian da' nak zix. <sup>44</sup>Ki naken, da' zbia to yag nak bian' kan nak yagen'. Bi zchibžo da' zbia yag higo lo yag yeche', na' lo yag yeche' bi zchibžo da' zbia lba uba. <sup>45</sup>Benne' chawe' zchalje' diža' chawe' dan' yo'o da' chawe' lo yichj lázda'we', na' benne' bi nake' chawe' zchalje' da' bi nak chawe' dan' yo'o da' bi nak chawe' lo yichj lázda'we'. Žoa'ažo znnen kan nak da' yo'on lo yichj lázdo'žo.

### Chope kan gak chíxwžo len yo'o

(Mt. 7:24-27)

<sup>46</sup>Lezka' wnná Jesusen': —¿Biz chen' žližle neda', znna: "Xanto", Xanto" na' bi žonle kan žapa' le'e? <sup>47</sup>Wloe'ela' le'e kan nak bennen' ze'e gan zoa', na' ženle' xtiža'a, na' žone' kan znna. <sup>48</sup>Benne' ni nake' ka to benne', kate' bene' liže', gže' bche'ne', na' bdixjwe' len yo'o gan nak lo yej xe. Kate' wdé nis wbá'a zil, na' bche'nen kwit yo'on', bi gok wchinnjen yo'on', dan' žian lo yej xe. <sup>49</sup>Na'a, no benne' ženle' xtiža'a, na' bi žone' kan znna, benne' ni nake' ka to benne' bene' liže' gan nak doze yo, na' bi bdixjwe' lenen. Kate' bche'n nis wbá'a kwit yo'on', la' wžia yi'ten belate ža.

### Jesús žeyone' bi' wen žin che to benne' yež Roma

(Mt. 8:5-13)

**7** Kate' Jesusen' beyóž bcháljlene' benne' ka' ki, wyeje' lo yež Kapernaum. <sup>2</sup>Lo yežen' zoa to benne' yež Roma, benne' zchi'e benne' ka' žjake' lo wdile, na' zoa to bi' wen žin chie' nží'ile'ele'-

be'. Yo'o yižwé' xkwidén', na' ba žekte gatbe'. <sup>3</sup>Kate' benle bennen' da' zchaljgak benne' ka' kan nak che Jesusen', la' bséla'tie' bale benne' gole, benne' judío ka', gan zoa Jesusen', nich chjéta'yoegkle' Le' yide' yedjyene' bi' wen žin chien', xkwidén' yo'obe' yižwé'. <sup>4</sup>Bžingak benne' gole ka' gan zoa Jesusen', na' dot láz'e'gake' góta'yoegkle' Le', na' wnnágake':

—Nak zi bennen' gono' da' ni chie', <sup>5</sup>dan' žape' ba la'ne benne' wláž chežo ka', na' bene' to yo'o chežo gan ženlžo xtiža' Dios.

<sup>6</sup>Naž Jesusen' wyéjlene' légake'. Kate' za' žintegake' liž bennen', le' bsele'e bałe lježe' gan za' Jesusen', na' góžgake' Le':

—Xan, wnná bennen': "Bi gek zedlo', dan' bi naka' zi cho'o liža". <sup>7</sup>Lezka' bi naka' zi biga'a gan zo'. Che len bi bežogla' la'a gan zo'. To wnnaze, na' yeyakte bi' wen žin chian'. <sup>8</sup>Lezka' neda', zoa benne' znna bi'e neda', na' ležka' zej nnita' benne' ka' žjake' lo wdile, benne' ka' zchi'a neda' légake'. Kate' žapa' toe': Wyéj ga na', žeje'. Kate' žapa' yetóe': Da ko' ni, ze'e. Lezka' kate' žapa' benne' wen žin chia': Ben žin ni, žonen!"

<sup>9</sup>Kate' Jesusen' benle' da' ni, bebán láz'e'le' che bennen', na' byechje', na' gože' benne' ka' zá'gake' xkóž'e'le', na' wnné':

—Da' li žapa' le'e, bi na' chejxaka'a nitó benne' Israel, benne' žejl'e chia' neda' kan žejl'e benne' ni chia'.

<sup>10</sup>Kate' bežingak benne' ka' gan zoa bennen' bsele'e légake', bennen' zchi'e benne' ka' žjake' lo wdile, na' belyo'e liže', na' blé'egekle' ba beyák bi' wen žin na'.

**Jesús žesbane' xkwide' byo  
che to no'le wzebe**

<sup>11</sup>Wdé gok da' ni,zej Jesusen' lo  
yež Naín len benne' wsedle chie'  
ka', na' benne' zan zjáklene' Le' tzen.  
<sup>12</sup>Kate' bžine' žoa'a yežen', ble'ele'  
benne' ka'zej noe'e to xkwide'  
byo, bi' gat, nich chejkáche'gake'  
be'. Bi'do' gaten' nakbe' xkwide'  
tlicha' che to no'le wzebe. Benne'  
zan, benne' wláz che no'len',  
nníta'lengake' le'. <sup>13</sup>Kate' Xanžon'  
ble'ele' no'len', beyache' láže'le' le',  
na' gože' le':

—Biž kwežo'.

<sup>14</sup>Naz Jesusen' wbige'e ga na',  
na' wdane' dan' del bi'do' gaten'.  
Wlezgak benne' ka'zej noe'e-be', na'  
Jesusen' wnné':

—Xkwide' byo, žapa' le', beyase.

<sup>15</sup>Naz bi'do' gaten' bebanbe', na'  
wže'be', na' wzó lawbe' zchaljbe'.  
Jesusen' benežjwe'-be' lo na' xna'be'.  
<sup>16</sup>Kate' blé'egekle benne' ka' da' ni,  
bžébegake', na' bka'n zéngake' Dios,  
na' wnnágake':

—Bla' to benne' zaka' ga zoažo ni,  
benne' zchalje' lo wláz Dios. Dios  
na'kze žezá' láže'e chežo, benne'  
chie' ka'.

<sup>17</sup>Wzé diža' che yela' wak che  
Jesusen', na' béngekle benách ka'  
nníta'gake' yógo'te yež gan nbab  
Judea, na' yógo'te yež zej žen'  
gawze ga na'.

**Da' wnnáb Zwa, bennen' bezóe'  
benách ka' nis**

(Mt. 11:2-19)

<sup>18</sup>Benne' ka' žónlengake' Zwa tzen  
bzéngekle' le' yógo'te da' ki, da' ka'  
žon Jesusen'. Zwan' bliže' chope

benne' ka', <sup>19</sup>na' bsele'e légake'  
gan zoa Jesusen' nich nnábgekle'  
Le', na' nnágake': ¿Nako' le' Benne'  
Criston', bennen' sela' Dios, o žala'  
kwezto' benne' yoble? <sup>20</sup>Kate' benne'  
ka' bsela' Zwan' bžíngake' gan zoa  
Jesusen', góžgake' Le':

—Zwa, bennen' bezóe' benách ka'  
nis bsele'e neto', nich nnablto' Le',  
na' nnato': ¿Nako' le' Benne' Criston',  
bennen' sela' Dios, o žala' kwezto'  
benne' yoble?

<sup>21</sup>La' na'ze žeyón Jesusen' benne'  
zan, benne' yižwé' ka', len benne'  
yó'ogake' be' xiwe' ka', na' lezka'  
benne' zan, benne' lo chole ka',  
bsaljwe' yej láwgake'. <sup>22</sup>Bechebe  
Jesusen', na' gože' chope benne' ka'  
bsela' Zwan', na' wnné':

—Le chej, chejzénlele Zwan' kan  
nak da' blé'ele, na' da' bénlele.  
Želé'egekle benne' ka' gókgake'  
lo chole. Žeza'gak benne' ka' bi  
gok sá'gake'. Beyakgak benne' ka'  
wdá'gake' yižwé' leže. Žeyéngekle  
benne' ka' bkwéžjwgake'. Bebangak  
benne' gat ka'. Benne' yache' ka'  
žéngekle' diža' chawen'. <sup>23</sup>Ba nez  
zen gaken che bennen' bi gak chope  
láže'e, na' gónlene' neda' tzen lá'kze  
bi žona' kan žekle' žala' gona'.

<sup>24</sup>Kate' benne' ka' bsela' Zwan'  
bezá'gake' ga na', wzó law Jesusen'  
zzejmí'ile' benne' ka' kan nak che  
Zwan', na' wnné':

—¿No benne' bejwíale lo latje  
dachen? ¿Bejwíale to benne' nake'  
ka to ya xtil dan' zta be'? <sup>25</sup>¿Nožkze  
benne' bejwíale? ¿Bejwíale to  
benne' nakwe' laže' da' zákale'en?  
Nnékzelele benne' ka'zej nakwe'  
laže' da' zákale'en, na' de yela'  
wnni'a chégake' nníta'gake' ližgak

benne' wnná bia' ka'. <sup>26</sup> ¿Nozke  
benne' bejwiale? ¿Bejwiale to benne'  
žchalje' lo wláz Dios? O', žapa'  
le'e. Žwan' nakže' blo ka to benne'  
žchalje' lo wláz Dios. <sup>27</sup> Nak Žwan'  
bennen' nyejw le'e yich la'y kan nak  
chie' da' znnan:

Bwia nga, žsel'a benne' wbás  
chia'.

Cheje' zga'ale' ka Le' nich wpé'e  
nez gan tio'.

<sup>28</sup> Neda' žapa' le'e: ganzej nnita'  
benách ka', cha' zoa no benne'  
žchalje' lo wláz Dios, bi nakže' blo  
ka Žwan', bennen' bezóe' benách ka'  
nis, san no benne' nakže' nexjw gan  
znna bia' Dios, bennen' nakže' blo  
ka Žwan'.

<sup>29</sup> Kate' benne' gaxjw ka' len benne'  
wechizjw ka', béngekle' da' bchajl  
Žwan', gókbe'gekle' da' naken  
chawe' law Dios, na' bezóagake' nis  
lo na' Žwan', <sup>30</sup> san benne' yodo'  
fariseo ka' len benne' yodo' wsedle  
ka', benne' ka' nzi' lo nágake' da'  
bchi'le Moisés, bi bezóagake' nis  
lo na' Žwan', na' ki goken, belka'ne'  
ka'ze da' chawe' da' gónele Dios  
gone' chégake'.

<sup>31</sup> Lezka' wnná Xanžon':

—¿Nakx wsaka' leba' kanzej  
nak benne' ka' nníta'gake' ža  
ni zoažo na'a? ¿Nakxkze jez  
nake'? <sup>32</sup> Zej nake' ka xkwide' ka'  
želyitjbe'. Želbe'be' lawe' ya'a, na'  
želbézeya'abe'. Želye'be' ljéžgakbe':  
“Zkwežto' bžejw lawle, na' bi žia'le.  
Žol nyáche'to', na' bi zbrézele.” <sup>33</sup> Ki  
nakle dan' bla' Žwan', bennen' bezóe'  
benách ka' nis, na' bi bdawe' yet xtil,  
na' bi we'je' xis uba, na' wnnele chie',  
na' wnnale: “Da' xiwe' žónlenen  
le' tzen.” <sup>34</sup> Kate' bla'a neda', Benne'

Golje' Benách, na' že'j žawa', znnele  
chia': “Bennen' nake' benne' wawle'e,  
na' benne' že'je'. Nake' lježgak benne'  
wechizjw ka' len yezika' benne' dola'  
ka'.” <sup>35</sup> Neda' žapa' le'e: zej nak bia'  
benne' ka' zej nape' yela' žejní'il che  
Dios ni'a che da' žóngake'.

### Da' ben Jesúš lo liž to benne' yodo' fariseo

<sup>36</sup> To benne' yodo' fariseo bliže'  
Jesusen' nich gáwlene' le' tzen.  
Wy'o Jesusen' liž bennen', na'  
wži'e, na' wzó lawe' žawe'. <sup>37</sup> Zoa to  
no'le le'e lo yežen', na' katen' benle'  
že'j žaw Jesusen' liž benne' yodo'  
fariseon', naž ble'e ga na', noe'e  
to béga'do' da' naken yej zaka', na'  
yožen to da' zla' zix. <sup>38</sup> Katen' bžine'  
zaka' xkóžele' Jesusen', wži'e xni'e  
Le', zbeže'. Naž wzó lawe' žesbise'  
ni'a Jesusen' len nis zbeže', na' bezíe'  
ni'e len yicha' yichje'. Bnope'e ni'e,  
na' wloé'e dan' zla' zix lo ni'e. <sup>39</sup> Kate'  
benne' yodo' fariseon', bennen'  
bliže' Jesusen', ble'ele' da' ni, wzá'  
laže'e, na' wnné': “Chela' nak benne'  
ni benne' žchalje' lo wláz Dios,  
gákbe'ele' da' nak no'le ni zgane' Le',  
na' da' žone', dan' nake' no'le le'e.”  
<sup>40</sup> Naž Jesusen' gože' benne' fariseon',  
na' wnné':

—Smon, de to da' žénela' yapa' le'.

Bež'i bennen', na' wnné':

—Wnná, benne' wsedle.

<sup>41</sup> Jesusen' gože' le':

—Wzó to benne' wnni'a, na'  
wnnítalak chope benne' zej nbage'e  
mežw chie'. To bennen' nbage'e  
chie' lazjwe' che chopiz, na' yetóen'  
nbage'e chie' lazjwe' che chop byo'.  
<sup>42</sup> Dan' bi de mežw chégake' nich  
chízjwgake' dan' zej nbage'e chie',

che len benít lawe' che žoptie' dan' zej nbage'e chie'. Wnná na'a. ɁNozle benne' chope' ki ſí'ižele' bennen' benít lawe' chégake'?

43 Bež'i Smon na', na' wnné': —Žekla' neda', bennen' wbága'že' mežw chie', dan' benít lawe'.

Jesusen' gože' le':

—Da' likze znno'.

44 Naž beyéchj Jesusen', na' bwie' no'len', na' gože' Smon na':

—¿Zle'elo' no'le ni? Wyoá'a ližo', na' bi benno' nis da' chibla' ni'a, san no'le ni besbise' ni'a len nis zbež'e', na' bezí'e ni'a len yicha' yichje'. 45 Bi bzechw lawo' neda', san kate' za' bžintia' ližo', bi wzóa ži no'le ni, znope'e ni'a. 46 Bi wló'o set yichja', san no'le ni wloé'e dan' zla' zix' ni'a. 47 Che len žapa' le', dola' zen dan' wbaga' no'le ni, ba benít lawa' chie', na' nží'ile'ele' neda'. No benne' ženít law Dios chie' látedo'ze, látedo'ze nží'ile' Dioš.

48 Naž Jesusen' gože' no'len', na' wnné':

—Dola' wbago'o ba benít lawa' chio'.

49 Naž benne' ka' želbé'lene' Jesusen' tzen gan žawgake' wzó låwgake' želyi'e ljéžgake', na' wnnágake':

—¿Nožkze benne' ni, ženít lawe' dola'?

50 Naž Jesusen' gože' no'len', na' wnné':

—Dan' žejli'o chia' neda', ba beló'. Binlo beyéj ližo'.

No'le ka' žákłengake' Jesús  
len benne' wsedle chie' ka'

**8** Wdé gokgak da' ki, wdé  
Jesusen' gan zej že' yež zan,

yež zen ka', na' yeždo' ka', gan bchalje' diža' chawen' kan znna bia' Dios, na' benne' chežinnote benne' wsedle chie' ka' zjáklene' Le' tzen.

2 Lezka' bale no'le ka' zjáklene' Le', no'le ka' beyón Jesusen' légake' kate' bebeje' be' xiwe' ka' yo'ogake', na' beké'e yižwé' ka' zej de'e. Lia, no'len' lezka' lie' Madlen, zoe' ládjwgake', no'len' bebéj Jesusen' gaže be' xiwe' wyoé'e. 3 Lezka' Zwan, zo'le Chosa, benne' žape chi'e da' de liž Herodes, benne' znna bi'e, zoe' ládjwgake', na' lezka' zoalén Susana légake'. No'le ki želsí'ni'e da' žaw Jesusen' len benne' wsedle chie' ka'. Ki žongak no'le ka' tzen len yezika' no'le ka', na' znéžjwgake' da' de chégake'.

Žsaka' lebe Jesús kan nak che to  
benne' žaz ža'ne'  
(Mt. 13:1-9; Mr. 4:1-9)

4 Lezka' benne' zan bžójgake'  
lo yež ka', na' bžíngake' gan zoa  
Jesusen'. Katen' bdóbgake' gan zoe',  
Le' bsaka' lebe', na' gože' légake':

5 —Bžoj to benne' žaz ža'ne'  
zjeze' bínbedo' ka'. Kate' ne zjeze',  
béxjwgak bale bínbedo' ka' gan nak  
nez las, na' wdegak benách ka' ga  
na', na' bléjgaken'. Lezka' bžingak  
byínnedo' ka', na' bdáwgakban'.

6 Béxjwgak yebale bínbedo' ka' lo  
yo gan že' yej. Kate' bla'gak bínbedo'  
ka', la' belbižten dan' bi ngopa' yon'.

7 Béxjwgak yebale bínbedo' ka' gan  
bela'gak lba yeche' ka'. Tzen belgole  
lba yeche' ka' len yagdo' ka'. Lba  
yeche' ka' beldóbgaken yagdo' ka'  
kate' blá'gaken, na' bžia yí'gaken  
yagdo' ka'. 8 Béxjwgak yebale  
bínbedo' ka' gan nak lo yo beb.  
Katen' ba bgólgaken, bnéžjwgaken.

To ton bnežjwn yetó gaywá'  
bínnedo' ka'.

Kate' Jesusen' beyóz wnné' ki,  
zižje wnnié':

—No benne' zoa nage', na' ženle',  
žala' wzé nage'.

### **Znna Jesús biz chen' žsaka' lebe'**

(Mt. 13:10-17; Mr. 4:10-12)

<sup>9</sup>Naž benne' wsedle ka' che  
Jesusen' wnnábgekle' Le', na'  
wnnágake':

—¿Biz žsedle dan' bsaka' lebo'?

<sup>10</sup>Jesusen' gože' légake':

—Dios zzejni'ile' le'e da' ngache'  
kan znna bi'e Le', san yezika'  
benách ki, zchájljena' légake' da'  
žsaka' leba' nich kate' wíagake', bi  
lé'egekle', na' kate' yéngakle', bi  
chejn'i'igekle'.

### **Zloe'el Jesús da' žsedle da' bsaka' lebe'**

(Mt. 13:18-23; Mr. 4:13-20)

<sup>11</sup>Lezka' wnná Jesusen':

—Ki nak da' žsedle dan' bsaka'  
leba': Bínnedo' ka' zej naken xtiža'  
Dios. <sup>12</sup>Bínnedo' ka' békjwgaken  
lo nez las zloé'egeklen kan žak  
chegak benne' ka' želenle' dižan',  
na' la' za'te da' xiwe', na' žeká'n  
dižan' da' wyónon lo yichj lázdo'gak  
benne' ka', nich bi chejlé'gaken',  
na' nich bi yelágake'. <sup>13</sup>Bínnedo'  
ka' békjwgaken lo yo gan že' yej  
zloé'egeklen kan žak chegak benne'  
ka' želenle' dižan', na' len yela'  
žebél želzi'en, san zej nake' ka  
bínnedo' ka' bi békaken lwen. To  
chí'ido'ze žejlé'gaken', dan' nža'  
lázdogake' da' žak chégake', na'  
la' žsántegake' dižan'. <sup>14</sup>Bínnedo'  
ka' békjwgaken gan bela'gak lba

yeche' ka' zloé'egeklen kan žak  
chegak benne' ka' želenle' dižan',  
na' kate' ba béngeklen', na' da' ka'  
žákgaken chégake' yežlyó nga  
žóngaken légake' lo'e, da' ka' zej  
naken yela' wnni'a chen, na' da'  
ka' zdan láže'gake' da' žákgaken  
ga ni, na' dižan' bi žonen žin lo  
yichj lázdo'gake'. <sup>15</sup>Bínnedo' ka'  
békjwgaken gan nak lo yo beb  
zloé'egeklen kan žak chegak benne'  
ka' dot láže'gake' žéngakle' dižan',  
na' zgo'o chóchgaken' lo yichj  
lázdo'gake', na' lo yela' zbez zen  
laže' chégake' žóngake' kan znna  
dižan'.

### **Žsaka' lebe Jesús che da' žsa'ní' ližžo**

(Mr. 4:21-25)

<sup>16</sup>Lezka' wnná Jesusen':

—Xtiža' Dios naken ka to yi'. Kate'  
to benne' zgale' yi', bi zdosen' kak,  
na' bi zgo'en zanle gan žate'e, san  
zzoen' sibe lo yo'o, na' yin' žsa'nín'  
benne' ka' žó'ogake' ga na'. <sup>17</sup>La' law  
yógo'te da' ngache', na' gak bian', na'  
žoj lawle yógo'te da' žaken ži zize.

<sup>18</sup>'Che len, le wzé nag, dan' gata'  
yelate' che benne' zzoa choche' da'  
ženle' lo yichj lázda'we', na' si'že'  
xtiža' Dios, san benne' bi zzoa  
choche' da' ženle' lo yichj lázda'we',  
na' yegá'a dižan' dan' benle'.

### **Da' ben xna' Jesús tzen len benne' biche'e ka'**

(Mt. 12:46-50; Mr. 3:31-35)

<sup>19</sup>Naž bžin xna' Jesusen' tzen  
len benne' biche'e ka', gan zoe',  
san bi gok žíngake' lawe' Le' dan'  
zej nnita' benne' zan ga na'. <sup>20</sup>To  
benne' zoe' ga na' bliže' Jesusen',  
na' wnné':

—Xno'o len benne' bicho'o ka'  
nnita'gake' lí'ale, na' ženegekle'  
wchál'lengake' Le'.

<sup>21</sup>Bechebe Jesusen', na' gože'  
légake':

—Benne' ki, benne' želyenle'  
xtiža' Dios, na' žóngake' kan znnan  
zej nake' ka xna'kza', na' benne'  
bíche'kza' ka'.

### Jesús zbek žie' be' wale

(Mt. 8:23-27; Mr. 4:35-41)

<sup>22</sup>To že wžén Jesusen' to lo barkw  
tzen len benne' wsedle chie' ka', na'  
Le' gože' légake':

—Le cho'o yechelá'a nisdo' nga.

Naž la' zjaktie'. <sup>23</sup>Kate' ne želdié'  
lo nisdon', ztas Jesusen'. Naž wzó  
law žak to be' wale lo nisdon', na'  
ba žek yetj barkwn' zan nisle, na' de  
zož chégake'. <sup>24</sup>Naž wbíga'gake' gan  
de Jesusen', na' besbángake' Le', na'  
wnnágake':

—iBenne' wsedle! iBenne' wsedle!  
Ba žek lo'ojžo zan nisle.

Kate' bebán Jesusen', bliže' ben'  
žaken, na' nisen' da' zgo'nен, na'  
wzóa ži ben' goken, na' wžé' ži  
nisdon'. <sup>25</sup>Naž Jesusen' gože' benne'  
wsedle chie' ka', na' wnné':

—¿Bi na' chejle'le che Dios?

Bžébegake' légake', na'  
bebángekle'. Gož ljéžgake' toe'  
yetóe':

—¿Nožkze benne' ni? Zdile' be'  
dan' žaken, na' nisdo', na' žóngaken  
dan' znne'.

### Benne' yež Gadara, benne' yoe'e be' xiwe'

(Mt. 8:28-34; Mr. 5:1-20)

<sup>26</sup>Naž bžin Jesusen' tzen len  
benne' wsedle chie' ka', gan nbab

yež Gadara, da' žen' yechela'ale  
nisdo' gan nbab Galilea. <sup>27</sup>Kate'  
Jesusen' bežoje' lo barkwn' gan  
nak lo yon', bedjhág to benne'  
yežen' Le'. Ba gok schale'e yoe'e be'  
xiwe', na' biž žakwe' laže', na' biž  
zzoe' lo yo'o, san zoaze' lo bloj gan  
zkáche'gake' benne' gat ka'. <sup>28</sup>Kate'  
bennen' yoe'e be' xiwe' ble'ele'  
Jesusen', wnníe' zižje. Bzoa zibe'  
law Jesusen', na' wnné':

—¿Biz nbaga'a chio', Jesús, Zi'n  
Dios, Benne' zente? Žáta'yoela' Le' bi  
wsaka' zi'o neda'.

<sup>29</sup>Ki wnné' dan' Jesusen' ba gože'  
be' xiwen' yežojeñ lo bennen'. Zan  
chi'i be' xiwen' ba bchix blol'-le'en  
bennen'. Benne' ka' che yežen'  
bchégake' le' do ya, na' bzóagake'  
bayw ya ni'a ne'e, san bchoge' do  
ya ka', na' be' xiwen' da' yoe'e bchen'  
le' lo latje dach. <sup>30</sup>Naž Jesusen'  
wnnable' be' xiwen', na' wnné':

—¿Bi lió'?

Be' xiwen' gožen Le':

—Be' Zan lia'.

Ki wnnán dan' yoe'e be' xiwe' zan.

<sup>31</sup>Naž be' xiwe' ka' góta'yoegeklen  
Jesusen' bi sele'e légaken latje  
chol' chegak benne' gat ka'!

<sup>32</sup>Lezka' wzóa to kwe' koch zan  
ga na', želdaba' žáwgakba' law  
ya'adon', na' be' xiwe' ka' belnnáb  
nyachen' Jesusen' we'e légaken  
latje chejzó'ogaken lo koch zan  
ka'. Jesusen' bi'e légaken latje.

<sup>33</sup>Bežožgak be' xiwe' ka' lo bennen',  
na' bežó'ogaken lo koch zan ka', na'  
jak koch ka' gan nak to le'e ya'a yej  
zen. Bejbíxjgakba' lo nisdo', gan  
belyepba' nis.

<sup>34</sup>Kate' benne' ka' žape  
chí'igake' koch ka', blé'egekle' kan

gok chégakba', bžébegake', na' bebángekle'. Bezónnjgake' ga na', zeyjgake' lážgake', na' bejzéngekle' benne' ka' nníta'gake' yežen', na' lezka' benne' nníta'gake' yixen'.

<sup>35</sup>Naž bžojgak benne' ka' nníta'gake' yežen', na' bejwágake' dan' goken.

Katen' bžíngake' gan zoa Jesusen', blé'egekle' bennen' wyoé'e be' xiwe' ka', ži'e xni'a Jesusen'. Nakwe' laže', na' ba bezóe' cháwe'do', na' bžébegake'. <sup>36</sup>Benne' ka' nníta'gake' ga na' belzenle' lágake' kan goken, na' blé'egekle' ba beyák bennen' wyoé'e be' xiwe' ka'. <sup>37</sup>Naž yógo'te benne' zan ka', benne' wláž che yež ka'zej nbaben yež Gadara na', góta'yoegakle' Jesusen' yežoje' lo yežlyó chégake'. Ki béngake' dan' zžébegake'. Bebén Jesusen' lo barkwn', na' bezé'e ga na'. <sup>38</sup>Bennen' bežojgak be' xiwe' ka' le' góta'yoele' Jesusen' we'e le' latje chéjlene' Le' tzen. Jesusen' gože' le' ga'ne' ga na', na' wnné':

<sup>39</sup>—Beyéj ližo'. Bejzenle benách wláž chio' ka' ka nak da' zen da' ben Dios len le'.

Beyéj bennen' liže', na' bzie' diža' dot lo yež ka' kan nak da' zen da' ben Jesusen' len le'.

### Xkwide' no'le che Jairo, na' no'len' wdane' laže' che Jesús (Mt. 9:18-26; Mr. 5:21-43)

<sup>40</sup>Kate' bežín Jesusen' yechelá'a nisdon', benne' zan, benne' nníta'gake' ga na', bebegekle' ni'a chie' Le' dan' želbeze' yógo'tegake' Le'. <sup>41</sup>Naž bžin to benne' lie' Jairo gan zoa Jesusen'. Nake' benne' blo che to yo'o gan žéngekle benne' judío ka' xtiža' Dios. Bzoa zibe' law

Jesusen', na' góta'yoele' Le' cheje' liže'. <sup>42</sup>Ki bene' dan' zoa to xkwide' no'le chie', na' ba žek gatbe'. Nakbe' bi' tlícha'kze chie', na'zejbe' ka chežinno yiz. Kate' nezej Jesusen' tzen len benne' zan ka', zchígake' Le'.

<sup>43</sup>Zej to no'le laduw benne' zan ka', na' ba gok chežinno yiz zzáka'lí'e, dan' bi zbez žen chie', da' žaken chégakkze no'le ka', na' ba bdie' bika' da' de chie', dan' wdizjwe' benne' ka' žeyóngake' benách ka', san nitó benne' bi gok yeyone' le'. <sup>44</sup>Wbige'e zaka' xkožel Jesusen', na' wdane' laže' da' nakwe', na' la' wbižte yižwé' žen chien'.

<sup>45</sup>Naž Jesusen' wnnable' benne' zan ka', benne' nníta'gake' ga na', na' wnné':

—¿Noz benne' wdane' neda'?

Nitóe' bi bechebe'. Naž Bedw len benne' ka' nníta'lengake' le', góžgake' Jesusen', na' wnnágake':

—Benne' wsedle, zej nnita' benne' zan ga ni, benne' zchígake' Le', na' zžíga'gake' Le', na' znno': “¿Noz benne' wdane' neda'?”

<sup>46</sup>Naž Jesusen' wnné':

—Zoa no benne' wdane' neda', dan' gókbe'ela' bžoj yela' wak neda', dan' žeyonen benách ka'.

<sup>47</sup>Kate' gokbe'el no'len' nnezle Jesusen' dan' bene', lo yela' zžebe wzize'. Bzoa zibe' law Jesusen', na' gože' Le' lawgak benne' zan ka' biz chen' wdane' laže' da' nakwe' Le', na' kan goken, la' beyaktie'. <sup>48</sup>Naž Jesusen' gože' le':

—Zí'na'do', dan' žejli'o chia' ba beyako'. Binlo beyéj ližo'.

<sup>49</sup>Kate' ne znna Jesusen' da' ni, bžin to benne' wzé'e liž benne' blon', na' gože' bennen':

—Ba got xkwide' no'le chio'. Biž gon lelo' benne' wsedle.

<sup>50</sup>Kate' Jesusen' benle' da' ni, bechebe', na' gože' benne' blon':

—Bi žebo'. Bejle'ze che Dios, na' yeyák xkwide' no'le chion'.

<sup>51</sup>Kate' Jesusen' wyoé'e yo'on', bi bi'e latje no benne' chó'olen' Le' san légakze Bedw len Jakob, na' Zwa, na' lezka' xa xna' xkwide' no'len'.  
<sup>52</sup>Želbeže benne' ka' nnítá'gake' ga na'. Želbeže nyache'e ni'a che xkwide' no'len', na' Jesusen' gože' légake', na' wnné':

—Biž kwézele. Bi nat xkwide' no'len'. Ztászebe'.

<sup>53</sup>Ben dítjgekle' Le' dan' nnézgakle' ba natbe'. <sup>54</sup>Naž Jesusen' bexwe' na'be', na' wnnié' zižje, na' wnné':

—Xkwide' no'le, beyase.

<sup>55</sup>Naž be' nakkzb'eyo' on lebe', na' bebanbe', na' la' wyástebe'. Jesusen' gože' légake' wnézjwgake' da' gawbe'. <sup>56</sup>Bebángakle xa xna'be', san Jesusen' bchi'le' légake' bi wzéngekle' nitó benne' kan goken.

Jesús žsele'e benne' wsedle chie' ka'  
nich chejségake' xtiže'e

(Mt. 10:5-15; Mr. 6:7-13)

**9** Naž Jesusen' betobe' benne' chežinno, benne' wsedle chie' ka', na' bdie' lo ná'gake' yela' wak, na' yela' wnná bia', nich yebéjgake' be' xiwe' ka' yo'ogak benách ka', na' nich yeyóngake' benne' yižwé' ka'.  
<sup>2</sup>Bsel'e' légake' nich chejzéngekle' benách ka' kan znnna bia' Dios, na' nich yeyóngake' benne' yižwé' ka'.  
<sup>3</sup>Jesusen' gože' légake':

—Bi be wa'le che lo nez, kege bardo', na' kege yixjw, na' kege yet, na' kege mežw, na' bi xoa yenle

chope laže'. <sup>4</sup>Bíte'ze yo'o gan cho'ole, le soa ga na' kate' yezá'žele lo yežen'. <sup>5</sup>Gáte'ze gan bi gápegač benách ka' le'e ba la'ne, le yežój lo yežen', na' le kwib bixte da' danelable, dan' wloe'elen légake' yež nbage'e zia.

<sup>6</sup>Naž zjak benne' wsedle chie' ka'. Wdégake' yógo'te yeždo' ka', na' bcháljgake' diža' chawen', na' beyóngake' benne' yižwé' ka' nnítá'gake' yógo'te yež ka'.

**Kan got Zwa, bennen' bezóe' benách ka' nis**

(Mt. 14:1-12; Mr. 6:14-29)

<sup>7</sup>Benle Herodes, bennen' znnna bi'e, kan nak yógo'te da' žon Jesusen', na' wžé' zedle', dan' znnagak benách ka':

—Bebán Zwa lo yela' got.

<sup>8</sup>Yebale' znnágake':

—Belá' Lías, bennen' bchalje' lo wláz Dios ža ni'te.

Yebale' znnágake':

—Ba bebán to benne' wbabe' benne' ka' bcháljgake' lo wláz Dios ža ni'te.

<sup>9</sup>Herodes na' wnné':

—Zwan' bchoga' yene'. ?Nožkze bennen', ženla' da' zan ki da' žone'? Herodes na' žak láže'lil'e le'ele' Jesusen'.

**Zwaw Jesúš gayo' mil benne' ka'**

(Mt. 14:13-21; Mr. 6:30-44; Jn. 6:1-14)

<sup>10</sup>Kate' bežingak benne' wbás ka' che Jesusen', benne' ka' bsel'e' chejségake' xtiže'e, na' bzéngekle' Le' yógo'te da' bengake'. Naž Jesusen' bchi'le' légake' cheze. Jake' to latje dach gan nbab yež Betsaida. <sup>11</sup>Kate' wnnézgakle benách ka' da' ni,

wnáwgake' Jesusen', na' Le' wdape' légake' ba la'ne, na' bcháljlene' légake' kan znnna bia' Dios, na' beyone' benne' yižwé' ka'.

<sup>12</sup>Kate' za' žale ža na', wbíga'gak benne' chežinno, benne' wbás ka' che Jesusen', gan zoe', na' góžgake' Le':

—Besela' benách ki nich chjake' ganzej ſe' yeždo' ka', na' ganzej ſe' yo'odo' ka' dot gawze, nich chejtíljgake' gan gá'ngake', na' da' gáwgake', dan' nak latje dach ga zoažo ni.

<sup>13</sup>Naž Jesusen' gože' légake':

—Le waw-gake' le'e.

Góžgake' Le':

—Gáyo'ze yet xtildo' de, na' chopze bel cheton' de. ¿Chejto' chjé'wto' da' gawgak benne' zan ki?

<sup>14</sup>Zej nnita' ka gayo' mil benne' ka' ga na'. Naž Jesusen' gože' benne' wsedle chie' ka', na' wnné':

—Le kwek chi-yóngake' to kwe' to kwe'.

<sup>15</sup>Ki béngake', na' wž'e'gak yógo'te benne' ka'. <sup>16</sup>Naž Jesusen' bexwe' gayo' yet xtil ka', na' chope bel ka'. Bchis lawe', zwie' ya'abale, na' gože' Dios: "Žóxkeno!" Naž bzozje' yet xtil ka', na' bi'en che cheze benne' wsedle chie' ka' nich chísgaken' lawgak benne' zan ka'. <sup>17</sup>Bdáwgake' yógo'tegake', na' béljgekle'. Wdé na' betóbgake' da' bizjw ka', na' beschá'gake' chežinno xkwit ka'.

### Znna Jesús kan za' gótgake' Le'

(Mt. 16:20-28; Mr. 8:30-9:1)

<sup>18</sup>To že kate' ne zoa Jesusen' cheze gan zcháljlene' Dios, na' žónlengak benne' wsedle chie' ka' Le' tzen, wnnable' légake', na' wnné':

—¿Nozen' znnagak benách ka' naka' neda'?

<sup>19</sup>Bechébegake', na' wnnágake':

—Bale' znnágake' nako' Zwa,

bennen' bezóe' benách ka' nis.

Yebale' znnágake' nako' Lías, bennen' bchalje' lo wláz Dios že ni'te, na' yebale' znnágake' nako' to benne' wbabe' benne' ka' bcháljgake' lo wláz Dios že ni'te, na' ba bebane' lo yela' got.

<sup>20</sup>Naž Jesusen' wnnable' légake', na' wnné':

—Cheze le'e, ¿nozkze znnale naka'?

Bechebe Bedw, na' wnné':

—Nako' Benne' Criston', bennen' bsela' Dios.

### Znna Jesús kan za' gótgake' Le'

(Mt. 16:20-28; Mr. 8:30-9:1)

<sup>21</sup>Naž Jesusen' besnisle' légake', na' bchi'le' légake' bi wzéngekle' nitó benne' No nake' Le'. <sup>22</sup>Naž gože' légake':

—Žon byenen sáka'li'a neda', Benne' Golje' Benáčh, na' da' zan da' gaken chia'. Benne' gole ka' len bxoz wnná bia' ka', na' benne' yodo' wsedle ka', wká'ngake' neda' ka'ze. Gótgake' neda', san kate' te chonne ža, Dios yesbane' neda' lo yela' got.

<sup>23</sup>Lezka' gože' yógo'tegake':

—Cha' no benne' žénele' gónlena' neda' tzen, žon byenen wzóe' chela'ale da' naken chie', na' gake' ka to benne' noe'e yag kroze nich chejté'e le'en. Naž gak gónlene' neda' tzen. <sup>24</sup>No benne' ži'e wnné yoe che yela' nban chie', wniten', san benne' wnité' yela' nban chie' dan' žónlene' neda' tzen, gata' yela' nban da' zejlí kanne chie'. <sup>25</sup>Bi be da' chawe' gata'

che to benne' cha' gape' yógo'te da' den yežlyó nga, san wnite' to chi'ize yela' nban chie'. <sup>26</sup>No benne' žedoe'ele' neda', na' žedoe'ele' xtiža'a, lezka' neda', Benne' Golje' Benáč, yedoe'ela' bennen' kate' yelá'a len yela' baní' che Xa', na' len yela' baní' chegak wbás ka' che ya'abá che Dios nich nna bi'a. <sup>27</sup>Da' li žapa' le'e, zej mnita' bałe benne' nga, benne' bi na' gátgake' kate' l'égekle' ža yedjnnábia' Dios.

### Zcha' kan znnna' law Jesús

(Mt. 17:1-8; Mr. 9:2-8)

<sup>28</sup>Kate' ba wdegak xono' ža wdé bchajl Jesusen' da' ki, bchi'e Bedw len Žwa, na' Jakob, na' wžene' to law ya'ado', gan bcháljlene' Dios. <sup>29</sup>Kate' ne zcháljlene' Dios, bža' kan znnna' lawe', na' laže' da' nakwe' beyaken zíla'do'ze, na' wyepen yes baní'. <sup>30</sup>Naž bla' lawgak chope benne' ka' gan zoa Jesusen', na' zcháljlengake' Le'. Zej nake' Moisés len Lías, benne' ka' wnnítalengake' ža ni'te. <sup>31</sup>Žoptie' belyepe' yes baní', na' zcháljlengake' Jesusen' kan za' gate' lo yež Jerusalén, na' yežé'e yežlyó nga. <sup>32</sup>La'kze znnale'en tas Bedon', len benne' ka' nnítalengake' le', na' ben byéngake' l'égekle' yela' baní' che Jesusen', na' chegak benne' chope' ka' nnítalengake' Le'. <sup>33</sup>Kate' žopte benne' ka' bezá'gake' gan zoa Jesusen', naž Bedon' gože' Le':

—Benne' wsedle, gak chawe' gañžo nga. Gonto' chonne yo'o laga', to chio', na' yetó che Moisés, na' yetó che Lías.

Bi nnezle Bedon' dan' znnna'.

<sup>34</sup>Kate' ne zchajle' da' ni, la' wže' te to bejw ga na', dan' bkachen' légake',

na' bžébegake' dan' nnítalengake' lo bejwn'. <sup>35</sup>Naž benle chi'i benne' zchajle' lo bejwn', na' wnné':

—Benne' ni nake' Zi'na'. Nži'ilala' Le'. Le wzé nag da' yi'e le'e.

<sup>36</sup>Kate' beyóž benle chi'i na', toze Jesusen' ngá'nlene' légake'. Benne' wsedle chie' ka' wnnítalengake' žize, na' ža na' bi góžgake' nitó benne' kan nak da' blé'egekle'.

### Žeyón Jesús to xkwide' byo yo'obe' be' xiwe'

(Mt. 17:14-21; Mr. 9:14-29)

<sup>37</sup>Kate' za' ža'ní' yetó ža, Jesusen' len benne' ka' nnítalengake' Le', bedínnegake' law ya'adon', na' za'gak benne' zan ga na', benne' ka' zedjhággake' Jesusen'. <sup>38</sup>To benne' ladjw benne' zan ka' wnnié' zižje. Bliže' Jesusen', na' wnné':

—Benne' wsedle, žáta'yoela' Le' yedjwío' xkwide' byo chia', dan' nakbe' tlícha'tekze bi' chia'. <sup>39</sup>Yo'obe' be' xiwe' da' zkwéžeya'an lebe', na' žzizle'en lebe', na' zbia zene' zide' žoa'abe'. Zchix zlol-le'en lebe', na' batkle žsanen lebe'. <sup>40</sup>Góta'yoela' benne' wsedle chio' ka' yebéjgaken', san bi gókgake'.

<sup>41</sup>Bechebe Jesusen', na' wnné':

—Le'e, benne' bi žeje'le' chia', na' nyal yichjle. Gáka'tega žala' sóalena' le'e, na' gaka' zen laže' len le'e? Le yedjwái' xkwide' byo chion' ga ni.

<sup>42</sup>Kate' ne za'be' zbiga'be' gan zoa Jesusen', be' xiwen' bchix blol-le'en lebe'. Jesusen' bdile' be' xiwen', na' beyone' xkwide' byon'. Naž benezjwe'be' lo na' xabe'.

<sup>43</sup>Bebángekle yógo'te benne' ka' ni'a che yela' wak zen che Dios.

**Jesús znne' da' yoble kan za' gótgake'  
Le'**

(Mt. 17:22-23; Mr. 9:30-32)

Kate' ne žebángekle yógo'te benne' ka' kan nak da' zen da' žon Jesusen', Le' gože' benne' wsedle chie' ka',  
**44**na' wnné':

—Le kwek yichjle da' ni, dan' za' wdégake' neda', Benne' Golje' Benách, lo na'gak benách ka'.

**45**Bi bejní'igekle benne' wsedle chie' ka' da' ni, dan' bi na' wnezjw Dios légake' latje chejní'igeklen', san bi bežoggékle' nnábgekle' Jesusen' kan nak da' ni.

**No benne' nake' blo**

(Mt. 18:1-5; Mr. 9:33-37)

**46**Naž wzó lawgak benne' wsedle ka' che Jesusen' zdil díža'gake'. Želnnable ljéžgake' toe' yetó'e' nole' gake' benne' blo. **47**Žákbe'ele Jesusen' da' zza' láž'e'gake', na' wdele to xkwíde'do', na' bzoe'-be' kwite'.  
**48**Naž gože' légake':

—No benne' gape' to xkwíde'do' ki ba la'ne dan' nakbe' chia', nedkzan' gape' ba la'ne, na' no benne' gape' neda' ba la'ne, lezka' gape' ba la'ne Xá, Bennen' bsele'e neda'. Che len, bennen' zoe' ládjwle, na' nakže' gaxjw láže', benne' ni nake' blo.

**No benne' bi žži'e chežo, žáklene'  
žo'o**

(Mr. 9:38-40)

**49**Naž Zwa bliže' Jesusen', na' wnné':

—Benne' wsedle, ble'elto' to benne' zkónle' žin lo' žebeje' be' xiwe' ka', na' bžonto' biž gonen' dan' bi žónlene' žo'o tzen.

**50**Jesusen' gože' le':  
—Bi wžonle gonen', dan' no benne' bi žži'e chežo, žáklene' žo'o.

**Jesús zdile' Jakob len Zwa**

**51**Kate' za' bawze ža žala' gat Jesusen', na' yeyepe' ya'abá che Dios, ben byene' cheje' lo yež Jerusalén.

**52**Bsele'e benne' wbás chie' ka' nich chjake' zgá'alegake' ka Le', na' jake' to yeždo' gan nbab Samaria, nich chejtíljgake' gan ga'ne' dot yele. **53**Benne' ka' che yežen' bi wdápégake' Jesusen' ba la'ne dan' zeje' lo yež Jerusalén. **54**Kate' Jakob len Zwa, benne' wsedle ka' che Jesusen', blé'egekle' da' ni, góžgake' Le':

—Xan, čnnablto' dinne yi' da' zan' ya'abá che Dios nich wžía yin' légake', gonto' kan ben Lías?

**55**Byechj Jesusen', na' bdile' légake', na' wnné':

—Bi nnézlele biz be' yo'ole.

**56**Neda', Benne' Golje' Benách, bla'nga, kege nich wžía yi'a yela' nban chegak benách ka', san nich yeslá' légake'.

Naž jake' yež yoble.

**Benne' ka', benne' žénegekle'  
chjénlengake' Jesús tzen**  
(Mt. 8:19-22)

**57**Kate' Jesusen' len benne' ka' žónlengake' Le' tzen ne yó'ogake' nez, bžin to benne' ga na', na' gože' Jesusen':

—Xan, žénela' sá'lena' Le' gáte'zeze gan chejo'.

**58**Jesusen' gože' le':

—Beza' ka', zej že' bloj chégakba', na' byínnedo' ka', žiagak xó'ngakba' ka', san neda', Benne' Golje' Benách,

bi de chia' gan gata'a nich yezí'  
laž'a'a.

**59** Naž Jesesen' gože' benne' yoble,  
na' wnné':

—Benlen neda' tzen.

Bennen' gože' Le':

—Xan, benn latje yeyá'a zga'ale  
liž'a', kate' wkáche'ž'a' xa'.

**60** Jesesen' gože' le':

—Be' latje benne' ka' za' gátgake'  
wkáche'gake' benne' gat ka' chégake',  
san le', wyéj, bejzenle benách kan  
znna bia' Dios.

**61** Naž bžin yetó benne', na' gože'  
Jesusen':

—Xan, žénela' sá'lena' Le', san  
benn latje cha'a zga'ale nich  
chejzela' diž'a' ljež'a' ka'.

**62** Jesesen' gože' le':

—No benne' že' laž'e da' de yežlyó  
nga, nake' ka to benne' zga'ne' beže,  
na' zwie' xkóže'le'. Cha' no benne'  
žone' ki, bi nake' zi gone' žin che da'  
znna bia' Dios.

Jesús žsele'e chonnalj chi  
benne' nich chejségake' xtiže'e

**10** Wdé gok da' ki, Xanžon'  
wžíe' yechonnalj chi benne'  
wsedle chie' ka', na' bsele'e chope  
wéjgake' nich chjake' zgá'alegake' ka  
Le' yógo'te yež zen ka', na' yeždo' ka',  
gan za' tie' Le'. **2** Gože' lágake':

—Da' li, dele'e žin chia', da' naken  
ka to yežlyó zen gan žon byenen  
lapa', san babze benne' wen žin chia'  
nnít'a'gake'. Che len, le gáta'yoele  
Dios, Bennen' nake' Xan yežlyón',  
sele'e benne' wen žin ka' gan nak  
yežlyó chien'. **3** Le chej na'a. Le  
wia, neda' žsel'a le'e, na' nakle ka  
zila' ka' zjakba' ládjwgak beko' yixe'  
snia ka'. **4** Bi wa'le bzod mežw, na'

kege yixjw yet, na' bi wa'le yetó  
kwe' zélele, na' bi želele lo nez nich  
wcháljenle benách ka'. **5** Gáte'teze  
yo'o gan cho'ole, zga'ale nnale:

“Da' zka'n chawe' yichj lázdo'žo  
gaken chegak benách nnít'a'gake'  
yo'o ni.” **6** Cha' zoa no benne' ga  
na', benne' zga'n chawe'e, da' zka'n  
chawe' yichj lázdo'žo da' nnablen  
gá'nlenen le', san cha' bi zoa no  
benne' ki ga na', da' zka'n chawen'  
da' nnablen gá'nlenen le'e. **7** Le ga'n  
lo yo'o gan cho'ole, na' le ye'j le gaw  
bi da' gónnagake' le'e, dan' žélkzele  
benne' wen žin da' gawe'. Bi tele  
to to yo'o. **8** Gáte'teze yež gan žinle,  
gan gápegake' le'e ba la'ne, le ye'j  
le gaw bíte'teze da' gónnagake' le'e.

**9** Le yejón benne' yižwé' ka', benne'  
nnít'a'gake' lo yežen', na' le ye'-gake':  
“Ba bla' da' znna bia' Dios gan zoale.”

**10** Gáte'teze yež gan žinle, cha' bi  
gápegake' le'e ba la'ne, le yežoj ga  
na', na' le chejzé lo nez che yežen',  
na' nnale: **11** “Bixte yo che lažle, da'  
dan' labto' zchinntjón', na' naken  
da' zloe'elen nbága'le zia, san žala'  
nnézlele da' ni. Ba bla' da' znna  
bia' Dios ga zoale ni.” **12** Neda' žapa'  
le'e, kate' žin ža chog Dios chegak  
benách ka', sáka'žegak benách ka'  
che yežen' ka sáka'gak benách ka'  
wnnít'a'gake' lo yež Sodoma, yežen'  
bchinj Dios.

Da' gak chegak benne' ka' bi yeyát  
laž'e'gake'  
(Mt. 11:20-24)

**13** Lezka' wnná Jesesen':  
—Da' nyáche'le'e gaken chele le'e,  
benách yež Korazín. Da' nyáche'le'e  
gaken chele le'e, benách yež  
Betsaida. Chela' gok lo yež Tiro,

na' lo yež Sidón yela' wak zen ka'  
 ka da' ka' bena' gan zoale le'e, ža  
 ni'te yeyát láže'gak benne' yež ka',  
 na' wakw kwíngake' laže' ka'ze, na'  
 kó'ogake' de yichjgake', da' wloe'elen  
 ba beyát láže'gake'. <sup>14</sup>Che len, kate'  
 žin ža chog Dios chegak benách  
 ka', sáka'žele le'e ka sáka'gak benne'  
 yež Tiro ka', na' benne' yež Sidón  
 ka'. <sup>15</sup>Le'e, benách ka' zoale lo yež  
 Kapernaum. Gok chele kan wyeple  
 gan cho'ogak benách ka' ya'abá che  
 Dios. Na'a yetjle gan chejžo'ole latje  
 chol chegak benne' gat ka'.

<sup>16</sup>Naž Jesusen' gože' benne'  
 wsedle chie' ka', na' wnné':

—No benne' zze nage' chele le'e,  
lezka' zze nage' chia' neda', na'  
 bennen' zka'ne' le'e ka'ze, lezka'  
zka'ne' neda' ka'ze, na' bennen'  
zka'ne' neda' ka'ze, lezka' zka'ne'  
 ka'ze Xa', Bennen' bsele'e neda'.

### Žežingak benne' ka' bejségake' xtiža' Jesús

<sup>17</sup>Kate' chonnalj chi benne' ka'  
 bsela' Jesusen' nich chejzéngekle'  
 benách diža' chawen' bežíngake'  
 gan zoe', na' wnnágake':

—Xan, be' xiwe' ka' žóngaken kan  
 zmnato' kate' zkonalto' žin lo'.

<sup>18</sup>Jesusen' gože' légake':

—Neda' ble'ela' da' xiwe', na'  
 wbixen zan ya'abá kan žon yi' wzió',  
 dan' žazen lo yo. <sup>19</sup>Le wia nga, neda'  
 bdia' lo na'le yela' wnná bia' nich  
 gak góxwle bele snia ka', na' goxjní'  
 ka', len na'le, na' bi be gaken chele,  
 na' nich wchinnle yela' wnná bia'  
 che da' xiwe', dan' bi zle'elen žo'o  
 chawe'. <sup>20</sup>Na'a, le yebél, kégeze dan'  
 žongak be' xiwe' ka' kan znnale, san  
 dan' zej nyejw lale ya'abá che Dios.

### Žebél Jesús

(Mt. 11:25-27; 13:16-17)

<sup>21</sup>La' na'ze bebél Jesusen', zoalen

Dios Be' La'y Le', na' wnné':

—Zka'n zena' Le', Xe, nako' Xan  
 ya'abá, na' Xan yežlyó nga. Ki žona'  
 dan' bkacho'o da' ki lawgak benne'  
 ka' žákgake' da' zenle'e, na' lawgak  
 benne' sina' ka', san bloe'elo' xkwide'  
 ka' kan zej naken. Ka'kze gaken, Xe,  
 dan' ki žaz lažo'o Le'.

<sup>22</sup>Naž wnné':

—Ba bde Xa' yógo'te lo na'a. Bi  
 zoa no benne' nnezle' no benne'  
 nake' Zi'n Dios, san toze Xažo Dios  
 nnezlen', na' bi zoa no benne' nnezle'  
 no benne' nake' Xažo Dios, san  
 toza' neda', Zi'ne', nnezlan', na' lezka'  
 nnézgekle benne' ka' žénela' neda',  
Zi'ne', wloe'ela' légake' Xa'.

<sup>23</sup>Naž Jesusen' bwie' benne'  
 wsedle chie' ka', na' gože' légake':

—Ba nez zen naken chegak benne'  
 ka' zlé'egekle' da' zlé'elele le'e, <sup>24</sup>dan'  
 žapa' le'e: benne' zan, benne' ka'  
 bcháljgake' lo wláz Dios len benne'  
 wnná bia' ka', gónegekle' lé'egekle'  
 da' zlé'elele le'e san bi blé'egeklen'.  
 Gónegekle' yéngake' da' žénlele le'e,  
 san bi béngeklen'.

### Benne' Samaria, benne' nake' chawe'

<sup>25</sup>Naž la' wzó ža'te to benne' yodo'  
 wsedle, na' nich si' bi'e Jesusen',  
 wnnable' Le', na' wnné':

—Benne' wsedle, žbize žala' gona'  
 nich gata' yela' nban da' zej lí kanne  
 chia'?

<sup>26</sup>Jesusen' gože' le':

—¿Žejni'iilo' da' nyejw le'e yich,  
 dan' bchi'le Moisés? ¿Nakx xbab  
 žono' le' dan' žolo'?

**27** Beží'i bennen', na' wnné':

—Ki znnan: “Bži'il Xano' Dios dot lažo'o, na' len dot yichj lazdo'o, na' len dot yela' žon chio', na' len dot yela' žejn'il chio', na' lezka' žala' ži'ilo' lježo' kan nži'il kwino'.”

**28** Jesusen' gože' le':

—Da' likze kan wnnó'. Ben ki, na' gata' yela' nban na' chio'.

**29** Dan' gónele bennen' yebéj chawe' kwine', gože' Jesusen':

—¿Noz benne' nake' lježa'?

**30** Bechebe Jesusen', na' gože' le':

—To benne' wzé'e lo yež Jerusalén, na' bdinne', zeje' yež Jerikó. Lo nezen' békwgak benne' wbán ka' le'. Btinnegake' ze', na' bēngake' le' we'. Naž bezá'gake' ga na', na' bká'ngake' le' ba žatkze'. **31** Naž wdé to bxoz lo nezen'. Kate' ble'ele' bennen' žie' we', cheža'ale wdíe'.

**32** Lezka' to benne' nbabe' za'só Lebí, benne' ka' žóngake' žin che yodo', wdíe' ga na'. Kate' ble'ele' le', lezka' wdíe' cheža'ale. **33** Lezka' to benne' nbabe' Samaria yoe'e nezen', na' bžine' gawze gan de bennen' žie' we'. Kate' ble'ele' le', beyache' láže'le' le'.

**34** Wbige'e gan die', na' bdebe' set, na' xis uba wal lo we' chie', na' bchelen' laže'. Naž bžie' le' xkože' bia chie', na' bchi'e le' lo yo'o gan želžín benne' ka' yó'ogake' nez, gan wdape chie' le'. **35** Yetó že kate' ba ža'ní', katen' za' yezá' benne' Samaria na' ga na', wleje' lažjwe' che chope ža, na' bka'nen' lo na' benne' xan yo'on', na' gože' le': “Wdape chi'i benne' ni, na' cha' senžo' mežw, neda' yeyizjwan' le' kate' yelá'a.” **36** Na'a, čnakx xbab žono' le'? ¿Nole benne' chonne ki goke' ljež bennen' bengak benne' wbán ka' le' žia?

**37** Bechebe benne' yodo' wsedlen', na' gože' Jesusen':

—Bennen' beyache' láže'le' le'.

Naž Jesusen' gože' le':

—Wyéj na'a, na' ben ki.

**Da' ben Jesús liž Marta len Lia**

**38** Naž Jesusen' beyoé'e nez, na' bžine' to yeždo' gan zoa to no'le lie' Marta, na' no'len' bchi'e Le' liže'.

**39** Martan' zoa no'le bile' lie' Lia, na' Lian' wži'e xni'a Jesusen', na' bze nage' xtiže'e. **40** Martan' wžé' zedle' dan' žónli'e žin. Wbige'e gan zoa Jesusen', na' gože' Le':

—Xan, čbi zeyache' láže'lo' neda' dan' bka'n bi' bila' ni neda', na' toza' žona' žin? Gož-be' gáklenbe' neda'.

**41** Bechebe Jesusen', na' gože' le':

—Marta, Marta, že' zedlo', na' da' zan da' že' lažo'o žonon'. **42** Toze da' žon byenen gonžon, na' Lia ni wžebe' dan' nakže chawe', na' dan' wžebe' bi yegá'n.

**Kan žala' wcháljlenžo Dios**

(Mt. 6:9-15; 7:7-11)

**11** To že na' Jesusen' zcháljlene' Dios. Katen' beyož bcháljlene' Le', to benne' wsedle chie' gože' Le', na' wnné':

—Xan, bsedle neto' wcháljlenzo' Dios, kan ben Žwa, bsedle' benne' ka' žónlengake' le' tzen.

**2** Naž Jesusen' gože' lágake':

—Kate' wcháljlenle Dios, žala' nnale ki:

Xato', zo' ya'abá, ga'n zen lo'.

Da, nna bi'o nga.

Žénelto' gak yežlyó nga kan žaz lažo'o Le', kan žaken ya'abá chio'.

**3** Benn da' gawto' na'a ža.

<sup>4</sup> Benít law cheto' dolan' nbága'to'  
kan neto' ženít lawto' che no  
benne' bi da' žone' cheto'.  
Bi go'o latje gon da' xiwe' ga  
bága'to' dola',  
san beslá neto' lo da' žonen.  
<sup>5</sup> Lezka' Jesusen' gože' légake':  
—Cha' zoa no benne' ládjwle,  
benne' zoa lježe', na' cha' žin to  
benne' liže' gachje yele, naž cheje'  
gan zoa lježen', na' wliže' le', na'  
nne': "Bicha'a, benngaž neda'  
chonne yet xtil, <sup>6</sup>dan' to benne' ze'e  
zi'to' ba bле'e liža', na' bi be de da'  
wa'a-ne' gawe!" <sup>7</sup>¿Yechebe bennen'  
yo'e lo yo'on', na' yi'e le' ki? "Bi  
gon lelo' neda'. Ba nyejw yo'o, na'  
bi' chia' ka' ba délengakbe' neda'. Bi  
gak chasa' nich bi da' gonna' chio!".  
<sup>8</sup>Neda' žapa' le'e: la'kze bi chase'  
nich bi da' wnežjwe' chie' dan' nake'  
lježe', san chase', na' wnežjwe' chie'  
ka da' žiážjele' nich bi gon lelže' le'.  
<sup>9</sup>Che len žapa' le'e:  
    Le nnab, na' Dios gonne' chele.  
    Le chilj, na' žel chele.  
    Le wlíž ža yo'o, na' yaljwn chele.  
<sup>10</sup>No benne' bi da' znnabe', zzi'en,  
na' bennen' bi da' žilje', zžel-lén',  
na' bennen' žliže' ža yo'o, žaljwn  
chie'.

<sup>11</sup>'Cha' zoa no benne' ládjwle,  
benne' nake' xa zkwide', na' cha'  
nnablbe' le' yet xtil, ćwnežjwe'  
chebe' yej? Cha' nnablbe' le' to bel,  
ćwnežjwe'-be' bele? <sup>12</sup>Cha' nnablbe'  
le' to xhit bežjw, ćwnežjwe'-  
be' goxjní? <sup>13</sup>Ki naken, cha' le'e  
bi nakle chawé', san nnézlele  
wnéžjwle chegak zi'nle ka' da'  
naken chawé', wak wxén láže'žele  
Xale zoe' ya'abá gonne' Dios Be' La'y  
chele, nol-le nnáblele Le'.

Znnágake' Jesús žone' žin len yela'  
wak che da' xiwe'

(Mt. 12:22-30; Mr. 3:19-27)

<sup>14</sup>To ža Jesusen' bebeje' be' xiwe'  
da' yo'o to benne', dan' žonen ga  
bi žak nnie'. Kate' bežój be' xiwen',  
bchalj bennen' bi gok nnie', na'  
bebángekle benách ka' wnníta'gake'  
ga na'. <sup>15</sup>Bále benne' ka' wnnágake':  
—Žebeje' be' xiwe' ka' len yela' wak  
che Belzebú da' xiwe', xangak be'  
xiwe' ka'.

<sup>16</sup>Gónegekle yebałe benne' ka' si'  
biá'gake' Jesusen', na' belnnable' Le'  
gone' to da' gak bian' da' zan' ya'abá  
che Dios. <sup>17</sup>Gókbe'ele Jesusen'  
da' žénegekle' góngake', na' gože'  
légake':

—Gáte'ze ganzej nnita' benne'  
wnná bia' ka', cha' žoj chóplegak  
benne' ka', kwia yí'gake'. Cha' žoj  
chóplegak benách ka' nníta'gake' to  
yo'o, yeyóz chégake'. <sup>18</sup>Lezka' žak  
che da' xiwe', dan' nzin' Belzebú.  
Cha' žoj chóplegak benne' ka'  
yó'gake' lo nan', čnakx gak dia'  
yela' wnná bia' chen? čNa'a nnale  
žebeja' be' xiwe' ka' len yela' wak  
che Belzebú? <sup>19</sup>Cha' neda' žebeja' be'  
xiwe' ka' len yela' wak che Belzebú,  
čnozkze benne' žonne' yela' wak  
chegak benne' ka' žónlengake' le'e  
tzen, nich žebéjgake' be' xiwe' ka'?  
Che len, da' žongak benne' ka' nak  
bian' nchíxele le'e. <sup>20</sup>Cha' neda'  
žebeja' be' xiwe' ka' len yela' wak  
che Dios, da' li ba bla' da' znnna bia'  
Dios gan zoale.

<sup>21</sup>Kate' to benne' wale nzi' lo ne'e  
da' zdíl-lene', na' žape chi'e liže', da'  
ka' nape' zej nga'nen chawé'. <sup>22</sup>Na'a,  
cha' za' yetó benne', bennen' nakže'

wale ka le', wléj wchochje' le', na' yeké'e yógo'te da' zdíl-lene', dan' žxen laže'en, na' chise' da' gota' che bennen'.

**23**'Cha' zoa no benne' bi žónlene' neda' tzen, nake' benne' žži'e chia' neda'. Cha' zoa no benne' bi ztóblene' neda', žóslase'.

**Kan nak che be' xiwe', da' Žežinen latje chen**  
(Mt. 12:43-45)

**24**Lezka' wnná Jesusen':

—Kate' Žežoj to be' xiwe' lo benne', zdán gan nbiže, žiljen gan yezi' lažen'. Cha' bi žel chen, naž nnan: "Yeyá'a gan bžoja!" **25**Kate' Žežinen ga na', žejkakan' bennen', nake' ka to yo'o da' ba nloan, na' ba nba'an nich no benne' chejsóe' ga na'. **26**Naž chejen, na' chejxín' yegáz be' xiwe' ka', da' ka'zej nakžen xiwe', na' chó'ogaken bennen'. Na'a, da' gaken che bennen' gakžen zi' ka dan' goken chie' zga'ale.

**Yela' ba nez zen da' naken dot li laže'**

**27**Kate' ne zchalj Jesusen' da' ni, to no'le zoe' ladjw benne' zan ka' wnné' zižje, na' wnné':

—Ba nez zen naken che no'len' bi'e Le' lo li'e, na' lezka' naken che lcho' no'len' gan gož'o.o.

**28**Bechebe Jesusen', na' wnné':

—Ba nez zenže naken chegak benne' ka' želyenle' xtiža' Dios, na' žóngake' kan znnan.

**Znnábgekle' Jesús gone' to da' gak bian' no nake'**

(Mt. 12:38-42; Mr. 8:12)

**29**Kate' ne želžingak benne' zan gan zoa Jesusen', wzó lawe' zchalje', na' wnné':

—Benne' wen da kegle ki želnnable' neda' gona' to da' gak bian' gan za' yela' wak chia'. San bi be da' gak bian' lé'egekle'. Toze da' gak bian' kan gok che Jonás lé'egeklen'. **30**Dan' goken che Jonasen' gok to da' nak bian' lawgak benne' ka' wnnít'a'gake' lo yež Nníibe. Lezka' gaken chia' neda', Benne' Golje' Benách. Gaka' to da' nak bian' lawgak benne' ka' nnít'a'gake' ža ni zoažo na'a. **31**Kate' Žin ža chog Dios chegak benách ka' da' sáka'gake', katen' wchi'a laže'e benne' ka' nnít'a'gake' ža ni zoažo na'a, Dios yechise' no'len' wzóe' ža ni'te, no'len' wnná bi'e benách ka' che yežlyón' da' žen' chelá'a gan zde wbíz byo' zag ka'. Da' ben no'len' wloe'elen zej nbaga' benne' ki zia. Ki gaken dan' bžoj no'len' gan nak zí'to' nich wzé nage' diža' che yela' žejní'il da' bchalj Salomón, benne' wnná bi'e benne' Israel ka'. Na'a, zoa' neda' nga, na' nakža' blo ka gok Salomón na'. **32**Lezka', Dios yechise' benne' ka' wnnít'a'gake' lo yež Nníibe kate' Žin ža choge' chegak benách ka', katen' wchi'a laže'e benne' ka' nnít'a'gake' ža ni zoažo na'a. Da' bengak benne' Nníibe ka' wloe'elen zej nbaga' benne' ki zia. Ki gaken dan' beyát láže'gak benne' ka' wnnít'a'gake' lo yež Nníibe katen' béngekle' da' bchalj Jonasen'. Na'a zoa' neda' nga, na' nakža' blo ka gok Jonasen'.

**Da' žsa'ní' lo yichj lázdo'žo**

(Mt. 5:15; 6:22-23)

**33**Lezka' wnná Jesusen':

—Kate' no benne' zzalje' yi', bi zgo'en gan ngache', na' bi zdosen'

zan kak, san zzoen' sibe gan la'ten, nich wza'nín' chegak benne' ka' želyo'e lo yo'on'. <sup>34</sup>Zej nak yej lawžo ka to da' zgo'on baní' lo yichj lázdo'žo. Cha' yej lawo' zej naken chawe', dotio' nžan' da' naken baní'. San cha' yej lawo' bi zej naken chawe', dotio' nžan' da' naken chol. <sup>35</sup>Wdape chi'i kwino' cha', nich dan' zgo'on baní' lo yichj lazdo'o bi yeyaken chol. <sup>36</sup>Ki naken, cha' dotio' nžan' da' naken baní', bi be da' naken chol zóalenen le', na' le'elo' binlo yógo'te, kan žak kate' zza'ní' yi' gan zo'.

Jesús žesbage'e benne' yodo' ka' zia  
(Mt. 23:1-36; Mr. 12:38-40; Lk. 20:45-47)

<sup>37</sup>Kate' beyož bchalj Jesusen' da' ni, to benne' yodo' fariseo bliže' Le' nich chejtáwlene' le'. Kate' Jesusen' wyo'e liž benne' yodon', wži'e, na' wzó lawe' žej' žawé!. <sup>38</sup>Kate' benne' yodo' fariseon' ble'ele' Le', bebanle' dan' bi wdíb Jesusen' ne'e kate' za' gawe'. <sup>39</sup>Naž Xanžon' gože' le':

—Le'e, benne' yodo' fariseo ka', žib kwinle kan žible lawle da' žej žáwlene, san lo yichj lázdo'le nža'le da' kegle ka', na' zza' láže'le da' bi naken chawe!. <sup>40</sup>Le'e bi žejn'ile. ÐBi nnézlele, Dios, Bennen' zle'ele' da' zoa lawle lezka' zle'ele' da' yo'o lo yichj lázdo'le? <sup>41</sup>Na'a, le wnežjw benne' yache' ka' che da' naple. Naž yógo'te da' naple yeyaken chawe'.

<sup>42</sup>'Da' nyáche'le'e naken chele le'e, benne' yodo' fariseo ka. Žízjwle che yodo' to kwe' che to chi kwe' da' zzi'le che yixe' weje, na' che yixe' rod, na' chegak yixe' kwando', san to zdézele da' naken chawe', na' yela' nži'il chele Dios. Da' ki žon byenen

gonle, na' bi wka'nle yezika' da ka' žonle.

<sup>43</sup>'Da' nyáche'le'e naken chele le'e, benne' yodo' fariseo ka'. Žénelele kwe'le gan nak blo lo yo'o gan žol-le xtiža' Dios. Lezka' žénelele gápegak benne' ka' le'e ba la'ne lawgak benách ka'.

<sup>44</sup>'Da' nyáche'le'e naken chele le'e, benne' yodo' wsedle ka', na' le'e, benne' yodo' fariseo ka', benne' zloé'ezele chawe' kwinle, dan' nakle kan zej nak yežw ba ka' chegak benne' gat ka', da' ka' bi zej nla' lawn, na' želdá benách ka' láglegaken, na' bi žákbe'egéklen'.

<sup>45</sup>Naž beží'i to benne' yodo' wsedle, benne' žake' da' bchi'le Moisés, na' gože' Jesusen':

—Benne' wsedle, kate' znno' ki, lezka' neto' žon zi'o.

<sup>46</sup>Jesusen' gože' le':  
—Lezka' da' nyáche'le'e naken chele le'e, benne' yodo' wsedle ka', žakle da' bchi'le Moisés. Ki naken dan' žesbága'le benách ka' to ywa' zi'i da' bi gak no benne' we'en, san le'e ni láte'ze bi zdañen' len ni'a na'le.

<sup>47</sup>'Da' nyáche'le'e naken chele le'e, dan' zzoale da' xtan ka' lawgak yežw ba ka' gan zej ngache' benne' ka' bcháljgake' lo wláz Dios, na' betgak xa wdé chele ka' légake.

<sup>48</sup>Ki naken, zhoa lile žónlenle tzen da' bengak xa wdé chele ka', dan' betgak xa wdé chele ka' légake', na' le'e zxoale da' xtan ka' lawgak yežw ba ka' gan zej ngache'e.

<sup>49</sup>'Che len, lo yela' žejn'íl chie', Dios wnné' ki: "Sel'a'a benne' ka' wcháljgake' lo wlaza' neda', na' benne' wbás chia' ka', gan zoale, na' benne' ki, gotle bale', na' kwia

láže'le yebałe'." <sup>50</sup>Ki gon Dios dan' choge' chegak benách ka' nnít'a'gake' že ni zoažo na'a gátgake' ni'a che žen chegak yógo'te benne' ka' bcháljgake' lo wlaze' Le'. Xa wdé chele ka' bétgake' benne' ka' kate' wzó law žata' yežlyó nga, <sup>51</sup>kate' wzó law wzóa bennen' bete' Abel, zi'n Adán, na' zejte bétgake' Secría. Bétgake' le' gachje láwe'le gan de bkog la'y gan zzéygake' bia beždo' ka' law Dios, na' gan zoa latje la'y. Che len, žapa' le'e, Dios choge' chegak benne' ka' nnít'a'gake' že ni zoažo na'a gátgake' ni'a che žen chegak yógo'te benne' ka', dan' xa wdé chele ka' bétgake' lágake'.

<sup>52</sup>'Da' nyáche'le'e naken chele le'e, benne' yodo' wsedle ka', žakle da' bchi'le Moisés. La' l'ézele nzi' lo na'le zi'n ya che latje gan zžel-lžo yela' žejn'i'il. Le'e bi žo'ole, na' ūséywle xnezagak benne' ka' zénegekle' chó'ogake' ga na'.

<sup>53</sup>Kate' beyóž bchaljlen Jesusen' lágake' da' ni, benne' yodo' wsedle ka' len benne' yodo' fariseo ka' bžá'ale'egake' Le', na' wzó lawgake' želnnable' Le' kan nak da' zan da' žákgaken, <sup>54</sup>nich kwéjgake' Le' diža' nich gak yesbágagake' Le' zia ni'a che da' yechebe'.

### Žsedle Jesús kan nak yela' zloé'ezele chawé' kwin

**12** La' že na'ze bdobgak zan gaywá' benách gan zoa Jesusen', na' zejte wléj ljéžgake'. Naž wzó law Jesusen' zcháljlene' benne' wsedle chie' ka', na' wnné':

—Le gape chi'i kwinle che da' naken ka kwa zichj che yet xtil chegak benne' yodo' fariseo ka', dan'

naken yela' zloé'ezele chawé' kwin chégake'. <sup>2</sup>Bi be de da' žaken že žize dan' bi la' lawlen, na' bi be de da' ngachen' dan' bi gak bian'. <sup>3</sup>Che len, yógo'te da' ba wnnale gan nak chol, yéngakle benách ka' gan nak lo baní', na' da' bchaljle ngáche'ze gan wzóa lo yo'o nyejwn, gaken da' wchaljgak benách ka' lawgak yógo'te benách.

### No Benne' žala' žébežo

(Mt. 10:28-31)

<sup>4</sup>Lezka' wnná Jesusen':

—Žapa' le'e, zí'na'do' ka': bi žébele benne' ka' žótgake' benách ka', san te na' biž bi gak góngake' chégake'.

<sup>5</sup>Wloe'ela' le'e no benne' žala' žébele. Le žébe Bennen' gak ke'e yela' wnná bia' cho'ne' le'e lo yi' gabíl. O', žapa' le'e, le žébe Bennen'.

<sup>6</sup>'Žóte'gake' gayo' byínnedo' ka' len chope mežw lasdo', san Dios bi žal laže'e nitoba'. <sup>7</sup>Lézka'kzen, yógo'te yicha' yichjle zej nbaben law Dios. Che len, bi žébele. Záka'žele le'e ka byínnedo' zan.

### Benne' ka' znnágake' zej nake' che Jesús

(Mt. 10:32-33; 12:32; 10:19-20)

<sup>8</sup>Lezka' wnná Jesusen':

—Žapa' le'e: yógo'te benne' ka' znnágake' zej nake' chia' neda' lawgak benách, lezka' neda', Benne' Golje' Benách, nnia' zej nake' chia' lawgak wbás che ya'abá ka'. <sup>9</sup>Benne' ka' znnágake' bi zej nake' chia' neda' lawgak benách, lezka' neda' nnia' bi zej nake' chia' lawgak wbás che ya'abá ka'.

<sup>10</sup>'Yógo'te benne' ka', benne' nnégake' chia' neda', Benne' Golje'

Benách, wak yenít law Dios  
chégake', san cha' no benne' nnie'  
che Dios Be' La'y, bi yenít law Dios  
che bennen'.

<sup>11</sup>'Kate' wché'gake' le'e gan nak  
lo yo'o gan zdobgak benne' judío  
ka' nich yéngkle' xtiža' Dios, na'  
lawgak benne' ka' wchi'a láže'gake'  
le'e, na' lawgak benne' wnná bia' ka',  
bi kwe' zédlele ni'a che da' gonle, o  
da' yecheble, o da' žala' nnale. <sup>12</sup>La'  
ža na'ze wloé'el Dios Be' La'y le'e da'  
žala' nnale.

**Yela' wnni'a chežo wak  
gonen ga gal láže'žo Dios**

<sup>13</sup>To benne' ladjw benne' zan ka'  
gože' Jesusen', na' wnné':

—Benne' wsedle, gož benne'  
bicha'a gonne' da' žeyala' chia' che  
da'gota' che xato'.

<sup>14</sup>Jesusen' gože' le'e:

—Benne'. ¿Zoa no benne' bzoe'  
neda' nich wchi'a laža'a le'e, o  
wzozja' da' de chele?

<sup>15</sup>Naž Jesusen' gože' benne' ka'  
nníta'gake' ga na', na' wnné':

—Le wia nga. Le gape chi'i kwinle  
nich bi tonle yela' gape. Kégeze da'  
náple'ele wzóan le'e lo yela' žebele.

<sup>16</sup>Naž Jesusen' bcháljlene' légake'  
da' bsaka' le'e, na' wnné':

—Wzóa to benne' wdápeli'e  
yela' wnni'a, na' bnéžywle'e yežlyó  
chie'. <sup>17</sup>Naž wzá' laže'e, na' wnné':  
“¿Nakxkze gona'? Bi nžo'o ga gape  
chia' da' žonn yežlyó chia.” <sup>18</sup>Naž  
wnné': “Ki gona. Wchinmja' yo'o  
ka' gan žape chi'a da' žata' chia', na'  
gona' yo'o zenže ka', gan gape chi'a  
da' žata' chia', na' dan' ba de chia'.  
<sup>19</sup>Naž yapa' kwina': ba nápel'i'a da'  
ba btoba', da' ye'j gawa' zante yiz.

Yezí' laža'a. Ye'j gawa', na' yebela'.”

<sup>20</sup>Naž Dios gože' le'e: “Le' bi be  
nnezlo'. Na'a yele gato'. Na'a, īnože  
benne' gak chie' dan' ba btobon?'”

<sup>21</sup>Ki žaken che bennen' ztobe'  
chekze' yela' wnni'a, na' bi žone' da'  
zej naken ka yela' wnni'a law Dios.

**Dios žape chie' benách chie' ka'**

(Mt. 6:25-34)

<sup>22</sup>Wdé na' Jesusen' gože' benne'  
wsedle chie' ka', na' wnné':

—Che len žapa' le'e: bi kwe'  
zédlele ni'a che da' ye'j gawle,  
dan' nbánlenle, o ni'a che laže' da'  
gákwle. <sup>23</sup>Záka'že yela' nban chele  
ka da' žawlen, na' záka'že bela' žen  
chele ka laže' da' žákwlen. <sup>24</sup>Le  
wia kan žak chegak sechj ka'. Bi  
žázgakba', na' bi žel-lapba', na' bi jez  
nnita' yo'o ka' chégakba' gan gape  
chí'igakba' da' žata' chégakba', san  
Dios zwawe' légakba'. Bi záka'že le'  
e ka byínnedo' ka'? <sup>25</sup>¿Noz  
benne' ládjwle le'e gak gone' ga  
soe' nbane' yetó chí'ido'ze dan' že'  
zedle' chen? <sup>26</sup>Che len, cha' bi gak  
gonle da' naken láte'do'ze, ¿biž chen'  
že' zédlele ni'a che da' naken da'  
zenle'e?

<sup>27</sup>Le wia kan zgólegak yéjedo'  
ka'. Bi žóngaken do laže', na' bi  
žábgaken laže', san žapa' le'e, la'kze  
góta'le'e yela' wnni'a che Salomón,  
bennen' wnná bi'e, lažen' da' gokwe'  
bi gokžen xtan ka jez nak yéjedo' ki.  
<sup>28</sup>Cha' Dios žone' xtan yeje yíxe'do'  
ka' da' žégaken na'a le'e yíxe', na'  
wxé wiž chéygaken lo yíl', ¿bi  
gone' da' zenže chele le'e, le'e na' bi  
žejle'le che Dios dot láže'le? <sup>29</sup>Che  
len, bi we' láže'le da' ye'j gawle, na'  
bi kwe' zédlele chen. <sup>30</sup>Yógo'te da'

ki žilgak benách ka' nníta'gake' yežlyó nga, san ba nnézkzele Xale Dios da' ka' žiažjele. <sup>31</sup>Le we' laže' gonle kan znna xtiža' Dios, na' yógo'te da' ki gonne' chele.

### **Yela' wnni'a da' ztobžo ya'abá che Dios**

(Mt. 6:19-21)

<sup>32</sup>Lezka' wnná Jesusen':

—Bi žébele le'e, nakle zíla'do' chia' ka'. Bi nakle benne' zan, san Xale Dios žaz laže'e gonne' le'e latje chejsoale gan znna bi'e Le'. <sup>33</sup>Le gote' da' naple, na' le wnežyw da' si'le chegak benách yache' ka'. Ki gaken, gonle bzod mežw chele da' bi kwia yin', na' wtoble yela' wnni'a da' bi te chen ya'abá che Dios, gan bi gak žin benne' wbán, na' bi galj bélédo' chen. <sup>34</sup>Gan že' yela' wnni'a chele, we' láže'le žinle ga'na'.

### **Žala' gakžo ban laže'**

<sup>35</sup>Lezka' wnná Jesusen':

—Le gak ban laže', na' le wzálj yi' da' wza'nín' chele. <sup>36</sup>Le gak ka benne' wen žin ka', benne' želbeze' ža yelá' xángake', bennen' wyeje' lni che yela' zchag na', nich kate' yežine', wliže', na' la' wsáljwtegake' nich yeyo'é'e. <sup>37</sup>Ba nez žen gaken chegak benne' wen žin ka', benne' gak ban láže'gake' kwézgake' kate' yela'že xángake'. Da' li žapa' le'e, xángaken' wpá' kwine', na' kweke' légake' gan ye'j gáwgake', na' wsí'ni'e dan' gáwgake'. <sup>38</sup>Lákze yelé'e kate' ba žák chol o gachje yele, cha' yedjxake'e légake' nníta'gake' želbeze' le', ba nez žen gaken chegak benne' wen žin ka'. <sup>39</sup>Žala' nnézlele da' ni. Chela'

nnezle xan yo'o biž ža žin benne' wbán, gak ban laže'e, na' bi we' latje bennen' wžie' yežw liže', nich bi kwane' da' de liže'. <sup>40</sup>Che len, le gak ban laže' le'e, dan' yelá'a neda', Benne' Golje' Benách, to ža katen' bi kwezle neda'.

### **Benne' wen žin chawe', na' benne' wen žin bi nake' chawe'**

(Mt. 24:45-51)

<sup>41</sup>Naž Bedw wnnable' Jesusen', na' wnné':

—Xan, čži'o néto'ze da' ni da' zsaka' lebo', o ži'o yógo'te benách da' ni?

<sup>42</sup>Xanžon' gože' le', na' wnné':

—čNožken' benne' wen žin chawe', benne' žejni'ile', na' nzi' lo ne'e lo wláz xane'? Benne' ni, xane' wdíe' lo ne'e liže', nich kate' gala' gawgak benne' ka' nníta'gake' liže', na' wnežjwe' légake' da' gáwgake'.

<sup>43</sup>Ba nez žen gaken che benne' wen žin na' kate' yelá' xane', cha' yedjxake'e le' žone' žin na' da' bdien' lo ne'e. <sup>44</sup>Da' li žapa' le'e, xane' wdíe' lo na' benne' wen žin chawen' yógo'te da' de chie'. <sup>45</sup>Cha' no benne' wen žin gekle' bi yelá' ze xane', na' so lawe' wsaka' zi'e yezika' wen žin ka', benne' byo ka', na' no'le ka', na' so lawe' ye'j gawe', na' sožle', <sup>46</sup>naž yelá' xan benne' wen žin na' kate' bi kweze' le', o kate' bi gákbe'ele', na' wsaka' zi'e benne' wen žin na', benne' bi nake' chawe', na' choge' chie' kwia yi'e kan nžog chegak benne' ka' bi žejlé'gake' che Dios.

<sup>47</sup>'Benne' wen žin na', benne' nnezle' da' ženele xane', na' bi zoe' zbeze', na' bi žone' kan wnná xane', benne' ni, wsaka' zi'le'e xane' le'.

<sup>48</sup>Cha' to benne' wen žin bi nnezle'

da' žénele xane', na' cha' gone' da'  
gonen ga bage'e da' gonen ga wsaka'  
zi' xane' le', wsaka' zi'e benne' wen  
žin ni láte'do'ze. No benne' nzi' lo  
ne'e da' zenle'e, da' zenle'e yennáb  
xane' lo ne'e, na' bennen' xane' bxeñ  
laže'e le' da' zenže, lezka' da' zenže  
yennáb xanen' lo ne'e.

### Da' nak Jesusen gon choplen benách ka'

(Mt. 10:34-36)

**49** Lezka' wnná Jesusen':  
—Bla'a neda' nich wzena' yi'  
yežlyó nga, na' že' zedla' nich zen  
yin'. **50** Na'a, de to da' žala' saka'a  
neda' da' naken ka to da' yezó'a  
nis, na' že' zedla' kate' gakžen chia'.  
**51** ¿Žéklele le'e bla'a neda' nich wzó'a  
žize da' žaken yežlyó nga? Žapa'  
le'e: O'o. Bla'a nich ko'a da' gon  
chople benách ka' nnítá'gake' yežlyó  
nga. **52** Na'a so law gayo' benne' ka',  
benne' nnítá'gake' to yo'o gák'gake'  
chope la'a. Chonne' tíl-lengake'  
chope benne' ka', benne' zej nzi'e  
xtiž'a'a, na' chope' ka' tíl-lengake'  
chonne' ka'. **53** No benne' zoa kwide'  
byo chie' tíl-lene' zi'en', na' kwide'  
byon' tíl-lene' xaben'. To no'le zoa  
kwide' no'le chie' tíl-lene' zi'en',  
na' kwide' no'len' tíl-lene' xna'ben'.  
No'len' zoa zoa' ližen' tíl-lene' zoa'  
ližen', na' zoa' ližen' tíl-lene' to'  
zi'en'.

### Da' žakgak na'a ža da' zej nak bian'

(Mt. 16:1-4; Mr. 8:11-13)

**54-56** Lezka' Jesusen' gože' benne'  
zan ka' nnítá'gake' ga na', na' wnné':  
—Nnézkzele dan' znnágake' benách  
ka', znnágake': "Kate' že' bejw kwele  
wak yejw. Kate' žechj be' bi gak  
yejw." Žakkzen kan znnágake'. Le'e,

benne' bi nnezle ka'. Žak znnéya'ale  
da' gon lawe' ža, san bi žákbe'elele  
nbága'le zia ni'a che da' žónkzele.

**Žala'** yegá'nlenžo chawe' no benne'  
žže'e žo'o  
(Mt. 5:25-26)

**57** Lezka' wnná Jesusen':

—¿Biz chen' bi zchi'a láže'kzle le'e  
kan nak da' naken chawe'? **58** Cha'  
zoa no benne' bi da' yennable' le',  
na' zejle nich žinle yolawé', be' laže'  
yegá'nleno' bennen' chawe' kate'  
ne yo'ole nez, nich bi yesbage'e le'  
zia law benne' zchi'a laže'e le'e, na'  
bennen' zchi'a laže'e wdíe' le' lo na'  
benne' žsejwe' liž ya, na' bennen'  
wsejwe' le' liž yan'. **59** Žapa' le', bi  
yežojo' ga na' kate' chízjwžo' dot da'  
nbago'o che bennen'.

### Žon byenen yeyát láže'žo

**13** La' ža na'ze bžingak benne'  
ka' ga na', na' bzéngekle'  
Jesusen' kan ben Pilato. Bete'  
bałe benne' Galilea, na' wzí'e žen  
chégake', na' bchagen' len xchengak  
bia beže, bia ka' ba bétgake'-ba' nich  
wžíagake' xchéngakba' law Dios.

**2** Bechebe Jesusen', na' gože' légake':  
—¿Žéklele le'e wbága'žegak benne'  
Galilea ka' dola' ka yezika' benne'  
Galilea ka', dan' belzake'e ki? **3** Žapa'  
le'e: O'o, na' cha' bi yeyát láže'le,  
lezka' kwia yi'le yógo'tele. **4** Lezka'  
goken chegak chino' chonne benne'  
ka', bejbaga' yo'o zan kwia na', da'  
nzin' Siloé, légake', na' gótgake'.  
¿Žéklele le'e belbága'že benne' ka'  
zia ka yezika' benne' ka' nnítá'gake'  
lo yež Jerusalén? **5** Žapa' le'e: O'o,  
na' cha' bi yeyát láže'le, lezka' kwia  
yi'le yógo'tele.

**Žsaka' lebe Jesús che yag  
higo dan' bi be wžian**

**6**Naž bzaka' lebe Jesusen', na'  
gože' légake':

—Wzóa to benne', na' wzóa to yag higo da' gozen' gan nak lo yežlyó chie'. Twiz twiz bejwíe' cha' zbia yagen', san bi be bžel-le'. **7**Naž gože' benne' žin lo yežlyó chien', na' wnné': “Ba gok chonniz žida' žeyilja' da' kwia yag higo ni, san bi be žežel-lan'. Bchogen. ¿Bíz chen' kon lanen yežlyó nga?” **8**Naž bechebe benne' wen žin na', na'  
gože' le': “Xan, bka'nen yetó yízzeze, na' wzacha' yo kwe'j kožen, na'  
wžá'n bebe. **9**Cha' kwia yag ni, na'  
yega'nen wen, san cha' bi be kwian,  
naž chogon!”

**Jesús žeyone' to no'le  
yižwé' kate' nak ža la'y**

**10**To ža žedle Jesusen' benách ka' nnít'a'gake' lo yo'o gan zdobgak benne' judío ka' nich yéngekle' xtiža' Dios kate' nak ža la'y chégake'. **11**Zoa to no'le ga na' ba gok chino' chonne yiz yoe'e yižwé', dan' yoe'e be' xiwe' da' žonen ga bizej nnita' benách ka' chawé', na' nyéchwteze' zde', na' bi žak yelí kwine'. **12**Katen' Jesusen' ble'ele' no'len', bliže' le', na' wnné':

—Nó'ledo', ba beyako'.

**13**Naž Jesusen' bxoa ne'e le', na'  
la' blite kwin no'len', na' bka'n zene'  
Dios. **14**Naž bža'a benne' blo che  
yo'o gan želyenle' xtiža' Dios. Zže'e  
dan' beyón Jesusen' no'len' kate' nak  
ža la'y. Benne' blon' gože' benne' ka'  
nnít'a'gake' ga na', na' wnné':

—Xop ža de gonžo žin. De latje lo  
ža ka' yidle nich no benne' yeyone'  
le'e, na' kege ža la'y.

**15**Naž beži'i Xanžon', na' wnné':

—Le'e, benne' ka' zloé'ezele chawé'  
kwinle, žbi žeježle bia beže ka' che  
chele gan dágakba' kate' nak ža la'y,  
na' chjwá'le-ba' we'j nis? **16**No'le ni  
nake' za'só Bran, na' chino' chonne  
yiz ba gok žsaka' zi' da' xiwe' le'.  
¿Bi žala' no benne' yeslé' le' lo nan'  
la'kze nak ža la'y?

**17**Kate' wnná Jesusen' da' ni,  
bedoé'egekle yógo'te benne' yodo'  
ka' nnít'a'gake' ga na', na' belžé'e  
Le', san bebégekle yezika' benách  
ka' nnít'a'gake' ga na'. Ki béngake'  
dan' blé'egekle' da' zen ka' da' žon  
Jesusen'.

**Žsaka' lebe Jesús che bínnedo'  
mostasa**

(Mt. 13:31-32; Mr. 4:30-32)

**18**Naž wnná Jesusen':

—¿Nakxkze žak zgole da' znnna bia'  
Dios, o bize wsaka' lebzón? **19**Žaken  
kan žak che to bínnedo' mostasa,  
dan' wží' to benne', na' gozen' gan  
nak lo yežlyó chie'. Bgole yag  
mostasan', na' goken to yag zen, na'  
bžingak byínnedo' ka', na' béngakba'  
xó'ngakba' lo ni'a nen'.

**Žsaka' lebe Jesús che kwa zichj che  
yet xtil**

(Mt. 13:33)

**20**Lezka' wnná Jesusen':

—¿Bízkze wsaka' leba' da' znnna bia'  
Dios? **21**Naken ka kwa zichj che yet  
xtil, dan' wží' to no'le, na' bchixen'  
chonne kwe' kwa yet xtil, na' bgole  
dot kwan'.

**To gan žala' težo da' naken to Ichido'**  
(Mt. 7:13-14, 21-23)

22 Kate' Jesusen' yoe'e nez zeje' Jerusalén, wdíe' lo yež zen ka', na' yeždo' ka', na' žedle' benách ka' nníta'gake' latje ka'. 23 To benne' wnnable' Jesusen', na' wnné': —Xan, čbabze benne' ka' yelágake'? Jesusen' gože' benne' ka' nníta'gake' ga na', 24 na' wnné': —Le we' laže' cho'ole zaka' gan žo'ogak benách ka', da' naken to Ichido', dan' žapa' le'e: yénegekle benne' zan chó'ogake' ga na', san bi sáke'gakle'. 25 Te chas xan yo'o, na' wsejwe' yo'o, le'e na' soale la' lí'ale, so lawle wližle že yo'on', na' ye'le-ne': “Xan, xan, bsaljw cho'oto.” Naž yeží'i bennen', na' yi'e le'e: “Bi nnezla' nož benne' le'e.” 26 Naž so lawle nnale: “We'j bdáwlento' Le', na' bsedlo' gan nak lawe' ya'a cheto'.” 27 Naž yi'e le'e: “Žapa' le'e, bi nnezla' ga benne' le'e. Le kwas ga zoa' ni, yógo'tele žonle da' kegle.” 28 Naž kwež nyáche'le, na' wxéj láye'le kate' lé'elele Bran, len Isaak, na' Jakob, na' yógo'te benne' ka' bcháljgake' lo wláz Dios, benne' ka' chejnníta'gake' gan znna bia' Dios, san le'e ga'nle la' lí'ale. 29 Žingak benne' ka' žójgake' zaka' gan zla' wbíz, na' zaka' gan ženen, na' zaka' gan za' be' zag, na' zaka' gan zde wbíz byo' zag ka', na' kwé'gake' yej gáwgake' gan znna bia' Dios. 30 Naž bale benne' ka' gákgake' benne' blo, benne' ka' ngá'ngake' ka'ze na'a, na' bale benne' ka', benne'zej nake' benne' blo na'a, gá'ngake' ka'ze.

**Zbež nyache' Jesúš ni'a chegak benách Jerusalén**  
(Mt. 23:37-39)

31 La' že na'ze bžingak benne' yodo' fariseo ka' gan zoa Jesusen', na' góžgake' Le': —iBežój! iBežónnj nga, dan' žénele Herodes gote' Le'!

32 Jesusen' gože' légake': —Le chej. Le chejzenle bennen' nake' ka to beza', da' znnia': Bwia nga, žebeja' be' xiwe' ka', na' žeyona' benách ka' na'a, na' wxé, na' wižj, na' yeyóž gona' žin chia'. 33 Žon byenen yá'lena' xneza' na'a, na' wxé, na' wižj, na' žina' lo yež Jerusalén, dan' žótgake' benne' ka' ga na', benne' zcháljgake' lo wláz Dios.

34 Le'e, zoale Jerusalén. Žotle benne' ka' zcháljgake' lo wláz Dios, na' zže'ele yej benne' wbás ka' žsel'a Dios chele. Zan chi'i gónela' wtoba' le'e chia' kan žon zkoko', ztobba' bríse'do' ka' zan xilba', san bi gónelele. 35 Le wia nga, ka'ze ga'n ližle, na' žapa' le'e, biž lé'elele neda' na' zejte nnale: “Ba nez zen gaken che bennen' ze'e lo wláz Xanžo Dios.”

**Jesúš žeyone' to benne' yoe'e yi**

**14** Kate' nak že la'y chegak benne' judío ka', wyó'o Jesusen' liž to benne' wnná bia', benne' yodo' fariseo. Jesusen' ži'e žej žawe', na' benne' yodo' fariseo ka' nníta'gake' ga na' zwíagake' Le'. 2 Lezka' zoa to benne' yoe'e yi ga na' law Jesusen!. 3 Naž Jesusen' wnnable' benne' yodo' wsedle ka' tzen len benne' yodo' fariseo ka',

benne' ka' źsédgekle' da' bchi'le  
Moisés, na' wnné':

—čDe latje yeyonžo no benne'  
yižwé' kate' nak ža la'y?

<sup>4</sup>Légake' wnníta'gake' žize. Naž  
Jesusen' bexwe' benne' yižwén', na'  
beyone' le', na' la' besélä'tie' le'. <sup>5</sup>Naž  
Jesusen' gože' benne' yodo' ka', na'  
wnné':

—Cha' zoa no benne' ládjwle,  
zej nnita' bia beže chie' ka', na'  
cha' bíxeba' toba' to lo yežw, čbi  
chejleje'-ba', la'kze nak ža la'y?

<sup>6</sup>Bi be gok yeži'igake' che dan'  
wnnén'.

### No benne' kwi'e latje blo

<sup>7</sup>Kate' Jesusen' ble'ele' kan žongak  
benne' yodo' fariseo ka', kan želbi'e  
latje blo ka' gan že'j žáwgake', naž  
bsaka' lebe', na' gože' lágake':

<sup>8</sup>—Kate' no benne' wliže' le' nich  
chejo' ga žak lni che yela' zchag  
na', bi kwi'o latje blo. Cha' bliže'  
to benne' nakže' blo ka le', <sup>9</sup>naž  
bennen' bliže' le' yide' gan zo', na'  
yi'e le': “Bnezjw latje kwe' benne' ni  
gan ži'o” na' lo yela' žedoe'ele chio'  
chejži'o že'lte. <sup>10</sup>Kate' no benne'  
wliže' le', bejžé' že'lte, nich kate' la'  
bennen' bliže' le', na' yi'e le': “Bicha'a,  
wdé yelate' kile.” Naž gakžo' le' blo  
lawgak benne' ka' želbé'lene' le'  
tzen. <sup>11</sup>No benne' zka'n zen kwine',  
góngake' ga yeyejxwe', san no  
benne' zoe' gaxjw laže', góngake' ga  
gakže' blo.

<sup>12</sup>Lezka' Jesusen' gože' bennen'  
bliže' Le', na' wnné':

—Kate' gono' to yela' waw, o  
lnido', bi wližo' lježo' ka', na' benne'  
bicho'o ka', na' biche' lježo' ka', na'  
benne' zjo'o li'a chio' ka', benne'

ka' zej nape' yela' wnni'a. Ki žala'  
gono' dan' lezka' wližgak benne' ka'  
le', na' ki gaken, yebi'igake' chio'.

<sup>13</sup>Kate' gono' to yela' waw, bliž  
benne' yache' ka', na' benne' ka' zej  
nžog ni'a ná'gake', na' benne' ka'  
bi žak sá'gake', na' benne' lo chole  
ka'. <sup>14</sup>Naž ba nez žen gaken chio',  
dan' bi gak bi da' yebi'igak benne'  
ki chio', san yebi'i chio' kate' žin  
ža yebangak benne' gat ka', benne'  
chawe' ka'.

### Žsaka' lebe Jesús che to lni žen

<sup>15</sup>Zoa to benne' že'j žawlene'  
Jesusen' tzen ga na', na' katen' benle'  
da' ni, gože' Le':

—Ba nez žen gaken che no benne'  
ye'j gawe' gan znnna bia' Dios.

<sup>16</sup>Jesusen' gože' le':

—Wzó to benne' bene' to lni  
žen, na' bliže' benne' zan. <sup>17</sup>Kate'  
ba wzíni'a yela' waw, bsele'e  
benne' wen žin chie' nich chejyežé'  
benne' ka' ba bliže', na' wnné': “Le  
da, dan' ba de yógo'te.” <sup>18</sup>Wzó law  
yógo'tegake' znnábgake' latje bi  
chjake'. Benne' nežwn' wnné': “Za'  
go'wa' to yežlyó, na' žon byenen  
chejwian'. Žáta'yoela' le' si' žen  
chaze' chia!” <sup>19</sup>Yetóen' wnné': “Za'  
go'wa' gayo' kwe' bež go'n, na'  
cha'a chejwia' cha' žóngakba' žin.  
Žáta'yoela' le' si' žen chaze' chia.”

<sup>20</sup>Yetóen' wnné': “Za' bchag na'a, na'  
bi gak yida!” <sup>21</sup>Kate' beyéj benne'  
wen žin na', bejyežé' xane' yógo'te  
da' ki. Naž bža'a benne' xan yo'on',  
na' gože' benne' wen žin na', na'  
wnné': “Wyéj na'atge gan nak lawe'  
ya'a, na' gan zej nak lo nez che yež  
nga, na' bejxi' benne' yache' ka', na'  
benne' ka' zej nžog ni'a ná'gake', na'

benne' ka' bi žak sá'gake', na' benne' lo chole ka'." <sup>22</sup>Kate' benne' wen žin na' ba bene' da' ki, wnné': "Xan, ba bena' kan gožo' neda', na' ne de latje." <sup>23</sup>Naž xane' gožo' benne' wen žin na', na' wnné': "Wyéj gan nak lo nez ka', na' gan nak nez las ka', na' ben byene yidgak benne' ka' nníta'gake' ga na', nich cha'te liža' nga." <sup>24</sup>Žapa' le'e: nitó benne' bliža' zga'ale bi ye'j gawe' yela' waw chia'."

**Da' sáka'žo cha' gónlenžo  
Benne' Cristo tzen**

<sup>25</sup>Lo ža ka' benne' zan žjáklene' Jesusen', na' Le' beyechje', na' gožo' légake':

<sup>26</sup>—Cha' no benne' yénele' gónlenžo neda' tzen, na' cha' bi ži'izèle' neda' ka nži'ile' xa xne'e, na' zo'le', na' zi'ne' ka', na' bi' biche'e ka', na' bi' zane' ka', na' yela' nban chie', bi nake' zi gake' benne' wsedle chia'. <sup>27</sup>No benne' bi gónlenžo neda' tzen la'kze gon byenen chejté'e le'e yag kroze, bi nake' zi gake' benne' wsedle chia'. <sup>28</sup>Cha' zoa no benne' ládjwle le'e, benne' žénele' gone' to yo'o sibe, čbi kwi'e zga'ale, na' wlabe' gaka'ž mežw žala' senle', nich nnezle' cha' de chie' da' žala' chizjwe' nich yeyóž gone' yo'on'? <sup>29</sup>Cha' bi gone' ki, na' cha' so lawe' kweke' len yo'on', na' cha' bi gak yeyóž gone' yo'o chien', naž so lawgak yógo'te benne' gon dítjgekle' le', benne' ka' l'egeklen', <sup>30</sup>na' nnágake': "Bennen' wzó lawe' žone' yo'o chien', na' bi gok yeyóž gonen!." <sup>31</sup>Lezka', cha' zoa no benne' wnná bia', na' cha' žon byenen cheje' lo wdile chejtíl-lene' yetó benne' wnná bia', čbi kwi'e zga'ale, na' gone'

xbab cha' wak chejtíl-lene' bennen' zchi'e galje mil benne' chie', na' le' chi milze benne' zchi'e? <sup>32</sup>Cha' bi gake', naž katen' yetó benne' wnná bian' ne zoe' zi'to', sele'e to benne' wbás chie' gan zoe', na' nnabe' nakx žala' gone' nich gá'nłengake' chawé' toe' yetóe'. <sup>33</sup>Ki naken, cha' zoa no benne' ládjwle le'e, na' cha' bi wka'ne' yógo'te da' nape', bi nake' zi gake' benne' wsedle chia'.

**Zede' da' zniten yela' sna'a chen  
(Mt. 5:13; Mr. 9:50)**

<sup>34</sup>Lezka' wnná Jesusen': —Nak chawé' zede', san cha' nit yela' sna'a chen, čnakx gak yeyonžon sna'a? <sup>35</sup>Biž bi zaka' zeden', kege nich yeyonen yo, na' kege nich yeyonen bebe, san cho'nžon na'le. No benne' zoa nage', na' ženle', žala' wzé nage'.

**Žsaka' lebe Jesús kan nak che to zila',  
bia wnitba'  
(Mt. 18:10-14)**

**15** Bdöbgak yógo'te benne' wechizjw ka' len benne' nexjw ka' gan zoa Jesusen', nich wzé nágake' chie'. <sup>2</sup>Che len benne' yodo' fariseo ka' len benne' yodo' wsedle ka' wnnágake' chie', na' wnnágake':

—Bennen' žape' benne' dola' ka' ba la'ne, na' že'j žawlene' légake'.

<sup>3</sup>Naž bsaka' lebe Jesusen', na' gožo' légake':

<sup>4</sup>—Cha' zoa no benne' ládjwle le'e, zej nnita' to gaywá' zila' chie', na' cha' ntitba' toba', čbi wka'ne' bia taplapj to galje ka' gan nak lo latje dachen', na' cheje' chejdilje' žilan', bia nntlba', kate' yežélže'.

ba'? <sup>5</sup>Katen' ba bežel-le'-ba', lo yela' žebél chie' yexóe'-ba' ža'a yene', <sup>6</sup>na' kate' yežine' liže', wtobe' ljež' ka' len benne' zjo'o li'a chie' ka', na' yi'e légake: "Le yebél tzen len neda', dan' ba bežel-la' zila' chia', bian' wnitlba." <sup>7</sup>Žapa' lee: lezka' gáta'že yela' žebél ya'abá che Dios ni'a che to benne' dola', benne' yeyát lažee', ka gata' ni'a chegak tplalj to galje benne' chawe' ka', benne' žékgakle' bi žon byenen yeyát láže'gake'.

### Žsaka' lebe Jesús che to mežw da' wnitlen

<sup>8</sup>Lezka' wnná Jesusen':

—Wzóá to no'le nape' chi mežw plat. Cha' ntile to mežw plat na', žbi wzalje' yi', na' wlóe' lo yo'o chien', na' yeyiljen' binlo kate' yežélželen'? <sup>9</sup>Katen' yežel-len', na' wtobe' no'le ljež' ka' len no'le zjo'o li'a chie' ka', na' yi'e légake: "Le yebél tzen len neda', dan' ba bežel-la' mežw plat na' dan' wnitlen." <sup>10</sup>Neda' žapa' lee: lezka' yebéle'gakle wbás che ya'abá ka' ni'a che to benne' dola', benne' yeyát lažee'.

### Žsaka' lebe Jesús che to xkwide' wnitlbe'

<sup>11</sup>Lezka' wnná Jesusen':

—Wzóá to benne' wnnítá'gak chope xkwide' byo chie'. <sup>12</sup>Xkwide' nyache' gožbe' xabe', na' wnnabe': "Xe, benn da' žeyala' chia' che da' den chio." Naž xaben' wdise' chégakbe' da' nape'. <sup>13</sup>Wdé na', xkwide' nyachen' btobbe' yógo'te da' wzí'be', na' wyejbe' to yež zi'to', gan ben ditjlbe' dot da' den chebe'. Benbe' da' kegle. <sup>14</sup>Katen' beyóž bdach dot dan' wzí'be', na' gok wbín

lo yež gan zoabe', na' byážjelbe'.

<sup>15</sup>Naž wyejbe' wen žin che to benne' lo yežen', na' bennen' bsele'e-be' gan de to yežlyó chie' nich chejwawbe' koch chie' ka'. <sup>16</sup>Gok láže'be' gawbe' yixe' ka'ze da' žawgak koch ka', san nitó benne' bi be bnezjwen' gawbe'.

<sup>17</sup>Naž beyát láže'be', na' wnnabe': "Benne' zan nnítá'gake' wen žin liž xa', na' dele'e da' že'j žáwgake', san neda' žatkza' lo yela' zdon nga. <sup>18</sup>Yezá'a nga, na' yeyá'a gan zoa xa', na' yapa'ne': Xe, benn' dola' law Dios, zoe' ya'abá chie', na' lawo' le'.

<sup>19</sup>Biž naka' neda' zi gaka' zi'no'. Ben neda' ka to benne' wen žin chio."

<sup>20</sup>Naž beyo'obe' nez, zeyejbe' gan zoa xabe'.

'Kate' ne zeza'be' zi'to', xabe' ble'ele'-be', na' beyache' láže'le'-be'. Taríaze bejchág xabe' lebe', na' beyele'e yenbe', na' bnope'e-be'.

<sup>21</sup>Naž zi'ne' na' gožbe'ne': "Xe, benn' dola' law Dios, zoe' ya'abá chie', na' lawo' le'. Biž naka' neda' zi gaka' zi'no'." <sup>22</sup>Naž xabe' gože' benne' wen žin chie' ka', na' wnné': "Le chejléj to laže' da' záka'le'en, na' le wakw-be'. Le ko'o to da' záka'le'e xben na'be', na' le wléj-be' zelbe'.

<sup>23</sup>Le chejxí' to beže, bia ženne', na' le got-ba'. Gawžo-ba', na' gonžo lni.

<sup>24</sup>Ki gonžo dan' gok xkwide' byo chia' ni ka to bi' gat, na' bebanbe'. Wnitlbe', na' ba beža'be' na'a." Naž wzó láwgake' žebégekle'.

<sup>25</sup>'Kate' ne žak da' ki, xkwide' byo wak che bennen' žonbe' žin yixe'. Kate' ne zeza'be', na' bežinbe' gawze ža yo'o, benlbe' ža' we' kwež, na' žak wyá'a lo yo'on'. <sup>26</sup>Naž bližbe' to benne' wen žin, benne' zoe' ga na', na' wnnablbe' le' bizen' žaken.

<sup>27</sup> Benne' wen žin na' gože'-be': "Bežín bi' bicho'on', na' xo' wnné' gótgake' to beže, bia ženne', dan' bežinbe' binlo lo ne'e." <sup>28</sup> Naž bž'a'a bi' waken', na' bi gónelebe' yeyo'obe' lo yo'on'. Naž bežój xaben', na' góta'yoel'-be' yeyo'obe'. <sup>29</sup> Beží'i bi' waken', na' gožbe' xabe', na' wnnabe': "Nnézkelo' ba bena' xchino' zan yiz, na' nitó chi'i bi na' wž'i'a che xtiž'o', na' nitó chi'i bi na' gonno' to zíla'do', bia gáwlena' lježa' ka'. <sup>30</sup> Na'a, kate' belá' xkwide' chio' ni, na' ben ditjlbe' da' ka' gota' chio', na' wdálenbe' no'le le'e ka', beto' to beže, bia ženne', ni'a chebe'." <sup>31</sup> Naž xabe' gože'-be', na' wnné': "Zi'na', le' zóalentezo' neda', na' yógo'te da' den chia', chio' nakkzen. <sup>32</sup> Žon byenen gonžo lni, na' yebelžo, dan' gok bi' bicho'o ni ka to bi' gat, na' bebanbe'. Wnitolbe', na' ba bela'be'!"

Žsaka' lebe Jesús che to benne'  
wen žin bi nake' chawe'

**16** Lezka' Jesusen' gože' benne'  
ka' žónlengake' Le' tzen, na'  
wnné':

—Wzóa to benne' wnni'a, na' wzóa  
to benne' wen žin chie', benne' nzi'  
lo ne'e da' nape xane'. Bžingak  
benne' ka' žesbága'gake' benne' wen  
žin na' zia law xane'. Wnnégake'  
chie' zžia yi'ze' da' nape xanen'.

<sup>2</sup> Naž xan yo'on' bliže' benne' wen  
žin chien', na' gože' le': "Bize da'  
ni ženla' kan žono'? Bloe'el neda'  
da' zej nak bian' žin beno', dan'  
biž yegá'n lo no'o da' naken chia'."

<sup>3</sup> Naž bezá' laže' benne' wen žin na',  
na'wnné': "Nakxkze gona'? Žebéj  
xana' neda' ga ni žona' žin. Bi gak  
gona' žin yixe', na' yedoe'ela' nnabla'

no benne' bi da' gonnze' chia'. <sup>4</sup> Na'a  
nnezla' da' gona' nich kate' yebéj  
xana' neda' ga ni žona' žin, gonngak  
benne' ka' žin gona' lížgake'." <sup>5</sup> Naž  
benne' wen žin na' bliže' benne'  
ka' zoa da' zábága'gake' che xane',  
na' gože' benne' nežw: "Gáka'ze  
zbago'o che xana'?" <sup>6</sup> Le' wnné': "To  
gaywá' že'e ži'a set zbag'a'a." Benne'  
wen žin blon' gože' le', na' wnné':  
"Ni de yich gan nyela' dan' zbag'o.o.  
Wž'é'e, na' bzoj yetó le'e yich da'  
nnan chi-yon že'e ži'a zbag'o.o."  
<sup>7</sup> Wdé na' wnnable' yetóe', na' wnné':  
"Cheze le', gáka'ze zbag'o?" Le'  
wnné': "To gaywá' da'a zoa' stribé."  
Naž benne' wen žin na' gože' le', na'  
wnné': "Ni de yich gan nyela' dan'  
zbag'o.o. Bzoj yetó le'e yich da' nnan  
taplalj da'a zbag'o.o." <sup>8</sup> Gokbe'el  
xane' bsíne'le benne' wen žin chien',  
bennen' bi nake' chawé. Ki naken,  
zej nakže benne' yežlyó nga sina' lo  
da' ka' žóngake' la' lágakze', ka jez  
nak benne' ka' želdálene' Dios tzen  
lo baní' chie'.

<sup>9</sup> Neda' žapa' le'e: le ga'nlen  
benách ka' chawé, wkónlele žin  
yela' wnni'a da' den chele yežlyó  
nga, nich kate' žin ža wka'nle da' ki,  
gápegake' le'e ba la'ne lo latjen' da'  
zejlí kanne.

<sup>10</sup> No benne' zkonle' binlo žin to  
da' láte'do'ze da' nzi' lo ne'e, lezka'  
wkonle' binlo žin to da' zen da'  
gata' lo ne'e. No benne' bi zkonle'  
binlo žin to da' láte'do'ze da' nzi'  
lo ne'e, lezka' bi wkonle' binlo žin  
to da' zen da' gata' lo ne'e. <sup>11</sup> Che  
len, cha' bi zkonlele binlo žin yela'  
wnni'a da' den chele yežlyó nga,  
čnozkze benne' wdíe' lo na'le yela'  
wnni'a da' naken li laže'?

<sup>12</sup> Cha' bi

znlele binlo žin da' nzi' lo na'le da' naken che benne' yoble, nozze benne' wde' lo na'le da' žala' gaken chekzle?

<sup>13</sup>'Nito benne' wen žin bi gak gone' xchingak chope xane', dan' že'e toen', na' ži'ile' yeten', o gape' ba la'ne toen', na' wze' cheale yeten'. Bi gak gonle xchin Dios, na' lezka' gonle žin nich gata' yela' wnni'a chele, da' naken che yežly nga.

<sup>14</sup>Bgekle benne' yodo' fariseo ka' da' ni, na' dan' zdan láze'gake' yela' gape, che len ben ditjgekle' Jesusen.

<sup>15</sup>Naz Jesusen' goe' legake':

—Le'e zloezele chawe' kwinle lawgak benach ka', san nnekzele Dios da' yo'o lo yichj lázdole, dan' bi zle'el Dios chawe' da' zdan láze'gak benach ka'.

### Da' bchi'le Moiss, na' da' bchi'le Dios

<sup>16</sup>Lezka' wnna Jesusen':

—Bengak žin da' bchi'le Moiss, na' da' bzojgak benne' ka' bchlgake' lo wlz Dios, na' zejte ža wza Zwa. Naz katen' bla' Zwan', wzo law zze dia' kan gak cho'ogak benach ka' gan znna bia' Dios, na' žon byengak ygo'te benach chogake' ga na'.

<sup>17</sup>Lake žaken ki, gake te che ya'aba, na' che yežly nga ka kwia yi' to diza'ze da' nyejwn le'e yich da' znna Dios.

### Da' zla'a laz benne' ka' nzag ngake'

(Mt. 19:1-12; Mr. 10:1-12)

<sup>18</sup>Lezka' wnna Jesusen':

—Cha' no benne' byo wsane' zo'le', na' cha' wechag nlene' no'le yoble, gone' dola' da' zka'n ditjen yela' zchag na', na' cha' no benne' byo wchag nlene' no'len' bsan benne'

byo chie' le', lezka' gone' dola' da' zka'n ditjen yela' zchag na'.

### Benne' wnni'a, na' Lasaro

<sup>19</sup>Naz bzaka' lebe Jesusen', na' wnne':

—Wza to benne' wnni'a. Žakwe' lae' da' zaka'le'en, na' ta ta žonteze' lni, na' že'j žawgake' da' dzile'e. <sup>20</sup>Lezka' wza to benne' yache'do' ga na', benne' lie' Lasaro. Bennen' znnable' no benne' bi da' wnejwe' chie', na' do zentie' žie' we', na' ži'le ža yo'o che benne' wnni'a na'. <sup>21</sup>Žak lae' benne' yache'don' gawe' da' bizjw ka' da' žexjwgaken zan gan že'j žaw benne' wnni'a na'. Lezka' zej nnita' beko' ka' ga na', na' bel-le'eba' lo we' ka' che benne' yache'don'. <sup>22</sup>Bzin ža got benne' yache'don', na' wbas che ya'aba ka' belchi'e le' nich chejoalene' Bran gan nak latje xtan che Dios. Lezka' got benne' wnni'a na', na' bkache'gake' le' lo yežw ba. <sup>23</sup>Kate' ne zaka'le'e bennen' góta'le'e yela' wnni'a chie', gan zoe' latje chegak benne' gat ka', na' bchis lawe', na' ble'ele' Bran, gan zoe' zito'le, na' zoalen Lasaron' le'. <sup>24</sup>Naz wnne' zie, na' wnne': "Xe, Bran, beyache' lae'l neda'. Bsela' Lasaro ga zoa' ni nich yesbise' xben ne'e, na' yedjsbise' loža'a, dan' zaka'li'a lo yi' nga." <sup>25</sup>Bran na' goe' le', na' wnne': "Zina', bejsa' lae' kan gok chio', kan góta'le'e yela' wnni'a chio' katen' wzo' nbano', san Lasaro ni, gok yela' yache' chie', na' na'a, žebel Lasaro nga, na' le' zako'o ga na'. <sup>26</sup>Lezka', to žoa'a ya'a sibe naken, dan' zoan gachje lawe'le gan zoale le'e, na' ga zoato' neto'

ni. Che len benne' ka' nníta'gake' nga, cha' yénegekle' tégake' gan zoale le'e, bi gak tégake', na' lezka' benne' ka' nníta'gake' ga na' bi gak yídgake' kile." <sup>27</sup>Naž bennen' góta'le'e yela' wnni'a chie' gože' le', na' wnné': "Xe, Bran, žáta'yoela' le' yeselo'o Lásaron' liž xa', <sup>28</sup>dan' zej nnita' gayo' benne' bicha'a ga na'. Besel'e nich chejzenle' légake' ka nak da' žaken nga, nich bi yídgake' latje ga zzáka'li'a ni." <sup>29</sup>Naž Bran na' gože' le', na' wnné': "Zej de da' bzoj Moisés, na' da' bzojgak benne' ka' bcháljgake' lo wláz Dios, da' nzi' lo ná'gake'. Žala' wzé nággake' diža' ka'." <sup>30</sup>Bež'i bennen' góta'le'e yela' wnni'a chie', na' wnné': "Xe, Bran, bi gonen ki, san cha' yebán to benne' lo yela' got, na' cheje' gan nníta'gake', na' yeyát láže'gake."

<sup>31</sup>Bran na' gože' le', na' wnné': "Cha' bi zze nággake' da' bchi'le Moisés, na' da' wnnagak benne' ka' bcháljgake' lo wláz Dios, bi chejlé'gake' la'kze no benne' yebane' lo yela' got."

### Žala' gon byenžo bi gonžo ga baga' no benne' doła'

(Mt. 18:6-7, 21-22; Mr. 9:42)

**17** Jesusen' gože' benne' ka' zónlengake' Le'e tzen, na' wnné':

—Nnítatezgak da' ka' žóngaken ga bág'a'gak benách ka' doła', san da' nyáche'le'e gaken che bennen' žone' ga no benne' bage'e doła'.

<sup>2</sup>Gakže chawe' che bennen' žone' ki cha' wgala' yene' to yej da' žot, na' chejžo'n kwine' lo nisdo', nich bi gone' ga baga' no benne' chia' doła'.

<sup>3</sup>Le wia binlo da' žonle. Cha' lježo'

gone' le' zia, bzejni'ile', na' cha' yeyát laže'e, benít law chie'. <sup>4</sup>La'kze gaže chi'i to ža gone' le' zia, na' cha' gaže chi'i yide' gan zo', na' yi'e le': "Žeyát laža'a" žala' yenít lawo' chie'.

### Yela' wak da' napžo dan' žejležo che Benne' Cristo

<sup>5</sup>Naž benne' wbás ka' che Xanžon' gózgake' Le', na' wnnágake':

—Ben ga chejlé'žeto' che Dios.

<sup>6</sup>Xanžon' gože' légake', na' wnné':

—Chela' nak láte'ze kan žejle'le che Dios, na' nakzen ka to bínnedo' mostasa, gak ye'le yag zen ni: "Kwas ga ni, na' bejsóa lo nisdo!" na' gonen kan že'len.

### Kan žala' gon no benne' nake' wen žin

<sup>7</sup>Lezka' wnná Jesusen':

—Cha' zoa no benne' ládjwle le'e, na' zoa to benne' ndo'w chie', benne' zga'ne beže o zlapo', na' kate' yeyóz gone' xchin xane', čéklele ye' xane' le', na' nne': "Da, wžé' ye'j gawo"?" <sup>8</sup>O'o. Ki yi'e le': "Bsi'ni'a da' gawa' neda!. Wzóa kwezo' wžío' da' ye'j gawa'. Teže na' gak ye'j gawa' le'?" <sup>9</sup>¿Yi'e benne' ndo'w chie' na': "Žóxkeno" dan' bene' kan gože' le'? Žekla' neda', bi gone' ki. <sup>10</sup>Lezka' gaken chele le'e. Kate' ba benle yógo'te da' bchi'le Dios le'e gonle, žala' nnale: "Nakto' wen žin bi be záka'to', dan' bénzeto' da' žon byenen gonto'."

### Chi benne' zej de'e yižwé' leže

<sup>11</sup>Kate' ne yo'o Jesusen' nez zeje' lo yež Jerusalén, wdíe' gan že'gak yeždo' ka' zej nbaben gan nbab Samaria, na' gan nbab Galilea.

<sup>12</sup>Kate' bžine' to yeždo', bžojgak chi benne'zej de'e yižwé' lež zedjchággake' Le', na' bgá'ngake' zí'to'le. <sup>13</sup>Zižje blížgake' Le', na' wnnágake':

—Jesús, benne' wsedle, beyache' laže'l neto'.

<sup>14</sup>Kate' ble'el Jesusen' légake', gože' légake':

—Le chej, chejlo'el kwinle lawgak bxoz ka'.

Kate' ne zjake', beyákgake' chawe'.

<sup>15</sup>Naž to benne' ládjwgake', katen' gókbe'ele' ba beyake' chawe', beyeje' gan zoa Jesusen'. Wnníe' zižje, na' bka'n zene' Dios. <sup>16</sup>Byechwe', na' bzechw lawe' lo yo law Jesusen', na' gože' Le': "Žóxkeno!"

Bennen' nbabe' Samaria. <sup>17</sup>Naž Jesusen' gože' le':

—¿Bi nnita' chi benne' beyákgake' chawe'? ¿Gaze zej nnita' yezika' benne' ka'? <sup>18</sup>¿Bi zoa no benne' yedjká'n zene' Dios, san toze benne' zi'to' ni?

<sup>19</sup>Naž Jesusen' gože' bennen', na' wnné':

—Beyase, na' beyéj ližo'. Ba beyako' chawe' dan' žejli'o chia'.

### Kan la' dan' znna bia' Dios

(Mt. 24:23-28, 36-41)

<sup>20</sup>Kate' benne' yodo' fariseo ka' wnnábgekle' Jesusen' batze la' dan' znna bia' Dios, Le' bechebe', na' gože' légake':

—Kan la' dan' znna bia' Dios, bi naken to da' le'elelen. <sup>21</sup>Bi gak no benne' nne': "Blan' nga" o nne': "Bžinen ga na'." Le wia nga. Znna bia' Dios lo yichj lázdo'gak benách ka'.

<sup>22</sup>Naž Jesusen' gože' benne' wsedle chie' ka', na' wnné':

—Žin že kate' yénelele le'elele že yelá'a neda', Benne' Golje' Benách, san bi le'elelen. <sup>23</sup>La'gak benne' yégake' le': "Zoe' ga ni" o nnágake': "Zoe' ga na'." Bi chejle ga na', na' bi gónlenle légake' tzen. <sup>24</sup>Kan žak kate' žep yes, na' zza'nín' dot ya'abá, lezka' gaken kate' žin že yelá'a neda', Benne' Golje' Benách. <sup>25</sup>Zga'ale kate' gak da' ni, žon byenen saka'a neda', na' benne' ka' nnítia'gake' že ni zoažo na'a wzóagake' neda' chela'ale. <sup>26</sup>Kan gok že na' katen' wzóá Noé, lezka' gaken kate' žin že yelá'a neda', Benne' Golje' Benách.

<sup>27</sup>Ža ni'te na' we'j bdáwgake'. Bchag ná'gake', na' bdégake' zí'ngake' ka' lo yela' zchag na', na' zejte wyó'o Noé na' lo barkw zen na' da' nzin' arka, na' la' gokte yejw da' bchinnjen yežlyó nga, na' bžia yin' yógo'tegake'. <sup>28</sup>Lezka' goken že na' katen' wzóá Lot. We'j bdáwgake'. Gó'wgake', na' béte'gake'. Gózgake' yežlyó che chégake', na' béngake' yo'o che chégake'. <sup>29</sup>Kate' bžin že na' katen' bežój Lot na' lo yež Sodoma, ka to nis yejw bexjw da' zzalj yi', na' bžia yin' yógo'tegake'. <sup>30</sup>Lezka' gaken kate' žin že la' lawa' neda', Benne' Golje' Benách.

<sup>31</sup>Kate' žin že na', cha' zoa to benne' yichjo'o, na' da' de chie' yo'on lo yo'on', bi žala' yetje' nich chejxi'e dan' den chie'. Lezka' no benne' zoe' yixé' bi žala' yeyeje' liže'. <sup>32</sup>Le yesá' laže' kan gok che zo'le Lot na', bwie' zkóže'le', na' beyake' yej zede'. <sup>33</sup>No benne' že' láže'ze' yela' nban chie', wniten', san bennen' wsane' yela'

nban chie' ni'a chia' neda', gape  
chi'en'.

<sup>34</sup>Žapa' le'e: kate' žin yelen', cha'  
z̄tasgak chope benne' tzen, toen'  
yechi'a-ne' latje chia', na' yetóen'  
wka'na'-ne'. <sup>35</sup>Cha' chope no'le  
yelgote' tzen, toen' yechi'a-ne' latje  
chia', na' yetóen' wka'na'-ne'. <sup>36</sup>Cha'  
chope benne' góngake' žin yixe',  
toen' yechi'a-ne' latje chia', na'  
yetóen' wka'na'-ne'.

<sup>37</sup>Kate' béngekle benne' wsedle ka'  
che Jesusen' da' ki, wnnábgekle' Le',  
na' wnnágake':

—Xan, ćgaz gak da' ki?

Jesusen' gože' lágake':

—Gan de to da' gat, dóbgakkze lab  
ka' ga na'.

To no'le wzebe, na'  
benne' wechi'a laže'

**18** Naž bzaka' lebe Jesusen',  
na' gože' lágake' kan žon  
byenen wlížtezz̄o Dios, na' bi gak  
chope láže'žo. <sup>2</sup>Wnné':

—To yež wzóa to benne' wechi'a  
laže', na' bi zžebe' Dios, na' bi žape'  
no benne' ba la'ne'. <sup>3</sup>La' yež na'ze  
wzóa to no'le wzebe, na' bžine' gan  
zoa benne' wechi'a lažen', na' wnné':  
“Bchi'a laže' che da' žon to benne',  
žone' chia' da' zia.” <sup>4</sup>Scha bi gónele'  
bi da' gone' chie', san wdé na' wzá'  
laže'e, na' wnné': “La'kze bi zžebe'  
Dios, na' bi žapa' no benne' ba la'ne',  
<sup>5</sup>san dan' záteze no'le wzebe ni, na'  
žon lele' neda', che len wchi'a laža'a  
da' žaken chie', nich bi yídteze' ga  
ni, na' nich bi tetle gon lele' neda'.”

<sup>6</sup>Naž Xanžon' gože' lágake', na'  
wnné':

—Le wzé nag kan wnná bennen'  
wechi'a lažen', bennen' bi nake'

chawe'. <sup>7</sup>čBi wchi'a laže' Dios da'  
žak chegak benne' ka' wžekze' chie',  
benne' ka' žližgake' Le' dot ža dot  
yele? ĉWžele' gáklene' lágake'?

<sup>8</sup>Žapa' le'e: la' wchi'a láže'tie'  
lágake'. Kate' yelá'a neda', Benne'  
Golje' Benách, ĉwežel-la' benne' ka'  
žejlé'gake' chia' yežlyó nga?

To benne' yodo' fariseo,  
na' benne' wechizjw

<sup>9</sup>Bzaka' lebe Jesusen' kan nak  
chegak benne' ka' zloé'ezegekle'  
chawe' kwíngake', na' zká'ngake'  
ka'ze yezika' benách ka'. <sup>10</sup>Ki wnné':

—Bžingak chope benne' gan  
nak lo zchil yodo' nich wlížgake'  
Dios. To bennen' nake' benne' yodo'  
fariseo, na' yetóen' nake' benne'  
zchizjwe' benách ka' lo wláz yež  
zi'to'. <sup>11</sup>Wzeze benne' yodo' fariseon',  
na' ki bliže' Dios, na' wnné': “Dios,  
žapa' Le': žóxkeno', dan' bi naka' ka  
zej nak yezika' benne' ka', benne'  
zej nake' wbán, na' benne' ka' bi jez  
nake' chawe', na' benne' ka' zka'n  
dítjgake' yela' zchag na'. Lezka' bi  
naka' ka benne' wechizjwn'. <sup>12</sup>Neda'  
žona' wbás chope chi'i žak xono' ža  
weje, na' znezjwa' che yodo' to kwe'  
che chi kwe' che yógo'te da' žata'  
chia.” <sup>13</sup>Benne' wechizjwn' wzíe'  
zí'to'te, na' bi bežogle' wchís lawe'  
nich wie' ya'abá, san wdape' lcho'e,  
na' wnné': “Dios, beyache' laže'l  
neda', benne' dola!”

<sup>14</sup>Naž wnná Jesusen':

—Neda' žapa' le'e: beyéj benne'  
wechizjwn' liže', na' ba beyake' chawe'  
law Dios, kege ka benne' fariseon'. No  
benne' zka'n zen kwine', gon Dios ga  
yexjwe', san no benne' zoe' gaxjw laže',  
gon Dios ga gake' benne' zaka'.

**Jesús žliž chawe'e xkwíde'do' ka'**  
(Mt. 19:13-15; Mr. 10:13-16)

**15** Naž bžingak benne' byo ka' len no'le ka' gan zoa Jesusen',zej noe' xkwíde'do' ka' chégake' nich xoá na' Jesusen' légakbe'. Kate' benne' wsedle ka' che Jesusen' blé'egeklen', bdílegake' légake'. **16** Naž Jesusen' bliže' benne' ka' žónlengake' Le' tzen, na' wnné':

—Le we' xkwíde'do' ki latje yídgakbe' gan zoa', na' bi wséwjle xnézgakbe', dan' gata' latje chegak benne' ka'zej nake' ka xkwíde'do' ki gan znna bia' Dios. **17** Da' li žapa' le'e: no benne' bi si' lo ne'e da' znna bia' Dios, kan žon to xkwíde'do', bi cho'o bennen' gan znna bi'e.

**To benne' dele'e yela' wnni'a chie'**  
(Mt. 19:16-30; Mr. 10:17-31)

**18** To benne' wnná bia' wnnable' Jesusen', na' wnné':

—Benne' wsedle dot chawe'. ¿Bize žala' gona' nich gata' yela' nban da' zejlí kanne chia'?

**19** Jesusen' gože' le':

—¿Bíz chen' ži'o neda': “Dot chawe”? Bi zoa no benne' nake' dot chawe'. Toze Dios nake' dot chawe'.

**20** Nnézkelo' da' ka' bchi'le Dios le':  
Bi gono' dola' da' zka'n ditjen  
yela' zchag na'.

Bi goto' benách ka'.

Bi kwano'.

Bi nnio' che lježo' da' wen laže'. Wdape xa xno'o ba la'ne.

**21** Bennen' gože' Jesusen', na' wnné': —Yógo'te da' ki žona' kate' wzó law naka' xkwide'.

**22** Kate' benle Jesusen' da' ni, gože' le':

—Yetó da' žiažje gono'. Bete' yógo'te da' den chio', na' dan' si'o bnežjwn chegak benách yache' ka', na' gata' yela' wnni'a chio' ya'abá che Dios. Naž da, benlen neda' tzen.

**23** Kate' benle bennen' da' ni, gok nyache' laže'e, dan' dele'e yela' wnni'a chie'. **24** Kate' blé'el Jesusen' kan gok bennen' nyache' laže', wnné':

—Zédele'e gaken cho'ogak benne' ka' dele'e yela' wnni'a chégake' gan znna bia' Dios. **25** Gakže zede cho'o to benne' dele'e yela' wnni'a chie' gan znna bia' Dios, ka te to bia zbiagak benne' ka' to lo nag yeche'.

**26** Naž benne' ka' béngekle' da' ni wnnágake':

—¿Nozkze benne' gak yelé', cha'?

**27** Jesusen' gože' légake':

—Dios gak gone' da' bi gak gongak benne' ka'!

**28** Naž Bedw gože' Jesusen':

—Bwia nga, neto' bka'nto' yógo'te da' den cheto', na' žónlento' Le' tzen.

**29** Naž Jesusen' gože' légake':

—Da' li žapa' le'e, no benne' wka'ne' liže', o xa xne'e, o biche' lježe' ka', o zo'le', o zi'ne' ka', dan' že' laže'e nna bia' Dios gáte'teze, **30** si'že bennen' da' ka' ža ni zoažo na'a, na ža da' za' gata' yela' nban da' zejlí kanne chie'.

**Jesús znne' da' yoble za' gótgake' Le'**

(Mt. 20:17-19; Mr. 10:32-34)

**31** Jesusen' bchi'e benne' chežinno, benne' wsedle chie' ka', cheze, na' gože' légake':

—Le wia nga, zejžo lo yež Jerusalén, gan gak yógo'te da' nyejw le'e yich la'y, da' wnnagak benne' ka' bcháljgake' lo wláz Dios, kan

žala' gak chia' neda', Benne' Golje' Benáč. <sup>32</sup>Benne' Jerusalén ka' wdégake' neda' lo na'gak benne' zi'to' ka', na' gon dítjgekle' neda', na' wlíž zí'gake' neda', na' wžé'egake' neda' zene'. <sup>33</sup>Chíngake' neda', na' te na' gótgake' neda', na' kate' gak chonne ža, yebana' lo yela' got.

<sup>34</sup>Bi wyejní'igekle benne' wsedle chie' ka' da' ni, na' bi wnnézgekle' bi da' zcháljlene' lágake' chen, dan' naken da' bi na' gak chejní'igekle'.

### Jesús zeyone' to benne' Jerikó, benne' lo chole

(Mt. 20:29-34; Mr. 10:46-52)

<sup>35</sup>Kate' za' žin Jesusen' lo yež Jerikó, zoa to benne' lo chole ga na'. Ži'e žoa'a nez, znnable' no benne' bi da' wnežjwe' chie'. <sup>36</sup>Bennen' benle' želdé benne' zan ga na', na' wnnabe' bizen' žaken. <sup>37</sup>Benne' ka' góžgake' le':

—Jesús, benne' Nasaret, zdie' nga.

<sup>38</sup>Naž benne' lo cholen' wnnié' zižje, na' wnné':

—Jesús, za'só Dabí, beyache' laže'l neda'.

<sup>39</sup>Benne' ka' zjake' law Jesusen' bdílegake' benne' lo cholen' nich kwi'e žize, san le' wnnié' zížje, na' wnné':

—Za'só Dabí, beyache' laže'l neda'.

<sup>40</sup>Naž wzé Jesusen' žize, zbeze', na' bsele'e to benne' chejliže' benne' lo cholen' nich zine' lawe'. Kate' bžine' lawe', Jesusen' wnnable' le', <sup>41</sup>na' wnné':

—Bize žénelo' gona' chio?

Benne' lo cholen' wnné':

—Žénela' yeyaljw yej lawa'.

<sup>42</sup>Jesusen' gože' le':

—Ba beyaljw yej lawa'. Ba beyako' dan' žejli'o chia'.

<sup>43</sup>La' belé'etele', na' wyéjlene' Jesusen', zka'n zene' Dios. Lezka' yógo'te benáč ka' nnita'gake' ga na' blé'egekle' dan' goken, na' bka'n zéngake' Dios.

### Jesús len Sakeo

**19** Naž wyoé'e Jesusen' lo yež Jerikó, zdie' lo yežen'. <sup>2</sup>Wzóa to benne' lie' Sakeo ga na'. Nake' benne' blo ládjwgak benne' wechizjw ka', na' dele'e yela' wnni'a chie'. <sup>3</sup>Benne' ni žak laže'e le'ele' Jesusen', san bi wzáke'le' dan' zej nnita' benne' zan ga na', na' nake' benne' bi ntonne'. <sup>4</sup>Naž taría taría wnežwe' lawgak benne' zan ka', na' wžene' to lo yag nich gak le'ele' Jesusen', dan' žala' tie' ga na'. <sup>5</sup>Kate' bžin Jesusen' ga na', bchis lawe', na' bwie' gan žia Sakeon', na' gože' le': —Zakeo, bedinne lo yagen', dan' žon byenen chejga'na' ližo' na'a.

<sup>6</sup>Naž la' bedínnete Sakeon' lo yagen', na' lo yela' žebél chie' bchi'e Jesusen' liže'. <sup>7</sup>Kate' benáč ka' nnita'gake' ga na' blé'egekle' da' ni, wzó láwgake' znnégake' che Jesusen', na' wnnágake':

—Wyoé'e nich gá'nlene' benne' dola'.

<sup>8</sup>Naž wzé Sakeon', na' gože' Xanžon':

—Xan, bwia nga. Gachje da' den chia' wnežjwa' chegak benne' yache' ka', na' cha' bi wdetle bchižjwa' benáč ka', yenezjwa' chégake' tape chi'ile.

<sup>9</sup>Jesusen' gože' le':

—Na'a ža ni bla' yela' žeslá chegak benne' ka' nnita'gake' lo yo'o nga, dan' lezka' benne' ni nake' za'só Bran. <sup>10</sup>Bla'a neda', Benne' Golje'

Benách, nich zedjdilja', na' yeslá' benne' ka' jez nnitle'.

### Žsaka' lebe Jesús che chi kwe' mežw

<sup>11</sup>Kate' ne zze naggak benne' ka' da' zchalj Jesusen', gože' lágake' to da' bsaka' lebe', dan' za' zíngake' lo yež Jerusalén, na' žékgakle' za' la' dan' znnna bia' Dios. <sup>12</sup>Ki wnná Jesusen':

—Wzóá to benne' blo, na' za' cheje' to yež zi'to' nich si' lo ne'e yela' wnná bia', na' te na' yelé'e laže'. <sup>13</sup>Kate' za' cheje' ga na', bliže' chi benne' wen žin chie' ka', na' bnežjwe' che chégake' to kwe' weje mežw, na' gože' lágake': “Le chiljen mežw ni kate' yela'za!”. <sup>14</sup>Benne' wláž ka' che benne' blon', benne' ka' bi zlé'egakle' le' chawé', bsel'a'gake' benne' wbás chégake' ka' gan cheje', nich nnágake': “Bi žénelto' nna bia' bennen' neto!”. <sup>15</sup>Naž benne' blon' wzí' lo ne'e yela' wnná bia', na' bežine' laže'. Naž bsel'e to benne' chejliže' benne' wen žin ka', benne' ka' bdie' lo ná'gake' mežw ka', nich nnezle' balze mežw wdíljlenen' to toe'. <sup>16</sup>Kate' bžin benne' nežw ga na', wnné': “Xan, to kwe' mežw chion' ba ben yichjen yechí kwe' ka!”. <sup>17</sup>Xanen' gože' le': “Chawé' beno'. Nako' benne' wen žin chawé'. Dan' binlo bkonlo' žin láte'ze da' gota' lo no'o, na'a gona' ga nna bi'o chi yež ka!”. <sup>18</sup>Naž yetó benne' wen žin bžine' ga na', na' wnné': “Xan, to kwe' mežw chion' ba ben yichjen yegayo' kwe' ka!”. <sup>19</sup>Xanen' gože' le': “Nna bi'o gayo' yež ka!”. <sup>20</sup>Naž yetóe' bžine' ga na', na' wnné': “Xan, ni de to kwe' mežw chion'. Btoban' laže', na' wdape chi'an. <sup>21</sup>Ki bena'

dan' bžeba' le', dan' nako' benne' snia. Žono' kan znnagak benách ka': žezí'o da' bi bdixjo', na' zlapo' gan bi gozo!”. <sup>22</sup>Naž xanen' gože' le': “Nako' benne' wen žin bi nake' chawé'. Ni'a che da' wnnó' wchi'a laža'a le'. Žákbe'elo' naka' benne' snia, na' žezí'a da' bi bdixjwa', na' zlapa' gan bi goza!. <sup>23</sup>Na'a, čibz chen' bi bejló'o mežw chian' gan gon yichjen, nich kate' yelá'a, yezi'an len yichjen?” <sup>24</sup>Naž gože' benne' ka' nnítá'gake' ga na', na' wnné': “Le yeká'a mežwn' lo ne'e, na' le wnežjwn che bennen' bezi'e chi kwe' mežwn!”. <sup>25</sup>Naž góžgake' le': “Xan, ba yo'o lo ne'e chi kwe' mežw.” <sup>26</sup>Naž bechebe xángake', na' wnné': “Žapa' le': no benne' wkonle' binlo žin da' do' yo'on lo ne'e, wxén láže'gake' le' yelate', san no benne' bi zkonle' binlo žin da' do' yo'on lo ne'e, yennábgake' dan' wyó'on lo ne'e. <sup>27</sup>Kan nak chegak benne' ka' bi zlé'egakle' neda' chawé', na' bi gónegekla' nna bi'a lágake', le chejxí'-gake', na' le got-gake' lawa' neda' nga.”

### Žo'o Jesús lo yež Jerusalén len yela' zen

(Mt. 21:1-11; Mr. 11:1-11; Jn. 12:12-19)

<sup>28</sup>Kate' beyóž bchalj Jesusen', beyo'e nez zeje' zaka' yež Jerusalén. <sup>29</sup>Kate' bžíngake' gawze gan že' yež Betfagé, na' yež Betania, gan nak ya'adon' nzin' Ya'a Yag Olibo, bsel'a' Jesusen' chope benne' wsedle chie' ka', <sup>30</sup>na' gože' lágake':

—Le chej yeždon' da' žen' yeláte'do' wnežw gan zoažo, na' katen' žinle lo yežen', chejxáka'le to búrrodo' da'ba' yag, na' nitó benne' bi na'

kwie'-ba'. Le sež'-ba', na' le yedjwá'-ba' nga. <sup>31</sup> Cha' no benne' nnable' le'e, na' nne': "čBíz chen' žsežle'-ba'?" ye'le-ne': "Xanžon' žiážjele'-ba'."

<sup>32</sup> Jak benne' wsedle chie' ka', benne' ka' bsele'e, na' bejxáka'gake'-ba' kan ba gož Jesusen' légake'.

<sup>33</sup> Katen' beséžgake' búrrodon', benne' xanba' ka' góžgake' légake': —čBíz chen' žsežle búrrodon?

<sup>34</sup> Bež'igake', na' wnnágake':

—Xanžon' žiážjele'-ba'.

<sup>35</sup> Belchi'e'-ba' gan zoa Jesusen'. Kate' ba bxóagake' laže' chelá'a ka' chégake' xkož'e' búrrodon', bžíagake' Jesusen' xkóž'e'ba' law laže' ka'.

<sup>36</sup> Belchiljwe' laže' chégake' lo nez gan žala' te Jesusen'. <sup>37</sup> Kate' ba bžíngake' gawze gan zoa ldinne che Ya'a Yag Olibo, benne' ka' žónlengake' Jesusen' tzen, lo yela' žebél chégake', wzó láwgake' znnégake' zižje, na' bka'n zéngake' Dios ni'a che yela' wak zen ka' da' blé'egekle', da' ka' ben Jesusen'. <sup>38</sup> Wnnágake':

—iGa'n zen benne' wnná bia' ni, benne' ze'e lo wláz Xanžo Dios! iZa' ya'abá che Dios da' zbek ži yichj lázdo'žo! iGa'n zen Dios!

<sup>39</sup> Naž benne' yodo' fariseo ka', benne' nnita'gake' ládjwgak benách zan ka', góžgake' Jesusen', na' wnnágake':

—Benne' wsedle, bdile benne' wsedle chio' ka'.

<sup>40</sup> Bechebe Jesusen', na' gož'e' légake':

—Žapa' le'e: cha' yelnnita' benne' ka' žize, yej ki nnégaken zižje.

<sup>41</sup> Katen' bžin Jesusen' gawze gan že' yež Jerusalén, na' ble'elen', wžež'e' chen. <sup>42</sup> Wnné':

—Žak laža'a nnézlele na'a ža da' gak gonen ga ga'n ži yichj lázdo'le law Dios, san na'a ba ngachen' lawle le'e, nich bi lélélelen. <sup>43</sup> Žingak ža ka' chele kate' benne' ka' bi zlé'egekle' le'e chawé', kwékgake' to ze'e kwe'j kož'e' gan zoale, na' wséjwgake' le'e, na' yógo'te latje dot gawze gónlengake' le'e wdile. <sup>44</sup> Wchínnjgake' ze'e da' žape chi'in yež chele, na' gótgake' benne' ka' nnítia'gake' yež nga. Bi ga'n to yej law lježen. Yógo'te da' ki gaken chele dan' bi gókbe'elele ža bla' Dios bedjwíe' le'e.

### Jesús žwe' lbie' li'a yodo'

(Mt. 21:12-17; Mr. 11:15-19; Jn. 2:13-22)

<sup>45</sup> Naž Jesusen' wyoé'e la' li'a yodo', na' wzó lawe' žebeje' lí'ale yógo'te benne' ka', benne' wete' ka' len benne' ža'w ka', benne' nnítia'gake' gan nak la' li'a yodon'. <sup>46</sup> Gože' légake':

—Nyejw le'e yich la'y da' znnan: "Liža' naken yo'o gan wližgak benách ka' Dios" san le'e ba benlen ka to yo'o chegak benne' wbán ka'.

<sup>47</sup> Tža tža Jesusen' bsedle' benách ka' gan nak lo zchil yodon', na' bxoz wnná bia' ka', len benne' yodo' wsedle ka', na' benne' blo ka' che yež gónegekle' gótgake' Le'. <sup>48</sup> Bi bžélgekle' nakle gótgake' Le', dan' yógo'te benách ka' zze nággake' xtiž'e' dot láž'e'gake'.

### Yela' wnná bia' da' nape Jesús

(Mt. 21:23-27; Mr. 11:27-33)

**20** To ža, kate' Jesusen' ne žsedle' benách ka' gan nak lo zchil yodo', na' zchalje' diža' chawen', bxoz wnná bia' ka', len

benne' yodo' wsedle ka', na' benne' gole ka', bžíngake' gan zoe', <sup>2</sup>na' góžgake' Le':

—Wnná neto!. ¿Bize yela' wnná bia' žónleno' da' ki? ¿Noz̄kze benne' bdie' lo no'o yela' wnná bian'?

<sup>3</sup>Bechebe Jesusen', na' gože' lágake':

—Lezka' neda' nnabla' le'e to. Le yež'i, na' nnale. <sup>4</sup>¿Noz̄ benne' bsele'e Žwa nich bezóe' benách ka' nis? ¿Dios, cha' to benne'?

<sup>5</sup>Benne' yodo' ka' bcháljgake' la' lágakze', na' wnnágake':

—Cha' nnažo: Dios bsele'e le', yi'e žo'o: “¿Bíz̄ chen' bi wyejle'le chie?”

<sup>6</sup>Cha' yežo-ne': To benne' bsele'e le', benne' yež ki wžé'egake' žo'o yej, dan' žékgekle' Žwan' bchalje' lo wláz Dios.

<sup>7</sup>Naž beži'igake', na' wnnágake':

—Bi nnezlto' no benne' bsele'e Žwan'.

<sup>8</sup>Naž Jesusen' gože' lágake':

—Lezka' neda' bi yapa' le'e bi yela' wnná bia' žónleno' da' ki.

**Benne' wen žin ka', benne' bizej  
nake' chawé'**

(Mt. 21:33-44; Mr. 12:1-11)

<sup>9</sup>Naž la' wzó lawte Jesusen' zcháljlene' benách ka' nnita'gake' ga na'. Bsaka' lebe', na' wnné':

—Wzó to benne' beyaze' lba uba ka' lo yežlyó chie', na' bdie' yežlyón' lo na'gak benne' wen žin ka' nich góngake' gachje len le' da' sí'gake', na' wyeje' zi'to' gan bga'ne' scha.

<sup>10</sup>Kate' bžin ža chíbgake' da' zžia lba uba ka', bsele'e to benne' wbás chie' gan zej nnita' benne' wen žin ka' nich si'e da' žeyala' chie', san benne' wen žin ka' béngake' le'

zi', na' beséla'gake' le' ka'ze. <sup>11</sup>Da' yoble bsele'e yetó wbás chie', na' lezka' béngake' chie' da' zia, na' beséla'gake' le' ka'ze. <sup>12</sup>Da' yoble bsele'e benne' beyonne' wbás chie' gan nnita'gake', na' lezka' bžíagake' le' we', na' bebéjgake' le' na'le lo yežlyón'.

<sup>13</sup>Naž xan yežlyón' wzá' laže'e, na' wnné': “¿Nakxkze gona'? Sel'a'a zí'nkza', bi' byodon' nži'ilá, gan nnita'gake'. Katen' le'gekle'-be', gápegake'-be' ba la'ne.” <sup>14</sup>San katen' benne' wen žin ka' blé'gekle'-be', bcháljgake' la' lágakze', na' wnnágake': “Xkwide' ni gak chebe' yežlyó nga. Le cho'o, gotžo-be', nich da' yeyala' chebe' gaken chežo.” <sup>15</sup>Bebéjgake'-be' na'le lo yežlyón', na' bétgake'-be'.

Naž Jesusen' gože' lágake':

—Na'a, ¿nakxkze gon xan yežlyón' chégake'? <sup>16</sup>Yide', na' gote' benne' wen žin ka', na' wdíe' yežlyó chien' lo na'gak benne' yoble ka'.

Kate' benne' ka' nnita'gake' ga na' béngekle' da' ni, wnnágake':

—Dios bi nne' gaken ki.

<sup>17</sup>Naž Jesusen' bwie' lágake', na' wnné':

—¿Bize žsedle dan' nyejw le'e yich la'y? Znnan:

Yej da' belká'n benne' wen yo'o ka' ka'ze,

na'a naken yej blo skin ze'e.

<sup>18</sup>No benne' bixe' law yej na', chichjw kwine', na' no benne' chejbaga' yej na' le', wzozjen le'.

**Kan nak da' zchízjwgake' lo wláz  
benne' Sésar**

(Mt. 21:45-46; 22:15-22; Mr. 12:12-17)

<sup>19</sup>La' ža na'ze, bxoz wnná bia'  
ka' len benne' yodo' wsedle ka',

gónegekle' góxwgake' Jesusen', dan' žákbe'egakle' wnné' dan' bsaka' lebe' kan nak chégake', san bžébegake' benne' zan ka' nníta'gake' ga na'. <sup>20</sup>Bwíatezgake' Jesusen', na' bséla'gake' benne' ka' nich kwéjgake' Lé' diža', benne' ka' wloé'el kwíngake' ka benne' chawe' ka', nich góngake' ga bi da' nna Jesusen', nich gak wdégake' Lé' lo na' bennen' znna bi'e légake'. <sup>21</sup>Nich góngake' ki, wnnábgekle' Jesusen', na' wnnágake':

—Benne' wsedle, nnezlto' znno' da' li, na' žedlo' da' li, na' bi zchi'a lažo'o kan nak da' zloé'ezele kwingak benne' ka', san kan žedlo' dan' wnnakze Dios naken dot li laže'. <sup>22</sup>Bloé'el neto'. Čžon byenen chížjwto' lazto' che benne' Sésar, benne' Roma znna bi'e, o bi chížjwton'?

<sup>23</sup>Žákbe'ele Jesusen' da' ženegekle' góngake' chie', na' gože' légake':

—čBíz chen' zbejle neda' diža'?

<sup>24</sup>Le wloé'el neda' to mežw da' zdate. čNoz benne' da' lawe' le'e da' ni, na' noz benne' žia le' nga?

Beží'igake', na' wnnágake':

—Che benne' Sésar da' ka'.

<sup>25</sup>Naž Jesusen' gože' légake':

—Le wnejjw benne' Sésar da' naken che benne' Sésar, na' Dios da' naken che Dios.

<sup>26</sup>Bi gok góngake' ga bi da' nna Jesusen' nich gak yesbága'gake' Lé' žia lawgak benne' zan ka', na' bebángekle' kan nak da' bechebe', na' wnníta'gake' žize.

Kan gak chegak benne' ka'  
yebángake' lo yela' got

(Mt. 22:23-33; Mr. 12:18-27)

<sup>27</sup>Naž bla'gak benne' yodo' saduseo ka', benne' ka' znnágake'

bi yebangak benne' gat ka', na' wnnábgekle' Jesusen', <sup>28</sup>na' wnnágake':

—Benne' wsedle, Moisés bzoje' chežo da' znnan: "Cha' gat to benne' byo, na' ga'n zo'le', na' cha' bi zoa nitó xkwide' chie', naž bi' biche'e žala' wchág nálenbe' no'le wzeben', nich gata' za'só benne' bíche'be', bennen' ba gote!" <sup>29</sup>Wnníta'gak gaže xkwide' byo zej nakbe' bíche'be'. Xkwide' nežwn' bchag nálenbe' to xkwide' no'le, na' gotbe', bi wzóa xkwide' chebe'. <sup>30</sup>Naž xkwide' bežope bchag nálenbe' no'len', na' lezka' got xkwiden', bi wzóa xkwide' chebe'. <sup>31</sup>Naž xkwide' beyonne bchag nálenbe' no'len', na' ka'kze bengak bi' gaže ka'. Gótgakbe', bi wzóa xkwide' chégakbe'. <sup>32</sup>Kate' ze lawte, lezka' got no'len'. <sup>33</sup>Na'a, katen' yebangak benne' gat ka', čnolbe' gak no'len' chebe', dan' bchag nágakbe' gážtebe' len no'len'?

<sup>34</sup>Naž bechebe Jesusen', na' gože' légame':

—Zchag na'gak benách ka' nníta'gake' ža ni zoažo na'a, na' znézjwgake' zí'ngake' ka' nich wchág nágakbe'. <sup>35</sup>Na'a, benne' ka' nákgake' zi yebángake' lo yela' got, na' chejnníta'gake' yežlyó da' gatan', bi góngake' yela' zzoalen no'le, na' bi wchág ná'gake'. <sup>36</sup>Ki gaken, dan' biž gatgak benne' ka' yebángake' lo yela' got, san gákgake' kan zej nak wbás che ya'abá ka', na' gákgake' zí'nkze Dios. <sup>37</sup>Cha' yebangak benne' gat ka', bloé'ekzele Moisés žo'o gan nyejw kan nak che yag yeche' da' wyeyen, gan bchalj Xanžon', na' wnné' nake'

Dios che Bran, na' Dios che Isaak, na' Dios che Jakob.<sup>38</sup> Dios nake' Dios, kege chegak benne' gat ka', benne' nátgake' to chi'ize, san nake' Dios chegak benne' ka' nníta'gake' nbángake', dan' zej nnita' nbangak yógo'te benách ka' lawe' Le', la'kze gótgake' yežlyó nga.

<sup>39</sup> Naž bale' benne' yodo' wsedle ka' bechébegake', na' wnnágake': —Benne' wsedle, cháwe'do' wnnó'.  
<sup>40</sup> Biž bežoggekle' bi da' nnábgekle' Le'.

### ¿Noz benne' nak Benne' Cristo zi'ne'?

(Mt. 22:41-46; Mr. 12:35-37)

<sup>41</sup> Naž Jesusen' gože' légake': —¿Biž chen' znnágake': "Benne' Criston' nake' zi'n Dabí"? <sup>42</sup> Dabí na'kze bchalje' da' nyejw le'e yich la'y gan zej nyejw salmo ka', da' znnan:

Xanžo Dios gože' Xana': "Wžé' kwita' li ža',  
<sup>43</sup> kate' gonža' ga wzóa zibgak benne' ka' lawo', benne' ka' bi zlé'gekle' Le' chawe'."

<sup>44</sup> Dabí na'kze wnné' nak Benne' Criston' Xane'. ¿Nakxkze naken, znnale le'e nake' zi'ne'?

### Jesús žesbage'e benne' yodo' wsedle ka' zia

(Mt. 23:1-36; Mr. 12:38-40; Lk. 11:37-54)

<sup>45</sup> Kate' yógo'te benách ka', benne' ka' nníta'gake' ga na', ne zze nággake' che Jesusen', Le' gože' benne' wsedle chie' ka':

<sup>46</sup> —Le gape chi'i kwinle chegak benne' yodo' wsedle ka', dan' žaz láže'gake' želdé' zej nakan' laže' tonn, na' ženegekle' wlíž zengak benách ka' légake' gan nak lawe'

ya'a, na' lezka' žaz láže'gake' želbi'e latje blo gan zdóbgake' nich yéngkle' xtiža' Dios, na' gan že'j žawgake' tzen.<sup>47</sup> Zká'agake' ližgak no'le wzebe ka', na' nich wloé'ezele chawe' kwíngake' žližgake' Dios scha. Benne' ki, Dios gon zi'že' légake'.

**Mežw da' bde to no'le yache' law  
Dios**  
(Mr. 12:41-44)

**21** Kate' ne zoa Jesusen' lo zchil yodo', bwie', na' ble'ele' benne' ka' de yela' wnni'a chégake', zgó'ogake' mežw lo kak che yodo'. <sup>2</sup> Lezka' ble'ele' to no'le yache' wzebe, na' wloé'e chope mežw lasdo', da' ka' záka'gaken láte'do'ze. <sup>3</sup> Naž wnná Jesusen': —Da' li žapa' le'e, da' zenže wlo'o no'le yache' wzebe ni ka da' wlo'ogak yezika' benne' ka', benne' zgó'ogake' mežw lo kaken'.  
<sup>4</sup> Yógo'tegake', ka da' nga'nze chégake', wló'ogake' mežw che yodo', san no'le ni, lo yela' yache' chie', wloé'e dot da' nape', da' žala' gawlen'.

**Znna Jesús wchinnjgake' yodo'**  
(Mt. 24:1-2; Mr. 13:1-2)

<sup>5</sup> Zej nnita' benne' ka' ga na', benne' zcháljgake' kan nakan che yodo' na', kan nakan xtando', na' kan zej nakan yej ka' da' zej nakan zenle'e, na' yezika' da' ka' zej nakan xtan. Naž Jesusen' gože' légake', na' wnné':

<sup>6</sup> —Zlé'elele yógo'te da' ki, san žin ža katen' biž ga'n nitó yej ki law lježen, dan' wchinnjgak benách ka' yodo' nga.

**Da' ka' gak biá'gaken kate' za' žin ža  
ze lawte ža ka'**

(Mt. 24:3-28; Mr. 13:3-23)

**7 Naž wnnábgekle' Jesusen', na'  
wnnágake':**

—Benne' wsedle, čbatže gak da'  
ki? ČBize gak bian' katen' za' gaken  
ki?

**8 Bechebe Jesusen', na' wnné':**

—Le gape chi'i kwinle, nich bi  
gon laže'l no benne' le'e, dan' la'gak  
benne' zan, benne' ka' wzóa lágake'  
kan lia' neda'. Nnágake' jez nake'  
Benne' Criston', na' nnágake': “Ba  
zoažo ža ze lawte ža ka'.” Neda'  
žapa' le'e: bi góñlenle légake' tzen.  
**9 Kate' yénlele žak wdile, na' želží'i**  
benách ka' chegak benne' yolawe'  
ka', bi žébele, dan' žon byenen  
gakgak da' ki zga'ale, san bi na' žin  
ža ze lawte ža ka'.

**10 Lezka' gože' légake':**

—Tíle to yež len yetó yež, na'  
benách ka' gan zoa to benne' znna  
bi'e tíl-lengake' benách ka' gan zoa  
yetó benne' znna bi'e. **11 Naž xo'le'e**  
law yežlyó nga, na' nize na'ze gak  
wbín, na' gáta'le'e yižwé' ka'. La'  
lawgak da' ka' ya'abá, da' góngaken  
ga žébegak benách ka', na' da' ka'  
gak biá'gaken.

**12 'Zga'ale kate' za' gak da' ki,**  
góxwgak benne' ka' le'e, na' kwia  
láže'gake' le'e. Wché'gake' le'e  
gan zdóbgake' nich yéngekle'  
xtiža' Dios. Ki góngake' nich wzía  
yí'gake' le'e, na' wséjwgake' le'e liž  
ya. Wché'gake' le'e lawgak benne'  
wnná bia' ka', na' lawgak benne'  
blo ka', dan' žónlenle neda' tzen.  
**13 Ki gaken chele nich gata' latje**  
wchaljle ka nak chia' neda'. **14 Le**

gon choch láže'le, na' bi kwek  
yichjle zga'ale nakx nnale chezle,  
**15 dan' gonna' neda' chele diža'**  
da' wži'ile, na' lezka' yela' žejni'il,  
nich bi gak benne' ka', benne' bi  
lé'gekle' le'e chawé', wzégake' le'e  
žize, na' bi gak bi da' nnégake'  
che xtíža'le. **16 Naž xakzle ka', na'**  
benne' bíche'kzle ka', na' lježkzle  
ka', wdégake' le'e lo na'gak benne'  
ka', na' gótgake' bálele. **17 Yógo'te**  
benách ka' wzóagake' le'e chela'ale  
dan' žónlenle neda' tzen, **18 san bi**  
nitl nitó yicha' yichjle. **19 Cha' soale**  
choch, gata' yela' nban da' zejlí  
kanne chele.

**20 'Kate' lé'elele benne' ka' žjake' lo**  
wdile jez ngo'e le'je yež Jerusalén,  
nnézlele ba bžin ža kwia yi' yežen'.  
**21 Naž benne' ka' nnít'a'gake' gan nbab**  
Judea žala' wzónnjgake', na' chjake'  
lawgak ya'a ka'. Benne' ka' nnít'a'gake'  
lo yežen' žala' žójgake' ga na', na'  
benne' ka' mnít'a'gake' wen yixé', bi žala'  
yeyéjgake' yežen'. **22 Kate' ža ka' Dios**  
wsaka' zi'e benne' ka' nnít'a'gake' yežen',  
na' gak yógo'te da' nyejwn le'e yich la'y  
kan žala' gaken chégake'. **23 Katen' žin**  
ža na', da' nyáche'le'e gaken chegak  
no'le ka' jez noe'e xkwide' le'egake',  
na' lezka' chegak no'le ka' zgáže'gake'  
bi'do' že'n ka', dan' sáka'le'egak benách  
ka' nnít'a'gake' ga na', dan' Dios wsaka'  
zi'že' benne' ka'. **24 Gatgak benne' zan**  
lo wdilen', na' wché'gake' ba'le' yež  
njeje' gan žíngake' dot yežlyó nga, na'  
benne' zi'to' ka' nna biá'gake' lo yež  
Jerusalén na' nejte za'a ža chégake'.

**Da' ka' gak biá'gaken kate' za' yelá'**  
**Cristo**

(Mt. 24:29-35, 42-44; Mr. 13:24-37)

**25 Lezka' wnná Jesusen':**

—Gakgak da' ka' gak biá'gaken lo wbíž, na' lo byo', na' lo belj ya'abá ka'. Lo yežlyó nga gak žež láže'gak benách ka', na' žébele'egake', dan' yéngkle' chi'i zižje che nisdo', dan' tale'e nisen'. <sup>26</sup>Yedó láže'gake' lo yela' zžebe chégake' dan' sa' láže'gake' chegak da' žala' gákgaken yežlyó nga, na' dan' xizgak da' zej nla' ya'abá. <sup>27</sup>Naz lé'egekle' neda', Benne' Golje' Benách, la'a lo bejw ya'abá, nzi' lo na'a yela' wnná bia', na' la' law yela' baní chia'. <sup>28</sup>Kate' so law gakgak da' ki, le gon choch kwinle, na' le wia ža'le, dan' ba zezá'a neda', nich yechi'a le'e.

<sup>29</sup>Jesusen' gožé' légake' to da' bzaka' lebe', na' wnné':

—Le wia nga kan žak che yag higo, na' che bíte'teze yag yoble. <sup>30</sup>Kate' zlé'elele žiagak ni'a ne'n že'ndo', na' nnézkzelele ba žzin byo' wbá ka'. <sup>31</sup>Lézka'kze, kate' lé'elele ba žakgak da' ki, nnézlele za' žin ža yedjinná bia' Dios yežlyó nga.

<sup>32</sup>'Da' li žapa' le'e, bi gatgak benách ka' nnítá'gake' ža ni zoažo na'a, kate' gakže yógo'te da' ki. <sup>33</sup>Te che ya'abá, na' che yežlyó nga, san xtiž'a'a, bi ten ka'ze, san gakkze kan znnan.

<sup>34</sup>'Le gape chi'i kwinle nich bi we'le latje da' wžia yin' le'e chazen lo yichj lázdo'le, dan' naken yela' wawle'e, na' yela' zzožle, na' yela' že' zedle, nich kate' žin ža na', bi yedó láže'le, <sup>35</sup>na' nich bi gaken chele ka to da' wžia yin' benách ka', da' gaken chegak yógo'te benách nnítá'gake' dot yežlyó nga. <sup>36</sup>Che len, le soa ban laže', na' le wcháljlenteze Dios, nich gak yelale lo da' žala' gaken, na' nich

bi yedoé'elele katen' la'le le'e lawá' neda', Benne' Golje' Benách.

<sup>37</sup>Te ža wzóa Jesusen' lo zchil yodo', gan bsedle' benách ka', na' kate' za' žale bežoje' ga na', na' wyeje' law ya'adon' nzin' Ya'a Yag Olibo. <sup>38</sup>Yógo'te benách ka' bžíngake' zzile gan zoa Jesusen' lo zchil yodo' nich wzé nággake' xtiž'e.

**Benne' yodo' ka' žon xtiž'a'gake'  
nakze gótgake' Jesús**  
(Mt. 26:1-5, 14-16; Mr. 14:1-2,  
10-11; Jn. 11:45-53)

**22** Kate' za' gak lni katen' žáwgake' yet xtil da' bi nzin' kwa zichj chen, lñin' nzin' Pasko', <sup>2</sup>naž bdobgak bxoz wnná bia' ka' len benne' yodo' wsedle ka'. Ben xtiž'a'gake' nakze gótgake' Jesusen', san bi wzáke'gakle', dan' zžébegake' da' gongak benách yež ka'.

<sup>3</sup>Naž da' xiwe' yjénlenen Judas tzen. Judas na' lezka' lie' Iskariote, na' nbáblene' benne' chežinno wbás ka' bsela' Jesusen', <sup>4</sup>Wyéj Judas na', na' bejcháljlene' bxoz wnná bia' ka' len benne' ka' yo'o lo ná'gake' che yodo', nakze gak gone' nich wdíe' Jesusen' lo ná'gake'. <sup>5</sup>Bebégekle benne' yodo' ka', na' bchebe láže'gake' wnéžjwgake' le' mežw. <sup>6</sup>Bchebe laže' Judas na', na' gónele' wdíe' Jesusen' lo ná'gake' ži žize.

**Da' žawžo nich chejsá' láže'žo kan  
got Xanžo**

(Mt. 26:17-29; Mr. 14:12-25;  
Jn. 13:21-30; 1 Kor. 11:23-26)

<sup>7</sup>Bžin ža katen' žáwgake' yet xtil da' bi nzin' kwa zichj chen, katen'

žála' gótgake' zíla'do' ka', bia ka'  
žáwgake' xche' Lni Pasko'. <sup>8</sup>Jesusen'  
bsele'e Bedw len Zwa, na' wnné':

—Le chej, na' le chejsí'ni'a da'  
gawžo xche' Lni Pasko'.

<sup>9</sup>Góžgake' le':

—¿Gaz žénelo' chejkwezton'?

<sup>10</sup>Jesusen' gože' légake', na' wnné':

—Le wia nga, kate' žinle lo yež  
nga, žoj to benne' yedjhage' le'e,  
noe'e to že'e nis. Le chéjlene' ga  
žíntele yo'o gan choe'e. <sup>11</sup>Le ye' xan  
yo'on': "Benne' wsedle ži'e le': ¿Gaze  
zoa yo'o zen na' gan gáwlena' benne'  
wsedle chia' ka' xche' Lni Pasko'?"  
<sup>12</sup>Naž wlo'e'le' le'e to yo'o zen da'  
zoan ža'le gan ba nba'a. Le wsí'ni'a  
dan' gawžon ga na'.

<sup>13</sup>Naž jake', na' bejxáka'gake' kan  
ba gož Jesusen' légake', na' belsí'ni'e  
da' gáwgake' xche' Lni Pasko' ga na'.

<sup>14</sup>Kate' gole ža na', wžé' Jesusen'  
gan gáwgake', na' wbás chie' ka'  
wžé'lengake' Le' tzen. <sup>15</sup>Naž Jesusen'  
gože' légake':

—Gok láže'li'a gáwlena' le'e tzen  
xche' ni zga'ale kate' saka'a, na' gata'.  
<sup>16</sup>Žapa' le'e: biž gawa' ki kate' žinže  
ža gak da' zloé'ezele xche' ni, da'  
gaken gan zwnna bia' Dios.

<sup>17</sup>Bexw Jesusen' to zíga'do', na' gože'  
Dios: "Žóxkeno!" Naž gože' légake':

—Le sin', na' le ye'j late' wejen,

<sup>18</sup>dan' žapa' le'e: biž ye'ja' xis uba  
kate' žinže ža na' nna bia' Dios.

<sup>19</sup>Naž bexwe' to yet xtil, na' gože'  
Dios: "Žóxkeno!" Wdé na' bzozjen',  
na' bi'en che chégake', na' wnné':

—Da' ni naken bela' žen chia' da'  
zdian' lo wlazle le'e. Le gon ki nich  
chejsá' láže'le neda'.

<sup>20</sup>Kate' beyóž bdáwgaken', lezka'  
bchalje' che zíga'don', na' wnné':

—Zíga'do' ni zloe'len kan nak  
diža' kob da' zka'n chawen', na' žen  
chia' žon chochen, žen na' laljen  
ni'a chele.

<sup>21</sup>'Na'a, bennen' wdíe' neda' lo  
na'gak benách ka' že'j žáwlene' neda'  
tzen. <sup>22</sup>Da' li cha'a gan gótgake'  
neda', Benne' Golje' Benách, na' gak  
chia' kan nyejw le'e yich la'y kan  
žala' gaken chia', san da' nyáche'le'e  
gaken che bennen' wdíe' neda'.

<sup>23</sup>Naž wzó láwgake' znnábgekle'  
Le' to weje to weje', na' wnnágake':  
—¿Nolton'?

Znnábake' nólgame' gake' benne' blo

<sup>24</sup>Naž wnnábake' la' légakze'  
nólgame' gake' benne' blo. <sup>25</sup>Jesusen'  
gože' légake':

—Benne' ka' zwnna biá'gake' yežlyó  
nga znnágake' žon cháwe'gake'  
benách ka', san zkóngekle' žin  
yela' wnná bia' chégake' nich gak  
chégakkze' da' chawe', <sup>26</sup>san le'e bi  
žala' gonle ki. No benne' nake' blo  
ládjwle le'e žala' gake' ka to benne'  
nakže' gaxjw, na' bennen' zwnna bi'e  
žala' gake' ka benne' ndo'w chegak  
lježe' ka'. <sup>27</sup>¿Nož benne' nakže' blo,  
bennen' že'j žawe', o bennen' zžie'  
yela' waw? ¿Kege bennen' že'j žawe'  
nakže' blo? Neda' zóalena' le'e ka to  
benne' zžie' yela' waw.

<sup>28</sup>'Le'e wzóalenkzele neda' katen'  
gokgak da' ka' chia', da' ka' wzí'  
biá'gaken neda'. <sup>29</sup>Che len wdía' lo  
na'le to gan nna bia'le, kan ben  
Xa', bdie' lo na'a gan nna bi'a neda'.

<sup>30</sup>Ki gona' nich gak kwe'le gan ye'j  
gáwlénle neda' tzen gan nna bi'a,  
na' kwe'le latje chekzle gan wchi'a  
láže'le chežinno kwe' benne' ka' zej  
nake' za'só Israel.

**Znna Jesús nna Bedw bi nónbi'e Le'**  
(Mt. 26:31-35; Mr. 14:27-31; Jn. 13:36-38)

**31** Lezka' wnná Xanžon':

—Smon, Smon. Bwia nga. Ba wnnáb da' xiwe' cho'ole le'e lo nan', nich wchíx lažen' le'e kan žon to benne' žsoe' zoa' stribé, **32** san ba bliža' Dios, na' wnnabla' Le' gáklene' le', nich bi yeyóž yedó yela' žejl'é' chio'. Naž, katen' yeyako' chia', ben choch lježo' ka'.

**33** Bedor' gože' Le':

—Xan, ba zoa' sálená' Le', kégeze liž ya, san lezka' ga gátlentia' Le'.

**34** Jesusen' gože' le':

—Bedw, žapa' le': zga'ale kate' kweže leko' na'a, le' nno' chonne chi'i bi nónbi'o neda'.

**Da' ben Jesús katen' za' gótgake' Le'**

**35** Jesusen' wnnable' légake', na' wnné':

—Kate' bsel'a'a le'e, na' bi bia'le yixjw yet, na' kege bzod mežw, na' kege chope kwe' zel-le, čbiže byážjelele?

Légake' wnnágake':

—Bi be byážjetlo'.

**36** Naž gože' légake':

—Na'a, no benne' de yixjw yet chie' žala' we'en, na' lezka' žala' gon no benne' de bzod mežw chie', na' no benne' bi de ya ntoche' chie' žala' gote'e laže' žxoa yene', na' ga'we' to ya ntoche'. **37** Žapa' le'e: žon byenen gak chia' kan nyejw le'e yich la'y, da' znnan: "Béngake' chie' kan žóngake' chegak benne' wen da' zinnj ka'."

Ki gaken, na' gak yógo'te da' zej nyejwn le'e yichen' kan žala' gaken chia'.

**38** Naž légake' wnnágake':

—Xan, ni de chope ya ntoche' ka'. Le' gože' légake':  
—Ná'teze.

**Jesús zcháljlene' Dios lo yežlyón' nzin' Jetsemaní**

(Mt. 26:36-46; Mr. 14:32-42)

**39** Naž bžoj Jesusen', na' kan žonkze' wyeje' law Ya'a Yag Olibo, na' benne' wsedle chie' ka' bénlengake' Le' tzen. **40** Katen' bžíngake' ga na', Jesusen' gože' légake', na' wnné':

—Le wlíž Dios, na' le nnable' bi gata' latje gon da' xiwe' ga bága'le dola'.

**41** Naž Jesusen' wzé'e gan nnítá'gake', na' wdíe' yelate' na'le ka to ga žin to yej da' žsežon, gan bzoa zibe', na' bcháljlene' Dios. **42** Wnné':

—Xe, cha' žénelo', blkwas len neda' dan' žala' saka'a, san kege kan žénela' neda', san ka žénelo' Le' gono'.

**43** Naž bla' law to wbás che ya'abá, na' ben choche' Jesusen'. **44** Naž Jesusen', lo yela' žekle chie', dot laže' bliže' Dios, na' nis yes chie' goken ka žen, da' žžonten lo yo.

**45** Kate' beyóž bcháljlene' Dios, bezó že'e, na' beyeje' gan zej nnita' benne' wsedle chie' ka', na' bedjxake'e légake' ztásgake' lo yela' nyache' laže' chégake'. **46** Naž Jesusen' gože' légake':

—¿Ztasle? Le chas, na' le wlíž Dios, na' le nnable' bi gata' latje gon da' xiwe' ga bága'le dola'.

**Želzene' Jesús**

(Mt. 26:47-56; Mr. 14:43-50; Jn. 18:2-11)

**47** Kate' ne zchalj Jesusen' da' ni, la' bžíntegak benne' zan ga na', na'

Judas žónlene' lágake' tzen. Judas na' nbáblene' benne' chežinno wsedle ka' che Jesusen', na' zeje' lawgak benne' zan ka'. Wbige'e gan zoa Jesusen' nich wchág lawe' Le'.  
**48** Naž Jesusen' gože' le':

—Judas, ćzchag lawo' neda', Benne' Golje' Benách, nich wdío' neda'?

**49** Kate' benne' ka' nnítalengake' Jesusen' blé'egekle' kan žak chie', góžgake' Le':

—Xan, čwyíngakto'-ne' ya ntoche'?

**50** To benne' wsedle che Jesusen' bene' we' nag benne' wen žin che bxoz blo. Bžixe' nage' li ža.

**51** Jesusen' wnné':

—Ná teze.

Wdán Jesusen' nag benne' wen žin na', na' beyonen'. **52** Naž gože' bxoz wnná bia' ka', na' benne' ka' yo'o lo ná'gake' che yodo', na' benne' gole ka', benne' ka' bi zlé'egekle' Le' chawe', na' wnné':

—ćZa'le, na' nwale ya ntoche' ka', na' yag ka', nich senle neda' kan žonle kate' zzenle benne' wbán ka'?  
**53** Tža tža wzóalenkza' le'e lo zchil yodo', na' bi be benle chia', san na'a wzáke'le dan' nak ža nzi' lo na' bennen' zoe' latje chol.

### Znna Bedw bi nónbi'e Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

**54** Naž benne' ka' békxwgake' Jesusen', na' belchi'e Le' liž bxoz blo. Bedw wnawe' Jesusen' zi'to' zí'to'le. **55** Kate' ni'a na' bxoz blon' ba bzéngake' yi' la' lí'ale liž bxoz blon', wžé'gake' kwit yin'. Naž Bedon' wžé'lene' lágake' tzen. **56** Kate' to xkwide' no'le wen žin ble'elbe' Bedon', že'ze' žoa'a yin', bwíabe'-ne', na' wnnabe':

—Benne' ni žónlene' Jesusen' tzen.

**57** Beží'i Bedon', na' wnné':

—No'le, bi nónbi'a bennen'.

**58** Yextido' yetó benne' ble'ele' Bedon', na' wnné':

—Le' žónleno' benne' ka' tzen.

Bedon' wnné':

—Benne', kege neda'.

**59** Yextido' wnná yetó benne':

—Da' li benne' ni žónlene' Jesusen' tzen, dan' nake' benne' Galilea.

**60** Naž Bedon' wnné':

—Benne', bi nnezla' biž chen zchaljo'.

Kate' ne zchalje' da' ni, la' wžéžete leko'. **61** Naž byechj Xanžon', na' bwie' Bedon'. Bejsá' laže' Bedon' da' wnná Xanžon', kan gože' le':

“Zga'ale kate' kweže leko' na'a, le' yeži'o chia' chonne chi'i, na' nno' bi nónbi'o neda'.” **62** Naž Bedon' bežoje' na'le, na' wžéžtekze' gže'te.

### Žon dítjgekle' Jesús

(Mt. 26:67-68; Mr. 14:65)

**63** Benne' ka', benne' wzéngake' Jesusen', ben dítjgekle' Le', na' bdíngake' Le'. **64** Naž bséjwgake' law Jesusen', na' belgape'e lawe'. Wnnábgekle' Le', na' wnnágake':

—Wnnéya'a. ćNoz bennen' wdape'e Le'?

**65** Da' zan da' wnnégake' chie', na' belsaka' zi'e Le'.

### Zžin Jesús lawgak benne' yodo' wchi'a laže' ka'

(Mt. 26:59-66; Mr. 14:55-64; Jn. 18:19-24)

**66** Kate' za' ža'ní' ža na', bdobgak benne' gole ka' len bxoz wnná bia' ka', na' benne' yodo' wsedle ka'. Belchi'e Jesusen' lawgak benne' yodo' wchi'a laže' ka', na' wnnábgekle' Le', **67** na' wnnágake':

—Wnná neto'. ¿Nako' le' Benne'  
Criston'?

Jesusen' gože' légake':

—Cha' yapa' le'e naka' Benne'  
Criston', bi chejle'le chia', <sup>68</sup>na' cha'  
bi da' nnabla' le'e, bi be yeži'ile, na'  
bi wsanle neda'. <sup>69</sup>Na'a so lawa'  
neda', Benne' Golje' Benách, kwi'a  
kwit li ža che Dios, Bennen' nape'  
dot yela' wnná bia'.

<sup>70</sup>Wnnábgekle' Le' yógo'tegake', na'  
wnnágake':

—¿Nakkzo' le' Zi'n Dios?

Le' gože' légake':

—Da' likze znnale.

<sup>71</sup>Naž wnnágake':

—¿Nozže žiáželžo benne' wloe'ele'  
zia da' nbage'e Le'? La' žo'oze ba  
benlžo wnníe' che Dios.

### Zžin Jesús law Pilato

(Mt. 27:1-2, 11-14; Mr. 15:1-5; Jn. 18:28-38)

**23** Naž belzó ža' yógo'te  
benne' zan ka', na' belchi'e  
Jesusen' law Pilato. <sup>2</sup>Naž wzó  
lágake' žesbága'gake' Le' zia, na'  
wnnágake':

—Benne' ni, blé'elto' da' zia da'  
žone'. Žone' ga zži'igak benách wláz  
cheto' ka' chegak benne' yolawe'  
ka', na' žsejwe' xnezgak benne' ka'  
žízjwgake' da' zchizjw benne' Sésar,  
na' znné' lekze' nake' Benne' Criston',  
benne' žala' nna bi'e.

<sup>3</sup>Naž Pilaton' wnnable' Jesusen',  
na' wnné':

—¿Nako' le' benne' nna bi'e benne'  
judío ka'?

Bechebe Jesusen', na' wnné':

—Da' likze znnno'.

<sup>4</sup>Naž Pilaton' gože' bxoz wnná bia'  
ka', len benne' ka' nnítá'gake' ga na',  
na' wnné':

—Bi be zžel-la' da' zia da' nbaga'  
benne' ni.

<sup>5</sup>Naž ben chóchgake' xtíža'gake',  
na' wnnágake':

—Žone' ga žongak benách ka'  
žo'osbé, na' zsedle' benách ka' do  
žente gan nbab Judea. Wzó lawe'  
bene' ki gan nbab Galilea, na' lezka'  
žonen' nga.

### Zžin Jesús law Herodes

<sup>6</sup>Kate' benle Pilato da' ni,  
zcháljgake' che gan nbab Galilea,  
wnnable' légake' cha' nbab Jesusen'  
Galilea. <sup>7</sup>Katen' wnnezle' nbab  
Jesusen' gan znnna bia' Herodes,  
bsele'e Le' law Herodes na', dan'  
lezka' zoe' le' lo yež Jerusalén ža ka'.

<sup>8</sup>Kate' Herodes na' ble'ele' Jesusen',  
bebele', dan' ba gok scha ženele'  
le'ele' Le', dan' ba benle' da' zan kan  
nak che Jesusen', na' žak laže'e le'ele'  
to yela' wak da' gone!. <sup>9</sup>Herodes na'  
wnnable' Jesusen' da' zan, san Le'  
bi be bechebe'. <sup>10</sup>Lezka' zej nnita'  
bxoz wnná bia' ka' len benne' yodo'  
wsedle ka' ga na', na' besbága'gake'  
Jesusen' zia. <sup>11</sup>Naž Herodes na' len  
benne' chie' ka', benne' žjake' lo  
wdile, belka'ne' Jesusen' ka'ze, na'  
nich gon dítjgekle' Le', bwákwgake'  
Le' laže' da' zaka', ka dan' žakw  
to benne' wnná bia', na' da' yoble  
belchi'e Le' law Pilaton'!. <sup>12</sup>Kate' ža na'  
Pilaton', na' Herodes na' bennítá'gake'  
chawe', dan' zga'ale bi blé'egekle'  
ljéžgake' chawe' toe' yetóe'.

### Želchoge' che Jesús gate'

(Mt. 27:15-26; Mr. 15:6-15; Jn. 18:39—19:16)

<sup>13</sup>Naž Pilato btobe' bxoz wnná bia'  
ka' len benne' blo ka', na' benne' yež  
ka', <sup>14</sup>na' gože' légake':

—Bedjwa'le benne' ni lawa' neda', na' znnale žone' ga žongak benách ka' žo'osbé, san kate' wnnabla'-ne' binlo, na' wnníta'kzele le'e ga ni, bi be bžel-la' da' zia da' nbage'e, da' ka' žesbága'le-ne'. <sup>15</sup>Kate' bsela'a-ne' law Herodes, bi be zia bžel-le' da' nbaga' benne' ni nich chogžo chie' gate'. <sup>16</sup>Na'a wsaka' zi'a-ne', na' te na' wsana'-ne'.

<sup>17</sup>Zoa to da' žon byenen gon Pilaton' kate' žak lni na', da' žónteze žone', žsane' to benne' nyejwe' liž ya lo na'gak benách ka'. <sup>18</sup>Naž yógo'te benne' ka' nníta'gake' ga na', wnnégake' zižje, na' wnnágake':

—Bet bennen', na' bsan Barrabás.

<sup>19</sup>Barrabás na' nyejwe' liž ya dan' bdíl-lene' benne' wnná bia' ka', na' dan' bete' to benne'. <sup>20</sup>Pilaton' bchál-jlene' légake' da' yoble, dan' žénele' wsane' Jesusen', <sup>21</sup>san da' yoble wnnégake' zižje, na' wnnágake':

—iBde'e le'e yag kroze! iBde'e le'e yag kroze!

<sup>22</sup>Naž Pilaton' gože' légake' da' chonne chi'i, na' wnné':

—¿Bízkze da' zinnj ben bennen'? Bi be bžel-la' da' bene' da' žonen ga nbage'e zia gate'. Wsaka' zi'a-ne', na' te na' wsana'-ne'.

<sup>23</sup>Zížježe wnnégake', na' wnnábgake' ta' Jesusen' le'e yag kroze. Dan' wžéžeya'agak benne' ka' len bxoz wnná bia' ka', scha, na' goken kan žénegekle'. <sup>24</sup>Naž Pilaton' bchoge' che Jesusen' gak chie' kan znnábgake'. <sup>25</sup>Bsane' bennen' wnnábgake' lo ná'gake', bennen' nyejwe' liž ya dan' bdíl-lene' benne' wnná bia' ka', na' dan' bete' to benne', na' bdie' Jesusen' nich gak chie' kan žénegekle'.

**Zdá'gake' Jesús le'e yag kroze**  
(Mt. 27:32-44; Mr. 15:21-32; Jn. 19:17-27)

<sup>26</sup>Kate' ne želchi'e Jesusen' nich chejdá'gake' Le' le'e yag kroze, békxwgake' Smon, to benne' yež Sirene, benne' zeze'e yixe', na' belxóe' yag krozen' ža yene' nich we'en, na' cheje' xkóže'le Jesusen'.

<sup>27</sup>Benne' zan, benne' byo ka' len no'le ka', zejnáwgake' Jesusen', na' želbeže', na' želbeže nyache'e chie'.

<sup>28</sup>Naž byechj Jesusen', na' bwie' légake', na' gože' légake':

—Le'e, no'le Jerusalén ka'. Bi kwéžele ni'a chia' neda', san le kweže ni'a chekzle, na' ni'a chegak zi'nle ka', <sup>29</sup>dan' žin ža nnágake': “Ba nez zen naken chegak no'le wbíž ka', na' chegak no'le ka' bizej noe'e bi'do' ka', na' no'le ka' bi zgáže'gake' bi' že'n ka'.” <sup>30</sup>Naž benách ka' so láwgake' yé'gake' ya'a sibe ka', na' mnágake': “Le yedjbaga' neto” na' lezka' yé'gake' ya'ado' ka': “Le wkache' neto.” <sup>31</sup>Cha' ki žóngake' chia' neda', naka' ka to yag nban, čnakxkze góngake' chele le'e, nakle ka yag biž ka'?

<sup>32</sup>Lezka' belchi'e chope benne' wen da' zinnj ka', nich wdá'gake' légake' le'egak yag kroze ka' tzen len Jesusen'. <sup>33</sup>Kate' bžíngake' law Ya'a Kalabera, da' znnan len diža' xiža': “Ya'a Žit Yichjžo” bdá'gake' Jesusen' le'e yag kroze. Lezka' bdá'gake' chope benne' ka' le'egak yag kroze ka', benne' wen da' zinnj ka'. Toe' bdá'gake' kwit li ža che Jesusen', na' yetóe' bdá'gake' kwite' yegle. <sup>34</sup>Naž Jesusen' wnné':

—Xe, benít law chégake', dan' bi nnézgekle' da' žóngake'.

Naž benne' ka' žjake' lo wdile, benne' nníta'gake' ga na', belé'gekle' laže' dan' nakw Jesusen', na' bebéjgake' da' gak bia' lawlen. <sup>35</sup> Benne' ka' nníta'gake' ga na', na' zwíagakze', ben dítjekle' Jesusen', na' lezka' bengak benne' wnná bia' ka', na' wnnágake':

—Benne' ni beslé' benne' yoble ka'. Na'a žala' yeslá kwine' cha' nake' Benne' Criston', bennen' bsela' Dios.

<sup>36</sup> Lezka' benne' ka' žjake' lo wdile ben dítjekle' Jesusen'. Wbíga'gake' gan zoe', na' byé'jgake' Le' nop zichj, <sup>37</sup> na' wnnágake':

—Cha' nako' le' benne' nna bi'e benne' judío ka', beslá kwino'.

<sup>38</sup> Lezka' zoa to da' dan' le'e yag kroze yichjle Jesusen', da' nyejwn len diža' griego, na' len diža' latín, na' len diža' hebreo, dan' znnan: "Benne' znnna bi'e benách judío ka!" <sup>39</sup> To benne' wen da' zinnj na', benne' de'e le'e yag kroze, bliž ditje' Jesusen', na' wnné':

—Cha' nako' le' Benne' Criston', beslá kwino', na' lezka' neto'.

<sup>40</sup> Beží'i yetó benne' wen da' zinnj na', na' wdile' lježen', na' wnné':

—¿Bi zžebo' Dios? Lezka' le' nžog chio' gato'. <sup>41</sup> Da' li žo'o, da' žala'kze gaken chežo zzáka'žo, kan žala' chog che no benne' wen da' zinnj, san benne' ni, bi be da' zinnj bene'.

<sup>42</sup> Naž bennen' gože' Jesusen':

—Bejsá' laže' neda' kate' žino' gan nna bi'o.

<sup>43</sup> Jesusen' gože' le':

—Da' li žapa' le', na'a ža sóaleno' neda' latje xtan chia'.

### Žat Jesús

(Mt. 27:45-56; Mr. 15:33-41; Jn. 19:28-30)

<sup>44</sup> Kate' bžin wawbíž, bechól dot yežlyó nga ga bžinte žedá chonne.

<sup>45</sup> Bechól lo wbíž, na' laže' da' zen lo yodo' wžezan' chope chogle. <sup>46</sup> Naž Jesusen' wnné' zižje, na' wnné':

—Xe, ždia' be' nakkza' lo no'o.

Kate' beyóž wnné' ki, la' bežojte be' nakkze', na' gote'.

<sup>47</sup> Kate' bennen' zchi'e benne' ka' žjake' lo wdile ble'ele' kan goken, bka'n zene' Dios, na' wnné':

—Da' likze bennen' goke' benne' chawe'.

<sup>48</sup> Yógo'te benne' ka' nníta'gake' ga na', na' zwíagakze', katen' blé'gekle' dan' goken, beyéjgake' lo yež, želgapa' lcho'gake' dan' že' zđegkle'.

<sup>49</sup> Zí'to'le bga'ngak yógo'te benne' ka', benne' zej nónbi'e Jesusen', len no'le ka' bénlengake' Le' tzen katen' wzóe' gan nbab Galilea, na' blé'gekle' dan' goken.

Zkáche'gake' Jesús lo yežw ba

(Mt. 27:57-61; Mr. 15:42-47; Jn. 19:38-42)

<sup>50</sup> Lezka' to benne' yež Arimatea, yežen' nbaben Judea, zoe' ga na'.

Lie' Jwsé, na' nake' chawe', na' dot li laže', na' nbáblene' benne' yodo' ka', benne' wchi'a laže' ka'. <sup>51</sup> Bi bénlene' tzen benne' ka' belchoge' che

Jesusen' gate', dan' zbezakze Jwsén' ža na' nna bia' Dios. <sup>52</sup> Naž wyéj Jwsén' law Pilato, na' wnnabe' latje yeyo'e Jesusen'. <sup>53</sup> Kate' ba betinne' Le', bchelo' Le' laže', na' bkáche'gake' Le' lo yežw ba, da' ba bché'ngake'

le'e ya'a yej, na' lo yežw ba na', nitó benne' gat bi na' wkáche'gake'.

<sup>54</sup> Ža na' nak ža zkwézgake' che ža la'y chegak benne' judío ka', dan' za' žin ža la'y na'.

<sup>55</sup> Lezka' jak no'le ka' ga na', no'le ka' wdálengake' Jesusen' tzen, katen' wzóe' gan nbab Galilea, na'

blé'egekle' yežw ba na', na' kan bkáche'gake' Le' ga na'. <sup>56</sup>Kate' beyéjgake' lo yo'o, bkwézgake' nežw da' zla' zix, na' set da' zla' zix. Naž bezí' láže'gake' ža la'y chegak benne' judío ka', kan znnna xtiža' Dios.

### Žebán Jesús lo yela' got

(Mt. 28:1-10; Mr. 16:1-8; Jn. 20:1-10)

**24** Kate' bžin ža nežw, na' ne nak zildo', bžingak no'le ka' žoa'a yežw ba che Jesusen'. Zej noe'e da' ka' zla' zix, da' ka' bkwézgaken', na' yebale no'le ka' žónlengake' légake' tzen. <sup>2</sup>Katen' bžingake' ga na', bejxáka'gake' ba nga'a yej na' dan' bžíagake' gan žó'ogake' lo yežw ba chien'. <sup>3</sup>Kate' belyo'e lo yežw ban', bi blé'egekle' Xanžo Jesusen' ga na'. <sup>4</sup>Kate' ne zžébegake' ni'a che da' žaken, la' blá'tegak chope benne' zej nakwe' laže' da' žepen yes baní', na' wzégake' gan mnítá'gak no'le ka'. <sup>5</sup>Naž bžébžegake', na' bzexjw yíchjgake' zwíagake' lo yole. Wbás che ya'abá ka' góžgake' légake', na' wnnágake':

—¿Biž chen' žeyilje to benne' zoe' nbane' ga nak latje chegak benne' gat ka'? <sup>6</sup>Biž yoe'e ga ni, dan' ba bebane'. Le yesá' laže' dan' gožkze' le'e katen' wzó' gan nbab Galilea. <sup>7</sup>Wnné': "Žon byenen soa no benne' wdíe' neda', Benne' Golje' Benách, lo na'gak benne' dola' ka'. Wdá'gake' neda' le'e yag kroze, na' yebana' kate' gak chonne ža."

<sup>8</sup>Naž bejsá' láže'gake' dan' wnná Jesusen', <sup>9</sup>na' bezá'gake' žoa'a yežw ban', na' bejzéngekle' benne' chinéj wbás ka' che Jesusen', len yezika' benne' ka', kan nak dan' goken.

<sup>10</sup>No'le ka' bejzéngekle' benne' wbás ka' da' ni, zej nake' Lia Madlen, na' Zwan, na' Lia, xna' Jakob, na' yebale no'le ka', no'le bénlengake' légake' tzen. <sup>11</sup>Benne' wbás ka' góžgake' nžix xtiža'gake', na' bi bejlé'gake' chégake'.

<sup>12</sup>Naž la' wzó ža'te Bedw, na' taría taría wyeje' žoa'a yežw ban'. Katen' bwie' lo yežw ban', ble'ele' láže'ze zej nnitan' ga na', na' naž beyeje' liže' žebanle' kan nak dan' goken.

### Da' gok lo nez da' zžinten lo yež

Emaús

(Mr. 16:12-13)

<sup>13</sup>La' ža na'ze zjak chope benne' ka' yó'ogake' nez da' zžinten lo yež Emaús, da' žen' ka chope hora žezá'gake' yež Jerusalén. <sup>14</sup>Lo nezen' zcháljgake' che dan' goken. <sup>15</sup>Kate' ne zcháljgake' la' légakze', bžinkze Jesusen' ga na', na' zéjlene' légake' tzen. <sup>16</sup>Bi beyónbia'gake' Le' dan' gok to da' zcholen' yej láwgake'. <sup>17</sup>Naž Jesusen' wnnable' légake', na' wnné':

—¿Biž chen' zchaljle la' l'é'ezele yo'ole nez? ¿Biž chen' žak nyache' láže'le?

<sup>18</sup>Beží'i bennen' lie' Kleofas, na' gože' Le':

—¿Nako' benne' zi'to' lo yež Jerusalén, na' tozo' le' bi nnezlo' dan' goken neje nase' ga na'?

<sup>19</sup>Naž Jesusen' gože' légake':

—¿Bizen' goken?

Góžgake' Le':

—Dan' goken che Jesús, benne' Nasaret na'. Goke' benne' bchalje' lo wláz Dios, na' len yela' wak zen bene' žin, na' bchalje' law Dios, na' lawgak yógo'te benách. <sup>20</sup>Bxzox

wnná bia' ka' len benne' wnná  
 bia' cheto' ka' bdégake' Le', na'  
 bchóggake' chie' gate', na' bdá'gake'  
Le' le'e yag kroze. <sup>21</sup>Neto' gok  
 láže'to' gake' bennen' žala' yeslé'  
 benách Israel ka' lo na'gak benne'  
 Roma ka', san na'a ba gok chonne ža  
 kate' gokgak da' ka'. <sup>22</sup>Lezka', bale  
 no'le ka', no'le wnníta'gake' ládjwto',  
 béngek' ga wžé' zedlto'. Jake'  
 žoa'a yežw ba chien' kate' bla' wbíz  
 na'a ža, <sup>23</sup>na' katen' bi blé'egekle'  
Le', na' beyéjgake', na' góžgake'  
 neto' blé'egekle' wbás che ya'abá  
 ka', wbás ka' góžgake' légake' zoa  
 Jesusen' nbane!. <sup>24</sup>Naž bale benne'  
 lježto' ka' jake' žoa'a yežw ban', na'  
 bejxáka'gaken' kan wnnagak no'le  
 ka', san bi blé'egekle' Jesusen'.

<sup>25</sup>Naž Jesusen' gože' légake':

—Le'e, benne' bi žejní'il ka'. Nzižje  
 yichj lázdo'le nich bi gak chejle'le  
 yógo'te da' wnnagak benne' ka'  
 bcháljgake' lo wláz Dios. <sup>26</sup>Bi ben  
 byenen saka' Benne' Criston' da' ki,  
 na' choe'e gan gake' benne' blo?

<sup>27</sup>Naž wzó law Jesusen' zloe'ele'  
légake' yógo'te da' zsedle kan nak  
 chie' da' zej nyejwn le'e yich la'y,  
 kate' wzó law da' bchalj Moisés, na'  
 zejte da' ka' wnnagak yógo'te benne'  
 ka' bcháljgake' lo wláz Dios.

<sup>28</sup>Katen' bžíngake' lo yeždo' gan  
 zjake', na' ben Jesusen' kan žon to  
 benne' zejže' zi'to'. <sup>29</sup>Ben byéngake'  
 gá'nlené' légake', na' wnnágake':

—Bga'nlen neto', dan' za' gale na'a,  
 na' ba žale.

Naž wyó'o Jesusen' lo yo'o, na'  
 bgá'nlené' légake'. <sup>30</sup>Kate' Jesusen'  
 ne že'j žawlène' légake', bexwe' yet  
 xtil, na' gože' Dios: “Žóxkeno!”. Naž  
 bzozjen', na' bnezjwen' chégake'.

<sup>31</sup>La' na'ze bnitle dan' bcholen yej  
 láwgake', na' beyónbia'gake' Jesusen',  
 na' Le' benitle' láwgake'. <sup>32</sup>Naž  
 góžgake' ljéžgake' toe' yetóe':

—Beyála'tekze lázdo'žo katen'  
 bcháljlene' žo'o lo nez, na' katen'  
 bzejni'ile' žo'o da' nyejwn le'e yich  
 la'y.

<sup>33</sup>La' na'ze belzó že'e, na'  
 beyéjgake' lo yež Jerusalén, na'  
 bejxáka'gake' zej ndobe benne'  
 chinéj wbás ka' che Jesusen', tzen  
len benne' ka' nníta'lengake' légake'.  
<sup>34</sup>Naž benne' ka' nníta'gake' ga na'  
 góžgake' chope' ka', na' wnnágake':

—iBa bebankze Xanžon! iBla'  
 lawe', na' Smon ble'ele' Le'!

<sup>35</sup>Naž benne' chope' ka' bžéngekle'  
légake' dan' goken chégake' lo  
 nezen', na' kan beyónbia'gake'  
 Jesusen' katen' bzožje' yet xtilen'.

**Benne' wsedle ka' che Jesús  
 želé'egekle' Le'**

(Mt. 28:16-20; Mr. 16:14-18; Jn. 20:19-23)

<sup>36</sup>Kate' ne zcháljgake' kan zej nak  
 da' ki, Jesusen' la' bedjsoatие' gachje  
 láwe'le gan nníta'gake', na' gože'  
légake':

—Le ga'n ži yichj lázdo'le.

<sup>37</sup>Naž bžébegake' dan' žékgekle'  
zlé'egekle' to bxin. <sup>38</sup>Jesusen' gože'  
légake':

—iBiz chen' že' zédlele? iBiz chen'  
 zza' láže'le da' ki? <sup>39</sup>Le wia ni'a na'a.  
 Nedkzan'. Le kan neda', na' le wia  
 neda', dan' to bxin bi dan' bela', na'  
 bi yo'on žit kan zlé'ekzelele naken  
 chia' neda'.

<sup>40</sup>Kate' ne zchalje' da' ni, blo'e'ele'  
légake' ni'a ne'e. <sup>41</sup>Lo yela' žebél  
 chégake' bi bejlé'gake', na' bebángekle'.  
 Che len Jesusen' gože' légake':

—¿De da' gawa'?

**42** Naž bnéžjwgake' Le' láte'do' bel, bia weye', na' china' bezdo'.

**43** Jesusen' wz'i'en, na' bdawen' láwgake'. **44** Naž gože' légake':

—Dan' goken chia' goken kan gožkza' le'e katen' wzóalena' le'e, na' wnnía': “Žon byenen gak yógo'te da' nyejw le'e yich, da' bsedle Moisés, na' da' wnnagak benne' ka' bcháljgake' lo wláz Dios, na' da' nyejw le'e yich da' nzin' Salmo Ka', da' ka' zcháljgaken kan žala' gaken chia' neda.”

**45** Naž bzejni'ile' légake' da ka' zej nyejwn le'e yich la'y, **46** na' gože' légake':

—Ki nyejw le'e yich kan žon byenen gaken che Benne' Criston', znnan sáka'l'i'e, na' yebane' lo yela' got kate' gak chonne ža, **47** na' dot yežlyó nga žala' wzégake' diža' kan nak chia' neda' nich yeyát láže'gak

benách ka', na' yenít law Dios doła' da' zej nbage'e. Lo yež Jerusalén so lawle wchaljle chia', **48** dan' le'ekze blé'elele da' ki, na' žala' wzele diža' dan' goken. **49** Le wia nga, neda' sela'a chele da' bchebe laže' Xa' gonne' chele. Che len le ga'nze lo yež Jerusalén kate' sí'žele yela' wak, dan' zan' ya'abá che Dios.

### Žeyepe Jesús ya'abá che Dios

(*Mr. 16:19-20; Hch. 1:6-11*)

**50** Naž Jesusen' bchi'e benne' ka' žónlengake' Le' tzen, na' jake' lo yež Betania, gan bchis ne'e, na' bliž chawe'e légake'. **51** Kate' ne žliž cháwe'ze' légake', la' beza'tie' gan nníta'gake', na' beyepe' ya'abá che Dios. **52** Wdé bka'n zéngake' Le', lo yela' žebél chégake' beyéjgake' Jerusalén. **53** Wnníta'gakze' lo zchil yodo' zka'n zéngake' Dios, na' žoe láwgake' Le'. Ka'kze naken.

# DIŽA' CHAWE' DA' BZOJ ZWA

Bennen' lie' Diža' golje' benách

**1** Kate' wzó law, kate' bi na' gata' yežlyó nga, ba zoakze Bennen' lie' Diža', na' Bennen' nake' Diža' wzóalene' Dios, na' Benne' Dižan' nakkze' Dios. **2** Bennen' nake' Diža' wzóalene' Dios katen' wzó law žata' yežlyó nga. **3** Lo na' Benne' ni, Dios bene' yógo'te da'zej nnita', na' bi be zoa da' ben Dios da' bi bene' lo na' Bennen'. **4** Napkze Bennen' yela' nban, na' yela' nban na' naken ka to baní' da' zza'nín' lo yichj lázdo'gak benách ka'. **5** Baní' na' wza'nín' gan nak chol' che yela' got, san bi gok da' chol' na' wsolen baní' na'.

**6** Dios bsele'e to benne' lie' Zwa ga ni. **7** Benne' ni ble'e nga nich wzóa lie' che Bennen' nake' baní', nich chejle'gak yógo'te benách ka' che Bennen' ni'a che dan' wchalje'. **8** Zwan' bi nake' banín', san bla'ze' nich wzóa lie' che Bennen' nake' baní'. **9** Kate' ža ka' Bennen' nake' baní' da' naken li laže' ba ze'e yežlyó nga, na' zza'ni'e lo yichj lázdo'gak yógo'te benách ka'.

**10** Bennen' nake' baní' ble'e yežlyó nga, na' lo ne'e Le' Dios bene' yežlyó nga, san benách ka' nníta'gake' yežlyó nga bi beyónbia'gake' Le'.

**11** Ble'e gan nak chie', san benne' ka' nbáblene' bi wzí' lo ná'gake' Le'. **12** Benne' ka' bejlé'gake' che Jesusen' wzí' lo ná'gake' Le', na' yógo'te benne' ki, Le' bene' ga wzí' lo ná'gake' gákake' zí'nkze Dios. **13** Benne' kizej nake' zí'in Dios, kege dan'zej nake' zí'ngak benách chie' ka', na' kege dan' náljgake' ni'a che da' zdan láže'gakkze', o dan' žénele no benne' gaken ki, sanzej nake' ki dan' naken da' žénekzele Dios.

**14** Bennen' nake' Diža' golje' benách, na' to chí'i'do'ze wdálene' žo'o, na' yela' nží'il che Dios, na' da' naken dot da' li wzóalengaken Le'. Ble'elto' yela' zen chie', na' yela' zen chien' naken da' bnezjw Xe' chie' dan' nake' bi' byo tlichia' chie'. **15** Zwan' bzoa lie' che Bennen'. Wnníe' zížje, na' wnné':

—Benne' ni nake' Bennen' bchalja' chie' katen' wnníá: "Benne' za' ze'e ka neda' nakže' blo ka neda', dan' zoakze' Le' zga'ale' ka neda'."

**16** Yógo'težo zzi'žo da' chawe' da' naken chie', da' žonnze' chežo, na' gonnze' da' zenze' chežo. **17** Da' bchi'le Dios blan' chežo lo na' Moisés, san yela' nží'il che Dios, na' da' naken dot da' li blá'gaken chežo lo na' Jesúš, Benne' Criston'. **18** Nitó

benne' bi na' le'ele' Dios, san bi'  
byo tlica' che Dios, Bennen' nži'il  
Xažo Dios Le', Benne' ni bene' ga  
nónbia'žo Dios.

**Da' wnná Žwa, bennen' bezóe'  
benách ka' nis, che Jesús**  
(Mt. 3:1-12; Mr. 1:7-8; Lk. 3:1-17)

<sup>19</sup>Da' ni naken da' bzoa li Žwa,  
katen' benne' judío wnná bia' ka',  
benne' nníta'gake' lo yež Jerusalén,  
bséla'gake' bxoz ka' gan zoa Žwan',  
tzen len benne' ka' zej nake' za'só  
Lebí, benne' ka' zej nake' ni'a na'gak  
bxoz ka', nich nnábgekle' Žwan', na'  
wnnágake':

—¿Nozkze benne' le'?

<sup>20</sup>Kwáselo bchalj Žwan', na' bi  
bkache'e da' nake', san bchalje'  
káteze naken, na' wnné':

—Bi naka' Benne' Criston', Bennen'  
bchebe laže' Dios sele'e chežo.

<sup>21</sup>Naž wnnábgekle' le' da' yoble,  
na' wnnágake':

—¿Nozkze le'? ¿Cha' len' Lías,  
benne' bchalje' lo wláz Dios ža  
ni'te?

Žwan' wnné':

—Kege nedan'.

Naž wnnábgekle' le':

—¿Cha' len' benne' žala' yide'  
nich wchalje' lo wláz Dios?

Bchebe Žwan', na' wnné':

—Kege nedan'.

<sup>22</sup>Naž wnnábgekle' le':

—¿Nozkze le'? Wnná neto' nich  
gak wzenlo' benne' ka' bséla'gake'  
neto'. ¿Biz znno' le' non' nako'?

<sup>23</sup>Bchebe Žwan', na' gože' légake':

—Neda' naka' bennen', nyejw le'e  
yiche la'y ka nak chie', dan' znnan:  
“Zenle chii' to benne' žliže' lo latje  
dach, znne': Le yejón chawe' yichj

lázdo'le dan' za' la' Xanžon' gan  
zoale.” Ki wnná Isaás, bennen'  
bchalje' lo wláz Dios.

<sup>24</sup>Benne' ka' bséla'gak benne'  
judío wnná bia' ka' zej nake' benne'  
yodo' fariseo ka'. <sup>25</sup>Wnnábgekle'  
Žwan', na' belyi'e le':

—¿Biz chen' žezó' benách ka' nis  
cha' bi nako' le' Benne' Criston', na'  
bi nako' Lías, na' bi nako' bennen'  
žala' yedjchalje' lo wláz Dios?

<sup>26</sup>Bchebe Žwan', na' gože' légake':

—Neda' žezó' benách ka' nis lo  
nis, san zoa to benne' gachje láwe'le  
gan zoale, bennen' bi nónbia'le-ne'.

<sup>27</sup>Benne' ni nake' Bennen' za' ze'e ka  
neda', na' nakže' blo ka neda', na' bi  
naka' neda' zi kweja' zele'.

<sup>28</sup>Yógo'te da' ki gókgaken gan  
nbab yež Betábara, gan nak  
yechelá'a yego Jordán, zaka' gan  
zla' wbíž, gan bezóa Žwan' benách  
ka' nis.

**Jesús nake' ka zíla'do', bia  
žótgake'-ba' law Dios**

<sup>29</sup>Ža chope ža Žwa ble'ele' za'  
Jesusen', na' wnné':

—Le wia ga na'. Bennen' nake'  
zíla'do' che Dios, na' žeké'e dola'  
chegak benách ka' nníta'gake'  
yežlyó nga. <sup>30</sup>Le' nake' Bennen'  
wnnía' chie': “Za' za' to Benne'  
ka neda', na' nakže' blo ka neda',  
dan' zoakze' zga'ale' ka neda'.”

<sup>31</sup>Bi bénbi'a-ne' zga'ale, san bla'a,  
na' žezó' benách ka' nis nich  
gónbia'gak benách Israel ka' Le'.

<sup>32</sup>Žwan' bzoa lie' chie', na' wnné':

—Ble'ela' Dios Be' La'y, bžoje'  
ya'babá che Dios, na' betje', na'  
wnné'e kan znna' to plomdo'. Ble'e  
gan zoa Jesusen', na' bgá'nlene' Le'.

**33** Bi bénbi'a-ne' zga'ale. Bennen' bsele'e neda' nich yezóa' benách ka' nis gože' neda', na' wnné': "Kate' le'elo' yetj Dios Be' La'y, chejsóalene' to Benne', na' gá'nlene' Le', Bennen' gone' da' zloézeze yela' žezóa nis ni, dan' wchize' benách ka' Dios Be' La'y." **34** Na'a, ba ble'elan', na' zzoa lia' che Bennen', znnia' nake' Zi'n Dios.

**Benne' nežw ka', benne'  
bénłengake' Jesús tzen**

**35** Yetó že na', da' yoble wzóa Zwa ga na', na' chope benne' ka', benne' žónłengake' le' tzen, wnníta'lengake' le'. **36** Kate' Zwan' ble'ele' Jesusen', zde' ga na', gože' benne' ka' žónłengake' le' tzen, na' wnné': —Le wia ga na'. Bennen' ze'e ga na' nake' zíla'do' che Dios.

**37** Chope benne' ka', benne' žónłengake' Zwan' tzen, béngekle' dan' wnné', na' bejnáwgake' Jesusen'. **38** Naž beyéchj Jesusen', na' ble'ele' chope benne' kizej nawe' Le', na' gože' lágake':

—¿Bizen' žilje?

Bely'i'e Le':

—Benne' wsedle, ¿gaze zo'?

**39** Bechebe Jesusen', na' gože' lágake':

—Le da, na' l'élelen.

Naž jákłene' Le', na' blé'egekle' gan zoe', na' bgá'nlene' Le' že na', dan' ba žale.

**40** Ndres, benne' biche' Smon Bedw, nake' to benne' chope' ka' béngekle' da' bchálj Zwan', na' bejnáwgake' Jesusen'. **41** Ndrezen' bejdilje' zga'ale benne' biche'e, bennen' lie' Smon, na' gože' le':

—Ba bla' Benne' Mesías.

Mesías naken to diža' hebreo da' znnan len diža' griego: "Benne' Criston" na' len diža' xiža': "Benne' bséla'kze Dios."

**42** Naž Ndrezen' la' bche'tie' Smon na' gan zoa Jesusen'. Katen' Jesusen' ble'ele' le', gože' le':

—Le' nako' Smon, zi'n Jonás. Na'a, si' lo' Sefas.

Sefas naken to diža' hebreo da' znnan: "Pedro" len diža' xtil, na' len diža' xiža': "Bedw" da' znnan: "Yej."

**Jesús žliže' Lip, na' Natanael**

**43** Kate' za' ža'ní' yetó že, gónele Jesusen' cheje' gan nbab Galilea. Bejkake' Lip, na' gože' le':

—Benlen neda' tzen.

**44** Lipen' nake' benne' yež Betsaida, da' naken lažgak Ndres, na' Bedon'.

**45** Lipen' bejdilje' Natanael, na' gože' le':

—Ba bžel-lto' Bennen' bzoj Moisés kan nak chie' gan nyejw da' bchi'le Dios, na' lezka' benne' ka' bcháljgake' lo wláz Dios bzójgake' kan nak chie'. Benne' ni Jesús, zi'n Jwsé, benne' yež Nasaret.

**46** Natanael na' gože' le':

—¿La' to da' naken chawé' lo yež Nasaret?

Lipen' gože' le':

—Da, na' le'elon'.

**47** Kate' Jesusen' ble'ele' za' Natanael na' gan zoe', wnné':

—Le wia nga to benne' nake' da' li benne' Israel, na' kwáselo zchalje'.

**48** Naž Natanael na' wnnable' Jesusen', na' gože' Le':

—¿Nakžkzen' nónbi'o neda'?

Bechebe Jesusen', na' gože' le':

—Kate' ne žliž Lipen' le', katen' wzó' zan yag higon', ble'ela' le'.

**49** Naž bechebe Natanael, na' gože' Le':

—iBenne' wsedle, Le' nako' Zi'n Dios! iLe' nako' Benne' Nna Bi'e Benne' Israel Ka'!

**50** Bechebe Jesusen', na' gože' le':

—¿Žejli'o chia', dan' goža' le':  
"Ble'ela' le' zan yag higon"? Le'elo'  
da' zénle'eže ka' ka da' ni.

**51** Lezka' Jesusen' gože' légake', na'  
wnné':

—Da' li žapa' le'e, lé'elele nyaljw  
ya'abá, na' wbás che ya'abá ka'  
želyetje', na' želbene' gan zoa' neda',  
Benne' Golje' Benách.

Lni che yela' zchag na' da'  
goken lo yež Kaná

**2** Wdé chonnie ža, gok lni che  
yela' zchag na' lo yež Kaná gan  
nbab Galilea, na' zoa xna' Jesusen'  
ga na'. **2** Lezka' wzóa no benne' bliže'  
Jesusen' len benne' wsedle chie' ka',  
nich yídgake' lni na'. **3** Kate' bebíz  
xis uba, dan' yé'jgake', xna' Jesusen'  
gože' Le', na' wnné':

—Biž de xis uban' da' žé'jgaken.

Bechebe Jesusen', na' wnné':

—Nó'ledo'. ¿Biz chen' znnio' neda'?  
Bi na' žin ža wloe'ela' law yela' wak  
chia'.

**5** Naž xna' Jesusen' gože' benne'  
wen žin ka', benne' zkqwá'gake' da'  
že'j žáwgake', na' wnné':

—Le gon yógo'te da' yi'e le'e.

**6** Wnníta'gak xope yeso' yej ga  
na', da' ka' zkóngekle benne' judío  
ka' žin kate' zíbgake' ni'a nágake'  
kan žónteze žóngake', na' žože  
chope chonnie že'e nis to to yeso' ka'.  
**7** Jesusen' gože' benne' wen žin ka',  
na' wnné':

—Le yescha'te yeso' ki nis.

Naž beschá'gake' yeso' ka' nis.

**8** Naž Jesusen' gože' légake':

—Le gachen' na'a, na' le chjwan'  
law benne' znnabe' bi da' žiažjen.

Yjwá'gaken' ga na'. **9** Bennen'  
znnabe' bi da' žiažjen bwien' cha'  
nak dži' nisen' da' ba beyaken  
xis uba, san bi nnezle' gan zan'.  
Nnázgekle benne' wen žin ka',  
benne' belgache'e nisen'. Naž  
bennen' znnabe' bi da' žiažjen bliže'  
bennen' zchag ne'e, **10** na' gože' le':

—Yógo'te benne' znézjwgake'  
zga'ale xis uba dan' nakžen dži', na'  
kate' ba né'jgake', naž znézjwgake'  
da' bi naken dži!. Le', na' zejte na'a  
wdape chi'o xis uba da' nakžen dži'.

**11** Ben Jesusen' yela' wak ni, da'  
gok bian', lo yež Kaná gan nbab  
Galilea, na' nak yela' wak ni da'  
nežw da' bene'. Ka' goken, bloe'ele'  
law yela' wak zen chie', na' benne'  
wsedle chie' ka' bejlé'gake' chie'.

**12** Wdé na' Jesusen' wyeje' lo yež  
Kapernaum, tzen len xne'e, na'  
benne' biche'e ka', na' benne' wsedle  
chie' ka', na' wnníta'gake' lo yež  
Kapernaum na' zan ža.

Jesús žebeje' benne' ka' li'a yodo'

(Mt. 21:12-13; Mr. 11:15-18; Lk. 19:45-46)

**13** Kate' za' žin Lni Pasko' kate'  
žejsá' láže'gak benne' judío ka' kan  
ben Dios katen' bebeje' xa xtó'gake'  
ka' lo yežlyó Egipto, na' Jesusen'  
wyeje' lo yež Jerusalén. **14** Bejxake'e  
benách ka' lo yežen', benne' ka'  
nníta'gake' li'a yodo', na' žóte'gake'  
bež ka', na' zila' ka', na' plomdo' ka',  
bia ka' žótgake'-ba' law Dios. Lezka'  
žé'gak benne' ka' ga na', benne'  
zchá'gake' mežw ka' da' zá'gaken dot  
yežlyó nga. **15** Katen' ble'lel Jesusen'

da' ni, na' bchoke' do las ka' nich chinne' benne' ka', na' bechache' yógo'te benne' ka' na'le gan nak li'a yodo', na' lezka' blage' na'le zila' ka', na' bež ka'. Besdinnje' xmežw benne' ka' zchá'gake' mežwn', na' bžixé' blag ka' chégake!. <sup>16</sup>Naž Jesusen' gože' benne' ka', benne' žóte'gake' plomdo' ka', na' wnné':

—Le yeká'a da' ki. Bi gonle liž Xa' ka to lawe' ya'a.

<sup>17</sup>Naž bejsá' láže'gak benne' wsedle ka' che Jesusen' da' nyejw le'e yiche la'y, da' znnan: "Dan' žékele'ela' che ližo', na' žeye zla lázda'wa'."

<sup>18</sup>Naž beži'igak benne' judío wnná bia' ka' nníta'gake' ga na', na' belyi'e Jesusen':

—¿Bíz yela' wak wloe'elo' neto' da' gak bian' nzi' lo no'o žono' da' ki?

<sup>19</sup>Bechebe Jesusen', na' gože' légake':

—Le wzía yi' yodo' ni, na' yechonne žaze yechisan'.

<sup>20</sup>Naž benne' judío ka' belyi'e Le', na' wnnágake':

—Xope-yon yiz ba zej žóngake' yodo' nga, na' Le', ¿chonne žaze yechison'?

<sup>21</sup>Yodon', dan' bchalj Jesusen' chen, naken la' kwinkze'. <sup>22</sup>Che len, katen' bebán Jesusen' lo yela' got, bejsá' láže'gak benne' wsedle chie' ka' kan wnné', na' bejlé'gake' da' nyejw le'e yiche la'y, na' lezka' da' bchalj Jesusen'.

### Jesús nnezle' kan zej nak yógo'te benách ka'

<sup>23</sup>Kate' ne zoa Jesusen' lo yež Jerusalén, kate' žak Lni Pasko', benne' zan bejlé'gake' chie' Le', dan'

blé'egekle' yela' wak ka' da' žone'.

<sup>24</sup>Jesusen' bi bxen laže'e légake', dan' nnezle' kan zej nak yógo'te benách ka'. <sup>25</sup>Bi žon byenen no benne' wloe'ele' Jesusen' kan zej nak benách ka', dan' nnézkzele' da' yo'o lo yichj lázdo'gak benách ka'.

### Jesús zcháljlene' Nikodemo

**3** Nikodemo, to benne' yodo' fariseo, nbáblene' benne' judío wnná bia' ka'. <sup>2</sup>Benne' ni ble'e gan zoa Jesusen' to xe'le, na' gože' Le':

—Benne' Wsadle. Nnezla' Dios bsele'e Le' nich wsedlo' neto'. Bi zoa no benne' gak gone' yela' wak ka', da' zej nak bian', kan zej nak da' ka' žono' Le', cha' bi zoaßen Dios le'.

<sup>3</sup>Bechebe Jesusen', na' gože' le':

—Da' li žapa' le', no benne' bi galje' da' yoble, bi gak le'ele' latjen' gan znnna bia' Dios.

<sup>4</sup>Nikodemon' wnnable' Le', na' wnné':

—¿Nakxkze gak to benne' galje' da' yoble katen' ba ngole'? ¿Wak yeyoé'e le'e xne'e, na' galje' yetó?

<sup>5</sup>Bechebe Jesusen', na' gože' le':

—Da' li žapa' le'. No benne' bi galje' ni'a che nis, na' ni'a che Dios Be' La'y, bi gak choe' gan znnna bia' Dios. <sup>6</sup>Bennen' nalje' lo ni'a lo na' benách, benachze nake', san no benne' nalje' ni'a che Dios Be' La'y, Be' La'y nbánlene'. <sup>7</sup>Bi yebanol' dan' žapa' le', žon byenen galjo' da' yoble. <sup>8</sup>Gáte'teze žak be', na' ženlo' znné ben', san bi nnezlo' galen' zan', o galen' zejen. Lezka' žak chegak benne' ka' zej nalje' ni'a che Dios Be' La'y.

<sup>9</sup>Naž Nikodemon' wnnable' Jesusen', na' wnné':

—čNakxkzen' gak da' ni, cha'?  
**10**Bechebe Jesusen', na' gože' le':  
 —čŽsedlo' benách Israel ka', na'  
 bi nnezlo' da' ki? **11**Da' li žapa' le',  
 da' nnezlto' zchaljto' chen, na' da'  
 ble'elto' zloe'elto' le'e, san bi zzi' lo  
 na'le dan' zsedlo'. **12**Cha' bi žeje'le'  
 chia' kate' zcháljlena' le'e kan zej  
 nak da' ka' žákgaken yežlyó nga,  
 čnakxkze gak chejle'le chia' cha'  
 wcháljlena' le'e che da' ka' žákgaken  
 ya'abá che Dios?

**13**'Batkle wžén no benne' ya'abá  
 che Dios, san toza' neda', Benne'  
 Golje' Benách, dan' bžoja' ya'abá  
 che Dios, na' betja' nga, san zoakza'  
 ya'abá che Dios. **14**Kan ben Moisés  
 lo latje dach, bchise' ža'le to bele ya,  
 bian' bde'e-ba' le'e yag, lezka' žon  
 byenen gaken chia' neda', Benne'  
 Golje' Benách, wchísgake' neda' to  
 le'e yag. **15**Ki gaken chia', nich bi  
 kwia yi'gak benne' ka' chejlé'gake'  
 chia', san gata' yela' nban da' zejlí  
 kanne chégake'.

### Dios nží'ile'ele' benách ka'

Naž wnná Jesusen':

**16**—Dan' nží'ile'el Dios benách  
 yežlyó nga, bdie' tlícha'tekze Zi'ne'  
 lo yela' got, nich bi kwia yi'gak  
 benne' ka' chejlé'gake' chie', san  
 gata' yela' nban da' zejlí kanne  
 chégake'. **17**Dios bsele'e Zi'ne' yežlyó  
 nga, kege nich choge' chegak  
 benách ka' nnítá'gake' yežlyó nga  
 kwia yi'gake', san nich yelágake'  
 ni'a chie' Le'.

**18**'Nóte'ze benne' žeji'e che  
 Benne' nake' Zi'n Dios, bi nžog  
 chie' kwia yi'e, san no benne' bi  
 žeji'e chie', ba nžog chie' gate'  
 dan' bi žeji'e che Benne' nake'

tlícha'tekze Zi'n Dios. **19**Che len ba  
 nžog chegak benách ka' gátgake',  
 dan' bla' Bennen' nake' baní' yežlyó  
 nga, san benách ki žaz láže'gake'  
 da' nak choł, na' kege Bennen' nake'  
 baní'. Ki žóngake' dan' bi nak chawe'  
 da' žóngake'. **20**Yógo'te benne' ka',  
 benne' žóngake' da' zinnj, bi žaz  
 láže'gake' baní', na' bi zlá'gake' lo  
 baní', nich bi nna' da' žóngake'.  
**21**Benne' ka' žóngake' da' nak dot  
 da' li, zlá'gake' lo baní' nich gak bia'  
 žóngake' ni'a che Dios da' žóngake'.

### Zwa, benne' žezóe' benách ka' nis, zchalje' che Jesús

**22**Wdé na', Jesusen' wyéjlene'  
 benne' ka' žónlengake' Le' tzen,  
 na' bžíngake' gan nbab Judea, na'  
 wzóalene' légake' gan žezágake'  
 benách ka' nis. **23**Lezka' Zwa žezóe'  
 benách ka' nis lo latjen' nzin' Enón,  
 gawze gan že' yež Salim, dan' de nis  
 zil ga na'. Belžín benne' ka' latjen'  
 nich yezágake' nis. **24**Ki goken  
 kate' Zwan' bi na' yejwe' liž ya.

**25**Naž bale benne' ka', benne'  
 žónlengake' Zwan' tzen, wzó  
 láwgake' zdíl díža'gake' len benne'  
 judío ka' kan nak che yela' žeyón  
 kwin chawe' chegak benne' yodo'  
 ka'. **26**Bžíngake' gan zoa Zwan', na'  
 belyi'e le':

—Benne' wsedle. Bwia nga.  
 Benne' wzóalene' le' yechelá'a  
 yego Jordán, bennen' bzoa lio' chie',  
 žezóe' benách ka' nis, na' želžín  
 yógo'te benách ka' gan zoe'.

**27**Naž bechebe Zwan', na' gože'  
 légake':

—Cha' zoa no benne' zoa da' nzi'  
 lo ne'e, naken da' ba bde Dios lo  
 ne'e. **28**Bénkzelele dan' bchalja'

katen' wnnia': "Bi naka' neda' Benne' Criston" san Dios bsele'e neda' nich wzenla' benach ka' za' ze'e Le. <sup>29</sup>Benne' byo, bennen' zzi'e xkwide' no'le zchag na'be', nake' benne' zchag ne'e, san ljež bennen' zchag ne'e, na' žónlène' le' tzen, zze nage' chie', na' Žebele' dan' Ženle' da' zchalj bennen' zchag ne'e. Lezka' Žebéle'ela' neda' dan' žaken chie' ki. <sup>30</sup>Žon byenen gakže blo Benne' Criston', san žon byenen yéxjwža' neda'.

### Bennen' bžoje' ya'abá che Dios

<sup>31</sup>Lezka' wnná Zwan':

—Bennen' ze'e zaka' ya'abale nakže' blo ka yógo'te benach. No benne' nake' che yežlyó nga, che yežlyó nga nakze', na' zchaljze' che da' žaken yežlyó nga, san Bennen' ze'e zaka' ya'abá che Dios nakže' blo ka yógo'te benach ka'. <sup>32</sup>Benne' ni zchalje' che da' ble'ele', na' che da' benle', san bi zoa no benne' zzi' lo ne'e dan' zchalje'. <sup>33</sup>Nóte'teze benne' zzi' lo ne'e dan' zchalje', zloe'ele' law žejli'e nak dot da' li da' znnna Dios. <sup>34</sup>Bennen' bselá' Dios, zchalje' diža' che Dios, dan' Dios na'kze dot laže'e bsele'e Dios Be' La'y len Bennen'. <sup>35</sup>Xažo Dios nži'ile' Zi'n'e, na' ba bdie' lo na' Zi'n'en' yógo'te da' de. <sup>36</sup>Nóte'teze benne' žejli'e che Zi'n Dios, ba de yela' nban da' žejli' kanne chie', san bennen' bi žejli'e che Zi'n'en', bi gata' yela' nban na' chie', san nbage'e zia law Dios.

### Jesús zcháljlene' to no'le nbabe' Samaria

**4** Béngekle benne' yodo' fariseo ka' kan benne' ka' žónlengake

Jesusen' tzen zej nyanže' ka benne' ka' žónlengake' Zwa tzen, na' lezka' žezóa Jesusen' zanže benach nis ka benach ka' žezóa Zwan' nis. <sup>2</sup>Jesús na'kze bi žezóe' benach ka' nis, san benne' wsedle chie' ka' žezágake' benach ka' nis. <sup>3</sup>Kate' wnnezle Jesusen' da' ni, bezé'e gan nbab Judea, na' zejdé' da' yoble gan nbab Galilea.

<sup>4</sup>Gan zeje', žon byenen tie' gan nbab Samaria. <sup>5</sup>Ka' goken, bla' Jesusen' to yeždo' gan nbab Samaria, da' nzin' Sikar, dan' žen' gawze gan de yežlyón' da' bnežjw Jakob che Jwsé chie' ža ni'te. <sup>6</sup>Lo latjen' Jakoben' bche'ne' to yežw nis gže'. Kate' bla' Jesusen' ga na', wži'e Žo'a a yežw nisen' dan' bejxáke'le' yoe'e nez, ne naken wawbíž. <sup>7</sup>Naž bžin to no'le Samaria ga na' nich si'e nis. Jesusen' gože' le', na' wnné':

—Benn da' ye'ja'.

<sup>8</sup>Jesusen' zoe' toze' dan' ba zjak benne' wsedle chie' ka' lo yežen' nich chejxi'gake' bi da' gáwgake'.

<sup>9</sup>Naž no'le Samaria na' gože' Jesusen', na' wnné':

—¿Znnablo' Le' neda' da' ye'jo', na' nako' benne' judío? Neda' naka' no'le Samaria.

Ki wnné' dan' benne' judío ka' bi de chawé' benach Samaria ka'.

<sup>10</sup>Bechebe Jesusen', na' gože' le':

—Chela' nónbi'o da' žonn Dios, na' no Bennen' ži'le' le': "Benn da' ye'ja'" na' le' nnablo' Le', na' Le' gonnie' chio' nis da' gonneen yela' nban.

<sup>11</sup>Naž no'len' gože' Le', na' wnné':

—Benne', bi no'o da' kwéjleno' nis, na' želte žia nis ni. ¿Gaz za' nisen' dan' žonnen yela' nban? <sup>12</sup>¿Nakžo' Le' zen ka Jakob, xa wdé chežo,

bennen' benne' cheto' yežw nis ni, ga ni wzi'e nis da' we'je', na' da' we'jgak zi'ne' ka', na' da' we'jgak bia beže chie' ka'?

<sup>13</sup>Bechebe Jesusen', na' wnné':

—No benne' ye'je' nis ni, da' yoble nnan ye'jen', <sup>14</sup>san nóteteze benne' ye'je' nisen' da' wnežjwa' neda', biž nnan ye'jen', dan' wnežjwa' chie' nisen' da' gaken lo yichj lázda'we' ka to gan žal nis, da' gonnен yela' nban da' zejlí kanne chie'.

<sup>15</sup>Naž no'len' gože' Le', na' wnné':

—Benne', benn chia' nisen', nich biž bil-la', na' biž yedjxi'a nis nga.

<sup>16</sup>Jesusen' wnné':

—Wyéj, bejlíž benne' byo chio', na' le da ga zoa' ni.

<sup>17</sup>Bež'i no'len', na' gože' Le':

—Bi zoa benne' byo chia'.

Naž Jesusen' wnné':

—Da' likze znnno': “Bi zoa benne' byo chia” <sup>18</sup>dan' ba wzóaleno' gayo' benne' byo ka', na' benne' byon' zóaleno'-ne' na'a, bi nake' benne' byo chio'. Da' ni znnno', da' likze znnno'.

<sup>19</sup>Naž no'len' gože' Le', na' wnné':

—Benne', žekla' neda' nako' benne' zchalje' lo wláz Dios. <sup>20</sup>Xa xto'to' ka' bka'n zéngake' Dios law ya'a nga, san znnale le'e yež Jerusalén naken ga žala' wkán' zengak benách ka' Dios.

<sup>21</sup>Jesusen' wnné':

—No'le, bejlé' da' znnia'. Za' ža katen' wkán' zenle Xažo Dios la'kze bi yedjsaole law ya'ado' ni, na' lezka' bi chejsaole lo yež Jerusalén. <sup>22</sup>Le'e zka'n zenle Bennen' bi nónbia'le-ne', san neto' nónbia'to' Bennen' zka'n zento', dan' ben Dios chie' gata' yela' žeslá ni'a chegak benne' judío

ka'. <sup>23</sup>Na'a, za' ža, na' ba zoažo ža na', kate' benne' ka' da' li wkán' zéngake' Dios, wkán' zéngake' Le', zoalen Dios Be' La'y, na' da' nak dot da' li, lágake', dan' žénele Xažo Dios wkán' zengak benne' ka' Le' ki. <sup>24</sup>Dios nake' Be', na' benne' ka' zka'n zéngake' Le', žon byenen wkán' zéngake' Le', zoalen Dios Be' La'y, na' da' nak dot da' li, lágake'.

<sup>25</sup>Naž no'len' gože' Le', na' wnné':

—Nnezla' žala' la' Benne' Mesías, (da' znnan: “Benne' Criston”). Kate' le'e Le', wlo'e'ele' žo'o yógo'te.

<sup>26</sup>Jesusen' wnné':

—Lekze' zcháljlene' le'.

<sup>27</sup>La' na'ze bežingak benne' wsedle ka' che Jesusen' ga na', na' bebán láže'gekle' dan' zcháljlene' to no'le, san nitóe' bi bežogle' nnable' Le', bi nne': “¿Biz znnablo' le?” o “¿Biz da' zcháljlene' le?”. <sup>28</sup>Naž no'len' bka'ne' že'e chie' ga na', na' beyeje' lo yež, na' gože' benne' ka' mnítagake' ga na', <sup>29</sup>na' wnné':

—Le da, l'é'elele to benne' gože' neda' yógo'te da' ba bena'. ¿Nakkze' Le' Benne' Criston'?

<sup>30</sup>Naž bžojgak benne' ka' lo yežen', na' bžíngake' gan zoa Jesusen'.

<sup>31</sup>Kate' nezej no'len', benne' wsedle ka' che Jesusen' ben byéngake', na' belyi'e Le':

—Benne' Wsedle, bdaw.

<sup>32</sup>Jesusen' gože' lágake':

—De to da' žawa', da' bi nónbia'le.

<sup>33</sup>Naž benne' wsedle chie' ka' belnnable' ljéžgake' toe' yetóe', na' wnnágake':

—¿Noz benne' ba bedjwé'e da' bdawe'?

<sup>34</sup>Naž Jesusen' gože' lágake':

—Da' nbánlena' naken gona' da' žénele Xa', Bennen' bsele'e neda', na'

yeyóž gona' xchine'. <sup>35</sup>Ki znnale le'e: "Yetáp byo' žin že lapžo." Neda' žapa' le'e: le wía na'le, na' wíale benách ka'zej nake' ka gan goz Dios, da' ba nbižen nich chejlapžon. <sup>36</sup>Bennen' zlapé' zzi'e lazjwe', na' dan' zlapen', naken nich gata' yela' nban da' zejlí kanne chegak benách ka', nich gak yebégekle tzen benne' žazen', na' benne' zlapen'. <sup>37</sup>Nak dot da' li da' znnan: "To benne' žaze', na' yetóe' zlapé!" <sup>38</sup>Neda' bsela'a le'e chejlaple gan bi gozle. Benne' yoble gozen', na' le'e zzi'le da' žonn žin na' da' bene'.

<sup>39</sup>Benne' zan, benne' Samaria ka', benne' nnítá'gake' lo yež Sikar na', bejlé'gake' che Jesusen' ni'a che xtiža' no'len', dan' bchalje' kan nak chie', na' wnné: "Gože' neda' yógo'te da' ba bena!" <sup>40</sup>Kate' bžingak benne' Samaria ka' gan zoa Jesusen', góta'yoegakle' Le' gá'nlene' légake'. Yechóp že bga'n Jesusen' ga na'. <sup>41</sup>Ka' goken, benne' zanže bejlé'gake' che Jesusen' ni'a che da' bchaljkze' Le'. <sup>42</sup>Naž benne' ka' belyi'e no'len', na' wnnágake':

—Na'a žejele' to' chie', kégeze ni'a che da' bchaljo' le', san lezka' dan' benlto' neto' chie' Le', na' nnezltó' da' li Bennen' nake' Benne' Criston', Bennen' žeslé' benách ka' nnítá'gake' yežlyó nga.

### Žeyón Jesús xkwide' byo che to benne' wnná bia'

<sup>43</sup>Yechóp že ka', bezá' Jesusen' gan nbab Samaria, na' wyeje' gan nbab Galilea. <sup>44</sup>Ki bene', dan' bchaljkze Jesusen', na' wnné: "Benne' wláz ka' che to benne' zchalje' lo wláz Dios bi žápegake'

le' ba la'ne." <sup>45</sup>Kate' belá' Jesusen' gan nbab Galilea, wdápegak benne' Galilea ka' Le' ba la'ne dan' lezka' jake' lo yež Jerusalén katen' gok Lni Pasko', na' blé'egekle' da' ka' ben Jesusen' ga na'.

<sup>46</sup>Naž beyéj Jesusen' lo yež Kaná gan nbab Galilea, gan beyone' nis xis uba. Lo yež Kapernaum na' zoa to benne' wnná bia', benne' nzi' lo ne'e yela' wnná bia' lo wláz benne' znnna bi'e, na' xkwide' byo chie' da'be' yižwé!. <sup>47</sup>Kate' bennen' benle' ba bezá' Jesusen' gan nbab Judea, na' ba bežine' gan nbab Galilea na', naž wyeje' gan zoa Jesusen', na' góta'yoele' Le' yide' liže', nich yeyone' xkwide' byo chien', dan' ba žek gatbe'. <sup>48</sup>Naž Jesusen' gože' le':

—Bi chejle'le chia' cha' bi le'elele da' ka'zej nak bian', na' yela' wak ka' da' gona'.

<sup>49</sup>Naž bennen' nzi' lo ne'e lo wláz benne' znnna bi'e gože' Jesusen', na' wnné:

—Benne', date ná'tege nich bi gat xkwide' byo chian'.

<sup>50</sup>Naž Jesusen' gože' le':

—Beyéj ližo'. Nban xkwide' byo chion'.

Bennen' bejlí'e da' wnná Jesusen', na' zeyeje'. <sup>51</sup>Kate' ne yoe'e nez zeyeje', bale benne' wen žin chie' bedjhággake' le', na' bzéngekle' le', na' wnnágake':

—Nban xkwide' byo chion'.

<sup>52</sup>Wnnable' légake' batx wzó law žeyakbe'. Belyi'e le':

—Bache', ka gachje že bežój-be' da' lan'.

<sup>53</sup>Naž wnnezle xa xkwide' byon', beyakbe' kate' Jesusen' ne zchájlene' le', na' gože' le': "Nban

xkwide' byo chion!" Che len bejl'i'e che Jesusen', na' lezka' benách ka' nnita'gake' liže' bejl'égake' chie'.

<sup>54</sup> Yela' wak ni naken da' bežopen da' ben Jesusen' katen' wzóe' gan nbab Galilea, da' goken wdé bezé'e gan nbab Judea.

### Žeyón Jesús to benne' die' ga nzi' Betesda

**5** Wdé gok da' ni, gok to lni chegak benne' judío ka' lo yež Jerusalén, na' Jesusen' wyeje' ga na'. <sup>2</sup>Lo yežen', gawze gan žo'ogak zila' ka', že' to bej nis zen, da' nzin' Betesda len diža' hebreo, na'zej nnita' gayo' zchil zen chen. <sup>3</sup>Lo zchil ka' degak benne' zan, benne' ka'zej de'e yižwé', benne' lo chole ka', na' benne' ka' bi žak sá'gake', na' benne' žak sá'gake'. Želbeze' bate ta nisen!. <sup>4</sup>Ki žaken dan' žetj to wbás che ya'abá to chi'i weje, na' žaze' lo nisen', na' zte' nisen'. Benne' nežw, benne' chejchoé'e lo nisen' kate' zdan, yeyaktie' kan nak bíte'ze yižwé' da' de'e. <sup>5</sup>Zoa to benne' ga na', bazej chino' chonne žoa yiz de'e yižwé'. <sup>6</sup>Katen' Jesusen' ble'ele' benne' yižwén' die' ga na', wnnezle' bazej zan yiz de'e yižwén', na' wnnable' le', na' wnné':

—¿Žénelo' yeyako?

<sup>7</sup>Bechebe benne' yižwén', na' gože' Jesusen':

—Benne', bi zoa no benne' wtinne' neda' lo nisen' kate' zdan. Kate' ne zeyá'a neda', žo'o benne' yoble zga'ale' ka neda'.

<sup>8</sup>Jesusen' gože' le':

—Wyase. Beywá' dan' delon', na' beyéj.

<sup>9</sup>La' beyakte bennen', na' beywé'e da' góta'len', na' beyeje'. Ža na' gok da' ni naken ža la'y chegak benne' judío ka'. <sup>10</sup>Naž benne' judío wnná bia' ka' belyi'e bennen' beyake', na' wnnágake':

—Ža la'y naken na'a. Bi žala' go'o da' žáte'lon'.

<sup>11</sup>Bechebe bennen', na' gože' légake':

—Bennen' beyone' neda' gožkze' neda', na' wnné': "Beywá' dan' delon', na' beyéj."

<sup>12</sup>Naž wnnábgekle' le', na' wnnágake':

—¿Nož bennen' gože' le': "Beywá' da' delon', na' beyéj"?

<sup>13</sup>Bennen' beyake' bi nnezel' nozen', dan' ba bezá' Jesusen' lo latjen' dan'zej nnita' benne' zan ga na'. <sup>14</sup>Wdé gok da' ni, Jesusen' bejxake'e bennen' gan nak lo zchil yodo', na' gože' le':

—Bwia nga. Ba beyako'. Biž gono' dola', nich bi gak chio' to da'nakže zi' ka dan' goken chio'.

<sup>15</sup>Wyéj bennen', na' bejzenle' benne' judío wnná bia' ka', Jesusen' beyone' le'. <sup>16</sup>Che len bwíagak benne' judío wnná bia' ka' da' žon Jesusen', na' gónegekle' gótgake' Le', dan' žone' da' ki kate' nak ža la'y chégake'. <sup>17</sup>Bechebe Jesusen', na' gože' légake':

—Xa' žónteze' žin, na' lezka' neda' žona' žin.

<sup>18</sup>Che len gónežegekle benne' judío wnná bia' ka' gótgake' Jesusen', kégeze dan' bi žape' ža la'y chégake' ba la'ne, san lezka' dan' wnné' nak Dios Xakze', na' ki naken, žon kwine' Dios.

**Yela' wnná bia' da' nzi' lo na' Zi'n Dios**

**19** Naž bechebe Jesusen', na' gože' lēgake':

—Da' li žapa' le'e. Bi be gak gona' neda', Zi'n Dios, žakze chia', san toze dan' zle'ela' žon Xažo Dios.

Yógo'te da' žon Xažo Dios, lezka' žona' neda', Zi'n'e'. **20** Xažo Dios nzi'ile' neda', Zi'n'e', na' zlœ'ele' neda' yógo'te da' žone', na' da' zénle'eže ka' ka da' ni wloe'ele' neda', da' ka' góngaken ga yebán láže'le le'e.

**21** Kan žon Xažo Dios, žesbane' benne' gat ka', na' žonne' yela' nban chégake', lezka' žona' neda', Zi'n'e', znezjwa' yela' nban chégake' kan žénekzela'. **22** Xažo Dios bi zchi'a laže'e nitó benne', san ba bdie' lo na'a neda', Zi'n'e', yógo'te yela' wnná bia' nich wchi'a laža'a benách ka'.

**23** Ki naken nich gápegak yógo'te benách ka' neda', Zi'n'e', ba la'ne, kan žápegake' Xažo Dios ba la'ne. Nóte'teze benne' bi žape' neda', Zi'n'e', ba la'ne, bi žape' ba la'ne Xažo Dios, Bennen' bsele'e neda', Zi'en'.

**24** Da' li žapa' le'e. Nóte'teze benne' ženle' da' zchalja', na' žejl'i'e che Xažo Dios, Bennen' bsele'e neda', benne' ni de yela' nban da' zejlí kanne chie', na' bi nžog chie' gate', san nake' ka to benne' ba bebane' lo yela' got dan' ba de yela' nban da' zejlí kanne chie'. **25** Da' li žapa' le'e, za' ža, na' ba zžin ža na', kate' benne' gat ka' yéngekle' chi'a neda', Zi'n Dios, na' benne' ka' yéngekle' xtiža'a, na' góngake' kan znnan, gata' yela' nban chégake'. **26** Kan yo'o lo na' Xažo Dios wnežjwe' yela' nban chegak benách ka', lezka' bdie'

lo na'a neda', Zi'n'e', wnežjwa' yela' nban chegak benách ka'. **27** Lezka' bdie' lo na'a yela' wnná bia' nich wchi'a laža'a benách ka' dan' naka' Benne' Golje' Benách. **28** Bi yebán láže'le kan nak da' ni, dan' za' ža kate' yógo'te benne' gat ka' yéngekle' chi'a, **29** na' yežjgake' lo yežw ba ka'. Yebangak benne' ka', benne' běngake' da' nak chawe', na' gata' yela' nban chégake', san benne' ka' běngake' da' zinnj, yebángake', na' chog Dios chégake' gátgake' to chi'ize.

**Da' ka' zej nak bian' da' nak Jesús**

**30** Lezka' wnná Jesusen':

—Bi be gak gona' nedza'. Kan nak da' ženla' da' zchalj Xa', ki zchi'a laža'a, na' kan zchi'a laža'a naken chawe', dan' bi žona' kan žénezela' neda', san kan žénekzele Xa', Bennen' bsele'e neda'. **31** Cha' neda' zchalja' chia' kwinka', bi zaka' dan' zchalja'. **32** Zoa Benne' yoble, Benne' zzoa lie' kan naka' neda', Bennen' nake' Xa', na' nnežla' zaka' da' zzoa lie' kan nak chia'. **33** Le'e bséla'le benne' ka' bejnńabgekle' Zwa, bennen' bezóe' benách ka' nis, na' dan' bzoa lie' kan nak chia' naken dot da' li. **34** Neda' bi žiážjela' no benne' wzóa lie' kan nak chia', san znnia' da' ki nich yelale le'e.

**35** Da' bchalj Zwan' goken ka to yi' yež, da' wyeyen, na' wza'nín', na' le'e, to chí'ido'ze wyáz láže'le si'le baní chien'. **36** Na'a, zoa da' zzoa li kan nak chia' neda' da' záká'žen ka dan' bzoa li Zwan' kan nak chia'. Da' ka' bde Xažo Dios lo na'a gona', da' ka' žona', na' da' ka' zzoa lígaken kan nak chia', na' zej nak bian' Xažo

Dios bsele'e neda'. <sup>37</sup>Lezka' Xažo  
 Dios, Bennen' bsele'e neda' zzoa lie'  
 kan nak chia'. Batkle bénlele chie',  
 na' batkle blé'elele lawe', <sup>38</sup>na' bi  
 nzi' lo na'le xtiže'e, dan' bi žejle'le  
 chia' neda', Bennen' bsele'e Lekze'.  
<sup>39</sup>Žsédtezle le'e da' nyejw le'e yiche  
 la'y, dan' žéklele gata' yela' nban  
 da' zejlí kanne chele ni'a che dan'  
 nyejwn le'e yiche la'y, na' dan'  
 nyejwn le'e yiche la'y na' zzoa lin  
 kan nak chia' neda'. <sup>40</sup>Bi žénelele  
 góñlenle neda' tzen nich gata' yela'  
 nban chele.

<sup>41</sup>Bi žilja' yela' ba la'ne da' gape  
 no benne' neda'. <sup>42</sup>Neda' nónbi'a le'e,  
 na' nnezla' bi nží'ilele Dios. <sup>43</sup>Bla'a  
 nga lo wláz Xažo Dios, na' le'e bi  
zzi' lo na'le neda', san cha' la' benne'  
 yoble, benne' yide' žakze chie', si'  
lo na'le bennen'. <sup>44</sup>¿Nakxkze gak  
 chejle'le che Dios cha' zzi'le yela'  
 ba la'ne da' žaple lježle tole yetole,  
 na' bi žiljle yela' ba la'ne da' gape  
 Dios tlica' le'e? <sup>45</sup>Bi wzóa yichjle  
 yesbaga'a le'e zia law Xa. Bennen'  
 yesbage'e le'e zia nake' lekze Moisés,  
 bennen' žxen lážel'e-ne', la'kze gote'  
 ža ni'te. <sup>46</sup>Chela' žejle'le che Moisés  
 na', lezka' chejle'le chia' neda', dan'  
 bzoj Moisés na' kan nak chia' neda'.  
<sup>47</sup>Na'a, ¿nakxkze gak chejle'le da'  
 žchalja' neda' cha' bi žejle'le da' ka'  
 bzoj Moisés na'?

Jesús zwawe' gayo' mil benne' ka'  
 (Mt. 14:13-21; Mr. 6:30-44; Lk. 9:10-17)

**6** Wdé gok da' ni, wyéj Jesusen'  
 yechelá'a nisdo' che gan  
 nbab Galilea, dan' nzin' Nisdo' Che  
 Tiberias, benne' Sésar. <sup>2</sup>Benne'  
 zan bejnáwgake' Jesusen' dan'  
 blé'egekle' yela' wak ka' da' bene',

katen' beyone' benne' yižwé' ka'.  
<sup>3</sup>Naž Jesusen' wžene' to law ya'ado',  
 gan wžé'lene' benne' wsedle chie'  
 ka'. <sup>4</sup>Za' žin Lni Pasko' kate' benne'  
 judío ka' žejsá' láže'gake' kan ben  
 Dios, katen' bebeje' xa xtó'gake' ka'  
lo yežlyó Egípto. <sup>5</sup>Kate' Jesusen'  
 bchis lawe', blé'ele' benne' zan,  
 benne' zá'gake' gan zoe', na' gože'  
 Lip:

—¿Gaz žel-lžo yet xtil dan' gawgak  
 benne' zan ki?

<sup>6</sup>Ki wnná Jesusen' nich nnezel' da'  
 nna Lipen', dan' nnézkzele' Le' da'  
 gone'. <sup>7</sup>Bechebe Lipen', na' wnné':

—Chela' si'žo yet xtil len lazjw to  
 benne' che xono' byo', benne' zan ki  
 bi geklen gáwgake' láte'do' wejen.

<sup>8</sup>Naž to benne' wsedle che  
 Jesusen', bennen' lie' Ndres, benne'  
 biche' Smon Bedw, gože' Le', na'  
 wnné':

<sup>9</sup>—Zoa to xkwide' byo nga,  
 nwa'be' gayo' yet xtil ka' da' zej  
 naken zoa' sebada, na' chope bel ka'.  
 ¿Wak wawžo benne' zan ki len da'  
 láte'do'ze ni?

<sup>10</sup>Naž Jesusen' gože' légake':  
 —Le ye' benne' zan ki kwé'gake' lo  
 yo.

Lo latjen' yo'o daka', na' wžé'gak  
 ka gayo' mil benne' ka' ga na'. <sup>11</sup>Naž  
 Jesusen' bexwe' yet xtil ka'. Kate'  
 beyóz gože' Dios "Žóxkeno'" bdisen'  
 chegak benne' wsedle chie' ka', na'  
légake' belyisen' chegak yógo'te  
 benne' ka' žé'gake' gan yo'o daka'.  
Lezka' béngegake' chegak bel ka', na'  
 bdáwgake' kan gónegekle' gáwgake'.  
<sup>12</sup>Kate' ba bélgegekle', Jesusen' gože'  
 benne' wsedle chie' ka', na' wnné':  
 —Le yetób da' bizjw ka' da' zej  
 nga'nen, nich bi be nitlen.

<sup>13</sup>Betóbgaken', na' beschá'gake' chežinno ḵkwit da' bizjw ka' chegak gayo' yet xtil ka'zej naken zoa' sebada, dan' bega'nen chegak benne' ka' bdáwgaken'. <sup>14</sup>Kate' benne' ka' blé'egekle' yela' wak dan' ben Jesusen', na' wnnágake':

—Da' li benne' ni nake' Bennen' zchalje' lo wláz Dios, Bennen' žala' yide' yežlyó nga.

<sup>15</sup>Dan' nnezelje Jesusen' ženegekle' ché'gake' Le' de chgi' nich góngake' ga nna bi'e lágake', che len bezé'e latjen', na' wyeje' toze' to law ya'a.

### Jesús zze'e lo nisdo'

(Mt. 14:22-27; Mr. 6:45-52)

<sup>16</sup>Kate' ba žale, jak benne' wsedle ka' che Jesusen', na' bžíngake' žoa'a nisdo'. <sup>17</sup>Belbene' to lo barkw, na' zjake' lo nisdon', nich žíngake' lo yež Kapernaum. Kate' ba nak chol, Jesusen' bi na' žine' gan mnítá'gake'. <sup>18</sup>Wzó law žák be' wale lo nisdon', na' nisen' zgó'anen. <sup>19</sup>Kate' ba bsá'gake' barkwn', na' wzán' ka to ga zzažo to hora, naž blé'egekle' Jesusen' zze'e lo nisdon', na' ze'e zbig'e' gan zej barkwn', na' bžébegake'. <sup>20</sup>Naž Jesusen' gože' lágake':

—Nedkzan'. Bi žébele.

<sup>21</sup>Naž len yela' žebél wzí'gake' Le' lo barkwn', na' la' bžinte barkwn' lo yo biž gan zjake'.

### Benne' zan žeyílgake' Jesús

<sup>22</sup>Ža chope ža, gókbe'egekle benne' zan ka', benne'zej nga'ne' yechelá'a nisdon', da' goken, dan' toze barkw bžinen ga na', na' Jesusen' bi wžénlene' benne' wsedle chie' ka' lo barkwn', san lágakze'

jake'. <sup>23</sup>Naž bžojgak yebaše barkw ka' lo yež Tiberias, na' bžíngaken to latje da' žen' gawze gan bdáwgake' yet xtil, katen' Xanžo Jesusen' gože' Dios: "Žóxkeno" chen. <sup>24</sup>Dan' blé'egekle' biž zoa Jesusen' ga na', na' bi zej nnita' benne' wsedle chie' ka' ga na', che len belbene' law barkw ka', na' bžíngake' lo yež Kapernaum, gan bejdíljgake' Jesusen'.

### Jesús nake' yet xtil da' znezjwn yela' nban li laže'

<sup>25</sup>Kate' bžingak benne' zan ka' yechelá'a nisdon', bejxáka'gake' Jesusen', na' bely'i'e Le':

—Benne' wsedle, ībatx beló'o nga?

<sup>26</sup>Bechebe Jesusen', na' gože' lágake':

—Da' li žapa' le'e: žeyiljle neda', kege dan' blé'elegekle yela' wak ka' da' bena', san dan' bdawle yet xtilen', na' béljelele. <sup>27</sup>Le gon žín, kege nich si'le yela' waw da' zde chen, san nich si'le yela' waw da' gáta'tezen, na' gonnen yela' nban da' zejlí kanne chele. Yela' waw ki naken da' wnežjwa' neda', Benne' Golje' Benách, chele, dan' Xažo Dios bloe'ele' law naka' Zl'he'.

<sup>28</sup>Naž wnnábgekle' Le', na' wnnágake':

—İBiz da' žon byenen gonto' nich gonto' da' žaz laže' Dios?

<sup>29</sup>Bechebe Jesusen', na' gože' lágake':

—Da' žaz laže' Dios naken chejle'le chia' neda', naka' Bennen' bsele'e Le'.

<sup>30</sup>Naž wnnábgekle' Le', na' wnnágake':

—İBiz da' nak bia' gono', da' le'elton' nich chejle'to' chio' Le'?

¿Bíz yela' wak gono? <sup>31</sup>Xa gole chežo ka' bdáwgake' yet xtil da' nzin' maná lo latje dach, kan nyejw le'e yiche la'y, da' znnan: "Moisés benne' chégake' yet xtil che ya'abá, dan' bdáwgaken!"

<sup>32</sup>Bechebe Jesusen', na' gože' légake':

—Da' li žapa' le'e: kege Moisés na' benne' chele yet xtil che ya'abá, san Xažo Dios žonne' chele yet xtilen'. <sup>33</sup>Yet xtil dan' žonn Dios chegak benách ka' naka' neda', dan' bžojen ya'abá, na' znezjwn yela' nban chegak benách ka', benne' nnita'gake' yežlyó nga.

<sup>34</sup>Naž belyi'e Le':

—Xan, bénnteze yet xtilen' cheto'.

<sup>35</sup>Jesusen' gože' légake':

—Neda' naka' yet xtil da' zej nbanlen benách ka' to chi'ize. Nóteteze benne' gónlene' neda' tzen, wéljele' to chi'ize da' naken che Dios, na' nóteteze benne' chejl'i'e chia' neda', ba we'je' to chi'ize da' naken che Dios. <sup>36</sup>Naken kan ba gožkza' le'e, la'kze zlé'elele neda', bi žejele'le chia'. <sup>37</sup>Yógo'te benne' ka' žonn Xa' chia', gónlengake' neda' tzen, na' benne' ka' gónlengake' neda' tzen, bi yesbí'igaka'-ne!. <sup>38</sup>Ki naken dan' bžoja' ya'abá che Dios, na' betja' nga, kege nich gona' kan žénela' nedkza', san nich gona' kan žénele Xažo Dios, Bennen' bsele'e neda'. <sup>39</sup>Da' žénele Xa', Bennen' bsele'e neda', naken bi kwia yi' nitó benne', bennen' benn Dios chia', na' yesbana'-ne' že ze lawte že. <sup>40</sup>Da' žénele Xažo Dios, Bennen' bsele'e neda', naken gata' yela' nban chegak yógo'te benne' ka' l'é'gekle' neda', Zi'ne', na' chejl'gake' chia' neda', na'

neda' yesbángaka'-ne' že ze lawte že na'.

<sup>41</sup>Naž benne' judío wnná bia' ka' wnnégake' che Jesusen', dan' wnné: "Neda' naka' yet xtilen' da' zan' ya'abá." <sup>42</sup>Che len wnnágake':

—Kege benne' ni Jesusen', zi'n Jwsé? Nónbia'žo xa xne'e. <sup>43</sup>Nakx chen', znnna benne' ni: "Bžoja' ya'abá che Dios?"

<sup>43</sup>Naž bechebe Jesusen', na' gože' légake':

—Bi nnele chia' la' le'eze. <sup>44</sup>Bi gak nitó benne' gónlene' neda' tzen, cha' Xa', Bennen' bsele'e neda', bi yedjwé'e bennen' chia' neda', na' neda' yesbana'-ne' že ze lawte že na'.

<sup>45</sup>Nyejw le'e yiche la'y kan wnnagak benne' ka' bcháljgake' lo wláz Dios, da' znnan ki: "Dios wsedle' yógo'te benách." Che len, yógo'te benne' ka', benne' želenle' chi'i Xa', na' nsédgekle' lo ne'e Le', gónlengake' neda' tzen.

<sup>46</sup>'Bi zoa no benne' ble'ele' Xažo Dios, san toze Bennen' bžoje' gan zoa Dios. Bennen' zle'ekzle' Xažo Dios. <sup>47</sup>Da' li žapa' le'e: nóteteze benne' žejl'i'e chia' neda' de yela' nban da' žejlí kanne chie'. <sup>48</sup>Neda' naka' yet xtil da' zej nbanlen benách ka' to chi'ize. <sup>49</sup>Xa xto'le ka' bdáwgake' yet xtilen' dan' nzin' maná lo latje dach, na' kate' bza'a že chégake', gótgake'. <sup>50</sup>Neda' naka' yet xtil da' zžojen ya'abá che Dios, na' nóteteze benne' gawen', bi gate' to chi'ize. <sup>51</sup>Nedkza' naka' yet xtilen' da' zej nbanlen benách ka', dan' bžojen ya'abá che Dios, na' cha' nóteteze benne' gawe' yet xtilen', na' gak bane' to chi'ize. Yet xtilen' da' znezjwa' neda' naken xpela'a,

da' znezjwan' nich gata' yela' nban  
chegak benách ka' nnítagake'  
yežlyó nga.

<sup>52</sup>Naž benne' judío wnná bia' ka'  
belchíx ljéžgake', na' wnnágake':

—čNakx gak gonn benne' ni  
xpele'e nich gawžon?

<sup>53</sup>Che len Jesusen' gože' légake':

—Da' li žapa' le'e: cha' bi gawle  
xpela'a neda', Benne' Golje' Benách,  
na' cha' bi ye'jle xchena', bi de yela'  
nban na' chele. <sup>54</sup>Nóte'teze benne'  
gawe' xpela'a, na' ye'je' xchena', de  
yela' nban da' zejlí kanne chie', na'  
neda' yesbana'-ne' že ze lawte že na'.

<sup>55</sup>Ki naken dan' nak xpela'a yela'  
waw da' li, na' xchena' naken to da'  
li da' ye'jen no benne'. <sup>56</sup>Nóte'teze  
benne' gawe' xpela'a, na' ye'je'  
xchena', sóalenteze' neda', na' neda'  
sóalenteza' le'. <sup>57</sup>Kan zoa nban  
Xažo Dios, Bennen' bsele'e neda', na'  
neda' nbánlena' Le', lezka' nóteteze  
benne' gawe' neda', soe' nbánlene'  
neda'. <sup>58</sup>Da' ni naken yet xtil da'  
bžojen ya'abá che Dios, na' bi naken  
ka yet xtilen' dan' nzin' maná, dan'  
bdawgak xa xto'le ka', na' kate' bza'  
ža chégake', gótgake'. Nóte'teze  
benne' gawe' yet xtil ni gak bane' to  
chi'ize.

<sup>59</sup>Da' ni bchalj Jesusen' gan nak  
to lo yo'o gan zdobgak benne' judío  
ka' nich yéngakle' xtiža' Dios, na'  
gok da' ni kate' ne žsedle' benách ka'  
nnítagake' lo yež Kapernaum.

**Da' žonnen yela' nban  
da' zejlí kanne chežo**

<sup>60</sup>Kate' benne' wsedle ka' che  
Jesusen' béngekle' da' ki, benne'  
zan ládjwgake' wnnágake' chen, na'  
wnnágake':

—Zédele'e nak diža' ni. ¿Nozkze  
benne' gak si' lo ne'en?

<sup>61</sup>Wnnezle Jesusen' znnegak  
benne' wsedle chie' ka' che xtiže'e,  
na' wnnable' légake', na' wnné':

—čZon diža' ni le'e zede?

<sup>62</sup>¿Nakxkze gaken cha' le'elele neda',  
Benne' Golje' Benách, yeyepa' gan  
wzóa' zga'ale? <sup>63</sup>Da' nak che Dios  
Be' La'y naken da' žonnen yela' nban  
chele. Da' nakze bela' žen bi gak gon  
chawen' le'e. Diža' da' bcháljlena'  
le'e naken che Dios Be' La'y, na'  
žonnen yela' nban chegak benách  
ka'. <sup>64</sup>Na'a, bálele le'e bi žejele'e chia'.

Wnná Jesusen' ki dan' nnézkzele'  
Le' že ni'te no benne' ka' bi  
žejlé'gake' chie', na' lezka' bennen'  
wdíe' Le' lo na'gak benne' ka'  
gótgake' Le'. <sup>65</sup>Che len wnné':

—Che len ba gožkza' le'e bi gak no  
benne' gónlene' neda' tzen, cha' bi  
we' Xažo Dios le' latje.

<sup>66</sup>Gok chope láže'gak benne' zan  
ža na', benne' wsedle chie' ka', na'  
biž wdálengake' Le' tzen. <sup>67</sup>Naž  
Jesusen' wnnable' benne' chežinno,  
benne' wsedle chie' ka', na' wnné':

—čLezka' le'e yekwasle?

<sup>68</sup>Bechebe Bedw, na' gože' Le':

—Xan, čnoz benne' chéjlento? Le'  
napo' diža' da' žonnen yela' nban da'  
zejlí kanne cheto'. <sup>69</sup>Neto' žejele' to'  
chio', na' nónbia'to' Le', nako' Benne'  
Criston', Bennen' bsela' Dios, na'  
nako' Zi'nkze Dios ban.

<sup>70</sup>Bechebe Jesusen', na' gože'  
légake':

—Wžekza' neda' le'e chežínnole ki,  
san to benne' ládjwle le'e žonlen da'  
xiwe' le' tzen.

<sup>71</sup>Da' ni bchalj Jesusen' che Judas  
Iskariote, zi'n to benne' lie' Smon,

dan' nak Judas na' bennen' wdíe' Le'  
lo na'gak benne' ka' gótgake' Le', na'  
 nbáblene' yechinéj benne' wsedle  
 chie' ka'!

**Bi žeje'lé'gak benne' biche'  
 Jesúš chie' Le'**

**7** Wdé gok da' ni, wdé Jesusen'  
 gan nbab Galilea. Bi gónele'  
 cheje' gan nbab Judea dan'  
 ženegekle benne' judío wnná bia' ka',  
 benne' nníta'gake' ga na', gótgake'  
Le'. <sup>2</sup>Ža na' za' žin lni chegak benne'  
 judío ka' kate' žejsá' láže'gake' ka  
 xa wdé chégake' wnníta'gake' gan  
 besbíngake' zan yo'o lága'do!. <sup>3</sup>Che  
 len benne' biche' Jesusen' ka' belyi'e  
Le', na' wnnágake':

—Bžoj ga ni, na' wyéj gan nbab  
 Judea nich l'égekle benne' wsedle  
 chio' ka', benne' nníta'gake' ga na',  
yela' wak ka' da' žono!. <sup>4</sup>Cha' žénele  
 no benne' gónbia'gak benách ka' le',  
 bi žone' ngáche'ze da' žone'. Dan'  
 žono' yela' wak zen ki, bloe'el kwino'  
lawgak yógo'te benách ka' nich  
l'égekle' da' žono'.

<sup>5</sup>Ki wnnagak benne' biche'e ka'  
 dan' bi na' chejlé'gake' chie' Le'.

<sup>6</sup>Naž Jesusen' gože' légake':

—Bi na' žin ža chia' nich wloe'ela'  
 dan' naka' lawgak benách ka', san  
 ža ni naken nich bi da' gonle le'e.

<sup>7</sup>Benách ka' nníta'gake' yežlyó  
 nga bi zzóagake' le'e chela'ale,  
 san zzóagake' neda' chela'ale dan'  
zloe'ela' law kan zej nake', na' da'  
 znia' nak bian' bi nak chawé' da'  
žóngake'. <sup>8</sup>Le chej le'e lni na'. Bi  
 cha'a neda' lni na' na'a dan' bi na'  
 žin ža chia'.

<sup>9</sup>Kate' beyóž gože' légake' da' ki,  
 bga'ne' gan nbab Galilea.

**Jesús žeje' lni chegak benne' judío ka'**

<sup>10</sup>Wdé jak benne' biche' Jesusen'  
 ka' lni na', lezka' wyeje' Le', kege  
 kwáselo, san ngáche'ze wyeje'.

<sup>11</sup>Gan žak lni na', wdiljgak benne'  
 judío wnná bia' ka' Jesusen', na'  
 wnnágake':

—¿Gaz zoa bennen'?

<sup>12</sup>Benne' zan bchálijgake' da'  
 zanlē'e kan nak che Jesusen'. Bale'  
 wnnágake':

—Nake' chawé'.

Yebał' wnnágake':

—Bi nake' chawé' dan' žon láže'le'  
 benách ka'.

<sup>13</sup>Nitó benne' bi bchalje' kwáselo  
 kan nak che Jesusen', dan' benne'  
 zan ka' zžébegake' benne' judío  
 wnná bia' ka'.

<sup>14</sup>Kate' ba bžin gachje lni na',  
bla' Jesusen' li'a yodo', na' bsdle'  
 benách ka' nníta'gake' ga na'.

<sup>15</sup>Bebán láže'gak benne' judío ka',  
 na' wnnágake':

—¿Nakx chen', žaklē'e bennen', na'  
 bi nsedle' che yodo'?

<sup>16</sup>Bechebe Jesusen', na' gože'  
légake':

—Da' žseda' neda', kege chezan',  
 san naken che Xažo Dios, Bennen'  
 bsele'e neda'. <sup>17</sup>Cha' žénele no  
 benne' gone' kan žénele Dios, na'  
 gákbe'le' cha' nak che Dios da'  
 žseda' benách ka' o cha' žakze chia'  
zchajla'. <sup>18</sup>Nóte'teze benne' zchajje'  
 žakze chie', žone' ki nich gápegak  
 benách ka' le' ba la'ne, san bennen'  
 žénele' gápegak benách ka' ba la'ne  
 bennen' bsele'e le', benne' ni zchajje'  
 da' naken dot da' li, na' bi žon laž'e.

<sup>19</sup>'Moisés bdie' lo na'le da' bchi'le  
 Dios, san nitole le'e bi žonle kan

znna xtiže'e. ¿Bíz chen' žénelele gotle neda'?

<sup>20</sup>Beži'igak benne' zan ka', na' bely'i'e Le':

—Da' xiwe' žónlenen le' tzen. ¿Nozkze benne' žénele' gote' le'?

<sup>21</sup>Bechebe Jesusen', na' gože' lęgake':

—To yela' wak bena', na' žebán láže'le yógo'tele. <sup>22</sup>Da' li Moisés benne' chele dan' nžogen lo bela' chele dan' nak bian' nzi'le xtiža' Dios. Kege Moisés na'kze bennen' chele, san wzí'en lo na'gak xa xta'we' ka'. Na'a, la'kze nak ža la'y, zchogle lo bela' chegak xkwide' byo chele ka' dan' nak bian' zej nbabbe' che Dios. <sup>23</sup>Cha' želzi'be' lo bela' chégakbe' dan' nak bian' kate' nak ža la'y, nich bi wka'nle ca'ze da' znna da' bchi'le Moisés, ižza'le neda' dan' beyona' to benne', nich beyake' cháwe'do' kate' nak ža la'y? <sup>24</sup>Bi žala' kon wchi'a láže'le, san le wchi'a laže' kan nak da' li.

### Jesús zlöe'ele' gan bžoje'

<sup>25</sup>Naž bchaljgak bałe benne' ka' nnita'gake' lo yež Jerusalén, na' wnnágake':

—¿Kege benne' ni bennen' žeyiljgak benne' judío wnnábia' ka' nich gótgake' Le'? <sup>26</sup>Le wia nga. Kwáselo zchalje', na' bi be žé'gake' Le'. ižákbe'egakle benne' ka', benne' znna biágake' žo'o, da' li benne' ni nake' Benne' Criston', Bennen' žala' nna bie' žo'o? <sup>27</sup>Benne' ni, nnezlžo ga benne' Le'. Kate' yid Benne' Criston', bi nnezle nitó benne' ga benne' Le'.

<sup>28</sup>Wzóá Jesusen' zsedle' benách ka' lo zchil yodo', na' katen' benle' da' ni, wnnié' zižje, na' wnné':

—¿Nónbia'le neda', na' nnézlele ga benne' neda'? Bla'a yežlyó nga, kege žakze chia', san Dios na'kze bsele'e neda', na' Le', bi nónbia'le-ne'. <sup>29</sup>Neda' nónbi'a-ne', dan' za'a lo wlaze' Le', na' Lekze' bsele'e neda'.

<sup>30</sup>Naž ben byéngake' séngake' Le', san nitó benne' bi bejwe' Le', dan' bi na' žin ža chie' nich choe'e lo ná'gake'. <sup>31</sup>Benne' zan bejlé'gake' chie', na' wnnágake':

—Kate' la' Benne' Criston', ¿gone' da' zanže yela' wak ka' ka da' žon Benne' ni?

### Benne' yodo' ka' želsele'e benne' ka' nich séngake' Jesú

<sup>32</sup>Béngekle benne' yodo' fariseo ka' da' zchaljgak benách ka' kan nak che Jesusen', na' bxoz wnnábia' ka' len benne' yodo' fariseo ka', bséla'gake' ni'a ná'gake' nich chejxéngake' Le'.

<sup>33</sup>Naž Jesusen' wnné':

—Yetó chíido'ze sóalena' le'e, na' naž yeýáa gan zoa Xa', Bennen' bsele'e neda'. <sup>34</sup>Yeyiljle neda', san bi yežél-lele neda'. Gan chejsóa' neda' bi gak yidle le'e.

<sup>35</sup>Naž benne' judío ka' bely'i'e ljéžgake' ka', na' wnnágake':

—¿Gaz chej benne' ni, gan bi yežél-lžo-ne'? ¿Cheje' gan zej nnita' benne' judío ka', benne' zej náslase' dot yežlyó nga, na' wsedle' benne' zi'to' ka'? <sup>36</sup>¿Bíz zejlás dan' wnné': “Yeyiljle neda', na' bi yežél-lele neda'” na' lezka': “Gan chejsóa' neda' bi gak yidle le'e”?

### Nis yego da' žonnen yela' nban chežo

<sup>37</sup>Kate' nak ža ze lawte ža che lni na', ža na' naken blo, wzó ža' Jesusen'. Wnnié' zižje, na' wnné':

—Cha' zoa no benne' źbiž yichj lázda'we', žala' yide' gan zoa', na' ye'je'. <sup>38</sup>Nóte'teze benne' žejl'e chia' neda', gak chie' kan nyejw le'e yiche la'y, da' znnan: "Lo yichj lázdo'w bennen' galj da' gaken ka to nis yego" dan' gon chawen' benách ka', na' gata' yela' nban chégake'.

<sup>39</sup>Bchalj Jesusen' da' ni kan nak che Dios Be' La'y, Bennen' žala' yedjsóalene' benne' ka' chejlé'gake' che Jesusen'. Ki wnné' dan' bi na' žin Dios Be' La'y na', dan' bi na' yeyepe Jesusen' gan gake' Benne' blo.

### Žak chóplegak benách ka'

<sup>40</sup>Kate' benne' zan ka' béngekle' da' ki, bałe' wnnágake':

—Da' li benne' ni nake' bennen' zchalje' lo wláz Dios, bennen' bchebe laže' Dios sełe'e chežo.

<sup>41</sup>Yebale' wnnágake':

—Benne' ni nake' Benne' Criston'. Wnnagak yebałe' benách ka':

—¿Galj Benne' Criston' gan nbab Galilea? <sup>42</sup>Nyejw le'e yiche la'y da' znnan: "Galj Benne' Criston' ladjw zi'n za'só Dabí ka', na' gake' benne' yež Belén, da' goken laž Dabín!"

<sup>43</sup>Ka' goken, gok chóplegak benne' ka' ni'a che Jesusen'. <sup>44</sup>Gónegekle' bałe' séngake' Jesusen', san nitó benne' bi be bene' chie'.

### Benne' wnná bia' ka' bi žejlé'gake' che Jesús

<sup>45</sup>Naž ni'a na'gak bxoz wnná bia' ka' len ni'a na'gak benne' yodo' fariseo ka', bežíngake' ganzej nnita' benne' yodo' wnná bia' ka', na' benne' ki belyi'e ni'a ná'gake' ka', na' wnnágake':

—¿Biz chen' bi žedjwa'le-ne'?

<sup>46</sup>Naž bechébegak ni'a ná'gake', na' wnnágake':

—Bi zchalj nitó benne' kan zchalj bennen'.

<sup>47</sup>Naž beži'igak benne' yodo' fariseo ka', na' wnnágake':

—Be'le latje ben láže'le' le'e?

<sup>48</sup>¿Zoa no benne' wnná bia', o no benne' yodo' fariseo, bejl'i'e chie'?

<sup>49</sup>Benne' ki, benne' bi žákgake' xtíža' Dios, zej nbage'e zia.

<sup>50</sup>Lezka' zoa Nikodemo ga na', bennen' blé'e gan wzóa Jesusen' to xe'le. Nikodemon' nake' benne' yodo' fariseo, na' gože' légake':

<sup>51</sup>—¿Chogžo che to benne' gate' ni'a che da' bchi'le Dios žo'o cha' bi yénležo chie' zga'ale nich nnézležo biz bene'?

<sup>52</sup>Naž beži'igake' yebałe' ka', na' belyi'e le'e:

—Nako' le' benne' Galilea? Bel da' nyejw le'e yich la'y, na' wi' batkle bžoj nitó benne' zchalje' lo wláz Dios gan nbab Galilea.

<sup>53</sup>Naž che chégake' beyéjgake' lížgake'.

**8** Jesusen' wyeje' gan nak law Ya'a Yag Olibo.

### No'len' bene' dola' da' źka'n ditjen yela' zchag na'

<sup>2</sup>Kate' za' ža'ní', bla' Jesusen' li'a yodo', na' bžingak yógo'te benách ka' gan zoe'. Jesusen' wži'e ga na', na' bsedle' légake'. <sup>3</sup>Naž benne' yodo' wsedle ka' len benne' yodo' fariseo ka' bché'gake' to no'le gan zoa Jesusen', no'len' blé'gekle' žone' dola' da' źka'n ditjen yela' zchag na'. Bzégake' le' gachje láwe'le benách ka' zze nágake' che Jesusen', <sup>4</sup>na' belyi'e Le':

—Benne' wsedle, no'le ni wzento'-ne' žone' dola' da' ūka'n ditjen yela' ūchag na'. <sup>5</sup>Lo da' bchi'le Moisés, gože' ūo' wže'ežo yej to no'le žone' da' ki, nich gate'. ?Na'a Le', biz ūnno'?

<sup>6</sup>Ki wnnágake' nich bi da' nna Jesusen' nich gak yesbága'gake' Le' ūzia. Naž byechw Jesusen', na' bwie' lo yo, na' bzoje' lo yon' len ūben ne'e. <sup>7</sup>Kate' wnnáble'gekle' Le', naž bezé Jesusen', na' gože' légake':

—Nólele le'e bi naple dola' wak so ūlawle wže'ele-ne' yej.

<sup>8</sup>Da' yoble beyechw Jesusen', na' bwie' lo yo, na' wzó ūlawe' ūzjoje' da' yoble lo yon'. <sup>9</sup>Kate' béngekle' da' ni, na' lázdo'gake' bcheben légake', na' bežojgak to tógake'. Zgá'alegak benne' gole ka' bezá'gake', na' wdé na' benne' kwide' ka'. Toze Jesusen' bga'ne' ūlen no'len', ga na' zoe' gachje ūlawe'le benne' ka' ūze nágake' chie' Le'. <sup>10</sup>Naž Jesusen' bezíe' da' yoble, na' bi ble'ele' nitó benne' ūesbage'e' no'len' ūzia, san toze no'len', na' gože' le':

—No'le, ?gaz zej nnita' benne' ka' besbága'gake' le' ūzia? ?Bi zoa no benne' ūchoge' chio' gato'?

<sup>11</sup>No'len' wnné':

—Nitóe'.

Naž Jesusen' gože' le':

—Lezka' neda', bi ūchoga' chio' gato'. Beyéj ližo', na' biž gono' dola'.

Jesús nake' baní' chegak benne' ka'

<sup>12</sup>Da' yoble Jesusen' bcháljlene' légake', na' wnné':

—Neda' naka' baní' chegak benách ka' nnita'gake' yežlyó nga. Nóte'teze benne' sá'lene' neda' tzen, bi te' gan nak chol, san soaßen baní' le', nich

le'ele' kan gata' yela' nban da' zej lí kanne chie'.

<sup>13</sup>Naž benne' yodo' fariseo ka' belyi'e Le', na' wnnágake':

—Le' ūzhoa lio' chio' kwinzo'. Bi zaka' da' ūzhoa lion'. Dáče'ze naken.

<sup>14</sup>Bechebe Jesusen', na' gože' légake':

—Lá'kze ūzhoa lian' chia' kwinza', dot da' li nak da' ūzhoa lian' dan' nnezla' gan bžoja', na' gan cha'a, san le'e bi nnézlele gan za'a, na' gan yeyá'a. <sup>15</sup>Le'e ūzhi'a ūlaže'le kan zej nak da' ka' ūákagaken yežlyó nga, san neda', ūakaze chia' bi ūzhi'a ūlaža'a nitó benne'. <sup>16</sup>Lá'kze wchi'a ūlaža'a, ka nak da' li wchi'a ūlaža'a, dan' kege nedza' wchi'a ūlaža'a, san Xa', Bennen' bsele'e neda', góñlene' neda' tzen. <sup>17</sup>Lezka' da' bsedle Moisés nyejw le'e yich la'y, na' ūnnan: "Da' ūzhoa ligak chope benne', naken dot da' li." <sup>18</sup>Neda' ūzhoa lia' chia' kwinza', na' Xa', Bennen' bsele'e neda', lezka' ūzhoa lie' chia' neda'.

<sup>19</sup>Naž benne' yodo' fariseo ka' wnnábgekle' Le', na' wnnágake':

—?Gaz ūzhoa Xo'?

Bechebe Jesusen', na' gože' légake':

—Bi nónbia'le neda', na' bi nónbia'le Xa'. Chela' nónbia'le neda', lezka' Xa' góñbia'le-ne'.

<sup>20</sup>Bchalj Jesusen' da' ni kate' ne zoe' ūsedle' benách ka' lo ūchil yodo', gan zej nnita' kak ka' gan ūzgo'gake' mežw che yodo', san nitó benne' bi bexwe' Le', dan' bi na' ūzin ūchiae' choe'e lo nágake'.

Znna Jesús: "Gan cha'a neda', bi gak yidle le'e"

<sup>21</sup>Da' yoble Jesusen' gože' légake', na' wnné':

—Yezá'a yežlyó nga, na' yeyiljle no benne' yeslé' le'e, san ga'n dola' da' nbágale, na' gatle. Gan cha'a neda', bi gak yidle le'e.

<sup>22</sup>Naž bchaljgak benne' judío wnná bia' ka', na' wnnágake':

—¿Got kwine'? Wnné': "Gan cha'a neda', bi gak yidle le'e."

<sup>23</sup>Jesusen' gože' légake':

—Nakle le'e che yežlyó da' žen' že'le nga, san neda' za'a ya'abá che Dios da' žen' ža'le. Nakle le'e benách che yežlyó nga, san neda' bi naka' benne' che yežlyó nga. <sup>24</sup>Che len goža' le'e: "Ga'n dola' da' nbágale, na' gatle." Cha' bi chejle'le nakkza' Benne' Weslá, ga'n dola' da' nbágale, na' gatle.

<sup>25</sup>Naž wnnábgekle' Le', na' wnnágake':

—¿Nožkze benne' nako'?

Jesusen' gože' légake':

—Naka' kan ba goža' le'e že ni'te.

<sup>26</sup>Da' zan da' žala' yapa' le'e, na' wchi'a laža'a da' nak chele. Diža' dot da' li zchalj Xa', Bennen' bsele'e neda', na' da' ženla' zchalje Le', zcháljlenan' benách ka' nnít'a'gake' yežlyó nga.

<sup>27</sup>Bi bejnf'igekle' zcháljlene' légake' kan nak che Dios, Xe'. <sup>28</sup>Che len Jesusen' gože' légake':

—Kate' žin že wchisle neda', Benne' Golje' Benách, nich gotle neda', naž gákbe'elele nakkza' Benne' Weslá, na' bi be žona' žakze chia', san da' bloe'el Xa' neda' zchaljan'. <sup>29</sup>Xa', Bennen' bsele'e neda', zóalene' neda'. Xa' bi bka'ne' neda' toza', dan' žónteza' da' žaz laže' Le'.

<sup>30</sup>Kate' bchalj Jesusen' da' ni, benne' zan bejlé'gake' chie'.

No benne' nake' che Dios, na'  
no benne' nake' wen laže'

<sup>31</sup>Naž Jesusen' gože' benne' judío ka', benne' žejlé'gake' chie', na' wnné':

—Cha' góntezele kan znna xtiža'a, da' li gakle benne' wsedle chia' ka'.

<sup>32</sup>Gónbia'le da' nak dot da' li, na' dan' naken dot da' li yeslán le'e.

<sup>33</sup>Beží'igake', na' belyi'e Le':

—Za'só Bran nakto', na' bi zoa no benne' bene' neto' benne' ndo'w ka'. <sup>34</sup>Biz chen' znnó: "Yeslán le'e"?

<sup>34</sup>Jesusen' gože' légake':

—Da' li žapa' le'e: Yogo'te benne' wen dola' ka', yó'ogake' lo na' dola'.

<sup>35</sup>To benne' ndo'w bi gá'nteze' liž xan yo'o, san bennen' nake' zi'n xan yo'on' gá'nteze' liž bennen' nake' xan yo'on'. <sup>36</sup>Ki naken, cha' Bennen' nake' Zi'n Dios yeslé' le'e, da' li yelale. <sup>37</sup>Nnezla' nakle za'só Bran, san žénelele gotle neda', dan' bi nzi' lo na'le xtiža'a. <sup>38</sup>Neda' zchalja' che da' ble'ela' gan zoa Xa', san le'e žonle da' benl-le gan zoa xakzle.

<sup>39</sup>Beží'igake', na' belyi'e Le':

—Bran nake' xa gole wdé cheto'.

Naž Jesusen' gože' légake':

—Chela' da' li nakle za'só Bran, gonle kan ben Bran na'. <sup>40</sup>Na'a, žénelele gotle neda', la'kze zcháljlenan' le'e da' nak dot da' li, dan' benla' bchalj Dios. Bi ben Bran na' ki. <sup>41</sup>Le'e žonle kan žon xakzle.

Naž belyi'e Le':

—Neto' bi nakto' zi'n zi' ka'. Toze Dios nake' Xato'.

<sup>42</sup>Naž Jesusen' gože' légake':

—Chela' da' li nak Dios Xale, si' lo na'le neda', dan' bžoja' gan zoa Dios, na' bla'a yežlyó nga. Kege

žakze chia' bla'a, san Dios na'kze bsele'e neda'. <sup>43</sup> ¿Bi nnézlele biz chen' bi gak chejnf'ilele da' znnia'? Naken dan' bi žénelele wzé nagle xtiža'a. <sup>44</sup> Xakzle naken da' xiwe'. Nakle che da' xiwen', na' žénelele gonle da' žaz laže' xalen'. Ža ni'te da' xiwen' naken benne' wetw benách ka', na' bi nzi' lo nan' da' nak dot da' li, dan' bi zchaljen da' li. Kate' žon laže' da' xiwe', ka nakkzen zchaljen, dan' naken benne' wen laže', na' naken ka xágakkze benne' wen laže' ka'. <sup>45</sup> Dan' zchalja' neda' da' li, bi žejele'le chia'. <sup>46</sup> ¿Nózlele le'e gak yesbága'le neda' dol'a? Cha' zchalja' da' li, čbiz chen' bi žejele'le chia'? <sup>47</sup> No benne' nake' che Dios, zze nage' xtiža' Dios, san le'e, dan' bi nakle che Dios, bi zze nagle xtiže'e.

**Benne' Criston' zoakze'  
zga'ale' ka Bran**

<sup>48</sup> Naž beži'igak benne' judío ka', na' belyi'e Jesusen': —Káteze wnnato' kate' wnnato' nako' benne' Samaria, na' žonlen da' xiwe' Le' tzen.

<sup>49</sup> Bechebe Jesusen', na' gože' légake':

—Bi žonlen da' xiwe' neda' tzen. Neda' žapa' Xa' ba la'ne, na' le'e zzoale neda' chela'ale. <sup>50</sup> Bi zka'n zen kwina'. Zoa No Benne' zka'n zene' neda', na' Le' zchi'a laže'e žo'o. <sup>51</sup> Da' li žapa' le'e: nóteteze benne' si' lo ne'e xtiža'a, bi gat bennen'.

<sup>52</sup> Naž benne' judío ka' belyi'e Le', na' wnnágake':

—Na'a nnezlto' žonlen da' xiwe' Le' tzen. Bran gote', na' lezka' gotgak benne' ka' bcháljgake' lo wláz Dios, san Le' znnno: "Nóteteze benne'

si' lo ne'e xtiža'a, bi gat bennen!."

<sup>53</sup> ¿Nakžo' Le' zen ka xažo Bran? Gote' le', na' gotgak benne' ka' bcháljgake' lo wláz Dios. ¿Nozkzen' žon kwino'?

<sup>54</sup> Bechebe Jesusen', na' gože' légake':

—Cha' neda' wká'n zen kwina', yela' zen na' bi be zakan'. Xa' zka'n zene' neda', na' le'e znnale nake' Dios chele. <sup>55</sup> Bi nónbia'le Xažo Dios, san neda' nónbi'a-ne'. Chela' nnia': bi nónbi'a-ne', na' gaka' benne' wen laže' kan nakle le'e. Nakle benne' wen laže' ka'. Na'a, da' li nónbi'a-ne', na' nzi' lo na'a xtiže'e. <sup>56</sup> Xale Bran bebele' dan' žala' le'ele' ža soa' neda' yežlyó nga, na' la'kze gote' ža ni'te, ble'elen', na' bebéle'ele'.

<sup>57</sup> Naž benne' judío ka' belyi'e Jesusen', na' wnnágake':

—Bi na' gono' chi-yon yiz. ¿Ble'elo' Bran na'?

<sup>58</sup> Jesusen' gože' légake':

—Da' li žapa' le'e: katen' bi na' soa Bran na', neda' ba zoakza'.

<sup>59</sup> Naž békwgake' yej ka' nich wžé'egaken' Jesusen', san Le' bkache' kwine' láwgake', na' bežoje' la' li'a yodon'. Wdíe' gachje láwe'le gan nnítä'gake', na' beyeje'.

**Jesús žeyone' to benne' golje' lo chole**

**9**    Kate' ne zda Jesusen' to latje, ble'ele' to benne' golje' lo chole. <sup>2</sup> Benne' wsedle chie' ka' wnnábgekle' Le', na' wnnágake':

—Benne' Wsedle, ¿noz ben dol'a, dan' golje' lo chole? ¿Benne' ni, cha' xa xne'e?

<sup>3</sup> Bechebe Jesusen', na' gože' légake':

—Bi naken dan' ben benne' ni dol'a, na' kege dan' bengak xa xne'e

dola', san naken nich la' law yela' wak zen che Dios ni'a che benne' ni. <sup>4</sup>Zon byenen gonžo xchin Xa', Bennen' bsele'e neda', kate' ne nak ka te ža. Žin ža gak chol' che yela' got, katen' bi gak nitó benne' gone' žin. <sup>5</sup>Kate' ne zoa' yežlyó nga, naka' baní' chegak benách ka' nnít'a'gake' yežlyó nga.

<sup>6</sup>Kate' beyóz bchalj Jesusen' da' ni, bži'e zene' lo yo, na' bene' góna'do' len zene' na', na' wdeben' yej law benne' lo cholén'. <sup>7</sup>Naž gože' le':

—Wyéj, na' bejtib lawo' lo bez nis da' nzin' Siloé. (Siloé naken to diža' hebreo da' znnan: nsela').

Naž benne' lo cholén' wyeje' ga na', na' bejtibe' lawe'. Kate' bezé'e ga na', ba zle'ele'. <sup>8</sup>Naž bebán láže'gak benne' zjo'o li'a ka', len benne' ka' blé'egake' le' zga'ale katen' goke' lo chole, na' wnnágake':

—¿Kege benne' ni bennen' wži'e, na' wnnable' no benne' bi da' wnežjwe' chie'?

<sup>9</sup>Bale' wnnágake':

—Lekze'.

Yebale' wnnágake':

—Kegen', san kan znnna' law bennen', lezka' znnna' law benne' ni.

Le' wnné':

—Nedan'.

<sup>10</sup>Naž wnnábgekle' le', na' wnnágake':

—¿Nakxkze goken, byaljw yej lawo'?

<sup>11</sup>Bechebe bennen', na' gože' légake':

—Bennen' lie' Jesús bene' góna'do', na' wdeben' yej lawa', na' gože' neda': "Wyéj žoa'a bez nis da' nzin' Siloé, na' bejtib lawo'." Wyá'a ga na', na' bejtiba' lawa', na' la' byáljwte yej lawa'.

<sup>12</sup>Naž wnnábgekle' le', na' wnnágake':

—¿Gaz zoa bennen'?

Le' gože' légake':

—Bi nnezla'.

Benne' yodo' ka' znnábgekle' binlo bennen' byaljw yej lawe'

<sup>13</sup>Naž bché'gake' bennen' goke' lo chole, na' bejzégake' le' lawgak benne' yodo' fariseo ka'. <sup>14</sup>Dan' nak ža la'y chégake' kate' ben Jesusen' góna'don', na' bsaljwe' yej law bennen' goke' lo chole, <sup>15</sup>che len benne' yodo' fariseo ka' wnnábgekle' le' da' yoble nakx goken byaljw yej lawe'. Le' gože' légake':

—Bdebe' góna'do' yej lawa', na' bejtib', na' zle'ela'.

<sup>16</sup>Naž bchaljgak bale benne' yodo' fariseo ka', na' wnnágake':

—Bennen' bi nake' che Dios, dan' bi žape chi'e ža la'y.

Yebale' wnnágake':

—¿Wak to benne' dola' gone' yela' wak ka' kan zej nak da' ka' žon bennen'?

Ka' goken, bžoj chóplegake'. <sup>17</sup>Da' yoble wnnábgekle' bennen' goke' lo chole, na' wnnágake':

—¿Biz znnó' le' che bennen', znnno' bsaljwe' yej lawo'?

Le' wnné':

—Nake' benne' zchalje' lo wláz Dios.

<sup>18</sup>Benne' judío wnná bia' ka' bi bejlé'gake' cha' goke' lo chole katen' golje', na' byaljw yej lawe'. Che len blížgake' xa xna' bennen' byaljw yej lawe'. <sup>19</sup>Wnnábgekle' légake', na' wnnágake':

—¿Nak benne' ni zi'nle, znnale golje' lo chole? ¿Nakxkze naken zle'ele' na'a?

**20** Bechébegak xa xne'e ka', na'  
bely'i'e légake':

—Nnezlto' benne' ni nake' zí'nto',  
na' golje' lo chole, **21** san nakx  
goken, zle'ele' na'a, bi nnezlto', na'  
noz bennen' bsaljwe' yej lawe', bi  
nnezlto'. Le nnable' le', dan' ba nake'  
benne' wak. Lekze' nne'.

**22** Ki wnnagak xa xna' bennen'  
goke' lo chole, dan' zžébegake'  
benne' judío wnná bia' ka', dan' ba  
ben xtiža'gake' cha' nóteteze benne'  
nne' nak Jesusen' Benne' Criston',  
to chi'ize kwéjgake' bennen' lo yo'o  
gan zdogbuk benne' judío ka' nich  
yéngakel' xtiža' Dios. **23** Che len  
wnnagak xa xne'e: "Le nnable' le',  
dan' ba nake' benne' wak."

**24** Naž benne' judío wnná bia' ka'  
da' yoble blížgake' bennen' goke' lo  
chole, na' bely'i'e le':

—Ni'a che Xanžo Dios wnné da'  
likze. Neto' nnezlto' nak bennen'  
benne' dola'.

**25** Naž bechebe bennen' goke' lo  
chole, na' wnné':

—Cha' nake' benne' dola' bi nnezla'.  
To da' nnezla'. Zga'ale goka' lo chole,  
na' na'a zle'ela'.

**26** Wnnábgakle' le' da' yoble, na'  
wnnágake':

—čBíz bene' chio'? čNakx bene'  
nich bsaljwe' yej lawo'?

**27** Bechebe bennen', na' gože'  
légake':

—Ba gožkza' le'e, san bi gónelele si'  
lo na'le xtiža'a. čBíz chen' žénelele  
yénlele da' yoble? čZénelele  
góñlenle Le' tzen?

**28** Naž bká'ngake' le' ka'ze, na'  
wnnágake':

—Le' žónleno' bennen' tzen, san  
neto' žónlento' Moisés tzen. **29** Neto'

nnezlto' Dios bcháljlene' Moisés  
na', san kan nak che benne' ni, bi  
nnezlto' noz benne' bsele'e Le'.

**30** Naž bechebe bennen', na' gože'  
légake':

—Da' ni žonen ga žebán laža'a. Le'e  
bi nnézlele noz benne' bsele'e bennen',  
na' Le' bsaljwe' yej law to benne' golje'  
lo chole. **31** Chela' bi nak bennen' che  
Dios, bi be gak gone'.

**34** Naž beži'igak benne' yodo' ka',  
na' bely'i'e le':

—Kan goljo' nak bian' nbago'o  
dola'. čZénekzlo' le' wsedlo' neto'?

Naž bebéjgake' le' na'le'.

### No benne' ka' zej nchólgekle'

**35** Benle Jesusen' kan bengak  
benne' judío wnná bia' ka',  
bebéjgake' bennen' goke' lo chole.  
Kate' bežage' le', gože' le':

—čZejli'o che Zi'n Dios?

**36** Bechebe' le', na' gože' Jesusen':  
—čNozen', nich chejli'a chie'?

**37** Jesusen' gože' le':

—Ba ble'elo' le', na' neda' nga  
zcháljlene' le', naka' Zi'n Dios.

**38** Naž bennen' byaljw yej lawe',  
bka'n zene' Jesusen', na' gože' Le':

—Yoa' lo no'o, čZejli'a chio' Le'.

**39** Jesusen' wnné':

—Nich wchi'a laža'a benách ka', bla'a  
yežlyó nga, nich l'égekle' benne' ka'  
zej nchólgekle', na' gakgak ka benne' lo  
chole benne' ka' žékgakle' zle'gekle'.

**40** Kate' benne' yodo' fariseo ka',  
benne' nníta'gake' gan zoa Jesusen',  
béngekle' da' ni, naž bely'i'e Le':

—¿Nakto' benne' nchólgekle'?

<sup>41</sup>Bechebe Jesusen', na' gože' légake':

—Chela' ncholze yej lawle, bi nbága'le dola'. Na'a znnale:

“Zlé'elto!” Che len nbága'le dola'.

Žsaka' lebe Jesús che  
le'je chegak zila' ka'

**10** Lezka' wnná Jesusen':

—Da' li žapa' le'e: no

benne' bi choe'e gan žo'ogak zila' ka'  
lo le'je chégakba', san žoe'e ga yoble,  
benne' ni nake' wbán, na' zbankze'.

<sup>2</sup>Bennen' žoe'e gan žo'ogak zila' ka'  
nake' benne' žape chi'ikze' lágakba'.

<sup>3</sup>Nich cho'o benne' ni, žsaljw benne'  
zoe' žape chi'e gan žo'ogak zila' ka',  
na' lágakba' žéngeklba' chie', na'  
žeyónbia'gakba'-ne'. Le' žlijgake'-ba'  
to toba' kan nzi' lágakba', na' žebeje'  
lágakba'. <sup>4</sup>Kate' ba wleje' yógo'te  
zila' ka', bia zej nakba' chie', znežwe'  
láwgakba', na' lágakba' žejnáwgakba'  
le', dan' žeyónbia'gakba' chie'.

<sup>5</sup>Bi chejnáwgakba' benne' yoble,  
san wzónnjgeklba' le', dan' bi  
nónbia'gakba' chi'igak benne' yoble  
ka'.

<sup>6</sup>Jesusen' bcháljlene' lágake' da' ni  
da' bsaka' lebe', san bi bejn'íigekle'  
dan' gože' lágake'.

**Jesús nake' Bennen' žape chi'e zila' ka'**

<sup>7</sup>Naž Jesusen' bcháljlene' lágake'  
da' yoble, na' wnné':

—Da' li žapa' le'e: neda' naka' ka  
to gan žo'ogak zila' ka'. <sup>8</sup>Ba blá'gak  
benne' zan, benne' ka' wnnágake'  
zej nake' Benne' Criston', san yógo'te  
benne' ka' bžíngake' zgá'alegake' ka  
neda', zej nake' benne' wbán ka', na'  
želbankze', na' bi wzé naggak zila'

ka' chégake'. <sup>9</sup>Neda' naka' ka to gan  
žo'ogak benách ka'. Nóte'teze benne'  
chó'olene' neda', yelá bennen', na'  
gake' ka to zila' žo'oba', na' žežojba',  
na' žél-lba' da' žawba'.

<sup>10</sup>Za'ze benne' wbán nich kwane'-  
ba', na' gote'-ba', na' wzía yi'e-ba'.

Neda' blá'a nich gata' yela' nban da'  
zejlí kanne chegak benách ka' zej  
nake' ka zila' chia' ka', na' gáta'zeze  
yela' nban da' zej lí kanne chégake'.

<sup>11</sup>Neda' žape chi'a benách chia' ka'  
kan žon bennen', lo yela' ži'i laže'  
chie' žape chi'e zila' chie' ka'. Bennen'  
žape chi'e zila' ka' ki ba zoakze' wdíe'  
yela' nban chie' ni'a chegak zila' chie'  
ka'. <sup>12</sup>Benne' nazjwe', benne' žape  
chi'e zila' ka', zlé'ele' za' beko' yixe'  
snia, na' zka'ne' zila' ka', na' žzonnje',  
na' beko' yixe' snia na' žejtáwy'a'ba'  
zila' ka', na' žeslásba' lágakba'. Ki žon  
benne' nazjwen', benne' žape chi'e  
zila' ka', dan' bi nakkze' benne' wape  
zila' ka', na' zila' ka' bi zej nakba'  
chekze'. <sup>13</sup>Žzonnj benne' nazjwen'  
dan' žape chi'e zila' ka' nich si'ze'  
mežw, na' bi že' laže'e lágakba'.

<sup>14-15</sup>Neda', lo yela' ži'i laže' chia'  
žape chi'a zila' ka'. Kan nonbia' Xažo  
Dios neda', na' neda' nónbi'a Xan',  
lezka' benách chia' ka', benne' zej  
nake' ka zila' chia' ka', zej nónbi'e  
neda', na' zdia' yela' nban chia'  
ni'a chegak zila' ka', na' zila' ka',  
bia zej nakba' chia' nónbia'gakba'  
neda'. <sup>16</sup>Lezka' zej nnita' zila' yoble  
chia' ka', bia ka' bi zej nbabba' nga.  
Lezka' žala' chejxí'gaka'-ba'. Bia ka'  
yéngeklba' chia', na' gákgakba' toze  
len yebale zila' chia' ka', na' nedkza'  
gape chi'a lágakba'.

<sup>17</sup>'Che len Xan' nži'ile' neda', dan'  
zdia' yela' nban chia', na' yezi'an da'

yoble, da' zejlás: wa'a latje benne' ka' gótgake' neda', na' yebana' lo yela' got. <sup>18</sup>Nitó benne' bi sáke'le' gote' neda', san nedkza' zdia' yela' nban chia', na' gata'. Nzi' lo na'a wdían', na' nzi' lo na'a yezi'an da' yoble. Ki naken dan' ki gož Xan' neda' gona'.

<sup>19</sup>Kate' béngekle benne' judío ka' da' ki, da' yoble bel-lá'a lázgake' kan žékgekle' che Jesusen'. <sup>20</sup>Benne' zan ládjwgake' wnnágake':

—Yoe'e be' xiwe', na' nyal yichj lázda'we'. ¿Biz chen' zze nagle chie' Le'?

<sup>21</sup>Yebale' wnnágake':

—To benne' yoe'e be' xiwe' bi zchalje' ki. ¿Wak to be' xiwe' wsaljwn yej lawgak benne' lo chole' ka'?

**Benne' judío wnná bia' ka'  
zzóagake' Jesús chelá'ale**

<sup>22</sup>Zak byo' zag ka', na' nak ža žóngake' Iní lo yež Jerusalén, kate' žejsá' láže'gake' ka bdégake' yodo' chégake' lo na' Dios. <sup>23</sup>Zda Jesusen' ža yo'o yodo' gan nak lo zchil chen, dan' nzin' Zchil Che Salomón.

<sup>24</sup>Benne' judío wnná bia' ka' bel-yéchjgake' Jesusen', na' belyi'e Le': —¿Batxkze wsano' žono' ga žek zedlto'? Cha' nako' Benne' Criston', kwáselo bloe'el neto'.

<sup>25</sup>Jesusen' gože' légake':

—Ba gožkza' le'e, san bi žejle'le chia'. Žin ka' da' žona', da' ka' bde Xa' lo na'a gona', zej nak bian' no naka'. <sup>26</sup>Le'e bi žejle'le chia', dan' bi nbáblenle benne' ka' zej nake' zila' chia' ka', kan ba gožkza' le'e. <sup>27</sup>Zila' chia' ka' žéngelba' chia', na' žeyónbia'gakba' neda', na' neda'

nónbia'gaka'-ba', na' zá'lengakba' neda' tzen. <sup>28</sup>Neda' znezjwa' yela' nban da' zejlí kanne chégakba', na' bi kwia yí'gakba', na' nitó benne' bi sáke'le' kwéjgake'-ba' lo na'a neda'.

<sup>29</sup>Xažo Dios bénngake'-ba' chia', na' Le' napže' yela' wak ka yógo'te benách ka', na' bi gak nitó benne' kwéjgake'-ba' lo na' Xan'. <sup>30</sup>Neda', na' Xažo Dios, toze nakto'.

<sup>31</sup>Da' yoble benne' judío wnná bia' ka' békxwgake' yej ka' nich wžé'egaken' Jesusen'. <sup>32</sup>Jesusen' gože' légake':

—Da' zan da' zej naken chawe' bena' lawle, dan' nzi' lo na'a che Xan'. ¿Ni'a che bizle žin chawe' ka' wžé'ele neda' yej?

<sup>33</sup>Beži'igak benne' judío wnná bia' ka', na' belyi'e Le':

—Ni'a che žin chawe' ka' bi wžé'eto' le' yej, san dan' bi zchaljo' chawe' che Dios. Le' nako' benachze, na' žon kwino' Dios.

<sup>34</sup>Bechebe Jesusen', na' gože' légake':

—Nyejw le'e yiche la'y kan wnná Dios, da' znnan: "Neda' znnia': nakle dios ka'." <sup>35</sup>Nnézkzelžo da' nyejw le'e yiche la'y nyéjwkzen to chi'ize. Le'e yiche la'y na' benne' ka' bchaljlen Dios légake' nzi' lágake' dios ka'.

<sup>36</sup>Diosen' bebeje' neda' chekze', na' bsele'e neda' yežlyó nga. ¿Na'a znnale chia': "Le' bi zchaljo' chawe' che Dios" dan' wnnía: "Zi'n Dios naka'?" <sup>37</sup>Cha' bi žona' žin da' bde Xažo Dios lo na'a gona', bi žala' chejle'le chia'. <sup>38</sup>Cha' žona' žin da' bde Dios lo na'a gona', la'kze bi žejle'le chia' nedkza', le chejlé' da' zej nak bia' žin ka' da' žona', nich gákbe'le žonlen Xažo Dios neda' tzen, na' neda' žónlena' Xan' tzen.

**39** Da' yoble gónegekle' séngake' Jesusen', san Le' belé' lo ná'gake'.

**40** Naž wyéj Jesusen' da' yoble yechelá'a yego Jordán, gan wdá Zwa, bennen' bezóe' benách ka' nis. Jesusen' bga'ne' ga na'. **41** Benne' zan bžíngake' gan zoa Jesusen', na' wnnágake':

—Da' li bi ben Zwa nitó yela' wak zen, san yógo'te da' wnná Zwan' kan žała' gak che benne' ni, dot da' li naken.

**42** Che len benne' zan bejlé'gake' che Jesusen' gan zoe'.

### Da' gok katen' got Lásaro

**11** Kate' ža ka' Lásaro, benne' Betania, die' yižwé!. Betania na' naken lažgak Lia, na' Marta. Nak Marta na' no'le bile Lian'. **2** Nak Lian' no'le zan Lásaron', bennen' die' yižwé', na' lezka' nake' no'len' wloé'e da' zla' zix ni'a Xanžom', na' besbiže' ni'e len yicha' yichje!. **3** Belseł'a' no'le zan Lásaron' to benne' bejlíže' Jesusen', na' wnné':

—Xan, bwia nga, Lásaro, bennen' nži'ilo'-ne', die' yižwé'.

**4** Kate' Jesusen' benle' da' ni, gože' benne' ka' nnítalengake' Le', na' wnné':

—Yižwé' ni bi naken da' gotten le' to chi'ize, san naken nich la' law yela' zen che Dios, na' ni'a che yižwé' ni lezka' la' law yela' zen chia' neda', Zi'n Diosen'.

**5** Jesusen' nži'ilie' Martan', na' no'le bile Martan', na' Lásaron!. **6** La'kze Jesusen' nži'ilie' légake', kate' benle' de' Lásaron' yižwé', bga'ne' gan zoe' yechóp ža ka!. **7** Wdé chope ža ka', Jesusen' gože' benne' wsedle chie' ka', na' wnné':

—Le cho'o da' yoble gan nbab Judea.

**8** Naž benne' wsedle chie' ka' belyi'e Le', na' wnnágake':

—Benne' Wsedle, gónegekle benne' judío wnná bia' ka' wžé'gake' Le' yej. ¿Chejo' da' yoble ga na'?

**9** Bechebe Jesusen', na' gože' légake':

—Zej de chežinno hora te ža. No benne' zde' te ža, bi chejchegwe', dan' zle'ele', dan' baní' da' zoan yežlyó nga zóalenen le'. **10** Cha' bennen' zde' žel, na' chejchegwe', dan' bi zoałen banín' le'.

**11** Kate' Jesusen' beyóž bchalje' da' ni, naž gože' légake':

—Ztas Lásaro, benne' lježzon', na' cha'a neda' ga na' nich yesbana'-ne'.

**12** Naž benne' wsedle chie' ka' belyi'e Le', na' wnnágake':

—Xan, cha' ztase', yeyake'.

**13** Jesusen' wnné' ki dan' ba got Lásaron', san légake' žékgekle' wnné': “Ztasze Lásaron!.” **14** Naž Jesusen' gože' légake' kwáselo, na' wnné':

—Ba got Lásaron!. **15** Žebela' dan' bi wzó'a' ga na', dan' gak na'a to da' gon chawen' le'e, dan' gonen ga chejle'le chia!. Le cho'o na'a gan de Lásaron'.

**16** Naž Mas, to benne' žónlene' Jesusen' tzen, bennen' lezka' lie' Benne' Kwach, gože' yezika' benne' wsedle chie' ka', na' wnné':

—Le cho'o, gátlenžo Le' tzen.

Jesús žesbane' benne' gat ka', na' nbánlenžo-ne'

**17-19** Yež Betania na' žen' gawze gan že' yež Jerusalén, na' nga'nzen ka zza'žo to hóraze. Che len ba

bžingak benne' zan, benne' judío ka', gan jez nnita' Marta, na' Lia, nich yeyón zéngake' lágake', dan' ba got benne' zángake'. Kate' Jesusen' bžine' ga na', benle' ba gok tape ža yo'o Lásaron' lo yežw ba. <sup>20</sup>Katen' benle Martan' za' Jesusen', naž bžoje' lo yo'o, na' bejchage' Le', san Lian' bga'nze' lo yo'o. <sup>21</sup>Martan' gože' Jesusen':

—Xan, chela' wzó' Le' nga, bi got benne' zana'. <sup>22</sup>Lezka' na'a, nnezla' yógo'te da' nnabolo' Dios, Le' gonnén' chio'.

<sup>23</sup>Jesusen' wnné':

—Yebán benne' zano'.

<sup>24</sup>Martan' gože' Le':

—Nnezla' yebane' kate' žin ža ze lawte ža na' katen' yebangak benne' gat ka'.

<sup>25</sup>Naž Jesusen' wnné':

—Nedkza' naka' Benne' žesbane' benne' gat ka', na' lezka' naka' Benne' jez nbanlen benách ka'. Nóteteze benne' chejlí'e chia' neda', la'kze gate', yebankze', <sup>26</sup>na' yógo'te benne' ka' nnítalengake' nbángake', na' žejl'é'gake' chia', bi gátgake' to chi'ize. *Žejl'i'o* da' ni?

<sup>27</sup>Martan' gože' Le':

—O', Xan. Žejl'i'a nako' Le' Benne' Criston', Zi'n Dios, Bennen' bchebe laže' Dios sele'e yežlyó nga.

*Zbeže Jesús dan' žeyache'  
laže'le' no'le zan Lásaro ka'*

<sup>28</sup>Kate' Marta beyóž bchalje' da' ni, beyeje' yo'o, na' bejliže' Lia, no'le bile', na' ži žize gože' le':

—Benne' Wsedle zoe' nga, na' znnie' le'.

<sup>29</sup>Kate' benle Lian' da' ni, la' wzó ža'tie', na' wyeje' gan zoa Jesusen'.

<sup>30</sup>Bi na' cho'o Jesusen' yeždon', san zoaze' gan bejchág Martan' Le'.

<sup>31</sup>Kate' benne' judío ka', benne' nnítalengake' lo yo'on', na' žeyón zéngake' no'le ka', blé'egekle' wzó ža' Lian', na' taríaze bžoje', naž bejnáwgake' le', na' wnnágake':

—Cheje' žoa'a yežw ba nich chejcheže' ga na'.

<sup>32</sup>Naž bžin Lian' gan zoa Jesusen'. Kate' ble'ele' Le', byechwe' xni'e, na' gože' Le':

—Xan, chela' wzó' Le' nga, bi got benne' zana'.

<sup>33</sup>Kate' ble'el Jesusen' zbeže', na' lezka' zbežegak benne' judío ka' jez nnítalengake' le', naž gok nyache' laže'e, na' bka' chi'e, <sup>34</sup>na' wnné':

—¿Gaz bkáče'le-ne'?

Bely'e Le':

—Da wio'.

<sup>35</sup>Wžeže Jesusen'. <sup>36</sup>Naž bchaljgak benne' judío ka', na' wnnágake':

—Le wia nga kan nží'ile'ele' le'.

<sup>37</sup>Bale' wnnágake':

—Ben Benne' ni ga zle'el bennen' goke' lo chole. ¿Gok bene' ga bi got Lásaron'?

*Žebán Lásaro lo yela' got*

<sup>38</sup>Da' yoble Jesusen' bka' chi'e, na' bžine' gan de yežw ban'. Ba na' yo'on to bloj le'e ya'a yej gan nadjw yežw ban', na' da' to yej blag da' nsejwn gan žo'o no benne' lo blojen'. <sup>39</sup>Jesusen' gože' benne' ka' nnítalengake' ga na', na' wnné':

—Le yeká'a yej blagen'.

Naž Marta, no'le zan benne' gaten', gože' Le':

—Xan, ba zle'e zgot dan' ba gok tap ža nate'.

- 40** Jesusen' wnné':  
—¿Kege gožkza' le' cha' žejl'i'o,  
le'eło' yela' wak zen che Dios?
- 41** Naž beká'agake' yej blagen'  
da' nsejwn gan žo'o no benne' lo  
blojen' gan yo'o benne' gaten'. Bwia  
Jesusen' ya'abale, na' wnné':  
—Xe, žapa' Le': "Žóxkeno" dan'  
ženlo' chia' neda'. **42** Neda' nnezla'  
žéntezelo' chia' neda', san zchalja' ki  
nich gak da' chawe' chegak benne'  
zan ki, na' nich chejlé'gake' Le'  
bséla'kzo' neda'.
- 43** Kate' beyóz bchalj Jesusen' da'  
ni, wnníe' zižje, na' wnné':  
—Lásaro, bežój kile.
- 44** Bežój benne' gaten' lo yežw ban',  
zej nžej ni'a ne'e len láže'do' ka', na'  
ngache' lawe' len yetó láže'do'. Naž  
Jesusen' gože' légake':  
—Le yeséž laže' ka' lo ni'a ne'e, na'  
le we' latje yezé'e.
- Žon xtíža'gak benne' wnná bia' ka'**  
**nich gótgake' Jesús**  
(Mt. 26:1-5; Mr. 14:1-2; Lk. 22:1-2)
- 45** Benne' zan, benne' judío ka',  
jáklené' Lia tzen, na' blé'egekle' dan'  
ben Jesusen'. Naž bejlé'gake' chie'.
- 46** Bale' jake' gan jez nnita' benne'  
yodo' fariseo ka', na' bzéngekle'  
légake' kan ben Jesusen'. **47** Naž  
bdobgak tzen benne' yodo' wchi'a  
laže' ka' len benne' yodo' fariseo  
ka', na' bxoz wnná bia' ka', na'  
wnnágake':  
—¿Nakxkze gonžo? Žon bennen'  
da' zan yela' wak zen. **48** Cha'  
wnéžjwžo Le' latje gonže' kan žone',  
yógo'te benách chejlé'gake' chie', na'  
yídegak benne' Roma ka' nga, na'  
wchínnjgake' yodo' la'y chežo, na'  
yež chežo nga.
- 49** Naž bchalj Kaifás, bennen' nake'  
bxoz blo yizen', na' žónlene' légake'  
tzen, na' gože' légake':  
—Le'e bi be nnézlele, **50** na' bi  
žákbe'elele žon byenen gat to benne'  
ni'a chegak benách ka', nich bi kwia  
yi'gak yógo'te benne' judío ka'.
- 51** Kege žakze chie' bchalje' da'  
ni, san dan' nake' bxoz blo yizen',  
che len bchalje' lo wláz Dios kan  
žala' gat Jesusen' ni'a chegak benne'  
yežen'. **52** Gat Jesusen', kégeze ni'a  
che yežen', san lezka' gate' nich  
wtobe' zí'n Dios ka', benne' yej  
násłase', nich gákgake' toze. **53** Ka'  
goken, la' ža na'ze ben xtíža'gake'  
gótgake' Jesusen'. **54** Che len biž  
wdá Jesusen' kwáselo gan jez nnita'  
benne' judío ka', san bezé'e ga na',  
na' wyeje' to latje gawze gan nak  
latje dach, na' ble'e lo yež Efraín,  
gan bga'ne' tzen len benne' wsedle  
chie' ka'.
- 55** Kate' ža na' za' gawze Lni  
Pasko' chegak benne' judío ka'  
kate' žejsá' láže'gake' kan ben Dios  
katen' bebeje' benách chie' ka' lo  
yežlyó Egipto. Bžojgak benne' zan  
lo yež ka', na' jake' lo yež Jerusalén  
kate' za' žin lni na', nich chejpá'  
kwíngake' kan nak che yodo'.
- 56** Benne' ka' nnítá'gake' lo yež  
Jerusalén beyíljgake' Jesusen', na'  
katen' wnnítá'gake' lo zchil yodo',  
belnnable' ljéžgake' toe' yetóe', na'  
wnnágake':  
—¿Biz znnale le'e? ¿Wide' lni, cha'  
bi yide'?
- 57** Ba wnnagak bxoz wnná bia' ka'  
len benne' yodo' fariseo ka', cha'  
no benne' nnezla' gan zoa Jesusen',  
žala' yedžzenle' légake' nich gak  
chejxéngake' Le'.

To no'le lie' Lia zgo'e da' zla' zix ni'a  
Jesús

(Mt. 26:6-13; Mr. 14:3-9)

**12** Kate' ne zej nga'n yexóp že  
žin Lni Pasko' kate' žejsá'  
láže'gake' kan ben Dios katen' bebeje'  
benách chie' ka' lo yežlyó Egípto, bla'  
Jesusen' lo yež Betania, gan zoa Lásaro,  
bennen' gote', na' besbán Jesusen' le'  
lo yela' got. <sup>2</sup>Naž bsí'ni'agake' to yela'  
waw ga na' da' gaw Jesusen'. Lia, no'le  
zan Lásaron', wloé'e yela' wawn', na' že  
Lásaron' ladjuw benne' ka' zé'lengake'  
Jesusen' tzen, gan že'j žawgake'. <sup>3</sup>Naž  
Lian' bexwe' ka to ya da' zla' zix che  
yeje susén las, da' záka'le'en, na'  
wloé'en lo ni'a Jesusen'. Besbiže' ni'e  
len yicha' yichje'. Dot lo yo'on' wžé' be'  
zixen'. <sup>4</sup>Naž bchalj to benne' wsedle  
che Jesusen', bennen' lie' Judas  
Iskariote, zi'n to benne' lie' Smon, na'  
nake' bennen' wdíe' Jesusen' lo na'gak  
benne' yodo' ka', na' wnné':

<sup>5</sup>—¿Biz chen' bi wdó'w da' zla'  
zixen', da' zakan' lázjwžo che to  
yiz, na' gak no benne' chise' mežwn'  
chegak benne' yache' ka'? <sup>6</sup>(Wnné'  
ki, kege dan' že' laže'e benne' yache'  
ka', san nake' wbán, na' lekze' noe'e  
bzod mežw chégake', na' zká'lane'  
mežwn' da' zgó'ogake' lo bzoden').

<sup>7</sup>Naž Jesusen' gože' le':  
—Le we'e latje, dan' nak da' ni da'  
bene' to da' zpe'en che že gacha'a  
lo yežw ba. <sup>8</sup>Benne' yache' ka' zej  
nnítalenteze' le'e, san neda' bi  
gá'nteza' gan zoale.

Benne' judío wnná bia' ka'  
ženegekle' gótgake' Lásaro

<sup>9</sup>Kate' béngekle benne' judío ka'  
zoa Jesusen' lo yež Betania, benne'

zan žake' ga na', kégeze dan' zoa  
Jesusen' ga na', san lezka' dan'  
ženegekle' lé'gekle' Lásaro, bennen'  
besbán Jesusen' lo yela' got. <sup>10</sup>Naž  
bxoz wnná bia' ka' ben xtíža'gake'  
lezka' gótgake' Lásaron'. <sup>11</sup>Ka' goken  
dan' benne' zan, benne' judío ka',  
žejlé'gake' che Jesusen', na' ba wlé'  
yíchjgake' bxoz wnná bia' ka' ni'a  
che Lásaron'!

**Zka'n zéngake' Jesús kate' žoe'e yež  
Jerusalén**

(Mt. 21:1-11; Mr. 11:1-11; Lk. 19:28-40)

<sup>12</sup>Bžingak benne' zan lo yež  
Jerusalén že Lni Pasko', na' že  
chope že béngekle' za' Jesusen' lo  
yežen'. <sup>13</sup>Naž wdíchjwgake' zin ka',  
na' bžójgake' nich chejchággake'  
Jesusen', na' wžéžeya'agake' zižje,  
na' wnnágake':

—iGa'n zen Dios! iGa'n zen Benne'  
ni ze'e lo wláz Xanžon', na' nna bi'e  
benách Israel ka'!

<sup>14</sup>Jesusen' bžel-le' to búrrodo', na'  
wžié'-ba' kan nyejw le'e yiche la'y,  
da' znnan:

<sup>15</sup>Bi žébele le'e, zoale yež Sión.  
Le wia nga, za' Benne' nna bi'e  
le'e.  
Žie' to búrrodo'.

<sup>16</sup>Kate' gok da' ni, bi bejn'iigekle  
benne' wsedle ka' che Jesusen', san  
wdé na', kate' bebane' Le' lo yela'  
got, na' beyepe' ya'abá che Dios, naž  
bejsá' láže'gake' da' ni da' nyejw le'e  
yiche la'y kan žala' gaken chie', na'  
ki goken chie'.

<sup>17</sup>Lezka' benne' ka' wnnítalengake'  
Jesusen' katen' bliže' Lásaro, bennen'  
bgache'e lo yežw ba, na' besbane'  
le' lo yela' got, bzoa lígake' che  
da' bene'. <sup>18</sup>Lezka' che len bžojgak

benne' ka', na' bejchággake' Jesusen', dan' béngekle' kan nak yela' wak zen na' da' bene' Le'. <sup>19</sup>Naž benne' yodo' fariseo ka' bcháljgake' la' légakze', na' wnnágake':

—Nak bia' bi be sáke'lžo gonžo. Le wia kan zónlengak yógo'te benách Le' tzen.

### **Benne' zi'to' ka' žílgake' Jesús**

<sup>20</sup>Bale benne' zi'to' ka'zej  
nžage' benne' ka' bžíngake' lo  
yež Jerusalén ža Lni Paskon' nich  
wká'n zéngake' Dios. <sup>21</sup>Benne'  
zi'to' ka' bejchággake' Lip, benne'  
Betsaida, yežen' nbaben Galilea, na'  
góta'yoegakle' le', na' wnnágake':

—Benne', žénelto' le'elto' Bennen'  
lie' Jesús.

<sup>22</sup>Wyéj Lipen', na' bzenle' Ndres  
da' ni. Naž Ndrezent' len Lipen'  
bejzéngeklen' Jesusen'. <sup>23</sup>Bechebe  
Jesusen', na' gože' légake':

—Za' žin ža gata' neda', Benne'  
Golje' Benách, na' yeý'a latje  
chia' ya'abá che Dios. <sup>24</sup>Da' li žapa'  
le'e: ga'n toze to bínnedo' cha' bi  
gachen' lo yo, na' te chen. Cha' te  
che bínnedon', lan', na' wnežjwn  
bínnedo' zánle'eže. <sup>25</sup>No benne' že'  
láže'ze' yela' nban chie', wniten',  
dan' gat to chi'ize bennen'. No  
benne' bi že' láže'ze' yela' nban  
da' nape' yežlyó nga gape chi'en,  
na' gata' yela' nban da' zejlí kanne  
chie'. <sup>26</sup>Cha' žénele no benne' gone'  
xchina', žala' gólnene' neda' tzen, na'  
gan chejsóa' neda', chejsóa bennen'  
žone' xchina'. Cha' žon to benne'  
xchina', Xažo Dios gape' le' ba la'ne.

### **Jesús zlöe'ele' kan za' gótgake' Le'**

<sup>27</sup>Lezka' wnná Jesusen':

—Na'a žek zédle'ela'. *¿Bizkze*  
nnia'? *¿Nnia': Xe*, beslá neda' lo da'  
žala' gaken chia' na'a? Che len bla'a,  
nich soela' da' žala' gaken chia' na'a.  
<sup>28</sup>Xe, ben ga la' law yela' zen chio'.

Naž benle chi'i to Benne' zchalje'  
ya'abá che Dios, na' wnné':

—Ba bena' ga nla' law yela' zen  
chia', na' da' yoble gona' ga la' lawn.

<sup>29</sup>Benne' zan, benne' ka'  
nnítal'gake' ga na', béngekle' chi'i na',  
na' wnnágake':

—iWzi' wnnén!

Yebałe benne' ka' wnnágake':

—To wbás che ya'abá che Dios  
bcháljlene' Le'.

<sup>30</sup>Naž bechebe Jesusen', na' gože'  
légake':

—Benle chi'i na', kege ni'a chia'  
neda', san ni'a chele le'e. <sup>31</sup>Ba bžin  
ža wchi'a laže' Dios benách yežlyó  
nga. Na'a Dios cho'ne' da' xiwe'  
na'le, dan' znnna bian' benách ka'  
nnítal'gake' yežlyó nga. <sup>32</sup>Na'a, cha'  
benne' ka', benne' gótgake' neda',  
wchísgake' neda', Benne' Golje'  
Benách, ža'le, gona' ga dobgak  
yógo'te benách ka' gan soa' neda'.

<sup>33</sup>Len da' ni da' bchalj Jesusen'  
blo'e'ele' law kan gate'. <sup>34</sup>Benne' zan  
ka' belyi'e Jesusen', na' wnnágake':

—Neto' benlto' chegak benne'  
ka', benne' bél'gake' xtiža' Dios, da'  
znnan: "Sóateze Benne' Criston!."  
*¿Biz* chen' znnno' Le': "Žon byenen  
wchísgake' Benne' Golje' Benách?"  
*¿Nozkzen'* Benne' Golje' Benách?

<sup>35</sup>Naž Jesusen' gože' légake':

—Yetó chí'ido'ze sóalena' le'e, na'  
naka' baní' chele. Le da kate' ne  
zóalena' le'e, na' de banín' chele,  
nich bi gak chol nitle. Nóte'ze  
benne' zde' gan nak chol bi nnezle'

gan zeje'. <sup>36</sup>Kate' ne zóala'lena' le'e, naka' baní' chele. Le chejlé' chia' neda', naka' baní' chele nich gakle zi'n Bennen' nake' banín' da' naken li laže'.

Kate' beyóž bchalj Jesusen', beyeje', na' benít lawe' gan nnít'a'gake'.

### Da' žonen ga bi žeje'l'gak benne' judío ka' che Jesús

<sup>37</sup>La'kze ben Jesusen' da' zan yela' wak zen lawgak benne' judío ka', bi bejlé'gake' chie'. <sup>38</sup>Ka' goken, bžin dan' bzoj Isaías, bennen' bchalje' lo wláz Dios ža ni'te, katen' wnné':

Xan, čnozkze benne' bejlí'e da' bchaljto'?

čNozkze benne' bloe'el Xanžo  
Dios le' yela' wak chie'?

<sup>39</sup>Ka' goken, bi gok chejlé'gake' che Jesusen'. Goken kan wnná Isaásen' katen' wnné':

<sup>40</sup>Dios bene' ga gok chol yichj lázdo'gake', na' gok choch lázdo'gake' nich bi l'é'egkle' len yej láwgate', na' nich bi chejní'igekle' lo yichj lázdo'gake'.

Na' wnná Dios:

Bi yeyákgake' chia' nich yeyona' légake'.

<sup>41</sup>Bchalj Isaásen' da' ni dan' ble'ele' yela' zen che Benne' Criston', na' bchalje' kan gak chie' Le'.

<sup>42</sup>La'kze goken ki, bejlé'gak benne' zan che Jesusen'. Lezka' bejlé'gak bale' benne' wnná bia' ka' chie', san dan' zžébegake' benne' yodo' fariseo ka', bi bzoa lígake' chie' kwáselo. Ki bengake' nich bi kwéjgake' légake' to chi'ize gan zdóbgake'

nich yéngekle' xtiža' Dios. <sup>43</sup>Lezka' bengake' ki dan' že' láže'gakže' gápegak benách ka' légake' ba la'ne, ka že' láže'gake' gape Dios légake' ba la'ne.

### Kwia yí'gake' dan' bi žejl'é'gake' da' bchalj Jesús

<sup>44</sup>Jesusen' wnné' zižje, na' wnné':

—No benne' žeji'e chia' neda', kege chia' nedza' žeji'e, san lezka' žeji'e che Xa', Bennen' bsele'e neda'.

<sup>45</sup>Lezka', no benne' zle'ele' neda', lezka' zle'ele' Xan', Bennen' bsele'e neda'. <sup>46</sup>Neda' naka' baní', na' bla' a yežlyó nga, nich bi ga'ngak benne' ka' lo chole, yógo'te benne' ka' chejlé'gake' chia' neda'. <sup>47</sup>Cha' ženle no benne' xtiža'a, na' bi žapen' ba la'ne, kege neda' choga' che bennen' kwia yi'e, dan' bla'a nga, kege nich choga' chegak benách ka' nnít'a'gake' yežlyó nga kwia yí'gake', san nich yeslá' benách ki. <sup>48</sup>No benne' zzoe' neda' chela'ale, na' bi zzi' lo ne'e xtiža'a, ba zoa da' chogen chie' kwia yi'e. Dižan' dan' bcháljenja' le'e naken da' chogen che bennen' kwia yi'e že za lawte že na'. <sup>49</sup>Ki naken dan' zchalja', kege žakze chia', san Xa', Bennen' bsele'e neda', gože' neda' da' žala' nnia', na' lezka' kan žala' wchalja'. <sup>50</sup>Nnezla' gož Dios neda' gona' ki nich gata' yela' nban da' zejlí kanne chegak benách ka'. Ki naken, zchalja' kan ba gožkze Xan' neda'.

Jesús žibe' ní'agak benne'  
wsedle chie' ka'

**13** Bžin že za' žin Lni Pasko'  
kate' žejsá' láže'gake' kan ben Dios, katen' bebeje' benách

chie' ka' lo yežlyó Egipto. Jesusen' nnézkzele' za' žin že chie' gate', katen' wzé'e yežlyó nga, na' yeyeje' gan zoa Xe'. Kan nži'ile' benách chie' ka', benne' ka' nníta'gake' yežlyó nga, na'a nži'ile' légake' na' zejte gate' lo wláz légake'.

<sup>2</sup>Da' xiwe' ba ngo'o yeſan' Judas Iskariote, zin' to benne' lie' Smon, nich wdíe' Jesusen' lo na'gak benne' ka' gótgake' Le'. <sup>3</sup>Jesusen' nnézkzele' kan nak, bžoje' gan zoa Dios, na' yeyeje' gan zoa Dios, na' Dios, Xe', ba bdie' lo ne'e Le' dot yeſa' wnná bia' chie'. <sup>4</sup>Che len, kate' ne že'j žáwgake', wzó ža' Jesusen', na' beké'e lažen' žxoa xkože'e. Bexwe' to laže' da' žesbižlenžon na'žo, da' bde'en li'e. <sup>5</sup>Naž wdé'e nis to lo ziga' ya, na' wzó lawe' žibe' ní'agak benne' wsedle chie' ka', na' žesbiže' ní'agake' len lažen' da' dan' li'e.

<sup>6</sup>Kate' bžin Jesusen' gan že' Smon Bedw, Bedon' gože' Le':

—Xan, bi žala' chibo' Le' ni'a.

<sup>7</sup>Bechebe Jesusen', na' gože' le':

—Da' ni da' žona', bi žejni'ilon' na'a, san te na'a chejni'ilon'.

<sup>8</sup>Naž Bedon' gože' Le':

—Bi chibkzo' Le' ni'a.

Jesusen' gože' le':

—Cha' neda' bi chiba' le', bi sáke'lo' góñleno' neda' tzen.

<sup>9</sup>Naž Smon Bedon' gože' Le':

—Xan, kégeze ni'a chibo', san lezka' chibo' na'a, na' yichja'.

<sup>10</sup>Jesusen' gože' le':

—No benne' nyaše', ní'aze' žon byenen chažen, dan' ba nakkze' chawe' dotie', na' le'e nakle chawe', san kege yógo'tele.

<sup>11</sup>Ki wnná Jesusen': "Kege yógo'tele nakle chawe'" dan'

nnézkzele' no benne' ládjwgake' wdíe' Le'.

<sup>12</sup>Beyóž wdíb Jesusen' ní'agake', na' beyakwe' lažen' bxoa xkože'e. Bebi'e gan že'j žáwgake', na' gože' légake':

—¿Žejní'ilele dan' za' bena' chele?

<sup>13</sup>Le'e že'le neda': "Benne' Wsedle" na': "Xan." Da' li nak da' znnale, dan' ki naka'. <sup>14</sup>Na'a, cha' neda' naka' Xanle, na' Benne' Wsedle chele, na' wdiba' ní'ale, lezka' žala' gonle le'e, chible ni'a lježle tole yetole. <sup>15</sup>To da' blee'elan' le'e nich gonle le'e kan bena' neda'. <sup>16</sup>Da' li žapa' le'e: to benne' wen žin bi nakže' blo ka Xane', na' to benne' wbás bi nakže' blo ka bennen' bsele'e le'. <sup>17</sup>Cha' žejní'ilele yógo'te da' ki, ba nez zen gaken chele le'e cha' gonle ki.

<sup>18</sup>Da' ni da' znnia' bi žapa' yógo'tele. Nónbia'kza' benne' ka' wžekza' neda', san žon byenen gak dan' nyejwn le'e yiche la'y, dan' znnan: "To benne' že'j žáwlene' neda' tzen wži'e chia' neda'!" <sup>19</sup>Na'a zloe'ela' le'e zga'ale kan gaken, nich katen' gaken ki, na' chejle'le zoakza' neda'. <sup>20</sup>Da' li žapa' le'e: no benne' gape' to benne' wbás ba la'ne, benne' sel'a'a neda', lezka' gape' neda' ba la'ne, na' no benne' gape' neda' ba la'ne, lezka' gape' Xa' ba la'ne, Bennen' bsele'e neda'.

Jesús znné' wdé Judas Le' lo na'gak benách ka'

(Mt. 26:20-25; Mr. 14:17-21; Lk. 22:21-23)

<sup>21</sup>Kate' beyóž bchaj] Jesusen' da' ni, gok nyache' laže'e, na' kwáselo wnné':

—Da' li žapa' le'e: to benne' zoe' ládjwle le'e nga wdíe' neda'.

<sup>22</sup>Naž benne' wsedle chie' ka' bwágake' law ljéžgake' toe' yetóe',

na' gok zédgekle', na' wzá' láže'gake' nólegake' bchalj Jesusen' chie'.

<sup>23</sup>To benne' wsedle chie', bennen' Jesusen' nži'ile' le', zoe' kwite'.

<sup>24</sup>Smon Bedw bлоé'ezele' bennen' nich nnable' Jesusen' nólegake' bchalje' chie'. <sup>25</sup>Naž bennen' zoe' kwit Jesusen' gože' Le':

—Xan, čnozen' bchaljo' chie'?

<sup>26</sup>Bechebe Jesusen', na' gože' le':

—Bennen' wa'a-ne' yet xtíl da' nbisen.

Naž besbise' yet xtílen', na' bi'en che Judas Iskariote, zi'n to benne' lie' Smon. <sup>27</sup>Beyóz bdaw Judas na' yet xtílen', wyáz da' xiwe' lo yichj lázda'we'. Naž Jesusen' gože' le':

—Dan' yo'o lažo'o gono', bentgan na'a.

<sup>28</sup>Yezika' benne' wsedle ka' che Jesusen', benne' žé'gake' ga na', na' že'j žáwgake', bi žejn'igekle' biz chen' gože' le' ki. <sup>29</sup>Dan' nwa' Judas na' bzod mežw chégake', che len gókgekle' bale' Jesusen' gože' le': "Bejxí' da' gawžo" o wnné: "Bia' late' chegak benne' yache' ka." <sup>30</sup>Katen' Judas na' beyóz bdawe' yet xtílen', na' la' bžojtie', ne nak žel.

### Jesús čchi'le' žo'o to da' kobe da' žon byenen gonžon

<sup>31</sup>Kate' ba bžoj Judas, wnná Jesusen':

—Na'a za' la' law yela' zen chia' neda', Benne' Golje' Benách, na' lezka' la' law yela' zen che Dios.

<sup>32</sup>Cha' la' law yela' zen che Dios ni'a chia' neda', Zí'ne', lezka' gonkze Dios ga la' law yela' zen chia' neda', Zí'ne', na' la' gontie' ki. <sup>33</sup>Le'e, zí'na'do' ka', yetó chí'ido'ze zóalena' le'e. Yeyilje neda', na' kan ba goža' benne' judío

ka', lezka' žapa' le'e na'a: gan cha'a neda', bi gak yidle žakze chele.

<sup>34</sup>To da' kobe zchi'la' le'e: le ži'il lježle tole yetole. Kan neda' nži'ila' le'e, lezka' žala' ží'ilele lježle tole yetole. <sup>35</sup>Cha' ží'ilele lježle tole yetole, gékbe'egekle yógo'te benách žónlenle neda' tzen.

**Jesús zinne' nna Bedw bi nónbi'e Le'**  
(Mt. 26:31-35; Mr. 14:27-31; Lk. 22:31-34)

<sup>36</sup>Naž Smon Bedw wnnable'  
Jesusen', na' wnné:

—Xan, čgazkzen' chejo'?

Bechebe Jesusen', na' wnné:

—Gan cha'a neda', bi gak sá'leno' neda' na'a, san te na'a yido' gan cha'a neda'.

<sup>37</sup>Bedon' gože' Le':

—Xan, čbiž chen' bi gak sá'lena' Le' na'a? Zoakza' wdía' yela' nban chia', na' gata' dan' nži'ila' Le'.

<sup>38</sup>Bechebe Jesusen', na' gože' le':

—čWdío' yela' nban chio' dan' nži'ilo' neda'? Da' li žapa' le', zga'ale kate' kweže leko', wži'o chia' chonne chi'i, na' nno' bi nónbi'o neda'.

**Jesús nake' nez da' chéjlenžo  
nich žinžo gan zoa Xažo Dios**

**14** Wnná Jesusen':  
—Bi gek zédlele. Le chejlé' che Dios, na' le chejlé' chia' neda'. <sup>2</sup>Latje zan zej den liž Xa'. Chela' bi naken ki, neda' ba gožkza' le'e. Cha'a neda' na'a, chejkweza' latje chele gan chejsoale. <sup>3</sup>Cha' chejkweza' latje chele gan chejsoale, na' yelá'a da' yoble, nich yechi'a le'e latje chian', nich gan chejsó'a neda', lezka' le'e chejsoale ga na'. <sup>4</sup>Nnézkzelele gan cha'a, na' lezka' nónbia'le nez.

<sup>5</sup>Mas gože' Le':

—Xan, bi nnezlto' gan chejo'.

¿Nakxkze gak gónbia'to' nezen'?

<sup>6</sup>Bechebe Jesusen', na' gože' le':

—Neda' nakkza' nez li, na' naka' da' nak dot da' li, na' naka' Benne'zej nbanlen benách ka'. Ni'a chia' nedza' gak la' no benne' gan zoa Xažo Dios. <sup>7</sup>Chela' nónbia'le neda', lezka' nónbia'le Xan'. Na'a, nónbia'le-ne' na' ba blé'elele-ne'.

<sup>8</sup>Naž Lip gože' Le':

—Xan, blœ'el neto' Xon', ná'teze.

<sup>9</sup>Bechebe Jesusen', na' gože' le':

—Lip, scha ba goken zóalena' le'. ¿Bi nónbi'o neda'? No benne' zle'ele' neda', lezka' zle'ele' Xan'. ¿Na'a nno': "Bloe'el neto' Xon"? <sup>10</sup>¿Bi žejl'i'o zóalenkza' Xa', na' Xan' zóalenkze' neda'? Da' ki da' zcháljlena' le', kege žakze chia' zchaljan', san Xa' zóalenkze' neda', na' Lekze' žone' žin ki. <sup>11</sup>Le chejl'e' chia', zóalenkza' Xa', na' Xan' zóalenkze' neda'. Cha' bi gak gonle ki, le chejl'e' chia' neda' ni'a che žin da' žona'. <sup>12</sup>Da' li žapa' le': da' ka' žona' neda', lezka' gon bennen' žejl'i'e chia' neda', na' da' ženže ka' gone' dan' yeyá'a gan zoa Xažo Dios. <sup>13</sup>Yógo'te da' nnáblele Xažo Dios, na' wkónlele žin la' neda', neda' gona' dan' nnable, nich wloé'ela' law neda', Zi'n Dios, yela' baní' zen che Xažo Dios. <sup>14</sup>Bíte'teze dan' nnable, na' wkónlele žin la' neda', neda' gonan'.

Jesús sele'e Dios Be' La'y  
yedjsóalene' benách chie' ka'

<sup>15</sup>Lezka' wnná Jesusen':

—Cha' nží'ilele neda', le gon da' žapa' le', <sup>16</sup>na' neda' gáta'yoela' Xažo Dios, na' Le' sele'e Benne'

yoble, Benne' gáklen'e' le', Benne' gon choche' le', na' sóalenteze' le'. Bennen' nake' Dios Be' La'y, Benne' znnakze' da' li. <sup>17</sup>Benách ka' nnít'a'gake' yežlyó nga bi gak si' lo ná'gake' Le', dan' bi gak lé'egekle' Le', na' bi gak gónbia'gake' Le', san zóalenke' le', na' soe' lo yichj lázdo'le. <sup>18</sup>Bi wka'na' le' ka xkwide' wžéb ka'. Yelá'a, na' yedjsóalena' le'. <sup>19</sup>Yetó chí'ido'ze, na' benách ka' nnít'a'gake' yežlyó nga biž lé'egekle' neda', san le'e yelé'elele neda'. Dan' zoakza' nbana' neda', lezka' le', to chí'ize soale nbanle. <sup>20</sup>Ža na' katen' Dios Be' La'y na' yedjsóalene' le', nnézkzelele zóalenkza' Xažo Dios, na' le'e zóalenle neda', na' neda' zóalenkza' le'. <sup>21</sup>Nóte'teze benne' zzi' lo ne'e xtiža'a, na' žone' kan znnan, nak bia' nží'ile' neda'. Xažo Dios ží'ile' bennen' nží'ile' neda', na' neda' ží'ilá' bennen', na' wloé'e law' lawe' le'.

<sup>22</sup>Judas gože' Le', (kege Judas Iskariote), na' wnné':

—Xan, ¿nakxkze gak wloé'e lawo' lawto' neto', na' bi wloé'e lawo' lawgak benách ka' nnít'a'gake' yežlyó nga?

<sup>23</sup>Bechebe Jesusen', na' gože' le':

—Nóte'teze benne' nží'ile' neda' gone' kan znnna xtiža'a, na' Xažo Dios ží'ile' le', na' yedjsóalento' le' lo yichj lázda'we'. <sup>24</sup>Nóte'teze benne' bi nží'ile' neda' bi žone' kan znnna xtiža'a. Da' bénlele, da' bchalja' neda', kege chia' nedzan', san naken che Xažo Dios, Bennen' bsele'e neda'.

<sup>25</sup>Žapkza' le' da' ki kate' ne zóalena' le', <sup>26</sup>san Dios Be' La'y, Bennen' sela' Xažo Dios chele, gáklen'e' le', na' gon choche' le'e

dan' wkónlele žin la' neda'. Wsadle' le'e yógo'te, na' wsé'e láže'le kan nak yógo'te da' ba goža' le'e.

<sup>27</sup>'Wka'na' da' wká'n ži yichj lázdo'le. Dan' wká'n ži yichj lázdo'le da' gonna' chele, bi naken ka da' znézjwgak benách ka' nníta'gake' yežlyó nga. Bi gek zédlele, na' bi žébele. <sup>28</sup>Ba bénlele da' ba goža' le'e, wnnía': yeyá'a, na' yelá'a, na' yedjsóalena' le'e. Chela' nží'ilele neda', na' yebélele katen' goža' le'e yeyá'a gan zoa Xažo Dios, dan' nakže blo Xažo Dios ka naka' neda'. <sup>29</sup>Na'a, ba goža' le'e zga'ale kate' gaken, nich kate' gaken ki, chejle'le chia' neda'.

<sup>30-31</sup>'Biž wcháljlenna' le'e da' zan, dan' za' da' xiwe', dan' znnna bian' benách ka' nníta'gake' yežlyó nga. La'kze bi de lo nan' bi da' gonen chia' neda', ki žala' gaken nich nnézgakle benách ka' nníta'gake' yežlyó nga nží'ilila' Xažo Dios, na' žona' kan ba gože' neda' gona'. Le so ža', na' le cho'o.

Kan nak che lba uba, na'  
chegak ni'a nen' ka'

## 15 Lezka' Jesusen' gože' légake':

—Naka' neda' ka to lba uba da' naken li laže', na' Xa' nake' ka benne' žaz ža'n, benne' žape chi'e lban'. <sup>2</sup>Choge' bíte'teze ni'a na' lban', dan' naka' neda', da' ka' bi be želbían, na' wchi'e yógo'te ni'a nen' ka', da' želbían, nich gákgaken chawe', na' kwíagaken yelate'. <sup>3</sup>Le'e ba nakle chawe' ni'a che dižan' da' ba bcháljlenna' le'e. <sup>4</sup>Le gónlenteze neda' tzen, kan neda' žónlenteza' le'e tzen. Kan nak che ni'a na' lban',

bi be gak kwian žakze chen, cha' bi gónlentezen lban' tzen, lezka' naken chele, bi be gak gonle cha' bi gónlentezle neda' tzen.

<sup>5</sup>'Naka' neda' ka lban', na' le'e nakle ka ni'a nen' ka'. No benne' gónlenteze' neda' tzen, kan neda' žónlenteza' le' tzen, benne' ni nake' ka ni'a na' lban' dan' zbian da' zenle'e, dan' cha' yekwasle len neda', bi be gak gonle. <sup>6</sup>No benne' bi gónlenteze' neda' tzen, gak chie' kan žak chegak ni'a na' lban', da' ka' bi zej naken chawe', Zchóggake' ni'a nen' ka', na' bížgaken. Katen' ba nbižgak ni'a nen' ka', na' wtóbgaken', na' chó'ngaken' lo yi', na' chéygaken.

<sup>7</sup>'Cha' gónlentezle neda' tzen, na' cha' gonle kan znnna xtiža'a, wake nnable bi da' yénelele, na' neda' gonan'. <sup>8</sup>Gaple le'e Xažo Dios ba la'ne katen' gonle xchine', na' gakle ka ni'a na' lban', da' ka' želbían, na' ki gak bia' da' li nakle benne' ka' žónlengake' neda' tzen. <sup>9</sup>Kan Xažo Dios nží'ile' neda', lezka' nží'ilila' le'e. Le gónteze kan žala' gon no benne' nží'ilila'-ne'. <sup>10</sup>Cha' gonle kan žapa' le'e, gonle kan žala' gon no benne' nží'ilila'-ne', kan neda' žona' kan Xažo Dios ba gože' neda' gona', na' žónteza' da' žaz laže' Dios, Bennen' nží'ile' neda'.

<sup>11</sup>'Da' ki žapa' le'e nich yebélele tzen len neda', na' gaken dot li laže' kan yebélele. <sup>12</sup>Da' ni naken da' zchi'la' le'e gonle: le ži'il lježle tole yetole, kan neda' nží'ilila' le'e. <sup>13</sup>Bi gak no benne' ží'ižele' lježe' ka gon bennen' wdí'e yela' nban chie', na' gate' nich gáklene' lježe' ka' dan' nží'ile' légake'. <sup>14</sup>Le'e nakle ljéža'do' ka' cha' gonle kan bchi'la'

le'e gonle. <sup>15</sup>Biž nnia' chele nakle wen žin chia' ka', dan' bi nnezele benne' wen žin da' gon xane'. Neda' wnnia' chele nakle ljéza'do' ka', dan' bena' ga nnézlele yógo'te da' gož Xa' neda' gona'. <sup>16</sup>Kege le'e wžele neda', san neda' wžekza' le'e, na' bnnita'a le'e nich chejle bi da' chjenle, kan žongak ni'a na' lban', da' ka' želbían da' zenle'e, na' gá'nteze dan' gonle. Ki gaken, Xažo Dios gonne' chele yógo'te da' nnáblele-ne', katen' wkónlele žin la' neda'. <sup>17</sup>Da' ni naken da' zchi'l'a le'e gonle. Le ž'il lježle tole yetole.

### Góngake' chegak benách che Jesús kan béngake' chie'

<sup>18</sup>Lezka' wnná Jesusen': —Cha' benách ka' nníta'gake' yežlyó nga zzóagake' le'e chela'ale, nnézlele ba bzóagake' neda' chela'ale zga'ale kan zzóagake' le'e chela'ale na'a. <sup>19</sup>Chela' nakle toze len benách ka' nníta'gake' yežlyó nga, ží'igekle' le'e kanzej nži'ile' ljéžgake' ka', san zzóagake' le'e chela'ale dan' bi nakle toze len légake'. Ki žaken dan' wžekza' neda' le'e, na' wleja' le'e ládjwgak benách ka' nníta'gake' yežlyó nga. <sup>20</sup>Le chejsá' láže' dižan' da' goža' le'e, katen' wnnia': "Benne' wen žin bi nakže' blo ka xane!" Cha' wžia láže'gak benách ka' neda', lezka' kwia láže'gake' le'e. Cha'zej nnita' benne' ka' žóngake' kan znnna xtiža'a, lezka' góngake' kan znnna xtiža'le le'e. <sup>21</sup>Yógo'te da' ki gongak benách ka' chele dan' žónlenle neda' tzen, na' dan' bizej nónbi'e Xažo Dios, Bennen' bsele'e neda'. <sup>22</sup>Chela' bi bla'a, na' chela' bi bcháljlena' légake', bi bága'gake'

dola', san na'a dan' bla'a nga, bi be zoa da' gak nnágake' che dola' da' zej nbage'e nich yebéj chawé' kwíngake'. <sup>23</sup>No benne' zzoe' neda' chela'ale, lezka' zzoe' Xažo Dios chela'ale. <sup>24</sup>Chela' bi bena' yela' wak zen ka' gan nníta'gake', da' ka' bi ben nitó benne' kan gókgaken, bi bága'gake' dola'. Na'a, blé'egekle' da' ka' bena', na' zzóagake' neda' chela'ale, na' lezka' zzóagake' Xa' chela'ale. <sup>25</sup>Ki goken, bžin da' znnna xtiža' Dios, dan' wzí' lo ná'gake', dan' znnan: "Zzóagake' neda' chela'ale na' bi zoa biz chen'."

<sup>26</sup>'Kate' yedjsoaлен Dios Be' La'y le'e, Ben' zchalje' da' li, Len' gáklene' le'e, na' gon choche' yichj lázdo'le. Nake' Ben' sel'a' chele lo wláz Xažo Dios. Be' La'y ni wzóa lie' chia' neda'. <sup>27</sup>Lezka' le'e wzóa lile chia', dan' wzóalenkzle neda' tzen ža ni'te, na'zejte na'a.

**16** 'Da' ki goža' le'e, nich bi gak chope láže'le. <sup>2</sup>Zin ža kate' kwéjgake' le'e to chi'ize gan zdobgak benne' judío ka' nich yéngekle' xtiža' Dios, na' ža na' gékgekle' cha' gótgake' le'e góngake' xchin Dios. <sup>3</sup>Ki góngake' dan' bizej nónbi'e Xažo Dios, na' dan' bizej nónbi'e neda'. <sup>4</sup>Žapa' le'e da' ki, nich kate' žin ža na', chejsá' láže'le da' ni da' žapkza' le'e, na' bi gak chope láže'le.

### Da' gon Dios Be' La'y

Lezka' wnná Jesusen':

—Da' ki bi goža' le'e ža ni'te, dan' zóalenkza' le'e. <sup>5</sup>Na'a yeyá'a, na' chejsóalena' Xažo Dios, Bennen' bsele'e neda', na' bi nnáblele nitole le'e neda', bi nnale: "¿Gaz chejo'?"

**6**Na'a, dan' žapa' le'e da' ni, žak nyache' láže'le. **7**Neda' žapa' le'e da' naken dot da' li. Gakže chawe' chele cha' yeyá'a. Cha' bi yeyá'a, bi yedjsóalen Dios Be' La'y le'e. Cha' yeyá'a, na' selá'a-ne', na' yedjsóalene' le'e. Le' gáklené' le'e, na' gon choche' yichj lázdo'le. **8**Kate' yide' Le', yesnisle' benách ka' nnítá'gake' yežlyó nga zej nbage'e dola', na' bi zej nónbi'e da' naken chawe', na' Dios choge' chégake' kwia yí'gake'.

**9**Zej nbage'e dola' dan' bi žejlé'gake' chia' neda!. **10**Bi zej nónbi'e da' naken chawe' dan' gótgake' neda', na' yeyá'a gan zoa Xažo Dios, Benne' chawe', na' biž lē'gekle' neda'.

**11**Dios choge' chégake' kwia yí'gake' dan' ba bchoge' che da' xiwe' kwia yin', dan' znna bian' benách ka' nnítá'gake' yežlyó nga.

**12**'Da' zanže žénela' wcháljlena' le'e, san bi gak chejn'iilelen na'a.

**13**Zchalj Dios Be' La'y da' naken dot da' li. Kate' le'e Le', wsedle' le'e yógo'te da' naken dot da' li, dan' bi wchalje' žakze chie', san wchalje' yógo'te da' yenle' dan' nna Xa', na' wzejni'ile' le'e yógo'te da' žala' gaken. **14**Le' gape' neda' ba la'ne, dan' si'e da' naken chia', na' wzejni'ilen' le'e. **15**Yógo'te da' naken che Xažo Dios zej naken chia'. Che len wnnía' si'e da' naken chia', na' wzejni'ilen' le'e.

### Yela' nyache' láže' yeyaken yela' žebél

**16**Lezka' wnná Jesusen':

—Yetó chí'ido'ze, biž lē'elele neda', na' yetó chí'ido'ze yelé'elele neda', dan' yeyá'a gan zoa Xažo Dios.

**17**Naž benne' wsedle chie' ka' belyi'e ljéžgake' toe' yetóe', na' wnnágake':

—iBiz zejlás dan' gože' ſo'o? Wnné': "Yetó chí'ido'ze, na' biž lē'elele neda', na' yetó chí'ido'ze yelé'elele neda', na' naken dan' yeyá'a gan zoa Xažo Dios."

**18**Naž wnnágake':

—iBizkze zejlás da' ni, dan' wnné': "Yetó chí'ido'ze"? Bi žejni'ilto' dan' wnné'.

**19**Žákbe'ele Jesusen' žénegekle' nnábgekle' Le', na' gože' légake':

—iZnnáblele lježle kan nak che dan' wnnía': yetó chí'ido'ze, na' biž lē'elele neda', na' yetó chí'ido'ze yelé'elele neda'? **20**Da' li žapa' le'e: kwéžele, na' gak nyache' láže'le, san benách ka' nnítá'gake' yežlyó nga yebégekle' katen' gótgake' neda'. Naž la'kze gak nyache' láže'le, yela' nyache' láže' chelen' yeyaken yela' žebél katen' yelé'elele neda'.

**21**To no'le kate' za' galj bi'do' chie', zzákali'e, dan' ba bžin ža chie', san kate' ba zoa to zkwide' byodo' chie', biž žejsá' láže'le dan' wzake'e, san žebele' dan' ba golj to zkwide' byodo' yežlyó nga. **22**Lezka' žaken chele. Nak nyache' láže'le na'a, san yelá'a neda', na' yedjwía' le'e, na' naž yebélele, na' bi sáke'le no benne' yeké'e yela' žebél chelen'.

**23**'Ža na' bi be nnábblele neda'. Da' li žapa' le'e: yógo'te da' nnábblele Xažo Dios, na' wkónlele žin la' neda', Le' gonnén' chele. **24**Na' zejte na'a ža bi zkónlele žin la' neda' kate' bi da' znáblele Xažo Dios. Le nnable' ki, na' gata' chele da' nnábblele-ne', nich gak dot li láže' yela' žebél chele.

**Jesús, Benne' Criston', bežoje'  
chawe' lo da' gok chie'**

**25** Lezka' wnná Jesusen':

—Bsaka' leba' katen' bcháljlena' le'e. Žin ža kate' biž wcháljlena' le'e da' wsaka' leba', san kwáselo wcháljlena' le'e kan nak che Xažo Dios. **26-27** Ža na' nnáblele Dios, na' wkónlele žin la' neda', na' žapa' le'e, bi gon byenen gáta'yoela' Xažo Dios lo wlazle le'e, dan' Xažo Dios nži'ile' le'e. Nži'ile' le'e dan' nži'ilele neda', na' žejele'le bžoja' gan zoe' Le'. **28** Bžoja' gan zoa Xažo Dios, na' bla'a yežlyó nga. Yeto' da' gaken, yezá'a yežlyó nga, na' yeyá'a gan zoakze' Le'.

**29** Naž benne' wsedle chie' ka' bely'i e Le', na' wnnágake':

—Na'a kwáselo zchaljo', na' biž žsaka' lebo'. **30** Na'a žákbe'elto' nnézkzelo' Le' yógo'te, na' bi žon byenen no benne' bi da' nnable' Le', dan' zloe'elo' neto' da' za' nnabton'. Che len žejele' to' bžojo' gan zoa Dios.

**31** Bechebe Jesusen', na' gože' légake':

—Žejele'le chia' neda' na'a? **32** Le wia, za' žin ža, na' ba zoažo ža na', katen' gásłasle che chele, na' wka'nle neda' toza', san bi soa' toza', dan' Xažo Dios zóalenkze' neda'.

**33** Da' ki goža' le'e nich ga'n ži yichj lázdo'le, dan' nakle chia' neda'. Gak da' wsaka' zin' le'e yežlyó nga, san le gak choch. Neda' ba bežoja' chawe' lo da' žak yežlyó nga.

**Jesús znnable' Dios gáklene'  
benách chie' ka'**

**17** Kate' beyož bchalj Jesusen'  
da' ki, bchis lawe', na' bwie'  
ya'abale, na' wnné':

—Dios, Xe, ba bžin ža. Ben ga la' law yela' zen chia' neda', Zi'no', nich gak gona' ga la' law yela' zen chio' Le'. **2** Ben ki dan' ba bdio' lo na'a yela' wnná bia' nich nna bi'a yógo'te benách ka', na' wa'a yela' nban da' zejlí kanne chegak yógo'te benne' ka' benno' chia'. **3** Ki gata' yela' nban da' zejlí kanne chégake', cha' zej nónbi'e Le', nako' Dios tlichá', na' lezka' zej nónbi'e neda', Jesúš, Benne' Criston', na' nnézgekle' Le' bselo'o neda'.

**4**' Neda' ba bena' ga nla' law yela' zen chio' yežlyó nga, na' ba beyož bena' žin da' bdio' lo na'a gona'.

**5** Na'a, Xe, ben ga la' law yela' zen da' napa' tzen len Le', na' gata' chia' yela' zen da'gota' chia' tzen len Le' ža ni'te zga'ale kate'gota' yežlyó nga.

**6**' Ba bloe'ela' da' nako' Le' lawgak benne' ki benno' chia', benne' ka' wlejo' ládjwgak benách ka' mnítä'gake' yežlyó nga. Benne' ki gókgake' chio', na' Le' bénngako'-ne' chia', na' žóngake' kan znna xtižo'o. **7** Na'a nnézgekle' yógo'te da' ka' benno' chia' zá'gaken lo no'o Le', **8** dan' ba bdia' lo ná'gake' dižan' da' bdio' Le' lo na'a neda', na' légake' nzi' lo ná'gaken', na' žákbe'egekle' bžoja' gan zo' Le', na' žejlé'gake' bselo'o Le' neda'.

**9**' Neda' žáta'yoela' Le' gáklengako'-ne'. Žáta'yoela' Le', kege gákleno' yógo'te benách ka' nnítä'gake' yežlyó nga, san gákleno' benne' ki benno' chia', dan'zej nake' chio' Le'. **10** Yógo'te benne' ka', benne'zej nake' chia', lezka'zej nake' chio', na' benne' ka'zej nake' chio' lezka'zej nake' chia', na' kanzej nak benne' ka' zloe'e lawn yela' zen chia'.

<sup>11</sup>'Na'a, biž ga'na' yežlyó nga, san benne' ki gá'ngake' yežlyó nga, na' neda' yedjsóalena' Le'. Znnabla' Le', Xe la'y, len yela' wak chio' gape chi'o benne' ki benno' chia', nich gákgake' toze, kan nakžo žo'o toze. <sup>12</sup>Katen' wzóalengaka'-ne' lo yežlyó nga, wdape chí'igaka'-ne', na' bkonla' žin yela' wak che La la'y chio'. Benne' ka' benno' chia', wdape chí'igaka'-ne', na' bi bnita' nitóe', san toze bennen' nake' ka zi'n da' xiwe', bennen' wnitle' to chí'ize. Ki goken, gok da' nyejw le'e yiche la'y.

<sup>13</sup>'Na'a yedjsóalena' Le', san kate' ne zoa' yežlyó nga, zchalja' ki nich gata' yela' žebél chégake' kan žata' chia' neda' yela' žebél.

<sup>14</sup>Neda' ba bdia' lo ná'gake' xtižo'o, na' benách ka' nníta'gake' yežlyó nga zzóagake' benne' ki chela'ale dan' bi žónlengake' légake' tzen, kan nak chia' neda', bi žónlena' benách yežlyó ka' tzen. <sup>15</sup>Žáta'yoela' Le', kege kwejo' benne' ki yežlyó nga, san gape chí'igako'-ne', nich bi chó'ogake' lo na' da' xiwe'. <sup>16</sup>Bi žónlengake' benách yežlyó ka' tzen, kan nak chia' neda', bi žónlena' benách ka' tzen. <sup>17</sup>Bebéj-gake' cheze chio', wkonlo' žin da' nak dot da' li. Da' nak dot da' li na' naken xtižo'o. <sup>18</sup>Kan beno' Le', bselo'o neda' ládjwgak benách ka' nníta'gake' yežlyó nga, lezka' žona' neda', žséla'gaka'-ne' ládjwgak benách ka'.

<sup>19</sup>Dan' nží'igekla'-ne' zde kwina' lo no'o, nich gákgake' cheze chio' dan' nží' lo ná'gake' da' naken dot da' li.

<sup>20</sup>Žáta'yoela' Le', kege chégakze benne' ki, san lezka' chegak benne' ka' chejle'gake' chia' neda' ni'a che da' wchaljgak benne' ki.

<sup>21</sup>Žáta'yoela' Le' gono' ga gákgake' toze yógo'tegake', na' lezka' gákgake' toze len žo'o, kan nako' Le', Xe, nako' toze len neda', na' neda' naka' toze len Le'. Ki žala' gákgake' nich chejle'gak benách yežlyó ka', bséla'kzo' Le' neda'. <sup>22</sup>Yela' ží'i lažen' da' benno' chia', neda' bnezjwan' chégake', nich gákgake' toze, kan nakžo žo'o toze. <sup>23</sup>Le' nako' toze len neda', na' neda' gaka' toze len légake', nich gak dot li laže' kan zej nake' toze, na' nich gónbia'gak benách yežlyó ka', bséla'kzo' Le' neda', na' nží'ilo' benne' ki kan nží'ilo' neda'!

<sup>24</sup>Xe, žénela' yedjsóalengak benne' ki neda', benne' ka' benno' chia', gan chejsóa', nich l'égekle' yela' zen na' da' benno' chia' dan' nží'ilo' neda' ža ni'te, katen' za' gono' yežlyó nga. <sup>25</sup>Xe chawé', benách yežlyó ka' bi zej nónbi'e Le', san neda' nónbia'kza' Le', na' benne' ki nnézgekle' bséla'kzo' Le' neda'. <sup>26</sup>Bena' ga nnézgekle' da' nakkzo' Le', na' gonža' ga nnézgekle' da' ni, nich kan nží'ilo' Le' neda', lezka' ží'igekle' ljéžgake' ka', na' nich gakkza' neda' toze len légake'.

### Želgoxe' Jesús

(Mt. 26:47-56; Mr. 14:43-50; Lk. 22:47-53)

**18** Kate' beyóz bchajl' Jesusen' da' ni, bžoje' ga na', na' benne' wsedle chie' ka' wyéjlengake' Le' tzen. Wdí'e yechelá'a yego Sedrón, na' bžine' gan de to yežlyó, na' wyó'olene' benne' wsedle chie' ka' latjen'. <sup>2</sup>Lezka' Judas, bennen' zdie' Jesusen', nónbi'e latjen' dan' btob Jesusen' benne' wsedle chie' ka' ga na' zan chí'i. <sup>3</sup>Naž Judas na'

bchi'e to kwe' benne' ka' žjake' lo wdile, na' benne' ni'a na'gak bxoz wnná bia' ka', na' benne' ni'a na'gak benne' yodo' fariseo ka', na' jake' gan zoa Jesusen', zej noe'e yi' yež ka', na' ya ntoche' chégake' ka'. <sup>4</sup>Dan' nnézkzele Jesusen' yógo'te da' žala' gaken chie', bžoje' gan zoe', na' gože' légake':

—¿Noz benne' žeyiljle?

<sup>5</sup>Beží'igake', na' belyi'e Le':

—Jesús, benne' Nasaret, žeyiljto'-ne'. Jesusen' gože' légake':

—Nedkzan'.

(Lezka' Judas na', bennen' zdie' Jesusen' lo ná'gake', žónlene' benne' ka' tzen.) <sup>6</sup>Kate' Jesusen' gože' légake': "Nedkzan" naž bebíga'gake', na' wbíxgake' lo yo. <sup>7</sup>Jesusen' wnnable' légake' da' yoble, na' wnné':

—¿Noz benne' žeyiljle?

Belyi'e Le':

—Jesús, benne' Nazaret, žeyiljto'-ne'.

<sup>8</sup>Naž bechebe Jesusen', na' wnné':

—Ba goža' le'e, nedkzan'. Cha' žeyiljle neda', le gonn latje yeyejgak benne' ki.

<sup>9</sup>Ki wnná Jesusen' nich bžin da' bchalje', katen' wnné': "Benne' ki benno' chia', bi bnita' nitóe!"

<sup>10</sup>Naž, dan' nwa' Smon Bedw to ya ntoche', wlejen', na' la' bentie' we' Malko, benne' wen žin che bxoz blo, na' bchoge' yid nage' li ža. <sup>11</sup>Naž Jesusen' gože' Bedon':

—Begó'o ya ntoche' chio' ližen. ¿Bi žala' saka'a dan' wnná Xan' gaken chia'?

### Zžin Jesús law bxoz blo

(Mt. 26:57-58; Mr. 14:53-54; Lk. 22:54)

<sup>12</sup>Benne' ka' žjake' lo wdile len bennen' zchi'e légake', na' benne'

ni'a na'gak benne' judío wnná bia' ka', békwgake' Jesusen', na' bchéjgake' Le'. <sup>13</sup>Naž bché'gake' Le' law Anás, dan' nake' xto' zi'n Kaifás, bennen' nake' bxoz blo yizen'. <sup>14</sup>Kaifás na' nake' bennen' bzejni'ile' benne' judío wnná bia' ka', na' blee'ele' légake' gakže chawé' gat toze benne', na' kege kwia yi' dot yež chégake'.

### Znna Bedw bi nónbi'e Jesús

(Mt. 26:69-70; Mr. 14:66-68; Lk. 22:55-57)

<sup>15</sup>Smon Bedw len yetó benne' wsadle che Jesusen', jake' xkózé'lgak benne' ka' zché'gake' Jesusen', na' bejnáwgake' Le'. Benne' wsadle ni wyó'olene' Jesusen' la' li'a liž bxoz blo, dan' nonbia' bxoz blon' le'.

<sup>16</sup>Bedon' bga'ne' na'le gan žo'ogak benách ka' la' li'a na'. Che len bežój benne' wsadlen' nonbia' bxoz blon' le', na' bcháljlene' no'len' žape chi'e gan žo'ogak benách ka' la' li'a na', na' bene' ga wyó'o Bedon' ga na'.

<sup>17</sup>Naž no'len' žape chi'e gan žo'ogak benách ka' la' li'a na' gože' Bedon', na' wnné':

—¿Lezka' le' žónleno' Bennen' tzen?

Beží'i Bedon', na' wnné':

—Kege neda'.

<sup>18</sup>Dan' žak da' zag, benne' wen žin ka', na' benne' ni'a na'gak benne' yodo' ka', ba bžéngake' yi', na' zégake' žoa'a yin', na' žeché'l kwíngake'. Lezka' Bedon' zélene' légake' tzen, na' žeché'l kwine'.

### Bxoz blo zbeje' Jesús diža'

(Mt. 26:59-66; Mr. 14:55-64; Lk. 22:66-71)

<sup>19</sup>Naž bxoz blo wleje' Jesusen' diža' nich nnezle' no benne'

ka' žónlengake' Le' tzen, na' bi da' žsedle Jesusen' benách ka'.

**20** Bechebe Jesusen', na' gože' le':

—Kwáselo bcháljlena' yógo'te benách ka'. Bsédtezegekla'-ne' gan nak lo yo'o gan zdóbgake' nich yéngakle' xtiža' Dios, na' lezka' lo zchil yodo', gan zdobgak yógo'te benne' judío ka', na' bi be bchalja' ngáche'ze. **21** ČBiz chen' zbejo' neda' diža'? Wléj diža' benne' ka' béngekle' da' bcháljlengaka'-ne'. Bwia nga, nnézgekle benne' ka' dan' bcháljlengaka'-ne'.

**22** Kate' beyóž bchalj Jesusen' da' ni, na' to benne' ni'a na'gak benne' yodo' ka', benne' zoe' ga na', wdape'e žoa'a law Jesusen', na' wnné':

—¿Ki žebi'o law bxoz blon?

**23** Bechebe Jesusen', na' gože' le':

—Cha' bi wnnía' chawe', bloe'el bíz da' wnnía' da' bi naken chawe', na' cha' gok chawe' da' wnnía', čbzí chen' wdapo'o neda'?

**24** Naž Anás na' besele'e Jesusen' nžeje', na' bejzégake' Le' law Kaifás, bennen' nake' bxoz blo.

**Da' yoble znna Bedw bi nónbi'e Jesús**  
(Mt. 26:71-75; Mr. 14:69-72; Lk. 22:58-62)

**25** Kate' ne ze Bedw žoa'a yi', žeché'l kwine', benne' ka' nnítal'gake' ga na' belyi'e le', na' wnnágake':

—¿Lezka' le' žónleno' Jesusen' tzen?

Beží'i Bedon', na' wnné':

—Kege neda'.

**26** Zoa to benne' wen žin che bxoz blo ga na', na' nake' ljež bennen' bchog Bedon' yid nage', na' benne' wen žin ni gože' Bedon':

—Ble'ela' le' lo yežlyón', žónleno' Jesusen' tzen.

**27** Da' yoble beží'i Bedon', na' la' wžéžete leko'.

**Zché'gake' Jesús law Pilato**

(Mt. 27:1-2, 11-14; Mr. 15:1-5; Lk. 23:1-5)

**28** Naž bché'gake' Jesusen', na' bezá'gake' liž Kaifás, na' bžíngake' yolawé' che benne' wnná bia', dan' nzin' Pretorio. Dan' ba ža'ní' ža na', na' benne' judío ka' bi wyó'gake' yolawen' dan' žékgekle' bága'gake' zia cha' chó'ogake' ga na', da' gonen ga bi gak gáwgake' xche' Lni Pasko', lnin' žejsá' láže'gake' kan ben Dios, katen' bebeje' benne' Israel ka' lo yežlyó Egipto. **29** Naž bžoj Pilato, benne' wnná bian', na' ble'e gan nnítal'gake', na' gože' légake':

—¿Biz zia žesbága'le benne' ni?

**30** Beží'igake', na' belyi'e le':

—Chela' bi nbaga' benne' ni zia, bi wdeto'-ne' lawo'.

**31** Naž Pilaton' gože' légake', na' wnné':

—Le'ekze le chi'e, na' le wchi'a laže' e Le' kan znnna da' žsédlele le'e.

Benne' judío ka' belyi'e le', na' wnnágake':

—Bi nzi' lo na'to' gotto' no benne'.

**32** Ka' goken, bžin xtiža' Jesusen', da' wnnié' kan gate'. **33** Naž Pilaton' beyo'e yolawen', na' bliže' Jesusen', na' gože' Le':

—¿Nako' le' benne' nna bi'e benne' judío ka'?

**34** Bechebe Jesusen', na' gože' le':

—¿Zakze chio' znnno' ki, o gožgak benách ka' le' ki naken chia'?

**35** Pilaton' gože' Le':

—¿Žeklo' naka' benne' judío?

Benne' wláz chio' ka', na' bxoz wnná bia' ka', bdégake' Le' lo na'a. ¿Bizkze beno'?

**36** Naž bechebe Jesusen', na' gože' le':

—Znna bi'a neda', san kege kan znna bia'gak benách ka' nníta'gake yežlyó nga. Chela' znna bi'a kan znna bia'gak benách ka', na' tilgak benne' ka' žónlengake neda' tzen, nich bi wé'gake latje no benne' wdié' neda' lo na'gak benne' judío ka'. Kan znna bi'a neda' bi naken kan znna bia'gak benách ka' nníta'gake yežlyó nga.

**37** Naž Pilaton' gože' Le:

—¿Nako' benne' znna bi'e?

Bechebe Jesusen', na' gože' le:

—Naka' kan znno'. Che len golja' yežlyó nga, nich wzóa lia' che da' naken dot da' li. Yogo'te benne' ka', benne' žóngake da' naken dot da' li, zze nággake da' znbia'.

**38** Pilaton' gože' Le:

—¿Bizen' da' naken dot da' li?

### Želchoge' che Jesús gate'

(Mt. 27:15-31; Mr. 15:6-20; Lk. 23:13-25)

Kate' beyóž wnná Pilato ki, bežoje' ga na', na' ble'e da' yoble gan zej nnita' benne' judío wnná bia' ka', na' gože' légake':

—Bi be da' zia bžel-la' da' nbaga' benne' ni. **39** Le'e de to da' žonteze žonle kate' žak Lni Pasko' ni, znnáblele neda' wsana' lo na'le to benne' nyejwe' liž ya. žénelele wsana' lo na'le benne' znna bi'e benne' judío ka'?

**40** Naž wžéžeya'agake' zižje yógo'tegake', na' wnnágake':

—Kege benne' ni, san Barrabás wsano'-ne' lo na'to'.

Barrabásen' nake' benne' wen da' zinnj.

**19** Naž Pilaton' bchi'e Jesusen', na' gože' benne' ka' žjake'

lo wdile chíngake' Le'. **2** Benne' ka' žjake' lo wdile béngeake to da' naken ni'a na' yag yeché' kan nak da' naken oro da' žia yichj benne' wnná bia', na' bžíagaken' yichj Jesusen', na' bwákwgake' Le' to laže' tonn xna kan nak da' žákwgak benne' wnná bia' ka'. **3** Naž wbíga'gake' law Jesusen', na' belyi'e Le:

—iGa'n zeno' le', benne' znna bi'e benne' judío ka'!

Naž wdápa'gake' žoa'a lawe'.

**4** Naž Pilaton' bežoje' da' yoble, na' gože' benne' judío wnná bia' ka', na' wnné':

—Le wia nga, yebeja' bennen' lawle le'e nich nnézlele bi bžel-la' nitó da' zia da' nbage'e.

**5** Naž bžoj Jesusen', na' žia yichje' da' naken ni'a na' yag yechen', na' nakwe' laže' tonn xna na'. Pilaton' gože' légake':

—Nga zoa bennen'.

**6** Kate' bxoz wnná bia' ka', na' benne' ni'a ná'gake' ka' blé'gekle' Jesusen', zižje wžéžeya'agake' da' yoble, na' wnnágake':

—iBde'e le'e yag kroze! iBde'e le'e yag kroze!

Pilaton' gože' légake':

—Le'ekze le chi'e, na' le chejdé'e le'e yag kroze. Neda' bi be da' zia bžel-la' da' nbaga' benne' ni.

**7** Naž benne' judío ka' belyi'e le:

—De cheto' to da' wnnakze Dios da' žsedlen neto', da' znnan žala' gat benne' ni dan' wnné' nake' Zi'n Dios.

**8** Kate' benle Pilaton' da' ni, bžébeže'. **9** Da' yoble beyoé'e lo yolawen', na' gože' Jesusen':

—¿Gazkze benne' Le'?

Bi be bechebe Jesusen'.

**10** Naž Pilaton' gože' Le:

—¿Bi žechebo', na' bi w<sub>lo</sub>e'elo'  
neda' da' žono'? ¿Bi nnezlo' nzi' lo  
na'a wdá'a Le' le'e yag kroze, na' nzi'  
lo na'a wsana' Le'?

<sup>11</sup>Bechebe Jesusen', na' gože' le':  
—Bi be nzi' lo no'o gono' chia'  
chela' bi bde Dios lo no'o yela' wnná  
bia' na'. Che len, bennen' bdie' neda'  
lo no'o nbágaze' zia ka le'.

<sup>12</sup>La' na'ze gónele Pilaton' wsane'  
Jesusen', san wžézeya'agak benne'  
judío wnná bia' ka', na' wnnágake':

—Cha' wsano' benne' ni, bi nžago'  
chawe' benne' Sésar, bennen' znna  
bi'e dot yežlyó nga. No benne' žon  
kwine' benne' wnná bia', zžile' che  
benne' Sésar na'.

<sup>13</sup>Kate' benle Pilaton' da' ni, gože'  
ni'a ne'e ka' chejxí'gake' Jesusen',  
na' wži'e latje chie' gan zchi'a laže'e,  
latjen' nzin' Li'a Ga Žoagak Yej Blag  
Ka', na' ka nak diža' hebreo nzin'  
Gabata. <sup>14</sup>Ža na' naken ža za' žin  
Lni Pasko', na' nak wawbíž. Naž  
Pilaton' gože' benne' judío wnná bia'  
ka', na' wnné':

—Nga zoa bennen' znna bi'e le'e.

<sup>15</sup>Wžézeya'agake' zižje, na'  
wnnágake':

—iBete! iBete! iBde'e le'e yag  
kroze!

Pilaton' gože' légake':

—¿Znnáblele neda' wdá'a bennen'  
znna bi'e le'e le'e yag kroze?

Beži'igak bxoz wnná bia' ka', na'  
wnnágake':

—Bi zoa yetó benne' znna bi'e  
neto'. Toze benne' Sésar znna bi'e  
neto'.

<sup>16</sup>Che len Pilaton' bdie' Jesusen' lo  
ná'gake', nich chejdá'gake' Le' le'e  
yag kroze. Naž békwgake' Jesusen',  
na' bché'gake' Le' na'le.

**Zdá'gake' Jesús le'e yag kroze**  
(Mt. 27:32-56; Mr. 15:21-41; Lk. 23:26-49)

<sup>17</sup>Bžoj Jesusen' ga na', na' noe'e  
yag kroze chie', nich cheje' latjen'  
dan' nzin' Latje Che Žit Yichjžo, na'  
kan nak diža' hebreo nzin' Gólgota.  
<sup>18</sup>Lo latjen' bdá'gake' Jesusen' le'e  
yag krozen', na' bdá'gake' yechope  
benne' le'e yag kroze ka' ga na'.  
Chelá'a weje zej de'e, na' Jesusen'  
de'e gachje lágwe'le gan da'gak chope  
benne' ka'. <sup>19</sup>Pilaton' bsele'e to  
benne' bzoje' to da' bde'e le'e yag  
kroze yichjle Jesusen', da' znnan ki:  
“Jesús, benne' Nasaret, benne' znna  
bi'e benne' judío ka!” <sup>20</sup>Benne' zan,  
benne' judío ka', belgake' dižan',  
dan' nakan gawze žoa'a yež gan  
bdá'gake' Jesusen' le'e yag krozen',  
na' dižan' nyejwn len diža' hebreo,  
na' len diža' griego, na' len diža'  
latín. <sup>21</sup>Bxoz wnná bia' ka' chegak  
benne' judío ka' belyi'e Pilaton', na'  
wnnágake':

—Bi wzojo': “Benne' znna bi'e  
benne' judío ka.” Bzoy ki: “Le' wnné'  
nna bi'e benne' judío ka.”

<sup>22</sup>Beží'i Pilaton', na' gože' légake':

—Da' ba bzoja', to chi'ize bzojan'.

<sup>23</sup>Kate' benne' ka' žjake' lo wdile',  
beyóž bdá'gake' Jesusen' le'e yag  
krozen', na' békwgake' laže' da'  
gokwe'. Wléjgaken' tápele, na' goken  
to kwe' weje da'gota' che chégake'.  
Lezka' békwgake' lažen' da' bxoa  
yen Jesusen', na' lažen' bi ndian, san  
naken to wlize. <sup>24</sup>Naž benne' ka'  
žjake' lo wdile, belyi'e ljéžgake' toe'  
yetóe', na' wnnágake':

—Bi chogžon, san gakže chawe'  
kwejžo da' gak bian', nich nnezlžo  
nolžo gaken chežo.

Ka' goken, bžin dan' nyejw le'e  
yiche la'y, da' znnan:

Wdísgake' laže' nakwa' che  
chégake',  
na' che laže' chia' wléjgake' da'  
nak bian'.

Ki bengak benne' ka' žjake' lo wdile.

<sup>25</sup>Gawze gan da' Jesusen' le'e yag  
krozen' wnnít'a'gak no'le ka'. Zej  
nake' xne'e, na' no'le bile xne'e, na'  
Lia, zo'le Kleofas, na' Lia Madlen.

<sup>26</sup>Kate' Jesusen' ble'ele xne'e, na'  
lezka' ble'ele benne' wsedle chie',  
bennen' nži'ile', zoe' ga na', gože'  
xne'e:

—Nó'ledo', bwia zi'no' zoe' kwito'  
le'.

<sup>27</sup>Naž gože' benne' wsedle chie'  
na':

—Bwia, xno'o zoe' kwito' le'.

La' ža na'ze benne' wsedlen' bchi'e  
le' nich chejsó'e liže'.

<sup>28</sup>Wdé na', dan' nnézkzele Jesusen'  
yógo'te ba goken, na' nich žin da'  
nyejw le'e yiche la'y, wnné':

—Zbilá' nis.

<sup>29</sup>De to že'e ga na', da' yožen nop  
zichj. Naž to benne' žeje' lo wdile  
besbise' to da' błol len nop zichjen',  
na' bzoen' law to ya xtil, na' bde'en  
žoa'a Jesusen' nich xopen!. <sup>30</sup>Beyóž  
we'j Jesusen' nop zichjen', na' wnné':

—Ba nakten.

Naž bzechwe' yichje'. Bežojte be'  
nakkze', na' gote'.

**Benne' žeje' lo wdile žadwe'  
yag ntoche' le'el sina' Jesús**

<sup>31</sup>Naž, dan' nak ža za' žin Lni  
Pasko', na' dan' bi žala' ga'ngak  
benne' gat ka' le'e yag kroze ka' kate'  
nak ža la'y chégake', na' naken to  
ža la'y zente, che len benne' judío

ka' góta'yoegakle' Pilaton' yi'e benne'  
ka' žjake' lo wdile, chejtíchjwgake'  
xkachjgak benne' ka' dágake' le'e  
yag kroze ka', na' wetíngake' légake'  
le'e yag kroze ka'. <sup>32</sup>Che len benne'  
ka' žjake' lo wdile wbíga'gake' ga  
na', na' bdíchjwgake' xkachje benne'  
nežw, na' lezka' bénge' che yetó  
bennen' dálene' Jesusen' le'e yag  
kroze. <sup>33</sup>Kate' bžíngake' gan da'  
Jesusen', blé'egakle' ba gote', na' bi  
bdíchjwgake' xkachje'.

<sup>34</sup>Naž to benne' žeje' lo wdile  
godwe' yag ntoche' chie' le'el sina'  
Jesusen', na' la' bžožte žen, na' nis.

<sup>35</sup>Neda', Zwa, ble'ela' da' ni, na' zzoa  
lian', na' da' znnia' naken dot da' li.  
Nnézkzela' zchalja' da' naken dot  
da' li, nich lezka' le'e chejle'le che  
Jesusen'. <sup>36</sup>Ki goken, bžin da' nyejw  
le'e yiche la'y, da' znnan: "Bi gachjw  
nitó žit yoe'e." <sup>37</sup>Yetó da' nyejw le'e  
yiche znnan ki: "Wíagake' bennen'  
godwe' Le' yag ntoche'."

### Zkáche'gake' Jesús lo yežw ba

(Mt. 27:57-61; Mr. 15:42-47; Lk. 23:50-56)

<sup>38</sup>Wdé gokgak yógo'te da' ki,  
Jwsé, to benne' yež Arimatea,  
benne' žónlene' Jesusen' tzen, san  
ngáche'ze dan' zžebe' benne' judío  
wnná bia' ka', wyeje', na' wnnable'  
Pilato we'e le' latje yeké'e Jesusen'.  
Pilaton' bi'e le' latje. Naž bla' Jwsén'  
gan da' Jesusen' le'e yag krozen',  
na' beké'e Le'. <sup>39</sup>Lezka' Nikodemo,  
bennen' zga'ale bejwíe' Jesusen'  
žel, ble'e ga na', na' noe'e to nežw  
sla' che yag mirra, da' nchixen to  
da' zla' zix, da' naken ka to gaywá'  
ya. <sup>40</sup>Naž Jwsén' len Nikodemon'  
betínngake' Jesusen', na' bchél'gake'  
Le' láže'do' ka', na' bdébgake' lawn

nežw slan' che mirra, da' nchixen  
da' zla' zix. Béngake' kan žónteze  
žongak benne' judío ka' kate'  
zkáche'gake' benne' gat ka'. <sup>41</sup>Gawze  
gan bdá'gake' Jesusen' le'e yag kroze  
de to yežlyó, na' gachje láwe'le  
yežlyón' zoa to yežw ba kobe da'  
nádjwgaken' le'e ya'a yej, na' lo  
yežw ban' bi na' gache' nitó benne'.  
<sup>42</sup>Wló'ogake' Jesusen' lo yežw ban'  
dan' žen' gawze, na' dan' nak ža  
zkwezgak benne' judío ka' che Lni  
Paskon'.

### Jesús žebane' lo yela' got

(Mt. 28:1-10; Mr. 16:1-8; Lk. 24:1-12)

**20** Kate' ba nak zildo' ža nežw,  
na' ne nak chol, wyéj Lia  
Madlen žoa'a yežw ban', na' ble'ele'  
ba bkwas yej blag da' bsejwn gan  
žo'o no benne' lo yežw ban'. <sup>2</sup>Naž  
taría taría beyéj Lian' gan zoa Smon  
Bedw, na' zoaļen yetó benne' wsedle  
le', bennen' Jesusen' nži'ilé' le', na'  
gože' légake':

—iBebéjgake' Xanžon' lo yežw ban',  
na' bi nnezlto' gan wló'ogake' Le'

<sup>3</sup>Naž bžoj Bedon' len yetó benne'  
wsedlen', na' jake' žoa'a yežw ban'.

<sup>4</sup>Tzen wzál'e'gake', san yetóen'  
taríaže wzé'e ka Bedon', na' zga'ale'  
le' bžine' žoa'a yežw ban'. <sup>5</sup>Byechwe',  
na' bwie' lo yežw ban', na' ble'ele'  
láže'do' ka' da' bchélga'ken' Jesusen',  
da' ka'zej nnitan' ga na', san bi  
wyoé'e lo yežw ban'. <sup>6</sup>Wdé na'  
bla' Smon Bedon' xkóže'le benne'  
wsedlen', na' wyoé'e le' lo yežw ban',  
na' ble'ele' láže'do' ka'zej nnitan'  
ga na'. <sup>7</sup>Lezka' ble'ele' láže'don' da'  
bchélga'ken' yichj Jesusen', na' bi  
žé'lenen yezika' láže'do' ka', san  
chela'ale ndoben. <sup>8</sup>Naž wyó'o benne'

wsedlen', bennen' bžine' zga'ale'  
žoa'a yežw ban', na' ble'ele' kan  
naken, na' bejli'e da' wnná Jesusen'.  
<sup>9</sup>Ka' goken, dan' bi na' chejní'ilé'  
da' nyejw le'e yiche la'y kan žon  
byenen gaken che Jesusen', da'  
znnan yebane' lo yela' got. <sup>10</sup>Naž  
žopte benne' wsedle ka' beyéjgake'  
lížgake'.

### Zloe'e law Jesús law Lia Madlen

(Mr. 16:9-11)

<sup>11</sup>Bga'n Lia kwitle yežw ban', na'  
zbeže'. Kate' ne zbeže', byechwe', na'  
bwie' lo yežw ban'. <sup>12</sup>Ble'ele' chope  
wbás che ya'abá che Dios nníta'gake'  
ga na', na' zej nakwe' laž' chich.  
Žé'gake' ga na', toe' yichjle yežw  
ban', na' yetóe' xní'ale yežw ban'  
gan wló'ogake' Jesusen'. <sup>13</sup>Wbás che  
ya'abá ka' belyi'e le', na' wnnágake':

—Nó'ledo', čbz chen' zbežo'?

Lian' gože' légake':

—Dan' beká'agake' Xana', na' bi  
nnezla' gan wló'ogake' Le'.

<sup>14</sup>Kate' beyóž wnné' ki, bwie'  
xkóže'le', na' ble'ele' Jesusen', zoe' ga  
na', san bi gókbe'ele' cha' Jesusen'.

<sup>15</sup>Naž Jesusen' gože' le':

—Nó'ledo', čbz chen' zbežo'? Nož  
benne' žeyiljo?

Dan' žekle Lian' nake' Le' benne'  
žape chi'e yežlyón', na' gože' Le':

—Benne', cha' le' bebejo'-ne',  
blo'el neda' gan wló'o-ne', na' neda'  
yeyoá'a-ne'.

<sup>16</sup>Naž Jesusen' gože' le':

—Lia.

Naž byechj Lian', na' len diža'  
hebreo gože' Le':

—Raboní.

Diža' hebreo ni znnan: "Benne'  
Wsedle chia!"

<sup>17</sup>Jesusen' gože' le':  
—Bi kano' neda', dan' bi na' yeyepa'  
gan zoa Xa'. Na'a, wyéj gan zej  
nnita' benne' ljéza'do' ka', na' gož-  
gake': “Ki wnná Jesusen': yeyepa'  
gan zoa Xa', na' lezka' nake' Xale.  
Nake' Dios chia', na' Dios chele.”

<sup>18</sup>Naž wyéj Lia Madlen', na'  
bezenle' benne' wsedle ka' che  
Jesusen' ba bele'ele' Xanžon', na' kan  
nak dan' wnné'.

### Zloe'e law Jesús lawgak benne' wsedle chie' ka'

(Mt. 28:16-20; Mr. 16:14-18; Lk. 24:36-49)

<sup>19</sup>Kate' ba gole ža na', da' naken  
ža nežw, zej ndobe benne' wsedle  
ka' che Jesusen', na' nyejw yo'o gan  
nníta'gake' dan' zžébegake' benne'  
judío wnná bia' ka'. Naž bloe'e  
law Jesusen' gachje lámwe'le gan  
nníta'gake', na' gože' lágake':

—Ga'n ži yichj lázdo'le.

<sup>20</sup>Kate' beyóž gože' lágake' da' ni,  
bloe'e'le' lágake' ne'e, na' le'el sine'e'.  
Naž bebegekle benne' wsedle chie'  
ka' dan' želé'egekle' Xanžon'. <sup>21</sup>Naž  
Jesusen' gože' lágake' da' yoble, na'  
wnné':

—Ga'n ži yichj lázdo'le. Kan ben  
Xa', bsele'e neda', lezka' žsel'a le'e  
chjenle xchina'.

<sup>22</sup>Kate' beyóž wnné' da' ni, blobe'  
lámwak', na' gože' lágake':

—Le si' lo na'le Dios Be' La'y. <sup>23</sup>No  
benne' yenít lawle, bennen' ben  
dola', ba yo'o yela' ženít law chie',  
na' no benne' bi yenít lawle le', ga'n  
dola' da' nbaga' benne' wen dolan'.

### Bi žejlé' Mas bebán Jesús

<sup>24</sup>Mas bi wzóalene' lágake' katen'  
Jesusen' bedjwíe' lágake'. Nak

Masen' to benne' chežinnoe' ka', na'  
lezka' lie' Benne' Kwach. <sup>25</sup>Wdé na'  
yezika' benne' wsedle ka' bely'i'e  
Masen', na' wnnágake':

—Ba ble'elto' Xanžon'.

Masen' gože' lágake':

—Cha' bi le'ela' ne'e gan bdin  
bdidjwn', na' wdía' xben na'a gan bdin  
bdidjwn', na' wdía' na'a le'el sine'e gan  
bdin yag ntochen', bi chejli'a.

<sup>26</sup>Kate' ba gok yexono' ža, benne'  
wsedle chie' ka' zej ndobe' da' yoble  
lo yo'on', na' zoalen Masen' lágake'.  
La'kze nyejw yo'o gan nníta'gake',  
bloe'e law Jesusen' gachje lámwe'le  
gan nníta'gake', na' gože' lágake':

—Ga'n ži yichj lázdo'le.

<sup>27</sup>Naž Jesusen' gože' Masen', na'  
wnné':

—Bde xben no'o nga, na' bwia na'a  
nga. Bde no'o le'el sina'a nga, na' biž  
gak chope lažo'o, san bejlé' chia'.

<sup>28</sup>Naž bechebe Masen', na' gože' Le':

—Xána'do', na' Dios chia'.

<sup>29</sup>Jesusen' gože' le':

—Mas, dan' ble'elo' neda', žejli'o.  
Ba nez zen gaken chegak benne' ka'  
chejlé'gake' chia' la'kze bi le'egakle' neda'.

### Da' žénele gon da' nyejw le'e yiche ni

<sup>30</sup>Ben Jesusen' da' zanže yela' wak  
zen ka' lawgak benne' wsedle chie' ka',  
da' ka' bi zej nyejwn le'e yiche ni. <sup>31</sup>Da'  
ki bzoja' le'e yiche nich chejle'le nak  
Jesusen' Benne' Criston', Bennen' bsela'  
Dios, na' nake' Zi'nkze Dios, na' kate'  
chejle'le chie', gata' yela' nban da' zejlí  
kanne chele dan' žejle'le chie' Le'.

### Zloe'e law Jesús lawgak gaže benne' wsedle chie' ka'

**21** Wdé gok da' ki, bloe'e law  
Jesusen' da' yoble lawgak

benne' wsedle chie' ka' gan nak  
žoa'a nisdo' da' nzin' Nisdo' Che  
Tiberias, na' ki goken kan b<sub>lo</sub>e'e  
l<sub>aw</sub>e' l<sub>awg</sub>ake'. <sup>2</sup>Zej ndobe Smon  
Bedw, na' Mas, bennen' lezka' lie'  
Benne' Kwach, na' Natanael, benne'  
yež Kaná, yežen' nbaben Galilea, na'  
lezka' zi'n Sebedeo ka', na' yechope  
benne' wsedle ka' che Jesusen'.

<sup>3</sup>Smon Bedwn' gože' l<sub>ég</sub>ake':

—Cha'a chejxena' bel ka'.

Yezika' benne' ka' belyi'e le', na'  
wnnágake':

—Sá'lento' le'.

Naž jake', na' wžéngake' to  
lo barkw, na' yelen' nitó bel bi  
wžéngake'. <sup>4</sup>Kate' za' ža'ní', bejsé'  
Jesusen' žoa'a nisdon', na' benne'  
wsedle chie' ka' bi gókbe'egekle' cha'  
Jesusen'. <sup>5</sup>Naž Jesusen' gože' l<sub>ég</sub>ake':  
—Zí'na'do' ka', čbi de bel chele?

Bež'i'gake', na' belyi'e Le':

—Nitoba'.

<sup>6</sup>Naž Jesusen' gože' l<sub>ég</sub>ake':

—Le wsé yixjw bel chele chelá'a li  
ža barkwn', na' senle-ba'.

Naž bségaken', na' biž gok  
yeká'agaken', dan' nža'te yixjw na'  
bel ka'. <sup>7</sup>Naž benne' wsedle, bennen'  
nži'il Jesusen', gože' Bedon', na'  
wnné':

—iXanžon'!

Kate' benle Smon Bedon',  
“Xanžon” beyakwe' laže' gokwe', da'  
beké'en zga'ale, na' wyaze' lo nis.

<sup>8</sup>Yezika' benne' wsedle ka' bsá'gake'  
barkwn', na' bedjzóbgake' yixjw'n'  
dan' nža'ten bel ka'. Bi nak zi'to' gan  
de yo biž, da' nakze ka to gaywá'  
lka' ní'ažo. <sup>9</sup>Katen' bžíngake' lo yo  
bižen', na' blé'egekle' že' to yi' balje  
ga na', na' ſoa to bel lawen', na'

lezka' de yet ga na'. <sup>10</sup>Jesusen' gože'  
l<sub>ég</sub>ake':

—Le yedjwá' bel ka' ba wzéngakleba'  
ga zoa' ni.

<sup>11</sup>Bebén Bedon' lo barkwn', na'  
wzobe' yixjwn' zaka' lo yo bižle,  
na' nža'ten bel ži'a ka', to gaywá'  
chonne-yonba'. La'kze zej nak bel  
zanle'e, bi bžeza' yixjwn'. <sup>12</sup>Naž  
Jesusen' gože' l<sub>ég</sub>ake':

—Le da gawle.

Nitó benne' wsedle chie' bi  
bežogle' nnable' Le', bi nne': “¿Noz  
Le?” Nnézkzegekle' nake' Xanžon'.  
<sup>13</sup>Naž wbiga' Jesusen', na' bexwe'  
yet ka', na' lezka' bel na', na' bi'en  
chégake'.

<sup>14</sup>Da' ni naken da' chonne chi'i  
blo'e e law Jesusen' lawgak benne'  
wsedle chie' ka' wdé bebane' lo yela'  
got.

### Jesús zcháljlene' Smon Bedw

<sup>15</sup>Kate' beyož bdáwgake', Jesusen'  
gože' Smon Bedw:

—Smon, zi'n Jonás, čnží'iželo'  
neda' kan zej nži'il benne' ki neda'?

Bechebe Bedon', na' gože' Le':

—O', Xan. Le' nnézkzeló' nži'ilá' Le'.  
Jesusen' gože' le':

—Bwaw zíla'd' chia' ka'.

<sup>16</sup>Jesusen' gože' le' da' chope chi'i,  
na' wnné':

—Smon, zi'n Jonás, čnží'ilo' neda'  
dot lažo'o?

Bechebe Bedon', na' gože' Le':

—O', Xan. Le' nnézkzeló' nži'ilá' Le'.  
Jesusen' gože' le':

—Bwaw zíla' chia' ka'.

<sup>17</sup>Jesusen' gože' le' da' chonne  
chi'i:

—Smon, zi'n Jonás, čnží'ilo' neda'?

Gok nyache' laže' Bedon' dan'  
chonn chi'i wnnable' le', na' wnné':  
“čNž'iilo' neda?” na' bechebe Bedon'  
na' gože' Le':

—Xan, yógo'te nnézkzelo' Le'.  
Nnezlo' nž'iila' Le'.

Jesusen' gože' le':

—Bwaw žila' chia' ka'. <sup>18</sup>Da' li žapa'  
le', katen' goko' žkwide', žakze chio'  
bwakw kwino', na' kan znnazen  
chio' wdó'. Kate' golo', wlío' no'o, na'  
benne' yoble wakwe' le' laže', na'  
chiae' le' gan bi yénelo' chejo'.

<sup>19</sup>Da' ni wnná Jesusen' nak bian'  
kan gat Bedon', dan' chejté'e le'e  
yag kroze, nich ga'n zen Dios. Kate'  
beyőž wnná Jesusen' ki, yetó da'  
wnné':

—Benlen neda' tzen.

Zchalj Jesús kan gak che benne'  
wsedlen', bennen' nž'iile'

<sup>20</sup>Byechj Bedon', na' ble'ele'  
benne' wsedlen' Jesusen' nž'iile'  
le', zedjnawe' légake'. Nake' benne'

wsedlen' wži'e kwit Jesusen' katen'  
bdáwgake', na' gože' Jesusen': “Xan,  
čnoz bennen' wdíe' Le?” <sup>21</sup>Kate'  
Bedon' ble'ele' le', gože' Jesusen':

—Xan, čbiž gon benne' ni?

<sup>22</sup>Jesusen' gože' le':

—Cha' žénela' ga'n bennen' kate'  
yela'ža', bi žala' gek zedlo'. Benlen  
neda' tzen le'.

<sup>23</sup>Wzé diža' ni gan zej nnita'  
lježžo ka', benne' ka' žejl'é'gake' che  
Jesusen'. Žékgekle' bi gat benne'  
wsedlen'. Jesusen' bi gože' le' bi  
gate', san ki wnné': “Cha' žénela'  
ga'n bennen' kate' yela'ža', bi žala'  
gek zedlo.”

<sup>24</sup>Benne' wsedlen' naka' neda',  
Zwa. Zzoa lia' da' ki, na' bzoja' le'e  
yiche da' ki, na' nnézlele da' znnia'  
naken dot da' li.

<sup>25</sup>Ben Jesusen' da' zanže ka'.  
Chela' no benne' wzoje' légaken le'e  
yiche to ton, žekla' bi gata' latje  
yežlyó nga ga kwa'gak yiche ka'  
žala' wzojen'. Ka'kze naken.

# DA' BENGAK BENNE' WBÁS KA' CHE CRISTO

---

Dios žone' da' bchebe laže'e,  
žsele'e Dios Be' La'y

**1** Kate' bzoja' chio' le' zga'ale,  
Teófilo, benne' zaka', neda',  
Lukas, bzoja' yógo'te da' wzó law  
Jesusen' žone', na' žsedle', <sup>2</sup>na' zejte  
beyepe' ya'abá che Dios. Kate' za'  
yeyepe' ya'abán', ne zoālen Dios  
Be' La'y Le', wnné' kan žala' gongak  
benne' wbás chie' ka', benne' ka'  
wžekze' Le'. <sup>3</sup>Wdé wzaka' Jesusen',  
na' gote'. Naž bebane', na' bloe'e  
lawe' lawgak benne' wbás chie'  
ka'. Bloe'e lawe' lawgake' da' zan da' gok  
biá'gaken zoe' nbane', da' ka' bi gak  
no benne' wži'e chégaken. Zan chi'i  
bloe'e lawe' lawgake' dot choplalj  
ža, na' bcháljlene' légake' kan znna  
bia' Dios.

<sup>4</sup>Katen' wnnít'a'gake' tzen, gože'  
légake' bi yekwásgake' lo yež  
Jerusalén, na' wnné':

—Le kwez ga na' da' bchebe laže'  
Xa' sele'e chele, kan ba bzenla' le'e.

<sup>5</sup>Lezka' wnné':

—Da' li Zwa bezóe' benách ka'  
nis lo nis, na' bi de yeschá gak  
chele da' zloe'l yela' žezóa nisen',  
dan' yide Dios Be' La'y yedjsóalene'  
le'e.

Žeyepe Jesús ya'abá che Dios

<sup>6</sup>Naž benne' ka' zej ndobe' gan  
zoa Jesusen' wnnábgekle' Le', na'  
wnnágake':

—Xan, ċongo' ga nna bia'gak  
benách Israel ka' da' yoble ža ni  
zoažo na'a?

<sup>7</sup>Jesusen' gože' légake':

—Bi nak chele nnézlele bi ža o bi  
yel gon Dios Xa', da' yo'on lo na'kze'.

<sup>8</sup>Si'le le'e yela' wak kate' yide  
Dios Be' La'y yedjsóalene' le'e. Naž  
wchaljle kan nak chia' neda' lo yež  
Jerusalén, na' dot gan nbab Judea,  
na' gan nbab Samaria, na' ga žíntele  
dot yežlyó nga.

<sup>9</sup>Kate' beyóž bcháljlene' légake'  
da' ni, na' kate' ne zwíagake'  
Le', la' beyeptie' lo be'ze gan  
že' to bejw da' bkachen' Le', na'  
biž blé'gekle' Le'. <sup>10</sup>Kate' ne  
zwíagake' ya'abale kate' ne žeyepe  
Jesusen', bla'gak chope wbás che  
ya'abá ka' gan nnít'a'gake', wbás  
ka' zej nakwe' laže' zíla'do'ze.

<sup>11</sup>Zoptie' góžgake' légake', na'  
wnnágake':

—Benne' Galilea ka', ċbiž chen'  
zwíale ya'abale? Yela'kze Jesusen'  
da' yoble kan ba blé'elele-ne' katen'

bezé'e gan zoale nga, na' beyepe' ya'abá che Dios.

### Zbégake' Matías nich chaze' latje che Judas

<sup>12</sup>Naž benne' ka', benne' bénlengake' Jesusen' tzen, bezá'gake' gan zoa ya'adon' da' nzin' Ya'a Yag Olibo, na' beyéjgake' lo yež Jerusalén. Ya'adon' zoan gawze gan že' yež Jerusalén na', da' naken kan zej nzi'e latje želzé'e že la'y chégake'. <sup>13</sup>Kate' bežíngake' lo yežen', belbene' gan nak da' chope kwia lo yo'o, gan zej nnita' Bedw len Jakob, na' Zwa, na' Ndres, na' Lip, na' Mas, na' Bartol, na' Matío, na' Jakob, zi'n Alfeo, na' Smon, bennen' že' laže'e yež chie', na' lezka' Judas, biche' Jakoben'. <sup>14</sup>Yógo'te benne' ki bcháljlengake' Dios tzen. Benne' biche' Jesús ka' len Lia, xna' Jesusen', na' yebale no'le ka', bénlengake' légake' tzen.

<sup>15</sup>La' že na'ze wzé Bedon' gachje láwe'le gan zej nnita' lježjo ka', benne' žejlé'gake' che Benne' Criston'. Gokgak ka xoplalj benne' ka' zej ndobe' ga na'. <sup>16</sup>Bedon' gože' légake', na' wnné':

—Ljéža'do' ka!. Ben byenen gok da' nyejw le'e yiche la'y, kan wnná Dios Be' La'y zgá'atele, dan' bzoj Dabí kan gok che Judas, bennen' bchi'e benne' ka' wzéngake' Jesusen'. <sup>17</sup>Judas na' wbáblene' že'o, na' bénlene' že'o tzen žin ni. <sup>18</sup>Wzí'gake' to yežlyó len lazjw che da' zia da' ben bennen'. Judas na' wbixe', na' wžeza' li'e, na' bžojgak yógo'te da' zej že' li'e. <sup>19</sup>Kate' benne' ka', benne' nnítal'gake' lo yež Jerusalén béngekle' da' ni, naž bé'gake' la

yežlyón' Aséldama, to diža' hebreo da' znnan len diža' xiža': "Yežlyó Che Žen." <sup>20</sup>Ka' goken che Judas na', kan nyejw le'e yiche la'y da' nzin' Salmo Ka', da' znnan:

Bga'n liže' ka'ze,  
na' bi bžel no benne' zoe' lo  
yo'on'.

Lezka' znnan:

Benne' yoble yedíe' lo wlaze'.

<sup>21-22</sup>'Na'a žon byenen kwežo to benne' gónlene' že'o tzen nich wzóa lie' che Jesusen', kan bebane' lo yela' got. Žala' gake' to benne' nbabe' benne' ka' bénlengake' že'o tzen že ni'te katen' Xanžo Jesusen' wdálene' že'o, benne' ka' wnnítal'engake' že'o katen' Zwa bezóe' benne' ka' nis, na' zejte že beyepe Jesusen' ya'abá che Dios, katen' bezé'e gan zoažo.

<sup>23</sup>Naž wléjgake' chope benne' ka', Jwsé, na' Matías. Jwsén' lezka' lie' Sabás, na' zoa yetó le' Justo. <sup>24</sup>Naž bcháljlengake' Dios, na' wnnágake':

—Xanto' Dios, nónbia'kzo' yichj lázdo'gak yógo'te benách. Bloe'el neto' nole benne' chope' ki ba wžekzo' Le', <sup>25</sup>nich gone' žin ni, na' gake' wbás chio', nich chaze' latje che Judas, bennen' bnite' latje chie' dan' bene' dola', na' wyeje' latje chekze' lo latje chol.

<sup>26</sup>Naž bžójgake' lágake' le'e yiche ka', to che Jwsé, na' yetó che Matías. Bchíxegake' da' ka', na' bebéjgake' ton, gan nyejw la Matías. Ka' goken, Matíasen' wbáblene' yechinéj benne' wbás ka' che Benne' Criston'.

Dios Be' La'y žedjsóalene'  
benne' ka' che Benne' Cristo

**2** Kate' ba bžin že Pentecostés,  
zej ndobe' tzen yógo'te benne'

ka' žejlé'gake' che Benne' Criston'.  
**2** Cholze benle žak žaxto' da' bžojen ya'abá, da' benlen kan ženle kate' žak to be' wale, na' benlen dot lo yo'o gan žé'gake'. **3** Bla' lawgak yi'do' ka' lo be'ze lawgake', na' wdísgaken che chégake', na' bejsóalengaken légake'. **4** Dios Be' La'y bedjsóalene' yógo'tegake', na' wzó lawgake' zcháljgake' diža' yoble ka', kan nak da' bnezjw Dios Be' la'y che chégake'.

**5** Kate' ža na' wnníta'gak benne' judío ka' lo yež Jerusalén, benne' ka' zka'n zéngake' Dios, na'zej nžoje' yógo'te yež dot yežlyó nga. **6** Kate' benne' zan ka' béngekle' žak žaxton', bdóbgake' ga na', na' gok zédgekle', dan' béngekle' zcháljgak benne' ka' žejlé'gake' che Benne' Criston' len diža' che chégake'. **7** Yógo'tegake' béngeklen', na' bebángekle', na' wnnágake':

—Le wia nga. ¿Kege benne' Galilea ka' yógo'te benne' ki zcháljgake'? **8** ¿Nakxkzen' ženlžo zcháljgake' xtíža'žo da' zcháljžo to tožo? **9** Žo'o nga nakžo benne' yež zan, benne'zej nžoje':

Gan nbab Partia, na' gan nbab Media.

Gan nbab Elam, na' gan nbab Mesopotamia.

Gan nbab Judea, na' gan nbab Kapadosia.

Gan nbab Ponto, na' gan nbab Asia.

**10** Gan nbab Frijia, na' gan nbab Panfilia.

Gan nbab lo yežlyó Ejipto.

Gan nbab Áfrika, gan zoaže zi'to' gan nbab Cirene.

Lezka'zej nnita' benne' yež Roma ka' nga. Bale'zej nake' benne' judío

ka', na' yebaše' nzi' lo ná'gake' da' žejlé'gak benne' judío ka' che Dios. **11** Lezka'zej nnita' benne' ka' nga, benne'zej nžoje' yežlyó Creta, na' gan nbab Arabia. Ženlžo zcháljgake' diža' che chežo, na' želzenle' žo'o da' zen ka' da' ben Dios, da' žóngaken ga žebán láže'zo.

**12** Ka' goken, bebángekle' yógo'tegake', na' benne' zanle'e ka' gok zédgekle'. Belyi'e ljéžgake' toe' yetóe', na' wnnágake':

—¿Bizkzen' da' žaken?

**13** Bale' ben dítjgekle' benne' ka' zcháljgake' diža' yoble ka', na' wnnágake':

—Želzózele'.

**Da' bchalj Bedw lawgak benách ka'**

**14** Naž Bedw wzélene' yechinéj benne' wbás ka' sela'a Benne' Criston', na' wzó lawe' znnie' zižje, na' gože' légake':

—Le'e, benne' ka' che gan nbab Judea, na' yógo'tele zoale lo yež Jerusalén nga. Da' ni žala' nnézlele. Le wzé nag da' yapa' le'e. **15** Neto' bi zzožleto' kan žéklele le'e, dan' ne zoažo xsile, na' bi zzožle nitó benne' ka na'a. **16** Da' ni da' žaken naken dan' wnná Joel, bennen' bchalje' lo wláz Dios ža ni'te, katen' wnné':

**17** Ki wnná Dios:

Da' ni gaken ža ze lawte ža ka'.

Sela'a Be' La'y chia'.

Chejsóalene' yógo'te benách ka'.

Zi'nlé ka', benne' byo ka', na'

no'le ka', wcháljgake' lo wlaza' neda'.

Le'e dáwe'gekle xkwide' ka' da' wloe'la' law,

na' benne' gole ka' nnégekle' yele.

- <sup>18</sup> Kate' žin že na' chisa' Be' La'y chia', na' chejsóalene' wen žin chia' ka', benne' byo ka', na' no'le ka', na' wcháljgake' lo wlaza' neda'.  
<sup>19</sup> Wloe'ela' law ya'abá ža'le da' ka' góngaken ga yebángekle benách ka', na' lo yežlyó že'le wloe'ela' law da' ka'zej nak bian', da' ka'zej naken žen che we', na' yi', na' žen che yin'.  
<sup>20</sup> Chol wbíž, na' gak byo' xna kan nak žen. Ki gaken kate' za' žin že na' Dios ba bло'e'len. Gak že na' ka da' batkle ble'el-len.  
<sup>21</sup> Yelagak yógo'te benne' ka' wlížgake' La Xanžon' cha' chejlé'gake' chie' Le'.  
<sup>22</sup> 'Le wzé nag da' ni da' žapa' le'e, benne' Israel ka'. Dios na'kze wdape' Jesúš, benne' Nasaret, ba la'ne, lawle le'e. Dios bi'e Le' latje bene' da' ka' žóngaken ga žebán láže'žo, da'zej naken yela' wak ka', na' da' ka'zej nak bian'. Yógo'te da' ki ben Dios lo na' Jesusen', kan ba nnézkzelele le'e. <sup>23</sup> Lezka', Dios bi'e to benne' latje bdie' Jesusen' lo na'le. Ka' goken, kan gónekzele Dios gaken, na' kan nak da' bkweze' že ni'te. Le'ekze wženle Jesusen', na' bdele-ne' lo na'gak benne' wen da' zinnj ka', benne' ka' bétgake' Le' katen' bdá'gake' Le' le'e yag kroze.  
<sup>24</sup> Naž Dios na'kze besbane' Jesusen', na' beslé' Le' lo yela' got, dan' bi gok ga'ne' to chi'ize lo yela' gotten'. <sup>25</sup> Kan nak da' ni, Dabí bchalje' lo wláz Dios že ni'te kan nak che Jesusen', na' wnné':

Blé'etezela' Xanžon', na' wzóe' lawa'. Le' zoe' kwita' li že, na' noxe' neda', nich bi gak no benne' bi da' gone' chia'.  
<sup>26</sup> Che len bebéle'ela', na' lo yela' žebél chia' bela'. Che len wxén laža'a Le' na' zejté že gata'.  
<sup>27</sup> Xana' Dios, nnezla' bi wka'no' neda' latje chol chegak benne' gat ka'. Bi go'o latje kwia yi' bela' žen chia'. Naka' benne' nží'ikzelo' Le'.  
<sup>28</sup> Bzejni'ilo' neda' kan žala' gona' nich gata' yela' nban da' zejlí kanne chia'. Gono' ga yebela' dan' zóalenkzo' neda'.  
<sup>29</sup> 'Na'a, ljéža'do' ka'. Nak bia' got xa gole chežo Dabín', na' bgache' lo yežw ba, na' ba chien' žen' gan zoažo na' zejté na'a že. <sup>30</sup> Dabín' bchalje' lo wláz Dios, na' wnnezle' ben choch Dios da' bchebe laže'e gone' chie', gone' ga galj Benne' Criston' ladjw za'sóe' ka', na' Le' nna bi'e latje che Dabín'. <sup>31</sup> Ble'el Dabín' da' ni zga'ale, na' bchalje' kan bebán Benne' Criston', na' kan goken, bi bga'ne' latje chol chegak benne' gat ka', na' bi wzía yi' bela' žen chie'.  
<sup>32</sup> Dios besbane' Jesusen' lo yela' got, na' kan gok da' ni yógo'teto' zzoa lito' chen. <sup>33</sup> Ka' goken, Dios, len yela' wak chie', bchise' Le' ža'le gan nápeli'e yela' wnná bia'. Na'a, Jesusen', Benne' Criston', ba bsele'e Dios Be' La'y ga ni, na' žaken kan bchebe laže' Dios gone' lo na' Benne' Criston', na' Dios Be' La'y na' žone'

da' ki da' zlé'elele, na' žénlele. <sup>34</sup>Bi beyepe Dabín' ya'abá che Dios, san Dabí na'kzen' wnné:

Xanžo Dios gože' Xana:  
 "Wžé' kwita' li ža gan nak blo  
<sup>35</sup> kate' gonža' ga benne' ka' bi  
zlé'egekle' Le' chawe' wzóa  
zíbgake' lawo' Le'."

<sup>36</sup>'Na'a, benne' Israel ka', žala'  
 nnézlele da' nakkzen. Jesús nikze,  
 Bennen' bda'le-ne' le'e yag kroze,  
 Dios bene' ga nake' Xanžo, na'  
 Benne' Weslá chežo.

<sup>37</sup>Kate' benne' ka' béngekle' da' ni,  
 gok zédgekle', na' belyi'e Bedon', na'  
 yezika' benne' wbás ka' che Jesús,  
 Benne' Criston', na' wnnágake':

—Lježto' ka', čnakxkzen' gonto'?

<sup>38</sup>Naž Bedon' gože' légake:

—Le yeyát laže', na' le yezóa nis  
 to tole lo la Jesús, Benne' Criston',  
 nich yenít law Dios dola' da'  
 nbága'le, na' Dios Be' La'y, Bennen'  
selá' Dios chele, yedjsóalene' le'e.  
<sup>39</sup>Da' bchebe laže' Dios naken chele  
 le'e, na' chegak zi'nle ka', na' lezka'  
 chegak yógo'te benách zi'to' ka',  
 yógo'te benne' ka' wlíž Xanžo Dios  
légake'.

<sup>40</sup>Da' ki, na' da' zan da' ki bchalj  
 Bedon', da' bzejni'ile' légake'  
 kwáselo, na' wnné:

—Le gon da' gon ga yelale, na' le  
 kwas gan zej nnita' benne' wen da'  
zinj ka', benne' ka' nnít'a'gake' ža ni  
 zoažo na'a.

<sup>41</sup>Ka' goken, benne' ka', benne'  
wzí' lo ná'gake' da' bchalj  
 Bedon', bezóagake' nis. Kate' ža  
 na' ka chonn mil benne' ka' wzó  
láwgake' zónlengake' légake' tzen.  
<sup>42</sup>Yógo'tegake' béngeake' dot da'  
 bsédgekle benne' wbás ka' bsela'

Benne' Criston'. Gókgake' toze toe'  
len yetóe', na' we'j bdáwgake' tzen  
 da' žesá' láže'žo kan got Jesusen', na'  
 tzen bcháljlengake' Dios.

### Kan bengak benne' ka' žejl'é'gake' che Benne' Cristo

<sup>43</sup>Benne' wbás ka' che Benne'  
 Criston' béngeake' da' zan da'  
žóngaken ga žebán láže'žo, na' da'  
 zan da' zej nak bian', san bžébegak  
 yezika' benách ka'. <sup>44</sup>Yógo'te  
 benne' ka', benne' žejl'é'gake' che  
 Benne' Criston', gókgake' toze, na'  
 beyóngake' toze yógo'te da' zej nape'.

<sup>45</sup>Kate' blé'egekle' zej nnita' benne'  
 ka' zoa bi da' želyázjеле', benne' ka'  
žónlengake' légake' tzen, naž benne'  
 ka' zoa bi da' nápegake', béte'gaken',  
 na' belyise' mežwn' da' wzí'gake' che  
 chegak benne' ka' želyázjеле'. <sup>46</sup>Tža  
 tža bdóbgake' tzen lo zchil yodo',  
 na' gan nak lo lížgake' ka' gan we'j  
 bdáwgake' da' žesá' láže'žo kan got  
Xanžon'. We'j bdáwgake' tzen, na'  
 bebégekle', na' gókgake' dot li laže'.

<sup>47</sup>Bka'n zéngake' Dios, na' yógo'te  
 benách ka' wdápegake' légake' ba  
 la'ne. Tža tža Xanžon' bzane' benne'  
 ka' zdóbgake' chie', benne' ka'  
želágake'.

### Žeyák to benne' bi žak se'e

**3** Kate' ža na' Bedw len Zwa  
 jake' tzen lo zchil yodo', katen'  
zdobgak benách ka' ga na', nich  
 wcháljlengake' Dios, ne naken  
 žedá chonne. <sup>2</sup>Gan želdí' zoa to  
 benne' bi žak se'e kate' wzó law ža  
 ni'te katen' nake' xkwide'. Tža tža  
žjwa'gak benne' ka' le' ga na', na'  
 želbeke' le' žoa'a yodo' gan nzin'  
 Da' Xtan Gan Žo'ožo. Ki béngeake'

chie' nich nnable' no benne' bi da' wnežjwe' chie', bennen' zoe' ladjw benne' ka' želyoé'e lo zchil yodon'. <sup>3</sup>Benne' ni, katen' ble'ele' Bedon' len Žwan', benne' ka' zjake' gan žo'gak benách ka' lo zchil yodon', na' góta'yoele' lágake' bi da' wnéžjwgake' chie'. <sup>4</sup>Naž Bedon' len Žwan' bwíagake' le', na' Bedon' gože' le':

—Bwia neto'.

<sup>5</sup>Naž bennen' bze nage' chégake' dan' žxen laže'e bi da' wnéžjwgake' chie'. <sup>6</sup>Bedon' gože' le':

—Bi de mežw plat, na' mežw oro chia', san da' dezen chia' gonna' chio'. Ni'a che yela' wak che la Jesús, Benne' Criston', Benne' yež Nasaret, wzó ža', na' wzá'.

<sup>7</sup>Naž Bedon' bexwe' ne'e li ža, na' bchise' le', na' la' beyakte ni'e, na' beyitjte bechj ni'e. <sup>8</sup>Naž wzá' bennen', na' wxite', na' wzíe'. Wyázlene' Bedon' na' Žwan' tzen lo zchil yodo', na' zze'e, na' žxite', na' źka'n ūzene' Dios. <sup>9</sup>Yógo'te benách ka', benne' nníta'gake' ga na', blé'egekle' le' zze'e, na' źka'n ūzene' Dios. <sup>10</sup>Ka' goken, bžébegake', na' bebángekle' kan nak dan' goken, dan' beyónbia'gake' le', nake' bennen' ūbi'e žoa'a yodo' gan nzin' Da' Xtan Gan Žo'ožo, na' ūnnabe' no benne' bi da' wnežjwe' chie'.

### Da' bchalj Bedw lo zchil yodo'

<sup>11</sup>Bennen' bi gok se'e, na' beyake', bexwe' na' Bedw len na' Žwa. Naž bdobgak yógo'te benách ka' gan nníta'gake' lo zchil yodo' da' nzin' Zchil Che Salomón, na' žebángekle'. <sup>12</sup>Kate' ble'el Bedon' da' ni, gože' benne' ka':

—Le'e, benne' Israel ka', čbiz chen' žebánlele che da' ni? <sup>13</sup>Biz chen' zwiale neto', na' žéklele len yela' wak chezto', o ni'a che da' žejle'to' che Dios, néto'ze beyonto' benne' ni, na' bento' ga zze'e? <sup>14</sup>Nak da' ni da' ben Dios, Bennen' nake' Dios chegak xa wdé chežo ka', Bran, na' Isaak, na' Jakob. Dios na'kze wdápel'i'e Ži'ne', Jesusen', ba la'ne. Jesusen', le'ekze bdele-ne' lo na'gak benne' ka' ūnna biá'gake' le'e. Kate' gónele Pilato wsane' Jesusen', bžonle-ne'. <sup>15</sup>Bzoale cheł'a ale Benne' Chawen', Benne' la'y, na' wnnáblele Pilaton' wsane' chele to benne' wetw benách ka'. <sup>16</sup>Ka' goken, bětkzele Bennen' žonnkze' yela' nban da' zejlí kanne chežo. Naž Dios besbane' Le' lo yela' got, na' kan nak da' ni ūzoa lito' chen lawle le'e. <sup>17</sup>Dan' bejlé' benne' ni che Jesusen', beyák ni'e, na' ūl'e'elele-ne', na' nónbia'le-ne'. Dan' žejli'e che Jesusen', Le' kate' gabí beyone' benne' ni, na' ūl'ekzelele yógo'tele kan nake' na'a.

<sup>17</sup>Na'a, ljéža'do' ka', nnezlá' benle da' ka', na' betle Jesusen' dan' bi bejn'ile, na' bi bejn'igekle benne' ka' ūnna biá'gake' le'e. <sup>18</sup>Ki be' Dios latje nich gak da' wnné' zga'ale, da' wnnagak benne' ka' bcháljgake' lo wlaze' Le' kan žalá' saka' Benne' Criston'. <sup>19</sup>Che len, le yeyát laže', na' le yeyák che Dios, nich yeké'e dola' da' nbága'le, na' gone' ga yeyák láže'le. <sup>20</sup>Naž sel'e Jesusen' da' yoble, Bennen' za ni'te bzoe' chie' gake' Benne' Criston', Bennen' nna bi'e le'e. <sup>21</sup>Na'a, žon byenen ga'ne' ya'abá che Dios kate' žinže ža yeyone' chawe' yógo'te da' žaken, na' gaken kan ba wnnakze Dios, da'

wnnagak benne' ka' bcháljgake' lo wlaze' Le' ža ni'te. <sup>22</sup>Lezka' Moisés gože' xa xto'žo ka', na' wnné': "Xanžo Dios sele'e chele to benne' galje' ládjwgak biche' lježle ka'. Gake' benne' wchalje' lo wláz Dios. Sele'e Le' chele kan bsele'e neda'. Žon byenen wzé nagle-ne' kan nak yógo'te da' yi'e le'e. <sup>23</sup>Yógo'te benne' ka', benne' bi wzé nággake' che Bennen' wchalje' lo wláz Dios, kwia yí'gake', na' kwásłengake' benách ka' che Dios."

<sup>24</sup>Kan nak ža ni zoažo na'a, bloé'egekle yógo'te benne' ka' bcháljgake' lo wláz Dios kate' wzó law zoa Samuel, na' wdé na'. <sup>25</sup>Le'e nakle za'sógak benne' ka' bcháljgake' lo wláz Dios, na' diža' źka'n chawe', da' bchebe laže' Dios chegak xa xto'žo ka', naken chele. Ki ben Dios katen' gože' Bran: "Ni'a che da' gon za'só' gon chawa'a yógo'te benách ka' mnítä'gake' dot yežlyó nga." <sup>26</sup>Katen' Dios besbane' Ži'ne' lo yela' got, na' bsele'e Le' nežw chele le'e nich gak gon chawe'e le'e, na' nich gone' ga wsanle da' kegle da' žonle.

#### Želžín Bedw len Žwa lawgak benne' yodo' wchi'a laže' ka'

**4** Kate' Bedw len Žwa ne zcháljłengake' benách ka', bxoz judío ka' len benne' yodo' saduseo ka', na' benne' źchi'e ni'a na'gak benne' yodo' ka', la' bžíntegake' gan mnítä'gake'. <sup>2</sup>Bžá'agak benne' ki dan' ſzédgekle Bedon' len Žwan' benách ka', na' zzéngekle' légake' yebangak benne' gat ka' dan' ba bebán Jesusen'. <sup>3</sup>Naž békwgake' Bedon' len Žwan', na'

bséjwgake' légake' liž ya kate' žinže ža yoble dan' ba za' žale ža na'.

<sup>4</sup>Benne' zan bejlé'gake' che Benne' Criston' dan' béngekle' da' bchaljgak Bedon' len Žwan'. Na'a, légakze benne' byo ka', benne' žejl'é'gake' che Benne' Criston' zej nake' ka gayo' mile'.

<sup>5</sup>Ža chope ža benne' wnná bia' ka' len benne' gole ka', na' benne' yodo' wsedle ka', bdóbgake' lo yež Jerusalén. <sup>6</sup>Lezka' Anás, bxoz blo, na' Kaifás, na' Žwa, na' Kantr, na' yógo'te ljež bxoz blon', bdóbgake' ga na'. <sup>7</sup>Naž bché'gake' Bedon' len Žwan', na' bzégake' légake' gachje láwe'le gan mnítä'gake'. Wnnábgekle' légake', na' wnnágake':

—¿Biz yela' wnná bia' nzi' lo na'le žonle da' ki? ¿Noz benne' bdie' lo na'le yela' wnná bian'?

<sup>8</sup>Naž Bedon' gože' légake', zoalen Dios Be' La'y le', na' wnné':

—Le'e, benne' ka' źnna bia'le neto', benách Israel ka', na' le'e, benne' gole ka'. <sup>9</sup>¿Znnáblele neto' na'a kan nak da' chawe' da' bento' che benne' yižwé' ni, na' nakx beyake' chawe'? <sup>10</sup>Žzejni'ilton' le'e nich nnézgeklen yógo'te benách Israel ka'. Beyák benne' ni zoe' lawle dan' ben žin yela' wak che Jesús, Benne' Criston', Benne' yež Nasaret. Le'e bda'le-ne' le'e yag kroze, san Dios besbane' Le' lo yela' got. <sup>11</sup>Dios bchalje' che Jesusen', katen' wnné': "Yej na' da' bzoale le'e chela'ale, le'e, benne' wen ze'e ka', na'a naken yej da' wžekza' neda' nich gaken yej blo che ze'e." <sup>12</sup>Bi zoa no benne' yoble, benne' gak yeslé' benách ka', dan' bi zoa nitó benne' yoble yežlyó nga, bennen' bzoa Dios, nich yeslé' žo'o.

<sup>13</sup>Kate' blé'egekle'zej nak Bedon', na' Zwan', benne' wechógláže' ka', gókbe'egekle' bi nsédgekle' che yodo', na'zej nake' benne' gazjw ka', na'bebángekle', na' besá'láže'gake' Bedon' len Zwan' wnníta'lengake' Jesusen'.

<sup>14</sup>Lezka' blé'egekle' zoa bennen' ga na', bennen' beyake', na' zie' lágake', na' bi be gok nnégake' chégake'. <sup>15</sup>Naž góžgake' benne' ni'a nágake' ka' yebéjgake' Bedon' len Zwan' lí'ale che yo'o gan zej ndobe', na' ben xtíza'gake' la' légakse'. <sup>16</sup>Wnnágake':

—¿Nakxkzen' gonžo chegak benne' ki? Da' li béngekle' to da' žonen ga žebángekle benách ka', na' yógo'te benách ka', benne' mníta'gake' Jerusalén, nnézgekle' da' ki. Bi gak wži'ižo che da' ki. <sup>17</sup>Na'a, nich bi seže diža' ni, na' nich bi yéngeklen benne' zanže, na'a žala' wchi'lžo benne' ki nich biž wcháljlengake' benách ka' kan nak che Jesusen'.

<sup>18</sup>Naž blížgake' Bedon' len Zwan', na' bchí'igekle' légake' nich biž wcháljlengake' benách ka', na' biž wsédgekle' légake' kan nak che Jesusen'. <sup>19</sup>Naž beží'i Bedon' len Zwan', na' belyi'e légake':

—Le wchi'a láže' le'e cha' nak chawé law Dios wzé nágžeto' xtíza'le le'e ka xtíza' Dios. <sup>20</sup>Bi gak kwe'to' žize. Žon byenen wzóa lito' che da' ble'elto', na' da' benlto'.

<sup>21</sup>Naž benne' yodo' wchi'a láže' ka' bchí'igekle' légake', na' naž bsane' légake' dan' bi bžélgekle' nakle wsaka' zí'gake' légake'. Ki béngekle' dan' bžébegake' benne' wláž ka', dan' yógo'tegake' zka'n zéngake' Dios ni'a che dan' goken. <sup>22</sup>Bennen' beyake', na' gok chie' da' žonen ga žebán láže'zo, ba zeje' ka choplalj yiz.

Znnábgekle' Dios gone' ga gákake' wechógláže'

<sup>23</sup>Kate' bsángake' Bedon' len Zwan', na' benne' ki bežíngake' gan zej nníta' ljéžgake' ka', na' bzéngekle' lágake' yógo'te da' wnnagak bxoz wnnábia' ka' len benne' gole ka'. <sup>24</sup>Kate' béngekle' da' ni, tzen bcháljlengake' Dios, na' wnnágake':

—iXanto' Dios, ga'n zen Lo! Le' nako' Dios, na' beno' ya'abá. Beno' yežlyó nga. Beno' nisdo'. Beno' yógo'te da' zej nnitan' to to latje ka'.

<sup>25</sup>Lo wlazo' Le' bchalj Dabí, benne' wen žin chion', na' wzoalen Dios Be' La'y le', na' wnné':

—Biz chen' žongak benách ka' žo'osbé, na' zza' láže'gake' da' bi zej naken chawé?

<sup>26</sup>Bengak benne' wnnábia' ka' žo'osbé lo yežlyó nga, na' gokgak toze benne' blo ka'. Bží'igake' chio' Le', Xanto' Dios, na' lezka' che Benne' Criston', Bennen' wžekzo' Le'.

<sup>27</sup>'Da' li Herodes len Ponsio Pilato, na' benne' zí'to' ka', na' benne' Israel ka', gókgake' toze lo yež nga. Bzóagake' Jesús, Zí'no' la'y, cheláale, Bennen' bzoakzo' cheto'. <sup>28</sup>Béngake' yógo'te da' wnnó' Le' zga'ale kan góngake', na' goken kan ben chocho' xtízo'o kan žala' gaken. <sup>29</sup>Na'a, Xanto', bwia da' zchí'igekle' neto', na' ben ga gakto' wechógláže', nich wchaljto' xtízo'o, neto' benne' wen žin chio' ka'. <sup>30</sup>Ben ga gak yeyonto' benne' yižwé' ka', na' ben ga soa'len yela' wak zen chio' neto', na' ben ga gak gonto' da' ka' góngaken ga yebán láže'to', na' da' ka' gak

biá'gaken. Ki gaken dan' Jesús, Zi'no' la'y, zóalene' neto'. Ka'kze gaken.

<sup>31</sup> Kate' beyóž bcháljlengake' Dios, wzíz latjen' gan wnníta'gake', na' Dios Be' La'y wzóalene' yógo'tegake', na' len yela' wechób laže' chégake' bcháljgake' xtiža' Dios.

### Žeyóngake' toze da' ka' nápegake'

<sup>32</sup> Benne' zan, benne' žejl'é'gake' che Benne' Criston', toze kan že' yichj láždo'gake', na' toze kan béngake'. Nitó benne' ládjwgake' bi wnné' nak cheze' da' nape', san beyóngake' toze da' nápegake'.

<sup>33</sup> Len yela' wak zen, benne' wbás ka' bsel'a Xanžo Jesusen', bzoa lígake' kan bebane' Le', na' yela' ži'i laže' che Dios wzóalenen yógo'tegake'.

<sup>34</sup> Nitó benne' bi be byázjele', benne' zoe' ládjwgake'. Yógo'te benne' ka' zoa bi da' nápegake', yežlyó chégake', o lížgake', béte'gaken', na' mežw chen yjwá'gaken', <sup>35</sup>na' bdégaken' lo na'gak benne' wbás ka' bsel'a Benne' Criston', na' lágake' belyisen' chegak benne' ka', benne' zoa bi da' žiažjen chégake'. <sup>36</sup>Jwsé, bennen' bzoagak wbás ka' bsel'a Benne' Criston' yetó le', Bernabé, da' znnan len diža' xiža', Benne' Žeyón Zene', zoe' ga na'. Nbáblene' za'só Lebí ka', na' golje' lo yežlyó Chipre, da' žen' gachje láwe'le nisdo'. <sup>37</sup>Bernabén' bete'e to kwe' yežlyó chie', na' yjwe' mežw chen, na' bdién' lo na'gak benne' wbás ka' bsel'a Benne' Criston'.

Dola' da' ben Ananías  
tzen len Safira, zo'le'

**5** Zoa to benne' yoble lie'  
Ananías, na' bete'e to kwe'

yežlyó chie'. Zo'le', Safira, bénlene' le' tzen. <sup>2</sup>Bkache' Ananásen' late' mežw che yežlyón', na' nnezel zo'le' dan' bene'. Da' bega'nzen yjwen', na' wloé'en lo na'gak benne' wbás ka' bsel'a Benne' Criston', na' wnné':

—Kíte'ze wzí'a.

### 3 Bedw gože' le':

—Ananás, čwyó'o da' xiwe' lo yichj lazdo'o, na' benen ga žénelo' gon láže'lo' Dios Be' La'y, na' bkacho'o che mežw che yežlyó chion'? <sup>4</sup>Katen' bga'n yežlyón' lo no'o, čbi goken chekzo? Kate' beyóž beto'on, čbi wyó'o mežwn' lo na'kzo? <sup>5</sup>Biz chen' wzé' yichjo' gono' da' ni? Dios na'kze góñelo' gon láže'lo', kege bénne'ze.

<sup>5-6</sup>Kate' benle Ananásen' da' ni, la' wbíxtie' lo yo ba nate'. Naž belbíga'te xkwide' ka', na' bchél'gakbe' le' laže', na' bebéjgakbe' le', na' bejkáche'gakbe' le'. Bžébegak yógo'te benne' ka' béngekle' kan gok da' ni.

<sup>7</sup>Ka chonne hora wdé na', bžin zo'le Ananásen' ga na', na' bi nnezel' dan' goken che benne' byo chien'.

<sup>8</sup>Naž Bedon' gože' le':

—Wnná neda'. <sup>9</sup>Kíte'ze wzí'le che yežlyó chelen'?

No'len' wnné':

—O', kíte'ze wzí'to'.

<sup>9</sup>Naž Bedon' gože' le':

—<sup>10</sup>Biz chen' ben toze xtíža'le, na' góñelele gon láže'le Dios Be' la'y? Bwia nga. Ná'tege yela'gak xkwide' ka', bi' ka' bejkáche'gakbe' benne' byo chion', na' lezka' yebéjgakbe' le'.

<sup>10</sup>Naž no'len' la' wbíxtie' xni'a Bedon', ba nate'. Katen' beyo'ogak xkwide' ka', na' blé'egeklbe'-ne' ba nate'. Naž bebéjgakbe'-ne', na'

bejkáche'gakbe'-ne' kwit benne'  
byo chien'. <sup>11</sup>Che len yógo'te  
benách ka' che Dios bžébegake', na'  
lezka' bžébegak yógo'te benne' ka'  
béngekle' kan gok da' ni.

**Benne' wbás ka' žóngake'  
yela' wak zan**

<sup>12</sup>Benne' wbás ka' bsela' Benne'  
Criston' béngekle' da' zan da' zej  
nak bian', na' yela' wak zen ka'  
lawgak benne' ka'. Bdóbgake' tzen  
yógo'tegake' lo zchil yodo' da' nzin'  
Zchil Che Salomón. <sup>13</sup>Ladjw benne'  
ka', benne' bi zejlé'gake' che Benne'  
Criston', bi bežogle nitó benne'  
górlene' légake' toze, na' benne'  
wláž ka' wdápegake' légake' ba la'ne.  
<sup>14</sup>Naž yebale' benne' zan, benne'  
byo ka', na' no'le ka', bejlé'gake' che  
Benne' Criston'. <sup>15</sup>Kate' blé'egekle  
benách ka' da' ka' žongak benne'  
ka' zejlé'gake' che Benne' Criston',  
belyóe' benne' yižwé' ka' lo blag  
ka', na' yebale' lo da'aze ka', na'  
yjwá'gake' légake' gan nak kwit nez  
nich kate' te Bedon' ga na', zolze  
chie' chelen bałe benne' yižwé' ka',  
nich yeýkgake'. <sup>16</sup>Lezka' bžojgak  
benách yež gawze ka', na' bžíngake'  
lo yež Jerusalén, zej noe'e benne'  
yižwé' ka', na' benne' ka' želzake'e  
dan' zej yoe'e be' xiwe' ka', na'  
beyákgake' yógo'tegake'.

**Benne' yodo' ka' źsaka'  
zí'gake' benne' wbás ka'**

<sup>17</sup>Che len bxoz blo len benne'  
yodo' saduseo ka', benne' ka'  
zónlengake' bxoz blon' tzen,  
béxwgake' Bedw. <sup>18</sup>Naž bxoz blon'  
len benne' ka' zónlengake' le' tzen,  
lezka' béxwgake' wbás ka' bsela'

Benne' Criston', na' bséjwgake'  
légake' liž ya. <sup>19</sup>Naž la' yel na'ze bla'  
to wbás che ya'abá che Xanžon', na'  
bsaljwe' liž yan', na' bebeje' légake'.  
<sup>20</sup>Wbasen' gože' légake', na' wnné':

—Le chej, na' le chejsé lo zchil  
yodo', na' le wchaljlen benách ka'  
nnítá'gake' ga na', na' le wzenle  
légake' kan nak che yela' nban da'  
zejlí kanne, na' kan gak sí'gaken'.

<sup>21</sup>Kate' béngekle' da' wnná  
wbasen', na' kate' za' ža'ní'  
zildo', belyoé'e lo zchil yodo', na'  
bsédgekle' benne' ka' nnítá'gake' ga  
na'.

La' na'ze bxoz blon' len benne'  
ka' žónlengake' le' tzen bdóbgake'.  
Btóbgake' benne' gole ka' len benne'  
yodo' wchi'a laže' ka', na' bséla'gake'  
ni'a ná'gake' ka' chjake' liž yan', nich  
chejxí'gake' benne' wbás ka' bsela'  
Benne' Criston', dan' žékgekle' ne  
nnítá'gake' ga na!. <sup>22</sup>Kate' bžingak  
ni'a na'gak benne' yodo' ka' ga na', bi  
bejxáka'gake' légake' lo liž yan', na'  
naž beyéjgake', na' bzéngekle' benne'  
yodo' ka' da' žaken. <sup>23</sup>Belyi'e benne'  
yodo' wchi'a laže' ka', na' wnnágake':

—Da' li bejxáka'to' nyéwté liž  
yan', na' benne' ka' žape ch'igaken'  
wnnítá'gake' ga na', san kate'  
bsálwjton', bi bejxáka'to' nitó benne'  
lo yo'on'.

<sup>24</sup>Naž bxoz blon' len bxoz wnná  
bia' ka', na' bennen' zchi'e ni'a na'gak  
benne' yodo' ka', kate' béngekle' da'  
ni, gok zédgake' dan' bi nnézgekle'  
gate žin da' žaken. <sup>25</sup>Naž bla' to  
benne' ga na'. Bzenle' légake', na'  
wnné':

—Le wia nga. Benne' ka' bséjwle  
liž ya nnítá'gake' lo zchil yodo', na'  
žsédgekle' benách ka'!

**26** Naž wyéj bennen' zchi'e ni'a na'gak benne' yodo' ka' tzen len ni'a ná'gake' ka', na' béxwgake' benne' wbás ka' bsela' Benne' Criston', san bi be da' zia béngeake' chégake', dan' bžébegake' benách ka' nníta'gake' ga na' wžé'egake' légake' yej. **27** Kate' ba bedjch'égake' benne' wbás ka', bzégake' légake' lawgak benne' yodo' wchi'a laže' ka', na' bxoz blon' wnnable' légake', **28** na' wnné:

—¿Bi bchi'leto' le'e biž wséidle benách ka' kan nak che bennen'? Na'a, ba wdisle da' zséidle dot lo yež Jerusalén, na' zénelele yesbága'le neto' zia ni'a che yela' got che bennen'.

**29** Naž Bedon' len yezika' benne' wbás ka' bsela' Benne' Criston', bechébegake', na' wnnágake':

—Žon byenen wzé nágzeto' xtiža' Dios ka xtiža'gak benách ka'. **30** Le'e betle Jesusen' katen' bda'le-ne' le'e yag kroze, san Dios chegak xa xto'žo ka' besbane' Le'. **31** Jesusen', Dios bzoakze' Le' gan nak blo kwitkze' li ža, nich gake' Benne' Blo, na' Benne' Weslá, na' nich gone' ga yeyát láže'gak benne' Israel ka', nich gak yenít lawe' dola' da' zej nbage'e. **32** Kan nak da' ni, neto' zzoa liton', na' lezka' Dios Be' La'y zzoa lien'. Dios Be' La'y na' nake' Bennen' žsela' Dios nich sóalene' benne' ka' žóngake' kan znna xtiže'e.

**33** Kate' béngekle benne' yodo' wchi'a laže' ka' da' ni, bžá'agake', na' gónegekle' gótgake' benne' wbás ka'. **34** Naž Gamaliel, to benne' yodo' fariseo, wzf'e lawgak benne' yodo' wchi'a laže' ka'. Benne' ni žákli'e da' bchi'le Moisés, na' yógo'te benách ka' žápegake' le' ba la'ne. Gože' ni'a

ná'gake' ka' yebéjgake' benne' wbás ka' bsela' Benne' Criston' lí'ale to chi'ido'. **35** Naž gože' benne' yodo' wchi'a laže' ka', na' wnné:

—Le'e, benne' Israel ka', le gape chi'i kwinle kan nak da' zénelele gonle chegak benne' ki. **36** Žala' chejsá' láže'le kan gok zgá'atele kate' bžin ža ni zoažo. Bla' Teudas, na' ben kwine' ka to benne' blo. Benne' ka' bénłengake' le' tzen wbábgake' ka tape gaywá' benne' byo ka'. Benne' ka' žjake' lo wdile bétgake' le', na' góslasgak yógo'te benne' ka' bénłengake' le' tzen, na' wzía yi' yógo'te da' ben bennen'. **37** Wdé gok dan', bla' Judas, benne' Galilea. Ki bene' katen' gok ža byéla'gak yógo'te benách ka' le'e yiche nich chízjwgake' lázgake', na' bénłengak benne' zan le' tzen. Lezka' bétgake' bennen', na' góslasgak yógo'te benne' ka' bénłengake' le' tzen.

**38** Che len žapa' le'e: le wsán benne' ki, na' bi be gonle chégake'. Cha' dan' znnágake' o dan' žóngake' naken chégakze benách ka', na' kwia yin', **39** san cha' zej naken che Dios, bi gak wchinnjlen. iLe gape chi'i kwinle bi tíl'-lenle Dios!

**40** Naž béngeake' toze diža len le'. Blížgake' benne' wbás ka' bsela' Benne' Criston', na' bdíngake' légake'. Bchí'igekle' légake' nich bi wzénzegekle' benách ka' kan nak che Jesusen'. Naž bsángake' légake'. **41** Benne' wbás ka' bsela' Benne' Criston' bžójgake' lawgak benne' yodo' wchi'a laže' ka', na' žebéle'gekle' dan' be' Dios légake' latje wzáka'gake' dan' zej nake' che Jesusen'. **42** Tža tža bsédtetzgekle' benách ka', na' bzoa lígake' che

Jesús, Benne' Criston', gan nak lo zchil yodo', na' gan nak lo ližgak benách ka'.

**Zbégake' gaže benne' nich gákłengake' benách yache' ka'**

**6** Kate' ū ka', belyán benách ka' żejlé'gake' che Benne' Criston'. Benne' judío ka', benne' żejlé'gake' che Benne' Criston', na' żcháljgake' diža' griego, wnnégake' chegak benne' judío ka' żcháljgake' diža' hebreo. Ka' goken dan' bi be bnezw no benne' chegak no'le wzebe ka', no'le ka' żcháljgake' diža' griego, katen' bdísgake' da' gawgak no'le wzebe ka'. **2**Naž benne' chezinno wbás ka' bsela' Benne' Criston' btóbgake' yógo'te benne' ka' żejlé'gake' chie', na' belyi'e légake':

—Bi nak chawe' soato' žize, na' bi wzóa lito' che xtiža' Dios, nich gonto' žin wawto' benách ka'. **3**Che len, lježto' ka', žala' kwеле gaže benne' byo ka' ládjwle le'e nich ko'ožo lo ná'gake' žin ni. Benne' byo ka', žon byenen gákgake' benne' ka' zápegak yógo'te benách ka' légake' ba la'ne. Žala' gákgake' benne' žejn'i'il ka', na' nak bia' Dios Be' La'y zóalene' légake'. **4**Neto' wcháljlentezto' Dios, na' wsedlto' benách ka' xtiže'e.

**5**Wyáz láže'gak yógo'tegake' da' ni, na' wžégake' Esteban, to benne' dot laže'e żejl'i'e che Benne' Criston', na' zoalen Dios Be' La'y le'. Lezka' wžégake' Lip, na' Prókoro, na' Nikanor, na' Timón, na' Parmenas, na' Nikolás, to benne' yež Antiokía, benne' zga'ale bche'e kan žone' nich wká'n zene' Dios kan žongak benne' judío ka'. **6**Naž bzégake' benne'

ka' wžégake' lawgak benne' wbás ka' bsela' Benne' Criston'. Benne' wbás ka' bxoa ná'gake' légake', na' wnnábgekle' Dios gákłene' légake'.

**7**Wzeže xtiža' Xanžon', na' belyanle'e benne' ka' żejlé'gake' che Benne' Criston', benne' ka' nnítia'gake' lo yež Jerusalén. Lezka' benne' zan, bxoz judío ka', wzí' lo ná'gake' da' żejležo che Benne' Criston'.

### Želzene' Esteban

**8**Naž Esteban, zoalen yela' wak che Dios le', dan' bde Dios lo ne'e, bene' da' ka' žóngaken ga žebán láže'žo, na' da' ka' zej nak bian', da' ka' bene' lawgak benne' wláž ka'.

**9**Naž bžojgak bale benne' ka' zej nbabe' yo'o gan zdobgak benne' judío ka' nich yéngakle' xtiža' Dios, yo'on' nzin' Yo'o Chegak Benne' Ka' Biž Zej Ndo'e. Lezka' benne' ka' zej nžoje' yež Sirene, na' yež Alejandría, na' gan nbab Silisia, na' gan nbab Asia, běngake' benne' ka' tzen. Benne' ki wdíl díža'gake' len Esteban na'. **10**Bi bzoele xtiža'gake', dan' bchajl Esteban na' len yela' žejn'i'il dan' bnezw Dios Be' La'y le'.

**11**Naž bdížjwgake' benne' wen laže' ka', nich nnágake': “Neto' benlto' da' zna Esteban na', znnie' che Moisés, na' che Dios.” **12**Ka' goken, benne' ki běngake' ga bža'agak benne' wláž ka'. Lezka' běngake' ga bža'agak benne' gole ka', na' benne' yodo' wsedle ka'. Yógo'te benne' ki belbía dí'e Esteban na'. Béxwgake' le', na' bché'gake' le' lawgak benne' yodo' wchi'a laže' ka'. **13**Lezka' bnnítia'gake' láwgake' bale benne' ka' nich nnágake' da' wen laže', na' wnnágake':

—Bi zoa ži benne' ni znnie' che yodo' la'y nga, na' che da' bchi'le Dios ž'o. <sup>14</sup>Bentlo' da' wnná benne' ni kan gon Jesús, benne' Nasaret. Wnné' wchinnje' yodo' ni, na' wch'é'e da' ka' žóneteze žonžo, da' ka' bchi'le Moisés ž'o.

<sup>15</sup>Naž benne' yodo' wchi'a laže' ka' len yógo'te benne' ka' žé'gake' ga na', bwíagake' Esteban na', na' blé'egekle lawe', da' znnan' kan znnna' law to wbás che ya'abá che Dios.

### Da' bchalj Esteban lawgak benne' yodo' ka'

**7** Naž bxoz blo wnnable' Esteban, na' wnné':

—¿Nakkze ki?  
<sup>2</sup>Bechebe Esteban, na' wnné':  
 —Le'e, benne' gole ka', na' le'e, ljéža'do' ka'. Le wzé nag da' yapa' le'e. Dios, Benne' zente, bloe'e lawe' gan wzóa Bran, xažo wdé na', katen' wzó'e gan nbab Mesopotamia, zga'ale kate' bejsóe' lo yež Harán. <sup>3</sup>Dios gože' le': "Bžojo', na' bkwaslen biche' lježo' ka', na' wyéj lo yežlyó da' wloe'elan' le!" <sup>4</sup>Naž bžoj Bran na' gan nbab Mesopotamia, da' naken yežlyó chegak benne' Kaldea ka', na' bejsóe' lo yež Harán. Lo yežen' got xa Bran na', na' le' bekwase' ga na', na' Dios bchi'e le' lo yežlyó nga, gan zoažo na'a. <sup>5</sup>Dios bi bi'e le' latje gak yežlyó nga chie'. Bi bnezjwe' Le' ni láte'ze gan soe' lo yežlyó nga, san Dios bchebe laže'e wnežjwe' Le' yežlyó nga, na' te gat Bran na', na' gaken chegak za'sóe' ka', la'kze bi na' soa nitó xkwide' chie'. <sup>6</sup>Lezka' Dios gože' Bran na': "Chjak za'só' ka' gan nak lo yežlyó chegak benne' zi'to' ka', na'

za'só' ka' gákgake' ka benne' zi'to' ka' ga na'. Benne' yežlyón' ka' góngake' za'só' ka' benne' ndo'w ka'. Wsaka' zí'gake' lágake' tape gaywá' yiz." <sup>7</sup>Lezka' Dios gože' le': "Neda' wsaka' zi'a benne' yežlyón' ka' gan za'só' ka' gákgake' benne' ndo'w ka', na' te na' žójgake' ga na', na' wkán zéngake' neda' lo yežlyó nga." <sup>8</sup>Dios bénlene' Bran na' to diža' da' zk'a'n chawen', na' gože' le' choge' lo bela' chegak benne' byo ka' nníta'gake' liže' to da' gak bian' nzi' lo ná'gake' dižan' da' zk'a'n chawen'. Wdé na' gok Bran na' xa Isaak, xkwide' byo chien', na' katen' ba zejbe' xono' ža, bchoge' lo bela' chebe' dan' nak bian'. Isaak na', lezka' bene' che Jakob, xkwide' byo chie', na' lezka' ben Jakob chegak chežinnote xkwide' byo chie', benne' ka' gókgake' xa wdé chegak chežinno kwe' lježgak benne' Israel ka'.

<sup>9</sup>Xa wdé chežo ka', lo yela' zge'el chégake', béte'gake' xkwide' Jwsé, bi' bíche'gake', lo na'gak benne' ka' bejché'gake'-be' lo yežlyó Ejipto. Dios wzóalene' xkwide' Jwsén', <sup>10</sup>na' beslé'-be' lo da' goken chebe'. Dios bnezjwe' yela' žeñj'il chebe', da' benen ga wyáz laže' benne' Faraón lebe'. Benne' Faraón wnná bi'e lo yežlyó Ejipto, na' le' bdie' lo na' xkwide' Jwsén' yela' wnná bia', nich nna bia'be' benách Ejipto ka' len yógo'te benne' ka' wnníta'gake' ližkze Benne' Faraón na'.

<sup>11</sup>Naž gokle' e wbín dot lo yežlyó Ejipton', na' gan nbab Kanaán nga, na' wzáka'gak yógo'te benne' ka' wnníta'gake' ža na'. Bi bžel da' gawgak xa wdé chežo ka'. <sup>12</sup>Kate' benle Jakob de zoa' stribi lo yežlyó

Ejipton', bsele'e zi'ne' byo ka' ga na', benne' ka'zej nake' xa wdé chežo ka'. Ka' goken da' nežw chi'i jake' ga na'. <sup>13</sup>Kate' da' chope chi'i jake' lo yežlyó Ejipton', ben Jwsé na' ga beyónbia'gak benne' biche'e ka' le'. Ka' goken, wnnezle benne' Faraón no benne' ka'zej nake' biche' Jwsén'. <sup>14</sup>Naž Jwsén' bsele'e diža', na' bene' ga bla' Jakob, benne' nake' xe', ga na', tzen len biche' lježe' ka', benne' ka' gókgake' chonnalj chi benne' ka'. <sup>15</sup>Ka' goken, wzóa Jakob lo yežlyó Ejipto, gan gote' le', na' lezka' gotgak xa wdé chežo ka' ga na' kate' bza'a ža chégake'. <sup>16</sup>Katen' got to to xa wdé chežo ka', na' za'sogake' ka' yjwá'gake' légake' lo yežlyó che bennen' lie' Sikem, na' bkáche'gake' légake' lo yežw ba ka' lo blojen' da' go'w Bran lo na'gak zi'n Hemor, benne' nake' zi'n Sikem na'.

<sup>17</sup>Kate' ba wdé yiz zan, na' bžin ža žala' gak da' bchebe laže' Dios, dan' ben choche' xtiže'e gone' che Bran na'. Belyán benne' ka'zej nbabe' chežinno kwe' za'só Israel, na' gókgake' benne' zanle'e katen' wnníta'gake' lo yežlyó Ejipton'. <sup>18</sup>Naž bla' benne' yoble, benne' wnná bi'e lo yežlyó Ejipton', na' batkle benle' kan nak da' ben Jwsé, bennen' góklen'e benne' Ejipto ka'. <sup>19</sup>Benne' wnná bian' ben láže'le' xa xto'žo ka'. Bsaka' zi'e légake', na' bene' ga bsángake' xkwide' byodo' ka' chégake', nich gátgakbe'. <sup>20</sup>La' ža na'ze golj xkwide' Moisés, na' wyáz laže' Dios lebe'. Dot chonne byo' xa xna'be' besgole'-be' lo yo'o lížgake'. <sup>21</sup>Kate' bžin ža žala' wsangak xa xna' xkwide' Moisés na' lebe' nich gatbe', na' bla' bi' no'le che benne'

Faraón gan belka'ne'-be', na' bejxi'e-be', na' besgole'-be' ka xkwide' chekze'. <sup>22</sup>Ka' goken, bsdle xkwide' Moisés na' yógo'te da' žakgak benne' Ejipto ka', na' gókle'ebe' zen lo da' wnnabe', na' lo da' benbe'.

<sup>23</sup>'Kate' bazej xkwide' Moisés na' choplalj yiz, wnná láže'be' chejwíabe' benne' wláž chebe' ka', benne' Israel ka'. <sup>24</sup>Kate' bžinbe' gan nníta'gake', ble'elbe' to benne' Ejipto, žsaka' zi'e to benne' wláž chebe'. Naž góklenbe' benne' wláž cheben', na' betbe' benne' Ejipton'. Ka' goken, xkwide' Moisés na' bezi'be' wzón bennen' lo wláž benne' wláž cheben'. <sup>25</sup>Gokle Moisés na' chejn'igekle benne' lježbe' ka' gon Dios ga yeslabe' lekzbe' légake', san légake' bi bejnj'igekle'. <sup>26</sup>Ža chope ža na' bejxáka'be' yechope benne' Israel ka', na' želdile', na' gónelbe' wzóa žibe' légake', na' gožbe' légake': "Le'e nak biche' lježle. ¿Biz chen' žsaka' zi'le biche' lježle?" <sup>27</sup>Naž bennen' žone' lježe' da' zia bžige'e xkwide' Moisés na', na' wnné': "¿Nozkze benne' bzoe' le' nich nna bi'o neto', na' wchi'a lažo'o da' žonto'? <sup>28</sup>¿Žénelo' goto' nedá' kan beno' neje, beto' benne' Ejipton'?" <sup>29</sup>Kate' benle xkwide' Moisés na' da' ni, naž bzonnjbe' ga na', na' bejsoabe' lo yežlyó Madián gan wzoabe' ka to benne' zi'to'. Lo yežlyó Madián na' bchag nálenbe' to xkwide' no'le lo yežen', na' goljgak chope xkwide' byo chie'.

<sup>30</sup>'Kate' ba wdé choplalj yiz wzóe' ga na', na' kate' zoe' gan nak lo latje dach, da' zoan law ya'a da' nzin' Sinaí, na' bloe'e law to wbás che ya'abá lo yi' che yag yéche'do' da'

žeyen. <sup>31</sup>Kate' Moisés na' ble'ele' yin', bebanle', na' wbige'e gawze nich le'e'en' binlo, na' benle' chi'i Xanžon'.

<sup>32</sup>Xanžon' gože' le': "Neda' naka' Dios chegak xa wdé chio' ka'. Naka' Dios che Bran, na' Dios che Isaak, na' Dios che Jakob." Naž Moisés na', lo yela' zžebe chie' wzízeli'e, na' biž bežogle' wien'. <sup>33</sup>Xanžon' gože' le': "Wléj zelo' ni'o, dan' nak la'y gan zo' dan' zoakza' neda', Dios, nga. <sup>34</sup>Da' li ba ble'ela' da' želzaka' benách chia' ka', benne' Israel ka' nníta'gake' lo yežlyó Ejipto, na' ba benla' želbeže nyáche'gake'. Betja', na' zoa' nga nich yeslá' légake'. Da na'a, sela'a le' lo yežlyó Ejipton'."

<sup>35</sup>La'kze benne' wláž ka' che Moisés na' bzóagake' le' chela'ale, na' wnnágake': "¿Nozkze benne' bzoe' le' nich nna bi'o neto', na' wchi'a lažo'o da' žonto?" san Dios bsele'e le' nich gake' benne' wnná bia', na' benne' weslá, kan wbás che ya'abán' gože' Moisés na' gan wzóe', katen' bloe'e lawe' lo yag yéche'don' da' žeyen. <sup>36</sup>Moisés nikze bebeje' benne' wláž chežo ka' lo yežlyó Ejipton'. Ka' goken, bene' da' ka' béngeken ga bebán láže'gake' benách ka', na' lezka' da' ka' gok biá'gaken, da' ka' bene' lo yežlyón'. Lezka' bene' lo nisdo' da' nzin' Nisdo' Xna, na' lezka' bene' láwgake' choplalj yiz gan nak lo latje dach. <sup>37</sup>Moisés na'kze gože' benne' Israel ka', na' wnné': "Xanžo Dios sele'e to Benne' chele, Benne' galje' ladjw biche' lježle ka, na' gake' Benne' wchalje' lo wláz Dios. Sele'e Le' chele kan bsele'e neda'. Lekze' žon byenen wzé nagle-ne'." <sup>38</sup>Lezka' Moisés na'kze wzóalene' benne' ka' bdóbgake' che Dios lo latje dach,

na' benlen wbás che ya'abán' le' tzen, wbasen' bcháljlene' le' law Ya'a Sinaí na'. Moisés na' wzóalene' xa xtožo ka', na' Dios bdie' lo ne'e diža' la'y chie', da' zloe'elen kan gak gata' yela' nban chegak benách ka', na' bde Moisés na' dižan' lo na'gak za'sógake' ka' na' zejte že zaožo na'a.

<sup>39</sup>Bi gónegekle xa xtožo ka' góngake' da' bchi'le Moisés na' légake', san bzóagake' le' chela'ale, na' gónegekle' yeyéjgake' lo yežlyó Ejipton'. <sup>40</sup>Katen' wzóalene' na' law Ya'a Sinaí na', légake' belyi'e Aarón, benne' biche' Moisés na', na' wnnágake': "Žénelto' gono' dios ka' cheto', lo'a ka', nich chjaken lawto'. Bi nnezlto' bi gok che Moisés, bennen' bebeje' neto' lo yežlyó Ejipto." <sup>41</sup>Naž béngeken' to beždo' da' naken ya oro, na' bétgake' to zíla'do', na' bdégake'ba' law beže oron', na' béngeken' lni law bežen' dan' béngeken'. <sup>42</sup>Che len Dios bsane' légake', na' wléj yichje' légake'. Naž bka'n zéngake' yi' ka' da' zej nnitan' ya'abá. Kan nak da' ni nyejw le'e yiche kan wnnagak benne' ka' bcháljlene' lo wláz Dios, da' znnan:

Le'e, benne' Israel ka', žwlo'ole lawa' neda' bia beže ka', bia ka, betle-ba', na' bzeyle-ba', dan' benle lo latje dach choplalj yiz?

<sup>43</sup>Bi wlo'ole-ba' lawa' neda', san bia'le Molok, lo'a chelen'. Lezka' bia'le to da' naken ka belj ya'abá da' nzin' Dios Refán, dan' bzoale ka dios chele. Da' ka' gókgaken lo'a chele ka'. Le'kze béngeken' nich bka'n zenle légaken. Che len, yeba' le'e lo yežlyó chele,

na' wchi'a le'e zí'to'že gan že'  
yežlyó Babilonia.

<sup>44</sup>'Katen' wnnít'a'gak xa xto'žo ka'  
lo latje dach, na' gota' to yo'o laže'  
chégake' gan wdape chí'igake' da'  
bchi'le Dios, dan' gok bian' Dios  
wzóalene' légake'. Béngake' yo'o  
lažen' kan Dios gože' Moisés gonen',  
katen' gože' le' gonen' kan nak dan'  
ble'ele', da' bloe'l Dios le' law ya'a  
na'. <sup>45</sup>Lezka' bdégake' yo'o lažen'  
lo na'gak zí'ngake' ka' na' zejte že  
na' xa xto'žo ka' bedjwá'gaken' lo  
yežlyó nga, katen' wzoālen Josué  
légake', na' beká'agake' yežlyón' lo  
na'gak benách zí'to' ka', benne' ka'  
blag Dios lawgak xa xto'žo ka'. Ki  
béngake' yiz zan kate' bžinte že  
wzóá Dabí. <sup>46</sup>Dios wyáz laže'e  
Dabín', na' le' wnnable' Diosen' we'e  
le' latje gone' to yo'o gan soa Dios  
che Jakob. <sup>47</sup>Diosen' bi bi'e le' latje,  
san Salomón, zí'n Dabín', bene' to  
yo'o che Diosen!. <sup>48</sup>Ki bene', la'kze  
bi zoa Dios, Benne' wak zenlee, to  
lo yodo' da' bengak benách ka'. Kan  
nak da' ni wnná to benne' bchalje'  
lo wláz Dios, katen' wnné':

<sup>49</sup> Ya'abá chia' naken ga ži'a znna  
bi'a  
na' yežlyó naken ga zhoa ni'a.  
Ki wnná Xanžon: ¿Gonkzle le'  
to liža'?  
¿Zoakze to latje gan žon byenen  
yezí' laža'a?

<sup>50</sup> ¿Kege len na'kza' bena' yógo'te  
da' ki?

<sup>51</sup> Naž Esteban na' gože' benne'  
yodo' wchi'a laže' ka', na' wnné':  
—Le'e, benne' choch laže' ka', bi  
be žazen lo yichj lázdo'le. Nak  
zižje yichj lázdo'le kan žak chegak  
benách ka' bi zej nónbi'e Dios.

Zží'itezle che Dios Be' La'y. Kan  
bengak xa xto'le ka', lezka' žonle  
le'e. <sup>52</sup>Xa xto'le ka' wžia láže'gake'  
yógo'te benne' ka' bcháljgake' lo  
wláz Dios. Lezka' bétgake' benne'  
ka' wnnágake' zga'ale kan žala' la'  
Benne' Criston', Benne' Chawé', na'  
na'a, katen' bla' Benne' Chawen',  
le'ekze betle-ne' len na'gak benne'  
ka' bdá'gake' Le' le'e yag kroze.  
<sup>53</sup>Le'ekze nzi' lo na'le da' bsdle  
Dios, dan' bdegak wbás che ya'abá  
ka' lo na'gak xa xto'le ka', san bi  
žonle kan znnan.

### Žótgake' Esteban

<sup>54</sup>Kate' benne' yodo' wchi'a  
laže' ka' béngekle' da' ki, naž  
bžá'ale'egake' Esteban, na' lo yela'  
zž'a' chégake' le' bxej láygake'.  
<sup>55</sup>Naž Esteban na' bwie' ya'abale,  
na' zoālen Dios Be' La'y le', ble'ele'  
latje baní' gan zoa Dios, na' lezka'  
Jesusen', zie' kwit li že che Dios gan  
nak blo. <sup>56</sup>Naž wnné':

—Le wia nga. Zle'ela' nyajw  
ya'abá, na' ze Benne' Golje' Benách  
kwit li že che Dios.

<sup>57</sup>Naž benne' yodo' wchi'a  
laže' ka' bséjwgake' nággake', na'  
wžéžeya'agake' zižje, na' tzen  
belbága'gake' le'. <sup>58</sup>Wléjgake' le'  
na'le žoa'a yežen', na' bžé'egake'  
le' yej. Benne' ka' besbága'gake'  
Esteban na' zia bségake' laže' zelxóá  
yéngake' gan nak xni'a to benne' lie'  
Saulo katen' bžé'egake' Esteban na'  
yej. <sup>59</sup>Kate' ne zžé'egake' Esteban na'  
le', le' bliže' Dios, na' wnné':

—Xana' Jesús. Wzí' be' nakkza'.

<sup>60</sup>Naž byechwe', na' bzoa zibe'.

Wnné' zižje, na' wnné':

—Xan. Bi yesbago'o légake' dola' ni.

Kate' beyóž bchalje' da' ni, na' gote'.

**Saulo žbia laže'e benách  
ka' che Benne' Cristo**

**8** <sup>1-3</sup>Saulo bénlene' tzen benne'  
ka' bétgake' Esteban.

La' na'ze benne' ka' zka'n zéngake'  
Dios, na' žejlé'gake' che Jesusen',  
biá'gake' Esteban, na' bejkáche'gake'  
le'. Belbéželi'e chie'.

Kate' ža ka' benne' judío ka',  
benne' ka' bi žejlé'gake' che Jesusen',  
belbía láže'li'e benách ka' che Benne'  
Criston', benne' ka'zej nnite'e lo  
yež Jerusalén. Lezka' Saulo wžia  
laže'e benne' ka' žejlé'gake' chie'  
Le'. Wyoé'e lížgake' ka', na' bežwe'  
benne' byo ka', na' no'le ka', na'  
bsejwe' lágake' liž ya.

Naž yeláte'ze ka bdachgak benne'  
ka' žejlé'gake' che Benne' Criston',  
belgáselase' dot gan nbab Judea,  
na' gan nbab Samaria, na' lágakze  
benne' wbás ka' bsela' Benne'  
Criston' bgá'ngake' lo yež Jerusalén.

**Zžin diža' chawé' gan nbab Samaria**

<sup>4</sup>Benne' ka' belgáselase' jake'  
yógo'te latje, na' bzégake' diža'  
chawen!. <sup>5</sup>Naž Lip, to benne'  
žónlene' tzen benne' ka' belgáselase',  
wyeje' gan nbab Samaria, na' bzoa  
lie' che Benne' Criston!. <sup>6</sup>Bdobgak  
benách Samaria ka', na' dot  
láže'gake' bze nággake' da' wnná  
Lipen', dan' béngekle' xtiže'e, na'  
blé'egekle' da'zej nak bia' ka' da'  
žone!. <sup>7</sup>Ka' goken, dan' bene' ga  
bežojgak be'zan, be' xiwe' ka'zej  
yo'o benách ka', na' belbéžeya'an  
zižje, na' beyakgak benne' zan,  
benne' yižwé' ka', benne' ka' bi gok

sá'gake', na' benne' ka' gok nyokgak  
ni'a ná'gake'. <sup>8</sup>Ka' goken, bebégekle  
benne' ka' nníta'gake' lo yežen'.

<sup>9</sup>Wzóa to benne' lie' Smon ga na'.  
Nake' benne' zga'ale goke' benne'  
wžá' wnné ya'a lo yežen', na' ben  
láže'le' benne' Samaria ka', na' lekze'  
wnné' nake' benne' wak zente.

<sup>10</sup>Yógo'te benne' ka' bze nággake'  
che benne' ni, gan zzo law benne'  
gaxjw ka', na'zejte benne' blo ka',  
na' wnnágake': "Benne' ni, nzi' lo  
ne'e yela' wak zen che Dios." <sup>11</sup>Ka'  
goken, wdápegake' le' ba la'ne, dan'  
scha ba ben láže'le' lágake' len yela'  
wžá' wnné ya'a chie'.

<sup>12</sup>Kate' bejlé'gake' da' bzoa li Lipen'  
che diža' chawen' kan znnna bia'  
Dios, na' kan nak che Jesús, Benne'  
Criston', naž bezóagake' nis, benne'  
byo ka', na' no'le ka'. <sup>13</sup>Lezka' Smon  
na' bejlé' che Jesusen', na' bezóe'  
nis, na' wdáteze' tzen len Lipen'.  
Kate' ble'ele' yela' wak zen ka' da'  
zej nak bian' da' žon Lipen', bebanle  
Smon na'.

<sup>14</sup>Kate' benne' wbás ka' bsela'  
Benne' Criston', benne' ka' nníta'gake'  
lo yež Jerusalén, béngekle' kan  
goken, benne' ka'zej nbabe' Samaria  
ba nzi' lo ná'gake' xtiža' Dios, naž  
bsela'gake' Bedw len Zwa ga na'.

<sup>15</sup>Kate' Bedon' len Zwan' bžíngake'  
ga na', naž góta'yoegakle' Dios lo  
wláz benne' ka' žejlé'gake' che Benne'  
Criston', nich yedjsoa len Dios Be'  
La'y lágake'. <sup>16</sup>Kate' bžinte ža na', bi  
na' yedjsoa len Dios Be' La'y lágake'.  
Bezóazegake' nis nich gákgake' toze  
len Xanžo Jesusen'. <sup>17</sup>Naž Bedon'  
len Zwan' belxoa ná'gake' benne'  
Samaria ka'. Góta'yoegakle' Dios, na'  
bedjsoa len Dios Be' La'y lágake'.

<sup>18</sup>Kate' ble'el Smon, bennen' goke' wz'á, dan' goken katen' benne' wbás ka' bselá' Benne' Criston' belxóa nágake' benách ka', bedjsoalen Dios Be' La'y légake', na' gónele' chizjwe' légake' mežw, <sup>19</sup>na' gože' légake':

—Benn yela' wak ni chia', nich kate' xoa na'a nóte'teze benne', yedjsoalen Dios Be' La'y le'.

<sup>20</sup>Naž Bedon' gože' le', na' wnné': —Kwia yi' mežw chion' tzen len le', dan' žeklo' len mežw si'o yela' wak che Dios. <sup>21</sup>Bi nako' zi gónleno' da' ni tzen, dan' yichj lazdo'o bi naken chawe' law Dios. <sup>22</sup>Beyát laže' che da' kegle da' žono', na' góta'yoele Dios, cha' yenít lawe' chio' da' ni da' zza' lažo'o. <sup>23</sup>Zle'ela' nbago'o zia, na' njejo' lo yelj che da' xiwe'.

<sup>24</sup>Naž bež'i' Smon na', na' gože' légake':

—Le wlíž Dios, na' le gáta'yoele Xanžon' ni'a chia' neda' nich bi gak chia' nitó da' ba wnnale.

<sup>25</sup>Kate' Bedon' len Zwan' beyóž bzoa lígake' che Benne' Criston', na' bsédgekle' xtiža' Dios lo yežen', naž lezka' bcháljgake' che diža' chawen' gan zej nnita' da' zan lažgak benne' Samaria ka', na' wdé na' beyéjgake' lo yež Jerusalén.

### Lip zcháljlene' to benne' nbabe' yežlyó Etiopía

<sup>26</sup>Naž to wbás che ya'abá bcháljlene' Lip, na' gože' le':

—Wzó ža', na' wyéj zaka' gan zde wbíž byo' zag ka'. Žino' gan zla' nez da' zejen Jerusalén, na' zejten yež Gasa, nezen' zden latje dach.

<sup>27</sup>Naž wyó'o Lipen' nez, na' zeje' lo nezen', na' bejchage' to benne' nbabe' yežlyó Etiopía, benne' wbíž.

Lo yežlyó Etiopía na' naked' benne' blo law Kandase, no'len' znna bi'e benách Etiopía ka', na' žape chi'i benne' ni yógo'te yela' wnni'a che no'len', dan' žen' liže'. Wyéj benne' ni lo yež Jerusalén nich bka'n zene' Dios. <sup>28</sup>Na'a, zeyeje' laže', na' ži'e lo karret chie', na' žole' da' nyejw le'e yiche kan wnná Isaías, bennen' bchalje' lo wláz Dios že ni'te. <sup>29</sup>Naž Dios Be' La'y gože' Lipen', na' wnné':

—Wbiga' gan zej karreten', na' wyéjlenen.

<sup>30</sup>Kate' ba wbiga' Lipen' ga na', benle' che benne' wbižen'. Žole' da' nyejw le'e yiche dan' wnná Isaíasen'. Lipen' gože' le':

—¿Žejni'ilo' dan' žolo'?

<sup>31</sup>Bež'i' benne' Etiopía na', na' wnné': —¿Nakx gak chejn'ilan' cha' bi zoa no benne' wzejni'ile' neda'?

Naž góta'yoele' Lipen' kwene', na' kwé'lene' le' tzen lo karreten'.

<sup>32</sup>Dan' nyejw le'e yiche dan' žole', znnan ki:

Ka to zíla'do',  
bché'gake' Le' nich gótgake' Le',  
na' ka zíla'do',  
bia bi zbéžeba' kate' zchóggake'  
yícha'ba',  
lezka' ben Le', bi bsaljw žoe'e, na'  
bi be wnné'.

<sup>33</sup>Bzóagake' Le' chela'ale,  
na' bi biá'gake' latje no benne'  
wchi'a laže'e Le'.

¿Nozkze benne' gak wloe'ele'  
zia da' zej nbaga' benne' wláz  
chie' ka'?

Légakkze' bétgake' Le'.

<sup>34</sup>Naž benne' wbižen' wnnable'  
Lipen', na' gože' le':

—Žáta'yoele' le' wzejni'ilo' neda'.  
¿Noz benne' wnná bennen' bchalje'

lo wláz Dios da' ni kan nak chie'?  
¿Bchalje' chekze', o che benne'  
yoble?

<sup>35</sup>Naž len la' diža' nize wzó law  
Lipen', na' bzejni'ile' le' diža' chawen'  
kan nak che Jesusen'. <sup>36</sup>Katen' jez  
yo'e nez zjake', bžíngake' gan de  
nis. Naž benne' wbižen' gože' Lipen',  
na' wnné':

—Bwia nga. Že' nis nga. iWakkze  
yezó'a' nis?

<sup>37</sup>Lipen' gože' le':

—Cha' žejli'o dot lažo'o, gak yezó'  
nis.

Le' beži'e, na' wnné':

—Žejli'a che Jesús, Benne' Criston',  
nake' Zí'n Dios.

<sup>38</sup>Naž wleke' karret chien' žize,  
na' žoptie' bětjgake', na' wyázgake'  
lo nisen'. Naž Lipen' bezó'e benne'  
wbižen' nis. <sup>39</sup>Kate' bežójgake' lo  
nisen', Dios Be' La'y bechi'e Lipen',  
na' biž ble'l benne' wbižen' le'. Naž  
beyo'e nezen', zeyeje', na' žebele'.

<sup>40</sup>Kate' ba žakbe'l Lipen', ba zoe'  
lo yež Asoto. Wdíe' yógo'te yež ka'  
zej nnitan' ga na', na' bchalje' diža'  
chawen' ga bžintie' lo yež Sesarea.

### Saulo žeyake' che Benne' Cristo

**9** Xakte na' bi bsan Saulo zbia  
laže'e benne' ka' žejl'égake'  
che Xanžon', na' gónele' gote'  
légake'. Nich gone' ki wyeje' law  
bxoz blo, <sup>2</sup>na' wnnable' le' gone' to  
yiche wnná bia' da' chjo'e lawgak  
benne' wnná bia' ka' chegak yo'o  
ka' gan zdobgak benne' judío ka'  
nich yéngekle' xtiža' Dios, benne'  
ka' nnítiga'gake' lo yež Damasko, na'  
cha' chejxake'e benne' byo ka', o  
no'le ka' ga na', benne' žejl'égake'  
che Jesusen', na' gak yechi'e légake'

zej nžeje' lo yež Jerusalén. <sup>3</sup>Kate'  
Saulon' len benne' ka' žónlengake' le'  
tzen, nezej yoe'e nezen' zjake', na'  
kate' za' žíngake' lo yež Damaskon',  
ka' gaze wza'ni'ile'e to baní' da' zan'  
ya'abá, dan' wza'nín' gan zjake'.

<sup>4</sup>Naž Saulon' bgo'ne' lo yo, na' benle'  
chi'i to benne' ži'e le':

—Saulo, Saulo, čbiž chen' zbia  
lažo'o neda'?

<sup>5</sup>Saulo wnnable' Le', na' wnné':

—¿Noz Le', Xan?

Le' wnné':

—Naka' Jesús na'kze, Bennen' zbia  
lažo'o. Žsaka' zi' kwino', dan' zži'o  
chia'. Žak chio' kan žak che beže,  
bia ţsaka' zi' kwinba' kate' zlibba'  
yag ntoche' da' žóngekle'-ba' zi'.

<sup>6</sup>Naž Saulon' wzízli'e, na' bžebe'.  
Wnné':

—Xan, čbiž žénelo' gona'?

Xanžon' gože' le':

—Wyase, na' wyáz lo yežen', na'  
sel'a to benne' gan so', benne'  
wzenle' le' da' žala' gono'.

<sup>7</sup>Bžébegak benne' ka' zjáklene'  
Saulon' tzen, dan' béngekle' chi'in',  
la'kze bi blé'egakle' nitó benne'.

<sup>8</sup>Naž beyás Saulon', na' kate' bxá'  
yej lawe', bi be zle'ele'. Che len  
béxwgake' ne'e, na' bché'gake' le' lo  
yež Damaskon'. <sup>9</sup>Saulon' wzó'e ga  
na' chonne ža nchol yej lawe', na' bi  
be we'j bdawe'.

<sup>10</sup>Lezka' Ananías, to benne' žejli'e  
che Benne' Criston', zoe' lo yež  
Damaskon', na' Xanžon' blo'ee lawe'  
gan zoe' lo da' ble'e dáwe'le', na'  
gože' le':

—Ananías.

Le' bechebe', na' wnné':

—Zoa' nga, Xan.

<sup>11</sup>Xanžon' gože' le':

—Wzó ža', na' wyéj gan nak nezen' nzin' Nez Li, na' lo liž Judas wnnáb cha' zoa Saulo, benne' Tarso, ga na'. Žáta'yoele' Dios lo yo'on'. <sup>12</sup>Ba ble'e dáwe'le' za' to benne' lie' Ananías, na' choe'e gan zoe', na' xoa ne'e le' nich yejaljw yej lawe'.

<sup>13</sup>Naž beží'i Ananías na', na' gože' Le':

—Xan, benne' zan ba bzéngekle' neda' kan žon bennen', dan' benle'e da' zia chegak benne' ka' žejl'é'gake' chio', benne' ka' nníta'gake' Jerusalén. <sup>14</sup>Lezka' ze'e nga, na' lo wláz bxoz wnná bia' ka' nzi lo ne'e yela' wnná bia' goxwe' yógo'te benne' ka' zcháljlengake' Dios ni'a che Lo'.

<sup>15</sup>Naž Xanžon' gože' Ananíasen', na' wnné':

—Wyéj, dan' wžekza' neda' bennen' nich wzóa lie' chia' neda' lawgak benách zi'to' ka', na' lawgak benne' ka' znna biá'gake' légake', na' lezka' lawgak benách Israel ka'. <sup>16</sup>Wloe'ela' le' da' zan da' sákali'e lo wlaza' neda', katen' gone' xchina'.

<sup>17</sup>Naž Ananíasen' wyeje' ga na', na' wyoé'e yo'on'. Bxoa ne'e Saulon', na' gože' le':

—Bicha'a Saulo, Xanžo Jesús, Benen' bloe'e lawe' lo nez gan zo'o, bsele'e neda' nich yejaljw yej lawo', na' nich yedjsoalen Dios Be' La'y le'.

<sup>18</sup>La' na'ze da'zej naken ka zeza' bel ka' béxjwgaken lo yej lawe', na' la' beyálwjte yej lawe'. Naž wzó ža' Saulon', na' bezóe' nis. <sup>19</sup>Wdé na' we'j bdawe', na' beyák laže'e. Ka chope chonne ža wzóalene' benne' ka' žejl'é'gake' che Benne' Criston', benne' ka' nníta'gake' lo yež Damasko.

### Saulo zzoaa lie' che Benne' Cristo lo yež Damasko

<sup>20</sup>La' wzó lawte Saulo zzoaa lie' che Benne' Criston' gan nak lo yo'o gan zdobgak benne' judío ka' nich yéngelké' xtiža' Dios, na' wnné':

—Jesús na'kze nake' Zi'n Dios.

<sup>21</sup>Bebán láže'gak yógo'te benne' ka', benne' želenle' chie', na' wnnágake':

—¿Kege benne' ni bennen' bžia yi'e benne' ka' nníta'gake' lo yež Jerusalén, benne' ka' zcháljlengake' Dios lo la Jesusen'? Nich gone' ki ble'e ga ni, nich wchi'e légake' zej nžeje' lawgak bxoz wnná bia' ka' nníta'gake' lo yež Jerusalén.

<sup>22</sup>Saulon' gok chochže', na' bene' ga wžé' zédgekle benne' judío ka' nníta'gake' lo yež Damasko, dan' bloe'ele' légake' Jesús na'kze nake' Benne' Criston', Bennen' žxen láže'gake' yedjinná bi'e légake'.

### Želá Saulo lo na'gak benne' judío ka'

<sup>23</sup>Kate' ba gok zan ža, naž benne' judío ka' béngake' toze diža' gótgake' Saulon'. <sup>24</sup>Dot ža dot yele benne' judío ka' wžé' náwgake' le' gan zdégake' lo ze'e da' žape chi'in yežen', nich gótgake' le', san gókbe'ele Saulon' da' ženegekle' góngake' chie'. <sup>25</sup>Naž benne' ka' žejl'é'gake' che Benne' Criston' bché'gake' Saulon' žel, na' belwé'e le' to lo xkwit zen da' nžejen do, na' btínnegake' le' na'le lo ze'en' dan' žape chi'in yežen'.

### Žežín Saulo lo yež Jerusalén

<sup>26</sup>Kate' bežín Saulo lo yež Jerusalén, gónele' gónlene' tzen benne' ka'

žejl'égake' che Benne' Criston', san yógo'tegake' bžébegake' le', dan' bi žejl'égake' žejl'é Saulon' che Benne' Criston'. <sup>27</sup>Naž Bernabé bchi'e Saulon' gan zej nnita' benne' wbás ka' bsela' Benne' Criston'. Bzenle' lágake' kan gok che Saulon', na' kan ble'ele' Xanžon' lo nez, na' Xanžo na'kze bcháljlene' le', na' kan ben Saulon' lo yež Damasko, len yela' wechóg laže' bzoa lie' che Jesusen'. <sup>28</sup>Naž Saulon' wzóalene' lágake' lo yež Jerusalén, na' bénlene' lágake' tzen. <sup>29</sup>Len yela' wechóg laže' Saulon' bzoa lie' che Xanžon', na' bdíl diže'e len benne' judío ka', benne' ka' zcháljgake' diža' griego, na' lágake' gónegekle' gótgake' le'. <sup>30</sup>Kate' lježžo ka', benne' žejl'égake' che Benne' Criston' gókbe'egekle' da' ni, na' bché'gake' Saulon' lo yež Sesarea, na' bsela'gake' le' lo yež Tarso, da' naken laž Saulon'.

<sup>31</sup>Naž gok chawé' chegak yógo'te kwe' benách ka' che Benne' Criston', benne' ka' nnítá'gake' dot gan nbab Judea, na' gan nbab Galilea, na' gan nbab Samaria, na' gok chóchgake'. Bžébegake' Xanžon', na' belyane' dan' goklen Dios Be' La'y lágake'.

### Bedw žeyone' Eneas

<sup>32</sup>Yetó da' goken, kate' Bedw ne žejwíe' lježžo ka', ble'e gan zej nnita' benne' ka' žejl'égake' che Jesusen' lo yež Lida. <sup>33</sup>Bejxake'e to benne' lie' Eneas ga na', na' ba gok xono' yiz die' lo da'a dan' de'e yižwé', na' bi žak se'e. <sup>34</sup>Bedon' gože' le':

—Eneas, Jesús, Benne' Criston', žeyone' le'. Wyase, na' betób da'a chion'.

La' wyaste Enéasen!. <sup>35</sup>Yógo'te benne' ka' nnítá'gake' lo yež Lida,

na' lo yež Sarón, blé'egekle' le', na' bejl'égake' che Xanžon', na' beyákgake' chie'.

### Žat Dorkas, na' žebane'

<sup>36</sup>Yetó da' goken, lo yež Jope wzóá to no'le žejli'e che Benne' Criston', no'len' lie' Tabita, na' kan nak diža' griego lie' Dorkas. No'len' bene' zan da' zej naken chawé', na' da' žákłengaken benne' yache' ka'.

<sup>37</sup>Da' goken ža na', wdá' Dorkasen' yižwé', na' gote'. Wdé bdíbgake' le', bdíxjwgake' le' to lo yo'o gan nak da' chope kwia. <sup>38</sup>Dan' že' yež Jopen' gawze gan že' yež Lida gan zoa Bedon', benne' Jope ka', benne' žejl'égake' che Benne' Criston', béngekle' zoa Bedon' ga na'. Che len bsela'gake' chope benne' gan zoe'. Góta'yoegekle' le', na' belyi'e le':

—Bi želo' sá'leno' neto'.

<sup>39</sup>Naž la' wzó ža'te Bedon', na' wyéjlene' lágake'. Katen' bžine' ga na', la' belche'tie' le' gan nak lo yo'o gan de no'le gat na'. Naž no'le wzebe ka' bdóbgake' dot kwite', na' želbeže'. Bloé'egekle' le' laže' ka' chegak benne' byo ka', na' laže' chegak no'le ka', da' ka' ben Dorkasen' kate' ne wzóalene' lágake'.

<sup>40</sup>Naž Bedon' bebeje' yógo'te benne' ka' nnítá'gake' ga na' na'le. Naž bzoa zibe', na' bcháljlene' Dios. Byechje' gan de Dorkasen', na' wnné':

—Tabita, wyase.

La' bxa'te yej law Dorkasen'. Kate' ble'ele' Bedon', la' wyastie', na' wži'e.

<sup>41</sup>Bedon' bexwe' ne'e, na' bchise' le'. Naž bliž'e' benne' ka' žejl'égake' che Jesusen', na' lezka' no'le wzebe ka', na' bejzíe' Dorkasen' lágake', ba' bebane'. <sup>42</sup>Kan gok da' ni wzé diža'

chen dot lo yež Jope, na' bejle'gak benne' zan che Xanžon'. <sup>43</sup>Zan ža bga'n Bedon' lo yež Jopen' lo liž Smon, to benne' žon chawe'e yid za beže.

### Da' ben Bedw lo liž Kornelio

**10** Wzóa to benne' yež Roma lie' Kornelio lo yež Sesarea, na' zchi'e to gaywá' benne' žjake' lo wdile, benne' ka' légake' Benne' Italia Žjake' Lo Wdile. <sup>2</sup>Kornelion' zka'n zene' Dios, na' zžebe' Le'. Yógo'te benne' ka' nníta'gake' liže' žónlengake' le' tzen. Kornelion' znežjwe' mežw zan da' žáklenen benne' yache' ka', na' zcháljlentez' Dios. <sup>3</sup>Žedá chonne Kornelion' ble' dáwe'le' wyó'o to wbás che ya'abá gan zoe'. Wbasen' gože' le':

—Kornelio.

<sup>4</sup>Bžebe Kornelion'. Bwie' wbás che ya'abán', na' gože' le':

—ćBíz yi'o neda' Xan?

Wbás che ya'abán' gože' le', na' wnné':

—Dios ženle' da' zcháljleno'-ne', na' nnézkzele' da' žono', kan žákleno' benne' yache' ka'. <sup>5</sup>Na'a, žala' selo'o benne' ka' chjake' lo yež Jope, nich chejlžgake' to benne' lie' Smon, na' lezka' lie' Bedw. <sup>6</sup>Bennen' zoe' liž to benne' žon chawe'e yid za beže, na' lezka' lie' Smon, na' zoa liže' zoa'a nisdo'. Bedon' wzenle' le' da' žala' gono'.

<sup>7</sup>Kate' ba bezá' wbás che ya'abán', wbasen' bcháljlene' le', naž Kornelion' bliže' chope bi' wen žin chie' ka', na' to benne' žeje' lo wdile, benne' zka'n zene' Dios, na' žónlene' tzen benne' ka' nníta'gake' liž Kornelion'. <sup>8</sup>Kate' beyóž bzenle'

légake' yógo'te dan' goken, bsele'e légake' lo yež Jopen'.

<sup>9</sup>Ža chope ža, katen' zej yo'e nez, na' za' žíngake' gan že' yež Jopen', la' na'ze wžén Bedon' yíchjo'ole nich wcháljlene' Dios, ne nak wawbíz.

<sup>10</sup>La' na'ze wdón Bedon', na' gónele' gawe'. Xak žsi'ní'agake' da' gawe', ble'e dáwe'le'. <sup>11</sup>Ble'ele' njaljw ya'abá, na' to da' naken ka to laže' žeje' zen žetjen gan zoe', na' nžejen dap kwe'te. <sup>12</sup>Žiagak bia yixe' ka' law lažen', na' zan kan zej nakba', bia ka' zej nnita' tape ni'a ná'gakba', na' bia ka' želzobe kwíngakba' lo yo, na' bia ka' zoa xílgakba'. <sup>13</sup>Naž benle' chi'i to benne' ži'e le':

—Bedw, wzó ža'. Bet-ba', na' bdaw-ba'.

<sup>14</sup>Beží'i Bedon', na' wnné':

—O'o, Xan. Batkle bdawa' da' bi žala' gawto' o da' bi naken chawe'.

<sup>15</sup>Da' bežope chi'i benle' chi'i bennen', na' gože' le':

—Da' ben chawe' Dios, bi nnio' chen: “Bi naken chawe’.”

<sup>16</sup>Chonne chi'i gok da' ki, na' naž laže' zen na' la' beyepten ya'abá.

<sup>17</sup>Kate' ne žek zedle Bedon', na' žezá' laže'e biz zejlás dan' ble'e dáwe'le', benne' ka' bsela' Kornelion' bžíngake' ga na', na' wnnábgake' gan zoa liž Smon na'. <sup>18</sup>Kate' bžíngake' ža yo'on', blížgake' benne' ka' nníta'gake' ga na', na' wnnábgakle' légake' cha' zoa to benne' lie' Smon ga na', bennen' lezka' lie' Bedw. <sup>19</sup>Kate' ne žezá' laže' Bedon' kan nak dan' ble'e dáwe'le', Dios Be' La'y gože' le', na' wnné':

—Bwia nga. Ba bžingak chonne benne' ka' nga, na' žílgake' le'.

**20** Wzó ža' na'a. Betj zan yo'o. Bi gak chope lažo'o chéjleno' légake', dan' bsela'a nedkza' légake'.

**21** Naž betj Bedon' zan yo'o gan zej nnita' benne' ka' bsela' Kornelion', na' gože' légake':

—Neda' bennen' žiljle. čBiz chen' za'le nga?

**22** Bechébegake', na' bely'i'e le':

—Kornelio, bennen' zchi'e benne' ka' žjake' lo wdile, bsele'e neto'. Nake' benne' chawe', na' zžebe' Dios. Yógo'te benne' judío ka' zápegake' bennen' ba la'ne, na' zej nži'il'e le'. Yetó da' goken, to wbás che ya'abá bcháljlene' le', na' gože' le' sele'e benne' ka' yedjlížgake' le' yido' liže' nich yenle' da' nno'.

**23** Naž Bedon' wloé'e légake' lo yo'o, na' bi'e gan gá'ngake'. Kate' za' ža'ní' yetó ža, wyase Bedon', na' wyéjlene' légake'. Bale lježo ka' bén lengake' le' tzen, benne' ka' nnítagake' lo yež Jopen'.

**24** Ža chonne ža, bžíngake' lo yež Sesarea. Ba zoa Kornelion' zbeze' légake', na' ba btobe' biche'e ka', na' lježe' ka', benne' ka' nži'ižele', gan nak liže'. **25** Kate' wyáz Bedon' li'a, bžoj Kornelion' lo yo'on', na' bejchage' le'. Bzoa zibe' xni'a Bedon', na' bka'n zene' le' kan žonžo che Dios na'kze. **26** Bedon' besó že'e le', na' gože' le':

—Wzó ža!. Lezka' benne' yežlyó nga naka' kan nako' le'.

**27** Kate' ne zchalje' da' ni, wyo'ote Bedon' lo yo'on', na' bejxake'e zej ndobe benne' zan ga na'. **28** Naž Bedon' gože' légake', na' wnné':

—Le'e nnézkzelele da' bchi'le Moisés, dan' znnan bi žala' gonlen to benne' judío tzen o chó'olene' to

benne' zi'to'. Na'a, Dios ba bloe'ele' neda' bi žala' nnia' che nitó benne' nake' ka'ze o bi nake' chawe'. **29** Che len, kate' bližle neda', la' bidtia', na' bi gok chope laža'a. Na'a znnaba', čbiž chen' wnnele neda'?

**30** Naž bechebe Kornelion', na' wnné':

—Ba gok tape ža ka zoažo na'a, žedá chonne, kate' ne žona' wbás, na' žliža' Dios lo liža' nga, ble'ela' to ukwide' byo. Bloe'e lawbe' lawá neda', nákwbe' laže' da' žákti'ten.

**31** Gožbe' neda', na' wnnabe': “Kornelio. Dios ženle' da' znnabolo' ne', na' nnezle' da' žono', kan žákleno' benne' yache' ka'. **32** Na'a, bsela' benne' ka' lo yež Jope nich chejnnégake' to benne' lie' Smon, na' lezka' lie' Bedw. Bennen' zoe' gan nak liž to benne' žon chawe'e yid za beže, na' lezka' lie' Smon. Zoa liž bennen' žoa'a nisdo'. Kate' la' Bedon' ga zo' ni, wzenle' le' diža' chawen!” **33** Ka' goken, la' bsela'tia' benne' ka' chejtílgake' le', na' chawe' beno' bido' gan zoato' ni. Che len zoato' yógo'teto' nga, na' ndobto' law Dios nich wzé nagto' yógo'te da' ye' Dios le' wzenlo' neto'.

### Da' wnná Bedw liž Kornelio

**34** Naž wzó law Bedw zchalje', na' wnné':

—Da' li žejni'ila' na'a, Dios bi zwie' yela' zneze chegak benách ka', san tlebe kan zle'ele' žo'o. **35** Žaz laže' Dios benách ka' nnítagake' dot yežlyó nga, benne' ka' zžébegake' Le', na' žóngake' da' naken chawe'. **36** Dios bdie' xtiže'e lo na'gak benne' Israel ka', na' bsele'e to benne' bzoa lie' che diža' chawen' chie', da' žonen ga zga'n chawe'

benách ka', na' bžinen chežo lo na' Jesúš, Benne' Criston'. Lekze' nake' Xanžo yógo'težo. <sup>37</sup>Le'e nnézkzelele da' goken gan nbab Judea, dan' wzó law goken gan nbab Galilea wdé bchajl Zwa nich yezóagak benách ka' nis. <sup>38</sup>Nnézkzelele kan ben Dios che Jesusen', Benne' Nasaret. Bsele'e Dios Be' La'y len yela' wak zen chie', na' Le' bénlene' Jesusen' tzen. Nnézkzelele kan wdé', na' kan bene' da' naken chawé', na' beyone' yógo'te benne' ka' belzake'e lo na' da' xiwe'. Ki bene', dan' wzoalen Dios Le'. <sup>39</sup>Na'a, neto' zzoa lito' che yógo'te da' ben Jesusen' gan nbab Judea, na' lo yež Jerusalén, na' kan goken, bégake' Le', katen' bdá'gake' Le' le'e yag kroze. <sup>40</sup>Naž Dios besbane' Le' kate' gok chonnie ža nate', na' bene' ga bloe'e lawe' gan wzoato' neto'. <sup>41</sup>Bi bloe'e lawe' lawgak yógo'te benách ka', san lázveto' neto' bloe'e lawe'. Dios wžekze' neto' ža ni'te nich wzóa lito' che Jesusen', na' wej' bdáwlento' Le' tzen wdé bebane' lo yela' got. <sup>42</sup>Dios gože' neto' wzóa lito' chie' Le' lawgak benách ka', na' zzoa lito' che Benne' Criston', na' znnato' nake' Bennen' bzoakze Dios nich wchi'a laže' benne' ban ka', na' benne' gat ka'. <sup>43</sup>Lezka' yógo'te benne' ka', benne' bcháljgake' lo wláz Dios ža ni'te, bzoa lígake' che Jesusen', na' wnnágake': "Yógo'te benne' ka' chejlé'gake' chie' Le', Dios yenít lawe' dola' da' zej nbage'e ni'a che da' bene' Le'."

### Dios Be' La'y žedjsóalene' benne' zi'to' ka'

<sup>44</sup>Kate' ne zchalj Bedw da' ni, la' bžinte Dios Be' La'y, na' bedjsóalene' légake', yógo'te benne' ka' belyenle'

dan' bchajl Bedon'. <sup>45</sup>Bebán láže'gkle benne' judío ka', benne' ka' žejl'égake' che Benne' Criston', na' bžíngake' ga na' tzen len Bedon', dan' Dios Be' La'y, Benne' bselá' Xažo Dios, bedjsóalene' benne' ka' bi zej nake' judío. <sup>46</sup>Ki béngekla' zchaljgak benne' zi'to' ka' diža' yoble, na' zka'n zéngake' Dios. <sup>47</sup>Naž bchajl Bedon', na' wnné':

—¿Wak no benne' wžóngake' benne' ki nich bi yezóagake' nis? Nak bia' Dios Be' La'y bedjsóalene' légake', kan bedjsóalene' žo'o, benne' judío ka'.

<sup>48</sup>Wnná Bedon' yezóagake' nis dan' nzi' lo ná'gake' Xanžo Jesúš. Naž benne' ka' góta'yoegkle' Bedon' gá'nlene' légake' chope chonnie ža ka'.

Da' wnná Bedw lawgak benne' judío ka', benne' ka' che Jesúš lo yež Jerusalén

**11** Béngekla' benne' wbás ka' bselá' Benne' Criston' len lježžo ka' nníta'gake' gan nbab Judea, kan benne' ka' bi zej nake' judío wzí' lo ná'gake' xtiža' Dios. <sup>2</sup>Kate' bežín Bedw lo yež Jerusalén, na' lježžo judío ka', benne' žejl'égake' che Benne' Criston', bdil díža'gake' len le'. <sup>3</sup>Belyi'e Bedon':

—¿Biz chen' wyó'oleno' benne' ka' bi zej nake' judío, na' bdáwlento' légake' tzen?

<sup>4</sup>Naž wzó law Bedon' zzejni'ile' légake' kan nak dot dan' goken, <sup>5</sup>na' wnné':

—Wzó lo yež Jope, na' kate' ne zcháljlena' Dios, blee'e dáwe'la' to da' blee'e'l Dios neda'. Ble'ela' to da' naken ka to laže' žeje zen, dan'

nžejen dap kwe'te. Betjen zan ya'abá, na' bžinen gan zoa'. <sup>6</sup>Katen' bwian', nich le'ela' da' žian lawlen, ble'ela' bia yixe' ka'zej nnita' tape ni'a nágakba', bia yixe' snia ka', na' bia ka' želzobe kwíngakba' lo yo, na' bia ka' zoa xílgakba'. <sup>7</sup>Benla' chi'i to benne' gože' neda': "Bedw, wzó ža'. Bet-ba', na' bdaw-ba'." <sup>8</sup>Naž goža'-ne': "O'o, Xan. Batkle bdawa' da' bi žala' gawto', o da' bi naken chawe'." <sup>9</sup>Naž da' bežope chi'i bliž benne' ya'abán' neda', na' gože' neda': "Da' ben chawe' Dios, bi nno chen: bi naken chawe'." <sup>10</sup>Chonne chi'i gok da' ni, na' naž dot dan' ble'ela' la' beyepten ya'abá. <sup>11</sup>La' na'ze bžíntegak chonne benne' ža yo'o gan zoa', benne' ka'zej nžoje' lo yež Sesarea. Bsel'a' to benne' lie' Kornelio légake', na' bedjdíljgake' neda'. <sup>12</sup>Dios Be' La'y gože' neda': "Wyejlen légake', na' bi gak chope lažo'o." Lezka' wzá'lengak žopte lježzo ki neda' tzen, na' wyejto' lo yež Sesarea gan wyo'oto' liž to benne' zoe' ga na'. <sup>13</sup>Bennen' bzenle' neto' da' ble'ele' kate' bla' to wbás che ya'abá lo liže'. Wzíe' lawe', na' gože' le': "Na'a bsel'a' benne' ka' chjake' lo yež Jope, nich chejnnégake' to benne' lie' Smon, na' lezka' lie' Bedw. <sup>14</sup>Bennen' wzenle' le' diža' chawen' kan gak yeló' le', na' lezka' yelagak yógo'te benne' ka' nnít'a'gake' ližo'!" <sup>15</sup>Katen' wzó lawá zcháljlena' légake', na' Dios Be' La'y bedjsóalene' légake' kan bedjsóalene' žo'o zga'ale. <sup>16</sup>Naž bejsá' laža'a da' wnná Xanžon', katen' wnné': "Da' li Zwa bezóe' benách ka' nis lo nis, san le'e, gak chele da' zloé'ezele yela' žezóa nisen', dan' Dios Be'

La'y yedjsóalene' le'e." <sup>17</sup>Che len, cha' Dios bsele'e Dios Be' La'y nich bedjsóalene' légake', tlebe kan bene' chežo žo'o, nolžo žejležo che Xanžo Jesúš, Benne' Criston', čnozkze neda' wži'a che Dios?

<sup>18</sup>Naž, kate' béngekle' da' ni wnníta'gake' žize, na' bka'n zéngake' Dios. Wnnágake':

—Ki naken, Dios žwe'e latje benne' ka' bi zej nake' judío, žeyát láže'gake' nich gata' yela' nban da' zejlí kanne chégake'.

### Benne' yež Antiokía ka' žejlé'gake' che Benne' Cristo

<sup>19</sup>Katen' benne' judío ka', benne' bi žejlé'gake' che Benne' Criston', bétgake' Esteban, na' belbía láže'gake' yezika' benne' ka' žejlé'gake' chie', naž bzonnjgak benne' ki, na' góslasgake'. Bejnníta'gake' yež zan gan nbab Fenisia, na' lo yežlyó Chipre, na' lo yež Antiokía, gan bzoa lígake' che xtiža' Dios, san láwgakze benne' judío ka'. <sup>20</sup>Lezka' yezika' benne' ka' bénlengake' légake' tzen, benne' ka' zej nbabe' yežlyó Chipre, na' benne' yež Sirene ka'. Benne' ki, kate' bžíngake' lo yež Antiokía, lezka' bcháljlengake' benne' zi'to' ka', na' bzoa lígake' che diža' chawen' kan nak che Xanžo Jesúš. <sup>21</sup>Yela' wak che Xanžon' wzóalenen légake', na' benne' zan bejlé'gake' che Xanžon', na' beyákgake' chie' Le'.

<sup>22</sup>Kate' bžin diža' kan gok da' ni, benne' ka' che Benne' Criston', benne' nnít'a'gake' lo yež Jerusalén, béngeklen', na' bsela'gake' Bernabé nich cheje' lo yež Antiokía na'. <sup>23</sup>Kate' Bernabén' ble'e lo yež

Antiokía, b<sub>le</sub>'ele' da' žonn Dios chégake', na' bebele'. Goze' l<sub>é</sub>gake' žala' chejlé' tezgake' che Xanžon' dot láže'gake'. <sup>24</sup>Bernabén' nake' benne' chawé', na' Dios Be' La'y zóalene' le', na' dot láže'e žejl'i'e che Benne' Criston'. Ni'a che da' bchalj Bernabén', benne' zan lo yežen' bejlé'gake' che Xanžon'.

<sup>25</sup>Wdé na', wyéj Bernabén' lo yež Tarso, na' bejdilje' Saulo. Kate' bežel-le'-ne', bchi'e le' lo yež Antiokían'. <sup>26</sup>Dot to yiz wnníta'gake' ga na', na' bénlengake' tzen benne' ka' zej nake' che Benne' Criston', na' bségekle' benne' zan ka'. Lo yež Antiokían', benne' ka' žejlé'gake' che Jesusen' wzí lágake' da' nežw chi'i Benne' Cristiano ka', da' zejlás Benne' Zej Yoe' Benne' Criston'.

<sup>27</sup>Kate' ža ka' bałe benne' ka', benne' zcháljgake' lo wláz Dios, bžójgake' lo yež Jerusalén, na' bžíngake' lo yež Antiokían'. <sup>28</sup>Wzé Agabo, to benne' žónlene' benne' ka' tzen, na' lo wláz Dios Be' La'y bzejni'ile' l<sub>é</sub>gake', na' wnné':

—Za' gak wbín dot yežlyó nga.

Gok wbín na' katen' znnna bia' Klaudio, benne' Roma. <sup>29</sup>Naž bchebe láže'gak benne' ka' žejlé'gake' che Benne' Criston', benne' nníta'gake' lo yež Antiokía, séla'gake' ka da' nápegake', da' gáklenen lježzo ka' nníta'gake' gan nbab Judea. <sup>30</sup>Ki béngeke', na' dan' bnézjwgake', bdégaken' lo na'gak Bernabén', na' Saulon' nich chjwá'gaken' lawgak benne' gole ka', benne' žape chí'igake' benne' ka' che Benne' Criston', benne' nníta'gake' gan nbab Judea.

Žótgake' Jakob, na'  
žséjwgake' Bedw liž ya

**12** Kate' ža ka' Herodes, benne' znnna bi'e, bene' ga békwgake' bałe benne' ka' che Benne' Criston', nich wsaka' zí'gake' l<sub>é</sub>gake'. <sup>2</sup>Herodes na' bsele'e benne' ka', na' bétgake' Jakob, benne' biche' Zwa. Bé'gake' le' ya ntoche'. <sup>3</sup>Kate' gókbe'ele Herodes na' wyáz láže'gak benne' judío ka' da' ni, na' bene' ga békwgake' Bedw. Gok da' ni ža ka' kate' žak lni katen' žawgake' yet xtil da' bi nzi' kwa zichj chen. <sup>4</sup>Wdé békwgake' Bedon', na' bséjwgake' le' liž ya, na' bdégake' le' lo na'gak tape kwe' benne' žjake' lo wdile Wnníta'gake' tape' to to kwe' ka'. Ka' béngeke' nich gape chí'igake' le'. Bžia láže' Herodes na' yebeje' Bedon' lawgak benách ka' te Lni Pasko', lni na' žejdínnegekle' kan ben Dios katen' yebeje' benách judío ka' lo yežlyó Ejipto. <sup>5</sup>Ka' goken, wdape chí'igake' Bedon' lo liž ya na', san benne' ka' che Benne' Criston' bcháljlentezegake' Dios, na' wnnábgekle' Le' gáklen' Bedon'.

Dios žebeje' Bedw liž ya

<sup>6</sup>Kate' za' žin ža žia láže' Herodes yebeje' Bedw liž ya na' nich gote' le', la' že' na'ze de Bedon' ztase', na' zej nnita' chope benne' žjake' lo wdile kwit Bedon', na' nžeje' len chope do ya. Wnníta'gak yebale benne' ka' žjake' lo wdile ža yo'o liž ya na', na' žape chí'igaken'. <sup>7</sup>La' na'ze to wbás che ya'abá che Xanžo Dios b<sub>lo</sub>e' lawe' ga na', na' wza'ni'le'e baní' liž ya na'. Wbás che ya'abán' wdane'

le'el sina' Bedon', na' besbane' le', na' gože' le':

—Wyase.

Naž beyéž do yan' dan' nžejen na' Bedon'. <sup>8</sup>Wbás che ya'abán' gože' le', na' wnné':

—Bchej li'o, na' blej zelo'.

La' bente Bedon' da' ni. Naž wbás che ya'abán' gože' le', na' wnné':

—Bxoa laže' yeno', na' da len neda'.

<sup>9</sup>Bežój Bedon', na' wyéjlene' wbás che ya'abán', san bi žákbe'ele' cha' da' žon wbasen' naken da' li. Gokle' yele znnele. <sup>10</sup>Katen' ba wdégake' gan zej nnita' benne' nežw ka', na' benne' bežope' ka', benne' žjake' lo wdile, benne' ka' žape chí'igake', na' bžíngake' gan zoa da' naken ya, da' nbagan' gan žó'ogake' liž ya na', gan žežójgake' lo nez che yež. Gan žó'ogake', žakze chen wyaljwn. Kate' bžójgake', belzé'e gan bžíngake' yetó nez, na' wbás che ya'abán' la' bezá'alentie' Bedon!. <sup>11</sup>Naž gókbe'ele Bedon', na' lo yichj lázdo'ze' wnné':

—Na'a nnezla' da' li bsela' Xanžo Dios to wbás che ya'abá chie', na' beslé' neda' lo na' Herodes, na' lo yógo'te da' gónegekle benne' judío ka' góngake' chia'.

<sup>12</sup>Kate' ne yo'o nez Bedon', žesá' laže'e kan nak da' goken, na' ble'e ža' yo'o liž Lia, xna' Zwa, xkwiden' zoa yetó labe' Markos. Lo yo'on' zej ndobe benne' zan, benne' žežlé'gake' che Benne' Criston', na' zcháljlengake' Dios. <sup>13</sup>Katen' bliž Bedon' gan žó'ogake' li'a, bžoj to xkwide' no'le lebe' Rode nich nnezlbe' nožen!. <sup>14</sup>Katen' beyónbia'be' chi'i Bedon', lo yela' žebél chebe' bi bsáljwbén, san taríaze beyejbe' lo yo'on', na'

bejzenlbe' benne' ka' nnítá'gake' ga na', na' wnnabe':

—Zoa Bedon' ža yo'o.

<sup>15</sup>Naž belyi'e-be':

—Nak yał yichjo'.

Lebe' chochže ben xtíža'be' naken ki. Naž wnnágake':

—Kege le'. Bxin chelgen'.

<sup>16</sup>Xak na' bi wzóa ži Bedon', žliž'e' benne' ka' nnítá'gake' lo yo'on'. Kate' bsáljwgake' yo'o, to belnítzele' katen' blé'egekle' le'. <sup>17</sup>Naž Bedon' bchis ne'e nich nnítá'gake' žize, na' bzenle' légake' kan ben Xanžon', bebeje' le' liž yan'. Gože' légake':

—Le chejzenle Jakob, na' lježžo ka' kan goken.

Naž bežój Bedon' ga na', na' wyeje' ga yoble.

<sup>18</sup>Kate' za' ža'ní' ža na', wžé' zédgekle benne' ka' žjake' lo wdile kan goken, dan' biž yo'o Bedon' liž yan'. <sup>19</sup>Naž bsela' Herodes benne' ka' chejxí'gake' Bedon'. Katen' bi bžélgekle' le', wnnable' benne' ka' žjake' lo wdile, benne' ka' wdape chí'igake' Bedon', dot da' goken. Wdé na' Herodes na' gože' ni'a ne'e ka' gótgake' benne' ka' žjake' lo wdile. Naž bezá' Herodes na' gan nbab Judea, na' wyeje' lo yež Sesarea, gan bga'ne'.

### Kan got Herodes

<sup>20</sup>Kate' ža ka' benne' yež Tiro ka', na' benne' yež Sidón ka' zdil díža'gake' len Herodes. Zga'ale benne' ka' nnítá'gake' lo yežlyó che Herodes na' belsele'e da' žiažje chegak benne' ka' nnítá'gake' lo yež Tiro, na' lo yež Sidón, san dan' zža'a Herodes na' légake', biž bi želsele'e chégake'. Naž benne' Tiro ka', len

benne' Sidón ka', gókgake' toze, na' béngake' ga bchálj Blasto lo wláz lágake' law Herodes na'. Nak Blaston' wen žin blo law Herodes na'. Benne' Tiro ka', len benne' Sidón ka', gónegekle' zíngake' law Herodes na', nich nnábgekle' le' ga'n chawé' diža' bizjw chégake'. <sup>21</sup>Naž Herodes na' bžia bi'e to ža yenle' chégake', na' ža na' wži'e latje chie' gan zchi'a laže'e bi da' žaken, nakwe' to laže' da' zakan', na' bchalje' láwgake'.

<sup>22</sup>Naž wžézeya'agak benne' ka', na' wnnágake':

—iKege bénne'ze nga! iDios na'kze zchalje'!

<sup>23</sup>La' na'ze to wbás che ya'abá che Xanžo la' be'tie' le' dan' lekze' wzi'e yela' zka'n zen da' žala' gaken che Dios. Naž golj bzoga' le' Herodes na', na' gote' dan' žáwgakba' le'.

<sup>24</sup>Naž wzé diža' kan nak che Xanžon', na' belyán benne' ka' nzi' lo ná'gaken'.

### Bernabé len Saulo žejcháljgake' diža' chawé' da' nežw chi'i

<sup>25</sup>Kate' Bernabé len Saulo ba bdégake' mežwn' da' btobgak benne' ka' che Benne' Criston' lo na'gak benne' gole ka', benne' žape chí'igake' benne' ka' che Benne' Criston', benne' ka' nnítá'gake' lo yež Jerusalén, na' bezá'gake' ga na', na' beyéjgake' lo yež Antiokía. Lézka' bché'gake' Zwa, xkwiden' zoa yetó labe' Markos.

**13** La' ža na'ze wnnítá'gak benne' ka' zcháljgake' lo wláz Dios, na' benne' wsedle ka', lo yež Antiokía, benne' ka'zej nbáblene' benne' ka' che Benne' Criston' lo yežen'. Ki lágake':

Bernabé,  
Smon, (lezka' lie' Benne' Gasj),  
Lusio, (benne' yež Sirene),  
Saulo,  
Manaén, (benne' bgól-lene' tzen  
Herodes, benne' znnna bi'e gan  
nbab Galilea).

<sup>2</sup>Katen' zej ndobe benne' ki law Xanžon', na' žóngake' wbás, Dios Be' La'y gože' lágake', na' wnné':  
—Le kwej Bernabé len Saulo cheze chia' nich chjéngake' žin na' dan' bliža' lágake' góngaken'.

<sup>3</sup>Katen' beyóž béngake' wbás, na' bcháljlengake' Dios, naž bxoá ná'gake' chope' ki, na' bséla'gake' lágake'.

### Wbás ka' zcháljgake' diža' chawé' lo yežlyó Chipre

<sup>4</sup>Naž Bernabé len Saulo jake' lo yež Seleusia dan' bsela' Dios Be' La'y lágake' ga na', na' belbene' to lo barkw da' bchen' lágake' gan nak to yežlyó lo nisdo' da' nzin' Chipre.

<sup>5</sup>Kate' bžíngake' lo yež Salamina, bcháljgake' xtiža' Dios ga nak lo yo'o ka' gan zdobgak benne' judío ka' nich yéngake' xtiža' Dios. Zej nchi'e xkwide' Zwa nich gáklenbe' lágake'. <sup>6</sup>Kate' beyóž wdégake' yógo'te yeždo' ka' zej nnitan' lo yežlyó Chipren', da' zoan lo nisdo', naž bžíngake' lo yež Pafos gan bejxáka'gake' to benne' judío lie' Barjesús. Nake' benne' wžá' wen laže', na' znné' zchalje' lo wláz Dios.

<sup>7</sup>Benne' ni zóalene' Serjio Paulo, to benne' wnná bia', benne' jejni'ile'. Benne' wnná bian' bliže' Bernabén' len Saulon', dan' gónele' yenle' xtiža' Dios. <sup>8</sup>Naž benne' wžán' beži'e chegak Bernabén', na' Saulon', dan'

gónele' gone' ga bi chejlé' benne' wnná bian' che Dios. Benne' wzán' lezka' lie' Elimas len xtíža'gak benne' zi'to' ka'. <sup>9</sup>Naž Saulon', bennen' lezka' lie' Pablo, bzúa choch lawe', na' zoalen Dios Be' La'y le', bwie' Elímasen', <sup>10</sup>na' gože' le':

—Le', benne' wen laže', na' benne' wen da' kegle. Nako' ka zi'nkze da' xiwe', na' bi zle'elo' chawe' yógo'te da' naken chawe!. ¿Bi wsano' da' žono', zži'o che diža' chawen' che Xanžon', na' žsejo' xnez no benne' žénele' chejli'e chie' Le'? <sup>11</sup>Na'a, Xanžo na'kze wsaka' zi'e le', na' chol yej lawo', na' bi le'elo' wbíž bale ža ka'.

La' wchołte yej law Elímasen', na' wdé' nile na'le, žilje' no benne' goxwe' ne'e, nich wchi'e le'. <sup>12</sup>Katen' benne' wnná bian' ble'ele' da' goken, na' bebanle' kan nak xtíža' Xanžon', na' bejli'e che Benne' Criston'.

### Da' ben Pablo len Bernabé lo yež Antiokía gan nbab Pisidia

<sup>13</sup>Naž Pablo len benne' ka' žónlengake' le' tzen wzéngake' to lo barkw, na' bezá'gake' lo yež Pafos, na' bžíngake' lo yež Perje gan nbab Panfilia. Lo yežen' xkwidé' Zwa blá'alenbe' légake', na' beyejbe' lo yež Jerusalén. <sup>14</sup>Wdé na' bezá'gake' lo yež Perjen', na' jake' lo yež Antiokía gan nbab Pisidia. Lo yežen', katen' nak ža la'y chegak benne' judío ka', belyoé'e lo yo'o gan zdóbgake' nich yéngekle' xtíža' Dios, na' lo yo'on' wzé'gake'. <sup>15</sup>Naž to benne' zoe' ga na' bele' to da' bsedle Moisés, na' lezka' to da' wnná to benne' bchalje' lo wláz Dios. Wdé na' benne' wnná bia' che yo'on'

bsele'e to benne', na' bcháljlene' Saulon', na' Bernabén', na' wnné':

—Le'e, lježto' ka'. Cha' nche'le to da' nnale da' wzejni'ilen neto', le nnan.

<sup>16</sup>Naž wzó ža' Pablon', na' bchis ne'e nich kwé'gake' žize, na' wnné':

—Le wzé nag da' yapa' le'e, benne' Israel ka', na' le'e, nole zžébele Dios. <sup>17</sup>Xanžo Dios, Bennen' zka'n zengak benne' Israel ka', wžekze' xa xtožo ka', na' bene' ga belyánli'e katen' gókgake' benne' zi'to' ka' lo yežlyó Ejipto. Wdé na' len yela' wak zen chie' bebeje' légake' lo yežlyón. <sup>18</sup>Choplalj yiz Dios goke' zen laže' len légake' katen' wdágake' dot lo yo biž lo latje dach. <sup>19</sup>Kate' beyóž bchinne' gaže kwe' yež ka' wnníta'gaken lo yežlyó Kanaán, na' bnezwje' xa xtožo ka' yežlyó chegak benne' ka'. <sup>20</sup>Wdé na', da' goken tape gaywá' chi yon yiz, Dios bnnite' benne' ka' nich wchi'a laže'le' légake' na' zejte wzóa Samuel, bennen' bchalje' lo wláz Dios. <sup>21</sup>Naž belnnable' Dios wzóe' to benne' nich nna bi'e légake', na' Dios bzoe' Saúl, zi'n Sis, to benne' nbáblene' za'só Benjamín ka' nich nna bi'e légake', na' ki ben Saúl na' choplalj yiz. <sup>22</sup>Wdé na' Dios beké'e Saúl na', na' bzoe' Dabí nich nna bi'e légake'. Dios blo'e'ele' kan nak Dabín', katen' wnné: "Nnezla' Dabí, zi'n Isaí, žone' da' žaz laža'a neda', na' gone' yógo'te da' žénela' gone!" <sup>23</sup>Ladjw za'só Dabín', Dios bene' ga golj Jesusen' nich yeslé' benne' Israel ka', kan zga'ale bchebe laže' Dios gone'.

<sup>24</sup>Zga'ale kate' bla' Jesusen', bchalj Zwa lawgak yógo'te benne' Israel ka' nich yeyát láže'gake', na' yezóagake' nis. <sup>25</sup>Katen' za' yejóž wchálj Zwan',

na' wnné': “¿Nozkze žéklele naka' neda'? Bi naka' Benne' Criston', Bennen' žala' yide'. Le wia nga. Za' la' Bennen' ga zoa' ni, na' neda' bi naka' zi kweja' ūzele' da' žleje'.”

<sup>26</sup>Le'e, ljéža'do' ka', le'ekzle nakle za'só Bran len nole le'e zoale nga, na' žébele Dios. Dios na'kze bsebale diža' ni chele nich yelale. <sup>27</sup>Benne' ka' wnníta'gake' lo yež Jerusalén len benne' ka' wnná biá'gake' légake', bi gókbe'egekle' Jesusen' nake' Benne' Criston', na' bi bejnf'igekle' da' nyejw le'e yiche dan' wnnagak benne' ka' bcháljgake' lo wláz Dios, žedlen kan nak che Jesusen', la'kze žólgaken' ža la'y ka', san lo yela' bi žejni' il chégake' bengake' da' benen ga bžin dan' znnna dižan' katen' belchoge' che Jesusen' gate'. <sup>28</sup>La'kze bi bžélgekle' bi da' nbaga' Jesusen' nich chóggake' chie' gate', san belnnable' Pilato yi'e benne' ka' gótgake' Le'. <sup>29</sup>Kate' beyóž bengake' yógo'te da' nyejw le'e yiche kan žala' gaken chie', belétjgake' Le' le'e yag kroze, na' belkache'e Le' lo yežw ba. <sup>30</sup>Naž Dios besbane' Le' lo yela' got, <sup>31</sup>na' zan ža bloe'e law Jesusen' lawgak benne' ka' wdálengake' Le' tzen katen' wdé' gan nbab Galilea, na' ble'e lo yež Jerusalén. Na'a, zzoa ligak benne' ka' chie' Le' lawgak benach ka'.

<sup>32</sup>Ka' naken, lezka' neto' zháljlento' le'e diža' chawen' kan nak dan' bchebe laže' Dios gone' chegak xa xtožo ka'. <sup>33</sup>Dan' bchebe laže' Dios gone' chégake', Lekze' bene' ga goken lawžo žo'o, nakžo za'sogake' ka'. Ki bene' katen' besbane' Jesusen', na' goken kan nyejw le'e yiche gan zoa salmo da'

chopen', dan' znnan ki: “Le' nako' Zi'na'. Neda' bzoakza' Le'.” <sup>34</sup>Ka naken, Dios besbane' Le' lo yela' got nich bi kwia yi' bela' žen chie', Dios na'kze wnné' ki: “Wnezjwa' chio' da' ba nez žen da' bchebe laža' che Dabí.” <sup>35</sup>Che len lezka' nyejw le'e yiche, gan zoa yetó salmo, da' znnan ki: “Bi go'o latje ga'n benne' la'y chio' gan kwia yi' bela' žen chie'.” <sup>36</sup>Da' goken che Dabín' nak bian'. Wdé bene' žin lawgak benne' wláž chie' ka', kan Dios gože' le' gone', naž gote', na' wló'ogake' le' lo yežw ba gan wnníta'gak xa xta'we' ka', na' wzía yi' bela' žen chie'. <sup>37</sup>Na'a, kan nak che Jesusen', Dios besbane' Le', na' bi wzía yi' bela' žen chie' lo yežw ba. <sup>38</sup>Le'e, ljéža'do' ka', žala' nnézlele da' ni da' zzenla' le'e. Ni'a che da' ben Jesusen' Dios ženít lawe' chele le'e dola' da' nbága'le. <sup>39</sup>Na'a, Dios žeyón chawe'e yógo'te benne' ka' žejlé'gake' che Jesusen', na' žeké'e dola' ka' da' bi gok yeká'a da' wnná xtiža' Dios, dan' bde Moisés chežo. <sup>40</sup>Le gape chi'i kwinle na'a nich bi gak chele da' nyejw le'e yiche dan' wnnagak benne' ka' bcháljgake' lo wláz Dios, da' znnan ki:

<sup>41</sup> Le wia nga, le'e, benne' ka' bi žaple neda' ba la'ne.

Yebán láže'le, san lo yela' bi žejlé' chele gatle.

Neda' gona' to žin ža ni zoale le'e,

na' la'kze no benne' wlo'e ele' le'e da' zejlás žin na', bi chejle'le chie'.

<sup>42</sup>Kate' Pablón' len benne' ka' žónlengake' le' tzen bežójgake' lo yo'o gan zdobgak benne' judío

ka' nich yéngekle' xtiža' Dios, naž góta'yoegakle benne' ka' légake' wzéngekle' légake' da' ki kate' žin yetó že la'y chégake'. <sup>43</sup>Kate' benne' ka'zej ndobe' lo yo'on', bežójgake' ga na', benne' zan, benne' judío ka', len benne' ka' beyákgake' judío, benne' ka' zka'n zéngake' Dios, bénlengake' Pablón' len Bernabén' tzen. Chope' ki bcháljlengake' légake', na' ben chóchgake' légake' nich gá'nteze chóchgake', na' nich wxén láže'gake' da' gonnze Dios chégake'.

<sup>44</sup>Yexono' že ka' katen' bžin yetó že la'y chégake', na' bdobgak yeláte'ze ka bdachgak benne' ka' che yežen' nich yéngekle' xtiža' Dios. <sup>45</sup>Naž bgé'egekle benne' judío ka', benne' bi žejl'é'gake' che Jesusen', kate' blé'egekle' benne' zan ka', na' che len wnnégake' che da' znna Pablón', na' beží'igake' chen. <sup>46</sup>Naž Pablón' len Bernabén', len yela' wechógláže' chégake', belyi'e benne' judío ka', na' wnnágake':

—Ben byenen wzenlto' le'e néžwle xtiža' Dios, san dan' zzoale chela'ale diža' ni, da' žonle nak bian' bi nakle zi gata' yela' nban da' zejlí kanne ni chele, che len, na'a chejto' gan zej nnita' benne' zi'to' ka'. <sup>47</sup>Lezka' gož Xanžo Dios neto' gonto' ki, na' wchaljto' che Benne' Criston' lawgak benne' zi'to' ka'. Ki znna da' wnná Dios kan nak che Benne' Criston', katen' wnné':

Bzoa' Le' nich gako' baní' chegak benne' zi'to' ka', na' gako' Benne' yeslé' benách ka' dot yežlyó nga.

<sup>48</sup>Kate' benne' zi'to' ka', benne' ka' nnítagake' ga na', béngekle' da' ni,

na' bebégekle', na' bka'n zéngake' Xanžon' ni'a che xtiže'e. Yógo'te benne' ka' ba ben Dios chégake' gata' yela' nban da' zejlí kanne chégake', bejlé'gake' che Benne' Criston'. <sup>49</sup>Ka' goken, wzé xtiža' Xanžon', na' benne' yógo'te yež zej nnitan' yežlyón', béngeklen'. <sup>50</sup>Naž benne' judío ka', benne' bi žejl'é'gake' che Jesusen', belkó'o yele'e benne' blo ka' che yežen' nich bi lé'egekle' Pablón', na' Bernabén' chawe'. Lezka' belkó'o yele'e no'le blo ka', no'le zka'n zéngake' Dios. Ka' goken, béngekle' ga belbía láže'gake' Pablón', na' Bernabén', na' blággake' chope' ki na'le lo yežlyó chégake'. <sup>51</sup>Naž Pablón' len Bernabén', bechínnjgake' bixte yo da' dan' lábgake', dan' zloe'elen nga'n zia da' zej nbaga' benne' ka' che yežen', na' jake' lo yež Ikonio. <sup>52</sup>Bebégekle benne' ka' che Xanžon', na' Dios Be' La'y wzóalene' légake'.

### Da' ben Pablo tzen len Bernabé lo yež Ikonio

**14** Kate' bžin Pablo len Bernabé lo yež Ikonio, belyo'e tzen lo yo'o gan zdobgak benne' judío ka' nich yéngekle' xtiža' Dios, na' bcháljgake' diža' chawen' ga na'. Ka' goken, benne' zan, benne' judío ka' len benne' zi'to' ka', bejlé'gake' che Benne' Criston'. <sup>2</sup>Naž benne' judío ka', benne' bi žejl'é'gake' chie', belkó'o yele'e bale benne' zi'to' ka' nich bi chejlé'gake' che Benne' Criston', na' nich bi lé'egekle' chawen' lježžo ka', benne' žejl'é'gake' chie' Le'. <sup>3</sup>Dan' bejlé'gak benne' zan ka' che Benne' Criston',

Pablon' len Bernabén' wnníta'gake' ga na' zan ža, na' lo yela' wechógo laže' bcháljgake' xtiža' Dios, dan' žxen láže'gake' Xanžon'. Xanžo na'kze błoe'ele' da' wnnágake' kan nži'il Dios benách ka' naken dot da' li, na' Dios bi'e légake' latje bénengake' da' ka'zej nak bian', na' da' ka'žóngaken ga žebángekle benách ka'. <sup>4</sup>Naž benne' ka' nníta'gake' lo yežen' gok chópelegake'. Bale' bénłengake' benne' judío ka' tzen, benne' ka' bi žejl'é'gake' che Jesusen', na' yebale' bénłengake' Bernabén' len Pablon', benne' wbás ka' bsel'a' Benne' Criston', tzen. <sup>5</sup>Naž benne' judío ka', benne' bi žejl'é'gake' chie' len benne' zi'to' ka', bénłengake' tzen benne' ka' znnna biá'gake' légake', na' bdóbgake' nich góngake' benne' wbás ka' bsel'a' Benne' Criston' zia, na' nich wžé'egake' légake' yej. <sup>6</sup>Kate' Pablon' len Bernabén' gókbe'egekle' da' ni, bzónnijgake' ga na', na' jake' lo yež Listra, na' lo yež Derbe, yež ka'zej nbaben Likaonia, gan wdégake' yógo'te yeždo' ka', da' jez nnitan' gawze. <sup>7</sup>Lo yež ka' bcháljgake' diža' chawen' kan nak che Benne' Criston'.

### Zžé'egake' Pablo yej lo yež Listra

<sup>8</sup>Lo yež Listra wzóa to benne' bi žak se'e. Že'ze' ga na' dan' bi zza'kze' katen' golje', na' batkle wzé'e ni'e. <sup>9</sup>Benne' ni wzé nage' da' wnná Pablo. Pablon' bwie' le', na' gókbe'ele' žejli'che Benne' Criston' nich yeyake'. <sup>10</sup>Naž wnné zižje Pablon', na' gože' le':

—Wzé.

La' bxíte'te bennen', na' wzé'e ni'e. <sup>11</sup>Kate' benne' Listra ka' blé'egekle' dan' ben Pablon', wzó láwgake'

znnégake' zižje len xtiža'gak benne' Likaonia ka', na' wnnágake':

—iDios ka' benne' ki! Béjtgake' ga ni zoažo, na' zloe'el kwíngake' kan znnna'gak benne' ka'!

<sup>12</sup>Wnnágake' Bernabén' nake' Júpiter, kan nak la dios blo chégake', na' wnnágake' Pablon' nake' Merkurio, yetó dios chégake'. Ki wnnágake' dan' zchalj Pablon' kan znnágake' žon Merkurion!. <sup>13</sup>Gan nníta'gake' zoa yodo' che Júpiter, da' žen' kwit nez gan žo'ogak benách ka' lo yežen'. Bxoz che Júpiter na' la' bžintie' ga na', na' nchi'e beže ka', na' lezka' noe'yeje ka', na' žónłengak benne' zan le' tzen. Gónegekle' gótgake' beže ka' lawgak Pablon' len Bernabén' nich wká'n zéngake' légake' kan žóngake' chegak dios ka' chégake'. <sup>14</sup>Kate' Bernabén', na' Pablon', benne' wbás ka' bsel'a' Benne' Criston', gókbe'egekle' da' ni, na' belcheze'e laže' da' jez nakwe'. Gok nyache' láže'gake' dan' žongak benne' ka' da' bi žala' góngake', na' belxite' Pablon', na' Bernabén', na' bejchážgake' gachje láwe'le benne' zan ka'. Wnnégake' zižje, <sup>15</sup>na' gózgake' légake':

—Le'e, benne' ka'. čBíz chen' žonle da' ki? Lezka' bénne'ze nakto' kan nakle le'e, na' zzenlto' le'e da' nikze žala' wsanle žonle, dan' bi be zakan', nich gakle che Dios ban. Dios ni bene' ya'abá, na' yežlyó nga, na' nisdo', na' yógo'te da' jez nnitan' to to latje ka'. <sup>16</sup>Yiz ka' da' wdégaken, bengak yógo'te benách ka' kan nak da' znnazen chégake', na' Dios bi bsejwe' xnézgake', <sup>17</sup>san bene' ga nak bia' da' nake', ni'a che da' chawé' da' žone' chégake'. Žsele'e nis yejw gan

zoažo, na' žone' ga želgole da' žazžon.  
Zwawe' žo'o, na' žone' ga žebelžo.

<sup>18</sup>La'kze Bernabén' len Pablón' góžgake' lágake' da' ki, kánneze bzógegekle' bséjwgake' xnezgak benne' zan ka', nich bi gógtake' beže ka' láwgake'.

<sup>19</sup>Naž bałe benne' judío ka', benne' bi žejlé'gake' che Benne' Criston', bžíngake' ga na', benne' ka' zej nžoje' lo yež Antiokía, na' lo yež Ikonio, na' belkó'o yele'e benne' zan ka'. Naž yógo'tegake' bžé'egake' Pablo yej, na' bzóbgake' le' na'le žoa'a yežen', dan' žékgekle' ba nate'. <sup>20</sup>Naž kate' benne' ka', benne' žejlé'gake' che Benne' Criston', bdóbgake' dot kwit gan de Pablón', na' wyase', na' beyaze' lo yežen'. Kate' za' ža'ní' yetó ža, Pablón' bežójlene' Bernabén', na' jake' lo yež Derbe.

<sup>21</sup>Lo yežen' bcháljgake' diža' chawen' kan nak che Jesús, Benne' Criston', na' benne' zan bejlé'gake' chie' Le'. Wdé na' beyéjgake' lo yež Listra, na' lo yež Ikonio, na' lo yež Antiokía. <sup>22</sup>Kate' Bernabén' len Pablón' wdégake' lo yež ka', ben chóchgake' benne' ka' žejlé'gake' che Benne' Criston', na' besá'gake' láže'gake' nich ga'n chóchgake' kan žejlé'gake' chie' Le'. Bely'i'e lágake':

—Cho'ožo žo'o gan znna bia' Dios, san žon byenen sákažo da' zan da' gaken chežo.

<sup>23</sup>Gan zoa to kwe' to kwe' benách ka' che Benne' Criston', Pablón' len Benabén' bnnítá'gake' benne' gole ka' nich gape chí'igake' benne' ka' che Benne' Criston'. Kate' ba bcháljlengake' Dios, na' běngake' wbás, naž bdégake' lágake' lo na' Xanžo, Bennen' žejlé'gake' chie'.

Pablo len Bernabé žežíngake' lo yež Antiokía gan nbab Siria

<sup>24</sup>Naž Pablo len Bernabé wdégake' gan nbab Pisidia, na' bžíngake' gan nbab Panfilia. <sup>25</sup>Kate' beyóž bcháljgake' xtiža' Benne' Criston' lo yež Perje, na' jake' lo yež Atalia.

<sup>26</sup>Bezá'gake' ga na', na' belbene' to lo barkw, na' bežíngake' lo yež Antiokía, gan zej nnita' benne' ka' che Benne' Criston', benne' ka' bséla'gake' lágake' nich chejzégake' xtiža' Dios, katen' wló'ogake' lágake' lo na' Dios, Bennen' žon chawé'e lágake' nich góngake' xchine', žin na' da' ba beyóž běngake'. <sup>27</sup>Katen' bežíngake' lo yež Antiokía, na' bdobgak benne' ka' che Benne' Criston', benne' ka' nnítá'gake' ga na'. Naž Pablón' len Bernabén' bžéngake' lágake' kan zej nak da' zen ka' da' ben Dios lo ná'gake', na' ležka' kan ben Dios, bi'e benách zi'to' ka' latje žejlé'gake' che Benne' Criston'. <sup>28</sup>Zan ža Pablón' len Bernabén' bgá'nlengake' benách ka' žejlé'gake' che Benne' Criston' lo yežen'.

Benne' ka' che Benne' Cristo žon xtiža'gake' lo yež Jerusalén

**15** Naž bałe benne' ka', benne' zej nžoje' gan nbab Judea, bžíngake' lo yež Antiokía. Bsédgake' lježo ka', na' wnnágake': —Le'e, benne' byo ka', cha' bi chog lo bela' chele kan žónteze žonto', kan bchi'le Moisés, bi gak yelale.

<sup>2</sup>Naž Pablo len Bernabé beldíl diže'e len lágake', na' gokle'e žo'osbé. Wdé na', benne' Antiokía ka' wžégake' Pablón' len Bernabén',

na' yeba<sub>le</sub> lježžo ka', nich chjake' lo yež Jerusalén, nich lá'gake' lawgak benne' wbás ka' bsel<sub>a</sub>' Benne' Criston', na' lezka' lawgak benne' gole ka', benne' žape chí'igake' benách ka' che Benne' Criston', nich wcháljlengake' légake kan nak da' ni da' žaken, na' kan nak da' yalze da' zsédgakle benne' ka'.

<sup>3</sup> Naž benne' ka' che Benne' Criston', benne' Antiokía ka', wló'ogake' légake nez. Wdégake' gan nbab Fenisia, na' gan nbab Samaria, na' bzéngekle' lježžo ka', benne' nníta'gake' ga na', kan goken, beyakgak benne' zi'to' ka' che Benne' Criston'. Da' ni benen ga bebégekle yógo'te lježžo ka'.

<sup>4</sup>Pablón' len Bernabén' bžíngake' lo yež Jerusalén. Naž benne' ka' che Benne' Criston', benne' ka' nníta'gake' ga na' len benne' wbás ka' bsel<sub>e</sub>' Le', na' benne' gole ka', benne' žape chí'igake' benách ka' che Benne' Criston', wdápegake' légake ba la'ne. Pablón' len Bernabén' bzéngekle' légake yógo'te da' ben Dios lo ná'gake'. <sup>5</sup>Naž bale benne' yodo' fariseo ka', benne' žejlé'gake' che Benne' Criston', belzó ži'e, na' wnnágake':

—Žon byenen chog lo bela' chegak benne' byo ka', benne' zi'to' ka' žejlé'gake' che Benne' Criston', na' wchi'ilžo légake góngake' kan znna da' bchi'le Moisés žo'o.

<sup>6</sup> Naž benne' wbás ka' bsel<sub>a</sub>' Benne' Criston' len benne' gole ka', benne' žape chí'igake' benách ka' che Benne' Criston', bdóbgake' nich wchi'a láže'gake' da' ni da' žaken. <sup>7</sup>Wdé bcháljgake' scha, na' wzé Bedw, na' gože' légake:

—Ljéža'do' ka'. Nnézkzelele kan gok ža ni'te, kan Dios wžekze' neda' nich wchalja' xtiže'e lawgak benách zi'to' ka' nich yéngakle' diža' chawen', na' chejlé'gake' che Benne' Criston'. <sup>8</sup>Dios, Bennen' nónbia'kze' da' yo'o lo yichj lázdo'gak benách ka', bzoe' da' nak bia' žape' légake ba la'ne, dan' bsele'e Dios Be' La'y chégake', kan bsele'e Le' chežo žo'o. <sup>9</sup>Bi bche'e kan bene' chégake', na' chežo, na' lezka' beyón chawé'e yichj lázdo'gake dan' žejlé'gake' che Benne' Criston'. <sup>10</sup>Na'a, čbiž chen' zži'ile che Dios, na' žesbága'le to ywa' zi'i yengak lježžo ka'? Ywa' na', da' naken da' bchi'le Moisés, bi gok wa'žon žo'o, na' bi gok wá'gaken xa xto'žo ka'. <sup>11</sup>Žejlé'žo yelažo ni'a cheze da' ben Xanžo Jesúš lo wláz žo'o, na' kan yelažo žo'o, lezka' yelágake' légake.

<sup>12</sup>Katen' beyóž bchalj Bedon' da' ni, na' yógo'tegake' wnníta'gake' žize, na' bze nággake' da' bchaljgak Bernabén', na' Pablón'. Benne' ki bzéngekle' légake da' ka' da' zej nak bian' da' žóngaken ga žebángekle benách ka', da' ka' ben Dios lo ná'gake' gan zej nnita' benách zi'to' ka'. <sup>13</sup>Katen' beyóž wnnagak Bernabén', na' Pablón' da' ni, bechebe Jakob, na' wnné':

—Ljéža'do' ka'. Le wzé nag da' yapa' le'e. <sup>14</sup>Smón Bedw ba bzenle' žo'o kan ben Dios, bloe'ele' law yela' wak chie' da' nežw chi'i lawgak benách zi'to' ka' nich bebeje' benách ka' che Leze', benne' ka' nníta'gake' ládjwgake'. <sup>15</sup>Kan nak da' ni naken tlebe len xtíža'gak benne' ka' bcháljgake' lo wláz Dios, kan nyejw le'e yiche la'y, da' znnan:

- <sup>16</sup> Kate' ža ka' te ža ki yelá'a, na' wchisa' to Benne' nna bi'e, Bennen' chaze' latje che Dabí, bennen' wnná bi'e. Gona' kan žon to benne' žechise' to yo'o nyinnj. Lezka' yechisa' benne' za'sóe' ka', benne' ka' jez nga'né. Gona' kan žon to benne' žechise' to ze'e gole. Ki gona' nich yechisa' da' wnná bia' Dabín',
- <sup>17</sup> na' nich chiljgak yezika' benách ka' Xanžon'. Benách zi'to' ka' chílgake' Lé', na' si' lágake': Benách Ka' Che Dios.
- <sup>18</sup> Ki wnnakze Xanžo, Bennen' ža ni'te bene' ga jez nak bia' yógo'te da' ki.
- <sup>19</sup> Che len žekla' neda' bi žala' wséjwžo xnezagak benách zi'to' ka', benne' ka' žeyákgake' che Dios. <sup>20</sup> Žala' wzojžo chégake' nich wká'ngake' da' ka' da' bi žala' gáwgake', da' bdegak benách ka' lawgak lo'a ka', na' bi góngake' da' sban ka', na' bi gáwgake' bela' chegak bia yixe' ka' len xchéngakba', na' bi gáwgake' xchen nóte'teze bia yixe'. <sup>21</sup> Ža ni'te, na'zejte na'a ža jez nnita' benne' ka' zcháljgake' lo yo'o gan zdobgak benne' judío ka' nich yéngekle' xtiža' Dios yógo'te yež ka', na' zcháljgake' che da' bzoj Moisés. Žolgakkzen' ža la'y ka'.
- <sup>22</sup> Naž benne' wbás ka' bsela' Benne' Criston' len benne' gole ka', na' yógo'te benne' ka' che Benne' Criston', wyáz láže'gake' wžégake' bale benne' ka' ládjwgake' nich séla'gake' lágake' lo yež Antiokía, tzen len Pablón', na' Bernabén'.

Chope' ka' wžégake' jez nake' Judas len Silas. Judas na' lezka' lie' Barsabás. Chope' ki jez nake' benne' blo ládjwgak lježo ka'. <sup>23</sup> Bzójgake' to le'e yiche da' bdégake' lo ná'gake', nich chjwá'gaken', dan' znnan ki: "Neto', benne' wbás ka' bsela' Benne' Criston' len benne' gole ka', na' lježo ka', žapto' le'e: "Padiox" lježto' ka', nakle benách zi'to' ka', na' zoale lo yež Antiokía, na' lo yež ka' jez nbaben Siria, na' Silicia. <sup>24</sup> Benlto' kan žongak bale benne' ka', benne' bžójgake' ga ni zoato', san bi bsela'to' lágake'. Žedjchá'gake' le'e len da' ka' znnágake', na' zchíxgake' yichj lázdo'le, dan' znnágake' žon byenen chog lo bela' chele, benne' byo ka', na' žala' gonle kan znná da' bchi'le Moisés. <sup>25</sup> Che len wyáz láže'to' katen' ba ben toze xtíža'to', wžeto' chope benne', na' séla'to' lágake' nich yedjwíagake' le'e. Yídlengake' tzen Bernabé len Pablo, benne' ka' nži'ilžo. <sup>26</sup> Bernabén', na' Pablón' ba jake' gan wzóa da' ben zož gátgake' dan' jez nži'ile' Xanžo Jesús, Benne' Criston'. <sup>27</sup> Ki naken, zséla'to' Judas len Silas gan zoale. Chope' ki wzejní'igekle' le'e da' ni da' zzojto' chele le'e yiche ni. <sup>28</sup> Dios Be' La'y bло'ele' neto' da' žaz láže'e, na' lezka' žaz láže'to' neto', bi yesbága'žeto' le'e ywa', da' naken da' bchi'le Moisés, san toze da' ki da' žon byenen gonlen.

<sup>29</sup> Bi gawle da' wdé lawgak lo'a ka'. Bi gawle žen. Bi gawle bela' chegak bia yixe' ka' len xchéngakba'. Bi gonle da' sban ka'.

Cha' gape chi'i kwinle, nich gonle kan znnagak da' ki, na' gonle da' naken chawe'!"

<sup>30</sup>Ka' goken, benne' ka' bséla'gake' bžíngake' lo yež Antiokía. Katen' blá'gake' ga na', btóbgake' benách ka' che Benne' Criston', benne' ka' nníta'gake' ga na', na' wló'ogake' yichen' lo ná'gake'. <sup>31</sup>Katen' beyož bélgaken', bebégekle' ni'a che da' nyejw le'e yichen', da' žeyón zenen légake'. <sup>32</sup>Judas na' len Sílasen' lezka' zej nake' benne' zcháljgake' lo wláz Dios. Che len bkóngekle' žin diža' zan, da' ka' bcháljlengake' lježjo ka', nich beyón zéngake' légake', na' ben chóchgake' légake'. <sup>33</sup>Wdé bžégekle' chope' ka' ga na' bale ža, naž lježjo ka' bzégake' légake' diža' nich yeyéjgake' lo yež Jerusalén gan zej nnita' benne' ka' bséla'gake' légake'. <sup>34</sup>Wyáz laže' Sílasen' bga'ne' lo yež Antiokían'. <sup>35</sup>Lezka' Pablón', na' Bernabén' bgá'ngake' lo yežen', na' bsédgekle' benách ka', na' bzoa lígake' che xtiža' Xanžon'. Lezka' bengak benách zanže ka'.

### Zzo law Pablo žežzenle' benách diža' chawe' da' chope chi'i

<sup>36</sup>Kate' ba wdé bale ža Pablo gože' Bernabé:

—Le cho'o chejžo da' yoble nich chejwíazho lježjo ka' nníta'gake' yógo'te yež ka' gan ba bchaljžo xtiža' Xanžon', nich le'elžo kan žak chégake'.

<sup>37</sup>Gónele Bernabén' wché'gake' xkwide' Zwa Markos, nich chéjlenbe' légake', <sup>38</sup>san bi wyáz laže' Pablón' wché'gake'-be' nich chéjlenbe' légake' dan' blá'alenbe' légake' gan

nbab Panfilia, na' biž yjénlenbe' légake' žin che Xanžon'. <sup>39</sup>Bi gok toze xtiža'gak Bernabén', na' Pablón', ga bžinte bla'a lázgake' toe' yetóe'. Bernabén' bchi'e xkwide' Markos, na' belbene' to lo barkw, na' jake' lo yežlyó Chipre. <sup>40</sup>Pablón' wžié' Silas nich chéjlen'e le' tzen. Naž lježjo ka' wló'ogake' légake' lo na' Xanžon', na' wnnábgekle' Le' gon chawe' e' légake'. Naž Pablón' len Sílasen' wyó'ogake' nez. <sup>41</sup>Wdégake' lo yež ka' gan nbab Siria, na' gan nbab Sílisia, na' ben chóchgake' benách ka' che Benne' Criston' nníta'gake' lo yež ka'!

### Xkwide' Timoteo žónlenbe' Pablo len Silas tzen

**16** Wdé na' bžin Pablo len Silas lo yež Derbe, na' lo yež Listra. Wzóa to xkwide' byo lebe' Timoteo ga na', na' žeje'le'be' che Benne' Criston'. Nakbe' zi'n to no'le judío žežli'e che Benne' Criston', san xabe' bi nake' judío. <sup>2</sup>Lježjo ka', benne' nníta'gake' lo yež Listra, na' lo yež Ikonio znnágake' žon Timoteon' da' naken chawe'.

<sup>3</sup>Gónele Pablón' chejlen xkwiden'e. Bchi'e-be', na' bchoge' lo bela' chebe' kan žongak benne' judío ka'. Ki bene' nich bi nnegak benne' judío ka' chebe', dan' nnézgekle' yógo'tegake' bi nak xabe' benne' judío. <sup>4</sup>Kate' Pablón' len benne' ka' žónlengake' le' tzen wdégake' gan zej nnita' yež ka', na' to to yež ka' bdégake' lo na'gak lježjo ka' nníta'gake' ga na' da' bzojgak benne' wbás ka' bsela' Benne' Criston' len benne' gole ka', benne' ka' nníta'gake' lo yež Jerusalén. Bdégake' yichen' lo ná'gake' nich

góngake' kan znnan. <sup>5</sup>Ka' goken, gok chochgak yógo'te kwe' benách ka' che Benne' Criston' kan nak da' žeje'žo chie' Le', na' belyane' tža tža.

**Benne' Masedonia žliž'e Pablo  
lo da' ble'e dáwe'le'**

<sup>6</sup>Pablo len benne' ka' žónlengake' le' tzen wdégake' gan nbab Frijia, na' gan nbab Galasia. Ki béngek' dan' bsejw Dios Be' La'y xnézgake', nich bi chejháljgake' xtiža' Xanžon' gan nbab Asia. <sup>7</sup>Kate' bžíngake' gan nbab Misia, gónegekle' chjake' gan nbab Bitinia, san Dios Be' La'y, Bennen' žselá' Jesusen' chežo, bi bi'e légake' latje. <sup>8</sup>Naž wdégake' cheł'a ale gan nbab Misia, na' jake' lo yež Troas. Neda', Lukas, zzoja' chio' da' ni, wzó'a lo yež Troasen', gan wzó law'a žónlena' Pablón' tzen. <sup>9</sup>Lo yežen' Dios błoe'le' Pablón' to da' ble'e dáwe'le'. To benne' byo, benne' Masedonia, błoe'e law'e gan zoe', na' góta'yoele' Pablón', na' wnné': "Da lažto', gan nbab Masedonia, na' goklen neto!" <sup>10</sup>Kate' Pablón' ble'e'le' da' ni, dan' ble'e dáwe'le', la' be' láže'teto' chejto' gan nbab Masedonia, dan' gókbe'elto' Dios ba bliž'e neto' nich chejchaljto' diža' chawen' chie' lawgak benách ka' nnítagake' lo yežlyón'.

**Da' bengak Pablo, na'  
Silas lo yež Filipos**

<sup>11</sup>Naž wžento' to lo barkw, na' wza'to' lo yež Troas. Wdeto' ga bžínteto' lo yež Samotrasia, na' wdé yetó že bžinto' lo yež Neápolis. <sup>12</sup>Beza'to' ga na', na' bžinto' lo yež Filipos, yežen' nakžen blo ka yógo'te yež ka' zej nbaben chełá'a

na' che gan nbab Masedonia. Lo yežen' zej nnita' benách wláz ka' chegak benne' Roma ka'. Wzoato' lo yežen' bale ža. <sup>13</sup>Kate' bžin to že la'y, bžojto' lo yež, na' wyejto' žoa'a yego gan zdóbgakkze benne' ka' che yežen' nich wcháljlengake' Dios, na' wže'to' ga na', na' bcháljlento' no'le ka' zej ndobe' ga na', kan nak xtiža' Xanžon'. <sup>14</sup>Zoa Lidia ládjwgake', to no'le che yež Tiatira. Nake' no'le žótí'e laže' xna da' záka'le'en. No'le ni zka'n zene' Dios, na' bze nage' da' bcháljl Pablón', na' Xanžon' góklene' no'len' nich wzí' lo ne'e dan' wnná Pablón'. <sup>15</sup>Naž bezóe' le' nis, na' lezka' belzóa nis benách ka' nnítagake' liže'. Wdé na' góta'yoele' neto', na' wnné':

—Cha' žákbe'elele žejli'a che Xanžon', le cho'o liža', na' le soa ga na'!

Ben byene' bga'nto' ga na'.

<sup>16</sup>Yetó da' goken to že kate' ne zejto' gan zcháljlento' Dios, bedjhág to xkwide' no'le neto', na' yo'obe' be' da' žonen ga znnéyá'abe'. Len yela' wnnéyá'a chebe' benbe' ga benne' xanbe' ka' belzí'lí'e mežw. <sup>17</sup>Xkwide' no'len' bejnawbe' Pablón', na' neto'. Wnnebe' zižje, na' wnnabe':

—Benne' ki žóngake' xchin Dios, Benne' wak zente. Zloé'egekle' le'e kan gak yelale.

<sup>18</sup>Ki benbe' zan že. Katen' biž wyáz laže' Pablón', byechje', na' bliž'e ben' yo'obe', na' wnné':

—Ni'a che Xanžo Jesús, Benne' Criston', žapa' le': bežój lo yichj lázdo'w xkwide' no'le ni.

La' na'ze bežojte ben'.

<sup>19</sup>Kate' xanbe' ka' gókbe'egekle' ba bežój ben' da' benen ga wnnéyá'abe',

na' biž sí'gake' mežw ni'a chebe', che len békwgake' Pablón' len Silas, na' bch'gake' légake' lawgak benne' yolawe' ka', benne' ka' zej ndobe' gan nak lawe' ya'a. <sup>20</sup>Bzégake' légake' lawgak benne' yolawe' ka', na' wnnágake':

—Benne' ki zej nake' benne' judío ka', na' žóngake' ga žongak benne' wláž chežo ka' žo'osbé. <sup>21</sup>Žsédgekle' da' bi žala' si' lo nažo, na' da' bi žala' gonžon, dan' nbabžo yež Roma.

<sup>22</sup>Benne' zan ka' bží'igake' che Pablón' len Sílasen'. Naž benne' yolawe' ka' góžgake' ni'a ná'gake' ka' yeká'gake' laže' da' zej nakw Pablón', na' Sílasen', na' chíngake' légake' yid. <sup>23</sup>Wdé belyínli'e légake', na' bséjwgake' légake' liž yan. Góžgake' benne' žejwe' liž yan' gape chi'e légake'. <sup>24</sup>Benne' ni, kate' ba góžgake' le' ki, bsejwe' légake' lo liž yan' ni'te, na' wloé'e ní'agake' lo bloj yag ka'!

<sup>25</sup>Gachje yele Pablón' len Sílasen' zcháljlengake' Dios, na' žolgake' da' žoe láwgake' Le'. Benne' ka' zej nyejwe' liž yan' bze nággaken'.

<sup>26</sup>Naž wzó'le'e yežlyó. Ka' goken ga bžintе wzize len ze'e liž yan', na' la' belyáljwte yógo'te gan želyoé'e lo yo'on', na' beyéž do ya ka' da' zej nžejen benne' ka' zej yoe' ga na'.

<sup>27</sup>Bebán bennen' žejwe' liž yan'. Kate' ble'ele' zej nyaljw gan želyoé'e liž yan', bleje' ya ntoche' chie' nich got kwine'. Ki gónele' gone' dan' žekle' ba bzonnjgak benne' ka' zej nyejwe' liž yan'. <sup>28</sup>Naž wnné zižé Pablón', na' bliže' le', na' wnné':

—Bi be gon kwino', dan' zoato' yógo'teto' nga.

<sup>29</sup>Naž bennen' wnnabe' yi', na' la' wyo'otie' liž yan'. Wzízl'i'e lo yela'

zžebe chie', na' bzoa zibe' xní'agak Pablón', na' Sílasen'. <sup>30</sup>Kate' ba bebeje' légake' lo liž yan', gože' légake':

—Le'e, benne' ka', čbiž žala' gona' nich yelá'?

<sup>31</sup>Légake' belyi'e le':

—Bejlé' che Xanžo Jesúš, Benne' Criston', na' yeló' le', na' lezka' yelagak benách ka' nnítá'gake' ližo'.

<sup>32</sup>Bcháljlengake' le' tzen len yógo'te benách ka' nnítá'gake' liže', kan nak che xtiža' Xanžon'. <sup>33</sup>La' na'ze, kate' ne nak žel, bennen' žejwe' liž yan' la' bche'tie' légake', na' bejtibe' légake' gan zíagake' we'. Wdé na', la' bezoatíe' nis, na' lezka' belzóá nis yógo'te benách ka' nnítá'gake' liže'. <sup>34</sup>Naž bchi'e légake' liže', na' bi'e da' we'j bdáwgake'. Žebele' tzen len yógo'te benách ka' nnítá'gake' liže' dan' žejlé'gake' che Dios.

<sup>35</sup>Kate' za' ža'ní' ža na', benne' yolawe' ka' bséla'gake' ni'a ná'gake', na' belyi'e bennen' žejwe' liž yan', na' wnnágake':

—Bsan benne' ka'.

<sup>36</sup>Naž bennen' žejwe' liž yan' bzenle' Pablo da' ni, na' wnné':

—Benne' yolawe' ka' góžgake' neda' wsana' le'e. Na'a, le žoj, na' binlo le yeyéž gan zoale.

<sup>37</sup>Naž bžoj Pablón', na' gože' ni'a na'gak benne' yolawe' ka', na' wnné':

—Ba wdíngake' neto' lawgak benách ka' la'kze bi bchi'a láže'gake' neto' kan znnna benne' Roma, benne' wnná bia'. Bséjwgake' neto' liž yan', na' neto' nbabto' yež Roma na'. Čna'a wsángake' neto' ži žize? iBi gaken ki! Žala' yedjsángake' légakkze' neto'.

<sup>38</sup>Beyejgak ni'a na'gak benne' yolawe' ka', na' bžengekle' lágake' da' ni, na' lágake' bžébegake' kate' béngekle'zej nbab Pablón', na' Sílasen' yež Roma. <sup>39</sup>Kate' bžíngake' liž yan', góta'yoegakle' Pablón' len Sílasen' bi yesbága'gake' lágake' zia. Naž belbeje' lágake' liž yan', na' góta'yoegakle' lágake' žójgake' lo yežen'. <sup>40</sup>Naž Pablón' len Sílasen' bžójgake' liž yan', na' wyó'ogake' liž Lidia. Katen' ba blé'gekle' lježžo ka', benne' nníta'gake' ga na', beyón zéngake' lágake', na' la' bezá'tegake' ga na'.

**Benne' yež Tesalónika  
ka' žóngake' žo'osbé**

**17** Wdé Pablo len Silas lo yež Anfípolis, na' lo yež Apolonia, na' bžíngake' lo yež Tesalónika, gan zoa to yo'o gan zdobgak benne' judío ka' nich yéngakle' xtiža' Dios. <sup>2</sup>Bga'n Pablón' lo yežen' galj ža, na' ka žónteze žone', wyoé'e yo'on' kate' nak ža la'y chegak benne' judío ka', na' bcháljlene' lágake' xtiža' Dios. <sup>3</sup>Bzejni'ile' lágake', na' bloe'ele' lágake' žsede da' nyejw le'e yiche la'y žon byenen saka' Benne' Criston', Bennen' žxen láže'gak benne' judío ka' yide', na' gate' nich yeslé' lágake', na' te gate', na' yebane' lo yela' got. Naž Pablón' gože' lágake', na' wnné': —Ka' goken che Bennen' lie' Jesús, Bennen' zzenla' le'e kan nak chie'. Benne' ni nake' Benne' Criston'. <sup>4</sup>Naž bale' bejlé'gake' che Benne' Criston', na' bénlengake' Pablón' len Sílasen' tzen. Lezka' benne' zan, benne' zi'to' ka', benne' zka'n zéngake' Dios, bejlé'gake' che Benne'

Criston'. Lezka' no'le zan, no'le blo ka', bejlé'gake' chie' Le'. <sup>5</sup>Naž benne' judío ka', benne' bi žejlé'gake' che Jesusen', lo yela' zge'el chégake' Pablo, btóbgake' benne' ka' bi zej nake' chawe', benne' ka' kon želdaze' ga na'. Kate' ba btóbgake' benne' zan ka', béngekle' žo'osbé dot lo yežen', na' de chgi' belyoé'e liž Jasón nich kwéjgake' Pablón' len Sílasen' lawgak benách ka', benne' ka' žóngake' žo'osbé. <sup>6</sup>Kate' bi bžélgekle' Pablón' len Sílasen', naž belbeje' Jasón, na' yezika' lježžo ka', benne' nníta'gake' ga na', na' bché'gake' lágake' lawgak benne' yolawe' ka'. Wnnégake' zižje, na' wnnágake':

—Ba bžingak benne' ka' nga, benne' ka' zchíxgake' benách ka' dot yežlyó nga. <sup>7</sup>Jasón ni wloé'e lágake' liže'. Zží'igake' che da' znna benne' Sésar, bennen' znna bi'e žo'o, na' znnágake' zoa yetó benne' znna bi'e, bennen' lie' Jesús.

<sup>8</sup>Kate' benne' wláž ka', na' benne' yolawe' ka', béngekle' da' ni, wžé' zédgekle'. <sup>9</sup>Naž, benne' yolawe' ka' wzí'gake' mežw da' bka'ngak Jasón na', na' yezika' benne' ka', nich wsángake' lágake'.

**Da' bengak Pablo len  
Silas lo yež Berea**

<sup>10</sup>Naž lježžo ka', benne' Tesalónika ka', la' belséla'tie' Pablo len Silas kate' ne nak žel, na' jake' lo yež Berea. Katen' bžíngake' ga na', belyoé'e lo yo'o gan zdobgak benne' judío ka' che yežen' nich yéngakle' xtiža' Dios. <sup>11</sup>Benne' ki gókgakže' chawe' ka zej nak benne' judío ka' nníta'gake' lo yež Tesalónika, dan'

wz' lo ná'gake' xtiža' Xanžon' dot láže'gake'. Tža tža bél'gake' da' nyejw le'e yiche la'y, nich nnézgekle' cha' nak dot da' li dan' znnna Pablón'. <sup>12</sup>Ka' goken, benne' zan, benne' judío ka', bejlé'gake' che Benne' Criston'. Lezka', benne' zan, benne' zi'to' ka', no'le blo ka', na' benne' byo ka', bejlé'gake' chie' Le'. <sup>13</sup>Naž kate' gókbe'egakle benne' judío ka', benne' ka' nníta'gake' lo yež Tesalónika, lezka' zchalj Pablón' xtiža' Dios lo yež Berea, naž jake' ga na', na' béngeake' ga bengak benne' zan žo'osbé ga na'. <sup>14</sup>Naž lježžo ka' la' belséla'tie' Pablón', nich cheje' žoa'a nisdo', san Sílasen', na' xkwide' Timoteo, bgá'ngakze' lo yež Berea na'. <sup>15</sup>Benne' Berea ka' bché'gake' Pablón' lo yež Atenas. Naž la' beyéjtgeake' lo yež Berea na', na' biá'gake' xtiža' Pablón', nich yé'gake' Sílasen' len xkwide' Timoteon' chjaktie' gan zoa Pablón'.

### Da' ben Pablo lo yež Atenas

<sup>16</sup>Kate' ne zoa Pablo zbeze' Silas len xkwide' Timoteo, lo yež Atenas, gok nyache' láže'e dan' ble'ele' kan žongak yógo'te benne' ka' che yežen', zka'n zéngake' lo'a ka'. <sup>17</sup>Che len bcháljlene' benne' judío ka' len benne' zi'to' ka', benne' zka'n zéngake' Dios. Ki bene' gan nak lo yo'o gan zdóbgake' nich yéngakle' xtiža' Dios. Lezka' tža tža bcháljlene' benne' ka' zdágake' lawe' ya'a kan nak xtiža' Benne' Criston'. <sup>18</sup>Pablón' bcháljlene' bale' benne' ka' nzi' lo ná'gake' da' zsédgakle benne' epikúreo ka', na' da' zsédgakle benne' estoiko ka'. Bale' wnnágake': —¿Bíz chen zchalj benne' wnnel'e ni?

Yebale' wnnágake': —Žeklto' zchalje' chegak dios zi'to' ka'.

Ki wnnágake' dan' zchalj Pablón' láwgake' diža' chawen' che Jesusen', na' che yela' yebán. <sup>19</sup>Naž békxwgake' na' Pablón', na' bché'gake' le' law Ya'a Areópago, gan zdóbgake' nich wcháljgake', na' wnnágake':

—¿Wak yenlto' da' kobe ni da' zchaljo' chen? <sup>20</sup>Zzenlo' neto' da' ka' žóngaken ga žebán láže'to'. Na'a, žénelto' nnezlto' bizen' dan' zchaljo' chen.

<sup>21</sup>Biž bi žaz láže'gak gongak benne' Atenas ka', na' benne' zi'to' ka' nníta'gake' ga na', san žéngakle', na' zcháljzegake' che to da' kobe.

<sup>22</sup>Naž wzé Pablón' gachje láwe'le li'a Areópagon', na' wnné':

—Benne' Atenas ka', yógo'te da' zle'ela' zej nak bian' zka'n zénle'ele dios ka' chele. <sup>23</sup>Katen' wdía' lo yež nga ble'ela' da' zan da' zka'n zenle, na' lezka' bejxaka'a to nichw gan nyejw da' znnan ki: "To Dios, Bi Nonbia' Nitó Benne' Le'." Dios na' zka'n zenle-ne' la'kze bi nónbia'le-ne', Dios na' zchalja' lawle kan nak chie'.

<sup>24</sup>Dios ni bene' yežlyó nga, na' yógo'te da' zej nnitan' yežlyó nga. Nake' Xan ya'abá, na' Xan yežlyó nga, na' bi zoe' to lo yodo' da' zej non benách ka'. <sup>25</sup>Bi be žiážjele' da' gak wnézjwgak benne' ka' chie', dan' Lekze' znezjwe' chegak yógo'te benách yela' nban, na' yógo'te da' žiážjegekle'.

<sup>26</sup>'Le' bene' toze benne' byo gan za'gak yógo'te kwe' benách ka' nníta'gake' dot yežlyó nga, na' bloe'ele' ža žala' nníta'gake',

na' gan žala' nníta'gake'. <sup>27</sup>Dios bzoakze' chégake' nich chílgake' Le', cha' nákteze wžélgekle' Le' la'kze kángakze'. Ki žaken la'kze bi zoe' zi'to' gan zoažo to tožo. <sup>28</sup>Lekze' žone' ga zoažo nbanžo, na' da' gak gonžo, na' da' nakžo. Naken kan wnnagak bałe benne' ka' wnníta'gake' ládjwle le'e, benne' ka' bzójgake' da' ka' žol-le, na' wnnágake': "Ljež Dios nakžo." <sup>29</sup>Na'a, cha' nakžo ljež Dios, bi žala' nnažo nak Dios ka to lo'a da' naken ya oro, o ya plat, o da' naken yej, da' ka' zej non benne' ka' kan nak to da' yo'ozen lo yichj lázdo'gake'. <sup>30</sup>Dios bzoe' chela'ale da' ka' béngekla' lo yela' bi žejni'il chégake' yiz ka' da' ba wdégaken, san na'a ženele' yeját láže'gak yógo'te benách ka' nníta'gake' dot yežlyo' nga. <sup>31</sup>Dios ba bлоe'ele' to ža kate' wchi'a laže'e yógo'te benách ka'. Nak dot chawé' kan wchi'a laže'e légake' lo na' Jesús, Bennen' bzoakze' Le', na' lawgak yógo'te benách ben choche' gaken ki dan' besbane' Le' lo yela' got.

<sup>32</sup>Katen' béngekla' da' ni dan' wnná Pablo kan goken, wzóa to benne' bebane' lo yela' got, na' bałe' ben dítjegakle' Le', na' yebale' wnnágake':

—Wak yenlto' da' zchaljo' chen ža yoble.

<sup>33</sup>Naž bežój Pablo' gachje láwe'le gan nníta'gake', na' beyeje'. <sup>34</sup>Bałe' bejlé'gake' che Benne' Criston', na' bénłengake' Pablo' tzen. Zoa Dionisio ládjwgake'. Nake' benne' bénłene' tzen benne' ka' zdóbgake' law ya'a Areópago. Lezka' to no'le lie' Dámaris, na' yebale' benne' ka' bejlé'gake' che Benne' Criston'.

### Da' ben Pablo lo yež Korinto

**18** Wdé gok da' ni, bezá' Pablo lo yež Atenas, na' wyeje' lo yež Korinto. <sup>2</sup>Bejxake'e Akila, to benne' byo judío, ga na'. Golj bennen' gan nbab Ponto, na' ba zoakze' lo yež Korinton'. Zga'ale bezé'e gan nbab Italia tzen len zo'le', no'len' lie' Prisila. Ki bene' dan' bchi'le Klaudio, benne' Roma wnná bia', žojgak benne' judío ka' lo yež Roma. Wyéj Pablón' gan zoa Akilan' len Prisilan'. <sup>3</sup>Dan' lébeze nak žin da' žongak Akilan', na' Pablón', che len bgá'nlene' légake', na' tzen béngekla' žin, žóngake' yo'o láže'do' ka'. <sup>4</sup>Kate' zej nak ža la'y chegak benne' judío ka', wyóo Pablón' lo yo'o gan zdóbgake' nich yéngakle' xtiža' Dios, gan bcháljlene' légake' diža' chawen'. Gónele' wlo'e'ele' benne' judío ka', na' benne' zi'to' ka', benne' nníta'gake' ga na', nak dot da' li da' zzenle' légake' kan nak che Jesús, Benne' Criston'.

<sup>5</sup>Silas len xkwide' Timoteo bezá'gake' gan nbab Masedonia, na' blá'gake' gan zchaljkze Pablo' xtiža' Dios lawgak benne' judío ka'. Pablo' wnné:

—Jesusen' nake' Benne' Criston', Bennen' žxen láže'gak benne' judío ka' yide' yeslé' légake'.

<sup>6</sup>Kate' benne' judío ka', benne' nníta'gake' ga na', beží'igake' che xtiže'e, na' wnnégake' chie', naž wžíb Pablo' laže' da' nakwe', dan' zlo'e'elen zbej yichje' légake' dan' zží'igake' che xtiža' Dios, na' gože' légake':

—La' kwínzele nbága'le žia che yela' got chele, kege neda' nbaga'an.

Na'a, cha'a gan zej nnita' benách zi'to' ka'.

<sup>7</sup> Naž Pablón' bežoje' ga na', na' wyeje' liž Justo, to benne' zka'n zene' Dios, na' zoa liže' gawze gan že' yo'o gan zdobgak benne' judío ka' nich yéngakle' xtiža' Dios. <sup>8</sup> Crispo nake' benne' blo che yo'on' Bejlí'e che Xanžo Jesúš, na' bénlengak le' tzen yógo'te benne' ka' nnítagake' liže'. Benne' zan, benne' Korinto ka', bejlé'gake' che Benne' Criston', katen' béngekle' xtiža' Dios, na' bezóagake' nis. <sup>9</sup> Naž Xanžon' na'kze gože' Pablón' lo da' ble'e dáwe'le', na' wnné':

—Bi žebo', na' bi wsano' zchaljo' xtiža'a, <sup>10</sup> dan' zóalenka' neda' le', na' bi wlapa' na' nitó benne' le' nich bi da' gone' chio', dan' benne' zan lo yež nga zej nake' chia'.

<sup>11</sup> To yiz yo'o gachje bga'n Pablón' ga na', na' bsedle' légake' xtiža' Dios.

<sup>12</sup> Kate' bžin ža znna bia' Galión gan nbab Akaya, benne' judío ka', benne' bi žejlé'gake' che Jesusen', ben toze xtiža'gake', na' békwgake' Pablón', na' bché'gake' le' gan zchi'a laže' Galión na'. <sup>13</sup> Bely'i'e Galión na':

—Benne' ni zko'o yele'e benách ka' nich wká'n zéngake' Dios, kan bi nak tlebe len da' nzi' lo na'to' neto'.

<sup>14</sup> Kate' za' wchálj Pablón', Galión na'kze gože' benne' judío ka', na' wnné':

—Le'e, benne' judío ka', chela' gak to da' bi nak tlebe len da' znna benne' Sésar, o to da' zinnj da' bene', soela' wzé naga' xtiža'le kan žala' gona', <sup>15</sup> san dan' nak diža' bizjw che díža'ze, na' che lagak benách ka', na' kan nak da' zséidlele l'ézele, le wká'n chawen' l'ékzele, dan' bi žénela' wchi'a laža'a da' ki.

<sup>16</sup> Naž Galión na' bchache' légake' lo yolawe'. <sup>17</sup> Naž yógo'te benne' wláž ka' békwgake' Sóstenes, benne' blo che yo'o gan zdobgak benne' judío ka' nich yéngakle' xtiža' Dios, na' belyine' le' yid la' li'a yolawe', san Galión na' bzoe' chel'a'ale da' žóngake'.

<sup>18</sup> Bga'n Pablón' lo yežen' ža zan, na' wdé bzele' diža' lježzo ka', na' wyeje' lo yež Senkrea, gan bene' yidze yichje', dan' de to da' bchebe laže'e law Dios gone'. Naž wžene' to lo barkw, nich cheje' gan nbab Siria, na' wyéjlengak Prisila len Akila le'. <sup>19</sup> Kate' bžíngake' lo yež Éfeso, wlá'a lázgake'. Wyó'o Pablón' lo yo'o gan zdobgak benne' judío ka' nich yéngakle' xtiža' Dios, na' bcháljlene' benne' ka' nnítagake' ga na'.

<sup>20</sup> Benne' ka' góta'yoegakle' Pablón' gá'nlene' légake' yelate' scha, san le' bi gónele'. <sup>21</sup> Bzele' diža' légake', na' wnné':

—Žon byenen soa' lena' lni da' za' gaken lo yež Jerusalén, na' te na' da' yoble yelá'a ga ni zoale, cha' Dios nne'.

Naž wžén Pablón' to lo barkw, na' bezé'e lo yež Éfeson'.

### Pablo žežzenle' benách diža' chawé' da' chonne chi'i

<sup>22</sup> Wdé bla' Pablo lo yež Sesarea, na' wyeje' lo yež Jerusalén, gan bejwíe' benách ka' che Benne' Criston', na' naž bezé'e ga na', na' wyeje' lo yež Antiokía. <sup>23</sup> Wdé wzóe' ga na' bałe ža, na' bžoje' ga na', na' wyeje' to to yež ka' zej nnitan' gan nbab Galasia, na' gan nbab Frijia. Ben choche' lježzo ka' nnítagake' ga na', lo da' žejlé'gake' che Benne' Criston'.

**Zchalj Apolo che Benne'  
Cristo lo yež Éfeso**

**24** To ža na' bla' Apolo lo yež Éfeso. Nake' benne' judío, na' golje' lo yež Alejandría lo yežlyó Ejipto. Žákli'e zchalje', na' nsedle' da' nyejw le'e yiche la'y. **25** Lezka' nsedle' kan nak da' žeje'žo che Xanžon'. Dot laže'e bchalje', na' kwáselo bsedle' benách ka' kan nak che Jesusen', la'kze nónbia'ze' da' žeza benách ka' nis kan ben Zwa. **26** Wzó law Apolon' zchalje' dot laže'e gan nak lo yo'o gan zdobgak benne' judío ka' nich yéngakle' xtiža' Dios. Kate' béngekle Prisila len Akila da' zchalj Apolon', na' bchégake' le' cheze, na' bzejn'igekle' le' kwáselo kan nak xtiža' Dios. **27** Kate' Apolon' gónele' cheje' gan nbab Akaya, na' lježžo ka', benne' nníta'gake' lo yež Éfeso, ben chóchgake' le'. Bzójgake' to le'e yiche da' chjwe'e lo na'gak benne' ka' žejlé'gake' che Benne' Criston' gan nbab Akaya na', nich gápegake' Apolon' ba la'ne. Kate' bla' Apolon' lo yežlyón', da' bchalje' gókłe'elenen benne' ka' žejlé'gake' che Benne' Criston', dan' wzoałen Dios légake'. **28** Ki goken dan' Apolon' bzoa zie' benne' judío ka' lawgak yógo'te benách ka', bkonle' žin da' nyejw le'e yiche la'y, na' bloe'ele' légake' Bennen' lie' Jesúś nake' Benne' Criston'.

**Da' ben Pablo lo yež Éfeso**

**19** Katen' wzóa Apolo lo yež Korinto, wdé Pablo gan zej nnita' yež ka' zej žen' yelate' ža'le, na' ble'e lo yež Éfeso. Lo yežen' bejxake'e bale' benne' ka' žejlé'gake'

che Benne' Criston'. **2** Pablón' wnnable' légake', na' wnné':

—¿Bedjoalen Dios Be' La'y le'e katen' bejle'le che Benne' Criston'?

Bely'i'e le':

—Bi na' yenlto' cha' zoa Dios Be' La'y.

**3** Naž Pablón' wnnable' légake', na' wnné':

—Nakx gok da' bezoaale nis?

Na' wnnágake':

—Kan bezóa Zwa benách ka' nis.

**4** Pablón' wnné':

—Zwan' bezóe' benách ka' nis, benne' ka' beyát láže'gake', na' Zwa na'kzen' gože' légake' žala' chejlé'gake' che Bennen' za' ze'e ka le', Bennen' lie' Jesúś, na' nake' Le' Benne' Criston'.

**5** Kate' benne' ka' béngekle' da' ni dan' znna Pablón', bezóagake' nis dan' ba žejlé'gake' che Xanžo Jesúś.

**6** Kate' Pablón' bxoa ne'e légake', na' wnnable' Dios lo wlázgake', na' Dios Be' La'y bedjsóalene' légake', na' bcháljgake' diža' yoble, na' bcháljgake' lo wláz Dios. **7** Gokgak benne' ki chežinnoe'.

**8** Wzó Pablón' ga na' ka chonnie byo', na' žó'oteze' lo yo'o gan zdobgak benne' judío ka' nich yéngakle' xtiža' Dios, na' lo yela' wechóglaze' bchalje' láwgake'.

Bcháljlene' légake', na' gónele' wloe'ele' légake' nak da' li da' znne' kan znna bia' Dios. **9** Bale' ben chóchgake' yichj lázdo'gake', na' bi bejle'gake' che Benne' Criston', na' wnnégake' che xtiža' Xanžon' gan zej nnita' benne' zan ka'. Naž Pablón'

bekwase' len benne' judío ka', na' bebeje' benne' ka' na'le, benne' ka' žejlé'gake' che Benne' Criston'.

Tža tža bcháljlene' benne' ka' žejlé'gake' chie' Le' gan zdóbgake' lo yo'o gan žsede Tiranno benách ka'. <sup>10</sup>Ki bénenteze Pablon' ka chopiz, na' ka' goken, yógo'te benách ka' nníta'gake' lo yež ka' gan nbab Asia, benne' judío ka', na' benách zi'to' ka', béngekle' kan nak che Xanžo Jesusen'. <sup>11</sup>Dios bene' da' zan yela' wak zen lo na' Pablon'. <sup>12</sup>Ka' goken, bałe benne' ka' békxwgake' láže'do' ka' da' bchej Pablon' yichje', na' laže' chelá'a ka' da' bde'e li'e, na' yjwá'gake' légaken gan zej nnita' benne' yižwé' ka'. Beyákgake' kan zej nak yižwé' ka' che chégake', na' bežojgak be' xiwe' ka' zej yo'o benne' ka'.

<sup>13</sup>Naž bałe benne' judío, benne' wdá žag ka', benne' zbéjgake' be' xiwe' ka', gónegekle' wkóngekle' žin la Xanžo Jesusen' nich yebéjgake' be' xiwe' ka' zej yo'o benách ka', na' wnnágake':

—Ni'a che la Jesús, Bennen' zchalj Pablon' kan nak chie', že'to' le'e yežojele.

<sup>14</sup>Ki bengak gaže benne' byo zi'n Eseba, to benne' judío, benne' blo ládjwgak bxoz wnná bia' ka'.

<sup>15</sup>Beží'i be' xiwen', na' wnnán:

—Nónbi'a Jesusen', na' nnezla' no benne' nake' Pablon', san le'e, čnoz benne' le'e?

<sup>16</sup>Naž bxite' bennen' yoe'e be' xiwe', na' bsaka' zi'e légake'. Blej bchochje' yógo'tegake', dan' wzáke'že' ka' légake'. Ka' goken bzonnjgak benne' gaže ka' lo yo'on', zej nak gale yídzegake', na' wé'zegake'. <sup>17</sup>Kan gok da' ni wzé diža' chen, na' yógo'te benne' ka' nníta'gake' lo yež Éfeso,

benne' judío ka', na' benne' zi'to' ka', béngeklen', na' yógo'tegake' bžébegake' Dios. Che len bka'n zéngake' la Xanžo Jesusen'.

<sup>18</sup>Lezka' bžingak benne' zan, benne' ka' žejlé'gake' che Benne' Criston', na' bexóalapagake' dola' da' zej nbage'e, na' bлоé'gekle' da' kegle ka' da' ba béngeake'. <sup>19</sup>Lezka' bengak benne' zan, benne' ka' zga'ale béngeake' yela' wžá'. Bžíngake' zej noe'e yiche wžá' chégake' ka', na' bzéygake' da' ka' lawgak yógo'te benách ka'. Blábgake' kan záka'gak yiche ka', na' goken chi yon mil mežw plat. <sup>20</sup>Ka' goken, wzé'e diža', na' xtiža' Xanžon' benen ga beyakgak benách zan chie' Le'. Dot láže'gake' bejlé'gake' che Benne' Criston'.

<sup>21</sup>Wdé gok da' ki, Pablon' ben byene' cheje' lo yež Jerusalén, san gónele' tie' zga'ale yež ka' gan nbab Masedonia, na' gan nbab Akaya. Wnne':

—Te cha'a lo yež Jerusalén, žon byenen cha'a lo yež Roma.

<sup>22</sup>Naž bsele'e chope xkwide' byo ka' gan nbab Masedonia, bi' ka' žónlengakbe' le' tzen, na' légakbe' Timoteo, na' Erasto, san lekze' bga'ne' bałe ža gan nbab Asia na'.

### Benne' Éfeso ka' žóngake' žo'osbé lo yežen'

<sup>23</sup>Kate' ža ka' bengak benne' Éfeso ka' žo'osbé, na' beží'igake' che xtiža' Xanžon'. <sup>24</sup>Demetrio, to benne' wen da' zej naken ya plat, bene' ga béngeake' žo'osbé na'. Demetron' žonkze' liž lo'a ka' da' zej naken ya plat, da' ka' zej naken che dios no'le chégake' lie' Diana. Benne' ka'

žóngake' žin ni zzí'gake' mežw zan.  
**25** Demetrimon' btobe' yezika' benne'  
 ka' žóngake' la' žin níze, na' gože'  
 lágake':

—Le'e, ljéža'do' ka', nnézkzelele  
 kan nak žin da' žonžo, žonnen  
 mežw chežo. **26** Zlé'elele, na' zénlele  
 kan žon Pablon'. Kégeze lo yež  
 Éfeso nga, san dot gan nbab Asia,  
 ba bene' ga beyakgak benne' zan  
 che Benne' Criston', na' ba bche'e  
 kan žóngake', dan' ži'e lágake' da' ka'  
 žongak benách ka' bi zej naken dios.  
**27** Kégeze ga'n ka'ze žin ni da' žonžo,  
 san lezka' ga'n ka'ze yodo' che dios  
 no'le zen lie' Diana. Ki gaken, ga'n  
 ka'ze yela' zen che dios no'le ni,  
 diosen ūka'n ūengak benách dot  
 gan nbab Asia, na' lezka' benách ka'  
 nnít'a'gake' dot yežlýo nga.

**28** Kate' béngekle benne' ka' da' ni,  
 belže'e, na' wžéžeya'agake' zižje, na'  
 wnnágake':

—iGa'n zen Diana, dios no'le chežo  
 žo'o, benne' Éfeso ka'!

**29** Ka' goken, bengak benách ka'  
 žo'osbé dot lo yežen', na' tzen jake'  
 taríaze la' li'a yolawe'. Bzóbgake'  
 Gayo len Aristarko ga na', benne'  
 ka' zej nbabe' Masedonia, na'  
 žónlengake' Pablon' tzen. **30** Gónele  
 Pablon' choe'e gan zej nnita' benne'  
 zan ka', san benne' ka' žejl'gake'  
 che Benne' Criston' bi bé'gake' le'  
 latje. **31** Lezka' bengak bale benne'  
 yolawe' ka' che gan nbab Asia,  
 benne' ka' zlé'egekle' Pablon' chawé.  
 Bsél'a'gake' benne' ka' góta'yoegekle'  
 le' bi choe'e la' li'a yolawen'. **32** Gan  
 žóngake' žo'osbé, na' zbéžeya'agake',  
 to da' znnágake' bale', na' yetó da'  
 znnágake' yebale'. Ka' goken dan'  
 zej nchixe benne' zan ka' žóngake'

žo'osbé, na' yeláte'ze ka ndachgak  
 benne' ka' bi nnézgakle' biz chen'  
 zej ndobe' ga na'. **33** Naž benne' judío,  
 ka' bebéjgake' Kantr, to benne' judío,  
 laduw benne' zan ka', na' bzégake'  
 le' lágake'. Blœ'el Kantren' len  
 ne'e, nich kwé'gake' žize, dan'  
 gónele' nne' da' gáklenen benne'  
 judío ka' lawgak yógo'te benne' ka'.  
**34** Katen' gókbe'egekle' nake' benne'  
 judío, na' tzen wžéžeya'agake' zižje  
 yógo'tegake' ka chope hora, na'  
 wnnágake':

—iGa'n zen Diana, dios no'le chežo  
 žo'o, benne' Éfeso ka'!

**35** Naž benne' wzój che yolawe'  
 bene' ga wž'egak benne' zan ka' žize,  
 na' wnné':

—Benne' Éfeso ka', nnézgakle  
 yógo'te benách zoa yodo' che  
 Diana nga, dios no'le zen, na' žo'o  
 ni, benne' Éfeso ka', žape chi'ižo  
 yodon', na' lezka' yej na' da' naken  
 lo'a Diana na', dan' bžojen ya'abá,  
 na' bežjwn ga zoažo ni. **36** Bi gak  
 nitó benne' wži'e che da' ni. Che  
 len žon byenen soale žize, na' bi  
 be ka gónele. **37** Bche'le benne' ki  
 nga, na' bi želbane' da' že' yodo',  
 na' bi wnné zí'gake' che dios  
 no'le chele. **38** Che len, cha' zoa  
 diža' bizjw chegak Demetrimon', na'  
 chegak benne' wen da' zej naken  
 ya plat, benne' ka' nnít'a'lengake'  
 le', len nóté'teze benne', de latje  
 gan wzé nagto' chégake', na' de gan  
 zoa benne' wchi'a laže'e lágake', ga  
 na' gak yesbága'gake' ljéžgake' zia  
 toe' yetó'e. **39** Na'a, cha' de yetó da'  
 nnable, wak wkán cháwe'žon kate'  
 dobjak benne' yolawe' ka', kan  
 znná yolawe' che yež Roma. **40** Wak  
 no benne' yesbáge'e žo'o zia ni'a

che žo'osbé da' goken na'a, na' nne' zži'ižo che yolawen'. Bi be zoa da' gak nnažo bžiz chen' gok žo'osbé na'.

<sup>41</sup>Kate' beyóz bchalje' da' ni, besele'e benne' zan ka' lížgake', benne' ka' zej ndobe' ga na'.

**Pablo zeje' gan nbab Masedonia, na' gan nbab Gresia**

**20** Kate' wžé' ži žo'osbé na' dan' goken lo yež Éfeso, naž Pablo bliže' benne' ka' žejl'é'gake' che Benne' Criston', na' kwáselo bzejni'ile' légake'. Wdé na' bzele' diža' légake', na' la' bkwastie' len légake'. Bžoje' ga na', na' wyeje' gan nbab Masedonia. <sup>2</sup>Wdíe' lo yež ka' zej nbaben ga na', na' bzejni'ile' benne' lježžo ka' nníta'gake' to to yež ka', na' wdé na' wyeje' gan nbab Gresia. <sup>3</sup>Wzóa Pablón' ga na' ka chonnie byo'. Kate' za' kwene' to lo barkw nich cheje' gan nbab Siria, na' gókbe'ele' žénegekle benne' judío ka' góxwgake' le'. Che len wyoé'e nez, na' beyeje' gan nbab Masedonia, na' bžine' lo yež Filipos. <sup>4</sup>Sópater, zi'n Pirro, benne' Berea, len Aristarko, na' Segundo, benne' Tesalónika ka', na' Gayo, benne' Derbe, na' lezka' xkwide' Timoteo, na' Tíkiko, na' Trófimo, benne' Asia ka', bén lengake' le' tzen. <sup>5</sup>Naž benne' ki jake' zgá'alegake' ka Pablón', na' bžíngake' lo yež Troas, gan belbeze' le'. <sup>6</sup>Lo yež Filipos na', neda', Lukas, bejchaga' Pablón'. Kate' ba wdé lnin' kate' žawgak benne' judío ka' yet xtíl da' bi nzin' kwa zichj chen, na' wžento' to lo barkw, na' beza'to' lo yež Filipos na'. Wdé gayo' ža bžagto' benne' ka' jake' zgá'alegake' ka Pablón', na' zbezgake' le' lo yež Troas, gan bga'nto' gaže ža.

**Da' ben Pablo lo yež Troas**

<sup>7</sup>Ža nežw bdobgak benne' ka' žejl'é'gake' che Benne' Criston' nich yej' gáwgake' da' žsa' láže'žo kan got Jesús, Benne' Criston'. Na' bsedle Pablo légake', na' dan' žala' yeze'e ga na' kate' za' ža'ní' ža na', che len scha bchalje', ga bžinte wdé gachje yele. <sup>8</sup>Gan zej ndobe' naken lo yo'o ža'le, na' zej nnita' da' zan da' zgóogaken baní' ga na'. <sup>9</sup>Wzóa xkwide' Eutiko ga na', na' že'be' gan žo'o baní' che yo'on', na' znnale'en tasbe' dan' ztonn Pablón' da' zchalje'. Gan že' ztas xkwiden' naken da' chonnie kwia lo yo'on', na' ztászebe' wbíxtebe', na' bžíntebe' lo yo že'le. Náttebe' bechísgake'-be'. <sup>10</sup>Betj Pablón' zan yo'on', na' bejxóe' lebe', na' beyeje'e-be'. Naž gože' benne' ka' nníta'gake' ga na', na' wnné':

—Bi žébele. Nbanbe'.

<sup>11</sup>Kate' ba bebén Pablón' ža'le, bejwe' yet xtíl, na' bdawen'. Naž Pablón' bcháljlene' légake' ga bžinte chbal-le. Wdé na' bežoje' ga na'. <sup>12</sup>Xkwide' byon', bin' wbixbe', nbanbe' beché'gake'-be', na' beyák zénle'egake'.

**Kan gok bžinto' lo yež Miletó**

<sup>13</sup>Bejchento' lo barkw, na' wdeto' ga bžinto' lo yež Asón nich chejchagto' Pablo ga na', kan ba ben xtíža'to', dan' gónele Pablón' cheje' ga na' sa'ze ni'e. <sup>14</sup>Kate' ba bžagto'ne' lo yež Asón na', wžene' lo barkwn' gan yo'oto', na' wyejto' gan že' yež Mitilene. <sup>15</sup>Bezá' barkwn' ga na', na' ža chope ža bžinto' to li gan zoa to yežlyó lo nisdon' da' nzin' Chio, na' yetó ža wdeto' to li gan

de yetó yežlyó da' nzin' Samos, na' bžinto' lo yež Trojilio gan bga'nto' to chi'i. Yetó ža bžinto' lo yež Miletto.

<sup>16</sup>Ki bento' dan' Pablón' ba ben choche' teze' yež Éfeso, nich bi želes' gan nbab Asia, dan' žak láže'lí'e soe' lo yež Jerusalén kate' žin ža Pentecostés cha' sáke'le'.

**Da' bchalj Pablo lawgak benne'  
Éfeso ka' lo yež Miletto**

<sup>17</sup>Kate' ne zoa Pablo lo yež Miletto, bsele'e to benne' bejliže' benne' gole ka', benne' žape chí'igake' benách ka' che Benne' Criston', benne' ka' nnít'a'gake' lo yež Éfeso. <sup>18</sup>Kate' bžíngake' gan zoa Pablón', le' gože' lágake':

—Le'e ba nnézkzelele kan béntega' gan zoale kate' wzó law bla'a gan nbab Asia. <sup>19</sup>Tža tža bena' xchin Xanžon' lo yela' gaxjw laže'. Ki bena' ga bžinte wžeža' ni'a chele, na' da' zan da' goken chia' da' ka' wzí' biá'gaken neda' ni'a che da' zia da' bengak benne' judío ka' chia', benne' ka' bi žejlé'gake' che Benne' Criston'. <sup>20</sup>Bcháljteza' gan zoale yógo'te da' žóngaken ga žak chawe' chele, na' kwáselo bsedla' le'e gan zdóbele che Benne' Criston', na' gan nak lo ližle ka'. <sup>21</sup>Bzoa lia' lawgak benne' judío ka', na' lawgak benne' zi'to' ka', nich yeyát láže'gake', na' yeyákgake' che Dios, na' nich chejlé'gake' che Xanžo Jesúš, Benne' Criston'. <sup>22</sup>Na'a, Dios Be' La'y ba bene' chia' cha'a lo yež Jerusalén, na' bi nnezla' bží' gaken chia' ga na'. <sup>23</sup>Yógo'te yež gan zda', Dios Be' La'y zlo'e'le' neda', na' ži'e neda' kan gongak benne' judío ka', benne' bi žejlé'gake' che Benne' Criston', znne' wséjwgake' neda'

liž ya, na' gon zí'gake' neda'. <sup>24</sup>Bi be žekla' neda' ni'a che da' gaken, la'kze gata' o bi gata', san žénezela' yeyóž gona' da' ne žona', nich gona' žin da' bde Xanžo Jesúš lo na'a, da' naken wchalja' diža' chawen' kan nak da' žonnze Dios chežo. Ki gona' len yela' žebél.

<sup>25</sup>'Ba bchalja' lawle le'e kan znna bia' Dios. Na'a, nnezla' biž le'elele neda'. <sup>26</sup>Che len, žapa' le'e da' naken dot da' li na'a ža. Bi be nbaga'a neda' che nitole le'e. <sup>27</sup>Bi be zoa da' bi bsedla' le'e, san bzenla' le'e yógo'te da' wnnakze Dios. <sup>28</sup>Che len, le gape chí'i kwinle, na' le gape chí'i yógo'te benách ka' che Benne' Criston', dan' Dios Be' La'y bnnite' le'e nich gáklenle, na' gape chí'ile benách ka' che Xanžo, Bennen' gote' lo wláz lágake', na' blalje' xchene' da' beyá'wle' lágake'. <sup>29</sup>Ba nnezla', te yezá'a gan zoale, chazgak benne' ka' gan zoale, benne' yénegekle' wchíxgake' benách ka' che Benne' Criston'. Góngake' kan žongak beko' yixe' snia ka', bia ka' zbia yí'gakba' zila' ka'. <sup>30</sup>Žojgak benne' ka' nnít'a'gake' ládjwle, na' wcháljgake' da' wen laže' nich kwéjgake' chégakze' benne' ka' žejlé'gake' che Benne' Criston', benne' ka' žónlengake' le'e tzen. <sup>31</sup>Che len, le gak ban laže', na' le yesá' laže' kan bena' neda' chonniz, dan' dot ža dot yele kwáselo bzejni'ilá' le'e to tole na' sejte wžeža' ni'a chele.

<sup>32</sup>'Na'a, zí'na'do' ka', zgo'a le'e lo na' Dios. Znnabla' Le' gon chawe'e le'e, na' gone' kan znna xtiž'e. Dios gon choche' le'e, na' gone' ga gak gónlenle tzen benne' ka' ba wleje' cheze'. <sup>33</sup>Batkle wdán laža'a

da' naken chegak lježa' ka'. Bi wdán laža'a mežw, o laže' chégake'.  
**34** Nnézkzelele, len na' kwinkza' bena' žin nich gak ga'wa' da' byažjen chia', na' da' byažjen chegak benne' ka' bénlengake' neda' tzen žin. **35** Len yógo'te da' bena', bloe'ela' le'e kan žala' gonžo žin nich gak gáklenžo benne' ka' želyážjele'. Žala' chejsá' láže'zo dan' wnná Xanžo Jesúš na'kze, katen' wnné': "Gakže chawe' che bennen' bi da' znezjwe' ka' da' gaken che bennen' bi da' zzi'e."

**36** Kate' beyóž bchalj Pablon' da' ni, naž bzoa zibe', na' bénlene' tzen yógo'tegake', bcháljlengake' Dios.

**37** Naž yógo'tegake' belbeže', na' byéla'gake' yen Pablon', na' bchag láwgake' le'. **38** Ki béngake' dan' gok nyache' láže'gake' ni'a che dan' wnná Pablon', katen' wnné': "Biž lélé'elele neda'." Jáklene' le' tzen, na' bžíngake' ga bebene' le' lo barkw.

### Pablo zeje' lo yež Jerusalén

**21** Wdé beza'to' gan wnnítá'gak benne' Éfeso ka', barkw da' yo'oto' la' wyo'oten nez, na' to liža wdeto' gan zoa yežlyodon' nzin' Kos. Ža chope ža, bžinto' yetó latje da' nzin' Rodas. Beza'to' ga na', na' bžinto' lo yež Pátara. **2** Lo yežen' bejxáka'to' to barkw yoble da' zejen gan nbab Fenisia. Wžento' lo barkwn', na' la' wyo'oten nez.

**3** Wdeto' gan zla' yežlyó Chipre, da' wzóan chelá'a yegle, na' bžinto' gan nbab Siria. Wyáz barkwn' latjen' gan že' yež Tiro, dan' žala' chejká'ngake' ywa' da' nwa' barkwn' ga na'. **4** Lo yež Tiro na' bejxáka'to' benne' ka' žejlé'gake' che Benne'

Criston', na' bgá'nlenlo' légake' gaže ža. Dan' ba bloe'el Dios Be' La'y légake' da' žala' gak che Pablon', belyi'e le' bi cheje' lo yež Jerusalén.

**5** Wdé na' katen' za' yežojo' ga na', yógo'tegake' wzá'lengake' neto' tzen len no'le ka' chégake', na' xkwide' ka' chégake', na' bžinto' na'le žoa'a yežen'. Naž bzoa zibto' žoa'a nisdo', na' bcháljlento' Dios.  
**6** Beyóž wdéla'to' lježto' toto' yetoto', na' bebento' lo barkwn', na' légake' beyéjgake' lížgake'.

**7** Naž la' wza'te barkwn' lo yež Tiron', na' ga ze lawte bžinen lo yež Tolemaida. Lo yežen' bežojo' lo barkwn'. Wdapto' "Padiox" benne' lježto ka' nnítá'gake' ga na', na' bgá'nlenlo' légake' to ža. **8** Kate' za' ža'ní' yetó ža, bežój Pablon' ga na', na' neto' bénlento'-ne' tzen, na' wyejto' lo yež Sesarea, gan wyo'oto' liž Lip, na' bgá'nlenlo' le'. Lipen' zchalje' diža' chawen', na' bénlene' tzen gaže benne' ka' wžégake' ža ni'te nich gáklenžake' benách ka' che Benne' Criston'. **9** Zej nnita' tape xkwide' no'le che Lipen', na' zcháljgakbe' lo wláz Dios. **10** Wdé wzoato' ga na' chope chonne ža, naž bla' Agabo, benne' bžoje' gan nbab Judea, na' zchalje' lo wláz Dios. **11** Benne' ni bedjwíe' neto', na' bexwe' yid nžejen le'e Pablon'. Bcheje' ni'a na' kwine', na' wnné':

—Ki zna Dios Be' La'y: "Ki gongak benne' judío ka', benne' nnítá'gake' lo yež Jerusalén. Wchéjgake' bennen' nak yid ni chie', na' wdégake' le' lo na'gak benne' zi'to' ka'."

**12** Kate' benlto' da' ni, neto' len benne' ka' nnítá'gake' ga na'

góta'yoelto' Pablon' nich bi cheje' lo yež Jerusalén. <sup>13</sup>Bež'i' Pablon', na' wnné':

—¿Bíz da' ni žonle, zbéžele, na' žonle ga žak nyache' laža'a? Neda' ba zoakza', kégeze wchéjgake' neda', san lezka' gata' lo yež Jerusalén ni'a che Xanžo Jesús.

<sup>14</sup>Dan' bi gok wcha'to'-ne', biž bi gožto'-ne', na' wnnato':

—Gak kan nna Xanžon'.

<sup>15</sup>Kate' ba wdegak ža ka', bkwezto' dan' nwa'to', na' wyejto' lo yež Jerusalén. <sup>16</sup>Bale benne' ka' che yež Sesarea na', benne' zejl'é'gake' che Benne' Criston', wzálengake' neto', na' Mnasón, to benne' Chipre, bénlene' légake' tzen. Žejli'e che Benne' Criston' ža ni'te, na' žala' chejga'nto' liž benne' ni.

### Pablo zejwíe' Jakob

<sup>17</sup>Katen' bžinto' lo yež Jerusalén, benne' lježzo ka', benne' zejl'é'gake' che Benne' Criston', len yela' žebél chégake' wdápegake' neto' ba la'ne. <sup>18</sup>Ža chope ža, Pablo wyó'olene' neto' lo yo'o, gan bejwiato' Jakob, na' jez ndobe yógo'te benne' gole ka' ga na', benne' ka' žape chí'igake' benách ka' che Benne' Criston', benne' ka' nníta'gake' lo yež Jerusalén. <sup>19</sup>Kate' Pablon' ba wdape' légake' "Padiox" bzenle' légake' yógo'te da' ben Dios lo ne'e le' gan jez nnita' benách zi'to' ka'. <sup>20</sup>Kate' béngekle' da' ni, bka'n zéngake' Dios. Naž belyi'e Pablon', na' wnnágake':

—Zlékzelo', lježto', benne' zante gaywá', benne' judío ka', zejl'é'gake' che Benne' Criston', na' yógo'tegake' žapele'egake' ba la'ne da' bchi'le Moisés. <sup>21</sup>Ba béngekle' da' ka'

znnagak benách ka' kan naken chio', znnágake' zzejni'ilo' yógo'te benne' judío ka', benne' nníta'gake' ladjw benách zi'to' ka', nich wká'ngake' da' bchi'le Moisés benách Israel ka', na' ži'o légake' bi chóggake' lo bela' chegak xkwide' byo chégake' ka', na' bi gápegake' ba la'ne da' ka' žónteze žonžo žo'o, benne' judío ka'. <sup>22</sup>¿Nakx gonžo na'a? Dobgak benne' zan kate' yéngekle' ba beló'o nga. <sup>23</sup>Na'a, ben da' ni da' ye'to' le'. Nnítallengak tape benne' byo ka' neto' nga, benne' ka' ba bchebe láž'e'gake' law Dios to da' góngake'. <sup>24</sup>Bche' benne' ki len le', na' benlen légake' tzen nich gon chawe' kwinle kan nak che yodo', na' wdizjw le' da' žala' chízjwgake' nich góngake' yidze yíchjgake', nich nnézgekle yógo'te benne' judío ka' bi nakkze dan' znnégake' chio', san lezka' le' žono' da' naken chawe', na' žapo' ba la'ne da' bchi'le Moisés. <sup>25</sup>Kan nak chegak benách zi'to' ka', benne' ka' zejl'é'gake' che Benne' Criston', ba bento' chawe' diža', na' ba bzojto' kan žala' góngake'. Bi žon byenen gape chí'igake' da' ki da' žónteze žongak benne' judío ka', san toze:

Bi yej' gáwgake' da' wlo'ogak  
benách ka' lawgak lo'a ka'.  
Bi gáwgake' žen.

Bi gáwgake' bela' chegak bia  
yixe' ka' len xchéngakba'.  
Bi góngake' da' sban.

### Žóxwgake' Pablo la' li'a yodo'

<sup>26</sup>Naž Pablo bchi'le tape benne' ka' len le', na' ža chope ža ben chawe' kwine' tzen len légake' kan nak che yodo'. Naž wyaze' la' li'a yodo', nich gak bia' biz ža yejóž góngake' da'

gon chawe' kwíngake', že na' žala' chjwá'gake' da' kó'ogake' law Dios to toe'. <sup>27</sup>Kate' za' yeožgak gaže ža ka', bałe benne' judío ka', benne' zej nžoje' gan nbab Asia, blé'egekle' Pablón' la' li'a yodo'. Béngake' ga bengak benne' zan žo'osbé, na' békwgake' Pablón'. <sup>28</sup>Wnnégake' zižje, na' wnnágake':

—Le gaklen neto', le'e, benne' Israel ka'. Benne' ni zsedle' yógo'te benách yógo'te latje nich wká'ngake' ka'ze yež chežo, na' da' bchi'le Moisés, na' yodo' chežo nga. Na'a, ba wloé'e benne' zi'to' ka' lo yodo' nga. Ki žone', zka'n ditjle' latje la'y nga.

<sup>29</sup>Ki wnnágake' dan' zga'ale blé'egekle' Pablón' lo yež tzen len Trófimo, benne' Éfeso, na' žékgake' bchi'e bennen' lo yodon'.

<sup>30</sup>Ka' goken, bdobgak yógo'te benne' ka' che yežen', na' bžíngake' ga na'. Naž wzéngake' Pablón', na' wzóbgake' le', na' bebéjgake' le' na'le la' li'a yodon', na' la' bséwjtegake' gan žó'ogake' la' li'a yodon'. <sup>31</sup>Kate' za' gótgake' Pablón', bžin diža' law benne' blo, benne' žeje' lo wdile'.

Benle' žongak yógo'te benách mnítágake' lo yež Jerusalén žo'osbé. <sup>32</sup>Naž benne' blon' la' btobtie' benne' ka' žjake' lo wdile, tzen len benne' ka' zché'gake' légake', na' taríaze wyéjlene' légake' gan žongak benne' ka' žo'osbé. Katen' blé'egekle' benne' blon' len benne' ka' žjake' lo wdile, naž bsángake' zwaw zázagake' Pablón'. <sup>33</sup>Wbiga' benne' blon' ga na', na' bexwe' Pablón'. Gože' benne' ka' žjake' lo wdile wchéjgake' le' len chope do ya. Wdé na' wnnable' benne' zan ka', na' wnné':

—¿Nozkze benne' ni, na' biz bene'?

<sup>34</sup>Benne' zan ka' belbéžeyi'e, na' che chégake' kan wnnágake'. Ka' goken, benne' blon' bi be gok chejni'ile', dan' žongak benne' ka' žo'osbé. Che len gože' benne' ka' žjake' lo wdile ché'gake' Pablón' lo yo'o zen gan zdóbgake'. <sup>35</sup>Katen' bžíngake' gan nak nepe' che yo'o zen na', yjwa'gak benne' ka' žjake' lo wdile Pablón', dan' žíadi'igak benne' zan ka' légake'. <sup>36</sup>Za'gak benne' ka' xkózé'l'gake'. Želbéžeyi'e, na' znnágake':

—iLe gote'!

**Da' bchalj Pablo lawgak benne' zan ka'**

<sup>37</sup>Kate' wzó láwgake' kó'ogake' Pablo lo yo'o zen na', le' gože' benne' blon', bennen' žeje' lo wdile, na' wnné':

—¿Gonno' neda' latje yapa' le' to diža'?

Benne' blon' gože' Pablón':

—¿Žako' diža' griego? <sup>38</sup>¿Kege le' benne' Ejipto na' ža nize btobe' benne' wen da' zinnj ka', na' bchi'e ka tape mil benne' wetw benne' ka' lo latje dach?

<sup>39</sup>Naž Pablón' gože' le', na' wnné':

—Da' li naka' neda' benne' judío. Golja' lo yež Tarso, to yež blo gan nbab Siliśia. Žáta'yoela' le' gonno' neda' latje wchalja' lawgak benách ki.

<sup>40</sup>Benne' blon' bi'e le' latje, na' Pablón' wzé' gan nak nepe', na' bchis ne'e nich kwe'gak benách zan ka' žize. Kate' ba wnnítágake' žize, naž Pablón' bcháljlene' légake' len diža' hebreo.

**22** Ki wnná Pablón':

—Le'e, benne' gole ka', na' le'e, ljéza'do' ka'. Le wzé nag da' yapa' le'e kan nak da' žona'.

<sup>2</sup>Kate' béngekle' zchalje' diža' hebreo, wnníta'gakže' žize. Pablon' gože' légake', na' wnné':

<sup>3</sup>—Nakkza' neda' benne' judío. Golja' lo yež Tarso gan nbab Silisia, san bgola' lo yež nga, na' bsedle Gamaliel neda' dot kan nak da' bsédgekle xa xto'žo ka'. Be' láže'teza' bka'n zena' Dios kan žonle le'e na'a. <sup>4</sup>Zga'ale wzía laža'a benne' ka' nzi' lo ná'gake' xtiža' Benne' Criston', na' bchi'a légake' gan gátgake'. Wzéngaka'-ne', na' bséjwgaka'-ne' liž ya, benne' byo ka' len no'le ka'. <sup>5</sup>Lezka' wak wzóa ligak bxoz wnná bia' ka' len benne' gole ka' da' béngekle'. Bzójgake' to yiche wnná bia' da' chjwa'a gan zej nnita' lježjo judío ka' lo yež Damasko. Wyá'a ga na' nich chejxena' benne' ka' nníta'gake' ga na', benne' ka' žejlé'gake' che Benne' Criston', nich yedjchi'a légake' zej nžeje' lo yež Jerusalén nga, nich gonto' légake' zia.

### Zloe'el Pablo kan beyake' che Benne' Cristo

<sup>6</sup>Naž wnná Pablo:

—Katen' zeyá'a lo nez, na' za' žina' lo yež Damaskon', katen' goken wawbíž, ka' gaze wyép yes baní' da' zan' ya'abá, na' bsa'nín' gan zeyá'a. <sup>7</sup>La' bgo'ntia' lo yo, na' benla' chi'i to Benne' gože' neda': "Saulo, Saulo, čbiž chen' žbia lažo'o neda'?" <sup>8</sup>Naž wnnabla' Le', na' wnníá': "¿Noz Le', Xan?" Le' gože' neda': "Neda' Jesús, benne' Nasaret. Nedkza' žbia lažo'o." <sup>9</sup>Benne' ka' wnníta'lengake' neda' blé'egekle' banín', na' bžébegake', san bi béngekle' chi'i Bennen' bcháljlene' neda'. <sup>10</sup>Naž goža'-ne':

"¿Biz žala' gona', Xan?" Xanžon' gože' neda': "Beyás, na' wyéj lo yež Damasko gan zoa to benne' yi'e le' yógo'te da' žala' gono!" <sup>11</sup>Dan' biž bi blé'ela' dan' bdi'i yes baní' na' yej lawa', che len benne' ka' zéjlengake' neda' tzen béxwgake' na'a, na' bché'gake' neda' gan bžintia' lo yež Damaskon'.

<sup>12</sup>Lo yežen' zoa Ananías, to benne' žone' dot kan znna da' bchi'le Dios, na' benne' judío ka' nníta'gake' lo yež Damaskon' žápegake' le' ba la'ne. <sup>13</sup>Ananíasen' blé'e gan wzóa', na' gože' neda': "Saulo, bicha'a, yeyaljw yej lawo." La' na'ze beyaljw yej lawa', na' blé'ela' le'. <sup>14</sup>Le' gože' neda': "Dios chegak xa xto'žo ka', wžekze' le' ža ni'te nich nnezlo' da' žénekzele' Le', na' nich le'elo' Benne' Chawe', Bennen' nake' Zi'nkze', na' nich yenlo' da' ye'kze' le'. <sup>15</sup>Ki naken dan' žala' wzóa lio' chie' Le' lawgak yógo'te benách ka', na' wzenlo' légake' da' ba blé'elo', na' da' ba benlo'. <sup>16</sup>Na'a, čbiž chen' želo'? Wzó ža', na' bezóa nis. Wnnable Xanžon' yeyone' le' chawe', na' yeké'e dola' da' nbago'o."

### Jesús bsele'e Pablo nich wzóa lie' chie' Le'

<sup>17</sup>Lezka' wnná Pablo:

—Wdé na', katen' belá'a lo yež Jerusalén nga, na' kate' ne zcháljlena' Dios lo žchil yodo', na' blé'e dáwe'la'. <sup>18</sup>Ble'ela' Xanžon', na' gože' neda': "Tariáze wyéj. Bežojte lo yež Jerusalén nga, dan' benne' ki bi gápegate' ba la'ne da' wchaljo' chia'." <sup>19</sup>Neda' goža'-ne': "Xan, nnézgekle' kan bena' neda'. Wyoá'a gan nak lo yo'o gan zdobgak benne'

judío ka' nich yéngekle' xtiža' Dios. Wdina' benne' ka' žejlé'gake' chio' Le', na' bséjwgaka'-ne' liž ya. <sup>20</sup>Katen' bétgake' Esteban, bennen' bzoa lie' chio', lezka' neda' wzóa' ga na', na' bénlen'a tzen benne' ka' bétgake' le', na' ben chi'a laže' da' bxoa yengak benne' ka' bžé'egake' le' yej." <sup>21</sup>Naž Xanžon' gože' neda': "Wyéj, dan' žsel'a le' lawgak benách zí'to' ka!"

**Pablo zcháljlene'** benne' blo,  
benne' žeje' lo wdile

<sup>22</sup>Nize ze law bze naggak benne' judío ka' che Pablo, na' naž wžézeya'agake'. Wnnégake' zižje, na' wnnágake':

—Le got bennen'. Bi žala' soe' nbane'.

<sup>23</sup>Naž, dan' belbéžeyi'e, na' lo yela' zža'a chégake', bchézgake' laže' da'zej nakwe', na' belgo'ne' goxo', <sup>24</sup>che len benne' blon', bennen' žeje' lo wdile, gože' benne' ka' žjake' lo wdile wché'gake' Pablón' lo yo'o zen na'. Lezka' gože' légake' chíngake' Pablón' nich nne' da' nakkzen, nich nneze' biz chen' želbéžeya'a ki benne' judío ka' che Pablón'. <sup>25</sup>Kate' ne zchéjgake' ni'a na' Pablón' len yid ka' nich chíngake' le', Pablón' gože' to benne' zchi'e benne' ka' žjake' lo wdile, benne' zoe' ga na', na' wnné':

—¿De latje chinle neda'? Neda' nbaba' Roma, na' bi bchi'a laže' nitó benne' neda' cha' nbaga'a zia.

<sup>26</sup>Kate' benle bennen' da' ni, wyeje', na' bejzenle' benne' blon', bennen' žeje' lo wdile. Gože' le':

—Bízkze žonžo? Benne' ni nbabe' Roma.

<sup>27</sup>Naž benne' blon' ble'e gan zoa Pablón', na' gože' le':

—Wnná cha' nbabkzo' Roma.

Pablón' gože' le':

—O', nbabkza'!

<sup>28</sup>Beží'i benne' blon', na' wnné':

—Neda' wdízjwkza' mežw zan nich baba' Roma.

Naž Pablón' gože' le':

—Neda' wbaba' Roma katen' golja' dan'zej nbab xa xna'a Roma.

<sup>29</sup>Kate' béngekle benne' ka' da' ni, benne' ka' za' chíngake' Pablón', naž bebíga'gake' gan zoe'. Lezka' bžebé benne' blon' katen' wnneze' nbab Pablón' Roma, dan' ba wnné' wchéjgake' le'.

**Zla' Pablo lawgak benne' yodo',**  
benne' wchi'a laže' ka'

<sup>30</sup>Ža chope ža, gónele benne' blon' nneze' kwáselo bizen' da' žesbága'gak benne' judío ka' Pablo zia. Wnné' besež'e do yan' da' nžejen Pablón', na' wnné' dobjak bxož wnná bia', bxož judío ka' len yógo'te benne' yodo', benne' wchi'a laže' ka'. Naž bebeje' Pablón' gan bséjwgake' le', na' bzie' le' láwgake'.

**23** Naž Pablón' bwie' lawgak benne' yodo', benne' wchi'a laže' ka', na' wnné':

—L'e'e, ljéža'do' ka'. Na' zejte na'a žonkza' da' chawé'. Ki naken, bi zoa da' žesbaga' lázda'wa' neda' zia law Dios.

<sup>2</sup>Naž Ananías, bxož blo, gože' benne' ka' nníta'gake' dot kwit Pablón' káp'a'gake' žoe'e. <sup>3</sup>Pablón' gože' le':

—Lezka' Dios yebi'e chio' le', benne' zloé'ezele chawé' kwino'. Že'kzo' zchi'a lažo'o neda' kan bchi'le Moisés, san zdetle žono' kan bchi'kzle Moisesen', znnó' káp'a'gake' neda'?

<sup>4</sup>Benne' ka' nnita'gake' ga na'  
bely'i'e Pablón:

—čžiliž zi'o bxoz blo che Dios?

<sup>5</sup>Pablón' gože' lágake':

—Le'e, ljéža'do' ka'. Nyejw le'e  
yiche da' znnan: "Bi wlíž zi'o benne'  
znna bi'e benách wláž chio' ka'" san  
neda' bi gókbe'ela' nake' bxoz blo.

<sup>6</sup>Naž gókbe'ele Pablón' bale' zej  
nake' benne' yodo' saduseo ka', na'  
yezíka'gake' benne' yodo' fariseo ka'.  
Wnnié' zižje lawgak benne' yodo',  
benne' wchi'a laže' ka', na' wnné':

—Le'e, ljéža'do' ka'. Naka' benne'  
fariseo, na' naka' zi'n to benne'  
fariseo. Na'a zchi'a láže'le neda' dan'  
žxen laža'a yebangak benne' gat ka'.

<sup>7</sup>Kate' wnná Pablón' da' ni, bžoj  
chóplegak benne' yodo' fariseo  
ka', na' benne' yodo' saduseo ka',  
na' beldíl diže'e la' lágakze'. <sup>8</sup>Ki  
béngake' dan' znnagak benne'  
saduseo ka' bi yebangak benne' gat  
ka', na' bi zej nnita' wbás che ya'abá  
ka', na' bi zej nnita' be' nákgakkze  
benách ka', san benne' yodo' fariseo  
ka' žejlé'gake' zej nnita' yógo'te da'  
ki. <sup>9</sup>Che len wzéžeya'agake'. Naž  
wzó ža'gak benne' wsedle, benne'  
yodo' fariseo ka'. Beldíl diže'e, na'  
wnnágake':

—Žeklo' neto' bi be da' zia nbaga'  
benne' ni, dan' cha' bchaljlen to  
be' nakkze no benne' le', o cha'  
bchaljlen to wbás che ya'abá le', bi  
žala' wzí'ižo che Dios.

<sup>10</sup>Kate' ba beldíl díža'le'e benne'  
judío ka', na' bžebé benne' blon',  
benne' žeje' lo wdile, dan' žekle'  
wzóž tile' Pablón'. Naž wnné' chjak  
benne' ka' žjake' lo wdile, nich  
chejbéjgake' Pablón' ladjw benne'  
judío ka', na' yeché'gake' le' lo yo'o

zen gan zdobgak benne' ka' žjake' lo  
wdile.

<sup>11</sup>Kate' ba nak žel ža na'ze, bloe'e  
law Xanžon' gan zoa Pablón', na'  
gože' le':

—Ben choch lažo'o, Pablo. Kan ba  
bchaljo' chia' neda' lo yež Jerusalén  
nga, ležka' žon byenen wchaljo'  
chia' lo yež Roma.

### Žóngake' toze diža' gótgake' Pablo

<sup>12</sup>Kate' za' ža'ní yetó ža, bale benne'  
judío ka' bengake' toze diža', na' ben  
choch xtíža'gake', na' wnnágake' Dios  
wsaka' zi'e lágake' cha' bi góngake' dan'  
bchebe láže'gake'. Wnnágake' bi be  
yej gáwgake' na' zejte gótgake' Pablón'.

<sup>13</sup>Nnita'gakže ka chopalaj benne' ka',  
benne' ben choch xtíža'gake' ki. <sup>14</sup>Jak  
benne' ki gan zej nnita' bxoz wnná bia'  
ka', na' benne' gole ka', benne' judío ka',  
na' wnnágake':

—Ba ben choch xtíža'to', na'  
znnabto' wsaka' Dios neto' zi' cha'  
bi gonto' ki, na' bi be yej gawto' na'  
zejte gotto' Pablón'. <sup>15</sup>Na'a, le'e len  
benne' yodo' wchi'a laže' ka', le ye'  
benne' blon', benne' žeje' lo wdile,  
nich yedjwá'gake' Pablón' wxé, nich  
žine' gan ndoble, na' nnale žénelele  
nnáblele Pablón' to diža' gaze lo  
de. Neto' kwe' nawto'-ne' la' nez, na'  
gotto'-ne' zga'ale kate' žine' nga.

<sup>16</sup>Benle xkwide' byo che no'le zan  
Pablón' kan kwe' náwgake' Pablón',  
na' wyejbe', na' wyo'obe' yo'o zen  
na', na' bejzenben' Pablón'. <sup>17</sup>Pablón'  
blíže' to benne' zchi'e benne' ka'  
žjake' lo wdile, na' gože' le':

—Bche' xkwide' ni law benne' blo,  
dan' nwa'be' to diža' ye'be'-ne'.

<sup>18</sup>Naž bennen' bchi'e-be' gan zoa  
benne' blon', na' gože' le':

—Pablo, bennen' nyejwe' liž ya, bliže' neda', na' góta'yoele' neda' yedjwá'a xkwide' ni lawo', dan' zénelbe' wcháljljenbe' le'.

<sup>19</sup>Benne' blon' bexwe' na'be', na' bchi'e-be' cheze, na' wnnable'-be', na' wnné':

—¿Bizen' zénelo' yi'o neda'?

<sup>20</sup>Lebe' gožbe'-ne':

—Benne' judío ka' ba ben toze xtíza'gake' gáta'yoegakle' le' chi'o Pablo wxé, nich žine' lawgak benne' yodo' wchi'a laže' ka'. Yé'gake' le' zénegekle' nnábgekle' le' to diža' gaze lo de, <sup>21</sup>san le', bi chejli'o dan' nnágake', dan' nnítá'gakže ka chóplalijgake' kwe' náwgake' Pablón'. Ba ben choch xtíza'gak benne' ka', na' wnnágake' wsaka' Dios légake' zi' cha' bi gótgake' Pablón', na' bi be yej' gáwgake' na' zejte gótgake' le'. Na'a, ba nnítá'gake' ban laže', na' želbe' wchebe lažo'o gono' dan' nnábgekle' le'.

<sup>22</sup>Naž benne' blon', benne' žeje' lo wdile, gože'-be' bi ye'be' nitó benne' dan' ba gožbe' le', na' naž besele' e xkwidén'.

Zla' Pablo law Féliks,  
benne' blo wnná bia'

<sup>23</sup>Naž benne' blon' bliže' chope benne' zché'gake' to gaywá' benne' ka' žjake' lo wdile to toe', na' gože' légake' wkwézgake' chope gaywá' benne' ka' žjake' lo wdile, benne' želzá' ní'agake', na' chonnalj chi benne' ka' žjake' lo wdile, benne' žíagake' bia ka', na' chope gaywá' benne' ka' žjake' lo wdile, benne'zej noe'e yag ntoche' ka', nich chjake' lo yež Sesarea te xche'. <sup>24</sup>Lezka' gože' légake' wkwézgake' to bia, da' kwia

Pablón', na' ché'gake' le' binlo, nich bi be gaken chie', nich žine' law Féliks, benne' blo wnná bia'.

<sup>25</sup>Lezka' bsele'e to yiche da' znnan ki: <sup>26</sup>“Neda', Klaudio Lisias, žapa' le': Padiox Féliks, benne' blo wnná bia'. <sup>27</sup>Benne' ni žselá'a-ne' lawo', wzengak benne' judío ka' le', na' gónegekle' gótgake' le'. Kate' gókbe'ela' nbabe' Roma, bchi'a benne' ka' žjake' lo wdile, na' beslá'-ne' lo na'gak benne' judío ka'. <sup>28</sup>Gónela' nnezla' biž bene', dan' žesbága'gak benne' judío ka' le' zia, na' bchi'a-ne' lawgak benne' yodo' ka', benne' wchi'a laže' chégake' ka'. <sup>29</sup>Kate' bchi'a laža'a dižan' kwáselo, wnnezla' žesbága'gake' le' zia kan nak da' znnna da' žsédgekle', na' bi be zia nbaga' benne' ni, nich no benne' gote' le', o wsejwe' le' liž ya. <sup>30</sup>Naž bla' to benne' bzenle' neda' že' nawgak benne' judío ka' le' nich gótgake' le', na' che len žselá'a le' gan zo', na' goža' benne' ka', benne' žesbága'gake' le' zia lá'gake' lawo' le', nich wloé'gekle' le' bi diža'zej nape' le'. Dios gon chawé'e le'.”

<sup>31</sup>Naž benne' ka' žjake' lo wdile bexwgake' Pablón', na' bengake' kan ba gož benne' blon' légake', na' bché'gake' le' lo yež Antípatris, ne nak žel. <sup>32</sup>Kate' za' ža'ní' yetó ža benne' ka' žjake' lo wdile, benne' želzá' ní'agake', beyéjgake' lo yež Jerusalén, na' benne' ka' žjake' lo wdile, benne' ka' žíagake' bia ka', beyó'ogake' nez, zché'gake' Pablón'.

<sup>33</sup>Kate' benne' ka' zché'gake' Pablón' bzíngake' lo yež Sesarea, bdégake' yichen' lo na' benne' blo wnná bian', na' bzégake' Pablón' lawe'. <sup>34</sup>Kate' beyóž bel benne' blo wnná bian'

yichen', na' wnnable' Pablon' gaz benne' le'. Kate' gókbe'ele' nbabe' gan nbab Siliśia, <sup>35</sup> gož' le':

—Yenla' da' nno' kate' benne' ka' žesbága'gake' le' zia lá'gake' ga ni.

Naž gož' benne' ka' gape chí'igake' le' lo yolawe' gan zchi'a laže' Herodes, benne' znna bi'e ga na'.

### Pablo zchalje' law Féliks

**24** Wdé gayo' źa, bla' Ananías, bxoż blo, ga na', tzen len bałe benne' gole, benne' judío ka', na' lezka' len Tértolo, to benne' žákli'e diža'. Blá'gake' law benne' blo wnná bian', na' besbága'gake' Pablo zia. <sup>2</sup>Katen' ba blížgake' Pablon', na' ble'e ga na', wzó law Tértolon' žesbage'e le' zia, na' wnné':

—Benne' blo wnná bia', Féliks. Ni'a chio' le' žak chawe' cheto', dan' lo yela' žejn'i'il chio' cháwe'do' znna bi'o benách wláž cheto' ka'. <sup>3</sup>Yógo'te da' ki žonen ga žak chawe' gáte'ze, na' dot láže'to' že'to' le': "Žóxkeno'." <sup>4</sup>Na'a, nich bi gon lelto' le', žáta'yoela' le' gon zen lažo'o, na' yenlo' cheto' to chí'ido'. <sup>5</sup>Gókbe'elto' benne' ni zko'o yele'e benách ka', na' žone' ga benne' judío ka' nnítal'gake' dot yežlyó zzí'igake' che yolawe', na' nake' benne' blo ládjwgak benne' ka' zej nzi'e da' bsedle benne' Nasaret na'. <sup>6</sup>Lezka' gónele' wká'n ditje' yodo' cheto'. Che len wzento' ne', na' gónele' wchi'a láže'to' le' kan znna da' zseldito'. <sup>7</sup>Naž Lisiás, benne' blo, benne' żeje' lo wdile', ble'e gan zoato', na' len yela' snia zen beké'e benne' ni lo na'to'. <sup>8</sup>Naž gož Lisiás na' benne' ka' žesbága'gake' le' zia, yídgake' lawo' le'. Na'a, le'kzo',

kate' nnabla' Pablo ni binlo, gak nnezlo' kwáselo yógo'te da' ki da' žesbága'to'-ne' zia.

<sup>9</sup>Lezka' wnnagak benne' judío ka', na' wnnágake' da' likzen'. <sup>10</sup>Naž benne' blo wnná bian' btaze ne'e nich wchálj Pablon', na' le' bechebe', na' wnné':

—Dot laža'a zchalja' kan nak da' žona', dan' ba zej nak yiz zan zchi'a lažo'o da' žak chegak benách lažto' ka'. <sup>11</sup>Da' bena' wak nnabo'. Bi na' gak chežinno že wyá'a lo yež Jerusalén nich wkán' zena' Dios. <sup>12</sup>Bi bejxáka'gake' neda' zdil diža' a len no benne', na' bi bena' ga gongak benách ka' žo'osbé gan nak lo zchil yodo', o lo yo'o gan zdóbga'ke' nich yéngekle' xtiža' Dios, o lo yež. <sup>13</sup>Lezka' bi gak kwej lígake' da' ki da' žesbága'gake' neda' zia. <sup>14</sup>Da' nize žexóalapa' lawo'. Kan žona' xchin Dios chegak xa xto'to' ka' naken tłebe len da' zsédgekle benne' ki, san légake' znnágake' naken da' zži'in che Dios, dan' żejli'a yógo'te da' znna xtiža' Dios, na' lezka' yógo'te da' bzogjak benne' ka' bcháljgake' lo wlaze' Le'. <sup>15</sup>Kan légake' žxen láže'gake' Dios, lezka' neda' žxen laža'a Le', yesbane' benne' gat ka', benne' chawe' ka', na' benne' ka' bi zej nake' chawe'. <sup>16</sup>Che len žon byena' bi baga'a da' gonen ga yesbaga' lázda'wa' neda' zia law Dios o lawgak benách ka'.

<sup>17</sup>Wdé wzóa' ga yoble chope chonne yiz, na' belá'a gan zej nnita' benách wláž chia' ka' nich wnežjwa' mežw da' gáklenen benách yache' ka', na' nich bi da' wdía' law Dios. <sup>18</sup>Kate' ne žona' da' ki, bale benne' judío ka', benne' zej nžoje' gan nbab

Asia bedjxáka'gake' neda'. Wzó'a  
la' li'a yodo', na' ba wléj chawe'  
kwina' kan nak che yodo', na' bi  
ntoba' benách zan, na' bi bena' ga  
gongak benách ka' žo'osbé. <sup>19</sup> Benne'  
judío ka', benne' zej nžoje' gan  
nbab Asia, žala' lá'gake' lawo' le',  
na' yesbága'gake' neda' zia cha' zej  
nape' diža' bizjw len neda'. <sup>20</sup> Žala'  
nnagak benne' judío ki cha' bi da'  
bžél'gekle' da' zinnj da' bena' katen'  
bla'a lawgak benne' yodo' ka', benne'  
zchi'a láže'gake' légake'. <sup>21</sup> Toze  
katen' wzó'a láwgake', zižje wžežia',  
wnniá: "Zchi'a láže'le neda' na'a dan'  
žxen laža'a yebangak benne' gat ka'."

<sup>22</sup>Kate' benle Féliks na' da' ni, na'  
dan' kwáselo ba nnezle' kan nak che  
da' žsedle Pablon', bzoe' chela'ale  
diža' bizjw ni, na' wnné':

—Kate' la' Lisias, benne' blon',  
benne' žeje' lo wdile, na' yejyóz  
yenla' kan nak diža' bizjw chele.

<sup>23</sup> Naž Félikš na' gože' benne'  
zchi'e benne' ka' žjake' lo wdile,  
benne' zoe' ga na', gape chi'e  
Pablón', san we'e le' latje te' la' lí'ale,  
na' bi wsejwe' xnežgak lježe' ka'  
yedjwíágake' le', nich bi da' góngake'  
chie'.

<sup>24</sup>Chope chonne žaze wdé na', da'  
yoble bla' Féliks na' ga na' tzen len  
Drusila, zo'le'. No'len' nake' judío.  
Féliks na' bliže' Pablon', na' bze nage'  
chie' kan nak da' žejele'žo che Jesúš,  
Benne' Criston'. <sup>25</sup>Kate' bchalj  
Pablon' kan žala' gakžo chaw'e', na'  
nna bia' kwinžo, na' lažo law Dios  
gan wchi'a laže'e ž'o o ža da' za'  
za', naž bžebe Féliks na', na' gože'  
Pablon':

—Beyéj na'a. Kate' gapa' latje,  
wliža' le' yetó.

<sup>26</sup>Lezka' gónele Féliks na' si'e  
mežw da' wnejzjw Pablón' nich  
wsane' le', na' che len, zan chi'i bliž'e'  
Pablón', na' bchájlene' le'. <sup>27</sup>Kate'  
gok chopiz, wyáz Porsio Festo latje  
che Féliks na', na' dan' gónele Féliks  
na' gone' da' žaz láže'gak benne'  
judío ka', na' bka'ne' Pablón' nyejwe'  
liž ya.

Zla' Pablo law Festo

25

**25** Bła' Festo lo yež Sesarea  
nich chaze' latje chie',  
gan gake' benne' blo wnná bia'.  
Wdé chonne ža bezé'e lo yežen',  
na' wyeje' lo yež Jerusalén. <sup>2</sup>Naž  
bla'gak bxoz wnná bia' ka' len  
benne' blo ka' chegak benne' judío  
ka' law Feston', nich yesbága'gake'  
Pablo zia. Góta'yoegkle' Feston'  
<sup>3</sup>gone' da' ženegekle', na' sele'e  
benne' ka' chejxí'gake' Pablón', nich  
yežine' lo yež Jerusalén. Gónegekle'  
kwe' náwgake' le' lo nez nich  
gótgake' le'. <sup>4</sup>Beží'i Feston', na' gože'  
légake':

—Nžej Pablón' lo yež Sesarea, na'  
žala' cha'a neda' ga na' wxé wiž  
nize. <sup>5</sup>Che len, nóté'tezlele le'e  
nzi' lo na'le, žala' sá'lenle neda', na'  
cha' nbaga' bennen' zia, na' gak  
vesbágale-ne' zia.

**6** Bga'n Feston' lo yež Jerusalén  
xono' ža. Naž beyeie' lo vež

Sesarea. Kate' za' ža'ní' yetó ža,  
wži'e gan zchi'a laž'e'e, na' gože  
benne' ka' chejxí'gake' Pablón'!

<sup>7</sup>Kate' bla' Pablón' ga na', benne' judío ka', benne' ka' jez nžoje' lo yež Jerusalén, wbíga'gake' gan zoe', na' zan da' wnnégake' chie'. Besbága'gake' le' zia, san bi gok kwej lígake' da' ka' wnnégake' chie'.

<sup>8</sup>Naž wnná Pablón' lo wlaze', na' wnné':

—Bi be bena' da' zží'i che da' žsédgekle benne' judío ka', na' kege bi da' bena' che yodo' chégake', na' kege che benne' Sésar, bennen' znna bi'e ū'o.

<sup>9</sup>Gónele Feston' gone' da' žaz láže'gak benne' judío ka', na' gože' Pablón':

—¿Žénelo' chejo' lo yež Jerusalén, gan soa no benne' wchi'a laže'e le' kan zej nak da' ki da' znnégake' chio'?

<sup>10</sup>Beží'i Pablón', na' gože' le':

—Zoakza' gan že' benne' zchi'a laže'e lo wláz benne' Sésar, gan žala' wchi'a laže'e neda'. Bi be da' zinnj bena' chegak benne' judío ka', na' ba nnézkzelo' da' ni. <sup>11</sup>Chela' bena' to da' zinnj, o bíte'ze da' gonen ga baga'a zia gata', na' bi wžona' gata'. Na'a, cha' bi bena' kan znnegak benne' ki chia', bi nzi' lo na' no benne' wdíe' neda' lo ná'gake'. Znnaba' cha'a law benne' Sésar gan wchi'a laže'e neda'.

<sup>12</sup>Kate' Feston' ba bcháljlene' benne' yolawe' ka', gože' Pablón':

—Ba wnnabo' chejo' law benne' Sésar. Law Sésar na' chejo'.

### Zchalj Pablo law Agripa, benne' znna bi'e

<sup>13</sup>Wdé chope chonne že, Agripa, benne' znna bi'e, ble'e lo yež Sesarea, tzen len Berenise, zo'le'. Bedjwíagake' Festo. <sup>14</sup>Kate' ba wnníta'gake' ga na' zan že, Feston' bzenle' Agripán', benne' znna bi'e, kan nak che Pablón'. Gože' le':

—Zoa to benne' nga, bka'n Féliks le' liž ya. <sup>15</sup>Kate' wzóa'

lo yež Jerusalén, bla'gak bxoz wnná bia' ka' len benne' gole ka' lawa', na' wnnégake' che benne' ni. Wnnábgekle' neda' choga' chie' gate'. <sup>16</sup>Neda' becheba', na' goža' légake' bi zchoggak benne' Roma ka' che to benne' gate' cha' bi žingak benne' ka' znnégake' chie' lawe', benne' ka' žesbága'gake' le' zia, nich gak yecheba' chen. <sup>17</sup>Che len, kate' bžíngake' légake' ga ni, bi wžela', san kate' bžin yetó že, wžl'a gan zchi'a laža'a, na' bsela'a benne' ka' bejxí'gake' Pablón'. <sup>18</sup>Kate' ne nníta'gak benne' ka' nga, benne' ka' žesbága'gake' le' zia, bi be wnnégake' chie' kan gokla' nnágake'.

<sup>19</sup>Wnnégake' chie' bałe diža' bizjw kan nak da' zejlél'gake' che Dios, na' kan nak che to benne' lie' Jesúś, bennen' gote', san Pablón' žon choch xtiže'e znné'e zoe' nbane' da' yoble.

<sup>20</sup>Dan' bnitla' kan zej nak da' ki, wnnabla' Pablón' cha' žénele' cheje' lo yež Jerusalén, gan soa no benne' wchi'a laže'e le' kan zej nak da' ki.

<sup>21</sup>Naž kate' wnnáb Pablón' cheje' law Augusto, benne' Sésar, nich wchi'a laže'e le', na' goža' benne' ka' žjake' lo wdile gape chí'igake' le' na' zejte selá'a-ne' law benne' Sésar.

<sup>22</sup>Naž Agripán' gože' Feston':

—Lezka' neda' žénela' yenla' da' nna bennen'.

Feston' gože' le':

—Wxé yenlo' da' nne'.

<sup>23</sup>Kate' za' ža'ni' yetó že, len yela' zen belá' Agripán' len Berenise ga na'. Belyaze' gan žala' wcháljgake', tzen len benne' wnná bia' ka'. Naž bséla'gake' benne' ka' chejxí'gake' Pablón'. <sup>24</sup>Naž Feston' gože' Agripán', bennen' znna bi'e, na' wnné':

—Benne' wnná bia', Agripa, na' yógo'tele le'e zoale nga tzen len neto'. Na'a zoa bennen' lawle le'e, na' zlé'elele-ne'. Yógo'te benne' judío ka', benne' nníta'gake' lo yež Jerusalén, na' lo yež nga, znnégake' chie'. Žé'gake' neda' žala' gate'. <sup>25</sup>Žekla' neda' bi be bene' da' nbage'e zia gate', san dan' wnnable' lekze' cheje' law Augusto, benne' Sésar, nich wchi'a laže'e le', che len ba bena' chia' sela'a-ne' law Auguston'. <sup>26</sup>Dan' bi nnezla' bi žala' wzoja' le'e yiche da' nbaga' benne' ni, dan' sela'a lo na' Xana', benne' Sésar, che len zchi'a-ne' lawle le'e, na' da' nakže blo, zchi'a-ne' lawo' le', Agripa, benne' wnná bia', nich kate' yeyóz znnablo'-ne', nnezla' bi žala' wzoja' le'e yiche kan nak che benne' ni. <sup>27</sup>Žekla' neda' bi nak chawe' sela'a to benne' nžjeje' ga na' cha' bi gak wloe'ela' zia da' nbage'e.

### Da' bchalj Pablo law Agripa

**26** Naž Agripan' gože' Pablo:  
—De latje wchaljo'.

Bli na' Pablón' law Agripan', na'  
wzó lawe' zchalje', na' wnné':

<sup>2</sup>—Benne' wnná bia', Agripa. Žaz laža'a dan' de latje na'a wchalja'  
lo wlaza' neda' lawo' le' kan nak  
yógo'te da' žesbágak benne' judío  
ka' neda' zia. <sup>3</sup>Žaz laže'ža' dan'  
nónbi'o yógo'te da' žónteze žongak  
benne' judío ka', na' lezka' da' ki da'  
zdil díza'to' chen.

### Da' ka' ben Pablo zga'ale

4Lezka' wnná Pablón':  
—Nnézkzegekle yógo'te benne'  
judío ka' kan bena' katen' gok yiz  
kwide' chia' gan zej nnita' benách

wláž chia' ka', na' lezka' lo yež  
Jerusalén. <sup>5</sup>Lezka' nnézkzegekle',  
na' wak nnágake' kan bena' ža ni'te.  
Goka' benne' fariseo. Benne' fariseo  
ka' žon byéngake' zka'n zéngakže'  
Dios ka žongak yezika' benne' judío  
ka'. <sup>6</sup>Na'a, zoa' nga lawle le'e nich  
no benne' wchi'a laže'e neda' dan'  
žxen laža'a Dios, na' dan' žejli'a chie'  
yesbane' benne' gat ka', na' gone'  
kan bchebe laže'e lawgak xa xto'to'  
ka'. <sup>7</sup>Žxen láže'gak benne' chežinno  
kwe' lježto' ka' sí'gake' dan' bchebe  
laže' Dios chégake'. Che len zka'n  
zéngake' Dios, na' žóngake' xchine'  
te ža, na' žel. Dan' žxen laža'a da' ni,  
žesbágak benne' judío ka' neda'  
zia. Ki naken, benne' wnná bia',  
Agripa. <sup>8</sup>Na'a, čžéklele le'e bi nak  
da' chejle'žo, yesbane' Dios benne'  
gat ka'?

### Pablo wžía laže'e benách ka' che Benne' Cristo

9Lezka' wnná Pablo:

—Lezka' neda', zga'ale gokla' da'  
zan žala' gona' nich wži'a che  
Jesús, benne' Nasaret. <sup>10</sup>Ki bena'  
lo yež Jerusalén. Bsejwa' benne'  
zan liž ya, benne' ka' žejl'é'gake'  
che Jesusen', dan' bdegak bxož  
wnná bia' ka' yela' wnná bia'  
lo na'a. Katen' bétgake' benne'  
ka', bénlengaka'-ne' tzen. <sup>11</sup>Zan  
chi'i bsaka' zi'a benne' ka', nich  
wsángake' kan žejl'é'gake' che  
Benne' Criston'. Ki bena' gan  
nak lo yo'o gan zdobgak benne'  
judío ka' nich yéngekle' xtiža'  
Dios. Bzá'ale'egaka'-ne', na' wžía  
láže'gaka'-ne' na' zejte wyá'a  
gan zej nnita' yež zí'to' ka' nich  
bejxéngaka'-ne'.

**Pablo z<sub>l</sub>oe'e'le' kan beyake'  
che Benne' Cristo**

**12**Lezka' wnná Pablo:

—Nich gona' ki wyá'a lo yež Damasko, na' bxoz wnná bia' ka', benne' ka' bséla'gake' neda', bdégake' yela' wnná bia' lo na'a. **13**Ka' goken, benne' wnná bia', Agripa. Kate' ne zeyá'a lo nez, ne nak wawbíž, ble'ela' to baní' ya'abá da' wza'ní'zen ka wbíž. Wza'nín' gan zeyá'a, na' gan zjak benne' ka' zá'lengake' neda' tzen. **14**Naž yógo'teto' bgo'nto' lo yo, na' benla' chii' to benne' bliže' neda'. Bchalje' diža' hebreo, na' wnné': "Saulo, Saulo, c<sub>i</sub>bz chen' zbia lažo'o neda'? Žon zi' kwino', zži'o chia' neda'. Žak chio' kan žak che beže, bia žon zi' kwinba', kate' zl<sub>b</sub>ba' yag ntoche' da' zóngekle'ba' zi'." **15**Naž goža'-ne': "¿Noz le', Xan?" Xanžon' gože' neda': "Neda' Jesús, Bennen' zbia lažo'o. **16**Na'a, beyás, na' wzé, dan' blo'e' lawa' na'a, nich wzó'a' le' gono' xchina', na' wzó'a li' kan nak che da' ni da' ba ble'elo', na' chegak da' ka' wloe'ela' le', katen' wloé'e lawa' gan zo'. **17**Yeslá' le' lo na'gak benne' wláz chio' ka', na' lo na'gak benne' zi'to' ka'. Na'a žsel'a'a le' lawgak benne' ka'. **18**Žsel'a'a le' gan nnítal'gake' nich gono' ga yeyaljw yej láwgake', na' yeyákgake' che Dios, na' kwásgake' len da' jez nak che da' chol, na' tágake' lo baní'. Yežójgake' lo na' da' xiwe', na' cházgake' lo na' Dios. Cha' chejlé'gake' chia' neda', Dios yenít lawe' chégake', na' yeké'e dola' da' jez nbage'e, na' gata' chégake' latje báblengake' benách ka', benne' ka' Dios ba wleje' cheze!"

**Ben Pablo kan nak da'  
blo'e'el Xanžo le'**

**19**Lezka' wnná Pablón':

—Che len, benne' wnná bia', Agripa, bi bži'a gona' da' blo'e'l Dios, Bennen' zoe' ya'abá, neda'. **20**Bzejni'ila' benne' ka' nnítal'gake' lo yež Damasko, na' wdé na' benne' ka' nnítal'gake' lo yež Jerusalén, na' benne' ka' nnítal'gake' gan nbab Judea, na' benách ka' che yež zi'to' ka', nich yeyát láže'gake', na' yeyákgake' che Dios, na' góngake' da' gak bia' ba beyát láže'gake'. **21**Dan' bena' ki, wzengak benne' judío ka' neda' katen' wzó'a la' li'a yodo', na' gónegekle' gógtgake' neda'. **22**Naž Dios góklene' neda', na' na' zejte na'a ža, dot laža'a zchalja' lawgak benne' gaxjw ka', na' lawgak benne' blo ka'. Bi zchalja' che da' yoble, san toze kan belnná zga'ale benne' ka' bcháljgake' lo wláz Dios, na' lezka' kan wnná Moisés kan žala' gaken. **23**Wnnágake': "Benne' Criston' sáka'li'e, na' te gate' gake' Benne' nežw yebane' lo yela' got, nich wloe'ele' law gak wxén láže'gak benách ka' žíngake' lo latje baní' chie', na' soa no benne' wzó'a lie' che da' ki lawgak benne' wláz cheto' ka', na' lezka' lawgak benách zi'to' ka'."

**Pablo zzejni'ile' Agripa nich  
chejlí'e che Benne' Cristo**

**24**Kate' ba bchalj Pablo da' ki, dan' wnné' lo wlaze', naž Festo wnnié' zižje, na' wnné':

—Žak yal yichjo', Pablo. Dan' bsédli'o, ba gok yal yichjo'.

**25**Naž Pablón' gože' le':

—Bi nak yal yichja', žapa' le', Festo, na' da' znnia' naken dot da' li, na' naken da' zakan'. **26**Agrípakze', benne' ni znna bi'e, nnézkzele' da'

ni, na' che len, dot laža'a zchajla'  
lawe' le'. Nnézkele' da' ni, dan' bi  
 goken bagáche'ze. <sup>27</sup> Benne' wnná  
 bia', Agripa. Čežili'o da' wnnagak  
 benne' ka' bcháljgake' lo wláz Dios?  
 Nnezla' žežili'o da' ni.

<sup>28</sup> Naž Agripan' gože' Pablon':  
 —Yeláte'ze žek gono' neda' che  
 Benne' Criston'.

<sup>29</sup> Pablon' gože' le':

—Ni'a che Xanžo Dios žénela',  
la'kze yeláte'ze o da' zenle'e, kégeze  
 le', san lezka' yógo'te benne' ki,  
 benne' želyenle' chia', gakle dot  
 kan naka' neda', naka' che Benne'  
 Criston', san kege chejle do ya kan  
 nžaja' neda'.

<sup>30</sup> Kate' beyóž bchalj Pablon' ki,  
 na' wzó ža' benne' blo wnná bian',  
 na' lezka' wzó ža'gak bennen' znna  
 bi'e, na' Berenise, na' benne' ka'  
 žé'lengake' légake' tzen. <sup>31</sup> Katen'  
 bžójgake' cheze, na' ben chawe'  
 xtíža'gake', na' wnnágake':

—Bi be ben benne' ni da' gonen ga  
 bage'e zia gate', o yejwe' le' liž ya.

<sup>32</sup> Agripan' gože' Feston':

—Wak no benne' wsán benne' ni  
 chela' bi wnnable' cheje' law benne'  
 Sésar nich wchi'a laže'e le'.

### Želsele'e Pablo lo yež Roma

**27** Katen' ba ben toze  
xtíža'gake' séla'gake' neto'  
 to lo barkw nich chejto' lo yež  
 Roma, gan nbab Italia, békxwgake'  
 Pablo, na' yebaše benne' ka' jez  
 nžaje'. Bdégake' légake' lo na' Julio,  
 benne' zchi'e to kwe' benne' žjake'  
lo wdile, da' nzin': Benne' Ka' Che  
 Augusto, bennen' nake' benne' Sésar.  
<sup>2</sup> Wžento' to lo barkw che gan nbab  
 Adramitio, dan' žala' ten gan zej

nnita' yež ka' gan želžín barkw ka',  
 yež ka' jez nbaben lo yežlyó Asia, na'  
 yó'ozeto' lo barkwn', wza'to' lo yež  
 Sesarea. Lezka' žonlen Aristarko  
 neto' tzen. Nake' benne' Tesalónika,  
 to yež nbaben Masedonia. <sup>3</sup> Kate' za'  
 ža'ní' yetó ža, bžinto' lo yež Sidón,  
 na' Julio, bennen' zchi'e benne' ka'  
 žjake' lo wdile, lo yela' ži'i laže' chie',  
 bi'e Pablon' latje cheje' gan zej nnita'  
 benne' lježo ka' nich wnézjwgake'  
le' bi da' žiážele'. <sup>4</sup> Wdé na', bebento'  
lo barkwn', na' wza'to' ga na'. Wdeto'  
 chelá'a gan že' yežlyó Chipre gan že'  
 ži ben' da' žaken. Ki béngake' dan'  
 ben' da' žaken lo nisdo', zan' zaka'  
 lawto'. <sup>5</sup> Naž wdeto' lo nisdon' gan  
 nla' gan nbab Silisia, na' gan nbab  
 Panfilia, na' bžinto' lo yež Mira, to  
 yež nbaben yežlyó Lisia.

<sup>6</sup> Bennen' zchi'e benne' ka' žjake' lo  
wdile, na' yo'oto' lo ne'e, bejxake'e  
 to barkw ga na' da' nžojen lo yež  
 Alejandría, na' zejen gan nbab Italia.  
Lo barkwn' wló'ogake' neto'. <sup>7</sup> Wza'  
 barkwn' cho laže' zan ža, na' len  
 yela' zzáka'le'e bžinto' gan nla' to  
 yežlyó da' nzin' Gnido, na' dan' ben'  
 da' žaken bžiga' neto', na' wdeto'  
 chelá'a yežlyó da' nzin' Creta gan že'  
 ži ben' da' žaken, na' wdeto' gan nla'  
 yež Salmón. <sup>8</sup> Len yela' zzáka'le'e  
 wdeto' chelá'a gan že' yežlyó Cretan',  
 na' bžinto' to latje gan želžín barkw  
 ka', da' nzin' Buenos Puertos, dan'  
 žen' gawze gan zoa yež Lasea.

<sup>9</sup> Dan' ba wžél-le'eto', ba bžin ža  
 žon zož gak ditje bíteteze barkw  
 cha' zzan' lo nisdo' lo ža ka', dan' ba  
 wdé ža ka' kate' žóngake' wbás, na'  
 za' žin byo' zag ka' kate' žakle'e be'.  
 Che len Pablon' bzejni'ile' légake',  
<sup>10</sup> na' wnné':

—Le'e, benne' ka', žákbe'ela' gan chej barkw ni, gon zož kwia yin', tzen len da' ka' nwan', na' lezka' gon zož gatžo žo'o.

<sup>11</sup>Bennen' zchi'e benne' ka' žjake' lo wdile bejle'že' da' wnnagak bennen' nzi' lo ne'e barkwn', na' benne' xankzen, ka dan' wnná Pablon'. <sup>12</sup>Dan' latjen' gan želžín barkw ka', dan' nzin' Buenos Puertos, bi naken ga gá'ngake' byo' zag ka', che len yeláte'ze ka bdachgak benne' ka' nníta'gake' lo barkwn' ben toze xtíza'gake' yekwásgake' ga na', cha' wak žíngake' gan želžín barkw ka' lo yež Fenise, to yež lezka' žen' lo yežlyón' da' nzin' Creta, na' zoan chela'ale gan žen wbíž, na' gónegekle' gá'ngake' ga na' byo' zag ka'.

### Žak to be' wale lo nisdo'

<sup>13</sup>Dan' žaken to be'do' da' za' zaka' chela'ale gan zde wbíž byo' zag ka', gókgekle' wak góngake' kan žénegekle', na' bechísgake' ya zi'i da' njejen do ya da' zzoan žize barkwn', na' wdé barkwn' gawze kwit yežlyón' nzin' Creta. <sup>14</sup>Yetó chí'ido'ze, gok to be' wale da' zan' lawto', dan' nzin' Euroklidón. <sup>15</sup>Dan' ben' da' žaken zzejen chela'ale barkwn', na' dan' bi gok chej barkwn' gan za' ben', naž bégake' ben' latje bchen' barkwn'. <sup>16</sup>Kate' wdé barkwn' ga bžinten chela'ale to yežlyodo' nzin' Kauda, bžinen chela'ale gan bi žakle'ben', na' len yela' zzáka'le'e bchísgake' bárkwdon', da' žoben barkw zen na', na' bzóagaken' lawle barkwn' gan yo'oto'. <sup>17</sup>Wdé bžéngaken' lo barkw zen na', naž bchej chóchgake'

barkw zen na'. Bdégake' do ka' zanle barkwn', nich bi kwia yin' lo nisdo'. Dan' bžébegake' te barkwn', na' chejche'ten lo yož da' žen' zan nisen', che len btíngake' laže' chen, da' ztoben be' nich wsán' barkwn'. Naž bégake' ben' latje bchen' barkwn'. <sup>18</sup>Kate' za' ža'ní' yetó ža, dan' be' wale da' žaken zche'le'en barkwn', bžó'ngake' bale ywa' da' nwa' barkwn' lo nisdo'. <sup>19</sup>Ža chonnie ža, len na' kwinto' bžo'nto' da' zkóngekle' žin lo barkwn' lo nisdon'. <sup>20</sup>Kate' ba gok zan ža bi zle'elto' wbíž o belj ka', na' dan' žakle'ben' da' zchen' barkwn' gan yo'oto', biž bxen láže'to' yelato'.

<sup>21</sup>Kate' ba gok zan ža bi be bdawto', wzé Pablon' gachje láwe'legake', na' gože' légake':

—Le'e, benne' ka', gokžen chawé' chela' bze nagle chia', na' bi wza'žo lo yežlyón' Creta, na' bi yedjchagžo da' ni da' zzáka'žo, na' da' žaken che barkw ni. <sup>22</sup>Na'a, žapa' le'e: le gon choch láže'le, dan' bi gatle nitole le'e zoale nga, la'kze kwia yi' barkw ni. <sup>23</sup>Ki gaken dan' wdé yele bla' to wbás che ya'abá che Dios lawa' neda'. Diosen' naka' chie', na' žona' xchine'. <sup>24</sup>Wbás che ya'abán' gože' neda', na' wnné': "Pablo, bi žebo'. Žon byenen žino' law benne' Sésar. Dan' nži'il Dios le', yeslé' yógo'te benách ka' nníta'lengake' le' lo barkw ni." <sup>25</sup>Che len, le gon choch láže'le, dan' žxen laža'a Dios, gone' kan ba gož wbás che ya'abá chie' neda'. <sup>26</sup>Ki gaken la'kze žon byenen kwia yi' barkw ni to lo yežlyodo', gan chejka'nen žo'o.

<sup>27</sup>Kate' ba wdé xda' ža, ben' da' žaken zchen' barkwn' lo nisdo' da'

nzin' Adriátko, na' gachje yele gókgekle benne' ka' žóngake' žin lo barkwn' za' žin barkwn' gawze gan že' to yežlyó. <sup>28</sup>Belžo'ne' to do lo nisdon', na' belnnezle' galje wes naken ga bžinten žante nisen'. Kate' wdé barkwn' yeláte'do', na' belžo'ne' don' da' yoble lo nis, na' belnnezle' ba nakzen chi wes.

<sup>29</sup>Dan' bžébegake' chejžé' barkwn' lo yej ka', che len, zaka' chelá'a xkóže'le che barkwn' belžo'ne' tape ya zi'i lo nis, da' ka' jez nžejen do ya, na' zzóagaken žize barkw. Len yela' žek zedle chégake' belbeze' cha'ní'. <sup>30</sup>Naž benne' ka' žóngake' žin lo barkwn' gónegekle' wzónnjgake' lo barkwn'. Blétjgake' bárkwdon' da' žian lo barkw zen na' lo nisdo'. Béngake' ka žénegekle' kó'ogake' ya zi'i na' yelate' zi'to', da' nžejen do ya, na' zoan žize barkwn', dan' zoan zaka' chelá'a lawle. <sup>31</sup>Naž Pablon' gožé' bennen' zchi'e benne' ka' žjake' lo wdile tzen len benne' ka' žjake' lo wdile, na' wnné':

—Cha' bi ga'ngak benne' ki lo barkw nga, bi gak yelale.

<sup>32</sup>Naž benne' ka' žjake' lo wdile belchoge' do ka' da' jez nžejen bárkwdon', na' bégake' latje wbixen lo nisdo'.

<sup>33</sup>Kate' za' ža'ní', Pablon' góta'yoelé' légake' gáwgake' late'. Gože' légake':

—Na'a ba gok xda' ža žnna'le dot yele, na' žonle wbás, na'bi be bdawle. <sup>34</sup>Che len, žáta'yoela' le'e gawle late' nich yeyák láže'le, dan' bi gatle nitole le'e.

<sup>35</sup>Kate' beyóz bchalj Pablon' da' ni, bexwe' yet xtil, na' gožé' Dios: "Žóxkeno!" Ki bene' lawgak

yógo'tegake'. Naž bzožje' yet xtilen', na' wzó lawe' žawe'. <sup>36</sup>Naž yógo'tegake' gok choch láže'gake', na' bdáwgake'. <sup>37</sup>Ka wyo'oto' lo barkwn', wbabto' chope gaywá' chonn'lalj chino' toto'. <sup>38</sup>Wdé bdáwgake', na' béljegekle', naž belžo'ne' zoa' stribé da' nwa' barkwn' lo nis, nich góngake' láte'že ywa' da' nwa' barkwn'.

### Zbia yi' barkw lo nisdo'

<sup>39</sup>Kate' ba nak te ža, na' benne' ka' žóngake' žin lo barkwn' bi bénbia'gake' yežlyón'. Blé'egekle' to gan zžin nisdon' yelate' gachje láwe'le yežlyón', na' de gan nak lache' zoa'a nisdo' lo latjen'. Gónegekle' góngake' ga cho'o' barkwn' ga na'. <sup>40</sup>Naž beséžgake' do ya ka' da' jez nžejen ya zi'i ka' da' zzóagaken barkwn' žize, na' bsángake' légaken, na' belbixen lo nisdo'. Lezka' beséžgake' do da' nžejen ne'e yag da' zzechjen barkwn' ki ka'le. Naž bechísgake' laže' che barkwn', da' ztoben be', dan' zoan chelá'a lawle che barkwn', na' wzó law zde barkwn' zaka' gan zžin nisdo' yelate' gachje láwe'le yežlyodon'. <sup>41</sup>Kate' bžin barkwi' to latje gan zchaggak chope nis, na' bejché' chelá'a lawle che barkwn' lo yož zan nisdon', na' bga'nze barkwn' ga na!. Biž gok tan, na' chelá'a xkóže'le che barkwn', wzó law nisdon' zchinnjen len yela' zza' chen. <sup>42</sup>Naž gónegekle benne' ka' žjake' lo wdile gótgake' benne' ka' jez nžejen, nich bi xóagake' lo nis, na' bi wzónnjgake'. <sup>43</sup>Bennen' zchi'e benne' ka' žjake' lo wdile gónele' yeslé' Pablon', na' gožé' légake' bi

góngake' kan žénegekle'. Naž gože' benne' ka' žak xóagake' lo nis, zgá'alegake' cházgake' lo nis nich žíngake' lo yo biž. <sup>44</sup>Lezka' gože' benne' ka'zej nga'ne' xóagake' lo blag ka', na' yezíka'gake' lawgak blagdo' ka' che barkwn'. Ka' goken, belágake' yógo'tegake', na' bžíngake' lo yo bizen'.

**Da' ben Pablo lo yežlyó  
da' nzin' Malta**

**28** Kate' ba bžinto' yógo'teto' lo yo biže, na' wnnezlto' yežlyón' gan zoato' nzin' Malta.

<sup>2</sup>Benne' xiža' ka', benne' nníta'gake' lo yežlyón', lo yela' ži'i laže' chégake' wdápegake' neto' ba la'ne. Bžéngake' yi', na' blížgake' neto' yógo'teto' yeché'l kwinto', dan' žak yew, na' žakle'e zag. <sup>3</sup>Naž Pablo bežwe' chelén zis wage biždo', na' katen' wloé'en lo yin', bžoj to bele snia ladjw zis wagen', bia žzonnlba' da' la che yin', na' wka'aba' yen na' Pablon'. <sup>4</sup>Kate' benne' xiža' ka' blé'egekle' belen', bia nála'ba' yen na' Pablon', naž bely'i'e ljéžgake':

—Da' li benne' ni nake' benne' wetw benách ka'. La'kze belé' lo nisdo', diosen' lie' Chawe' bi we'e le' latje soe' nbane'.

<sup>5</sup>Pablon' bžíbesise' ne'e, na' beyexjw bele snia na'. Bejxóateba' lo yin', na' le' bi be gokle'. <sup>6</sup>Benne' xiža' ka' nníta'gake' ga na' bwíagake' Pablon'. Zbézgake' batze kwi'e yi, o bix'e gate'. Naž kate' ba belbeze' scha, na' blé'egekle' bi be gokle', gókgake' yetó, na' wnnágake' nake' to dios.

<sup>7</sup>Lo latje na'ze že' yežlyó che Publio, benne' wnná bia' lo yežlyón',

na' wdape' neto' ba la'ne. Lo yela' ži'i laže' chie' bnnite' neto' liže' chonne ža. <sup>8</sup>Kate' ža ka' xa Publio na' de'e yižwé'. Yoe'e da' la, na' de'e yižwé' žen. Wyáz Pablon', zejwíe' le', na' wdé bcháljlene' Dios, bxoa ne'e benne' yižwén', na' beyake'. <sup>9</sup>Dan' ben Pablon' da' ni, lezka' benne' yižwé' ka', benne' nníta'gake' lo yežlyón', bžíngake' gan zoe', na' beyákgake'. <sup>10</sup>Benne' ka' wdápegake' neto' ba la'ne, na' bénngake' da' zan da' góklengaken neto'. Kate' za' yeza'to' lo yežlyón', bénngake' cheto' da' ka' byážjelto'.

### **Zžin Pablo lo yež Roma**

<sup>11</sup>Kate' gok chonne byo' zoato' ga na', wžento' to lo barkw che yež Alejandría, da' bga'nen lo yežlyón' byo' zag ka'. Chelá'a lawle che barkwn' jez da'gak lo'a ka' jez nzin' Kástor len Pólucks, dios kwach ka' chegak benne' Alejandría ka'.

<sup>12</sup>Bezá' barkwn' ga na', na' bžinen lo yež Sirakusa, gan bga'nto' chonne ža. <sup>13</sup>Beza'to' ga na', na' wdeto' chela'ale yežlyón', na' bžinto' lo yež Rejio. Kate' za' ža'ní' yetó ža, na' žak be' da' zan' zaka' gan zde wbíz byo' zag ka', na' bezá'to' ga na', na' ža chope ža la' bžínteto' lo yež Puteoli.

<sup>14</sup>Lo yežen' bejxáka'to' bale benne' lježžo ka', benne' žejl'égake' che Benne' Criston', na' góta'yoegake' neto' gá'nleno' lágake' xono' ža.

Kate' wdé ža ka', bezá'to' ga na' nich chejto' lo yež Roma, na' bezá' n'ato'.

<sup>15</sup>Benne' lježžo ka' nníta'gake' lo yež Roma ba béngekle' za' žinto' ga na', na' bžójgake' bedjhággake' neto'. Bžíngake' to yeždo' nzin' Ga Zdo'w Apio. Yebale' bžíngake' to latje nzin'

Chonne Yo'o Gan Zga'ngak Benne' Ka' Zej Yoe'e Nez. Kate' Pablon' ble'ele' légake', bdip laže'e, na' gože' Dios: "Žóxkeno!."

<sup>16</sup>Kate' bžinto' lo yež Roma, na' bennen' zchi'e benne' ka' zjake' lo wdile, bchi'e benne' ka' jez nžeje', na' bdie' légake' lo na' to benne' blo žeje' lo wdile. Benne' ni bi'e Pablo latje soe' cheze', san to benne' žeje' lo wdile wzóalene' le', bennen' žape chi'e le'.

### Da' bchajl Pablo lo yež Roma

<sup>17</sup>Ža chonne ža, Pablon' bliže' benne' blo ka' chegak benne' judío ka', benne' nníta'gake' lo yež Roma. Kate' ba jez ndobe' gan zoa Pablon', le' gože' légake':

—Le'e, ljéža'do' ka', la'kze bi be bena' chegak benne' wláz chežo ka', na' kege chegak da' žónente žonžo kan bengak xa xto'žo ka', benne' judío ka' nníta'gake' lo yež Jerusalén bdégake' neda' lo na'gak benne' Roma ka', benne' ka' nníta'gake' lo yež Jerusalén, nich wséjwgake' neda' liž ya. <sup>18</sup>Naž kate' ba wnnábgekle benne' Roma ka' neda', gónegekle' wsángake' neda', dan' gókbe'egekle' bi nbaga'a zia gata'. <sup>19</sup>Benne' judío ka' bséjwgake' xnezgak benne' ka' gónegekle' wsángake' neda', na' ben byenen wnnaba' cha'a law benne' Sésar nich wchi'a laže'e neda', na' kege nich yesbaga'a benne' wláz chežo ka' zia. <sup>20</sup>Che len bliža' le'e nich le'ela' le'e, na' wcháljlena' le'e, dan' nžeja' do ya ni dan' žxen laža'a da' žxen lážežo ž'o'o, benne' Israel ka', gon Dios da' bchebe laže'e gonne' chežo. <sup>21</sup>Naž légake' bely'i'e Pablon':

—Bi na' si'to' nitó diža' da' zan' gan nbab Judea kan nak che da' žaken chio', na' bi na' la' nitó benne' lježžo nga, benne' judío, nich wloe'ele' neto' cha' zoa no benne' bi da' znnie' chio'. <sup>22</sup>Na'a, žénelto' yenlto' da' nno', da' žeji'o, dan' nnezlto' yógo'te latje znnegak benách ka' chegak benne' ka' jez nzi' lo ná'gake' diža' koben'.

<sup>23</sup>Ka' goken, Pablon' bžie' bia' to ža, na' ža na' benne' zan bdóbga'ke' gan zoe'. Wzó law Pablo zildo', na' gótele', bzejni'ile' légake', na' bzenle' légake' kwáselo kan znnna bia' Dios. Gónele' wloe'ele' légake' nak dot da' li da' zchalje' kan nak che Jesusen'. Nich gone' ki bkonle' žin da' bchi'le Moisés, na' da' wnnagak benne' ka' bcháljgake' lo wláz Dios. <sup>24</sup>Bale' wzí' lo ná'gake' da' bchajl Pablon', san yezíka'gake' bi bejlé'gaken'. <sup>25</sup>Dan' gok chóplegake', wzó láwgake' žezá'gake' ga na', na' Pablon' gože' légake', na' wnné':

—Nakkze da' li da' wnná Dios Be' La'y lo na' Isaías, bennen' bchajlje' lo wláz Dios, dan' bzejni'ile' xa xto'žo ka', katen' wnné':

<sup>26</sup>Wyéj lawgak benne' ka', na' yé'gako'-ne':  
Wzé nagle, san bi chejní'ilele.  
Wiale, san bi lé'elele.

<sup>27</sup>Benne' ki nak zide yichj lázdo'gake'  
na' bi be žazen lo yichj lázdo'gake'.  
Žóngake' kan žongak benne' lo chole ka'.  
Bi zlé'egekle' len yej láwgake'  
na' bi žénegekle nággake',  
na' bi žejn' il yichj lázdo'gake'  
na' bi žénegekle' yejákgake' che  
Dios

nich gak yeyóngaka'-ne'.

<sup>28</sup>Na'a, žala' nnézlele da' ni. Dios  
žsele'e neto' lawgak benách zi'to'  
ka' nich yelágake', katen' yéngekle'  
xtiže'e.

<sup>29</sup>Kate' beyóž bchalj Pablon'  
da' ki, naž bežojgak benne'  
judío ka', na' želdíl díža'gake' la'  
légakze'.

<sup>30</sup>Pablon' bga'ne' ga na' chopiz,  
na' wzóe' to lo yo'o gan žizjwe', na'  
wdape' ba la'ne yógo'te benne' ka'  
bedjwíagake' le'. <sup>31</sup>Len yela' wechób  
laže' bchalje' kan znna bia' Dios.  
Bsedle' benách ka' kan nak che  
Xanžo Jesús, Benne' Criston', na'  
bi wzóa no benne' wsejwe' xneze'.  
Ka'kze naken.

# DIŽA' DA' BSELĀ' PABLO LO YEŽ ROMA

Pablo žape' "Padiox" benách  
ka' che Jesús lo yež Roma

**1** Neda', Pablo, naka' benne'  
ndo'w che Jesús, Benne'  
Criston', na' wbás chie', dan' bliž  
Dios neda', na' wžekze' neda' nich  
wchalja' diža' chawé' chien'.

<sup>2</sup>Bchebe laže' Dios že ni'te sele'e  
diža' chawen' chežo. Bene' ki lo  
na'gak benne' ka' bcháljgake' lo  
wlaze' Le', na' lémak' bzójgake'  
xtiže'e le'e yiche la'y che Dios.  
<sup>3</sup>Bzójgake' yógo'te da' žala' gon  
zí'nkze Dios, Bennen' nake' Xanžo  
Jesús, Benne' Criston'. Lo yela'  
benách chie' nake' za'só Dabí,  
bennen' wnná bi'e benách Israel ka',  
<sup>4</sup>san kan nak be' nakkze', da' naken  
la'y, nak bia' nake' Zí'n Dios, na' nape'  
dot yela' wak. Nak bia' naken ki dan'  
bebane' lo yela' got. <sup>5</sup>Ni'a che da' ben  
Jesús, Benne' Criston', zzi'žo da' žonn  
Dios chežo lo yela' ži'i laže' chie', na'  
bzoe' neda' wbás chie' nich lo wlaze'  
Le' gona' ga benách ka' nnita'gake'  
dot yežlyó nga chejlé'gake' chie' Le',  
na' góngake' kan znná xtiže'e. <sup>6</sup>Benle  
le'e da' zinnj tzen len benách ka'  
nnita'gake' yežlyó nga, san na'a ba  
bliž Dios le'e nich gakle che Jesús,  
Benne' Criston'.

<sup>7</sup>Dios nži'ile' le'e, na' bliže' le'e  
nich gakle che Leze'. Znnabla'  
Xažo Dios len Xanžo Jesús, Benne'  
Criston', gon chawé'e le'e, na' wká'n  
zie' yichj lázdo'le.

Žénele Pablo chejwíe' benách  
ka' che Jesús lo yež Roma

<sup>8</sup>Zzo lawá' zzoja' chele da' ni. Dan'  
nakžo che Jesús, Benne' Criston',  
žapa' Dios: "Žóxkeno" kan nak  
chele yógo'tele, dan' zchaljgak  
benách ka' nnita'gake' dot yežlyó  
nga kan žeje'le chie' Le'. <sup>9</sup>Dot  
laža'a žona' xchin Dios, na' zchalja'  
diža' chawen' kan nak che Zi'ne'.  
Nnézkzele Dios zcháljlenteza'-ne', na' znnabla'-ne' gon chawé'e  
le'e. <sup>10</sup>Znnabla' Dios, cha' naken  
da' žénele' Le', gonne' neda' latje  
yedjwía' le'e. <sup>11</sup>Ki znnabla'-ne' dan'  
žak laža'a le'ela' le'e nich gak gona'  
ga gata' chele to da' wnežjw Dios  
Be' La'y chele, da' gonen ga gólele lo  
da' nak che Xanžon'. <sup>12</sup>Dan' žénela'  
naken gon chochžo tožo yetožo,  
dan' žeje'žo to tožo che Jesús,  
Benne' Criston'.

<sup>13</sup>Zí'na'do' ka', žénela' nnézlele  
da' ni. Gok laža'a zan chi'i yida'  
gan zoale, san na' žeje' na'a bi na'  
gonnen chia'. Žénela' yida' gan

zoale nich gona' ga yebélenlele da' zchalja', kan žebélengeklen yezika' benách ka' nníta'gake' yežlyó nga. <sup>14</sup>Zoa da' nbaga'a chegak yógo'te benách, chegak benách ka' nníta'gake' yež gawze ka', na' chegak benách ka' nníta'gake' yež zi'to' ka', chegak benách ka'zej nsedle', na' chegak benách ka' bizej nsedle'. <sup>15</sup>Che len, kan sáke'la' gona', ba zoa' wchalja' diža' chawen' gan zoale le'e lo yež Roma.

### **Yela' wak zen che diža' chawen'**

<sup>16</sup>Bi žedoe'ela' zchalja' diža' chawen', dan' napen yela' wak che Dios nich yeslán yógo'te benne' ka' ſejlē'gaken'. Gan zzo law, ženele Dios yéngeklen benne' judío ka', na' te na' yéngeklen benách zi'to' ka'. <sup>17</sup>Diža' chawen' zloe'elen žo'o Dios gone' ga yeyakžo chawe' lawe' Le', cha' chejle'žo chie' Le', na' bi gak chope láže'žo. Kan nak da' ni nyew le'e yiche la'y, da' znnan: "No benne' nake' chawe' dan' ſejli'e che Dios, gata' yela' nban chie!"

### **Zia da'zej nbaga' benách ka' nníta'gake' yežlyó nga**

<sup>18</sup>Dios, Bennen' zoe' ya'abá, bloe'ele' law bi zle'ele' chawe' yógo'te benne' ka' žóngake' da' kegle, na' wsaka' zi'e légake', benne' ka', lo yela' bi nak chawe' chégake' zzóagake' chela'ale da' naken dot da' li. <sup>19</sup>Ki naken chégake' dan' bla' da' nak bian' zoakze Dios lawgak yógo'te benách ka', dan' Dios na'kze bloe'elen' law gan nníta'gake'. <sup>20</sup>Ža ni'te katen' wzó law gota' yežlyó nga, na'zejte na'a ža, da' ka' ben Dios zej nak bian' da' bi gak le'elžo

che Dios, kan zej nak yela' wak zen chie', na' da' nakkze' Le'. Che len, bi gak nnágake' bi zej nbage'e zia. <sup>21</sup>Katen' bénbia'gake' Dios, bi bka'n zéngake' le' kan žala' wká'n zenžone', na' bi belyi'e Le': "Žóxkeno!". Che len dáče'ze beyák da' zza' láže'gake', na' bchol yichj lázdo'gake' dan' béngake' zide yichj lázdo'gake'. <sup>22</sup>La'kze gókgakle' ſejnij'ile'egakle', beyákgake' benne' bi nnezle ka', <sup>23</sup>dan' bká'ngake' yela' zen che Dios, Benne' zóateze', na' bka'n zéngake' lo'a ka', da' ka' zej naken ka benne' ka' žátgakkze', na' ka bia ka' zoa xílgakba', na' ka bia yixé' ka' želdaba' lo yo, na' ka bele ka' žzob kwíngakba' lo yo.

<sup>24</sup>Che len Dios bebéj yichje' légake' nich góngake' da' kegle ka' da' zze láže'gake', na' ki goken, bka'n sto' kwíngake' toe' len yetóe'.

<sup>25</sup>Goken ki dan' bká'ngake' xtiža' Dios, da' naken dot da' li, na' wzí' lo ná'gake' to da' wen laže'. Wdápegake' ba la'ne, na' bka'n zéngake' da' ka' ben Dios, na' kege Dios na'kze, Bennen' žala' wká'n zéntezžo. Ka'kze gaken.

<sup>26</sup>Che len Dios bebéj yichje' légake' nich góngake' da' ka' zze láže'gake' da' žóngaken ga žedoe'elžo. No'le ka' bká'ngake' yela' zzoalen benne' byo, nich góngake' da' zej naken sban. <sup>27</sup>Lezka' bengak benne' byo ka', bká'ngake' yela' zzoalen no'le, na' wzé láže'gake' da' zej nak sban da' žóngake' toe' len yetóe', na' béngake' da' žóngaken ga žedoe'elžo, dan' wnníta'lengake' la' ljež benne' byógakze'. Benne' ka' béngake' ki zzáka'gake' lo bela' žen chégake' dan' bebi'i Dios chégake' da' naken tlebe len dolan' da' béngake' dan' bká'ngake' Dios.

**28** Dan' bi gónegekle' gápegake'  
Dios ba la'ne, che len bebéj yichje'  
légake' nich sa' láže'gake' da' wen  
laže', na' góngake' da' bi zakan'.  
**29** Žóntezgake' yógo'te da' bi zej  
nak chawe'.  
 Žóngake' yela' sto' ka'.  
 Žóngake' da' kegle.  
 Ždan láže'gake' yela' gape.  
 Bi zlé'egekle' ljéžgake' ka' chawe'.  
 Zgé'egekle' ljéžgake' ka'.  
 Žótgake' ljéžgake' ka'.  
 Ždfl'-lengake' ljéžgake' ka'.  
 Žon láže'gake' benách ka'.  
 Žónle'egake' da' zinnj.  
 Žnnégake' che ljéžgake' ka'.  
**30** Žnnágake' da' wen laže' che  
ljéžgake' ka'.  
 Bi zlé'egekle' Dios chawe'.  
 Zej nake' benne' bizjw ka'.  
 Žon kwíngake' benne' blo ka'.  
 Zka'n zen kwíngake'.  
 Žíljgake' da' zinnj da' góngake'.  
 Žeží'igake' che xa xná'gake'.  
**31** Zej nake' benne' bi žejni'il ka'.  
 Bi žóngake' da' bchebe láže'gake'  
góngake'.  
 Bi zej nake' ži'i laže' kan žala'  
gákgake'.  
 Bi ženít láwgake' che ljéžgake' ka'.  
 Bi žeyache' láže'gakle' ljéžgake' ka'.  
**32** Nnézkegekle' da' bzoa Dios to  
chi'ize kan žala' gak chegak benne'  
ka' žóngake' da' ki, gátgake' to  
chi'ize. La'kze nnézgaklen', kégeze  
žóngake' ki, san žaz láže'gake'  
benne' ka' žóngake' da' ki.

Chog Dios chegak benne' wen  
da' zinnj ka' gátgake'

**2** Che len, bi gak gon kwino'  
chawe', no benne' nako', cha'  
znnio' che lježo'. Katen' znnio' che

lježo', žesbaga' kwino' zia, dan'  
znnio' che lježo', na' lezka' žono' le'.  
**2** Nnézkzelžo kan žchi'a laže' Dios.  
 Lo da' naken dot da' li žchi'a laže'e  
benne' wen da' zinnj ka'. **3** Le' znnio'  
chegak benne' ka' žóngake' da' kegle,  
na' lezka' žono' le'. **4** Žeklo' wdé  
gónzele Dios kate' wchi'a laže'e le'?  
**4** ¿Zka'no' ka'ze yela' ži'i laže' che  
Dios, na' yela' zbez zen laže' chie',  
na' kan žone', zzele' nich že'e le'? **5** Bi  
nnézkzel' Dios žónlene' le' lo yela'  
ži'i laže' chie' nich gata' chio' latje  
yeyát lažo'o? **5** Lo yela' lazdo' zížje  
chio' bi beyát lažo'o. Che len ztobo'  
yela' zzaka' da' yebí'i Dios chio' kate'  
wchi'a laže'e benne' ka', na' gak  
bia' naken kan žala' gon Dios kate'  
choge' chegak benne' wen da' zinnj  
ka' gátgake'. **6** La' ža na'ze yebí'ikze  
Dios che to to benne' kan zej nak  
da' béngeake' to toe'. **7** Wnejzwe' yela'  
nban da' zejlí kanne chegak benne'  
ka' žóntezgake' da' naken chawe',  
na' že' láže'gake' sí'gake' da' chawe'  
da' znezjw Dios, na' žénegekle'  
yežójgake' chawe' lawe' Le', nich  
sóagake' nbángake' to chi'ize. **8** Dios,  
lo yela' zža'a chie', wsaka' zi'e benne'  
ka' zží'igake' che xtiž'e, benne' ka'  
bi žénegekle' góngake' kan znnna da'  
naken dot da' li, san žóngake' da'  
bi naken chawe'. **9** Sáka'gak yógo'te  
benne' ka' žóngake' da' kegle, na'  
gak nyache' láže'gake'. Ga zzo law  
gaken ki chegak benne' judío ka', na'  
lezka' gaken chegak benách zí'to' ka'.  
**10** Dios gon chawe'e yógo'te benne'  
ka' žóngake' da' naken chawe', na'  
gape' légake' ba la'ne, na' wkán zie'  
yichj lázdo'gake'. Ga zzo law gone'  
ki chegak benne' judío ka', na' lezka'  
gone' chegak benách zí'to' ka'.

<sup>11</sup>Ki wchi'a laže' Dios benách ka', na' Le' zle'ele' yógo'te benách ka' ka' zej nakkze'. <sup>12</sup>Gatgak yógo'te benách ka' žóngake' dola', la'kze bi žákbe'egekle' zží'igake' che xtiža' Dios dan' bi na' yéngekle' xtiže'e. Lezka', ka nak da' znna xtiža' Dios, Le' wchi'a laže'e yógo'te benne' ka' zej nzi'e xtiže'e, san žóngakkze' dola'. <sup>13</sup>Ki gaken dan' benne' ka' žéenzegekle' xtiža' Dios bi zej nake' chawe' lawe' Le', san yejakgak chawe' benne' ka' žóngake' kan znna xtiže'e na'. <sup>14</sup>Ka nak chegak benne' ka' bi zej nake' benne' judío ka', san žóngakkze' kan znna xtiža' Dios la'kze bi na' yéngeklen', zoa to da' bzoa Dios lo yichj lázdo'gake' da' žedlen légake'. <sup>15</sup>Benne' ki zloé'egekle' law žon žin xtiže'e da' yo'on lo yichj lázdo'gake'. Da' žon da' yo'on lo yichj lázdo'gake' nak bian' naken ki. Kan zza' laže'gake', žesbága'gake' ljéžgake' ka' zia, o žebéj ljéžgake' ka' chawe' toe' yetóe'. <sup>16</sup>Ki yebí'i Dios chéga'ke' ža na' katen' wchi'a laže'e yógo'tegake' lo na' Jesús, Benne' Criston', kan zej nak da' béngake', na' kan nak da' wzá' laže'gake'. Ki žedle diža' chawen' da' zchaljan!

### Da' žongak benne' judío ka', na' da' wnnakze Dios

<sup>17</sup>Le' znnale nakle benne' judío ka', na' žen láže'le yelale dan' žonle kan znna xtiža' Dios, na' zka'n žen kwinle dan' žéklele nónbia'le Le', <sup>18</sup>na' nnézkzelele da' žénele Dios gonle, na' da' wnnakze' Le', da' žsédlele le'e, na' žákbe'elele da' naken dot chawe'. <sup>19</sup>Zej nnita' benne' ka' zdágake' ga yoble, kan

žongak benne' lo chole ka'. Žéklele wak wzejní'ilele benne' ka' zej nchol yichj lázdo'gake'. <sup>20</sup>Žéklele wak wsédlele benne' ka' bi žejní'igekle', na' benne' ka' žejní'igekle' láté'do'ze, dan' nzi' lo na'le xtiža' Dios da' žedlen benách ka' kan nak yela' žejní'il da' naken dot li laže', na' da' naken dot da' li. <sup>21</sup>Na'a, le'e žsédlele yezika' benách ka'. Bi žala' wsédl kwinle? Le'e znnale: "Bi kwano". ¿Zbanle le'e'? <sup>22</sup>Lezka' znnale: "Bi gono' dola' da' zka'n ditjen yela' zchag na'". ¿Zonle le'e dola' da' zka'n ditjen yela' zchag na'? Le'e bi zle'ele chawe' lo'a ka'. ¿Zbanle le'e da' zej že' lo yodo' chégaken? <sup>23</sup>Zka'n žen kwinle dan' nzi' lo na'le xtiža' Dios. ¿Zka'nle le'e Dios ka'ze, dan' zzoale da' wnnakze' Le' chela'ale? <sup>24</sup>Nyejw le'e yiche la'y kan žonle, dan' znnan: "Ni'a che da' žonle le'e, benne' ka' bi zej nake' benne' judío ka' znne zí'gake' che Dios." <sup>25</sup>Wak yebélenlele da' nžogen lo bela' chele, benne' byo ka', dan' nak bian' nzi' lo na'le xtiža' Dios, cha' žonle kan znna xtiže'e, san cha' zzoale da' wnnakze' Le' chela'ale, ba beyakle ka zej nak benne' ka' bi zej nake' che Dios. <sup>26</sup>Che len, benne' byon', benne' bi nžog lo xpele'e dan' nak bian' no benne' byo nzi' lo ne'e xtiža' Dios, san žone' dot kan znna xtiže'e, benne' ni nake' law Dios ka' to benne' byo nžog lo xpele'e dan' nak bian', la'kze bi nžogen lo bela' chekze'. <sup>27</sup>Benne' byon' bi nžog lo xpele'e da' nak bian' no benne' nzi' lo ne'e xtiža' Dios, san žone' dot da' znna xtiže'e, ka žon benne' ni zloé'elen nbága'le le'e zia, la'kze nzi' lo na'le xtiža' Dios, na' nžog lo bela'

chele dan' nak bian' naken ki, san bi žonle kan znna xtiže'e na'. <sup>28</sup> Cha' to benne' judío nakzen' lo bela' žen chie', bi nakkze' benne' judío, na' da' nak bian' da' nžogzen lo bela' chie' bi naken li laže'. <sup>29</sup> Bennen' nake' ki lo yichj lázda'we' nake' da' li benne' judío, benne' nake' che Dios, na' da' nak bia' nzi' lo ne'e xtiža' Dios da' naken li laže' naken to da' yo'on lo yichj lázda'we'. Da' nak bian' da' naken li laže' naken che be' nakkžo, na' kege che yela' benachze chežo. Bennen' nake' che Dios ki, bi žápegak benách ka' le' ba la'ne, san Dios na'kze žape' le' ba la'ne.

**3** Cha' ki naken, čbiž da' chawe' žaken che to benne' dan' nake' benne' judío? čBiž da' chawe' žaken che benne' byo, benne' judío, dan' nžog da' nak bian' lo xpele'e? <sup>2</sup> Da' cháwe'le'e naken chie', na' da' zan kan zej naken. Da' naken blo, Dios bdie' diža' la'y chie' lo na'gak benne' judío ka'. <sup>3</sup> Bale' bi žejlé'gake' che Dios. čŽeklo' bi gon Dios kan znna xtiže'e dan' bi žejlé'gake' chie' Le'? <sup>4</sup> Bi gaken ki. Žala' gákbe'elžo žónteze Dios kan znna xtiže'e, la'kze žon láže'gak yógo'te benách ka'. Kan nak chie' nyejw le'e yiche la'y, da' znnan:

Gak bia' nako' chawe' dan' žono'  
kan znnno,  
na' yežojo' chawe' cha' no benne'  
wchi'a laže'e Le'.

<sup>5</sup>Kate' žonžo da' kegle, Dios znne' bi nak chawe' da' žonžo. Da' ni nak bian' Dios nake' chawe'. Zej nnita' benne' ka' znnágake': "Da' kegle da' žonžo nak bian' Dios nake' chawe', na' che len bi žala' wsaka' zi'e

žo'o." <sup>6</sup> Bi naken ki. Chela' ga'n zen Dios ni'a che da' kegle da' žonžo, čnakxkze gak wchi'a laže'e benách ka' nníta'gake' yežlyó nga? <sup>7</sup> Kate' no benne' žon laže'e, Dios znne' bi zchalj bennen' da' naken dot da' li kan žone' Le'. Da' ni nak bian' nak dot da' li da' znnakze Dios. Zej nnita' benne' ka' znnágake' da' žon láže'gake' légake' žonen ga'ga'zen Dios, na' bi žala' choge' chégake', bi nne' zej nbage'e dola'. Ki znnágake'. <sup>8</sup> čNnažo: "Gonžo da' kegle nich gak da' nak chawe'?" Benne' ka' znne zí'gake' chežo znnágake' zsedlžo da' ki, na' naken chawe' chog Dios chégake' gátgake'.

### Yógo'težo nbága'žo dola'

<sup>9</sup> čBízkze nnažo na'a? Kan nak cheto' neto', benne' judío ka', čnákkžeto' chawe' ka yezika' benách ka'? Bi naktó', dan' ba bloe'elto' nga, zej nbaga' benách judío ka' dola', na' lezka' zej nbaga' benách zito' ka' dola'. Yógo'težo nbága'žo dola'. <sup>10</sup> Nyejw le'e yiche la'y da' znnan:

Bi zoa nitó benne' nake' chawe', nitóe'.

<sup>11</sup> Nitó benne' žejni'ile'.

Nitó benne' žilje' Dios.

<sup>12</sup> Yógo'tegake' zdágake' ga yoble; yógo'tie' zej nnitle'.

Nitó benne' žone' da' nak chawe', nitóe'.

<sup>13</sup> Lbá'gake' zej naken ka yežw ba ka' da' zej nyaljwn.

Len da' znnágake' žon láže'gakle' ljéžgake' ka'.

Diža' da' žežojen žoá'agake' naken ka da' yožen laye' bele snia ka'.

<sup>14</sup> Len da' znnágake', znne zí'gake' chegak benne' ka'.

**15** Nnítá'gake' zbézgake' nich gótgake' benách ka'.  
**16** Zbía yí'tezgake', na' žsaka' zí'tezgake' ljéžgake' ka'.  
**17** Bi gak gá'nłengake' ljéžgake' ka' cháwe'do'.  
**18** Bi zžébegake' Dios.  
**19** Nnezlžo bchajl̄ Dios yógo'te da' ki, da' ži'e benne' ka' nzi' lo ná'gake' xtiž'e. Che len bi gak nitó benne' nne' bi nbage'e dola', na' yógo'te benách, benne' ka' nnítá'gake' dot yežlyó nga, Dios wchi'a laže'e lęgake'. **20** Že' láže'gak benne' judío ka' góngake' da' znna xtiž'a' Dios nich yeyákgake' chawé, san bi gak nitó benne' yeyake' chawé' ki, dan' bzoa Dios da' wnnakze' nich gákbe'elžo nbága'žo dola', dan' bi žonžo dot da' wnnakze' Le'.

### Yelažo dan' žejl̄e'žo che Jesús, Benne' Cristo

**21** Na'a, ba bla' law kan gak yeyakžo chawé' law Dios. Bi gak yeyakžo chawé' lawe' Le' cha' žónzežo kan znna xtiž'e, la'kze nyejw le'e yiche la'y da' wnnagak benne' ka' bchál̄gake' lo wláz Dios, dan' zloe'elen kan gak yeyakžo chawé' lawe' Le'. **22** Dios žonkze' ga žeyakžo chawé' lawe' Le' dan' žejl̄e'žo che Jesús, Benne' Criston', na' gone' ga yeyakgak chawé' yógo'te benne' ka' chejl̄e'gake' chie' Le'. Tlebe zej nak yógo'te benách, **23** dan' yógo'tie' béngake' dola', na' bi zej nake' chawé' kan nak Dios dot chawé'. **24** Dios, lo yela' ži'i laže' chie', žonze' ga žeyakžo chawé' lawe' Le', na' beyone' žo'o chawé' dan' Jesús, Benne' Criston', beya'we' žo'o. **25** Ki goken dan' Dios bdie' Jesús, Benne'

Criston', lo yela' got lo wlazzho žo'o. Le' blalje' xchene', da' žeká'n dola', dan' žaken chežo cha' žejl̄e'žo chie' Le'. Ki ben Dios nich gak bia' Le' nake' chawé', la'kze lo yela' zbez zen laže' chie' bzoc' chela'ale dola' ka' da' benžo ža ni'te. **26** Ki ben Dios, na' blose'el kwine' chawé' ža ni zoažo na'a, na' zga'ne' chawé' la'kze žeké'e dola' da' jez nbaga' benách ka', na' žone' ga žeyákgake' chawé' cha' žejl̄e'gake' che Jesús, Benne' Criston'.

**27** ¿Wak wkán zen kwinžo dan' nakžo chawé' law Dios? Bi gakžo. ¿Bíz chen'? Naken dan' belažo, kege dan' žonžo kan znna xtiž'a' Dios, san dan' žejl̄e'zežo che Jesús, Benne' Criston'. **28** Na'a, nnezlžo žeyák chawé' to benne' law Dios dan' žejl̄i'e che Jesús, Benne' Criston', na' kege dan' žone' kan znna xtiž'a' Dios.

**29** ¿Nak Dios Dios chégakze benne' judío ka'? ¿Bi nake' lezka' Dios chegak benách zi'to' ka'? O', lezka' nake' Dios chegak benách zi'to' ka', **30** dan' zoa toze Benne' nake' Dios. Dios na' žone' ga žeyakgak chawé' benne' judío ka' lawe' Le', benne' byo ka' nžog lo bela' chégake' dan' nak bian' nzi' lo ná'gake' xtiž'e. Ki žone' Le' dan' žejl̄e'gake' che Jesús, Benne' Criston', na' lezka' gone' ga yeyakgak chawé' benne' zi'to' ka' lawe' Le', benne' byo ka' bi nžog lo bela' chégake' dan' nak bian'. **31** Na'a, cha' belažo dan' žejl̄e'žo che Jesús, Benne' Criston', ¿wak nnažo biž zaka' da' bchi'le Dios žo'o? Bi gakžo, san yela' žejl̄e' chežo zloe'elen nak choch xtiž'e na'.

### Da' ben Bran žsedlen žo'o

**4** ¿Bíz kze nnažo na'a? ¿Nakx beyák Bran, xa wdé cheto',

benne' judío ka', chawe' law Dios?  
**2**Chela' beyák Bran chawe' law Dios dan' wzóa da' benkze' le', wak wká'n zen kwine', san kege law Dios. **3**Kan nak da' ni nyejw le'e yiche la'y da' znnan: "Bran bejli'e che Dios, na' che len Dios ble'ele' le' ka benne' chawe' lawe' Le'." **4**Cha' zoa no benne' žone' xchinžo, da' žízjwžone' bi naken to da' žonnžo chie', san naken to da' nbága'žo chie'. **5**Lezka' cha' to benne' žejle'ze' che Dios, la'kze bi be žin bene', Dios, Bennen' žone' ga žeyakgak chawe' benne' ka' lawe' Le', benne' ka' bi zej nake' chawe', znnne' nake' chawe' lawe' le' dan' žejli'e chie' Le'. **6**Lezka' bchalj Dabí kan žaken da' chawe' che no benne', Dios znnne' nake' chawe' lawe' Le' la'kze bi be žin bene'. **7**Ki wnná Dabín:

Ba nez zen naken che bennen'  
 Dios ženít lawe' chie' ka nak  
 da' kegle da' bene'.

Na' žek'e doł'a' da' nbage'e.

**8**Ba nez zen naken che bennen',  
 Dios bi žesbage'e le' zia ni'a  
 che doł'a' da' bene'.

**9**¿Žak da' chawe' ni chégakze  
 benne' byo ka' nžog lo bela' chégakze  
 dan' nak bian' nzi' lo ná'gake' xtiža'  
 Dios, o lezka' žaken chegak benne'  
 byo ka' bi nžog ki lo bela' chégakze'?  
 Ba wnnákzežo beyák chawe' Bran  
 na' law Dios dan' bejli'e chie' Le'.

**10**¿Batx beyák chawe' Bran na'?  
 ¿Goken katen' ba nžog lo xpele'e  
 dan' nak bian', o goken zga'ale? Bi  
 goken kate' ba nžogen lo xpele'e,  
 san zga'ale goken. **11**Bran na'  
 bejli'e che Dios katen' bi na' chog  
 lo xpele'e dan' nak bian'. Wdé na'  
 bchog lo xpele'e dan' nak bian', dan'

zloe'elen ba beyake' chawe' law  
 Dios. Goken ki nich gak Bran na' ka  
 xagak benne' ka' chejlé'gake' che  
 Dios, la'kze bi nžog lo xpéla'gake'  
 dan' nak bian'. Dan' žejl'é'gake' che  
 Dios, gak nna Dios zej nake' chawe'  
 lawe' Le'. **12**Nak Bran na' xa wdé  
 chegak benne' judío ka', benne'  
 žejl'é'gake' che Dios. Kégeze nake'  
 xagak benne' byo ka' nžog lo bela'  
 chégakze' dan' nak bian', san lezka'  
 nake' xagak benne' ka' žóngake' kan  
 ben Bran na', dan' žejl'é'gake' che  
 Dios kan ben Bran na' kate' bi na'  
 chog lo xpele'e dan' nak bian'.

### Da' wnnacze Dios gata' chežo dan' žejle'žo chie' Le'

**13**Bchebe laže' Dios bi da'  
 wnežjwe' che Bran na', na' chegak  
 za'sóe' ka', gata' chégakze yežlyó  
 ngakze. Gaken ki, kege dan'  
 žóngake' kan znnna xtiža' Dios,  
 san dan' beyákgake' chawe' lawe'  
 Le' dan' žejl'é'gake' chie'. **14**Chela'  
 yežlyó nga gata' chégakze benne'  
 ka' žóngake' kan znnna xtiža' Dios, bi  
 gon byenen chejle'žo chie', na' gak  
 da' bchebe laže' Dios to da' bi zaka'.  
**15**Xtiža' Dios zloe'elen ž'o' nbága'žo  
 zia, da' žonen ga chog Dios chežo  
 gatžo. Gan bi na' žin da' wnnakze  
 Dios, bi gak bága'gak benách ka' zia  
 dan' bi béngeake' kan wnnakze' Le'.

**16**Che len žebelžo dan' žala' si'žo  
 dan' bchebe laže' Dios dan' žejle'žo  
 chie' Le', dan' nak bian' naken to  
 da' žonnze' chežo. Ki naken nich  
 gak bia' gata' dan' bchebe laže'  
 Dios gonne' chegak yógo'te za'só  
 Bran na', kégeze chegak benne'  
 ka' nzi' lo ná'gake' da' wnnakze  
 Dios, san lezka' chegak benne' ka'

žejl'é'gake' che Dios kan bejl'é' Bran na' che Dios. Bran na' nake' ka xažo yógo'težo žo'o, nolžo žejle'žo che Dios. <sup>17</sup>Ki naken kan nyejw le'e yiche la'y kan Dios gože' Bran na', dan' znnan: "Bzoa' le' ka xagak benách ka' nníta'gake' dot yežlyó."

Ki naken, law Dios, Bennen' bejlé' Bran na' chie', nak Bran na' ka xažo yógo'težo. Dios na' žesbane' benne' gat ka', na' zchalje' che to benne' bi na' soe' kan ba zoakze bennen' bi na' soe'.

<sup>18</sup>Ki naken dan' Dios gože' Bran na': "Benne' zante gakgak za'só' ka." Bran na' bejl'i'e che Dios, na' bxen laže'e Dios gone' dan' bchebe laže'e wnežjwe' chie', la'kze bi gok le'ele' dan' žxen laže'e si'e, na' ka' goken, wy'o lo ne'e gake' xagak benách ka' nníta'gake' dot yežlyó nga. <sup>19</sup>Bran na' bi gok chop laže'e kan žežli'e che Dios, la'kze ba zeje' ka to gaywá' yiz, na' bejsá' laže'e kan nak che bela' žen chie', da' ba natkzen dan' ba ngóleli'e, na' lezka' kan nak che Sara, zo'le', nake' no'le wbíž. <sup>20</sup>Bi gok chop laže'e, na' bi goke' benne' bi žežl'é' kan nak da' bchebe laže' Dios gone' chie', san gokže' choch dan' bejl'i'e che Dios, na' bka'n zene' Dios. <sup>21</sup>Dot laže'e bxen laže'e Dios, nape' yela' wak gone' dot dan' bchebe laže'e gone'. <sup>22</sup>Che len, Dios bzoe' che Bran na' nake' chawe' lawe' Le' dan' bejl'i'e chie' Le'.

<sup>23</sup>Nyejw le'e yiche la'y da' znnan: "Dios bzoe' chie' nake' chawe' lawe' Le'." Ki nyejwn le'e yichen', kégeze nich yebélenlen Bran na', <sup>24</sup>san nich yebélenlžon lezka' žo'o. Dios gone' ga yeyakžo chawe' lawe' Le' cha' chejle'žo chie' Le', besbane' Xanžo

Jesusen' lo yela' got. <sup>25</sup>Jesusen', Dios bdie' Le' nich gote' ni'a che dola' da' nbága'žo žo'o, na' besbane' Le' lo yela' got, nich gak gone' ga yeyakžo žo'o chawe' lawe' Le'.

Da' žata' chežo dan' ba  
beyakžo chawe' law Dios

**5** Na'a, znnna Dios ba beyakžo chawe' lawe' Le' ni'a che da' ben Xanžo Jesús, Benne' Criston', cha' žežle'žo chie' Le', na' che len ba begá'nlenžo Le' cháwe'do'. <sup>2</sup>Dan' žežle'žo che Jesús, Benne' Criston', žežbelénložo da' žonn Dios chežo, dan' žon chochen lázdo'žo. žežbelžo dan' žxen láže'žo gata' chežo yela' baní' che Dios. <sup>3</sup>Kégeze ki žežbelžo, san lezka' žežbelžo kate' zzáká'žo, dan' nnezlžo da' zzáká'žo žsedlen žo'o kwežžo zen laže'. <sup>4</sup>Kate' zbezžo zen laže' žežojžo chawe' law Dios, na' kate' ba bežojžo chawe' lawe' Le' žxen láže'žo Lekze' gák'lene' žo'o. <sup>5</sup>Kate' žxen láže'žo Le', bi žak chope láže'žo. Ki naken dan' yela' nži'il che Dios len žo'o yo'on yichj lázdo'žo. Dios Be' La'y, Bennen' bsela' Dios chežo, žone' ga žaken chežo ki.

<sup>6</sup>Katen' bi gok yelažo žakze chežo, kate' bžin ža, Benne' Criston' gote' lo wlazžo žo'o, kate' ne gokžo benne' dola' ka'. <sup>7</sup>Bi yénele no benne' gate' lo wláz to benne' chawe'. Wak no benne' wechóg laže'e gate' lo wláz to benne' nake' dot chawe'. <sup>8</sup>Dios zlöe'ele' žo'o kan nží'ile'ele' žo'o, dan' got Benne' Criston' lo wlazžo žo'o kate' ne gokžo benne' dola' ka'. <sup>9</sup>Ba beyakžo chawe' law Dios dan' got Benne' Criston' lo wlazžo žo'o, katen' blalje' xchene'. Che len žxen

läže'žežo Le' yeslē' žo'o lo že chog Dios chegak benne' dola' ka' gátgake' to chi'ize. <sup>10</sup>Katen' bi ble'elžo Dios chawe', Zi'nkze Dios gote' lo wlazzō žo'o nich gak yeyakžo toze len Dios. Na'a, dan' zoa nban Bennen' bene' ga ba beyakžo toze len Diosen', žxen läže'žežo yelažo to chi'ize. <sup>11</sup>Lezka' žebelžo law Dios ni'a che da' ben Xanžo Jesúš, Benne' Criston', dan' ba beyakžo toze len Diosen' ni'a che da' bene' Le'.

**Da' ben Adán, na' da'  
ben Benne' Cristo**

<sup>12</sup>Bla' dola' lo yežlyó nga ni'a che da' ben toze benne', Adán, na' dan' bene' dola', lezka' wyó'o yela' got. Che len gatgak yógo'te benách ka' dan' yógo'tegake' jez nbage'e dola'. <sup>13</sup>Zga'ale kate' bla' da' bchi'le Dios lo yežlyó nga, bengak benách ka' dola', benne' ka' wnníta'gake' yežlyó nga, na' gótgake', san Dios bi besbage'e benne' ka' zia dan' bi béngeake' ka znna xtiže'e. Ki goken dan' bi na' žin da' bchi'le Le' gan wnníta'gake'. <sup>14</sup>Kate' wzó law zoa Adán, na' zejte že wzó Moisés gotgak yógo'te benách ka' dan' wbág'a'gake' dola', la'kze bi bzóagake' chela'ale to da' wnnakze Dios kan ben Adán na'. Yógo'te benách ka' jez nake' toze len Adán na' dan' jez nake' za'sóe' ka'. Da' ni zloe'elen žo'o kan gakgak yógo'te benách ka' toze len Benne' Criston', benne' ka' chejlé'gake' chie' Le'.

<sup>15</sup>Da' žonnze Dios chežo bi naken ka da' goken chežo ni'a che dolan' da' ben Adán na'. Ni'a che dolan' da' ben toze bennen', gatgak yógo'te benách ka'. Da' zénle'eže naken da'

žonnze Dios chežo, dan' naken yela' nban da' zejlí kanne. Žonne' chežo da' ni ni'a che da' ben yetoze Benne', Jesúš, Benne' Criston'. <sup>16</sup>Da' žonnze Dios chežo bi naken tlebe ka da' goken chežo ni'a che dolan' da' ben toze bennen'. Da' bchog Dios che Adán na' ni'a che dolan' da' bene', lezka' bchog Dios chegak yógo'te benách ka'. Dan' žonnze Dios chežo naken nich gak yeyakžo chawe' lawe' Le' la'kze nbága'žo dola' zan. <sup>17</sup>Wyó'o yela' got yežlyó nga ni'a che dolan' da' ben toze bennen'. Ni'a che da' ben yetoze Bennen', Jesúš, Benne' Criston', gata' yela' nban da' zejlí kanne chegak benne' ka' yeyákgake' chawe' law Dios, dan' naken da' žonnze Dios chežo.

<sup>18</sup>Dios bchoge' chegak yógo'te benách ka' gátgake' ni'a che dolan' da' ben toze bennen'. Lezka' yógo'te benách ka' gak yeyákgake' chawe' lawe' Le' ni'a che da' nak chawe' dan' ben yetoze Bennen', na' gata' yela' nban da' zejlí kanne chégake'.

<sup>19</sup>Beyakgak benne' zan wen dola' ka' dan' bi ben toze bennen' kan znna xtiža' Dios. Lezka' benne' zan yeyákgake' chawe' law Dios dan' ben yetoze Bennen' kan znna xtiža' Dios.

<sup>20</sup>Wyó'o da' wnnakze Dios lo yežlyó nga nich gak bia' jez nbaga' benách ka' dola'. Dan' gok bia' jez nbage'e dola', lezka' gok bia' zénle'eže nak da' žonnze Dios chegak benách ka'. <sup>21</sup>Gota' yela' wak che dola' goten žo'o. Lezka' da' žonnze Dios chežo napen yela' wak gonen ga yeyakžo chawe' lawe' Le' ni'a che da' ben Xanžo Jesúš, Benne' Criston', na' gonen ga gata' yela' nban da' zejlí kanne chežo.

Zoažo nbanžo ni'a che  
Jesús, Benne' Cristo

**6** ¿Bízkze nnažo na'a? ¿Žala'  
gonžo dola' nich lo yela' nži'il  
che Dios Le' yénit lawe'e chežo  
da' zanže? <sup>2</sup>iBi góñkzežon! Nak  
chežo ka ba gotžo to chi'ize nich  
biž gonžo dola'. ¿Nakxkze gak  
góñzežo dola'? <sup>3</sup>¿Bi nnézlele kan  
naken chežo? Cha' bezoažo nis nich  
yeyakžo toze len Benne' Criston',  
dan' bezoažo nis zloe'elen ž'o ba  
wdežo lo yela' got tzen len Le'. <sup>4</sup>Kan  
goken, gótlénžo-ne' tzen, lezka'  
bgáche'lénžo-ne' tzen lo yežw ba  
katen' bezoažo nis. Kan ben Dios,  
len yela' wak zen chie' besbane'  
Benne' Criston' lo yela' got, lezka'  
bene' ga bebánlenžo tzen Jesusen'  
nich gakžo benách kobe chie' ka'.

<sup>5</sup>Cha' bénlenžo tzen Benne'  
Criston', na' gotžo kan gote' Le',  
lezka' góñlenžo-ne' tzen, yebanžo  
lo yela' got kan bebane' Le'. <sup>6</sup>Ba  
nnézkzelžo da' ni: yela' benách  
chežo da' wzóan zga'ale, wdá'lenen  
Le' tzen le'e yag kroze nich kwia yi'  
yela' benách chežo da' bénlenžon  
dola', nich biž nna bia' da' nak dola'  
ž'o. <sup>7</sup>Cha' nakžo toze len Bennen'  
gote' ni'a che dola', na' ba beyakžo  
chawe' law Dios, biž nbágažo dolan',  
na' biž yo'ožo lo na' dola'. <sup>8</sup>Na'a,  
cha' nátlenžo tzen Benne' Criston',  
žejle'žo yebánlenžo-ne' tzen, <sup>9</sup>dan'  
nnezlžo ba bebán Benne' Criston' lo  
yela' got, na' biž gate'. Che len biž bi  
gak gon yela' got na' chie' Le'. <sup>10</sup>Kan  
goken, gote' Le', toze chi'i gote' ni'a  
che dola' da' wbágažo ž'o, san  
kan naken, zoe' nbane', nbánlene'  
Dios. <sup>11</sup>Lezka' žala' géklele le'e

naken chele ka ba nátkzele nich biž  
gonle dola', san zoale nbanle nich  
gonle kan znna xtiža' Dios, dan'  
nakle toze len Xanžo Jesúš, Benne'  
Criston'.

<sup>12</sup>Che len, bi we'le latje da' naken  
dola', nich bi gonen ga gonle dola'  
lo bela' žen chele da' gatkzen. Biž  
gonle kan nak da' zze láže'le da'  
kegle lo bela' žen chele. <sup>13</sup>Bi wdé  
kwinle lo na' da' naken dola', na' bi  
gonle da' kegle, san le wdé kwinle  
lo na' Dios dan' ba bebanle lo yela'  
got, na' le wdé bela' žen chele  
lo ne'e nich góñlenen' da' naken  
chawe'. <sup>14</sup>Bi we'le latje da' naken  
dola', nich bi gonen ga gonle dola',  
dan' bzoa Dios le'e nich gonle kan  
znna da' chawe' chie' Le', na' kege  
góñzele kan znna da' bchi'le' benách  
dola' ka'.

Da' žsaka' lebe kan nak  
che benne' ndo'w

<sup>15</sup>¿Bízkze nnažo na'a? ¿Žala'  
gonžo dola' dan' biž yo'ožo lo na'  
da' bchi'le Dios benách dola' ka',  
san žonžo kan znna da' chawe' che  
Dios? iBi gonžon! <sup>16</sup>Ba nnézkzežon!  
cha' wdé kwinle lo na' to benne'  
nich gakle benne' ndo'w chie' ka',  
na' nich gonle kan znna xtiže'e, to  
chi'ize nakle benne' ndo'w ka' che  
bennen' žonle kan znna xtiže'e.  
Lezka' gaken cha' wdé kwinle nich  
gonle dola' da' gonen ga gatle, o  
cha' wdé kwinle nich gonle kan  
znna xtiža' Dios, Bennen' gone' ga  
yeyakle chawe' lawe' Le'. <sup>17</sup>Na'a,  
žoxken Dios. La'kze zga'ale gokle  
benne' ndo'w ka' lo na' dola', na'a  
dot láže'le žonle kan znna xtiža'  
Dios, dan' bde kwinle lo nan!. <sup>18</sup>Dan'

ba belale lo na' dola', ba beyakle ka benne' ndo'w ka' lo na' da' naken chawe'. <sup>19</sup>Zcháljlena' le'e kan žak chegak benách ndo'w ka', dan' bi žejní'ilele kwáselo lo yela' benachze chele. Zga'ale bde kwinle tzen len bela' žen chele lo na' da' kegle, na' lo na' da' bi naken chawe', na' gokle ka benne' ndo'w ka' chen, na' benle xchin da' bi naken chawe'. Na'a, le wdé bela' žen chele lo na' da' naken chawe', nich gakle ka benne' ndo'w ka' chen, na' gonle xchin da' naken chawe' nich gakle benne' ka'zej nake' che Dios.

<sup>20</sup>Katen' gokle ka benne' ndo'w ka' lo na' dola', bi benle xchin da' naken chawe'. <sup>21</sup>Na'a, ḡok chawe' chele ni'a che da' benle zga'ale? Na'a dan' benle žonen ga žedo'elele, na' žonen ga gat to chi'ize no benne' žonen'. <sup>22</sup>Na'a ba belale lo na' dola', na' nakle ka benne' ndo'w ka' che Dios, dan' žonen ga žak da' chawe' chele dan' žonen ga nakle che Dios, na' žonen ga naple yela' nban da' zejlí kanne. <sup>23</sup>Lazjw no benne' žone' dola' naken yela' got, san da' žonnze Dios chežo naken yela' nban da' zejlí kanne, dan' napžo dan' nakžo toze len Xanžo Jesúš, Benne' Criston'.

### Da' žsaka' lebe yela' zchag na'

**7** Zí'na'do' ka', nólele le'e nzi' lo na'le da' bchi'le Dios benách judío ka'. Nnálezkelele yo'o lo na' xtiže'e na' no benne' kate' ne zoe' nbane'. <sup>2</sup>Lezka' to no'le nžag ná'lene' to benne' byo yoe'e lo na' benne' byo chien' kate' ne zoa nban benne' byo chien', dan' ki znna da' bsedle Dios kan nak che yela' zchag na',

san cha' ba got benne' byo chien', na' nžoj no'len' lo na' xtiža' Dios dan' bchagen légake'. <sup>3</sup>Ki naken, kate' ne zoa nban benne' byo chien', cha' no'len' wchág ná'lene' no benne' byo yoble, gone' dola' da' wká'n ditjen yela' zchag na', san cha' ba got benne' byo chien', na' nžoj no'len' lo na' xtiža' Dios na', na' na'a, cha' wchág ná'lene' to benne' byo yoble, bi gone' dola' da' zka'n ditjen yela' zchag na'.

<sup>4</sup>Lezka' žaken chele, zí'na'do' ka'. Dan' nžagle Benne' Criston', naken ka ba nátkzele le'e, na' biž yo'ole lo na' da' bchi'le Moisés žo'o, nich gak gakle che Benne' yoblen'. Na'a nakle che Benne' Criston', Bennen' bebane' lo yela' got. Ki naken nich gak gonžo da' žaz laže' Dios. <sup>5</sup>Katen' wyo'ožo lo na' yela' benachze chežo, da' znna xtiža' Dios benen ga gok bia'gak da' ka' wzé láže'žo da' bi zej naken chawe', da' ka' béngeaken žin lo bela' žen chežo nich góngaken ga gatžo. <sup>6</sup>Na'a ba belažo lo na' da' bchi'le Moisés žo'o dan' nátkzežo kan nak da' znna xtiže'e, dan' bchi'len žo'o zga'ale. Ki naken nich gak gonžo xchin Dios lo yela' nban kobe da' žonn Dios Be' La'y chežo, na' kege gonžon lo da' ba wdé chen, dan' naken dan' bchi'le Moisés žo'o.

### Zoalén neda' da' naken dola'

<sup>7</sup> ¿Bízke nnažo na'a? ¿Žon da' wnnakze Dios ga žona' dola'? Bi žonen ki, san chela' bi bzejní'il neda' da' znna xtiže'e, bi wnnezla' nak dola' da' žona'. Chela' bi zoa lo da' wnnakze' Le' da' znnan: "Bi se lažo'o da' de che lježo" bi nnezla' nak dola' yela' zze laže' da'

de che lježa'. <sup>8</sup>Kate' benla' xtiže'e, na' gókbe'ela' da' nak dola' žonen žin lo bela' žen chia', na' benen ga gókbe'ela' zze laža'a yógo'te da' kegle. Gan bi na' la' xtiže'e, bi nak bia' da' naken dola'. <sup>9</sup>Ža ni'te, kate' bi na' yenla' xtiža' Dios, gokla' zoa' nbana', san kate' benla' xtiže'e, gókbe'ela' nbaga'a dola', na' goka' ka to benne' gat law Dios. <sup>10</sup>Dios bdixjwe' da' znna xtiže'e nich gonen ga gata' yela' nban chežo, san benen ga gókbe'ela' ba natkza'. <sup>11</sup>Gok bia' nchíxela' kan nak dola', dan' ben xtiže'e ga gókbe'ela' nbaga'a dola', na' žala' gata'.

<sup>12</sup>Che len, la'y nak xtiža' Dios, na' la'y, na' chawe', na' xtan nak da' bchi'le' ž'o'o. <sup>13</sup>¿Ben da' naken chawe' ga goka' ka to benne' gat? Bi naken ki, san da' nak dola' gok bian' ni'a che da' naken chawe', na' benen ga gókbe'ela' ba natkza' nich gak bia' nak dola' da' žona!. Ki goken nich gak bia' ni'a che xtiža' Dios yógo'te da'zej naken dola'zej nakle'en da' zinnj.

<sup>14</sup>Nnezlžo Dios Be' La'y benne' chežo xtiža' Dios, san neda' naka' benachze, na' yo'a lo na' dola' ka to benne' ndo'w chen. <sup>15</sup>Na'a, bi žejni'il'a' da' žona!. Žénela' gona' kan znna xtiža' Dios, san bi žona' dan' žénela' gona'. Da' žona' naken dola' da' bi zle'ela' chawe'. <sup>16</sup>Žona' dola' la'kze bi žénela' gona' dolan!. Ki naken dan' xtiža' Dios žsedlen neda' bi naken chawe' da' žona!. Che len nak bia' nak chawe' da' znna xtiže'e. <sup>17</sup>Ki naken, kege nedza' žona' dolan!, san dola' da' zoalen neda' žonen ga žona' dolan!. <sup>18</sup>Nnezla' da' nak chawe' bi zóalenen neda', o žala'

nnia', dan' naken chawe' bi zóalenen da' nak yela' benachze chia!. Žénela' gona' dan' naken chawe', san la' nedza' bi gak gonan'. <sup>19</sup>Bi žona' da' naken chawe' da' žénela' gona', san žóneteza' da' kegle da' bi žénela' gona'. <sup>20</sup>Che len, cha' žona' dola' da' bi žénela' gona', kege nedkza' žonan', san dola' da' zóalenen neda' žonen ga žona' dolan!

<sup>21</sup>Ki nak da' žaken chežo yógo'težo. Kate' žénelžo gonžo da' naken chawe', zoalen žo'o da' žonen ga žonžo da' kegle. <sup>22</sup>Lo yichj lázda'wa' žaz laža'a xtiža' Dios, <sup>23</sup>san žákbe'ela' zoa da' znna bia' neda' da' zoalen bela' žen chia', na' to da' zž'i'i che xtiža' Dios yo'on lo yichj lázda'wa'. Dan' zóalenen bela' žen chia' žonen ga žona' dola'.

<sup>24</sup>iDa' nyáche'le'e naken chia' neda! ?Nozkze benne' gak yeslé' neda' lo yela' benachze chia' da' žonen ga žona' dola'? <sup>25</sup>iŽoxken Dios, ba belažo na'a ni'a che da' ben Xanžo Jesúš, Benne' Criston! Che len, kan nak da' yo'on lo yichj lázda'wa' žona' kan znna xtiža' Dios, la'kze yela' benachze chia' žonen ga žénela' gona' dola'.

### Da' gak gonžo dan' zoalen Dios Be' La'y žo'o

**8** Che len, benne' ka'zej nake' toze len Jesúš, Benne' Criston', biž bi zia zej nbage'e, benne' ka'biž žóngake' kan žénele yela' benachze chégake', san žóngake' kan žénele Dios Be' La'y. <sup>2</sup>Dan' naka' toze len Jesusen', Dios Be' La'y, Bennen' nbánlenžo, žáklene' neda'. Che len, ba belá' lo da' benen ga bena' dola', na' lezka' lo yela' got. <sup>3</sup>Ba ben Dios

da' bi gok gon da' bchi'le' žo'o. Bi be gok gonen da' gáklenen žo'o dan' nakžo benachze. Che len Dios bsele'e Zi'nkze', Bennen' beyake' benáčh kan nakžo žo'o, nakžo benáčh dola' ka', san Le' bi be dola' bene'. Besbaga' kwine' dola' da' wbága'žo žo'o, na' ka' goken, Dios bchoge' chie' gote' ni'a che dola' da' žonžo lo yela' benachze chežo nich biž ga'nžo lo na' dolan!. <sup>4</sup>Ki bene' nich gak gonžo da'zej naken chawe' da' že' xtiža' Dios žo'o gonžo, nolžo biž žonžo kan žénele yela' benachze chežo, san žonžo kan žénele Dios Be' La'y.

<sup>5</sup>Benne' ka', benne' žóngake' kan žénele yela' benachze chégake', že' láže'gake' da' naken che yela' benachze chégake', san benne' ka' žóngake' kan žénele Dios Be' La'y, že' láže'gake' da' naken che Dios Be' La'y. <sup>6</sup>Cha' že' láže'zežo da' naken che yela' benachze chežo, gatžo to chi'ize, san cha' že' láže'žo da' naken che Dios Be' La'y, ba napžo yela' nban da'zejlí kanne, na' zga'n ži yichj láždo'žo. <sup>7</sup>No benne' že' láže'ze' da' naken che yela' benachze chie', bi zchage' Dios chawe', dan' bi žon bennen' kan znna xtiža' Dios, na' bi gak gonen'. <sup>8</sup>Che len, benne' ka' žóngake' kan žénele yela' benachze chégake', bi gak góngake' da' žaz láže' Dios.

<sup>9</sup>Na'a, le'e biž žonle kan žénele yela' benachze chele, san žonle kan žénele Dios Be' La'y dan' zóalenzke' Le' le'e. Benne' Criston' bsele'e Dios Be' La'y chežo. No benne' bi zoalen Dios Be' La'y le', bi nake' toze len Benne' Criston'. <sup>10</sup>Cha' Benne' Criston' zóalene' le'e, la'kze gat yela'

benachze chele ni'a che dola', soale nbanle ni'a che Dios Be' La'y dan' ben Dios ga nakle chawe' lawe' Le'. <sup>11</sup>Be' La'y che Dios, Bennen' besbane' Jesusen' lo yela' got, zóalene' le'e. Dios, Bennen' besbankze' Jesús, Benne' Criston', lo yela' got, gone' ga yebanle le'e lo bela' žen chele da' žatkzen. Ki gone' dan' zoalen Dios Be' La'y le'e.

<sup>12</sup>Che len, zí'na'do' ka', zoa to da' nbága'žo, san kege che yela' benachze chežo, nich bi gonžo kan žénele yela' benachze chežo na'. <sup>13</sup>Cha' žonle kan žénele yela' benachze chele, gatle to chi'ize, san cha', len yela' wak che Dios Be' La'y, žonle ga kwia yi' da' žonle lo yela' benachze chele, na' gapple yela' nban da'zejlí kanne.

<sup>14</sup>Zej nak zí'nkze Dios yógo'te benne' ka' žóngake' ka žénele Dios Be' La'y. <sup>15</sup>Dios Be' La'y na', Bennen' zóalene' le'e, bi bmnite'e le'e da' yoble ka benne' ndo'w ka' nich žébele, san ba bene' le'e zí'nkze Dios, na' Lekze' žone' ga žližžo Dios, na' znnážo: "Xe." <sup>16</sup>Dios Be' La'y na' zzejní'ikzele' be' nakkžo, na' žone' ga nnezlžo nakžo zí'n Dios. <sup>17</sup>Cha' ba nakžo zí'n Dios, lezka' da'zej naken che Xažo Dios gata' chežo tzen len Benne' Criston'. Ki gaken chežo cha' sáka'lenžo tzen Benne' Criston' nich tzen len Le' soažo lo yela' baní' chie'.

<sup>18</sup>Žekla' neda', da' zzáka'žo na'a bi be naken kan nak yela' baní' da' gata' chežo ža da' ba za'. <sup>19</sup>Zbezgak yógo'te da' ben Dios, na' žak láže'gaken žinte ža na' katen' Dios wlo'e'le' law zej nak zí'nkze' benne' ka' žejl'é'gake' chie' Le'. <sup>20</sup>Yógo'te

da' ben Dios wdégaken lo na' da'  
 žonen ga kwia yí'gaken, kege  
 dan' gónegklen gaken ki, san ki  
 goken dan' ben Dios ga naken ki.  
Lezka' bene' ga gak wxén láže'gak  
Le' da' ka' bene',<sup>21</sup> na' yelagak  
 yógo'te da' ka' ben Dios lo da'  
 žonen ga zbia yí'gaken. Ki naken,  
lezka' yebégeklen lo yela' žeslá da'  
 záka'le'en da' yebélengekle benne'  
 ka'zej nake' zi'n Dios. <sup>22</sup>Nnezlžo  
 yógo'te da' ben Dios zzáka'gaken  
 na' zejte na'a ža, kan zzaka' to no'le  
 za' galj bi'do' chie'. <sup>23</sup>Kégeze yežlyó  
 nga zzakan', san lezka' zzáka'žo  
 žo'o, la'kze Dios Be' La'y záołene'  
 žo'o. Le' nake' chežo da' zlöe'elen  
 žo'o kan gákkzežo. ZZáka'žo  
 kate' ne zbezžo ža na' katen' Dios  
 wloe'ele' law nakžo zi'nkze' ka', ža  
 na' lezka' yeskobe' beł' žen chežo.  
<sup>24</sup>Dan' žxen láže'žo gone' da' ni,  
 belažo žo'o, san cha' gak le'lžo dan'  
žxen láže'žo, bi naken to da' zbezžo  
láže'žon. Bi zbezžo da' ba zle'lžon.  
<sup>25</sup>Na'a, cha' žxen láže'žo to da' bi  
zle'lžo, na' lo yela' zbezžen láže'ž  
zbezžon.

<sup>26</sup>Lezka' Dios Be' La'y žákłene' žo'o  
 kate' žedó láže'žo, dan' bi nnezlžo bi  
 žala' nnablžo Dios, san Dios Be' La'y  
 zdekze' xtíža'žo law Dios, na' lo yela'  
 znnab chie' zbeže láže'li'e, kan bi  
 gak no benne' nne'. <sup>27</sup>Dios zwie' da'  
 yo'o lo yichj láždo'gak benách ka', na'  
 nnezle' da' žénele nna Dios Be' La'y  
 na', na' Le', kan žénekzele Dios, zdie'  
xtíža'gak benne' ka' law Dios, benne'  
 ka'zej nake' toze len Benne' Criston'.

### Ba belažo dan' yo'ožo Benne' Cristo

<sup>28</sup>Nnezlžo yógo'te da' žak chegak  
 benne' ka'zej nži'ile' Dios žon

cháwe'gaken légake', benne' ka'  
 bliž Dios légake' kan wnnakze'  
 gone'. <sup>29</sup>Benne' ka' wžekze Dios  
 zga'ale, lezka' bzoe' chégake' zga'ale  
 gákgake' tlebe kan nak Zi'nkze',  
 nich gak blo Zi'nen' ladjw benne'  
 zan, benne' lježe ka'. <sup>30</sup>Benne' ka'  
 bzoa Dios chégake' zga'ale kan  
 žala' gákgake', lezka' bliž' légake',  
 na' benne' ka' bliž', bene' légake'  
 chawé lawe' Le', na' benne' ka'  
 bene' légake' chawé, lezka' ba bzoe'  
 chégake' s'gake' yela' banf' chie'.

<sup>31</sup>¿Bízkze nnažo na'a kan zej nak  
 da' ki? Cha' Dios žákłene' žo'o, bi  
 žala' žébežo la'kze soa da' gongak  
 benách ka' chežo. <sup>32</sup>Dios, dot laž'e'e  
 benne' chežo Zi'nkzen'. Bdie' Le'  
 nich gote' lo wlazžo žo'o. Cha' ki  
 ben Dios, žbi gónnli'e chežo tzen  
 len Zi'nen' yógo'te da' žiážjelžo?

<sup>33</sup>¿Nožkze benne' gak yesbage'e  
 benne' ka' zia, benne' ka' wžekze  
 Dios? Bi gak nitó benne' dan'  
 benkze Dios ga ba beyakžo chawé  
lawe' Le'. <sup>34</sup>¿Nožkze benne' gak  
 choge' chežo gatžo to chi'ize? Bi  
 gak nitó benne' dan' gotkze Benne'  
 Criston' lo wlazžo žo'o, na' da' nakže  
 žen, bebane' lo yela' got, na' na'a  
 zoe' kwit li ža che Dios gan nzi'  
lo ne'e yela' wnná bia', na' znne  
 chawé'e lo wlazžo žo'o law Dios.

<sup>35</sup>La'kze zoa bi da' žaken chežo,  
 nnézkzelžo Benne' Criston' nži'ile'  
 žo'o. Nnezlžo nži'ile' žo'o

la'kze zzáka'žo, o la'kze nak  
 nyache' láže'žo,  
la'kze zbia láže'gak benách ka'  
 žo'o, o la'kze zdonžo,  
 o la'kze žiažje da' gákwžo, o  
la'kze žon zož chežo,  
 o la'kze gotgak benách ka' žo'o.

**36** Kan zej nak da' ki nyejw le'e yiche la'y da' znnan:

Dan' nakžo chio' Le',  
žóntezgak benách ka' ga gatžo.  
Nakžo ka zila' ka',  
bia ka' ndégakba' lo na' benne'  
gote' légakba'.

**37** Na'a, dan' Bennen' nži'ile' žo'o  
zóalene' žo'o, žxen láže'žo soelžo lo  
da' žaken chežo. **38-39** Che len žekla'  
neda':

Bi be sáke'le gonen ga biž ži'il  
Dios žo'o.  
Nži'ile' žo'o dan' nakžo toze len  
Xanžo Jesúš, Benne' Criston'.  
Bi sáke'le gon yela' got o yela'  
nban ga biž ži'ile' žo'o,  
na' kege wbás che ya'abá ka',  
o benne' wnná bia' ka', o yela'  
wak che da' xiwe',  
o bíte'teze da' zoan, o bíte'teze  
da' zan',  
o to da' že' ža'le, o to da' že' že'le,  
o bíte'teze da' ben Dios.

Dios wžekze' benne' Israel  
ka' nich gákgake' chie'

**9** Žchalja' da' naken dot da' li  
dan' naka' che Benne' Criston',  
na' da' znnia' naken tlebe len da'  
znnakze Dios Be' La'y lo yichj  
lázda'wa'. Bi žon laža'a. **2**Žakle'e  
nyache' laža'a, na' žékitezela', **3**dan'  
žak laža'a gona' ga yelagak lježa' ka',  
benne' wláž chia' ka'. Chela' gaklen  
légake', yénekzela' yebéj yichj Dios  
neda', na' kwáslena' Benne' Criston'.  
**4**Benne' wláž chia' ka' zej nake' za'só  
Israel, na' Dios bi'e légake' latje  
gákgake' zi'nkze' ka'. Yela' banf'  
che Dios wzóalenen légake', na'  
Dios bdie' lo ná'gake' diža' chie' da'  
zka'n chawen', na' lezka' da' bchi'le'

žo'o. Blíže' légake' nich wká'n  
zéngake' Le', na' bchebe laže'e gon  
chawé'e yógo'te benách zi'to' ka' ni'a  
chégake'. **5**Zej nake' za'sogak xa wdé  
cheto', Bran, na' Isaak, na' Jakob,  
na' ladjw ljéžgake' ka', kan nak yela'  
benách chie', golj Benne' Criston',  
Bennen' nakkze' Dios, na' znnna bi'e  
yógo'te. iGa'n zénteze' Le'! Ka'kze  
gaken.

**6**La'kze yógo'te benne' wláž  
chia' ka' bi nzi' lo ná'gake' Benne'  
Criston', bi žala' nnažo: "Beyák  
xtiža' Dios dáče'ze." Kege yógo'te  
za'só Israel zej nake' da' li benne'  
Israel ka', benne' ka' zej nake' che  
Dios. **7**La'kze goljgak benne' zan  
za'só Bran, kege yógo'tegake'  
gókgake' da' li za'só Bran na', san  
naken kan nyejw le'e yiche la'y da'  
znnan: "Za'só Isaak ka' gákgakze'  
da' li za'só' ka'!" **8**Ki naken, benne'  
ka' zej nake' zi'n to benne', bennen'  
nake' che Dios, kege yógo'tegake'  
zej nake' zi'nkze Dios. Na'a, benne'  
ka' náljgake' ni'a che da' bchebe  
laže' Dios zej nakze' da' li za'só  
Bran na'. **9**Dan' bchebe laže' Dios  
bi da' wnežjwe' che Bran na' znnan  
ki: "Yetó yiz na'a ža yelá'a, na' Sara,  
zolo', galje to bi' byodo' chie'."

**10**Kégeze da' ni goken ki, san  
lezka' katen' Rebeka ne noe'e bi'  
byodo' ka' che Isaak, xa wdé cheto',  
lo li'e, **11-13**katen' bi na' gálgakbe',  
na' bi na' góngakbe' da' nak chawé'  
o da' kegle, Dios gože' Rebeka na',  
na' wnné: "Xkwide' nežw chio'  
gonbe' xchin xkwide' bežopen!" Da'  
ni naken tlebe len da' nyejw le'e  
yiche kan wnná Dios, dan' znnan:  
"Bži'ila' Jakob, na' kege Esaú." Ka'  
goken, bga'n choch da' bzoa Dios to

chi'ize kan nak chegak benne' ka' ba wžekze' Le'. Che len bi žaken ki ni'a che to da' gak gongak benách ka', san naken ki dan' zbekze Dios no benne' žliže'.

<sup>14</sup> ¿Bíz̄kze nnažo na'a? ¿Žon Dios da' kegle? Bi žonen'. <sup>15</sup>Dios gože' Moisés, na' wnné': "Yeyache' láže'la' no benne' žénela' yeyache' láže'la'-ne', na' we' laža'a no benne' žénela' we' laža'a-ne'." <sup>16</sup>Che len, bi žaken ki ni'a che da' ženegekle benách ka', o dan' žon byene to benne', san naken dan' ženekzele Dios, Bennen' žeyache' láže'le' benách ka'. <sup>17</sup>Kan nak da' ni nyejw le'e yiche la'y kan Dios gože' Benne' Faraón, katen' wnné': "Che len bzoa' le' gan znnna bi'o nich wloe'ela' law yela' wak zen chia' ni'a chio' le', na' gona' ga gónbia'gak benách ka' nníta'gake' dot yežlyó da' nakkza' neda'." <sup>18</sup>Ki naken, Dios žeyache' láže'le' no benne' ženekzele', na' lezka' žone' zižje yichj lázdo'w no benne' ženele' gone' zižje yichj lázda'we', kan bene' che Benne' Faraón na'.

<sup>19</sup>Na'a ye'le neda': "Cha' ki naken, biž chen' žesbaga' Dios benách ka' zia? ¿Nožkze benne' gak wsejwe' xnez Dios nich bi gone' da' ženekzele' Le?" <sup>20</sup>Bi naken ki. ¿Nožkze le' znnio' che Dios? ¿Wak to yeso' da' naken yo yen' benne' wen že'e, na' nnan: "¿Biž chen' beno' neda' ki?" <sup>21</sup>¿Bi nzi' lo na' benne' wen že'e gone' che gona' na' to yeso' da' wkonižon žin ga nla' law, na' che la' gona' na'ze gone' yetó yeso' da' wkonižon žin ga bi nla' law?

<sup>22</sup>Gónekzele Dios wloe'ele' law kan wsaka' zi'e no benne' wen da' kegle, na' gone' ga gak bia' yela'

wak zen chie', san lo yela' zbez zen laže' chie' bzoele' benne' ka' žala' choge' chégake' gátgake', benne' ka' zej nbage'e zia, da' žon byenen wžia yi'e légake'. <sup>23</sup>Ki ben Dios nich gak bia' záka'le' yela' baní' chie', dan' zloe'ele' law lawgak benne' ka' žeyache' láže'le', benne' ka' bzoe' chégake' zga'ale sóagake' lo yela' baní' chien'. <sup>24</sup>Dios bliže' benách ki. Kégeze bliže' neto', benne' judío ka', san lezka' bliže' benách zi'to' ka'. <sup>25</sup>Kan nak da' ni nyejw le'e yiche la'y da' bchalj Oseas lo wláz Dios, katen' wnné':

Benne' ka' bi zej nake' benách chia' ka', go'a lágake': "Benách chia' ka'." Na' benne' ka' bi bži'ilá', go'a lágake': "Benne' ka' nži'ilá'."

<sup>26</sup>La' na'ze gan wnníta' kan nak chégake':

"Bi nakle benách chia' ka'" go'a lágake': "Zí'nkze Dios ban."

<sup>27</sup>Na'a, kan nak chegak za'só Israel ka', Isaías wnné':

La'kze yangak za'só Israel ka', na' nníta'gake' kan že' yox žoa'a to yego zen, nbábzegake' yelágake'.

<sup>28</sup>Xanžo Dios la' gontie' ga la' lawte

da' bchoge' chegak benách ka' nníta'gake' yežlyó nga.

<sup>29</sup>Lezka' Isaías na' bchalje' zga'ale, na' wnné':

Xanžo Dios, Bennen' nape' dot yela' wnná bia', chela' bi bka'ne' chežo za'sóžo ka',

ga'nžo kan zej nak yež Sodoma, na' yež Gomorra, yež ka' bchinnj Dios.

**Benách Israel ka', na' diža' chawe'**

**30** ¿Bizkze nnažo na'a? Benne' ka' bi jez nbabe' Israel, na' bi be' láže'gake' yeyákgake' chawe' law Dios, ba beyákgake' chawe' lawe' Le', san beyákgake' chawe' lawe' Le' dan' žejlē'gake' chie'. **31** Na'a, la'kze be' láže'gak benne' Israel ka' góngake' kan znna xtiža' Dios, da' žala' gonen ga gákgake' chawe' lawe' Le', bi gota' chégake' da' žala' gata' chégake' dan' žóngake' kan znna xtiže'e. **32** ¿Biz chen' goken ki? Ki goken dan' bi bengaken' lo yela' žejlē' chégake' che Dios, san žakze chégake' gónegekle' góngake' kan znna xtiže'e, na' che len bchíxgekle', o wak nnažo: bejchégwgake' lo da' nzin': Yej Gan Žejchégo'gak Benách Ka'. **33** Kan nak da' ni nyejw le' yiche la'y da' znnan:

Le wia nga, wdixjwa' lo yež Sión  
to benne' byo,  
bennen' gake' ka to yej gan  
chejchégo'gak benách ka',  
yej na' gonen ga wchíxgekle'.  
No benne' chejli'e chie' Le', bi  
yedoe'ele'.

**10** Zí'na'do' ka', da' žak laža'a,  
na' da' znnabla' Dios gone'  
chegak benách Israel ka', naken  
gone' ga yelágake'. **2** Zzoa lia'  
chégake', dot láže'gake' že' láže'gake'  
Dios, san kege len yela' žejn' il  
li laže'. **3** Bi nnézgekle' kan žon  
Dios, žonze' ga nakžo chawe' lawe' Le',  
san ženegekle' gon kwíngake'  
chawe' law Dios žakze chégake', na'  
bi nníta'gake' gaxjw laže' law Dios  
nich gak gone' Le' lágake' chawe'  
lawe' Le'. **4** Beyóz ben Benne' Criston'  
da' ženele gon da' bchi'le Moisés

gonžo. Ben benne' Criston' ga gak  
yeyakgak yógo'te benách ka' chawe'  
law Dios, benne' ka' chejlé'gake'  
chie' Le'.

**5** Kan nak che no benne' cha'  
yeyake' chawe' law Dios dan' žone'  
kan znna xtiža' Dios, bzoj Moisés  
da' znnan ki: "Bennen' gone' dot  
kan znna xtiže'e, soe' nbane' dan'  
žone' ki." **6** Na'a, kan nak che no  
benne' yeyake' chawe' law Dios dan'  
žejli'e chie' Le', znnan ki: "Bi nno'  
lo yichj lazdo'o, bi nno': ¿Nozkze  
benne' kwene' ya'abá che Dios? (dan'  
naken: nich gone' ga yetj Benne'  
Criston'), **7** na' bi nno': ¿Nozkze  
benne' yetje' gan de latje che  
benne' gat ka'? (dan' naken, nich  
gone' ga kwen Benne' Criston', na'  
yežoje' lo yela' got)." **8** Na'a, ¿bizkze  
znnan? Ki znnan: "Gawze gan zo'  
zoakze xtiža' Dios. Lo žo'o, na' lo  
yichj lazdo'o zoa xtiže'e na'." Da' ni  
naken diža' che da' žejle'žo che Dios  
dan' zchaljton', na' znnato': **9** "Cha'  
da' znnō' nak bian' Jesusen' nake'  
Xano', na' cha' žejli'o dot lažo'o  
Dios besbane' Le' lo yela' got, yeló'  
le'." **10** Lo yichj lazdo'žo žejle'žo che  
Jesusen' nich yeyakžo chawe', na'  
ni'a che da' zchaljžo, zloe'elžo dan'  
nak Jesusen', Benne' Criston', chežo  
nich yelažo.

**11** Nyejw le'e yiche la'y da' znnan:  
"Bi yedoé'gekle yógo'te benne'  
ka' žejlē'gake' chie' Le'." **12** Dios,  
tlebe kan že' laže' benne' judío  
ka', na' benne' zi'to' ka', benne'  
ka' nníta'gake' dot yežlyó nga,  
dan' Xanžo na'kze nake' Xangak  
yógo'tegake', na' nápli'e bi da'  
wnežjwe' chegak yógo'te benne'  
ka' znnábgekle' Le'. **13** Kan nak da'

ni nyejw le'e yiche la'y da' znnan: "Yelagak yógo'te benne' ka' wlížgake' La Xanžon!" <sup>14</sup> ¿Nakx gak wlížgake' Le' cha' bi žejlé'gake' chie' Le'? ¿Nakx gak chejlé'gake' chie' Le' cha' batkle béngekle' kan nak chie'? ¿Nakx gak yéngekle' chie' cha' bi zoa no benne' wzenle' légake' xtiže'e? <sup>15</sup> ¿Nakxkze gak wzéngekle' xtiže'e cha' bi sela' no benne' légake'? Kan nak da' ni nyejw le'e yiche da' znnan: "Ba nez zen gaken chegak benne' ka' žingak benne' ka' gan nnít'a'gake', benne' ka' zcháljgake' da' zka'n ū yichj lázdožo." Ki znnna diža' chawe' che Benne' Criston'.

<sup>16</sup> Na'a, kege yógo'tegake' wzí' lo ná'gake' diža' chawen'. Kan nak da' ni, Isaías wnné: "Xan, ¿nozkze benne' bejli'e da' bchaljton?"

<sup>17</sup> Ki naken, benne' ka' yéngekle' chejlé'gake' chie' Le', na' dan' žala' yéngeklen' naken xtiža' Benne' Criston'.

<sup>18</sup> Na'a znnia: "¿Bi béngeklen'?" Da' li béngeklen', kan nyejw le'e yiche la'y da' znnan:

Benle chí'igake' dot yežlyó nga.

Yógo'te latje bžingak xtiža'gake'.

<sup>19</sup> Lezka' znnaba: "¿Bi gókbe'gekle benne' Israel ka' da' ni?" Da' li gókbe'geklen'. Gan wzó law, bchalj Moisés lo wláz Dios, na' wnné:

Gonkza' ga gé'elele le'e,  
dan' ū'ila' benach ka' bizej  
nbáblene' le'e.

Ni'a chegak benach ka' bi  
žejn'i'gekle' gona' ga ža'ale.

<sup>20</sup> Wdé na' Isaías na' gókli'e benne' wechógo laže', na' bchalje' lo wláz Dios, na' wnné:

Benne' ka', benne' bi bdílgake'  
neda', bžélgake' neda'.

Blo'e lawa' lawgak benne' ka' bi  
be wnnábgekle' neda'.

<sup>21</sup> Na'a, kan nak chegak benne' Israel ka', bchalj Isaías na' lo wláz Dios, na' wnné: "Tža tža bli na'a, na' bliža' benach ka' bi žóngake' kan znnna xtiža'a, na' zzóagake' neda' chel'a'ale."

No benne' ka' yelágake'  
ladjw benach Israel ka'

**11** Na'a znnaba: ¿Bebéj yichj Dios benach Israel ka' to chi'ize? Bi naken ki. Nedkza' naka' benne' Israel. Naka' za'só Bran, na' nbaba' ljež Benjamín ka', zi'nkze Israel na'. <sup>2</sup>Dios bi bebéj yichje' benach chie' ka', benne' ka' wžekze Le' ū ni'te nich gákgake' che Leze. <sup>3</sup>Bi nnézlele dan' nyejw le'e yiche la'y kan ben Lías, bennen' bchalje' lo wláz Dios? Bliže' Dios, na' besbage'e benach Israel ka' zia, na' wnné: <sup>3</sup>"Xan, ba bétgake' benne' ka' bcháljgake' lo wlazo' Le', na' bchínnjgake' bkog la'y chio' ka' gan bzeyto' bia beždo' ka' lawo' Le'. Toza' neda' nga'na' chio', na' žénegekle' gótgake' neda'." <sup>4</sup>Na'a, žbiž bechebe Dios? Ki wnné: "Žape chia' chonnlalj chi gaywá' benne' chia' ka', benne' ka' bi zhoa zíbgake' lawgak lo'a ka' zej nzin' Baal."

<sup>5</sup> Lezka' naken ū ni zoažo na'a, zej nga'n bale benne' Israel ka', benne' ka' wžekze Dios nich gákgake' chie' Le'. Le' žape chí'ikze' légake'. <sup>6</sup>Cha' naken da' žonze' Le' ni'a chégake', bi naken ni'a che to da' gak góngake'. Chela' goken ni'a che to da' gak gonžo, dan' žonze Dios ni'a chežo biž gaken to da' žonze' ni'a chežo.

<sup>7</sup> ¿Bízke nnažo na'a? Bi wži'gak benne' Israel ka' dan' bdílgake', san

ba wzí'gaken benne' ka' wžekze  
Dios nich gákagake' chie' Le', na'  
yezíka'že' ka', Dios bene' zižje yichj  
lázdo'gake'. <sup>8</sup>Kan nak da' ni nyejw  
le'e yiche la'y da' znnan: "Dios bene'  
ga zej nake' chol laže'." Ki bene', na'  
la'kze gak le'egakle' da' žone' Le', na'  
yéngakle' xtiže'e, bi žejn'igakle'. Ki  
naken chégake' na' zejte ža ni zoažo  
na'a. <sup>9</sup>Kan nak da' ni lezka' bchalj  
Dabí, katen' wnné:

Lni ka' chégake' yeyákgaken da'  
séngaken légake',  
na' ka to do yelj gan chéjgake'.  
Lezka' góngaken ga chíxgakle',  
na' Dios wsaka' zí'e légake'.  
<sup>10</sup>Cholgak yej láwgake', nich bi  
le'egakle',  
na' to chi'ize yéchwgake' nich  
wá'gake' ywa'.

#### Kan gak yelagak benách ka' bi zej nake' benne' judío

<sup>11</sup>Na'a znnia': ¿Bchíxgakle benne'  
judío ka' ga bzinté wnítgakle' to  
chi'ize? Bi goken ki, san bzóagake'  
xtiža' Dios chela'ale, na' na'a Dios  
žoe'e latje yelagak benne' ka' bi zej  
nake' benne' judío nich gone' ga  
gé'egakle benne' judío ka' légake'.  
<sup>12</sup>Dan' bengak benne' judío ka',  
bchíxgakle', benen ga bžin da'  
naken ka to yela' wnni'a zen chegak  
benách ka' nníta'gake' yežlyó  
nga. Cha' ki goken, gota' to yela'  
wnni'a zen chegak benne' ka' bi zej  
nake' benne' judío dan' wnítgakle'  
benne' judío ka', na' da' zénle'eže  
gata' chegak benách ka' nníta'gake'  
yežlyó nga kate' yeyakgak benne'  
judío ka' che Dios.

<sup>13</sup>Na'a žapa' le'e, benne' ka' bi  
nakle benne' judío, znnia': dan'

naka' wbás bselá' Dios nich wzenla'  
benne' ka' bi zej nake' benne' judío  
ka' xtiže'e, zkónle'ela' žin dan' nzi' lo  
na'a, <sup>14</sup>nich gak gona' ga gé'egakle  
benne' wláz chia' ka' le'e, na' nich  
gona' ga yelágake' bale'. <sup>15</sup>Cha'gota'  
latje chegak benách ka' nníta'gake'  
dot yežlyó nga yeyákgake' che  
Dios dan' wnítgakle benne' judío  
ka' latje chégake', na' da' zénle'eže  
gata' chegak benách ka', kate'  
benne' judío ka' yeyákgake' lo latje  
chégakkze' na'. Gaken kan žak kate'  
žebangak benne' gat ka'. <sup>16</sup>Cha'  
znézjwžo che Dios kwa nildó' da'  
žebejžon néžwle, lezka' kwa dan'  
nga'nen naken che Leze', na' cha'  
nnažo nak che Dios lwe yag, lezka'  
ni'a nen zej naken che Leze'.

<sup>17</sup>Zej nak bałe benne' judío ka' ka  
ni'a na' to yag olibo chawé' da' ka'  
zej nžogen, na' le'e, ka ni'a na' to  
yag olibo yixé', bejda'le yag olibo  
chawen', na' beyazle lo latje chegak  
benne' ka' wzóggake', na' zzi'le  
da' žonn lwen, na' xis yag olibo  
chawen'. <sup>18</sup>Che len, bi wká'n zen  
kwinle, bi wzoale chela'ale benne'  
ka' zej nake' ka ni'a nen ka', da'  
zej nžogen. Cha' zka'n zen kwinle,  
žala' nnézlele kege le'e zwawle lwe  
yagen', san lwe yagen' zwawn le'e.

<sup>19</sup>Wak nno': "Wžoggak ni'a na'  
yagen' nich gak chaza' neda' lo  
latje chégaken." <sup>20</sup>Da' znnó' naken  
dot da' li, san wzóggake' dan' bi  
bejlé'gake' che Dios, na' bejdó' le'  
yagen' dan' želj'i'o che Dios. Che len,  
bi žala' wká'n zen kwino', san žala'  
žebo' Dios. <sup>21</sup>Cha' bsaka' zí'i Dios  
benne' ka', benne' ka' zej nakkze'  
ni'a na' yag chawen', lezka' wsaka'  
zi'e le'. <sup>22</sup>Na'a, bwia nga kan nak

Dios ži'i laže', na' lezka' kan ūsaka' zí'li'e no benne'. Da' li ūsaka' zí'li'e benne' ka' bchígakle', san nake' ži'i laže' len le'. Che len, žala' góntezo' da' naken tłebe len yela' ži'i laže' chie' na', nich bi choge' lezka' le' lo yag chien'. <sup>23</sup>Lezka' gaken chégake' cha' bi gá'ngake' lo yela' bi žejlé' chégake', na' chejtá'gake' da' yoble lo yagen', dan' nap Dios yela' wak gone' ga chejtá'gaken' da' yoble. <sup>24</sup>Nako' le' ka ni'a na' yag olibo yixe' da' bchogen', na' bejtó'o yag olibo chawen' gan nitó benne' wdé' ni'a na' to yag yixe'. Bi gakže zede chegak benne' ka'zej nakkze' ka ni'a na' yag chawen', chejtá'gake' da' yoble lo yag chégakkzen'.

### Kan gak yelagak benách Israel ka'

<sup>25</sup>Zí'na'do' ka', žénela' nnézlele da' ni da' bgachen', nich bi wká'n zen kwinle ni'a che yela' žejni'il chele. Bałe benne' Israel ka' beyákgake' zižje laže', na' ki gákgake' ga žinže ža yógo'te benách ka', benne' bizej nake' benne' judío ka', benne' ka' žala' yélágake', bazej nbabe' gan ūnna bia' Dios. <sup>26</sup>Te na' gata' latje yelagak yógo'te benne' Israel ka', kan nyejw le'e yiche la'y, da' ūnnan:

Žoj Benne' Weslá lo yež Sión, na' yeké'e da' kegle da' bengak za'só Jakob ka'.

<sup>27</sup>Da' ni naken diža' žag da' gónlena' légake' katen' yeká'a dola' da'zej nbage'e.

<sup>28</sup>Ki naken, bzóagake' diža' žag da' ben Dios chela'ale, na' Dios wléj yichje' légake' nich gak yelale le'e, san lezka' nži'il Dios légake', dan' wžekze' Le' xa xtó'gake' ka'. <sup>29</sup>To

chi'ize znezjw Dios da' znezjwe', na' to chi'ize zbie' benách ka'. <sup>30</sup>Kan nak chele, zga'ale bi benle kan ūnna xtiža' Dios, na' na'a Dios žeyache' láže'le' le'e dan' bi bengak benne' judío ka' kan wnnakze' Le'. <sup>31</sup>Lezka' žaken chégake' na'a, bi žóngake' kan wnná Dios, san ki gakzen na' zejte Dios yeyache' láže'le' légake', kan žeyache' láže'le' le'e na'a. <sup>32</sup>Dios wléj yichje' yógo'te benách ka' bzóagake' xtiže'e chela'ale, nich gak yeyache' láže'le' yógo'tegake'.

<sup>33</sup>Zenle'e nak yela' wnni'a che Dios, dan' naken yela' wak zen chie', na' yela' žejni'il chie'. Bi gak nitó benne' chejnii'ile' da' bzoa Dios gone', na' bi gak no benne' nnezel'e' da' ka' žon Dios. <sup>34</sup>¿Nozkze benne' žejni'ile' da' zza' laže' Xanžon'? ¿Nozkze benne' gak wzejni'ile' Le'? <sup>35</sup>¿Nozkze benne' zoa da' bnežjwe' che Dios nich gon byenen bi da' yebí'i Dios chie'? <sup>36</sup>Yógo'te da'zej denzej nžojen lo na' Dios, na'zej nnitan' ni'a chie' Le', na'zej nnitan' nich yebélenle' Le' légaken. iGa'n zen Dios to chi'ize! Ka'kze gaken.

### Žala' wdé kwinžo lo na' Dios

**12** Zí'na'do' ka'. Dios žeyache' láže'le' žo'o. Che len žáta'yoela' le'e wdé kwinle lo na' Dios, na' gakle ka to da'nak ban da' zdežo law Dios, nich gakle che Leze', dan' naken to da' žaz laže' Dios. Da' ni žala' gonle, da' naken tłebe len da' ūkán zenžo Dios. <sup>2</sup>Biž gonle tłebe kan žongak benách ka' nnít'a'gake' ža ni zoažo na'a, san le gak benách kobe ka' dan' ba bkob Dios yichj lázdo'le. Le gon ki nich gak nnézlele da' chawe' da' žénele

Dios gonle, dan' žaz laže'e Le', na'  
da' naken dot li laže'.  
 ³ Na'a, dan' zoa da' bde Dios lo  
na'a, žapa' yógo'tele: bi wká'n zen  
kwinle, da' bi žala' gonle, san žala'  
gakle gaxjw laže' kan zza' láže'le, na'  
kan nak yela' žejlé' chele da' benn  
Dios che chele. ⁴ Kan nak toze beła'  
žen chežo, la'kze da' zan da' ka' jez  
dan', na' kege toze žin žon to to  
da' ka', ⁵ lezka' naken chežo. La'kze  
benne' zan nakžo, nakžo ka toze  
beła' žen dan' nžagžo žo'o Benne'  
Criston', na' che len yógo'težo nakžo  
toze tožo len yetožo.

⁶ To tožo nzi' lo na'žo to da' benn  
Dios chežo, na' nža' to ton kan nak  
da' benne' che chežo.

No benne' Dios bnezjwe' chie'  
wchalje' lo wlaze' Le', len yela'  
žejlé' chie', žala' wchalje'.

⁷ No benne' Dios bnezjwe' chie'  
gone' xchine', cháwe'do' žala'  
gonen'.

No benne' Dios bnezjwe' chie'  
wsedle' benách ka', cháwe'do'  
žala' wsedle' légake'.

⁸ No benne' Dios bnezjwe' chie'  
wzejni'ile' benách ka', na'  
cháwe'do' žala' wzejni'ile'  
légake'.

No benne' bi da' wnezjwe' che  
no benne' yoble, dot laže'e  
žala' wnezjwen'.

No benne' znna bi'e benách  
ka', lo yela' gaxjw laže' žala'  
gonen'.

No benne' žákłene' lježe' ka', len  
yela' žebél žala' gonen'.

**Kan žala' gon no benne'  
nake' toze len Jesús**

⁹ Žala' ží'ilele lježle ka' dot láže'le.

Le wzóa da' kegle cheła'ale.  
Le we' laže' gonle da' naken  
chawe'.  
 ¹⁰ Le ži'il lježle ka' kan nži'il  
kwinkzle.  
Kan žaple ba la'ne lježle žala'  
gonle ga gakže' benne' blo.  
 ¹¹ Le gon chóchteze láže'le, na' bi  
wedle.  
Le gon xchin Xanžon' dot láže'le.  
 ¹² Le yebél dan' zoa da' ž xen  
láže'le.  
Le kwez zen laže' kate' bi  
zzákale.  
Le wcháljlenteze Dios.  
 ¹³ Le wnežjw benách ka' che  
Jesusen' da' žiážjegekle'.  
Le we' gan chejnnítá'gak benne'  
ka' zlá'gake' ližle.  
 ¹⁴ Le nnable Dios gon chawe'e  
benne' ka' zbia láže'gake' le'e.  
Le nnab gak chawe' chégake', na'  
bi wžiale légake' zia.  
 ¹⁵ Le yebél tzen len benne' ka'  
žebégekle'.  
Le kwéželen benne' ka'  
žbéžegake'.  
 ¹⁶ Le gak toze len lježle ka'.  
Bi wká'n zen kwinle, san le  
gonlen tzen benne' gaxjw laže'  
ka'.  
Bi gekle ba naple dot yela'  
žejní'il.  
 ¹⁷ Bi yebí'ile che nitó benne', bi  
gonle da' zia che no benne'  
žone' chele da' zia.  
Le gon da' nak chawe' chegak  
yógo'te benách.  
 ¹⁸ Cha' sáke'le, le kwez chawe' len  
yógo'te benách.  
 ¹⁹ Zí'na'do' ka', bi yezi'le wzón  
benách ka' la' le'eze, san le we' latje  
yebí'i Dios chegak benne' ka', dan'

nyejw le'e yiche la'y da' znnan: "Nedkza' yezi'a wzón. Neda' yebi'a chegak benách ka'." Ki wnná Xanžo Dios. <sup>20</sup>Lezka' znnan: "Cha' zoa no benne' bi zle'ele' le' chawe', na' cha' zdone', bnezw da' gawe'. Cha' zbiile'nis, bnezw da' ye'je'." Kate' gono'ki, gono' ga yedoé'el bennen!. <sup>21</sup>Bi go'o latje nna bia' da' kegle le', san wnná bia' da' keglen', wkonlo' žin da' naken chawe'.

**13** Yógo'tele žala' gonle kan znnagak benne' yolawe' ka'. Dios bdekze' lo ná'gake' yela' wnná bia' da'zej nzi'e, na' wak nnažo bnníta'kze' Lé' benne' ka' lo latje chégake'. <sup>2</sup>Che len, no benne' zzoe' no benne' yolawe' chela'ale, zzoe' chela'ale to da' bzoa Dios, na' benne' ka' žongake' ki, choge' chégake' kwia yí'gake'. <sup>3</sup>Zej nnita' benne' yolawe' ka', kege nich wchébegake' no benne' žone' da' naken chawe', san nich wchébegake' no benne' žone' da' zinnj. Cha' ženelo' gono' ga bi wchébegake' le', ben da' naken chawe', na' yežojo' chawe' gan zchi'a láže'gake'. <sup>4</sup>Benne' yolawen' nake' ni'a na' Dios nich gáklene' le', san cha' žono' da' zinnj, na' žala' žebo', dan' bi noe'e dáche'ze bar che yolawe'. Nake' ni'a na' Dios nich yebi'e da' žeyala' no benne' žone' da' zinnj. <sup>5</sup>Che len žon byenen gonle kan znnna bennen' nzi' lo ne'e yela' wnná bia', kägeze dan' bde Dios lo ne'e wsaka' zi'e le'e, san lezka' nich kwe' ži' yichj lázdo'le law Dios. <sup>6</sup>Che len žizjwle lazle che yolawe', dan'zej nak benne' yolawe' ka' ni'a na' Dios, na' žongake' da' bdie' Le' lo ná'gake'.

<sup>7</sup>Le chizjw yógo'te benne' ka' da' nbága'le chégake'. Le chizjw lazle lo na' no benne' žala' wchizjwe' lazle. Le chizjw mežw no benne' žala' chízjwlen. Le žebe no benne' žala' žébele, na' le gape ba la'ne no benne' žala' gapple le' ba la'ne. <sup>8</sup>Bi be žala' bága'le che nitó benne', san toze žala' ží'ilele lježle ka', da' nbága'le chegak yógo'te benách ka', dan' no benne' nži'ile' lježe' ba bene' dot da' znnna xtiža' Dios. <sup>9</sup>Ki znnna xtiže'e:

Bi gono' dola' da' zka'n ditjen yela' zchag na'.  
Bi goto' benách ka'.  
Bi kwano'.  
Bi mnio' che lježo' da' wen laže'.  
Bi dan lažo'o da' de che lježo'.

Da' wnné' ki, na' yógo'te da' yezika' da' wnné', yeyóz gon no benne' žone' kan znnna da' znnan ki: "Bži'il lježo' kan nži'il kwino'." <sup>10</sup>Bennen' nži'ile' lježe' bi be žone' che lježe' da' kegle. Ki naken, bennen' nži'ile' lježe' žone' dot da' znnna xtiža' Dios.

<sup>11</sup>Le gon ki dan' nnézlele kan žak ža ni zoažo na'a, na' lezka' nnézlele ba bžin ža žala' gakle ban laže' kan žebán no benne' ztase', dan' ba zoaže gawze ža yelažo lo da' kegle ka goken katen' wzó lawžo žejležo che Benne' Criston'. <sup>12</sup>Gan zoažo na'a naken ka yele, na' za' te yelen', na' gan zoa Benne' Criston' naken ka te ža, na' za' chejsoažo ga na'. Che len žala' kwáslenžo da' žongak benách ka' gan nak chol. Kan žon to benne' žeje' lo wdile, zwakw kwine' da' žape chi'in le' lo wdile, lezka' žala' tažo lo baní' che Dios, dan' gape chi'in žo'o nich bi cho'ožo lo na' da' xiwe'. <sup>13</sup>Nich gonžo ki žala'

gonžo da' chawe' kan žala' gon no benne' zde' te ža.

Bi žala' sožlžo, na' bi gáwle'ežo.

Bi žala' gonžo da' kegle, na' kege da' gon ditjen žo'o.

Bi žala' tíl-lénžo lježžo ka', na' bi gé'elžo légake'.

<sup>14</sup>Na'a, žala' yeyón kwinle lo yichj lázdo'le kan nak Xanžo Jesús, Benne' Criston', na' bi we' láže'le gonle da' zdan láže'le lo yela' benachze chele.

Bi žala' nnežo chegak lježžo ka'

**14** Le we' latje no benne' góñlene' le'e tzen, benne' žeji'e che Benne' Criston', la'kze bi nak dot li láže' kan žeji'e chie' Le'. Bi tíl-lénle-ne' kan nak da' žéklele le'e žala' gone'. <sup>2</sup>Kan nak da' ni, zej nnita' benne' ka' žékgekle' wak gáwgake' bíte'teze da' žawgak benách ka', san yebale benne', benne' ka' bi nak dot li láže' kan žejlé'gake' che Benne' Criston', žáwgake' toze da' žazžo. <sup>3</sup>Na'a, bennen' žawe' yógo'te bi žala' wzóe' chela'ale no benne' bi žawe' yógo'te, na' lezka', bennen' bi žawe' yógo'te bi žala' nnie' che bennen' žawe' yógo'te, dan' nzi' lo na' Dios bežope benne' ka' žejlé'gake' che Benne' Criston'. <sup>4</sup>¿Nozkze le', znnio' che benne' wen žin che benne' yoble? Law Xankze yežój chawe' o bi yežój chawe' no bennen' nake' wen žin che Dios. Yežoje' chawe' law Dios, dan' gonkze Xanžo Dios ga yežoje' chawe'.

<sup>5</sup>Zoalja to benne' zka'n zenže' to ža ka zka'n zene' yezika' ža ka', na' benne' yoble, toze kan zka'n zene' yógo'te ža. To tožo žala' wíazo cha'

nak chawe' da' žonžo. <sup>6</sup>Bennen' zka'n zene' to ža, zka'n zenen' nich wká'n zene' Xanžon', na' bennen' bi zka'n zene' ža na', nich wká'n zene' Xanžon' bi zka'n zenen'. Lezka', bennen' žawe' yógo'te, žawe' ki nich wká'n zene' Xanžon', dan' ži'e Dios: "Žóxkeno" na' bennen' bi žawe' yógo'te, bi žawen' nich wká'n zene' Xanžon', na' lezka' ži'e Dios: "Žóxkeno".

<sup>7</sup>Nitó benne' ládjwžo žo'o bi nak bane' cheze', na' nitó benne' bi žate' cheze'. <sup>8</sup>Cha' zoažo nbanžo, nich ga'n zen Xanžon' zoažo nbanžo, na' cha' gatžo, nich ga'n zen Xanžon' gatžo. Ki naken, cha' zoažo nbanžo o cha' gatžo, nakžo che Xanžon'.

<sup>9</sup>Lezka' che len got Benne' Criston', na' bebane', nich gake' Xangak benne' gat ka', na' Xangak benne' ban ka'.

<sup>10</sup>Na'a le', ¿biz chen' znnio' che lježžo? ¿Biz chen' zzo' lježon' chela'ale? Žon byenen la'žo yógo'težo law Benne' Criston' gan wchi'a láže'e žo'o. <sup>11</sup>Kan nak da' ni nyejw le'e yiche la'y da' znnan:

Znna Xanžo: "Ni'a chia' nedkza', wzóa zibgak yógo'te benách ka' lawa' neda'.

Nnágake' kwáselo naka' Dios."

<sup>12</sup>Ki naken, Dios wchi'a láže'e yógo'težo.

Bi žala' gonžo da' gonen ga chíxgekle lježžo ka'

<sup>13</sup>Che len, biž žala' nnežo che lježžo ka', san žala' we' láže'žo bi gonžo bi da' gonen ga chíxgekle', o bi da' gonen ga góngake' dola'.

<sup>14</sup>Nnézkzela' bi be zoa da' žawžon da' gak gonen ga biž nakžo chawe'

law Dios, na' da' bchalj Xanžo Jesusen' naken t<sup>le</sup>be len da' ni. Cha' žekle no benne' zoa bi da' gak gonen ga biž nake' chawe' law Dios, che bennen', naken ki. <sup>15</sup> Cha' žono' le' ga gak lježo' nyache' laže'e, dan' žawo' le' da' žekle' le' bi žala' gawžon, bi žono' kan žala' gon no benne' nži'ile' lježe'. Bi be žala' gawžo da' gonen ga gak chope laže' no benne', bennen' got Benne' Criston' ni'a chie'. <sup>16</sup> Che len, bi be gonle da' gonen ga nne zi'gak benách ka' che da' žeklele le'e nzi'ile latje gonlen. <sup>17</sup> Kate' znna bia' Dios žo'o, bi že' láže'žo da' ye'j gawžo, san že' láže'žo gakžo chawe' lawe' Le', na' ga'n ži yichj lázdo'žo, na' yebelžo, da' ka' gak gonžo dan' zoalen Dios Be' La'y žo'o. <sup>18</sup> No benne' žone' xchin Benne' Criston' kanzej nak da' ki, žone' da' žaz laže' Dios, na' yežoje' chawe' lawgak benách ka'.

<sup>19</sup> Che len žala' gonžo chegak benách ka' da' góngaken ga gata' da' wká'n ži yichj lázdo'žo, na' da' gon chochen lázdo'žo kan žejle'žo che Benne' Criston'. <sup>20</sup> Bi be žala' gawžo da' gonen ga gak chope laže' bennen' bzoa Dios le'. Nak dot da' li dan' znnagak benách ka': "Yógo'te de latje gawžon" san gonžo da' kegle cha' gonžo ga chixle lježo ni'a che da' žawžo. <sup>21</sup> Gakže chawe' cha' bi gawo' bela', na' bi ye'jo' xis uba, na' bi be gono' da' wchixen lježo', o da' gonen ga gak chope laže'e, o da' gonen ga biž žejli'e che Benne' Criston' dot laže'e. <sup>22</sup> Cha' žejli'o de latje bi da' gono', žala' gonon' law Dios gan zo' tozo'. Ba nez zen gaken che bennen'

bi žchebe lážda'we' le' ni'a che da' žekle' de latje gone', <sup>23</sup> san bennen' žak chope laže'e ni'a che da' žaw'e', nbage'e zia, dan' žone' da' bi žekle' de latje gone'. Cha' žonžo da' žeklžo bi žala' gonžon, zbgá'žo dola'.

žala' gonžo da' žaz láže'gak lježžo ka'

**15** Che len, cha' nakžo choch kan žejle'žo che Benne' Criston', žala' soelžo benne' ka' bi žejle'gake' chie' Le' dot láže'gake'. Bi žala' gonžo da' žaz láže'zežo žo'o. <sup>2</sup> Yógo'težo žala' gonžo da' žaz láže'gak lježžo ka' nich gak chawe' chégake', na' gak choch láže'gake' kan žejle'gake' che Benne' Criston'. <sup>3</sup> Ki žala' gonžo, dan' bi ben Benne' Criston' da' wyáz láže'ze', san gok chie' kan nyejw le'e yiche la'y, da' znnan: "Bedjbága'gak neda' diža' zi' ka' da' wnnegak benne' ka', da' wnné zí'gake' chio' Le', Dios." <sup>4</sup> Yógo'te da' bzójgake' le'e yiche la'y za ni'te, bzójgaken' nich wsedlen žo'o. Dan' nyejw le'e yiche la'y žonen ga zbezžo zen laže', na' žeyón zenen žo'o. Che len zoa da' žxen láže'žo. <sup>5</sup> Znnabla' Dios, Bennen' žone' ga zbezžo zen laže', na' žeyón zene' žo'o, gone' ga gakle toze kan žonle le'e, na' gakle kan Jesús, Benne' Criston', žénele' gakle. <sup>6</sup> Ki žala' gonle nich gakle toze, na' tzen wká'n zenle Dios, Xa Xanžo Jesusen'. <sup>7</sup> Che len, nich ga'n zen Dios, le si' lo na'le tole yetole kan Benne' Criston' wzí' lo ne'e žo'o. <sup>8</sup> Ki žala' gonle, dan' žapa' le'e: blá' Jesús, Benne' Criston', na' góklene' benne' judío ka' nich bloe'ele' law nak dot da' li da' zchalj Dios, na' bene' ga bžin da' bchebe laže'e wnežjwe' chegak xa wdé che'to' ka'.

**Benách zi'to' ka' yéngakle'  
diža' chawe'**

**9**Lezka' bla' Benne' Criston' nich bene' ga benne' ka' bi jez nake' benne' judío yéngakle' xtiža' Dios dan' ſeyache' láže'le' légake'. Kan nak da' ni nyejw le'e yiche la'y da' znnan:

Che len, wká'n zena' da' nako'

Le',

lawgak benách ka' nnít'a'gake' dot yežlyó nga,

na' gola' da' we lawa' Le'.

**10**Ga yoble nyejw le'e yiche la'y da' znnan:

Le'e, benách ka' zoale dot yežlyó nga,

le yebél tzen len benách ka' che Dios.

**11**Ga yoble nyejw le'e yiche la'y da' znnan:

iLe wká'n zen Xanžon',  
yógo'tele bi nakle benne' judío ka'!

iLe gole da' we lawn Le',  
yógo'tele zoale dot yežlyó nga!

**12**Lezka' bzoj Isaías da' znnan:

La' law Benne' nbáblene' benne'  
ka' jez nake' za'só Isaí, xa  
Dabí.

Gak blo Bennen' nich nna bi'e  
benne' ka' bi jez nake' benne'  
judío ka'.

Benne' ki wxén láže'gake' Le'.

**13**Znnabla' Dios, Bennen' žone' ga žxen láže'žo Le', gone' ga yebéle'elele, na' ga'n ži yichj lázdo'le dan' ſejle'le chie' Le', na' gone' ga gak dot li láže' kan žxen láže'le Le', dan' zoalen yela' wak che Dios Be' La'y le'e.

**14**Zí'na'do' ka', ba nnézkzela'  
žóntezle da' ka' naken chawe', na'

náple'ele yela' ſejn' il nich gak wzejn'ilele lježle ka'. **15**Na'a naka' wechógláže', na' zzoja' chele le'e le'e yiche ni, zí'na'do' ka', na' žsa'a láže'le dan' zoa da' besbaga' Dios neda' gona' dan' nži'ile' le'e. **16**Che len žona' xchin Jesús, Benne' Criston', lawgak benách ka' bi jez nake' benne' judío ka', na' zchalja' diža' chawe' che Dios, nich gak wdía' benách ka' bi jez nake' benne' judío ka' lo na' Dios, benne' ka' wžekze Dios Be' La'y nich gákgake' che Leze'. Gákgake' ka to da' wdekza' lo na' Dios, da' chaz láže'le Le'.

**17**Na'a, dan' žónlena' tzen Jesús,

Benne' Criston', žin, nzi' lo na'a chaz láža' kan nak da' bena' lo xchin

Dios. **18**Lezka' naka' wechógláže'

wchalja' kan nak da' ben Benne' Criston' lo na'a neda', na' kege

da' bena' nedza'. Bene' ga žongak benách ka' bi jez nake' benne' judío

ka' kan zna xtiža' Dios. Da' ni

bene' Lekze', na' bkonle' žin da'  
bchalja' neda', na' žin da' bena'

neda'. **19**Lezka' bkonle' žin da' ka'  
zej nak bian' da' bloe'ele' law Le' lo

na'a neda', na' yela' wak žen ka' da'  
bene', na' yela' wak che Dios Be'

La'y da' wžoalenen neda'. Ka' goken,  
wžo lawa' zchalja' lo yež Jerusalén,

na' dot gawze na' zejte gan nbab Ilíriko, ba bchalja' diža' chawe' kan

nak che Benne' Criston'. **20**Be' láža' a  
bchalja' diža' chawen' gan bi na'

yéngakle benách ka' kan nak che Benne' Criston'. Chela' wchalja' ga

ba béngekla' benách ka', na' gona'  
neda' ka žon to benne' žone' to yo'o

law len ze'e da' ba bdixjw benne'  
yoble. **21**Ka bena' neda' naken kan

nyejw le'e yiche la'y, da' znnan:

Lé'egekle benne' ka' nníta'gake'  
gan bi benle nitó benne' kan  
nak chie' Le',  
na' chejn'i'gekle benne' ka'  
batkle béngekle' kan nak chie'.

### Žénele Pablo cheje' lo yež Roma

<sup>22</sup>Che len, la'kze zan chi'i gónela'  
yida' gan zoale, bi na' gak yida'.  
<sup>23</sup>Na'a, dan' ba beyóž bena' žin che  
Dios latje ki, na' zan yiz ba ženela'  
yida' gan zoale, <sup>24</sup>che len, kate'  
cha'a lo yežlyó Espana, tia' gan  
zoale le'e, dan' žxen laža'a yedjwía'  
le'e, na' yebélenla' le'e. Te na' gak  
yego'ole neda' nez. <sup>25</sup>Na'a žala' cha'a  
lo yež Jerusalén, nich chjwa'a to  
da' gákleneñ benne' ka' che Benne'  
Criston' nníta'gake' ga na'. <sup>26</sup>Ki  
gona' dan' wyáz láže'gak benne' ka'  
nníta'gake' gan nbab Masedonia, na'  
gan nbab Akaya, btóbgake' mežw da'  
znéjwgake' chegak benách yache'  
ka'zej nbabe' benách ka' che Benne'  
Criston', benne' ka' nníta'gake' lo yež  
Jerusalén. <sup>27</sup>Wyáz láže'gak benne'  
ka' bi zej nake' benne' judío ka',  
béngake' da' ni. Da' li naken to da'  
zej nbage'e chegak benne' judío ka'.  
Cha' zzi'gak benne' ka' bi zej nake'  
benne' judío ka' da' naken che Dios  
ni'a che da' bengak benne' judío ka',  
na' žala' gáklengake' benne' judío  
ka' len da' nápgake'. <sup>28</sup>Che len, kate'  
yeyóž wdía' dan' bnéjwgak benne'  
ki lo na'gak benne' judío ka', naž tia'  
gan zoale le'e kate' cha'a lo yežlyó  
Espana. <sup>29</sup>Kate' la'a gan zoale, žxen  
laža'a žínlena' yógo'te da' zebélenlžo  
ni'a che diža' chawe' che Benne'  
Criston'.  
<sup>30</sup>Ni'a che Xanžo Jesúš, Benne'  
Criston', na' ni'a che yela' nži'il

da' zchiz Dios Be' La'y lo yichj  
lázdo'žo, neda' žáta'yoela' le'e,  
zí'na'do' ka', nich wcháljenle Dios  
tzen len neda', na' nnáblele-ne'  
gáklene' neda'. <sup>31</sup>Le nnable' gone'  
ga yelá' neda' lo na'gak benne' ka'  
bi žejlé'gake' che Benne' Criston',  
benne' ka' nníta'gake' gan nbab  
Judea, na' gone' ga chaz láže'gak  
benne' ka' zej nake' che Benne'  
Criston', benne' ka' nníta'gake' lo  
yež Jerusalén, sí'gake' dan' chjwa'a  
ga na'. <sup>32</sup>Lezka' le nnable', cha' nak  
da' znnna Dios, wnežjwe' neda' latje  
la'a gan zoale lo yela' žebél chia',  
nich yeží' láže'lena' le'e tzen. <sup>33</sup>Na'a  
znnabla' Dios, Bennen' zka'n zie'  
yichj lázdo'žo, sóalene' yógo'tele le'e.  
Ka'kze gaken.

Benne' ka' che Jesúš žápegake'  
“Padiox” ljéžgake' ka'

**16** Le si' chawe' Febe, no'le  
zanžon' nake' toze len  
Xanžon'. Nake' no'le wen žin che  
Dios, na' nbáblene' benne' ka' che  
Benne' Criston' lo yež Sencrea. <sup>2</sup>Lo  
wláz Xanžon' le si' lo na'le no'len',  
kan žala' gongak benách ka' che  
Benne' Criston'. Le gáklene', na' le  
gonn chie' bíte'ze da' žiážjelen'.  
Lekze' góklene' benne' zan, na' lezka'  
góklene' neda'.

<sup>3</sup>Le gape “Padiox” Prisila, na'  
Akila, benne' byo chie'. Benne' ki  
bénłengake' neda' tzen žin che  
Jesúš, Benne' Criston'. <sup>4</sup>Žopte benne'  
ki wdégake' gan ben zož gátgake'  
nich bengake' ga bi gata' neda', na'  
žápegaka'-ne': “Žóxkenle” na' kege  
nedza', san lezka' yógo'te lježžo ka'  
zej nbabe' gan zej nnita' benách  
ka' che Benne' Criston', benne'

ka' bizej nake' benne' judío ka', že'gake' légake': "Zóxkenle." <sup>5</sup>Le gape "Padiox" benne' ka' che Benne' Criston', benne' ka' zdóbgake' lo ližgak Prisilan', na' Akilan'. Le gape "Padiox" Epeneto, bennen' nži'ilá. Le' bejli'e che Benne' Criston' zga'ale' ka yógo'te benne' ka' nníta'gake' gan nbab Akaya. <sup>6</sup>Le gape "Padiox" Lia, no'len' bene' žin zen che Benne' Criston' gan zdóble le'e. <sup>7</sup>Le gape "Padiox" Andróniko len Junias, benne' wláž chia' ka'. Benne' ki byéjwłengake' neda' tzen liž ya, na' benne' wbás ka' bsela' Benne' Criston' žápegake' légake' ba la'ne. Lezka' bejlé'gake' che Benne' Criston' zgá'alegake' ka neda'.

<sup>8</sup>Le gape "Padiox" Amplias, bennen' nži'ilá dan' nake' che Xanžon'. <sup>9</sup>Le gape "Padiox" Urbano, bennen' bénlene' neto' tzen žin che Jesús, Benne' Criston'. Lezka' le gape "Padiox" Estakis, bennen' nži'ilá. <sup>10</sup>Le gape "Padiox" Apeles, bennen' nak bia' žejli'e che Benne' Criston'. Lezka' le gape "Padiox" benne' ka' nníta'gake' liž Aristóbulo. <sup>11</sup>Le gape "Padiox" Herodión, benne' wláž chia'. Lezka' le gape "Padiox" benne' ka' nníta'gake' liž Narsiso, na' žejlégake' che Xanžon'. <sup>12</sup>Le gape "Padiox" Trifena len Trifosa, no'le ka' žóngake' žin che Xanžon'. Lezka' le gape "Padiox" Pérsida, no'len' bene' žin zen che Xanžon', na' nži'ilžo-ne'. <sup>13</sup>Le gape "Padiox" Rufo, benne' wžekze Xanžon'. Lezka' le gape "Padiox" xna' Rufo na', no'len' nake' ka xna'kza' neda'. <sup>14</sup>Lezka' le gape "Padiox" Asíncrito, na' Flegonte, na' Hermas, na' Patrobas, na' Hermes, na' lezka' lježo ka'zej nake' toze

len Xanžon', na' nníta'lengake' benne' ka'. <sup>15</sup>Lezka' le gape "Padiox" Filólogo len Julia, na' Neroe len no'le zane', na' lezka' Olimpas, na' yógo'te lježo ka' žejlégake' che Benne' Criston', na' nníta'lengake' benne' ka'.

<sup>16</sup>Le gape "Padiox" lježle ka', na' le chela' lježle ka' lo yela' nži'il chele. Yógo'te lježo ka', benne' nníta'gake' nga, na' zej nbábłene' benách ka' che Benne' Criston', žápegake' le'e "Padiox".

<sup>17</sup>Na'a, žáta'yoela' le'e, zí'na'do' ka', le gon ga gak bia'gak benne' ka' žóngake' ga žoj chóplele, na' zchíxgake' le'e, dan' žsédgekle' da' bi naken tlebe len da' nsedle le'e. Le kwas gan zej nnita' benách ki, <sup>18</sup>dan' bi žóngake' xchin Jesús, Benne' Criston'. Žóngake' žin nich gata' yela' wnni'a chégake', na' žon láže'gekle' benne' gaxjw láže' ka', zkóngekle' žin diža' gaxjw láže' ka', na' diža' chejle'žo da' wen láže'. <sup>19</sup>Zze diža' žonle kan znnna xtiža' Xanžon', na' žéngekle yógo'te benách ka' da' ni. Che len žebela' ni'a che da' žonle le'e. Na'a, žénela' soale gonle da' nak chawe', na' kege gonle da' kegle. <sup>20</sup>Dios, Bennen' zka'n zie' yichj láždo'žo, za' gone' ga wléj wchochjle da' xiwe'. Znnabla' Xanžo Jesús, Benne' Criston', gon chawe'e le'e.

<sup>21</sup>Xkwide' Timoteo, xkwiden' žónlenbe' neda' tzen žin, žápebe' le'e "Padiox." Lezka' Lusio len Jasón, na' Sosípater, benne' wláž chia' ka', žápegake' le'e "Padiox."

<sup>22</sup>Neda', Tersio, zzoja' da' znnna Pablo le'e yiche ni, lezka' žapa' le'e "Padiox" na' zoalen Xanžon' neda'.

<sup>23</sup>Lezka' Gayo, bennen' žonne'  
neda' latje zoa' liže' nga, žape' le'e  
“Padiox.” Lezka' žonne' latje yógo'te  
benách ka' che Benne' Criston'  
zdóbgake' nga. Erasto, benne' yo'o  
lo ne'e mežw che yež nga žape'  
le'e “Padiox.” Lezka' Kuarto, benne'  
lježžo, žape' le'e “Padiox.”

<sup>24</sup>Znnabla' Xanžo Jesúš, Benne'  
Criston', gon chawe'e le'e. Ka'kze  
gaken.

### iGa'n zen Dios!

<sup>25</sup>Na'a, izka'n zento' Dios, Bennen'  
gak gone' le'e choch ni'a che diža'  
chawe' da' zchaljan', na' ni'a che da'

zchalja' kan nak che Jesús, Benne'  
Criston', na' ni'a che da' bloe'e law  
Dios che da' bgache' chie', dan'  
bkache'e Le' ža ni'te ga bžinte na'a  
ža! <sup>26</sup>Na'a ba bla' da' ni le'egak  
yiche ka' da' bzojgak benne' ka'  
bcháljgake' lo wláz Dios, Bennen'  
zóateze', kan wnnakze' Le'. Na'a zej  
nnita' benne' ka' zcháljgaken' gan  
že'gak yógo'te benách ka' nich gak  
chejlé'gake' che Benne' Criston', na'  
nich gak góngake' kan znna xtiže'.

<sup>27</sup>iNi'a che da' ben Jesúš, Benne'  
Criston', ga'n zen to chi'ize Dios  
tlícha'kze, Bennen' napkze' dot yela'  
wak! Ka'kze gaken.

# DIŽA' NEŽW DA' BSEŁA' PABLO ŁO YEŽ CORINTO

Pablo žape' "Padiox"  
benách ka' che Jesús

**1** Dios bliže' neda', Pablo, kan žénekzele' Le', nich gaka' wbás che Jesús, Benne' Criston'. Iježo Sóstenes žónlenе' neda' tzen.<sup>2</sup> Žapa' le'e "Padiox" zí'na'do' ka', zdoble che Dios lo yež Corinto, na' nakle che Leze' dan' nakle toze len Jesús, Benne' Criston'. Dios na'kze bliže' le'e nich gakle che Leze' tzen len yógo'te benne' ka' nnít'a'gake' gáte'teze, na' zcháljlengake' Dios, zkóngekle' žin la Xanžo Jesús, Benne' Criston', Xángake', na' lezka' Xanžo.<sup>3</sup> Žáta'yoela' Xažo Dios len Xanžo Jesús, Benne' Criston', gon chawe'e le'e, na' wká'n žie' yichj lázdo'le.

Da' napžo dan' nakžo toze len Jesús

<sup>4</sup> Žápeteza' Dios: "Žóxkeno'" kan nak chele le'e, dan' zoa da' chawe' da' bennze' chele dan' nakle toze len Jesús, Benne' Criston'. <sup>5</sup> Dan' nakle toze len Benne' Criston', Dios ba bénnl'i'e chele da'zej naken chie'. Žáklenе' le'e lo yógo'te da' znnale, na' žone' ga'ježn'i'ile'elele. <sup>6</sup> Ki naken dan' dot láže'le wzí' lo

na'le da' zchaljto' kan nak che Benne' Criston'. <sup>7</sup> Che len, bi be žiážjelele che da' žonn Dios Be' La'y chežo, kate' ne zbezle ža na' yelá' law Xanžo Jesús, Benne' Criston'. <sup>8</sup> Lekze' gon choche' le'e nich gak sóelele yógo'te kate' žinže ža ze lawte ža na', nich bi gak no benne' bi da' nnie' chele ža na' yelá' law Xanžo Jesús, Benne' Criston'. <sup>9</sup> Dios žone' kan znné', na' Lekze' bliže' le'e nich gakle toze len Zi'ne', Xanžo Jesús, Benne' Criston'.

Zej nžoj chople benách Corinto ka'

<sup>10</sup> Ni'a che Xanžo Jesús, Benne' Criston', žáta'yoela' le'e, zí'na'do' ka', nich gonle toze xtíža'le yógo'te. Bi žoj chóplele, san le gak toze kan zza' láže'le, na' kan žonle le'e. <sup>11</sup> Ki žapa' le'e, zí'na'do' ka', dan' benne' ka' nnít'a'gake' liž Kloé bzéngekle' neda' kan žonle, na' wnnágake' zdil díža'le. <sup>12</sup> Znnia' da' ni: zej nža' da' znnale to tole. Bálezle znnale žónlenle Pablo tzen. Yebálezle znnale žónlenle Apolo tzen. Yebálezle znnale žónlenle Sefas tzen, na' yebálezle znnale žónlenle Benne' Criston' tzen. <sup>13</sup> ¿Bžoj chople Benne' Criston'? iWdá' neda', Pablo, le'e

yag kroze lo wlazle le'e? ¿Bezoale le'e nis nich gakle toze len neda'?  
**14** Žapa' Dios: "Žóxkeno" dan' bi bezó'a nis nitóžele le'e, san chopze Crispo len Gayo. **15** Che len bi gak nnale bezoale nis nich gakle toze len neda'. **16** Lezka' bezó'a nis Estéfanas len benne' ka' nníta'gake' liže'. Bi žejsá' laža'a cha' bezó'a nis no benne' yoble ga na'. **17** Benne' Criston' bsele'e neda', kege nich yezó'a benách ka' nis, san nich wzenla' benách ka' diža' chawe' chie'. Zchaljan', san kege len yela' žejn'i'il chekza', nich bi wka'na' ka'ze yela' wak che da' ben Benne' Criston' katen' gote' le'e yag kroze.

**Jesús napkze' yela' wak, na'  
yela' žejn'i'il che Dios**

**18** Žékgekle benne' ka', benne'zej nchol yichj lázdo'gake', da' zchaljžo kan nak che Jesúš, kan gote' le'e yag kroze, naken to da' dáche'ze, san žo'o, dan' ba belažo, žákbe'elžo dan' zchaljžon napen yela' wak che Dios nich yeslán benách ka'. **19** Ki naken dan' nyejw le'e yiche la'y da' znnan:

Wloe'ela' law nak dáche'ze yela' žejn'i'il  
chebak benne' ka'zej nnezle' da'  
zenle'e.

Wzúa' chela'ale yela' žejn'i'il  
chebak benne' ka' žejn'i'igekle'  
da' zenle'e.

**20** ¿Bízkze yebélenle no benne'  
žejn'i'ile' da' zenle'e?  
¿Bízkze yebélenle no benne'  
nsédli'e?  
¿Bízkze yebélenle no benne'  
žákli'e zchalje'?

Dios ba bloe'ele' law nak yela'  
žejn'i'il chebak benách ka', benne'

nníta'gake' yežlyó nga, to da' dáche'ze. **21** Dios, lo yela' žejn'i'il chie', bi bi'e latje benne' ka' nníta'gake' yežlyó nga gónbia'gake' Le' ni'a che yela' žejn'i'il chégakkze'. Dios wyáz laže'e beslé' benne' ka' žejlé'gake' chie' Le' ni'a che dan' zchaljžon, la'kze žékgekle benách ka' naken to da' dáche'ze.

**22** Žénegekle benne' judío ka'  
lē'gekle' yela' wak ka' da'zej nak bian', na' benne' zi'to' ka' žeñegekle' yéngkle' da' wzejni'ilen légake'.

**23** Žo'o zchaljžo che Benne' Criston', kan gote' le'e yag kroze. Da' li, dan' zchaljžon kan got Benne' Criston', žonen ga zchígekle benne' judío ka', na' yezika' benách ka' žékgekle' naken to da' dáche'ze. **24** Benne' ka' bliž Dios légake', la'kze zej nake' benne' judío ka', o benne' zi'to' ka', žákbe'gekle' napkze da' ben Benne' Criston' le'e yag kroze dot yela' wak che Dios, na' dot yela' žejn'i'il chie'.

**25** Žékgekle benne' ka' nníta'gake' yežlyó nga da' ben Dios nak bian' nake' benne' bi nnezle, san dan' bene' nápežen yela' žejn'i'il ka da'zej nape benách ka'. Žékgekle' da' ben Dios nak bian' bi nake' wale, san dan' bene' nápežen yela' wak ka da'zej nape benách ka'. **26** Na'a, zí'na'do' ka', le žejsá' laže' kan gokle le'e katen' bliž Dios le'e. Bi gokle zanle benne' ka' žejn'i'igekle' lo yela' benachze chégake', na' bi gokle zanle benne' wnná bia' ka', na' kege zanle gokle benne' blo ka'. **27** Benne' ka' nníta'gake' yežlyó nga žékgekle' benne' ka' wžekze Dios zej nake' benne' bi nnezle ka'. Ki ben Dios nich gone' ga yedoé'gekle benne' yežlyó ka',

benne' žejni'igekle'. Lezka' wžé Dios benne' ka' bizej nake' wale yežlyó nga nich gone' ga yedoēgekle benne' wale ka'. <sup>28</sup>Lezka', benne' ka' nníta'gake' yežlyó nga žékgekle' benne' ka' wžekze Dios zej nake' ka'ze, na' bi be záka'gake', na' bizej nake' wale. Ki ben Dios nich gone' ga ga'ngak ka'ze da' ka' zka'n zengak benne' ka' nníta'gake' yežlyó nga. <sup>29</sup>Che len, bi gak nitó benne' wká'n zen kwine' law Dios. <sup>30</sup>Dios na'kze bene' ga nakžo toze len Jesús, Benne' Criston', na' bene' ga napžo yela' žejni'il chie'. Dan' nak Benne' Criston' toze len ž'o, ba beyakžo chawé, na' nakžo che Dios na'kze, na' belažo. <sup>31</sup>Nak chežo kan nyejw le'e yiche la'y, da' znnan: "Cha' zoa no benne' ženele' bi da' wká'n zene', žala' wká'n zene' Xanžo Dios."

### Zchaljžo kan bda' Jesús le'e yag kroze

**2** Ki goken, zí'na'do' ka', katen' bla'a gan zoale. Bchalja' xtiža' Dios lawle, kege len yela' žejni'il chekza', na' bi be bena' len yela' wak chekza'. <sup>2</sup>Katen' wzóalena' le'e, be' laža'a bi wchalja' da' yoble, san toze kan nak che Jesús, Benne' Criston', kan bde'e le'e yag kroze. <sup>3</sup>Wzóalena' le'e lo yela' bi nak wale chia', na' lo yela' zžebe wzízel'i'a. <sup>4</sup>Bcháljlena' le'e xtiža' Dios, kege kan zchaljgak benách ka' lo yela' žejni'il chégakkze', san goklen Dios Be' La'y neda', na' yela' wak che Dios wzóalenen neda', da' gok bian' nak dot da' li da' wnnia'. <sup>5</sup>Ki bena' nich gak chejle'le che Dios, kege dan' bénlele yela' žejni'il chegak benách ka', san dan' blé'elele yela' wak che Dios.

### Dios Be' La'y žone' ga nónbia'žo Dios

<sup>6</sup>Zcháljleno' benne' ka' ba nakže dot li laže' kan žejlé'gake' che Dios len yela' žejni'il cheto'. Yela' žejni'il ni bi naken ka da'zej nape benne' ka' nníta'gake' yežlyó nga, na' bi naken ka da'zej nape benne' ka' znnna biá'gake' ža ni zoažo na'a, benne' ka' kwia yí'gake'. <sup>7</sup>Zchaljto' len yela' žejni'il da' bi gak no benne' žel-len', dan' znezjw Dios, dan' bgache' yela' žejni'il ni da' bzoa Dios ža ni te nich yebélenlžon. <sup>8</sup>Benne' ka' znnna biá'gake' ža ni zoažo na'a bi bénbia'gake' yela' žejni'il ni. Chela' bénbia'gaken', bi bdá'gake' Xanžon', Benne' ze'e ya'abá, le'e yag kroze. <sup>9</sup>Naken kan nyejw le'e yiche la'y, da' znnan:

Ba bkwez Dios da' ka' si'gak  
benne' ka'zej nži'ile' Le',  
da' ka' bi ble'el nitó benne', na' bi  
benle' chégaken,  
na' bi wzá' laže'gak benách ka'  
kan jez naken.

<sup>10</sup>Na'a, Dios ba bzejni'ile' ž'o da' ki lo na' Dios Be' La'y, dan' zwíakze Dios Be' La'y yógo'te, na' Lezka' da' yo'o lo yichj lázdo'w Dios na'kze.

<sup>11</sup>¿Nnezle no benne' da' yo'o lo yichj lázdo'w yetó benne'? Toze be' nakkze bennen' nnezlen. Lezka', bi nnezle nitó benne' da' yo'o lo yichj lázdo'w Dios. Toze Dios Be' La'y nnezlen'. <sup>12</sup>Bi yo'ožo to be' da' zdazen yežlyó nga, san zoalen Dios Be' La'y ž'o, Bennen' zchiz Dios yichj lázdo'žo nich gak gónbia'žo da' ka' bennkze' Le' chežo. <sup>13</sup>Zchaljžo ka jez nak da' ka' benn Dios chežo, kege len diža' da' žsédgakle benne' ka' ž'o' len yela' žejni'il chégakkze',

san len diža' ka' da' žsedle Dios Be' La'y žo'o. Ki naken, zzejni'ilžo benne' ka' zoalen Dios Be' La'y légake' kan nak da' žsedle Dios Be' La'y žo'o.

<sup>14</sup>No benne' bi zoalen Dios Be' La'y le', bi zzi' lo ne'e da' žsedle Dios Be' La'y žo'o, dan' žekle' naken to da' yalze. Bi gak chejní'il bennen' da' ni, dan' toze bennen' zoalen Dios Be' La'y le' gak gákbe'ele' da' zaka' da' ni. <sup>15</sup>No benne' zoalen Dios Be' La'y le' gak gákbe'ele' da' zej zaka' yógo'te, san bi gak nitó benne' yoble gákbe'ele' da' záka'kze bennen'.

<sup>16</sup>Nyejw le'e yiche la'y da' znnan:  
  ¿Nozkze benne' nnezle' da' zza'  
    laže' Xanžo?  
  ¿Nozkze benne' gak wzejni'ile'  
    Le'?

San da' zza' laže' Benne' Criston'  
yo'on lo yichj lázdo'žo žo'o.

### Nakžo wen žin tzen len Dios

**3** Che len, zí'na'do' ka', bi gok wcháljlena' le'e kan zcháljlena' to benne' zoalen Dios Be' La'y le', san bcháljlena' le'e kan zcháljlena' no benne' nake' benachze, na' bi zoalen Dios Be' La'y le'. Nakle ka bi' že'n ka', dan' bi nakle choch kan žejele'le che Benne' Criston'. <sup>2</sup>Bseda' le'e da' bi naken zede, da' naken ka niže' da' we'jle. Bi bseda' le'e da' naken zede ka belá' da' gawlen. Bi gok chejní'ilele da' naken ka belá' da' gawlen, na' bi na' gakle na'a.  
<sup>3</sup>Ki naken dan' nakle ka no benne' nake' benachze na' zejte na'a ža. Kate' ne zgé'elele lježle ka', na' zdile díža'le, na' žejož chóplele, nakle ka no benne' nake' benachze, na' žonle tlebe kan žongak benne' ka'

nníta'gake' yežlyó nga. <sup>4</sup>Kate' ne zoalen to benne' le'e, benne' znne' žónlene' Pablo tzen, na' yetó benne' znne' žónlene' Apolo tzen, ne nakle ka no benne' nake' benachze.

<sup>5</sup>¿Bizkze naka' neda', Pablo? ¿Bizkzen' Apolo? Nakto' wen žin che Dios, na' ni'a che da' bento' neto' bejle'le che Benne' Criston'. To toto' žonto' žin da' benn Xanžon' che cheto'. <sup>6</sup>Žin da' bento' lo yichj lázdo'le naken ka žin da' žon to benne' žaz ža'ne'. Neda' goza' bínbedo' ka', na' Apolo bxoen' nis, san Dios bene' ga bla', na' ga bgole bínnedon' da' wyazen lo yichj lázdo'le. <sup>7</sup>Ki naken, láte'ze zaka' benne' žaz, na' láte'ze zaka' benne' žxoen' nis, san záka'le'e Dios, Bennen' žone' ga zla', na' ga zgole bínnedon'. <sup>8</sup>Tlebe kan zej nak bennen' žazen', na' bennen' žxoen' nis. Dios yebi'e che chégake' kan nak žin da' žóngake'. <sup>9</sup>Nakto' neto' wen žin tzen len Dios, na' le'e nakle ka to yežlyó che Dios gan žonto' žin.

Lezka' nakle le'e ka to yo'o da' žon Dios. <sup>10</sup>Lo da' benn Dios chia', naka' ka to benne' blo wen ze'e. Neda' bdixjwa' len ze'e, na' benne' yoble zchise' ze'en'. To tožo žala' wíažo kan zchisžo ze'e law len ze'en'.

<sup>11</sup>Dios ba bdixjwe' to len ze'e da' naken Jesús, Benne' Cristo na'kze, na' bi gak no benne' wdixjwe' yetó len ze'e. <sup>12</sup>Žin da' žonžo che Benne' Criston' naken ka zchisžo ze'e law len ze'en'. Law len ze'en' wak no benne' gone' žin da' naken ka zchise' ze'e da' naken oro, o da' naken plat, o da' naken yej zaka' ka', o wak no benne' gone' žin da' naken ka zchise' ze'e da' naken yag, o da' naken yix,

o da' naken yixe' ka'ze. <sup>13</sup>Gak bia' kan nak žin da' žon to to benne'. Kate' žin že wchi'a laže' Dios benách ka', na' la' law kan nak žin da' benžo to tožo, dan' te žin na' lo yi', na' yin' si' bian' žin da' ben to to benne'.

<sup>14</sup>Cha' žin da' ben no benne', da' naken ka to ze'e da' bchise', yežojen chawe' lo yin', na' Dios yebi'e chie' kan nak tlebe len žin da' bene'.

<sup>15</sup>Cha' chey žin da' ben no benne' da' naken ka to ze'e da' bchise', na' wnite' da' gónele Dios yebi'e chie', san yelakze' le', da' gaken chie' kan žak che to benne' želé' to lo yi' zen.

<sup>16</sup>¿Bi nnézlele nákkzele le'e yodo' che Dios, na' zoa Dios Be' La'y lo yichj lázdo'le? <sup>17</sup>Cha' no benne' wká'n ditje' yodo' che Dios, na' Dios wžia yi'e le', dan' nak la'y yodo' che Dios, na' le'ekze nakle yodon'.

<sup>18</sup>Bi gon laže'l kwinle. Cha' no benne' ladjwle le'e žekle' žejn'i'ile'ele' kan žejn'i'igekle benne' ka' nníta'gake' yežlyó nga, žala' yeyák bennen' ka to benne' bi be nnezle' da' naken che yežlyó nga, nich gata' yela' žejn'i'il chie' da' naken dot li laže'. <sup>19</sup>No benne' napze' yela' žejn'i'il che yežlyó nga nake' law Dios ka to benne' bi be nnezle'. Nyejw le'e yiche la'y da' znnan: "Dios žone' ga zchíxgakle benne' sina' ka', zkonle' žin yela' žejn'i'il chégake!." <sup>20</sup>Lezka' znnan: "Xanžo nnezle' da' zza' laže'gak benne' sina' ka' naken to da' dáche'ze." <sup>21</sup>Che len, bi žala' wká'n zenle no benne' ni'a che da' wsedle' le'e. Yogo'te yo'on lo na'le. <sup>22</sup>Yo'ogak lo na'le Pablo, na' Apolo, na' Sefas, na' yežlyó nga, na' yela' nban, na' yela' got, na' ža ni zoažo na'a, na' ža da'

za'. Yogo'te yo'ogaken lo na'le, <sup>23</sup>na' le'e yo'ole lo na' Benne' Criston', na' Benne' Criston' yoe'e lo na' Dios.

Da' žongak benne' wbás  
ka' bsel'a' Benne' Cristo

**4** Che len, žala' géklele le'e nakto' neto' wen žin che Benne' Criston', na' nzi' lo na'to' da' naken dot da' li, da' ngache' che Dios, da' bi gak no benne' chejni'ile' žakze chie'. <sup>2</sup>Benne' ka', Dios bdie' lo ná'gake' wkóngekle' žin da' nak chie', žon byenen góngake' binlo da' žóngake'. <sup>3</sup>Bi že' zedla' cha' wchi'a láže'le neda', o cha' benne' ka' nníta'gake' yežlyó nga wchi'a láže'gake' neda'. Bi zchi'a laža'a kwina'. <sup>4</sup>Bi zchebe lázda'wa' neda'. Da' ni bi nak bian' bi nbaga'a zia. Xanžon' nake' Benne' zchi'a laže'e neda'. <sup>5</sup>Che len, bi žala' wchi'a láže'le nitó benne' zga'ale kate' žin ža chen. Le kwez ža na' yelá' Xanžon', na' Le' wloe'ele' law dan' ngache' gan nak chol, na' lezka' da' yo'o lo yichj lázdo'gak yogo'te benne' ka'. Naž Dios yebi'e che to to benne' da' gapen le' ba la'ne kan žala' gone' chie'.

<sup>6</sup>Na'a, zí'na'do' ka', kan nak da' ni, bchalja' che da' žonto' neto', Apolo, na' neda'. Gak wíale le'e kan žonto' neto' nich gak gonle kan nyéwze le'e yiche la'y, na' bi wká'n zenle to benne', na' bi wzoale chela'ale yetóe'.

<sup>7</sup>¿Ben no benne' ga nako' le' benne' blo? ¿Nzi' lo no'o to da' bi benn Dios chio'? Cha' Le' bennze' chio' dan' nzi' lo no'o, ¿biz chen' zka'n zen kwino', na' žeklo' žakze chio' wzí' lo no'on?

<sup>8</sup>¿Žéklele le'e nákžele benne' blo ka'? ¿Žéklele naple yela' wnni'a

chezle? ɔŽéklele znna bia'le, la'kze bi znna bia'to' neto'? Ni'a che Xanžo Dios žak laža'a nna bia'le le'e nich gak nna biá'lento' le'e tzen. 9Žekla' neda' nak cheto', benne' wbás ka' che Dios, kan bzoe' neto' jejto' zante kan žak chegak benne' ka' ba nžog chégake' gátgake' lawgak benách ka'. Nakto' ka to da' zwiagak benne' ka' mníta'gake' yežlyó nga, na' lezka' ka to da' zwiagak wbás che ya'abá ka'. 10Dan' žénelto' gonto' xchin Benne' Criston', žwe'to' benách ka' latje žékgekle' nakto' benne' bi nnezle ka', san le'e žéklele žakle da' zenle'e dan' nakle che Benne' Criston'. Le'e žéklele ba nakle benne' wale ka', san žékgekle benách neto' bi nakto' benne' wale ka'. Zzoagak benách ka' neto' chela'ale, san žápegake' le'e ba la'ne. 11Na' zejte na'a ža, zdonto', na' zbilto'. Bi de laže' da' gákwton'. Žon zi'gak benne' ka' neto', na' bi zoa ližto'. 12Žsaka' zi' kwinto', la' néto'ze žonto' žin. Žliž zi'gak benách ka' neto', san neto' znnablto' Dios gon chawe'le légake'. Žbia láže'gak benách ka' neto', san zzoelton'. 13Znnégake' cheto', san lo yela' gaxjw láže' zcháljlento' légake'. Na' zejte na'a ža nakto' ka bebe che yežlyó nga, na' ka to da' zzo'ngak yogo'te benách ka' na'le.

14Zzoja' chele da' ki, kege dan' žénela' gona' ga yedoé'ele, san žénela' wzejni'ilá' le'e, žona' kan žon to benne' zzejni'ile' zi'nkze' ka', xkwide' ka' nži'ile'. 15La'kze gak nníta'gak zan gaywá' benne' ka' wsédgekle' le'e kan nak che Benne' Criston', san toze benne' zoe', benne' nake' ka xakzle, bennen' bene' ga nakle che Benne' Criston'. Lo yela'

nban kobe da' naple dan' nakle toze len Benne' Criston', nedkza' naka' ka xale dan' zga'ala' neda' bzenla' le'e diža' chawe' da' wzí' lo na'le. 16Che len, žáta'yoela' le'e we' láže'le gonle kan žona' neda'.

17Che len zsel'a'a xkwide' Timoteo gan zoale. Dan' scha bénlenbe' neda' tzen žin che Xanžon' nakbe' ka zi'nkza', na' nakbe' dot li laže', na' nži'ilá'-be'. Gon xkwide' Timoteon' ga chejsá' láže'le da' ka' žseda' dan' naka' wbás che Benne' Criston', da' ka' žseda' yógo'te kwe' benách ka' che Benne' Criston' gáte'teze gan ža'a. 18Bálele le'e zka'n zen kwinle dan' žéklele biž yelá' gan zoale. 19Na'a, la' yelá'tia' gan zoale cha' gonn Xanžon' neda' latje. Naž gákbe'ela', kege da' znnágakze benne' ka' zka'n zen kwíngake', san gákbe'ela' cha' zoalen yela' wak che Dios lágake'. 20Cha' nzi' lo na'le nna bia' Dios le'e, bi nak bia' naken ki dan' znnázelen. Nak bia' naken ki cha' zoalen yela' wak che Dios le'e. 21¿Bizle žénelele? ɔŽénelele yelá' gan zoale len to bar nich sel'a' snia le'e, o len yela' nži'il, na' lo yela' gaxjw láže'?

Pablo zchi'a laže'e to  
benne' žone' da' kegle

**5** Zze diža' zoalen to benne' le'e, benne' žone' da' kegle, dan' zóalene' zo'le xe'. Da' kegle ki bi žongak benách ka' bizej nónbi'e Dios. 2Le'e zka'n zen kwinle, san žala' gak nyache' láže'le, na' yekwasle bennen' žone' dolan' gan zoale. 3La'kze bi zóalena' le'e lo bela' žen chia', da' li zóalena' le'e lo be' nakkza'. Kan zóalenkza' le'e ba

bchi'a laža'a bennen' žone' dołan'.  
**4** Kate' doble che Xanžo Jesús, Benne' Criston', neda' gona' le'e tzen lo be' nakkza'. Naž, len yela' wak che Xanžo Jesusen', **5** le wdé bennen' lo na' da' xiwe' nich kwia yi' da' ženele bela' žen chie', san yelá be' nakkze' ža na' yelá' Xanžon'.

**6** Bi žala' wká'n zen kwinle kan nak da' žonle. **7** Bi nnézlele da' znnan: "Láte'do'ze kwa zichj che yet xtíl gonen ga chaž dot kwa da' nzin' kwa zichjen?" **7** Na'a, le yekwás dołan' gan zoale da' naken ka to kwa gole, nich gakle chawe'. Naž gakle ka to kwa kobe da' bi nzin' kwa zichj, kan da' li ba nakle. Nak chežo ka ba zoažo Lni Pasko' kate' žawgake' yet xtíl da' bi nzin' kwa zichj, na' ba bétgake' lo wlazžo žo'o zila' che Lni Paskon', zilan' nakkze Benne' Criston'. **8** Che len žala' gonžo lni na', kege zoalen kwa gole žo'o, da' zloe'elen da' kegle da' bi zakan', san žala' wkonlžo žin yet xtíl da' bi nzin' kwa zichj, yet xtílen' da' zloe'elen da' nak dot chawe', na' da' nak dot da' li.

**9** Katen' bzoja' chele le'e yiche nežwn', gožkza' le'e bi góñlenle tzen benne' ka' žóngake' da' kegle. **10** Goža' le'e ki, kege nich kwasle to chi'ize gan zej nnita' benne' ka' nnít'a'gake' yežlyó nga, benne' ka' žóngake' da' kegle, na' gan zej nnita' benne' ka' zze láže'gake' da' de che ljéžgake' ka', na' gan zej nnita' benne' wbán ka', na' benne' ka' zka'n zéngake' lo'a ka'. Nich gonle ki gon byenen žojle yežlyó nga. **11** Da' znnna da' bzoja' chele, le'e yichen', naken nich bi góñlenle tzen no benne' znnne' nake' che Benne' Criston', san

žone' da' kegle, o zze láže'e da' de che lježe', o zka'n zene' lo'a ka', o znnne zí'e, o zzožle', o zbane'. Bi gáwlénle tzen benne' ki. **12-13** Bi nak chia' neda' wchi'a laža'a benne' ka' bi jez nake' toze len žo'o. Dios wchi'a láže'e légake'. Le'ekze žala' wchi'a láže'le benne' ka' jez nake' toze len le'e. Che len, le yekwás bennen' žone' da' keglen' gan zoale.

### Bi žala' che'žo no lježžo law benne' zchi'a láže'e

**6** Kate' zdile díža'le tole len yetole, ēnakxkze žežogle chejle yolawe' gan wchi'a láže'gak benne' ka' bi žejl'é'gake' che Benne' Criston' le'e? Gakže chawe' chejle lawgak benách ka' che Benne' Criston' nich wchi'a láže'gake' le'e. **2** ¿Bi nnézlele da' gongak benne' ka' jez nake' che Benne' Criston'? Žin ža kate' wchi'a láže'gake' ýogo'te benách ka' mnít'a'gake' yežlyó nga. Cha' le'ekze wchi'a láže'le benne' ka' nnít'a'gake' yežlyó nga, ibi naple yela' žejn' il nich wchi'a láže'le diža' bizjw ki? **3** ¿Bi nnézlele wchi'a láže'žo wbás che ya'abá ka'? Žon byenžen wchi'a láže'žo da' žakgak yežlyó ga ni zoažo na'a. **4** Na'a, cha' žak to da' žon byenen no benne' wchi'a laže'en, dan' žaken yežlyó nga, ibiz chen' žežle lawgak benne' ka' wchi'a láže'gaken', benne' ka' bi be nzi' lo ná'gake' ládjwgak benne' ka' che Benne' Criston'? **5** Zchalja' ki nich gona' ga yedoé'elele. ¿Bi zoalen no benne' le'e, benne' žake' late' nich gak wchi'a laže'e da' žak chegak lježle ka'? **6** ¿Nakxkze gak to benne' nake' che Benne' Criston' chi'e lježe' yolawe' gan wchi'a

łáže'gak benne' ka' bi žejlé'gake' che Benne' Criston' légake'?

<sup>7</sup> Da' li zchíxlele le'e kate' zdile díža'le. ¿Bíz chen' bi sóelele kate' no benne' žone' chele da' kegle? ¿Bíz chen' bi sóelele kate' no benne' zbéjlane' da' den chele? <sup>8</sup> L'e'e žonle da' kegle, na' zbéjlanle, na' žonle ki chegak lježle ka', benne' jez nake' toze len Benne' Criston'!

<sup>9-10</sup> ¿Bi nnézlele bi chazgak benách ka' bi jez nake' chawe' gan znna bia' Dios? Bi gon laže'l kwinle.

Bi chaz nitó benne' wen da'  
zinnj gan znna bia' Dios,  
na' nitó benne' zka'n zene' lo'a  
ka',  
na' nitó benne' zka'n ditje' yela'  
zchag na',  
na' nitó benne' byo, benne' žon  
kwine' ka to no'le,  
na' nitó benne' byo zóalene' la'  
ljež benne' byoze',  
na' nitó benne' wbán,  
na' nitó benne' zdan laže'e yela'  
gape,  
na' nitó benne' že'je',  
na' nitó benne' wnné le'e,  
na' nitó benne' zbéjlane'.  
Nitó benne' žone' da' ki bi chaze'  
gan znna bia' Dios.

<sup>11</sup> Ki benle bálele le'e, san na'a ba bekwasle kan jez nak dola' da' wbágale, na' ba nakle che Dios na'kze, na' ba beyakle chawe' law Dios ni'a che da' ben Xanžo Jesusen'. Be' la'y che Dios žone' ga žaken ki chele.

### Bela' žen chežo naken che Dios

<sup>12</sup> Znnagak benách ka': "Yo'o lo na'žo gonžo yógo'te." La'kze da' ni naken dot da' li, bi žala' gonžo

yógo'ten. La'kze de latje gona' yógo'te, bi go'a latje bi da' nna bian' neda'. <sup>13</sup> Lezka' znnagak benách ka': "Yela' waw nakzen da' chazen le'žo, na' le'žo nakzen da' zzin' yela' waw." Da' ni naken dot da' li, san žin ža wžia yi' Dios yela' waw, na' lezka' le'žo. Dios bene' bela' žen chežo, kege nich wkonlžon žin nich gonžo da' kegle. Naken nich yebélenlen Xanžon', na' Xanžon' nake' nich yebélenle bela' žen chežo L'e'. <sup>14</sup> Dios besbane' Xanžon' lo yela' got. Lezka', len yela' wak zen chie' yesbane' žo'o.

<sup>15</sup> ¿Bi nnézlele, lo bela' žen chele nakle toze len da' nakkze Benne' Criston'? ¿Nakxze gak yekwasle to da' naken toze len Benne' Criston' nich gonle ga gaken toze len to no'le le'e? Bi žala' gonle ki. <sup>16</sup> ¿Bi nnézlele cha' to benne' byo zóalene' to no'le le'e, nake' toze len le'? Kan nak da' ni nyejw le'e yiche la'y, da' znnan: "Chope' gákgake' ka toze benne'." <sup>17</sup> Na'a, no benne' nake' toze len Xanžon', nake' toze len L'e' lo be' nakkze'.

<sup>18</sup> Che len, bi gonle dola' da' naken da' sban. Bíte'zeze dola' yoble da' žon no benne', na'le lo da' nakkze' žone' dolan'. San no benne' žone' dola' da' naken da' sban, žone' dola' da' nžagen lekze'. <sup>19</sup> ¿Bi nnézlele bela' žen chele naken yodo' che Dios Be' La'y na', na' L'e' zoe' lo yichj lázdo'le. Che len bela' žen chele bi naken chezle. Na'a, naken che Dios. <sup>20</sup> Dios beya'we' le'e, na' to da' zen wdizjwe'. Le wkonle žin bela' žen chele, na' lezka' be' nákkzele nich wká'n zenle Dios, dan' jez nak bela' žen chele, na' be' nákkzele che Dios.

Pablo žsedle' kan nak  
che yela' zchag na'

**7** Na'a, yecheba' che da' ka'  
wnnáblele neda', da' ka' bzojle  
chia' le'e yichen'. Gak chawe' che  
no benne' byo cha' bi sóalene' no'le.  
**2** Dan' zónle'egak benách ka' da'  
kegle gan zoale, yógo'te benne'  
byo, benne'zej nbáblene' le'e žala'  
nníta'lengake' no'le che chégake', na'  
yógo'te no'le ka' žala' nníta'lengake'  
benne' byo che chégake'. **3** No benne'  
byo, benne' zoa zo'le', žala' gone'  
che zo'le' kan nak yela' zon che yela'  
zchag na', na' tlebe kan žala' gon  
no'len' len benne' byo chien'. **4** Bela'  
žen che no no'le bi yo'on lo na'ze',  
san benne' byo chien' nzi' lo ne'en.  
Lezka', bi yo'o lo na'ze no benne'  
byo bela' žen chie', san zo'le' nzi' lo  
ne'en. **5** No benne' byo len no no'le,  
benne' ka'zej nžag ná'gake', bi žala'  
wžóngake' toe' yetóe'. Wak góngake'  
da' ni toze cha' góngake' toze diža'  
bi chágake' to chíido'ze nich gak  
wcháljlengake' Dios dot láže'gake'.  
Te na', da' yoble benne' byon' žala'  
sóalene' zo'le', nich bi sáke'le da'  
xiwe' gonen ga chó'ogake' nez dola'  
dan' bi gak nna bia' kwíngake'.

**6** Da' ni da' žapa' le'e naken to da'  
žonn Xanžon' le'e latje. Bi naken to  
da' zchi'le' le'e. **7** Žekla' neda' gakže  
chawe' ga'ngak toze yógo'te benne'  
ka', kan zoa' toza' neda'. To to benne'  
nzi' lo ne'e ka da' bnežjw Dios chie'  
gone'. Toe' nzi'e to da' bnežjwen', na'  
yetóe' nzi'e yetó da' bnežjwen'.

**8** Na'a, žapa' benne' ka' nníta'gake'  
toze, na' lezka' no'le wzebe  
ka', znnia': gak chawe' chégake'  
gá'ngake' toze kan zoa' toza' neda'.

**9** Cha' bi gak nna bia' kwíngake',  
wak wchág ná'gake', dan' gakže  
chawe' wchág ná'gake', na' bi se  
láže'gake' da' kegle.

**10** Žápgaka' benne' ka' ba nžag  
ná'gake', na' kege nedza' znnia'  
da' ni, san Xanžon' znnakzen', na'  
xtiže'e znnan: "To no'le bi žala'  
kwáslene' benne' byo chie!" **11** Cha'  
no no'le kwáslene' benne' byo chie',  
žala' ga'ne' toze', o yeyake' toze len  
benne' byo chien'. Lezka' benne' byo  
bi žala' wka'ne' zo'le'.

**12** Na'a, nedza' žápgaka' yezika'  
benne' ka', na' kege Xanžon' wnne'  
ki, na' znnia': cha' zoa no lježžo,  
benne' žejli'e che Benne' Criston', na'  
zo'le' bi žejli'e che Xanžon', na' cha'  
zo'le' žénele' gá'nlene' le', bi žala'  
kwáslene' zo'len'. **13** Lezka' znnia':  
cha' zoa no no'le zanžo, no'len'  
žejli'e che Benne' Criston', na' benne'  
byo chie' bi žejli'e che Xanžon',  
na' cha' benne' byo chien' žénele'  
gá'nlene' le', na' no'len' bi žala'  
kwáslene' le'. **14** Ki žala' góngake'.  
Benne' byon', benne' bi žejli'e che  
Benne' Criston', Dios zle'ele' le' ka  
to benne' nake' che Leze' dan' nake'  
toze len zo'le', no'len' žejli'e che  
Benne' Criston', na' no no'le bi žejli'e  
che Benne' Criston', Dios zle'ele' le'  
ka to no'le nake' che Leze' dan' nake'  
toze len benne' byo chie', bennen'  
nake' lježžo, benne' žejli'e che  
Benne' Criston'. Chela' bi naken ki,  
gakgak zi'nle ka' ka zi'n zi' ka' law  
Dios. San na'a,zej nakbe' che Dios.  
**15** No benne' byo, o no'le, bennen'  
bi žejli'e che Benne' Criston', cha'  
žénele' kwáslene' bennen' nžag  
ná'lene', waken. Benne' lježžo na',  
o no'le zanžo na', bennen' žejli'e

che Benne' Criston', bi žon byenen gá'nlene' bennen' bi žejli'e chien', dan' bliž Dios žo'o nich gá'nlenžo lježžo cháwe'do'. <sup>16</sup>Ki žala' gaken. Le', no'le, wak gono' ga yelá benne' byo chion', na' le', benne' byo, wak gono' ga yelá no'le chion'.

<sup>17</sup>Žala' gonžo to tožo kan nak da' bnezw Xanžon' che chežo, na' lezka' ga'nžo kan gokžo katen' bliž Dios žo'o nich gakžo chie'. Žsedla' yógo'te kwe' benách ka' che Benne' Criston' da' ni. <sup>18</sup>Cha' Dios bliže' no benne' byo, bennen' nžog lo xpele'e da' nak bia' nzi' lo ne'e xtiža' Dios, žala' ga'ne' ki, zoa lo xpele'e dan' nak bian'. Lezka', cha' Dios bliže' no benne' byo, bennen' bi nžog lo xpele'e dan' nak bian', bi žala' chogen' lo xpele'e. <sup>19</sup>Bi be zaka' dan' nžog lo xpele'a' no benne' byo, na' cha' bi nžog lo xpele'e dan' nak bian', bi be zakan'. Da' záka'le'en naken gonžo kan zna xtiža' Dios. <sup>20</sup>To benne' žala' ga'ne' kan goke' katen' bliž Dios le'. <sup>21</sup>Cha' bliže' le' katen' nako' benne' ndo'w, bi kwe' zedlo' dan' nako' ki, san cha' gata' chio' latje žojo' lo na' xano', žala' si'o latjen' da' gatan' chio' žojo'. <sup>22</sup>Cha' bliž Xanžon' no benne' kate' ndo'e, law Xanžon' nake' ka to benne' bžoje' lo na' xane' na', nich gone' xchin Xanžon'. Lezka', cha' bliž Xanžon' no benne' kate' ba nžoje' lo na' xane' na', benne' ni nake' ka to benne' ndo'w che Benne' Criston'. <sup>23</sup>Da' zenle'e naken da' wdizyw Dios, nich beya'we' le'e. Che len bi žala' gote' kwinle lo na'gak benách ka'. <sup>24</sup>Che len, zí'na'do' ka', žala' soale law Dios kan gokle to tole katen' bliže' le'e.

<sup>25</sup>Kan nak chegak benne' ka' bi nžag ná'gake', bi be bchi'le Xanžon' neda'. Ki žekla' neda', na' gak wxén láže'le neda' dan' beyache' laže'l Xanžon' neda'. <sup>26</sup>Dan' žakgak da' zan da' žaken chežo ža ni zoažo na'a, žekla' neda' gak chawé' cha' yógo'te benne' ka' gá'ngake' kan zej nake' na'a. <sup>27</sup>Le', benne' byo, cha' nžag ná'leno' to no'le, bi žala' kwásleno'-ne'. Lezka', cha' zo' tozo', bi žala' wchág ná'leno' to no'le. <sup>28</sup>Na'a, cha' wchág ná'leno' to no'le, bi gono' doł'a', na' cha' to xkwide' no'le wchág ná'lenbe' to benne' byo, bi gonbe' doł'a', san benne' ka' nžag ná'gake' sáka'gake' lo yežlyó nga, na' žénela' yelale lo yela' zzaka' na'.

<sup>29</sup>Na'a, zí'na'do' ka', žapa' le'e da' ni: za' žin ža ze lawte ža na'. Che len, benne' byo ka', benne' ka' nžag ná'lengake' no'le ka', žala' we' láže'gake' Dios kan žon no benne' byo bi nžag ná'leno' to no'le. <sup>30</sup>Lezka', benne' ka' zbeže nyáče'gake' žala' yebégekle' len Dios kan žon to benne' bi zbeže', na' benne' ka' žebégekle' žala' nnítá'gake' gaxjw laže' law Dios kan žon no benne' bi žebele', na' benne' wete' ka' žala' gákgake' ka to benne' bi be de chie'. <sup>31</sup>Benne' ka' zkóngekle' žin da' de yežlyó nga žala' gákgake' ka to benne' bi že' laže'e da' ka', dan' te chegak da' ka' zle'elžo yežlyó nga.

<sup>32</sup>Žénela' bi kwe' zédlele. To benne' bi zoa zo'le', že' laže'e da' nak che Xanžon', ka gak gone' da' žaz laže' Xanžon'. <sup>33</sup>Benne' byon', benne' nžag ná'lene' to no'le, že' laže'e da' de yežlyó nga, ka gak gone' da' žaz laže' zo'le'. <sup>34</sup>Lezka' žaken che to

no'le nžag ná'lene' to benne' byo, na' che to no'le zoe' toze'. No'en' zoe' toze' že' laže'e da' nak che Xanžon', ka gak soe' che Dios lo bela' žen chie', na' lo be' nakkze'. No'en' nžag ná'lene' to benne' byo že' laže'e da' de yežlyó nga, ka gak gone' da' žaz laže' benne' byo chien'.

**35** Žapa' le'e da' ki nich yebélenlelen, na' kege nich wsejwa' xnezle. Žénela' gonle da' žala' gonle, nich gonle xchin Xanžon' dot láže'le.

**36** Cha' zoa no benne' žekle' bi nak chawe' ga'n toze xkwide' no'le chie', na' ba zoa yiz chebe', na' ženele'elbe' wchág ná'lenbe' to benne' byo, wak wchág ná'lenbe'-ne'. Bi gonbe' dola'. **37** Cha' bennen' ba ben choche' xtiže'e, na' bi žon byenen gone' ki, na' yo'o lo ne'e ka gone', na' ba ben choche' xtiže'e ga'nbe' tozbe', gone' da' naken chawe'. **38** Ki naken, no benne' žoe'e latje xkwide' no'le chie' wchág ná'lenbe' to benne' byo, žone' da' naken chawe', san no benne' žone' ga'gab'e' tozbe' žone' da' nakže chawe'.

**39** To no'le nžag ná'lene' to benne' byo, yoe'e lo na' da' nak che yela' zchag na' kate' ne zoa nban benne' byo chien'. Cha' gat benne' byo chien', na' gata' lo na' no'len' wchág ná'lene' no benne' byo ženele', cha' benne' byon' žejl'e che Xanžon'.

**40** Žekla' neda' gakže chawe' che no'len' cha' ga'ne' toze', na' žekla' žon Be' La'y che Dios neda' tzen.

**Da' zdegak benách ka' lawgak lo'a ka'**

**8** Na'a, wchalja' kan nak che da' že'žawžo, dan' bdegak benách ka' lawgak lo'a ka'. Znnagak benách ka': "Yógo'težo napžo yela'

žejn'íl." Da' ni naken dot da' li. Yela' žejn'íl ki žonen ga zka'n zen kwinžo, san yela' nži'il chežo len lježžo žonen ga žáklenžo lježžon'. **2** Cha' zoa no benne' žekle' ba žejn'ile' yógo'te, bi na' chejní'ile' kan žala' chejní'ile', **3** san no benne' nži'ile' Dios, Dios na'kze zóalene' bennen'.

**4** Na'a, kan nak che da' že'žawžo, dan' bdegak benách ka' lawgak lo'a ka', nnezlžo bi be záka'gak lo'a ka' da' jez nnitan' yežlyó nga, na' bi zoa yetó benne' nake' Dios. **5** La'kze zej nnita' da' ka' žékgekle benách ka' zej naken dios ka', da' ka' zej nnitan' ya'abá, na' da' ka' zej nnitan' yežlyó nga, na' da' zan da' žližgak benách ka', na' znnágake' zej naken dios chégake', na' lezka' xángake', **6** san chežo žo'o:

Toze Benne' nake' Dios, Bennen' nake' Xažo.

Le' bene' yógo'te da' zle'elžo, na' zoažo nbanžo nich wká'n zenžo Le'.

Toze Benne' nake' Xanžo,

Bennen' lie' Jesúš, Benne' Criston'.

Lo ne'e Le', Dios bene' yógo'te da' ka' zej nnitan', na' nbánlenžo Le'.

**7** Kege yógo'te lježžo ka' žejn'ígekle' da' ni. Bale', benne' ka' zga'ale bka'n zéngake' lo'a ka', na' zejte na'a ža že'žawgake' da' zdegak benách ka' lawgak lo'a ka', na' žékgekle' da' že'žawgake' napen yela' wak chegak lo'a ka'. Dan' bi nak dot li laže' kan žejl'e gake' che Benne' Criston', che len nbága'gake' zia dan' že'žawgaken'. **8** Da' že'žawžo bi gonen ga gape Dios žo'o

ba la'ne, dan' cha' gawžon, bi gákžežo chawe', na' cha' bi gawžon, bi ga'nžežo ka'ze. <sup>9</sup>Yo'o lo na'le ye'j gawle bíteze. Le gape chi'i kwinle nich bi gonle ga chíxgekle benne' ka' bi nak dot li laže' kan žejlé'gake' che Benne' Criston'. <sup>10</sup>Le žeklo' napo' yela' žejn'il kan nak da' ni, na' gak gawo' bíteze. Cha' kwi'o latje chegak lo'a ka', na' ye'j gawo' da' bdegak benách ka' lawgak lo'a ka', na' cha' lježo', benne' bi nak dot li laže' kan žejlí'e che Benne' Criston', le'ele' le', kate' ne že'j žawo' ga na', na' wak gono' ga ye'j gawe' dan' bdegak benách ka' lawgak lo'a ka'. <sup>11</sup>Cha' gono' ki, gono' ga chixle lježo', bennen' bi nak dot li laže' kan žejlí'e che Benne' Criston'. Ki gaken dan' žeklo' le' napo' yela' žejn'il. ¿Gono' ki che lježo', na' got Benne' Criston' ni'a che bennen'? <sup>12</sup>Cha' ki gono', gono' dola' da' yesbagan' lježo' zia, na' gono' ga chixle' dan' bi nak dot li laže' kan žejlí'e che Benne' Criston', na' lezka' gono' dola' da' zzoan Benne' Criston' chela'ale. <sup>13</sup>Che len, cha' da' ye'j gawa' gonen ga chixle to lježa', biž gawa' bela' na', nich bi gona' ga gon lježan' dola'.

**Da' yo'o lo na' to benne'  
wbás bselá' Jesús**

**9** Neda' naka' benne' wbás bselá' Benne' Criston'. Le' beslakzé' neda'. Neda' ble'ekzla' Xanžo Jesusen'. Nakkzle le'e toze len Benne' Criston' ni'a che žin da' bena' neda' lo wláz Xanžon'. <sup>2</sup>Yezika' benách ka' gak gékgekle' bi naka' benne' wbás bselá' Benne' Criston', san le'e žon byenen géklele naka' benne' wbás chien'. Dan' nakle

le'e toze len Xanžon', da' nákkzzele nak bian' naka' benne' wbás bselá' Xanžon'.

<sup>3-4</sup> Zej nnita' benne' ka' zesbága'gake' neda' zia. Ki žebi'a, na' žápgaka'-ne': nzi' lo na'a nnaba' da' ye'j gawa' dan' žona' žin ni. <sup>5</sup>Lezka' de lo na'a wchág ná'lena' to xkwide' zanžo, xkwiden' žejlé'be' che Benne' Criston', nich gónlenbe' neda' tzen gan zda', kan žongak yezika' benne' wbás ka' bselá' Benne' Criston', na' kan žongak benne' bíche'kze' ka', na' lezka' Bedon!. <sup>6</sup>¿Žéklele le'e toza' neda' len Bernabé žala' gonto' žin te ža, nich gata' da' gawto'? <sup>7</sup>Bi zoa no benne' cheje' lo wdile, cha' bi zoa no benne' chizjwe' le'. Bi zoa no benne' gaze' lba uba ka', cha' bi gak gawe' da' zbiagak lba ka'. Bi zoa no benne' gape' zila' ka', cha' bi gak ye'je' niže' chégakba'. <sup>8</sup>Bi géklele la' nedza' zchalja' ki. Lezka' znnna da' nyejw le'e yiche lo da' bsdle Moissés. <sup>9</sup>Lo dan' bsdle Moisés na' nyejw le'e yiche da' znnan: "Bi ko'o do yixjw žoa'a beže kate' zlejba' zoa' stribé." Bchalj Dios da' ni, kégeze dan' že' laže' beže ka', <sup>10</sup>san nich yebélenžon žo'o. Che len nyejwn le'e yichen', na' benne' zga'ne' beže, na' lezka' benne' žone' ga zlej beže zoa' striben', žoptie' žala' wxén láže'gake' sí'gake' che da' zla' lo yežlyón!. <sup>11</sup>Na'a, cha' bentó' neto' žin gan zoale le'e, dan' naken ka žin žaz, dan' naken che Dios Be' La'y, čéklele bi žala' yebélenito' to da' do' da' den chele kan žebélenle to benne' žaz ža'n da' zlapé'? <sup>12</sup>Yezika' benne' ka', benne' zzejní'igekle' le'e, žebélengekle' da' den chele. <sup>13</sup>Bi žala'že neto' yebélenlon'?

Batkle bebélenlo' da' ni da' nzi' lo na'ton', san bzoelto' yógo'te da' ki nich gak wchaljto' diža' chawe' kan nak che Benne' Criston'.<sup>13</sup> Nnézkzelele kan žak chegak benne' ka' žóngake' žin che yodo', žebélengekle' da' ka' znézjwgak benách che yodo'. Lezka' bxoz ka', benne' zdégake' žen chegak bia beže ka' lo bkog la'y che Dios, žáwgake' bela' chegak bia beže ka'.<sup>14</sup> Lezka' bdixjw Xanžon' kan žala' gak chegak benne' ka' zcháljgake' diža' chawe'. Benne' ka' žebélengekle' da' zcháljgake' žala' wáwgake' lágake'.<sup>15</sup> Neda' batkle bebélenla' da' ni da' nzi' lo na'a, na' da' ni da' zzoja' le'e yiche ni, bi naken nich nnabla' no benne' bi da' wnežjwe' chia'. Žka'n zen kwina' dan' bi be zzi'a kate' zchalja' diža' chawen'. Yénežela' gata' ka go'a latje no benne' nnie' chia' zchalja' diža' chawen' dan' nazjwa'.

<sup>16</sup> Bi yo'o lo na'a wká'n zen kwina' dan' zchalja' diža' chawen', dan' žon byenen wchaljan'. Da' nyáche'le'e gaken chia' neda' cha' bi wchalja' diža' chawen'.<sup>17</sup> Chela' zchalja' diža' chawen' dan' žénekzela', gak nnaba' lazjwa', san žon byenen wchaljan', dan' naken to da' besbaga' Dios neda' gona'.<sup>18</sup> Bižkze yebélenla' cha'? Žebela' dan' bi nazjwa' kate' zchalja' diža' chawen'. Bi žebélenla' dan' yo'o lo na'a dan' zchalja' diža' chawen'.

<sup>19</sup> Na'a, la'kze bi nak nitó benne' xana', ba ben kwina' ka to benne' ndo'w chegak yógo'te benách ka' nich gak gona' ga yelagak bale benách ka'.<sup>20</sup> Kate' zcháljlena' benne' judío ka', žon kwina' ka

to benne' judío nich gak gona' ga yelagak benne' judío ka'. Benne' judío ka' žóngake' kan znna da' bслед Moisés. Che len žon kwina' ka to benne' žone' kan znna xtiže'e na', la'kze bi yoa'a lo na' xtiže'e na'. Ki žona' nich gak gona' ga yelagak benne' ka' žóngake' kan znna xtiže'e na'.<sup>21</sup> Kate' zcháljlena' benách zi'to' ka', benne' ka' bi yó'ogake' lo na' da' bслед Moisés, žon kwina' ka to benne' zi'to' na', nich gak gona' ga yelágake'. Bi ūka'na' ka'ze da' wnná Dios. Neda' žona' kan znna xtiža' Benne' Criston'.<sup>22</sup> Žon kwina' ka to benne' bi nak dot li laže' kan žejli'e che Benne' Criston' nich gak gona' ga yelagak benne' ka' bi nak dot li laže' kan žejl'égake' chie' Le'. Žon kwina' kan zej nak yógo'te benách ka' nich gak gona' ga yelagak bale benne' ka'.<sup>23</sup> Lo yógo'te da' žona', žona' ga gak yéngekle benách ka' diža' chawen', nich gak yebélenla' lágake' tzen diža' chawen'.

<sup>24</sup> Ba nnézkzelele kan žongak benne' ka' žítjgake' lo witje. Žxíte'gake' yógo'tegake', san toze benne' yebélenle' latje blo. Lezka' žala' gonle le'e xchin Dios, gonle kan žongak benne' ka' žítjgake' lo witje, nich gak yebélenlele da' yeb'i Dios chele.<sup>25</sup> Yógo'te benne' ka', kate' zpa' kwíngake' nich gak chítjgake' lo witje, znna bia' kwíngake' lo yógo'te da' žóngake'. Žóngake' ki nich s'gake' to da' naken zin da' nitlen, san si'žo žo'o to da' yebélenzelžon.<sup>26</sup> Che len, naka' neda' ka to benne' dot laže'e žxíti'e. Lezka' naka' ka to benne', dot laže'e zdile', na' bi zdí'a da' nitze.<sup>27</sup> Kan žon to benne' žliže'

benne' ka' nich chejtítjgake' lo witje, lezka' žona' neda', na' zchalja' nich yelagak benách ka'. Bennen' žitje' lo witje žone' ga gak belə' žen chie' wale, na' znna bi'en. Lezka' žona' neda', nich bi wnita' latje chia' lo žin che Dios.

**Bi žala' wká'n zenžo lo'a ka'**

**10** Žénela' wzejni'ilal' le'e, zí'na'do' ka', kan gok chegak xa wdé cheto' ka'. Dios bzoe' to bejw da' wló'on zol yógo'tie' katen' Moisés bchi'e légake' nich žójgake' lo yežlyó Ejipto. Lezka', yógo'tie' wdégake' gachje láwe'le nisdo' tzen len Moisés na'. <sup>2</sup>Lo bejw na', na' lo nisdon', gok chégake' kan žak che to benne' žezóe' nis. Dan' goken chégake' gok bian' gókgake' toze len Moisés na'. <sup>3</sup>Lezka' yógo'tie' bdáwgake' yet xtildon', dan' bnežjw Dios Be' La'y chégake' lo latje dach. <sup>4</sup>Yógo'tie' wé'jgake' nisen' dan' bnežjw Dios Be' La'y chégake', dan' wé'jgake' nisen' dan' bžojen le'e yej na' da' bloe' law Dios Be' La'y, yej na' wbánłengake' légake'. Kan gok yej na' nakkze Benne' Criston', dan' nbánłenžo Le'. <sup>5</sup>La'kze goken ki, bi wyáz laže' Dios yógo'tie'. Che len gótgake' lo latje dach na'.

<sup>6</sup>Yógo'te da' ki naken to da' žedlen žo'o, nich bi se láže'žo da' kegle, kan wzé láže'gaken' légake'. <sup>7</sup>Bi žala' wká'n zenžo lo'a ka', kan bengak bałe benne' ka'. Nyejw le'e yiche la'y da' znnan: "Wžé'gak benne' ka' nich we'j bdáwgake', na' bezó žá'gake', na' béngeake' lni che lo'a na'." <sup>8</sup>Bi žala' gonžo da' kegle, kan bengak bałe benne' ka' da' kegle, na' to žaze gótgake' chonne-

žoa mile'. <sup>9</sup>Bi žala' si' bia'žo Xanžon', kan wzí' bia'gak bałe benne' ka' Le', na' gótgake' dan' bdáwy'a'agak bele snia ka' légake'. <sup>10</sup>Lezka', bi žala' nnežo che Dios kan wnnegak bałe benne' ka' chie' Le', na' to wbás che ya'abá bžia yi'e légake'.

<sup>11</sup>Yógo'te da' ki da' gókgaken chegak xa wdé cheto' ka', žsédeklen žo'o, na' jej nyejwn le'e yiche la'y nich wchébegaken žo'o, dan' ba zoažo ža kate' za' yesyóž Dios che yežlyó nga. <sup>12</sup>Che len, no benne' žekle' nake' benne' wale, žala' gape chi'i kwine', nich bi chixle'. <sup>13</sup>Kan nak da' zzi' bia' le'e, lezka' žaken chegak yógo'te benách ka'. Dios žone' kan znnne', na' bi we'e latje bi da' si' bian' le'e da' bi gak sóelelen, san kate' bi da' si' bian' le'e, na' wloe'le' le'e kan žoje lo na' da' xiwe', nich gak sóelelen.

<sup>14</sup>Che len, zí'na'do' ka', bi wká'n zenle lo'a ka'. <sup>15</sup>Zcháljlena' le'e kan zcháljlena' benne' ka' žejn'igekle'. Le wchi'a laže' da' nnia' na'a. <sup>16</sup>Kate' znnablžo Dios gon la'ye' da' že'jžo kate' žezá' láže'žo kan got Benne' Criston', dan' že'jžon zloe'elen nakžo toze len Benne' Criston', na' žebélenžo da' bene' katen' blalje' xchene', na' gote' le'e yag kroze. Lezka', yet xtilen' da' zzozjžon, na' žawžon, zloe'elen žónlenžo Benne' Criston' tzen, dan' žebélenžo da' bene' katen' bdie' belə' žen chie' lo wlazzó žo'o. <sup>17</sup>La'kze benne' zan nakžo, yógo'težo žawžo toze yet xtilen', da' zloe'elen nakžo toze len toze Bennen', na' che len nakžo ka toze benne'.

<sup>18</sup>Le wia nga kan žongak benne' Israel ka'. Žáwgake' law Dios da'

zdégake' lo bkog la'y chie', na' dan' žáwgake' zloe'elen zej nake' toze len Dios. <sup>19</sup> ¿Bízkze zejlás da' znnia' nga? Bi znnia' zej nape lo'a ka' yela' wak, na' da' zdegak benách ka' lo bkog chegak lo'a ka' bi napen yela' wak. <sup>20</sup> Ki znnia': benne' ka' bi zej nónbi'e Dios, da' zdégake' lawgak lo'a ka', zdégaken' lawgak be' xiwe' ka', na' kege law Dios. Žénela' bi gakle toze len be' xiwe' ka'. <sup>21</sup> Bi gak ye'je dan' zloe'elen nakžo toze len Xanžon', na' lezka' dan' wloe'elen nakle toze len be' xiwe' ka'. Bi gak gawle dan' zloe'elen žónlenžo Xanžon' tzen, na' lezka' dan' wloe'elen žónlenle be' xiwe' ka' tzen. <sup>22</sup> ¿Gonžo ga ge'ele Xanžon' žo'o? ¿Zéklele nápžele yela' wak ka' da' nape' Le'?

### Da' žala' gonžo dan' nži'ilžo lježžo ka'

<sup>23</sup> Nak dot da' li da' znnan: "Yógo'te nzi' lo nažo gonžon." Na'a, neda' znnia': kege yógo'ten žala' gonžon. Yógo'te nzi' lo nažo gonžon, san kege yógo'ten gonen ga gakže dot li laže' kan žeje'žo che Benne' Criston'. <sup>24</sup> Žala' we' láže'žo gonžo da' gonen ga gak chawe' chegak lježžo ka', na' kégeze da' gonen ga gak chawe' che la' kwínzežo.

<sup>25</sup> Bíte'teze da' žóte'gak benách ka' lawe' ya'a, wak gawlen, na' bi be žala' nnable chen, nich bi kwe' zede lázdo'le. <sup>26</sup> Nyejw le'e yiche da' znnan: "Che Xanžon' nak yežlyó nga, na' lezka' yógo'te da' zej nnita' yežlyó nga."

<sup>27</sup> Cha' to benne' wliže' le'e, benne' bi žeji'e che Dios, nich yidle liže', na' yénelele chejle, le ye'j le gaw bíte'teze da' wkoé'e lawle, na' bi

be nnable chen, nich bi kwe' zede lázdo'le. <sup>28</sup> Cha' no benne' yi'e le'e: "Da' ni bdégake' lawgak lo'a ka'" bi gawlen nich gak chawe' che bennen' bloe'elen' le'e, na' nich bi kwe' zede lázda'we'. <sup>29</sup> Znnia': "Nich bi kwe' zede lázdo'w bennen' bloe'elen' le'e" na' kege nich bi kwe' zede lázdo'le le'ekze.

Wak no benne' nnable' neda', na' nne': "¿Bíz chen' žala' wzóa' chela'ale da' nzi' lo na'a gona' dan' zbe' zeden lázdo'w benne' yoble?" <sup>30</sup> Lezka' gak nna bennen': "Cha' yapa' Dios: žóxkeno', ni'a che da' žawa', čbiž chen' yesbaga' no benne' neda' zia ni'a che da' žawan?" <sup>31</sup> Ka nak bi da' ye'j gawle, o bíte'teze da' gonle, le gon yógo'ten nich ga'n zen Dios. <sup>32</sup> Bi be gonle da' gonen ga chíxgekle benne' judío ka', na' bi be gonle da' gonen ga chíxgekle benne' ka' bi zej nake' benne' judío ka', na' bi be gonle da' gonen ga chíxgekle benne' ka' zej nake' che Dios. <sup>33</sup> Le gon kan žona' neda', kan že' laža'a gona' da' chaz láže'gak yógo'te benách ka', na' bi že' laža'a gona' da' yebélenla' nedza', san da' yebélengekle yezika' benách ka' nich yelágake'!

**11** Le gon kan žona' neda', kan neda' lezka' žona' kan ben Benne' Criston'.

### Da' žala' gongak no'le ka' zej nake' che Jesús

<sup>2</sup> Zapa' le'e ba la'ne, zí'na'do' ka', dan' žejsá' láže'tezle neda', na' nzi' lo na'le xtiža' Dios da' bdia' lo na'le. <sup>3</sup> Na'a, žénela' chejní'ilele nak Benne' Criston' Xangak yógo'te benne' byo ka', na' benne' byon'

nake' xan zo'le', na' Xažo Dios nake' Xan Benne' Criston'. <sup>4</sup>Cha' no benne' byo zcháljlene Dios, o zchalje lo wláz Dios, na' nxoe zlapo'e, zka'ne' Benne' Criston' ka'ze. <sup>5</sup>Na'a, cha' to no'le zcháljlene Dios, o zchalje lo wláz Dios, na' bi be nxoe yichje', zka'ne' benne' byo chie' ka'ze, na' naken chie' kan nak che to no'le lee, no'len' nžog yicha' yichje'. <sup>6</sup>Cha' bi be nxoa no'len' yichje', žala' chog yicha' yichje'. Cha' gon ga yedoe'ele no'len' cha' no benne' choge' yicha' yichje', na' žala' bi xoe yichje'. <sup>7</sup>To benne' byo bi be žala' xoe yichje' kate' zlee law Dios, dan' nake' lo Dios, na' dan' nak benne' byon' zloee lawn yela' zen che Dios, san da' nak no'len' zloee lawn yela' zen che benne' byo chien'. <sup>8</sup>Katen' Dios bene' benne' ka', bi wleje' benne' byon' lo no'le. No'len', lo benne' byon' wleje' le'. <sup>9</sup>Lezka', bi ben Dios benne' byon' nich yebélenle no'len' le', san bene' no'len' nich yebélenle benne' byo chie' le'. <sup>10</sup>Che len, no'len' žala' xoe yichje' da' zloeelen zoa no benne' byo nake' xane' dan' zwíagak wbás che ya'abá ka' žo'o. <sup>11</sup>Na'a, law Xanžon', žon byenen soa to no'le che benne' byo, na' lezka' soa to benne' byo che no'le. <sup>12</sup>Kan ben Dios, wleje' no'len' lo benne' byon', lezka' na'a, benne' byo náljlene' no'le, na' yógo'te zžójgaken lo na' Dios.

<sup>13</sup>Le wchi'a laže' la' leeze. čžala' wchaljlén to no'le Dios, na' bi be xoe yichje'? <sup>14</sup>¿Bi zsedle yela' nakze che benách, žala' yedoe'ele benne' byon', cha' žoee latje tonn yicha' yichje'? <sup>15</sup>Na'a, cha' ntonn yicha' yichj no'len', naken yela' xtan

chie', dan' benn Dios yicha' yichje' nich yesbinen yichje'. <sup>16</sup>Cha' zoa no benne' yénele' wžie che da' ni, kíte'ze nzi' lo na'to' žonto', na' tlebe kan žongak yógo'te kwe' benách ka' che Dios.

### Da' ţe'j žawžo nich yesá' láže'žo kan got Xanžo

<sup>17</sup>Bi žapa' lee ba la'ne kan nak da' wzejni'ilá' lee na'a. Da' žonle katen' zdoble che Benne' Criston', bi žonen ga žak chawe' chele, san žonen ga žak chele da' zinnj. <sup>18</sup>Zzo lawa' zzejni'ilá' lee da' ni da' zzéngekle benách ka' neda', na' znñágake' kate' zdoble che Benne' Criston', nžoj chóplele, na' žejli'a ki naken. <sup>19</sup>Žon byenen nníta' lengak benne' ka' lee, benne' ka' zsédgekle' da' wen laže', nich gak bia'gak benne' ka' zej nake' da' li benne' ka' che Benne' Criston'. <sup>20</sup>Che len, kate' zdoble, dan' ţe'j žawle tzen bi naken da' ţe'j žawžo nich yesá' láže'žo kan got Xanžon'. <sup>21</sup>Ki naken dan' žon byenle to tole ţe'j žawle da' nwa'le che chele kate' ţe'j žawle tzen, na' che len zdonle bále, na' yebále ţe'j žawle na' zejte zzózlele. <sup>22</sup>¿Bi zoa ližle gan gak ye'j gawle? Kan žonle, zka'ne benách ka' che Dios ka'ze, na' žonle ga žedo'egekle benne' ka' bi be de chégake'. ¿Bízukze yapa' lee? ¿Gapa' lee ba la'ne? Bi žapa' lee ba la'ne kan nak da' ni da' žonle.

<sup>23</sup>Xanžo na'kze bdie' lo na'a dan' bsedila' lee, kan ben Xanžo Jesusen' yelen' katen' to benne' bdie' Le' lo na'gak benne' ka' bétgake' Le'. Bexwe' yet xtil, <sup>24</sup>na' wdé gože' Dios: "Zóxkeno" na' bzozjen', na' wnné: "Le gawn. Da' ni naken

xpela'a da' nzozjen lo wlazle le'e. Le gon ki nich chejsá' láže'le kan gak chia' neda.' <sup>25</sup>Lezka', wdé bdáwgaken', bexwe' to zíga'do', na' wnné: "Da' yožen zíga'do' ni naken xchena', da' žon chochen diža' kobe da' zka'n chawen'. Le gon ki yógo'te chi'i ye'jlen nich chejsá' láže'le kan gak chia' neda.' <sup>26</sup>Ki žala' gonle na' zejte ža yelá' Xanžon'. Yógo'te chi'i gawle yet xtil ki, na' ye'jle che zíga'do' ki, wloé'elele law kan got Xanžon'.

<sup>27</sup>Che len, kate' no benne' gawe' yet xtil ni, o ye'je' che zíga'do' ni che Xanžon', cha' bi žapen' ba la'ne, nbage'e zia dan' žone' dola', zka'ne' xpela', na' xchen Xanžon' ka'ze. <sup>28</sup>Che len, žala' wchi'a láže'žo la' kwínzežo to tožo, na' naž gak gawžo yet xtil ni, na' ye'jžo che zíga'do' ni. <sup>29</sup>No benne' že'j žawen', bi žapen' ba la'ne cha' bi žákbe'ele' zloe'elen da' gok che belá' žen che Xanžon', na' žesbaga' kwine' dola' ni'a che da' že'j žawe'. <sup>30</sup>Che len da'gak benne' zan ka' yižwé', benne' žónlengake' le'e tzen, na' zkwíde'gekle', na' benne' zan ba gótgake'. <sup>31</sup>Chela' wchi'a láže'žo la' kwínzežo, bi gon byenen wchi'a láže' Xanžon' žo'o. <sup>32</sup>Cha' gon byenen wchi'a laže' Xanžon' žo'o, na' wsaka' zi'e žo'o, nich bi gon byenen choge' chežo gatžo katen' choge' chegak benne' ka' gátgake', benne' ka' nnít'a'gake' yežlyó nga.

<sup>33</sup>Che len, zína'do' ka', kate' doble nich ye'j gawle nich chejsá' láže'le kan got Xanžon', le kwez tole yetole. <sup>34</sup>Cha' zoa no benne' zdone', žala' gawe' gan nak lo yo'o liže', nich bi gon byenen wchi'a laže' Dios le'e

kate' doble. Zej nnita' yebale da' ka' žonle, san wká'n chawa'a da' ka' katen' yedjwía' le'e.

Yela' wak ka' da' žonn

Dios Be' La'y chežo

**12** Na'a, zína'do' ka', žénela' chejní'ilele kan zej nak yela' wak ka' da' žonn Dios Be' La'y chežo.

<sup>2</sup>Nnézkzelele kan goken katen' bi na' chejle'le che Benne' Criston', be'le latje bche'gak benách ka' le'e ga yoble. Bka'n zenle lo'a ka', da' ka' bi znnégaken. <sup>3</sup>Che len, zzejni'ilá' le'e ki, na' znnia': ladjw yógo'te benne' ka' zcháljgake' lo wláz Dios Be' La'y, bi gak nitó benne' nne zi'e che Jesúš, na' bi gak nitó benne' nne: "Jesús nake' Xanžo" cha' bi zoalén Dios Be' La'y le'.

<sup>4</sup>Na'a, nžá'gak to to da' ka' da' žonn Dios Be' La'y chežo, san toze nak Be' La'y na'. <sup>5</sup>Lezka', nžá'gak to to žin ka' da' zde Xanžon' lo nažo, san toze nak Xanžon'. <sup>6</sup>Lezka' nžá'gak to to yela' wak ka' da' napžo da' žónlenžo xchin Dios, san toze nak Xažo Dios, Bennen' žonne' chežo yela' wak ka' nich gonžo xchine'. <sup>7</sup>Dios žonne' che chežo to da' nak bian' napžo yela' wak che Dios Be' La'y, da' žebélenžon yógo'težo. <sup>8</sup>Dios Be' La'y znezjwe' yela' wak che to benne' nich wchalje' len yela' žejní'il, na' Be' La'y na'kze znezjwe' yela' wak che yetó benne' nich wchalje' lo yela' sina'. <sup>9</sup>Lezka', Dios Be' La'y na'kze znezjwe' yela' žejlé' che Benne' Criston' che yetó benne' nich bi da' gone', na' znezjwe' yela' wak che yetó benne' nich yejone' benne' yižwé' ka'. <sup>10</sup>Znezjwe' yela' wak che

yetó benne' nich gone' yela' wak ka' che ya'abá che Dios, na' žoe'e yetó benne' latje wchalje' lo wláz Dios, na' znezjwe' yela' wak che yetó benne' nich gákbe'le' cha' be' da' yo' to benne' naken che Dios o cha' naken che da' xiwe'. Znezjwe' yela' wak che yetó benne' nich wchalje' diža' yoble da' bi nsedle', na' znezjwe' yela' wak che yetó benne' nich wdíe' diža' yoblen' da' bi nsedle'. <sup>11</sup> Yógo'te da' ki žon Dios Be' La'y na'kze, dan' znezjwe' yela' wak ka' che to to benne' kan žénekzele' Le'.

### **Yógo'težo nakžo ka toze benne'**

<sup>12</sup> Kan nak toze bela' žen chežo, la'kze da' zan da' ka' jez žian lo bela' žen chežo, san da' zan ka' da' jez žian lo bela' žen chežo jez naken toze len bela' žen chežo, lezka' naken che Benne' Criston'. <sup>13</sup> Dan' zoalen Dios Be' La'y ž'o'o, da' ni naken chežo ka to da' bezoažo nis, da' nak bian' nakžo ka toze benne', la'kze nakžo benne' judío ka', na' benne' zi'to' ka', na' lezka' benne' ndo'w ka', na' benne' ka' bi jez ndo'e. Yógo'težo, Dios bi'e ž'o'o latje si'žo da' znezjw Dios Be' la'y na'kze chežo.

<sup>14</sup> Na'a, ka nak bela' žen chežo, da' zan da' jez žian lo bela' žen chežo, na' kege tozen. <sup>15</sup> Chela' gak wchálj ní'ažo, wak nnan: "Dan' bi naka' na' benne' ni, bi naka' chie'" da' ni bi gonen ga bi naken chie'.

<sup>16</sup> Chela' gak wchálj nagžo, wak nnan: "Dan' bi naka' yej lawe', bi naka' che benne' ni" da' ni bi gonen ga bi naken chie'. <sup>17</sup> Chela' nak dot bela' žen chežo yej lawžo, čnakxkze gak yenlžo? Chela' nak doten nagžo,

čnakxkze gak le'el zína'žo? <sup>18</sup> Na'a, Dios bzoe' yógo'te da' ka' da' jez žian lo bela' žen chežo kan gónekzele' Le'. <sup>19</sup> Chela' nak toze da' žian lo bela' žen chežo, na' biž soa bela' žen chežo. <sup>20</sup> Na'a, kan nakžo, da' zan da' jez žian lo bela' žen chežo, san toze bela' žen nakžo.

<sup>21</sup> Che len, yej lawžo bi gak yen' na'žo, na' nnan: "Bi žon byenen sóaleno' neda!" Lezka', yichjžo bi gak yen' ní'ažo, na' nnan: "Bi žon byenen sóalénle neda!" <sup>22</sup> Na'a, da' ka' da' jez žian lo bela' žen chežo, da' ka' žeklžo jez nkwidé'žen, da' ki žon byénežen kwiágaken lo bela' žen chežo. <sup>23</sup> Lezka', da' ka' da' jez žian lo bela' žen chežo, da' ka' žeklžo jez nakžen ka'ze, da' ki zwákwžežon chawé', na' da' ka' žeklžo bi žala' la' lágaken, zwákwžežon xtan. <sup>24</sup> Bi žon byenen gonžo ki che da' ka' jez nakže xtan che da' ka' da' jez žian lo bela' žen chežo. Dios bene' bela' žen chežo, na' bene' ga záka'že da' žeklžo ž'o'o nakžen ka'ze. <sup>25</sup> Ki bene', na' bi nžoj chóplegak da' ka' da' jez žian lo bela' žen chežo, dan' žape chí'igaken ljéžgaken ton yetón. <sup>26</sup> Cha' gak zi' to da' žian lo bela' žen chežo, gakgak zi' tzen len dan' yógo'te da' ka' da' jez žian lo bela' žen chežo, na' cha' to da' žian lo bela' žen chežo, zoa bi da' žebélenlen, na' yógo'te da' ka' da' jez žian lo bela' žen chežo žebélengeklen tzen len dan'.

<sup>27</sup> Na'a, le'ekze nakle toze len bela' žen che Benne' Criston', na' to tole nakle ka to da' ka' da' jez žian lo bela' žen chien'. <sup>28</sup> Lezka', ladjw benách ka' che Benne' Criston', Dios bnnite' benne' ka' žóngake' xchine'.

Ga nežw bnnite' benne' wbás ka'  
che Benne' Criston'.  
Ga bežope bnnite' benne' ka'  
zcháljgake' lo wlaze' Le'.  
Ga beyonne bnnite' benne' ka'  
žsédgekle' benne' chie' ka'.  
Naž bnnite' benne' ka' žóngake'  
yela' wak che ya'abá ka'.  
Naž bnnite' benne' ka'  
žeyóngake' benne' yižwé' ka'.  
Naž bnnite' benne' ka'  
žákłengake' lježžo ka'.  
Naž bnnite' benne' ka'  
zloé'egekle' žo'o žin da'  
gonžon.  
Naž bnnite' benne' ka'  
zcháljgake' diža' yoble da' bi  
zej nsedle'.

<sup>29</sup>Kege yógo'tie' jez nake' benne'  
wbás ka' che Benne' Criston'. Kege  
yógo'tie' zcháljgake' lo wláz Dios.  
Kege yógo'tie' žsédgekle' benne' chie'  
ka'. Kege yógo'tie' žóngake' yela'  
wak che ya'abá ka'. <sup>30</sup>Kege yógo'tie'  
nzi' lo ná'gake' yeyóngake' benne'  
yižwé' ka'. Kege yógo'tie' zcháljgake'  
diža' yoble da' bi jez nsedle'. Kege  
yógo'tie' zdégake' diža' yoble da'  
bi jez nsedle'. <sup>31</sup>Le we' laže' si' lo  
na'le yela' wak ka' da' záka'gakžen.  
Na'a, wloe'ela' le'e to da' záka'žen ka  
yógo'te da' ki.

### Žala' ži'ilžo lježžo kan Jesús nži'ile' žo'

**13** La'kze zchalja' xtíža'gak  
benách ka' da' bi nsedla',  
na'lezka' xtíža'gak wbás che ya'abá  
ka', san cha' bi nži'ilá' lježža', dan'  
zchaljan' bi záka'žen ka žaxto' da'  
žon to bžejw da' zkwežžon o da' žon  
to ya da' ztilžon len lježen. <sup>2</sup>La'kze  
nzi' lo na'a wchalja' lo wláz Dios,

na' nich chejni'ila' yógo'te da' jez  
ngachen', na' yógo'te diža' che yela'  
žejn'íl, na' la'kze nak dot li laže'  
kan žejli'a che Dios, na' jezte gak  
yeká'a ya'a zen ka', san cha' bi nži'ilá'  
lježža', bi be zaka'a neda'. <sup>3</sup>La'kze  
chisa' dot da' de chia' nich wawa'  
benách yache' ka', na' la'kze wdía'  
bela' žen chia' ga wzeygak benách  
ka' len dan' naka' toze len Benne'  
Criston', san cha' bi nži'ilá' lježža', bi  
yebélenla' dan' žona'.

- <sup>4</sup>No benne' nži'ile' lježže':  
Zbeze' zen laže', na' nake' ži'i  
laže'.
- Bi zge'ele' lježže'.
- Bi zka'n zen kwine', na' bi žon  
kwine' benne' blo'.
- <sup>5</sup>Bi žone' da' kegle, na' bi zdan  
laže' e yela' gape.
- Bi zža'atие', na' bi žejsá' laže' e da'  
zinny da' ben no benne' chie'.
- <sup>6</sup>Bi žebele' kate' no benne' žone'  
da' kegle.
- Žebele' kate' no benne' znné' da'  
nak dot da' li.
- <sup>7</sup>Zzoele' bíte'ze da' gon lježže'  
chie'.
- Žejlé'ze' che lježže', na' žzen  
láže'ze' gon lježže' da' nak  
chawé'.
- Zbékzeze' zen laže'.
- <sup>8</sup>Yela' nži'il batkle te chen. Te  
che da' nzi' lo na'gak benách ka'  
wcháljgake' lo wláz Dios. Žin ža  
katen' biž gata' lo na'gak benách  
ka' wcháljgake' diža' yoble da' bi  
zej nsedle', na' te che yela' žejn'íl  
chegak benách ka'. <sup>9</sup>Láte'ze  
žejn'ílžo na'a, na' láte'ze zchaljžo  
lo wláz Dios. <sup>10</sup>Kate' žin da' naken  
dot li laže', naž yeyóž che da' naken  
láte'ze.

<sup>11</sup>Katen' goka' xkwide', bchalja' ka to xkwide', na' wlék yichja' ka to xkwide', na' wzá' laž'a ka to xkwide'. Kate' bgola', na' bka'na' da'zej naken che bi' kwide' chia'. <sup>12</sup>Na'a da' zle'elžo nakzen ka da' zle'elžo kate' zwia kwinžo to lo yej wan. Bi zle'elžo dot kan naken. Ža da' za' le'elžo yógo'te dot kan zej naken. Na'a nónbi'a láte'ze. Ža da' za' gónb'i'a yógo'te kan Dios na'kze nónbi'e neda'. <sup>13</sup>Na'a, nníta'tezgak yela' žejl' che Dios, na' yela' žxen laž'e Dios, na' yela' nži'il. Zej nnita' da' chonnie ki, san da' záka'že naken yela' nži'il.

**Yela' wak da' žonn Dios Be'  
La'y chežo da' záka'žen**

**14** Le gon byene ž'iilele lježle ka', na' le we' laž'e si'le yela' wak ka' da' žonn Dios Be' La'y chežo, na' da' naken blo, yela' wak wchaljile lo wláz Dios. <sup>2</sup>No benne' zchalje' diža' yoble da' bi nsedle', kege benách ka' zcháljlene'. Dios zcháljlene', dan' bi zoa nitó benne' žejni'ile' da' znne'. Dios Be' La'y žoe'e bennen' latje zchalje' kan zej nak da' ka' zej ngache' che Dios. <sup>3</sup>Bennen' zchalje' lo wláz Dios, zcháljlene' benách ka' nich gakže dot li laž'e kan žejl'é'gake' che Benne' Criston'. Žon choche' légake', na' žeyón zene' légake'. <sup>4</sup>Bennen' zchalje' diža' yoble da' bi nsedle' žon choche' la' kwinze', san no benne' zchalje' lo wláz Dios žon choche' yógo'te benách ka' che Benne' Criston'.

<sup>5</sup>Žak laž'a wchaljile yógo'tele diža' yoble da' bi nsédlele, san da' žénežela' naken wchaljile lo wláz Dios. Žebélenželžo da' znna

to benne' zchalje' lo wláz Dios ka žebélenžo da' znna to benne' zchalje' diža' yoble da' bi nsedle', cha' bi zoa no benne' gak wdíe' diža' yoblen' da' bi nsedle', nich gon choche' benách ka' che Benne' Criston'. <sup>6</sup>Che len, zí'na'do' ka', kate' la'a gan zoale, cha' wcháljlena' le'e diža' yoble da' bi nsedla', bi be yebélenlelen. Yebélenlele toze dižan' da' wcháljlena' le'e da' bloe'el Dios neda', o diža' da' wzejni'ilen žo'o, o diža' da' wchalja' lo wláz Dios, o diža' da' wsedlen žo'o.

<sup>7</sup>Lezka' žaken che da' ka' žóngaken žaxto', da' ka' bi zej nnita' nbángaken, kan nak bžejw da' zkwežon, o kan nak gitarra. Cha' bi žolgaken kan žala' gólgaken, čnakxkze gónbia'žo biž da' žolgaken, dan' žol bžejw na', o gitarra na'? <sup>8</sup>Cha' bi kwež kan žala' kwež lozban' da' žližen benne' ka' lo wdile, čnožkze benne' wpá' kwine' nich cheje' lo wdilen? <sup>9</sup>Lezka' žaken chele. Cha' len lóže'le zchalje' diža' da' bi zej nsedle benách ka', bi chejn'igekle' da' wchaljile. Ki gaken, dáche'ze wchaljile. <sup>10</sup>Da' li zej nnita' da' zan diža' yoble yežlyó nga da' ka' zchaljgak da' zan kwe' benách zi'to' ka, na' zej nnita' benách ka' žejn'igekle' to to diža' yoble ka'. <sup>11</sup>Na'a, cha' bi žejni'ila' diža' da' zchalj to benne', gaka' ka to benne' zi'to' law bennen' zchalje', na' le' gake' law'a neda' ka to benne' zi'to'. <sup>12</sup>Lezka' naken chele. Že' lážel'e'le si'le da' žonn Dios Be' La'y chežo. Che len, le we' laž'e si'le da' ka' góngaken ga gákgakže choch benách ka' che Benne' Criston'.

<sup>13</sup>Che len, no benne' zchalje' diža' yoble da' bi nsedle' žala' nnable'

Dios wnejjwe' le' yela' wak wdíe' diža' yoble dan' zchalje'. <sup>14</sup>Kate' žiliža' Dios, cha' zchalja' diža' yoble da' bi nsedla', lo be' nakkza' cháwe'do' žiliža' Dios, san dan' bi žejni'ila' da' znnia', lo yela' žejni'il chia' bi žebélenla' dan' zchalja'. <sup>15</sup>¿Nakxkze žala' gona' cha'? Wliža' Dios lo be' nakkza', na' lezka' lo yela' žejni'il chia' wliža'-ne'. Gola' da' we lawa' Dios lo be' nakkza', na' lezka' lo yela' žejni'il chia' gola' da' we lawa'-ne'. <sup>16</sup>Cha' toze lo be' nakkzo' žliž la'yo' Dios, na' cha' zoa to benne' žénzele' chio', san cha' bi žejni'ile' dan' zchaljo', čnakxkze gak nne': "Ka'kze gaken" ni'a che dan' zchaljo', kate' ži'o Dios: "Žóxkeno?" <sup>17</sup>Wákelja cháwe'do' zchaljo', kate' ži'o Dios: "Žóxkeno!" Cha' bi žejni'il bennen' ženle' da' zchaljo', bi be yebélenlen'. <sup>18</sup>Žapa' Dios: "Žóxkeno" dan' zchaljža' diža' yoble da' bi nsedla' ka yogo'tele. <sup>19</sup>Lawgak benách ka' che Dios yénežela' wchalja' gáyo'ze diža' da' gak chejn'igekle benách ka' ka da' zan gaywá' diža' yoble da' bi nsedla', na' da' bi gak chejn'il nitó benne'. Gak wsedla' yezika' benách ka' toze cha' chejn'igekle' dan' wchalja'.

<sup>20</sup>Zí'na'do' ka', bi gakle ka xkwide' ka' kan nak da' zza' láže'le. Le gak ka xkwide' ka' nich bi gonle da' kegle, san le gak benne' ka' ba jez ngole' kan nak da' zza' láže'le. <sup>21</sup>Nyejw le'e yiche la'y da' znnan: "Len diža' yoble, na' len žoá'agak benách zi'to' ka' wcháljlenna' benách ki. La'kze gona' ki, bi wzé nágkake' xtiža'a." Ki znnna Xanžon'. <sup>22</sup>Ki naken, Dios žoe'e žo'o latje zchaljžo diža' yoble da' bi nsedlžo

nich gaken to da' nak bian' lawgak benách ka' bi žejlé'gake' che Benne' Criston', na' kege lawgak benne' ka' žejlé'gake' chie' Le'. Žoe'e žo'o latje zchaljžo lo wlaze' Le' da' žala' si'gak benne' ka' žejlé'gake' che Benne' Criston', na' kege benne' ka' bi žejlé'gake' chie'. <sup>23</sup>Che len, kate' doble tzen, yogo'tele le'e, nole nakle che Benne' Criston', cha' wchaljle diža' yoble da' bi nsedle, na' cha' chazgak benne' ka'zej nsedle' láte'ze, o benne' ka' bi na' chejlé'gake' che Benne' Criston', ċbi nnágake': "Nyal yichle"? <sup>24</sup>San cha' yogo'tele wchaljle lo wláz Dios, na' cha' cho'o to benne' bi žejli'e che Benne' Criston', o to benne' nsedle' láte'ze, na' gákbe'ele' nbage'e zia, na' Dios wchi'a laže'e le'. Ki gákbe'ele' dan' yenle' diža' da' wchaljle yogo'tele. <sup>25</sup>Gákbe'ele' kan nak da' zza' laže'e, dan' bgachen', na' wzóa zibe', na' wká'n zene' Dios, na' nne': "Da' li Dios zóalene' le'e."

### Kan žala' gonžo gan zdobžo che Jesúš

<sup>26</sup>Che len, zí'na'do' ka', kate' zdoble che Benne' Criston', to benne' zóalene' le'e žole' to salmo, na' yetóe' žsedle' le'e to da' nsedle', na' yetóe' zloe'ele' le'e to da' bloe'el Dios le', na' yetóe' zchalje' diža' yoble da' bi nsedle', na' yetóe' zdie' diža' yoblen' da' bi nsedle'. Yogo'te da' gonle žala' gaken da' yebélengekle benne' ka' zdóbgake' che Benne' Criston'. <sup>27</sup>Kate' nnítiga'gak benne' ka' ga na', benne' ka' zcháljgake' diža' yoble da' bi jez nsedle', bi žala' wchaljgak ki benne' zanže ka chope chónnzele. Gak wchálj toze bennen', na' te na'

gak wchalje' yetóe', san žon byenen soa no benne' wdíe' diža' yoblen' da' bi nséidle. <sup>28</sup> Cha' bi gak no benne' wdíe' diža' yoblen' da' bi nséidle, na' bennen' zchalje' diža' yoblen' da' bi nséidle, žala' soe' žize gan ndoble, na' gak wcháljlene' Dios len dižan' lo yichj lázda'we'. <sup>29</sup> Lezka', benne' ka' zchaljgake' lo wláz Dios žala' wchaljgake' chope chonnze', na' yezika' benne' ka' zchaljgake' lo wláz Dios žala' wchi'a láže'gake' da' zchalj bennen'. <sup>30</sup> Cha' Dios wloe'ele' to benne' ū'e ga na' da' znna xtiže'e dan' zchalj bennen', na' žala' soa žize bennen' zchalje'. <sup>31</sup> Yogo'tele gak wchaljle lo wláz Dios to tole nich wséidle yogo'tele, na' gakle choch yogo'tele. <sup>32</sup> Benne' ka' zchaljgake' lo wláz Dios gak nna biá'gake' kwíngake', na' kwé'gake' žize. <sup>33</sup> Kege Dios žone' ga žonžo žo'osbé, dan' ženele' Le' gánlenžo lježzo ka' chawé'do', kan žone' gan zej nnita' yogo'te kwe' benách ka' che Benne' Criston'.

<sup>34</sup> No'le chele ka' žala' kwé'gake' žize gan zdoble. Bi nzi' lo ná'gake' wchaljgake' ga na'. Žala' kwé'gake' gaxjw laže' kan znna xtiža' Dios. <sup>35</sup> Cha' ženegekle' chejn'i'igekle' yelate', žala' nnábgekle' benne' byo che chégake' kate' ne nnít'a'gake' lížgake'. Bi žala' wchaljgak no'le ka' gan zdóbgake' che Dios.

<sup>36</sup> ¿Žéklele le'e Dios bnežjwe' xtiže'e lo na'le le'eze? ¿Žéklele le'e bžin xtiža' Dios chezle le'e? <sup>37</sup> Cha' zoa to benne' ládjwle, benne' žekle' zchalje' lo wláz Dios, o žekle' zoalen Dios Be' La'y le', benne' ni žala' si' lo ne'e nak da' zzoja' chele le'e yiche ni da' bsedle Xanžon'.

<sup>38</sup> San cha' bi wzé nage' diža' ni, bi žala' wzé nagle le'e che bennen'.

<sup>39</sup> Che len, zí'na'do' ka', le we' laže' wchaljle lo wláz Dios, na' bi wséwjle xnez no benne' zchalje' diža' yoble da' bi nsedle'. <sup>40</sup> Žala' gonžo yogo'te kan nak chawe', na' kan žala' gaken.

Kan gok, bebán Benne'  
Cristo lo yela' got

**15** Na'a, zí'na'do' ka', wzenla' le'e kan nak diža' chawen' da' bchalja' gan zoale, dan' wzí' lo na'le, na' žonen ga nakže li laže' kan žejele'le che Benne' Criston'. <sup>2</sup> Ni'a che dižan' yelale, cha' gonle kan znna diža' chawen' dan' bchaljan' gan zoale, cha' da' li bejle'le che Benne' Criston'.

<sup>3</sup> Kate' bžina' gan zoale da' nežw chi'i bđia' lo na'le da' bde Dios lo na'a neda'. Ki znnan: "Got Benne' Criston' lo wlazzó ž'o dan' wbága'žo doł'a." Kan nak da' ni nyejw le'e yiche la'y, na' znnan ben byenen benen'. <sup>4</sup> Lezka' znnan: "Bgache'e lo yežw ba, na' kate' bza' a chonne ža, na' bebane' lo yela' got" kan lezka' nyejw le'e yiche la'y, na' znnan ben byenen goken chie'.

<sup>5</sup> Wdé bebane' bloe'e law Benne' Criston', na' Bedon' ble'ele' Le', na' wdé na', benne' chežinno wbás chie' ka' blé'egekle' Le'. <sup>6</sup> Naž Benne' Criston' bloe'e lawe' lawgak benne' zanže ka gayo' gaywá' lježzo ka', benne' ka' žeje'gake' chie' Le', kate' ne zej ndobe' tzen. Yogo'te lježzo ki nnít'a'gake' nbángake' na'a, la'kze bale' ba gótgake'. <sup>7</sup> Naž Jakob ble'ele' Le', na' wdé na' bloe'e lawe' lawgak yogo'te benne' wbás chie' ka'.

<sup>8</sup>Kate' ze lawte lezka' błoe'e lawe' lawa' neda'. Kan gok da' ni, naka' ka to żkwidé' goljbe' kate' ba wdé ža żala' galjbe'. <sup>9</sup>Ki naken dan' nexjwa' neda' ka yógo'te benne' wbás chie' ka', na' bi naka' neda' zi gaka' wbás chie', dan' wžia laža'a benách ka' che Dios. <sup>10</sup>Na'a, ni'a che da' besbaga' Dios neda', naka' da' naka' na'a, na' kege da' nitze bene' chia' ki. Benža' neda' xchine' ka yezika' wbás chie' ka', la'kze kege žakze chia' bena' žin na'. Dios na'kze, lo yela' ži'i laže' chie', bkonle' neda' žin. <sup>11</sup>Na'a, cha' bchalja' neda' o cha' bchaljgak yebale benne' ka', da' ni naken da' zchaljton', na' da' bejle' le' le'e.

### Yebanžo lo yela' got

<sup>12</sup>Zzoa lito' che Benne' Criston' kan bebane' lo yela' got. Cha' ki naken, żnakżkze znnale bálele le'e: "Bi yebangak benne' gat ka?" <sup>13</sup>Chela' bi yebangak benne' gat ka', bi bebán Benne' Criston', <sup>14</sup>na' chela' bi bebán Benne' Criston', dáche'ze nak da' zzoa lito', na' dáche'ze nak yela' żejlé' chele chie' Le'. <sup>15</sup>Lezka', chela' bi bebán Benne' Criston', žon laže'to' kate' zzoa lito' kan nak che Dios, na' znnato' besbane' Benne' Criston'. Chela' bi yesbane' benne' gat ka', Dios bi besbane' Benne' Criston'. <sup>16</sup>Chela' bi yebangak benne' gat ka', bi bebán Benne' Criston', <sup>17</sup>na' chela' bi bebán Benne' Criston', dáche'ze nak yela' żejlé' chele chie' Le', na' jez nga'n dola' da' nbágale. <sup>18</sup>Lezka', benne' ka' ba gótgake', na' bejlé'gake' che Benne' Criston', to chi'ize gótgake' cha' bi bebane' Le'. <sup>19</sup>Cha' toze kate' ne zoažo nbanžo

gak yebélenlžo Benne' Criston', nakže da' nyache' chežo ka da' nak chegak yógo'te benách ka'.

<sup>20</sup>Na'a, da' li bebán Benne' Criston' lo yela' got, na' nake' Benne' nežw, bennen' bebane' to chi'ize ládjwgak yógo'te benne' ka' yebángake' to chi'ize lo yela' got. <sup>21</sup>Kan bła' yela' got ni'a che da' ben to benne', lezka', ni'a che da' ben yetó benne' bła' yela' yebán chegak benne' gat ka'. <sup>22</sup>Kan žatgak yógo'te benách ka' dan' jez nake' żasó Adán, lezka' yebangak yógo'te benne' ka' jez nake' toze len Benne' Criston'. <sup>23</sup>To toe' yebane' kan żala' gaken. Zga'ale bebán Benne' Criston', na' te na'a yebangak benne' ka' jez nake' chie' Le' katen' yele'e. <sup>24</sup>Naž žin ža ze lawte ža kate' yeká' Benne' Criston' dot da' yo'o lo na' da' xiwe', na' dot yela' wnná bia' chen, na' dot yela' wak chen, na' wdié' da' znnna bi'e Le' lo na' Xažo Dios. <sup>25</sup>Žon byenen nna bia' Benne' Criston' na' zejte ža ba bzoa Dios kate' yógo'te benne' ka', benne' żži'igake' chie' Le', wzóa zíbgake' lawe' Le'. <sup>26</sup>Da' zdá'baga' Le', da' wchinnej' kate' ze lawte, naken yela' got. <sup>27</sup>Dios ba bdie' yógo'te lo na' Zi'nen' nich nna bi'en. Nyejw le'e yiche la'y da' znnan: "Bdie' yógo'te lo ne'e nich nna bi'en." Na'a, nak bia' bi bde kwine' lo na' Zi'nen', dan' nakkze' Le' Bennen' zdie' yógo'ten lo na' Zi'nen'. <sup>28</sup>Kate' žin ža na' kate' wdé Dios yógo'ten lo na' Benne' Criston' nich nna bi'en, naž Zi'nen' wdé kwine' lo na' Xažo Dios, Bennen' bdie' lo na' Zi'nen' yógo'ten, na' kate' ze lawte, Dios nna bi'e to chi'ize yógo'ten.

<sup>29</sup>Bálele le'e žezoale nis lo wlazgak benne' gat ka'. Cha' žéklele

bi yebangak benne' gat ka', čbiž chen' žezoale nis lo wlazgak benne' gat ka'?

<sup>30</sup>Žon zož cheto' gatto' yógo'te ža. čBiž chen' žwe'to' latje gaken ki cha' bi yebanžo lo yela' got? <sup>31</sup>Yógo'te ža žon zož gata'. Zzenla' le'e da' ni, ljéža'do' ka', dan' žaz laža'a da' bena'. Bena' ga žejele' che Xanžo Jesús, Benne' Criston'. <sup>32</sup>Cha' bdíl-lena' bia snia ka' lo yež Éfeso dan' wnnazen chia', čbižkze yebélenla'? Cha' bi yebangak benne' gat ka', žala' gonžo kan znagak benách ka': "Ye'j gawžo dan' gatžo wxé wiž."

<sup>33</sup>Bi we'le latje no benne' gon láže'le' le'e. Cha' si' lo na'le láte'ze da wen laže', na' dotle yechólele. <sup>34</sup>Le' yeját laže', na' biž gonle dola' dan' bálele le'e bi nónbia'le Dios. Zchalja' ki nich gona' ga yedoé'elele.

### Kan gakžo kate' yebanžo lo yela' got

<sup>35</sup>Wákelja no benne' nne': "Nakxkze yebangak benne' gat ka'? čNakxkze gak bela' žen chégake' kate' yelá'gake'?" <sup>36</sup>Le', benne' bi nnezle. Da' žazo' lo yo bi lan' cha' bi nitlen. <sup>37</sup>Da'žazo' lo yo naken to bínnedo'ze, cha' che zoa' stribé, o che yetó yixe' kwando'. Dan' žazo' bi naken yixe' kwando' da' žala' lan'. <sup>38</sup>Dios žone' ga gak to to yixe' kwando' kan nonkze' chen. Kan nak to to bínnedo' ka' žone' ga gak yixe' kwando' chen. <sup>39</sup>Lezka', bi nak toze kan nak bela' che chegak yógo'te bia yixe' ka'. Zoa to bela' chegak benne' ka', na' yetó kan nak bela' chegak bia yixe' ka'. Yetó kan nak bela' chegak byinne ka', na' yetó kan nak bela' chegak bel ka'. <sup>40</sup>Lezka' nža' bela' žen chegak

benne' ka' nníta'gake' ya'abá che Dios ka nak bela' žen chegak benne' ka' zej nnite'e yežlyó nga. Zoa to yela' xtan chegak benne' ka' zej nnite'e ya'abá che Dios, na' yetó kan nak yela' xtan chegak benne' ka' nníta'gake' yežlyó nga. <sup>41</sup>Zoa to yela' xtan che wbíz, na' yetó che byo', na' yetó chegak belj ya'abá ka'. Yela' xtan che to belj ya'abá nžan' kan nak yela' xtan che yetó belj ya'abá. <sup>42</sup>Lezka' gaken kate' yebangak benne' gat ka'. Kate' zgache' to benne' lo yežw ba nake' to bela' žen da' kwia yin'. Kate' yebane', naž gake' to da' soan to chi'ize. <sup>43</sup>Kate' zgache' e lo yežw ba nake' to bela' žen ka'ze, na' da' zkwidé'len. Kate' yebane', naž gake' to da' xtan, na' da' wale. <sup>44</sup>Kate' zgache' e lo yežw ba nake' to bela' žen che yežlyó nga. Kate' yebane', naž gake' to da' soan to chi'ize ya'abá che Dios. Zoa to bela' žen che yežlyó nga, na' yetó kan gak da' cho'o be' nakkzžo.

<sup>45</sup>Nyejw le'e yiche la'y da' znnan: "Benne' nežw, benne' wzóe' yežlyó nga, bennen' lie' Adán, Dios bene' le' benne' ban" san Bennen' wyaze' latje che Adán na', Benne' Criston', Dios bene' ga nake' Be' nbánlenžo.

<sup>46</sup>Bi bla' zga'ale Benne' nake' Be'. Bla' zga'ale bennen' wdape' yela' benachze chežo, na' naž bla' Benne' nake' Be'. <sup>47</sup>Bennen' wzóe' zga'ale', goke' yo. Bennen' bežope', Bennen' nake' Xanžon', bžoje' ya'abá che Dios. <sup>48</sup>Benne' ka' nníta'gake' yežlyó nga zej nake' kan gok bennen' goke' yo, na' benne' ka' žala' chejnñita'gake' ya'abá che Dios gákgake' kan nak Bennen' bžoje' ya'abá na' che Dios. <sup>49</sup>Kan de

chežo na'a to bela' žen da' naken  
kan gok bela' žen che bennen' goke'  
yo, lezka' žala' yeyakžo kan nak  
Bennen' bžoje' ya'abá na' che Dios.

<sup>50</sup>Ki znnna da' ni da' žapa' le'e,  
zí'na'do' ka', znnnia': da' naken bela'  
žen bi chazen gan znnna bia' Dios, na'  
lezka', da' kwia yin' bi sin' da' zoan to  
chi'ize. <sup>51</sup>Le wia nga, žapa' le'e to da'  
bgachen': bi gatžo yógo'težo, san Dios  
wché'e kan nakžo yógo'težo. <sup>52</sup>To  
chí'ido'ze gaken, kan nak to da' zdaze  
yej lawžo, kate' kwež lozban' da' zze  
lawten. Kwež lozban', na' yebangak  
benne' gat ka', na' gákga'ke' to da'  
soan to chi'ize, na' Dios wché'e da'  
nakžo yógo'težo ž'o'. <sup>53</sup>Da' nakžo da'  
kwia yin' žala' yeyaken to da' soan to  
chi'ize, na' da' nakžo, dan' žala' gaten,  
yeyaken to da' batkle gaten. <sup>54</sup>Katen'  
dan' kwia yin' ba beyaken to da' soan  
to chi'ize, na' lezka' dan' žala' gaten ba  
beyaken to da' batkle gaten, naž gak  
dan' nyejw le'e yiche la'y da' znnan:

Begá'a to chi'ize yela' got.

Ben Benne' Criston' da' ni.

<sup>55</sup>Biž bi gak gon yela' got chežo.  
Biž gak gon ga gatžo.

<sup>56</sup>Wak bi gon yela' got chežo  
dan' nbága'žo dola', na' nbága'žo  
dola' dan' zžil'ijo che xtiža' Dios.

<sup>57</sup>Žoxken Dios. Le' benkze' ga  
belažo lo yela' got ni'a che da' ben  
Xanžo Jesús, Benne' Criston'.

<sup>58</sup>Che len, zí'na'do' ka', le soa choch.  
Le gak dot li laže' nich góntezle xchin  
Xanžon' dan' nnézkzelele žin da' žonle  
che Xanžon' bi naken dáche'ze.

Wnějwgak benne' Corinto ka'  
da' žiážjegac ljéžgake' ka'

**16** Na'a, kan nak che mežwn'  
da' wnějwjle dan' gáklenen

lježžo ka', benne' ka' žejlé'gake' che  
Benne' Criston', na' nníta'gake' lo  
yež Jerusalén, le gon na'a kan goža'  
yógo'te kwe' benách ka' che Benne'  
Criston', benne' ka' nníta'gake' gan  
nbab Galasia. <sup>2</sup>Tža tža nežw, to tole  
žala' ko'o cháwe'le late' mežw, kan  
nak da' žonn Dios chele. Le gape  
chi'in, nich bi gon byenen wtoblen  
katen' la'a gan zoale. <sup>3</sup>Katen' la'a  
gan zoale, sela'a benne' ka' kwele  
le'e nich chjake' lo yež Jerusalén.  
Wzoja' le'e yiche da' gonen ga gak  
biá'gake', na' chjwá'gake' mežwn' da'  
wnějwjlen. <sup>4</sup>Cha' žala' cha'a neda'  
ga na', na' wak sá'klene' neda'.

#### Da' žénele Pablo gone'

<sup>5</sup>La'a gan zoale kate' yeyóž tia' lo  
yež ka' gan nbab Masedonia, dan'  
žon byenen tia' lo yež ka'. <sup>6</sup>Žekla'  
gá'nlena' le'e to chi'i, o ga'nla' ga na'  
byo' zag ka'. Naž gak gáklenle neda',  
na' yego'ole neda' nez gáte'teze gan  
žala' cha'a. <sup>7</sup>Kate' la'a yedjwía' le'e  
bi žénela' teza' ga na'. Žxen laža'a  
sóalena' le'e scha, cha' Xanžon' we'e  
neda' latje. <sup>8</sup>Ga'na' nga lo yež Éfeso  
kate' žinže ža Pentecostés, <sup>9</sup>dan' de  
latje gona' to žin zen che Xanžon'  
nga, lalkze benne' zan žon byéngake'  
wséjwgake' xneza'.

<sup>10</sup>Cha' xkwide' Timoteo la'be' gan  
zoale, le we' laže'-be', nich bi gak  
nyache' láže'be' katen' sóalenbe'  
le'e. Ki žala' gonle dan' žonbe' xchin  
Xanžon' kan žona' neda' xchine'.

<sup>11</sup>Che len, bi žala' no benne' wzóe'-  
be' chela'ale. Le gaklen-be', na' binlo  
le yego'o-be' nez, nich yela'be' ga  
zoa' neda' ni, dan' zbeza'-be', na'  
lezka' lježžo ka' žónlengake'-be' tzen  
žin.

<sup>12</sup>Kan nak che lježžo Apolo, góta'yoel'e'ela'-ne' cheje' chejwíe' le'e tzen len lježžo ka'. Bi žénele' cheje' na'a. Cheje' kate' sáke'le'.

### Da' bchalj Pablo kate' ze lawte

<sup>13</sup>Le gak ban laže', na' le gak choch kan žeje'le che Benne' Criston'. Le gak wechóg laže', na' le gon choch lázdo'le. <sup>14</sup>Len yela' nži'il le gon bíte'teze da' gonle.

<sup>15</sup>Na'a, zí'na'do' ka', ba nnézkzelele kan nak Estéfanas, na' lezka' kan nakgak lježe' ka'. Zej nake' benne' nežw ka' bejlé'gake' che Benne' Criston' ladjw benách ka' nníta'gake' gan nbab Akaya. Benne' ki bde kwíngake' nich góngake' xchingak benách ka' che Dios. <sup>16</sup>Žáta'yoela' le'e, zí'na'do' ka', gapple ba la'ne benne' ka'zej nake' ka nakgak lježžo ki, na' lezka' kanzej nak benne' ka' žónlengake' légake' tzen žin, na' žáklengake' lježžo ka'. <sup>17</sup>Žebela' dan' bžingak Estéfanas, na' Fortunato, na' Akaiko ga zoa' ni,

dan' góklengake' neda' lo wlazle le'e.

<sup>18</sup>Beyón zéngake' neda' kan lezka' beyón zéngake' le'e. Le gape ba la'ne benne' ki.

<sup>19</sup>Yógo'te kwe' benách ka' che Dios, benne' ka' nníta'gake' gan nbab Asia nga žápegake' le'e "Padiox." Akila len zo'le', Prisila, na' lezka' benne' ka' zdóbgake' che Dios gan nak lo lízgake', žápegake' le'e "Padiox." <sup>20</sup>Yógo'te lježžo ka', benne' nníta'gake' nga žápegake' le'e "Padiox." Le gape "Padiox" tole yetole, na' le chela' lježle ka'.

<sup>21</sup>Neda', Pablo, len na' kwinkza' zzoja' da' ni, na' znnia': žapa' le'e "Padiox."

<sup>22</sup>No benne' bi nži'ile' Xanžo Jesúis, Benne' Criston', ba nbage'e zia.

Da, Xan.

<sup>23</sup>Znnabla' Xanžo Jesúis, Benne' Criston', gon chawé'e le'e. <sup>24</sup>Nži'ilala' yógo'tele le'e dan' nakžo toze len Xanžo Jesúis, Benne' Criston'. Ka'kze gaken.

# DIŽA' BEŽOPE DA' BSELĀ' PABLO ŁO YEŽ CORINTO

Pablo žape' "Padiox"  
benáč ka' che Jesúš

**1** Neda', Pablo, žapa' le'e  
"Padiox", le'e zdoble che Dios  
lo yež Corinto, na' lezka' yógo'tele  
nakle che Dios gan nbab Acaya.  
Neda' naka' wbás che Jesúš, Benne'  
Criston', dan' ženele Dios gaka'  
ki. Bi' lježžo Timoteo žónlenbe'  
neda' tzen. <sup>2</sup>Znnabla' Xažo Dios  
len Xanžo Jesúš, Benne' Criston',  
we' laže'e le'e, na' wkán' žie' yichj  
lázdo'le.

## Da' ka' wzaka' Pablo

<sup>3</sup>iGa'n zen Dios, Xa Xanžo Jesúš,  
Benne' Criston', dan' nake' Xažo,  
Bennen' žeyache' láže'le' žo'o, na'  
žeyón zénteze' žo'o! <sup>4</sup>Dios žeyón  
zene' žo'o kate' bi da' žaken chežo,  
nich gak yeyón zenžo benne' ka' zoa  
bi da' žaken chégake'. Žeyón zenžo  
légake' kan Dios žeyón zene' žo'o.

<sup>5</sup>Kan žan da' zzáka'žo kan wzaka'  
Benne' Criston', lezka' žan da'  
žeyón zenen žo'o, dan' nakžo toze  
len Benne' Criston!. <sup>6</sup>Che len, cha'  
zoa bi da' zzáka'to', žaken ki cheto'  
nich gak yeyón zento' lježto' ka',  
na' gonto' ga yelale le'e. Cha' Dios

žeyón zene' neto', žaken ki nich  
gak yeyón zento' le'e, na' lo yela'  
zbez zen laže' chele, gak sóelele  
da' ka' zzáka'le, kan lezka' žaken  
cheto'. <sup>7</sup>Zxen láže'to' ga'nle choch  
kan žejle'le che Dios, dan' nnezltō'  
cha' sáka'le le'e tzen len neto',  
lezka' yebélele tzen len neto' dan'  
Dios žeyón zene' žo'o.

<sup>8</sup>Žénelto' nnézlele, zí'na'do'  
ka', kan nak da' zan da' goken  
cheto' gan nbab Asia. Wdetlen  
dan' goken cheto', na' gokžen  
zi' ka da' gok soelto'. Ki goken,  
biž bxen láže'to' soato' nbanto'.  
<sup>9</sup>Gokltō' goken cheto' kan žak  
chegak benne' ka' ba nžog chégake'  
gátgake'. Goken ki cheto' nich  
bi wxén láže'to' la' kwínzeto',  
san wxén láže'to' Dios, Bennen'  
žesbane' benne' gat ka!. <sup>10</sup>Dios  
beslē' neto' lo da' benen ga ben  
zož gatto', na' žeslē' neto' tža tža.  
Žxen láže'to' Le' yeslē' neto' ki da'  
yoble, <sup>11</sup>cha' gáklenle neto', na'  
wcháljlenle Dios, na' nnáblele-  
ne' gáklenle' neto'. Dios gone' kan  
nnáblele-ne' tzen len benne' zan,  
na' gon chawé'e neto', na' légake'  
yé'gake' Dios: "Žóxkeno" ni'a  
cheto'.

**Biz chen' zžele Pablo nich  
cheje' yež Corinto**

<sup>12</sup>Da' ni žonen ga žebelto'. Be' nakkzto' zlo'elen neto', len yela' li laže' cheto', na' dot láže'to' žonto' da' žonto' yežlyó nga, na' lezka' bento' gan zoale le'e. Ki bento', dan' benn Dios cheto' da' góklenen neto', na' kege len yela' žejni'il chezto' bento' ki. <sup>13</sup>Zzojto' chele le'e toze da' gak gol-le, na' da' gak chejn'iilele. Žak laža'a chejn'iilele dot zen <sup>14</sup>dan' žejni'il late'. Naž kate' žin že yelá' Xanžo Jesúš, Benne' Criston', na' gak gaple neto' ba la'ne kan neto' žapto' le'e ba la'ne na'a.

<sup>15-16</sup>Dan' bxeñ laža'a da' ni, wzá' laža'a yedjwía' le'e zga'ale katen' wdí'a gan nbab Masedonia, na' yedjwía' le'e da' yoble kate' yezá'a nga, nich yebélenlele neda' chope chi'i. Te na' gak gáklenle neda', na' yego'ole neda' nez nich cha'a gan nbab Judea. Ki gónela' gona'. <sup>17</sup>¿Zéklele ben laža'a dan' bcha'a kan bena? ¿Zéklele lo yela' benachze chia' žona' da' znnaze chia', na' bchaljza' katen' wnnía': ki gona'? <sup>18</sup>Ni'a che Xanžo Dios, Bennen' žone' dot zen kan znnna xtiže'e, bi bchaljza' katen' bzenla' le'e xtiža' Dios. <sup>19</sup>Bi zchaljze Jesúš, Benne' Criston', Zi'n Dios, Bennen' bzenlto' le'e kan nak chie', neda' len Silbano, na' Timoteo. Jeseñen' zchalje' da' naken dot da' li. <sup>20</sup>Benne' Criston' žonkze' ga nakkzen yógo'te da' bchebe laže' Dios, na' ni'a chie' Le' gak nnažo: "Ka'kze gaken" nich ga'n zen Dios. <sup>21</sup>Dios na'kze žone' ga žxen láže'to' tzen len le'e nakžo che Benne'

Criston', na' bdie' lo na'to' žin chie' da' žonto'. <sup>22</sup>Le' benne' chežo da' nak bia' nakžo chie', dan' bchize' Dios Be' La'y lo yichj lázdó'žo. Dios Be' La'y na' nake' chežo da' žonen ga nnezlžo si'žo yógo'te da' gonn Dios chežo.

<sup>23</sup>Ni'a che Xanžo Dios, Bennen' nnézkzele' da' zza' laža'a, zchalja' da' naked dot da' li. Nnézkzele' Le' bi bedjwía' le'e lo yež Corinto, nich bi gon byenen gona' ga gak nyache' láže'le le'e. <sup>24</sup>Bi žénelto' wchi'ilto' le'e kan žeje'le che Benne' Criston', dan' ba nakle choch kan žeje'le chie'. Žénelto' gonto' da' gonen ga yebélele.

**2** Che len be' laža'a bi yedjwía' le'e da' yoble bayén, nich bi gona' ga gak nyache' láže'le. <sup>2</sup>Cha' gona' neda' ga gak nyache' láže'le le'e, čnozkze benne' gone' ga yebela' neda'? <sup>3</sup>Žala' gona' ga gak nyache' laže' bennen' žala' gone' ga yebela' neda'? <sup>3</sup>Che len bzoja' chele le'e yiche da' nežw. Bi gónela' yedjwía' le'e, nich bi gonle le'e ga gak nyache' laža'a neda', dan' le'ekze žala' gonle ga yebela' neda'. Dan' žxen laža'a le'e, nnezla' yebélele yógo'tele cha' yebela' neda'. <sup>4</sup>Katen' bzoja' chele diža' nežwn', wžé' zedla', na' gokle'e nyache' laža'a na' zejte wžeža'. Bzoja' da' ka' le'e yichen', kege nich gona' ga gak nyache' láže'le le'e, san nich nnézlele kan nží'ile'ela' le'e.

**žala' yenít lawžo che no  
benne' žone' da' kegle**

<sup>5</sup>Bennen' bene' da' kegle, bennen' zoe' ga na', kege bene' ga gok nyache' laža'a nedza', san bene' late' ga gok nyache' láže'le yógo'tele le'e.

Žnnia' late' nich bi tetlen yesbaga'a bennen' zia. <sup>6</sup>Ka'ze da' ba bsáka'le bennen' yeláte'ze ka bdachle le'e. <sup>7</sup>Na'a, žala' yenít lawle bennen', na' gon chochole le', nich bi tetlen gak nyache' laže'e, na' nich bi yeyale' to chi'ize. <sup>8</sup>Che len žáta'yoela' le'e gonle da' gak bia' nží'ilele-ne' dot láže'le. <sup>9</sup>Lezka' che len bzoja' chele, le'e yichen'. Gónela' si' bi'a le'e nich nneza' cha' žóntezle kan znnna xtiža'a. <sup>10</sup>Kate' ženít lawle le'e che no benne', lezka' neda' ženít lawa' chie'. Kate' ženít lawa' che no benne', zoa bi da' bene', žonan' lo wláz Benne' Criston' nich gak chawe' chele le'e. <sup>11</sup>Ki žona' nich bi sáke'le da' xiwe' bi da' gonen chežo, dan' ba nnezlžo da' žénelen gonen chežo.

### Wžé' zedle Pablo lo yež Troas

<sup>12</sup>Katen' bla'a lo yež Troas nich wchalja' diža' chawe' kan nak che Benne' Criston', na' Xanžon' bénnl'i'e neda' latje wchalja' ga na'. <sup>13</sup>La'kze goken ki, wžé' zedla' dan' bi bejxaka'a bi' lježžo Tito ga na'. Che len bkwáslena' benne' ka', na' wyá'a gan nbab Masedonia.

### Da' nzi' lo na'žo dan' nakžo toze len Jesús

<sup>14</sup>Žoxken Dios, Bennen' zché'teze' žo'o ka to da' nak bian' beyóz beslá Benne' Criston' žo'o. Dios zkonle' žo'o žin nich zloe'ele' law kan gak gónbia'gak benách ka' Benne' Criston!. Nakžo ka to da' zla' zix, da' žisen gáte'ze. <sup>15</sup>Nakžo ka to da' zla' zix, da' zzey Benne' Criston' law Dios, na' zchisen' lawgak benne' ka' ba belágake', na' lawgak benne' ka' zej nnitle!. <sup>16</sup>Lawgak benne' ka'

zej nnitle' nakžo ka to da' zla' zgot da' nak bian' gátgake', san lawgak benne' ka' ba belágake' nakžo ka to da' zla' zix da' nak bian' sóatezžo nbanžo. <sup>17</sup>Bi žonto' kan žongak benne' zan, benne' zkóngekle' xtiža' Dios žin ka to da' žóte'gaken', na' žá'wgaken', san dan' bselá' Dios neto', dot láže'to' zchaljto' lawe' Le', dan' nakto' toze len Benne' Criston'.

### Diža' da' žeyonen žo'o toze len Dios

**3** <sup>1</sup>Žéklele le'e zka'n zen kwinto' katen' zchaljto' ki? <sup>2</sup>Žon byenen wlo'e'elto' le'e to yiche da' nak bian' da' nakto'? <sup>3</sup>Žon byenen nnablto' le'e gonnle to yiche ki cheto' kan žongak bale benách ka'? <sup>2</sup>Le'ekze nakle ka to yiche da' nak bian' da' nakto', dan' nyejwn lo yichj láždo'žo, na' yógo'te benách gak gólgaken', na' chejní'igeklen'. <sup>3</sup>Da' nakle nla' law ka to yiche da' bzoj Benne' Criston', dan' bsele'e lo na'to' neto'. Bi nyejw to le'e yiche, san Be' La'y che Dios ban bzojen', kege to lo yej blag, san lo yichj láždo'le bzojen'.

<sup>4</sup>Ki zchaljto' dan' žxen láže'to' Dios dan' nakto' toze len Benne' Criston'. <sup>5</sup>Bi žeklto' zoa bi da' gak gonto' néto'ze, san Dios žonne' yela' wak cheto' nich bi da' gonto'. <sup>6</sup>Dios bennkze' yela' wak cheto' nich gonto' xchine' lo diža' koben', da' žeyonen žo'o toze len Dios. Diža' ni bi naken to da' zchi'le žo'o da' nyejwn to le'e yiche, san naken to da' žsedle Dios Be' La'y žo'o. Xtiže'e da' nyejwn le'e yichen' zchogen chežo gatžo, san Dios Be' La'y žone' ga zoažo nbanžo.

<sup>7</sup>Da' ka' bchi'le Dios neto' da' zej nyejwn le'e yiche, Dios na'kze

bzojen' lo yej blag ka', na' bla' law yela' zen chie' katen' bdien' lo na' Moisés. La'kze wdé chen, wyeple'e yes banín' law Moisés na'. Ka' goken, bi gok wíagak benách Israel ka' law Moisés na'. Cha' yela' baní' ki wzóalenen xtiža' Dios, na' xtiže'e na' zchogen chegak benách ka' gátgake',<sup>8</sup> da' zénle'eže nak yela' baní' da' zóalenen da' ka' žon Dios Be' La'y.

<sup>9</sup>Wzóa to yela' baní' da' wzóalenen dan' benen ga nžog chegak benách ka' gátgake'. Da' zénle'eže nak yela' baní' che da' žonen ga znna Dios zej nak benách ka' chawe' lawe' Le'.<sup>10</sup> Dan' záka'le'e yela' baní' da' nla' lawn na'a, láte'do'ze nga'n yela' baní' da' bla' lawn katen' Dios bnežjwe' da' bchi'le' benách ka'.<sup>11</sup> Cha' wzóa yela' baní' che da' wzóan to chí'ido'ze, da' zénle'eže nak yela' baní' che da' zoan to chí'ize.

<sup>12</sup> Dan' napto' da' ni da' žxen láže'to', zchaljto' lo yela' wechóg láže' cheto'.<sup>13</sup> Bi žonto' kan ben Moisés, bkache'e lawe' len to láže'do', nich bi l'égekle benách Israel ka' yela' baní' da' zej znitlen.<sup>14</sup> Bcholgak yichj lázdo'gake' benne' ka'. Na'zejte na'a že katen' žolgake' yiche che diža' golén' da' žeyonen benách ka' toze len Dios, naken chégake' kan zkache' láže'don' yej láwgake', da' gak yeká' toze Benne' Criston'.<sup>15</sup> Na'zejte na'a že, katen' žolgake' yichen' gan nyejw diža' che Moisés, zoa ka to láže'do' yej láwgake' dan' žonen ga nchol yichj lázdo'gake'.<sup>16</sup> Kate' no benne' žeyake' che Xanžon', žegá'a dan' žonen ga nchol yichj lázdo'w bennen'.<sup>17</sup> Katen' znnato' "Xanžo" zchaljto' che Dios Be' La'y. Gan

zoa Be' La'y che Xanžon', zoakze yela' weslá ga na'.<sup>18</sup> Yógo'težo žo'o bi be zoa yej lawžo, san nakžo ka to yej wan gan zla' law yela' baní' che law Xanžon', na' yela' baní' na' che Xanžon', Bennen' nake' Be' La'y, zchan' žo'o, na' žonen ga zej žákžežo kan nak Benne' Cristo na'kze, na' žáta'že yela' baní' chie' len žo'o.

**4** Dios beyache' láže'le' neto', na' bdie' lo na'to' žin da' žonto', na' che len bi žak chope láže'to'.<sup>2</sup> Ba bka'nto' da' ka' žongak benne' ka' ngáche'ze, da' ka' žóngaken ga žedoe'lelžo. Bi žon láže'lto' nitó benne', na' bi zcha'to' xtiža' Dios. Dan' zchaljto' che da' nak dot da' li, že' láže'to' gonto' da' ka' gónbia'gekle yógo'te benách ka' zej naken chawe' law Dios.<sup>3</sup> Cha' zej nnita' benne' ka' bi žejn'i'igekle' diža' chawen' da' zchaljto', zej nakze benne' ka' zej nchol yichj lázdo'gake' bi žejn'i'igeklen'.<sup>4</sup> Bi žejle'gak benne' ka', dan' ben da' xiwe' ga naken ki. Da' xiwe' žon kwinen ka dios, na' znna bian' benách ka' zej nnite'e že ni zoažo na'a, na' benen ga zej nchol yichj lázdo'gake' nich bi l'égekle' yela' baní' che diža' chawen' kan nak yela' baní' che Benne' Criston', Bennen' znn'e'e dot kan znna' Dios na'kze.<sup>5</sup> Bi zchaljto' che la' kwíñzeto', san zchaljto' che Jesús, Benne' Criston', na' zzenltó' benách ka' Le' nake' Xanžo, na' neto' naktó' wen žin chele dan' nži'ilto' Jesusen'.<sup>6</sup> Dios, Bennen' bene' ga wza'ní' baní' gan gok chol, nake' Bennen' ūsa'ní'e lo yichj lázdo'žo, na' zzejní'ile' žo'o nich gónbia'žo yela' baní' che Dios, da' ūza'nín' žoa'a law Jesús, Benne' Criston'.

Dan' žejele'žo che Dios  
žonžo kan žénele' Le'

**7** Yela' wnni'a che Dios ni yo'on lo yichj lázdo'žo ž'o'o, na' nakžo ka to yeso' da' naken yo, nich gak bia' yela' wak zen na' naken che Dios, na' kege chézežo.

**8** Žsaka' zí'gake' neto', san bi zkwide' láže'to'.

Že' zedlto', san bi žak chope láže'to'.

**9** Žbia láže'gake' neto', san bi žebéj yichj Dios neto'.

Žžó'ngake' neto' lo yo, san bi žbía yí'gake' neto'.

**10** Lo bela' žen cheto' žáttezto' tzen len Jesús,  
san nak bia' lo bela' žen cheto'  
zoato' nbánlento' Le' tzen.

**11** Kate' ne zoato' nbanto', žónenteze zož gatto' dan' nakto' che Jesusen' nich gak bia' zoato' nbánlento' Le' tzen lo bela' žen cheto', da' znitlen.

**12** Ki naken, žon zož gatto' neto', san ni'a che da' ni žata' yela' nban chele le'e.

**13** Nyejw le'e yiche la'y da' znnan: "Bejl'i'a che Dios, na' che len bchalja!" Lezka' žaken cheto', žejele'to' che Dios, na' che len zchaljto'. **14** Nnezlto' kan gon Dios, Bennen' besbane' Xanžo Jesúš, lezka' yesbane' neto' tzen len Jesusen', na' chejzíe' neto' tzen len le'e lawe' Le'. **15** Yógo'te da' ki žákaken ki nich gak chawe' chele le'e, na' cha' da' žonn Dios chežo gatan' chegak benáčh zanže ka', na' yé'gake' Dios: "Žóxkeno" na' ga'n zen Dios.

**16** Che len, bi žak chope láže'to'. La'kze žbia yi' bela' žen cheto',

yógo'te ža zkobe Dios da' nakto' lo yichj lázdo'to'. **17** Da' láte'do'ze da' zzáka'žo na'a to chí'ido'ze žonen ga gata' chežo to da' yebéle'elenlžo da' soan to chi'ize, dan' záka'le'ežen kan gak gónbia'žo. **18** Bi že' láže'žo da' zle'elžo yežlyó nga, san da' bi gak le'elžo že' láže'žon. Dan' zle'elžo, to chí'ido'ze zoan, san dan' bi gak le'elžo soan to chi'ize.

**5** Nnezlžo kate' kwia yi' bela' žen chežo, da' naken ka to yo'o láže'do' yežlyó nga, Dios ba bkweze' to da' kobe chežo, da' naken ka to yo'o, dan' zoan to chi'ize ya'abá che Dios, na' naken dan' benkze' Le'. **2** Che len zbeže láže'žo dan' žénelžo cho'ožo da' koben', dan' naken ka to ližžo ya'abá che Dios. **3** Cho'ožo da' koben' kan žákwžo to laže', nich bi soažo gan bi yo'ožo lo bela' žen chežo. **4** Kate' ne zoažo lo bela' žen chežo, da' naken ka to yo'o láže'do', zbeže láže'žo lo yela' nyache' laže' chežo. Bi žonžo ki dan' žénelžo wka'nžo bela' žen chežo, san žénelžo cho'ožo to chi'ize da' koben'. Ki gaken, wka'nžo bela' žen chežo da' žbia yin', na' chazžo lo yela' nban da' jejlí kanne. **5** Dios ba bkweze' yógo'te da' ki chežo, na' bchize' Dios Be' La'y ž'o'o, Bennen' nake' chežo da' nak bian' sí'kzežo dan' bkweze' chežo.

**6** Che len zoažo choch. Kate' ne yo'ožo lo bela' žen chežo, nnezlžo zoažo zi'to' gan zoa liž Xanžon'.

**7** Žonžo kan žonžo dan' žejele'žo che Dios, na' kege dan' zoa bi da' zle'elžon. **8** Dan' žxen láže'žo da' ni, žénelžo wka'nžo bela' žen chežo nga nich chejsóalažo Xanžon'. **9** Che len že' láže'žo gonžo da' žaz

laže' Xanžon', cha' ga'nžo lo bela'  
žen chežo nga, o cha' chejsóalenžo  
Xanžon' ga na'. <sup>10</sup>Ki žonžo dan' žon  
byenen lažo yógo'težo law Benne'  
Criston' gan žie zchi'a laže'e. Naž  
yebi'e che chežo kanzej nak da'  
benžo kate' ne yo'ožo lo bela' žen  
chežo nga, cha' benžo da' zej naken  
chawe' o da' kegle.

### Da' žeyón žo'o toze len Dios

<sup>11</sup>Che len, dan' zžébeto' Dios, že'  
láže'to' wzejni'ilto' benách ka'. Dios  
nnézkzele' kanzej nak da' ka' yo'o  
lo yichj lázdo'to', na' žxen laža'a  
lezka' le'e nnézlele binlo dan' yo'on  
lo yichj lázdo'to'. <sup>12</sup>Bi žebéj kwinto'  
chawe' lawle le'e, san ženelto' gata'  
latje chele gapple neto' ba la'ne, nich  
gak yechéble, bi da' ye'le benne' ka'  
zka'n zen kwíngake' kan zlo'eze  
law kwíngake', na' kege kanzej  
nake' lo yichj lázdo'gake'. <sup>13</sup>Cha'  
nyal yichjto', naken nich ga'n zen  
Dios, na' cha' bi nyal yichjto', naken  
nich gak da' chawe' chele le'e. <sup>14</sup>Žon  
byenen bi da' gonto' dan' nž'il  
Benne' Criston' žo'o, dan' nnezlžo  
toze' Le' gote' lo wlazgak yógo'te  
benách, na' che len nak chegak  
yógo'te benách ka' kan nátlengake'  
Le' tzen. <sup>15</sup>Le' gote' lo wlazgak  
yógo'te benách ka' nich biž bi  
gongak benne' ka' zej nnita' nbane'  
da' naken chégakze', san da' naken  
che Bennen' gote' lo wlazgake', na'  
bebane' lo yela' got. <sup>16</sup>Che len, biž  
gónbia'to' benách ka' kanzej nakze'  
lo bela' žen chégake', na' la'kze  
kítēze bénbia'to' Benne' Criston',  
bi nónbia'to'-ne' ki na'a. <sup>17</sup>Cha' ba  
beyák nóte'zeze benne' toze len  
Benne' Criston', ba nake' benne'

kobe. Ba wdé che da' gokgak zga'ale,  
na' ba zej nkoben yógo'ten.

<sup>18</sup>Yógo'te da' ki ben Dios, Bennen'  
beyone' žo'o toze len Lekze' lo  
na' Benne' Criston', na' bdie' lo  
na'to' wchaljto' kan gak yeyakgak  
yógo'te benách ka' toze len Le'. <sup>19</sup>Da'  
žchaljto' znnan ki: "Dios wzóalene'  
Benne' Criston' tzen, na' bene' ga  
gak yeyakgak benne' ka' nníta'gake'  
yežlyo' nga toze len Lekze', na' bi  
žejsá' laže'e dola' da' wbága'gake!"  
Bdie' lo na'to' diža' chawe' ni, kan  
gak yeyakgak benách ka' toze len  
Le'. <sup>20</sup>Na'a, nakto' wbás ka' che  
Benne' Criston', na' žak na'a ka Dios  
na'kze žáta'yoel' le'e lo na'to' neto'.  
Che len žáta'yoel' le'e lo wláz  
Benne' Criston', le yeyák toze len  
Dios. <sup>21</sup>Benne' Criston' bi be dola'  
bene', san Dios bdie' Le' ka to benne'  
dola' lo wlazžo žo'o nich gata' latje  
chežo gakžo chawe' kan nak Dios  
na'kze, dan' nakžo toze len Benne'  
Criston'.

**6** Dan' žónlento' Dios tzen žin,  
žáta'yoel' le'e, na' znnato' bi  
wdele ka'ze da' chawe' da' ženele  
Dios gone' chele. <sup>2</sup>Nyejw le'e yiche  
la'y kan wnná Dios, da' znnan:

To ža wžé' laža'a le', benla' chio',  
na' ža bena' ga gak yeló',  
góklena' le'.

Le wia nga. Na'a naken ža že' laže'e  
žo'o. Na'a naken ža gak yelažo.

<sup>3</sup>Bi ženelto' bi da' gonto' da' gonen  
ga wchixle no benne', nich bi soa no  
benne' wka'ne' ka'ze žin da' žonto'.

<sup>4</sup>Ni'a che yógo'te da' žonto', že'  
láže'to' gak bia' nakto' wen žin che  
Dios. Che len, len yela' zbeze zen  
laže' zzoelto' da' ka' zzáka'to', na' da'  
ka' žiážjelto', na' da' ka' žóngaken ga

že' zedlto'. <sup>5</sup>Ki bento' la'kze bdingak benne' ka' neto' lo yo, na' bséjwgake' neto' liž ya, na' wžia láže'gake' neto'. Wdetle bento' žin, na' bi gota' cheto' latje taste' o bi da' gawto'. <sup>6</sup>Be' láže'to' gak bia' nako' wen žin che Dios. Gok bia' da' ni

dan' nako' laždo' yaž,  
na' dan' napto' yela' žejn'il,  
na' dan' zbezto' zen laže',  
na' dan' nako' ži'i laže',  
na' dan' zoalen Dios Be' La'y  
neto',  
na' dan' nak li laže' kan nži'ilto'  
lježto' ka'.

<sup>7</sup>Zchaljto' da' naken dot da' li,  
na' zoalen yela' wak che Dios  
neto'.

Da' nak chawe' naken ka to da'  
zdíl-lento' lo wdile,  
na' lezka' da' žape chi'in neto' lo  
wdilen'.

<sup>8</sup>Zej nnita' benne' ka' žápegake'  
neto' ba la'ne,  
na' lezka' benne' ka' zzóagake'  
neto' cheļa'ale.  
Zej nnita' benne' ka' žliž zí'gake'  
neto',  
na' lezka' benne' ka' žliž  
cháwe'gake' neto'.

La'kze benách ka' znnágake' žon  
láže'to', zchaljto' da' naken dot  
da' li.

<sup>9</sup>La'kzezej nnita' benách ka' bi  
zej nónbi'e neto',  
lezka'zej nnita' benne' ka'zej  
nónbi'e neto'.

Zdato' gan žon zož gatto', san ne  
zoato' nbanto'.

Žóngake' neto' da' zia, san bi  
žótgake' neto'.

<sup>10</sup>Žóngake' neto' nyache' laže', san  
žebétezelto'.

Nakto' benne' yache' ka', san  
žonnto' yela' wnni'a li laže'  
chegak benne' zan ka'.  
La'kze bi be de cheto', yógo'te da'  
de naken cheto'.

<sup>11</sup>Dot láže'to' zcháljlento' le'e,  
zí'na'do' ka', le'e zoale lo yež Corinto.  
Bloe'elto' le'e kan da' li že' láže'to'  
le'e. <sup>12</sup>Cha' bi nakžo toze bi naken  
dan' bi že' láže'to' le'e, san le'ekze bi  
že' láže'le neto'. <sup>13</sup>Na'a, zcháljlena'  
le'e kan žon to benne' zcháljlene'  
zi'nkze' ka', na' znnia': le yebí'i cheto'  
kan žónlento' le'e. Le we' laže' neto'.

**Nakžo ka to yodo' gan yo'o Dios ban**

<sup>14</sup>Bi gónlenle tzen benách ka' bi  
žejl'é'gake' che Dios.

Bi gak gak toze da' nak chawe'  
len da' kegle.

Bi gak gak toze da' nak chol len  
da' nak baní'.

<sup>15</sup>Bi gak gak toze Benne' Criston'  
len da' xiwe'.

Bi gak gak toze to benne' žejli'e  
che Benne' Criston' len to  
benne' bi žejli'e chie'.

<sup>16</sup>Bi gak gak toze yodo' che Dios  
len lo'a ka'.

Le'ekze nakle ka to yodo' gan yo'o  
Dios ban. Kan nak da' ni, Dios  
na'kze wnné':

Sóalena' légake', na' tálena'  
légake'.  
Gaka' Dios chégake',  
na' légake' gákake' benách chia'  
ka'.

<sup>17</sup>Che len, lezka' wnné' ki:  
Le yežój ládjwgake', na' le kwas  
gan nnítá'gake'.

Wnná Xanžo: "Bi gónlenle  
légake' tzen da' kegle,  
na' si' lo na'a le'e.

**18** Neda' gaka' Xakzle,  
na' le'e gakle zi'na' ka', benne'  
byo ka', na' no'le ka,"  
Ki znna Xanžo, Bennen' napkze'  
dot yela' wak.

**7** Da' ki da' bchebe laže' Dios zej  
naken chežo, ljéža'do' ka'. Che  
len žala' yeyón kwinžo chawé, na'  
yekwasžo bíte'zeze da' ūka'n ditjen  
bel'a' ūzen chežo, na' be' nakkžo. Lo  
yela' zžebe Dios chežo žala' gakžo  
che Leze'.

### Beyát laže'gak benne' Corinto ka'

**2** Le si' lo na'le neto'. Bi bento' no  
benne' ládjwle le'e zia. Bi bento' ga  
chixle no benne'. Bi ben laže'lto'  
no benne'. **3** Zchalja' ki, kege nich  
yesbaga'a le'e zia, san naken ka  
wnnía' zga'ale, na' da' yoble znnia':  
zoa' ban laže' soa' nbánlena' le'e  
o gátlena' le'e dan' že' laže'a le'e.  
**4** Žxenle'e laže'a le'e, zi'na'do' ka',  
na' žapa' le'e ba'la'ne. La'kze da'  
zan da' zzáka'to', zóali'a choch, na'  
žebéle'ela'.

**5** Katen' bžinto' gan nbab  
Masedonia, na'zejte na'a ža, bi žata'  
cheto' latje yezi' laže'to', san da' zan  
da' žaken cheto'. Benách ka' zdíl'-  
lengake' neto', na' lo yichj lázdo'to'  
zej yo'o da' ka' zchébegaken neto'.  
**6** Naž Dios, Bennen' žon choche' no  
benne' za' gak chope laže'e, ben  
choche' neto' dan' bežín xkwide' Tito  
ga zoato' ni. **7** Bi gokzen dan' bežinbe'  
ga zoato' ni, san dan' lezka' bzenlbe'  
neto' kan le'e ben chochle lázdo'be'.  
Bzenlbe' neto' kan ženele'elele  
yel'e'elele neda', na' kan nak nyache'  
laže'le ni'a che da' goken ga na', na'  
lezka' kan že' laže'le neda'. Yogo'te da'  
ki žóngaken ga žebéle'ela'.

**8** La'kze da' bzoja' chele le'e le'e  
yiche nežwn' benen ga gok nyache'  
láže'le le'e, bi nak nyache' laža'a  
na'a. Zga'ale gok nyache' laža'a  
kate' gókbe'ela' benen ga gok  
nyache' laže'le le'e to chi'ido', **9** san  
na'a žebela', kege dan' gok nyache'  
láže'le, san dan' ben yela' nyache'  
laže' chele na' ga beyát laže'le. Dios  
bkonle' žin yela' nyache' laže' chele  
na', nich bi wchíxelele le'e ni'a che  
da' bento' neto'. **10** Yela' nyache' laže'  
da' zkonle Dios žin žonen ga yeyát  
laže' no benne' nich yelé', na' che  
len bi žala' gak nyache' laže'žo ni'a  
chen, san yela' nyache' laže' da'  
naken che yežlyó nga žonen ga  
žatgak benách ka'. **11** Le wia nga kan  
bkonle Dios žin yela' nyache' laže'  
chele na':

Benen ga že' laže'le Dios.

Benen ga gónelele yežoje  
chawé'.

Benen ga bža'ale bennen' bene'  
dolan'.

Benen ga zžébele Dios.

Benen ga be' laže'le gonle kan  
znna xtiža' Dios.

Benen ga nží'ilele Dios dot  
laže'le.

Benen ga gónelele gonle zia  
bennen' bene' dolan'.

Benle da' nak bia' bi be dola'  
nbága'le ni'a che dan' goken.

**12** Che len, la'kze bzoja' ki le'e yichen',  
bi gokzen ni'a che bennen' bene'  
dolan', na' kégeze ni'a che bennen'  
wžake'e, san lezka' nich gak bia' law  
Dios da' li že' laže'le neto'. **13** Da' ni  
ben chochen lázdo'to'. Kégeze beyák  
choch lázdo'to' san žebéle'elto' dan'  
žebél xkwide' Tito ni'a che da' benle  
le'e, na' ben chochle lázdo'be'.

**14** Bka'n zena' le'e law xkwide'  
Titon', na' bi benle ga bedoe'ela'.  
Bcháljlentezto' le'e da' nak dot  
da' li, na' lezka' nak dot da' li da'  
bcháljlento' xkwide' Titon' katen'  
wdapto' le'e ba la'ne. **15** Zej žakže dot  
li laže' kan nži'il xkwide' Titon' le'e  
kate' žejsá' láže'be' kan benle kan  
znna xtíža'to', na' kan wdaple-be' ba  
la'ne lo yela' zžebe Dios chele, na' lo  
yela' gaxjw laže' chele. **16** Žebéle'ela'  
dan' gak wxeñ laža'a le'e dot laža'a.

### Kan žala' wnézjwžo da' napžo

**8** Na'a, zí'na'do' ka', ženelto'  
wzenlto' le'e kan nak da'  
benn Dios chegak kwe' ka' benách  
ka' che Benne' Criston', benne' ka'  
nníta'gake' gan nbab Masedonia.  
**2** La'kze da' zenle'e wzáka'gake'  
lo da' ka' gókgaken chégake', da'  
zenle'e bebégekle', na' dot láže'gake'  
bnézjwgake' da' zenle'e la'kze jez  
nake' benách yache' ka'. **3** Neda'  
zzoa lia' kan nak chégake', dot  
láže'gake' bnézjwgake' yógo'te da' gok  
wnézjwgake', na' bnézjwgakže' ka'  
da' gókgake'. **4** De chgi' wnnábgekle'  
neto', na' góta'yoel'egekle' neto' we'to'  
légake' latje tzen len neto' gákłengake'  
lježo ka' žejlé'gake' che Benne'  
Criston'. **5** Béngakže' kan wlék yichjto'  
góngake', dan' zga'ale bde kwíngake'  
lo na' Xanžon', na' lezka' lo na'to' neto',  
na' naken da' žaz laže' Dios. **6** Che len  
wnnablto' xkwide' Titon' yeyóž gonbe'  
xchinbe' gan zoale le'e, nich wtobbe'  
mežw da' znézjwle le'e lo yela' ži'i  
laže' chele, kan wzó lawbe' benbe'  
zga'ale. **7** Nakle benne' blo ka' kan nak  
yógo'te da' žonle,  
kan žejele'le che Benne' Criston',  
na'

kan žejní'ilele, na'  
kan zzejní'ilele benách ka', na'  
kan že' láže'le gonle da' naken  
chawe', na'  
kan nži'ilele neto'.

Lezka' žala' gakle benne' blo ka'  
kan gáklenle lježle ka', na' lo yela'  
ži'i laže' chele soa bi da' wnézjwle  
chégake'.

**8** Bi žon byena' gonle le'e  
ki. Zchalja' kan žongak yebałe  
benách ka', kan dot láže'gake' bi  
da' znézjwgake'. Ki žona' nich  
gona' ga gonle da' gak bia' nak  
dot li laže' kan nži'ilele lježle ka'.

**9** Nnézkzelele da' benn Xanžo Jesúš,  
Benne' Criston', chežo. Gota' yela'  
wnni'a zen chie', san nich gákłene'  
le'e beyake' benne' yache' nich gata'  
yela' wnni'a chele, dan' goke' Le'  
yache'.

**10** Ki žekla' neda': gakže chawe'  
chele cha' yeyóž gonle da' wzó  
lawle žonle ba gok to yiz. Gokle  
benne' blo ka', kégeze kan bnézjwle,  
san lezka' kan gónelele wnézjwle.

**11** Na'a, dot láže'le le yesyóž gonle  
dan' wzó lawle žonle, na' dot  
láže'le bnézjwle. Le wnežjw na'a  
kan sáke'le. **12** Cha' ženelele bi da'  
wnézjwle, Dios žape' ba la'ne da'  
znézjwle kan nak da' deze chele.  
Bi znnabe' wnézjwžele ka da' deze  
chele.

**13** Bi ženela' gona' ga wnézjwle  
le'e da' gáklenen yezika' benách  
ka' na' zejte yážjelele le'e. **14** Ženela'  
gak tlebe kan de chele, na' chégake'.  
Na'a da' zenle'e de chele da' gak  
wnézjwle nich soa da' gata' chegak  
benne' ka' žiážjegekle'. Naž kate'  
yážjelele le'e, légake' gak bi da'  
wnézjwgake' chele nich ki gak tlebe

kan de chele, na' chégake'. <sup>15</sup>Lezka' nyejw le'e yiche la'y, da' znnan: "Bennen' btobe' da' zenle'e, bi be bga'nze chie', na' bennen' btobe' láte'ze, bi be byážjele".

**Kan žongak xkwide'  
Tito, na' lježbe' ka'**

<sup>16</sup>Žoxken Dios, Le' bene' ga že' laže' xkwide' Tito le'e kan že' laža'a neda' le'e. <sup>17</sup>Kégeze žonbe' kan znnna xtiža'a da' wnnabla'-be', san dan' že' láže'kzbe' le'e, žakze chebe' gónelbe' chejvíabe' le'e.

<sup>18</sup>Žséla'to' to lježžo tzen len lebe', lježzon' žápegak yógo'te kwe' benách ka' che Benne' Criston' le' ba la'ne, dan' žone' binlo žin che diža' chawen'. <sup>19</sup>Lezka' yógo'te kwe' benách ka' che Benne' Criston' wžegak benne' ni nich sá'lene' neto' tzen chjwa'to' dan' znézwle le'e nich ga'n zen Xanžon', na' lezka' gak bia' že' láže'žo lježžo ka', benne' ka' žejlé'gake' che Benne' Criston'. <sup>20</sup>Ki gaken, góñlene' neto' tzen nich bi gak no benne' bi da' nnie' cheto' kan žónlento' mežwn' da' zenle'e da' znézwle le'e, da' gáklenen benách yache' ka'. <sup>21</sup>Že' láže'to' gonto' da' naken chawe', kégeze law Xanžon', san lezka' lawgak benách.

<sup>22</sup>Lezka' žséla'to' yetó lježžo tzen len légake', bennen' ble'elto' zan chi'i kan žone' le', na' nak bia' dot laže'e žénele' góñlene' neto' tzen žin. Lezka', dan' žxen laže'e le'e, žénezele' gáklenen neto' lo žin ni. <sup>23</sup>Cha' no benne' nnable' kan nak xkwide' Titon', nakbe' lježa', na' žónlenbe' neda' tzen žin nich gákleno' le'e. Cha' no benne' nnable' kan zej nak yezika' lježžo

ki, bséla'gak yógo'te kwe' benách ka' che Benne' Criston' légake', na' zka'n zéngake' Benne' Criston'. <sup>24</sup>Le gon ga gak bia' nží'ilele légake' nich gákbe'gekle yógo'te kwe' benách ka' che Benne' Criston' žonle ki, na' nich nnézgekle' nak dot da' li da' chawe' da' znnato' kan nak chele.

**Mežw da' ztobžo da'  
gáklenen lježžo ka'**

**9** Kan nak da' znézwle da' gáklenen lježžo ka', benne' žejlé'gake' che Benne' Criston', bi žon byenen wzoja' chele le'e, le'e yiche ni. <sup>2</sup>Ba nnezla' kan žénelele gonle da' ni, na' zchalja' lawgak benách ka' žejlé'gake' che Benne' Criston', benne' ka' nnítá'gake' gan nbab Masedonia nga, kan nak da' chawe' da' žonle. Zzenla' légake' kan nak chele le'e, zoale gan nbab Acaya, kan ba gok to yiz ba zoale gonle da' ni, na' dan' že' láže'le gonle da' ni, ben chochen láždo'gak yeláte'ze bdachgak benách ki, benne' ka' žejlé'gake' che Benne' Criston'. <sup>3</sup>Na'a, žsel'a'a lježžo ki gan zoale nich gak bia' nak dot da' li da' znnato' kan nak chele, na' nak kan ba wnnia' chele, ba zoale gonle dan' gáklenen lježžo ka'. <sup>4</sup>Cha' bale benách Masedonia ki, benne' ka' žejlé'gake' che Benne' Criston', yídłengake' neda' tzen, na' cha' gak bia' bi zoale gonlen, naž yedo'e'lto' dan' bxen láže'to' le'e, na' lezka' le'ekze žala' yedo'e'elele. <sup>5</sup>Che len gokla' žala' sel'a'a lježžo ki nich žíngake' gan zoale zgá'alegake' kate' la'a neda', na' gáklengegake' le'e nich yeyóž wtoble dan' bchebe láže'le wnézjwlen. Ki gaken, yeyóž wtoble

mežwn' zga'ale kate' la'a, na' gak bia' znézjwlen dan' žénekzelele, na' kege dan' žon byéneto' bi da' wnézjwle.

**6** Le chejsá' laže' da' znnan:  
No benne' žaze' láte'ze, láte'ze yelape'.  
No benne' žaze' da' zenle'e, da' zenle'e yelape'.

**7** To tole žala' wnézjwle kan ba wnnale lo yichj lázdo'le, na' kege lo yela' nyache' laže' chele o dan' zoa no benne' žon byene', dan' nži'il Dios no benne' dot laže'e znezjwe'. **8** Dios gak yebi'e chele da' zenle'e kan žiážjelele nich gata' chele yógo'te dan' žiážjelele, na' ga'n chele nich gak gáklenle no benne' zoa da' žiážjele'. **9** Lezka' nyejw le'e yiche la'y kan nak che to benne' wzóa bi da' bnežjwe', da' znnan:

Dot laže'e bnežjwe' chegak  
benách yache' ka'.

Nak biá'teze yela' ži'i laže' chie'.

**10** Dios, Bennen' žonne' chežo bi da' gazžo, na' lezka' bi da' ye'j gawžo, wnežjwe' chele da' gak wnézjwle le'e, dan' naken ka da' žaz to benne', na' lezka' gone' ga chan da' yelaple, da' naken da' chawe' da' žonlen.

**11** Dios gone' ga gáta'le'eze yela' wnni'a chele nich gak wnézjwle da' zenle'e. Ki gaken, dan' wnézjwle, dan' chiston' lo wlazle le'e, gonen ga ye'gak benne' zan Dios: "Žóxkeno'."

**12** Da' znézjwle dan' gáklenen lježzo ka', kégeze gonnен chégake' da' žiážjegekle', san gonen ga yé'gake' Dios: "Žóxkeno'." **13** Kate' gonle ki, na' wkán' zéngake' Dios dan' gak bia' žonle kan znnna diža' chawen' che Benne' Criston' kan znnale žonle. Lezka' we láwgake' Le', dan' nakle

le'e ži'i laže', na' znézjwle chégake', na' lezka' chegak yezika' benách ka'. **14** Wcháljlengake' Dios, na' nnábgekle' Le' gon chawe'e le'e dan' zej nži'ile' le'e dan' Dios že' láže'li'e le'e. **15** iŽoxken Dios, Bennen' benne' chežo to da' záka'le'en!

**Yela' wnná bia' da' nzi' lo na' Pablo**

**10** Znnagak bálele le'e naka' gaxjw laže' kate' ne zóalena' le'e, san kate' zoa' zi'to' gan zoale žselá' le'e snia kan zzoja' chele le'e yiche. Dan' nak Bennen' Criston' gaxjw laže', na' ži'i laže', neda', Pablo, žáta'yoela' le'e **2** nich bi gonle ga gon byenen selá' le'e snia katen' la'a gan zoale. Ba zoa' selá' snia benne' ka' znnágake' žonto' žin ni lo yela' benachze cheto'. **3** Da' li nakto' benách, san kege žakze cheto' žonto' xchin Dios. **4** Da' ka' zdíl-lento' lo wdile, bi zej naken ka da' ka' zdíl-lengak benne' ka' nnítá'gake' yežlyó nga, san da' ka' zdíl-lenton' zej napen yela' wak che Dios, dan' zkonlto' žin nich wžia yi'to' da' wale ka' che da' xiwe'. Žžia yi'to' da' wen laže' ka' da' znnna da' xiwe' kan nak cheto', **5** na' yógo'te da' ka' zkonlen žin nich gonen ga wkán' zen kwinžo, nich gonen ga bi gak gónbia'žo Dios. Žonto' ga zej nak bia' yógo'te da' zza' laže'gak benách ka', da ka' žóngaken ga zží'igake' che Dios, nich gak gonto' kan znnna Bennen' Criston'. **6** Te gonle da' gak bia' dot laže'le žonle kan znnna xtiža' Bennen' Criston', soato' selto' snia yógo'te benne' ka' zží'igake' che xtiže'e.

**7** Zwiale da' nla' lawze. Cha' zoa no benne' ládjwle le'e, benne' žekle'

nake' che Benne' Criston', lezka'  
žala' gákbe'le' da' ni: kan le' nake'  
 che Benne' Criston', lezka' neto'  
 nakto' chie'. <sup>8</sup>Bi žedoe'ela' la'kze  
 wdetlen bka'n zen kwina' kan nak  
yela' wnná bia' da' bde Xanžon' lo  
na'to'. Da' nzi' lo na'to' naken nich  
 gak gónzeto' li laže' kan žejle' che  
 Benne' Criston', na' kege nich wžia  
 yi'to' le'e. <sup>9</sup>Bi žénela' géklele žénela'  
 wcheba' le'e len da' zzoja' chele le'e  
 yiche ni. <sup>10</sup>Zej nnita' benne' ka' ga  
 na', benne' ka' nnágake': "Kanzej  
 nak da' ka' zzoj Pablo chežo, zsele'  
 ž'o snia, na' žesbage'e ž'o zia, san  
 kate' zóalene' ž'o žon kwine' gaxjw  
laže', na' diža' zen laže' zchalje'."

<sup>11</sup>Bennen' znnie' cheto' ki žala'  
 gákbe'ele' da' ni: kan nakto' kate'  
 zzojto' chele le'e yiche kate' zoato'  
 zi'to' gan zoale, lezka' gakto' lo da'  
 gonto' katen' sóalento' le'e.

<sup>12</sup>Da' li bi žežoglo' nnato' nakto'  
 tlebe kanzej nak benne' ka' zka'n  
zen kwíngake'. Benne' bi nnezel  
 ka'zej nak benne' ka'. Lo da' zza'  
laže'gake' znnágake' kan žala'  
 gakgak benách ka', na' zchi'a'  
laže'gake' la' légakze' kan nak dan'  
zza' laže'gake'. <sup>13</sup>Neto' bi wka'nže  
zen kwinto' kan žala' gonto', san  
 toze kan nak žin da' bde Dios lo  
na'to', na' lo žin na', žala' gonton'  
 gan zoale le'e. <sup>14</sup>Cha' bde Dios lo  
na'to' žin da' gonto' gan zoale, bi  
 wdetle benton' katen' bžinto' gan  
 zoale, katen' bcháljlento' le'e diža'  
 chawen!. <sup>15</sup>Bi zka'n zen kwinto' kan  
 nak žin da' bengak yezika' benách  
 ka', san toze kan nak žin da' bde  
 Dios lo na'to'. Žxen laže'to' gakže li  
laže' kan žejle' che Benne' Criston'  
 nich gak gonto' žin gan zoale da'

zákažen, kan nak da' bde Dios lo  
na'to' gonton!. <sup>16</sup>Naž gak wchaljto'  
 diža' chawen' gan zej nnita' yež ka'  
 žé'gaken zí'to'že gan zoale. Ki gaken,  
 bi gon byenen wká'n zen kwinto'  
 ni'a che žin da' bengak yezika'  
 benách ka', dan' bde Dios lo ná'gake'.

<sup>17</sup>Nyejw le'e yiche la'y da' znnan:  
 No benne' žénele' bi da' wká'n  
zene',  
 da' benkze Xanžon' žala' wká'n  
zenen'.

<sup>18</sup>Ba bežój chawe' to benne' kate'  
znnna Xanžon' ba bežoje' chawe', na'  
 kege kate' znnne' ki che la' kwinze'.

### Pablo, na' benne' ka' žon kwíngake' wbás ka' che Jesúš

**11** Žénela' gakle zen laže' len  
 neda' kate' ne zchalja' lo  
yela' bi nnezle chia'. Le we' laže'le  
 neda!. <sup>2</sup>Že' laže'a le'e kan Dios  
 na'kze že' laže'le' le'e, dan' nakle  
 kan nak to xkwide' no'le nakbe'  
 dot li laže', no'len' bezía'-be' kwit  
 Benne' Criston' nich wchág ná'lenbe'  
Lekze'. <sup>3</sup>Zžeba' la' no benne' gan  
 zoale, na' gon laže'le' le'e, na' gone'  
 ga wsanle kan dot laže'le' nž'i'ilele  
 Benne' Criston', kan ben Eba, zo'le  
 Adán katen' da' xiwe', lo yela' sina'  
 chen, ben laže'len le'. <sup>4</sup>Ki znnia'  
 dan' dot laže'le' žwe'le no benne'  
 latje ze'e gan zoale, na' zchalje'  
 kan nak che xtiža' Jesúš, da' nžan'  
 kan nak da' bsedlto' le'e, na' zzi' lo  
na'le to be', na' to diža' chawe', da'  
 ka'zej nžan' kan nak Be' La'y na',  
 na' diža' chawen' dan' wzí' lo na'le  
 da' bcháljto' neto!. <sup>5</sup>Žekla' bi nakža'  
 neda' ka'ze kan zej nak benne' ka',  
 benne' žéklele le'e zej nákl'i' zen,  
 na' znnágake' zej nake' wbás ka' che

Benne' Criston'. <sup>6</sup>La'kze naka' ka'ze kan zchalja', bi naka' ka'ze kan nak yela' žejn'i il da' napan'. Zan chi'i, na' da' zan kan bloe'elto' le'e kan nak yela' žejn'i il da' napton'.

<sup>7</sup> ¿Bi gok chawe' da' bena' katen' bi be bchixjwa' le'e katen' bchalja' diža' chawen' gan zoale? Bka'n kwina' ka'ze, san bka'n zena' le'e. <sup>8</sup>Bkonla' žin da' gok chegak yezika' kwe' ka' benáčh ka' che Benne' Criston', dan' wz'i'a mežw da' bnéžjwgake' chia' nich gok bena' žin gan zoale le'e. <sup>9</sup>Katen' wzóalena' le'e, cha' wzóa da' byážjela', bi bsaka' zi'a nitole le'e, san lježžo ka', benne' ka' bžójgake' gan nbab Masedonia, bnéžjwgake' chia' dan' byážjelan'. Batkle bsaka' zi'a le'e, na' tlebe kan gona'. <sup>10</sup>Ni'a che da' nak dot da' li kan nak che Benne' Criston' da' zóálenen neda', bi soa' žize, san wká'n zen kwina' kan nak da' ki dot gan nbab Acaya. <sup>11</sup>¿Zéklele bi nži'ilá' le'e dan' znnia' ki? Nnézkzele Dios nži'ilá' le'e.

<sup>12</sup>Gónteza' kan žona' na'a, nich bi gata' latje chegak benne' ka' zka'n zen kwíngake', benne' ka' znnágake' zej nake' wbás ka' che Benne' Criston', na' znnágake' žongake' xchine' Lé' kan žonton' neto'. <sup>13</sup>Bi zej nake' wbás ka' bselá' Benne' Criston'. Žon láže'gake' kan nak žin da' žongake', na' žonze kwíngake' wbás ka' che Benne' Criston'. <sup>14</sup>Bi žala' yebánležo kan žongak benne' ka'. Lezka' da' xiwe' na'kze zloe'l kwinen ka to wbás che ya'abá, wbasen' zde' lo baní'. <sup>15</sup>Che len bi žala' yebánležo cha' wen žin ka' che da' xiwen' zloe'l kwíngake' ka benne' ka' žongake' xchin Bennen' nake' chawe'. Kwia yí'gake' kan nak tlebe len da' žongake'.

### Da' ka' wzaka' Pablo

<sup>16</sup>Da' yoble žapa' le'e: bi žala' no benne' gekle' nyal yichja'. San cha' žéklele nyal yichja', le gonn neda' latje wchajla' ka to benne' nyal yichje', nich wká'n zen kwina' to chi'ido'. <sup>17</sup>Da' ni da' znnia' bi naken to da' gož Xanžon' neda' gona', san zchalja' ka to benne' nyal yichje', na' wká'n zen kwina'. <sup>18</sup>Zej nnita' benne' zan zka'n zen kwíngake' kan zej nak da' žóngake' žakze chégake'. Che len, lezka' neda' wká'n zen kwina'. <sup>19</sup>Dan' žéklele žakle da' zenle'e, dot láže'le žwe'le latje wchajlgak benne' ka' nyal yíchjgake'. <sup>20</sup>Lezka' žwe'le no benne' latje gone' le'e benne' ndo'w ka', o no benne' ke'e da' den chele, o no benne' nna bi'e le'e, o no benne' wka'ne' le'e ka'ze, o no benne' kape'e žoa'ale. <sup>21</sup>Žedoe'ela' znnia' da' ni: bi bento' ki chele dan' wdetle gokto' gaxjw laže'.

Cha' zoa no benne' žežogle' wká'n zen kwine', lezka' neda' yežoglan', na' wchajla' ka to benne' nyal yichje'.

<sup>22</sup>¿Zej nake' benne' hebreo ka'?

Lezka' naka' neda'.

¿Zej nake' benne' Israel ka'?

Lezka' naka' neda'.

¿Zej nake' za'só Bran? Lezka' naka' neda'.

<sup>23</sup>¿Zej nake' wen žin ka' che Benne' Criston'? Lezka' nakža' neda'.

(Zchalja' ka to benne' nyal yichje' kate' zchalja' ki.)

Benža' neda' žin ka bénge'ké' légake'.

Byejwa' liž ya da' zanže chi'i ka byéjwgake' légake'.

- Bdingak benách ka' neda' lo  
yo da' zanže chi'i kan gok  
chégake'.  
Ben zož gata' da' zanže chi'i ka  
goken chégake'.  
**24** Gayo' chi'i bdingak benne' judío  
ka' neda' yid.  
(To to chi'i ka' bdíngake' neda' to  
galje žoa chi'i).  
**25** Chonne chi'i bdíngake' neda' yag.  
To chi'i bžé'egake' neda' yej.  
Chonne chi'i wyoá'a to lo barkw  
da' wzía yin' lo nisdo'.  
To chi'i wyoá'a to yele, na' to že  
lo nis lo nisdon'.  
**26** Zan chi'i katen' wyoá'a nez,  
wdí'a gan ben zož chia' che lo  
yego ka',  
na' gan ben zož chia' lo na'gak  
benne' wbán ka',  
na' gan ben zož chia' lo na'gak  
benne' wláž chia' ka',  
na' gan ben zož chia' lo na'gak  
benne' zi'to' ka',  
na' gan ben zož chia' lo yež,  
na' gan ben zož chia' lo latje  
dach,  
na' gan ben zož chia' lo nisdo',  
na' gan ben zož chia' lo na'gak  
benne' wen laže' ka', benne'  
ka' znnázegake' zejl'égake' che  
Benne' Criston'.  
**27** Žin zen bena', na' bedó laža'a.  
Zan chi'i bi gota' chia' latje tasa'.  
Wdona', na' wbił'a.  
Zan chi'i bi gota' chia' da' gawa',  
o gan wchél kwina', o laže' da'  
gakwa'.  
**28** Yógo'te že gok zedla' dan' že'le'e  
laža'a yógo'te kwe' benách ka'  
che Benne' Criston'.  
**29** Kate' no benne' zkwide' laže'e,  
lezka' neda' zkwide' laža'a.

Kate' no benne' žone' ga wchixle  
to lježžo, zža'a bennen' žone'  
ki.

**30** Cha' žon byenen wká'n zen  
kwina', wká'n zen kwina' kan zej  
nak da' ka' zej nak bian' zkwidé'la'.  
**31** iGa'n zen Dios, Xa Xanžo Jesús,  
Benne' Criston! Le' nnézkzele'  
zchalja' da' nak dot da' li. **32** Katen'  
wzóá' lo yež Damasko, benne' lie'  
Aretas, bennen' gota' lo ne'e lo wláz  
benne' znna bi'e gan nbab Roma,  
bnnite'e benne' ka' wžé' náwgake'  
nich séngake' neda', **33** san lježžo  
ka' bdégake' neda' to ga že'o baní'  
che yo'o, ne yo'a to xkwite zen, na'  
btínmegake' neda' na'le lo ze'e da'  
žape chi'in yežen'. Ka' goken, belá'  
lo na'gak benne' ka' wžé' náwgake'  
ned'a.

Da' błe'e dáwe'le Pablo, na'  
da' błoe'el Dios le'

**12** Da' li bi żala' wká'n zen  
kwina'. La'kze ki naken,  
na'a wchalja' kan zej nak da' ka'  
ble'e dáwe'la', na' da' ka' błoe'el  
Xanžon' neda'. **2** Nónbia'kza' to  
benne' zejli'e che Benne' Criston',  
na' ba gok xdá' yiz wzóá no benne'  
bchi'e le' ya'abá che Dios. Bi nnezla'  
cha' wyeje' ga na' lo bela' zen chie',  
o lo be' nakkze'. Toze Dios nnezle'.  
**3** Nnézkzel'a wyaze' latje xtan che  
Dios, da' nzin' paraíso. Bi nnezla'  
cha' wyeje' ga na' lo bela' zen chie',  
o bi. Toze Dios nnezle'. **4** Katen'  
wzóé' ga na', benle' da' ka' žóngaken  
ga žebanlžo, da' ka' bi de latje no  
benne' wchalje' chégaken. **5** Gak  
wká'n zena' bennen', san bi wká'n  
zen kwina'. Toze wká'n zen kwina'  
kan nak da' nak bia' zkwidé'la'.

**6**La'kze yénela' wká'n zen kwina', bi gaka' benne' bi nnezle, dan' nnia' da' nak dot da' li. Na'a, bi wká'n zen kwina' dan' bi žénela' gapže no benne' neda' ba la'ne kanzej nak da' ka' ble'ela' neda', o kan nak da' benla' neda'.

**7**Naž, nich bi ttle wká'n zen kwina' dan' ble'ela' da' ka' da' žóngaken ga žebanlžo, Dios bzo'e to yižwé' da' žlale'en lo xpela'a kan žla gan zga'a to yeche'. Yižwén' goken ka to da' bkonle žin da' xiwe', nich bsaka' zin' neda'. Ki goken chia' nich bi ttle wká'n zen kwina'. **8**Chonne chii góta'yoela' Xanžon', na' wnnabla' Le' yeké'e xwi'a na'. **9**Xanžon' gože' neda': "Nakte chio' da' že' laža'a le'. Yebélenželo' da' že' laža'a le' kate' zkwíde'lo!" Che len, žebéle'ela' dan' zkwíde'la'. Dan' žaken ki chia', na' žáklenže yela' wak che Benne' Criston' neda'. **10**Che len, dan' nži'ilä Benne' Criston', žebela' kate' zkwíde'la', na' kate' no benne' žliž zí'e neda', na' kate' zoa da' žiážjela', na' kate' no benne' zbia laže'e neda', na' kate' zoa bi da' žaken chia'. Kate' zkwíde'la', napža' yela' wak chie' Le'.

### Pablo že' laže'e benách Corinto ka' zej nake' che Jesús

**11**Naka' benne' bi nnezle dan' bchalja' kanzej nak da' chawé' ka' da' bena' neda'. Le'ekze ben byenle bena' ki. Le'e žala' wká'n zenle neda', na' la'kze bi be naka' neda', bi nakža' ka'ze kanzej nak benne' ka' žéklele le'e zej náklje' zen, benne' ka' znnázegake' zej nake' wbás ka' che Benne' Criston'. **12**Da' ka' bena' lo yela' zbez zen laže' chia' gan zoale

le'e zej nak bian' naka' benne' wbás che Benne' Criston'. Blé'elele da' ka' bena', da' ka' zej nak bian', na' da' ka' žóngaken ga žebanlžo, na' yela' wak zen che ya'abá che Dios. **13**Toze da' bi bena' gan zoale le'e da' bena' gan zej nnita' yezika' kwe' benách ka' che Benne' Criston'. Bi bsaka' zi'a le'e nich bi da' gonnle da' ye'j gawan'. Le si' zen chia' dan' bi bena' ki chele.

**14**Za' la'a neda' gan zoale da' beyonne chii'. Bi be nnaba' da' gonnle chia'. Žénela' gonnle le'e kwinkzle chia', na' kege bi da' den chele. Bi' že'n ka', bi žon byenen wáwgakbe' xa xná'gakbe'. Xa xná'gakbe' ka' žala' wáwgake' zí'ngake' ka'. **15**Dot laža'a wkonla' žin yógo'te da' den chia', na' wdé kwina' ni'a chele nich gak da' chawé' chele, la'kze žekla' neda' kate' nži'ižela' le'e, zej žeyache' yela' nži'il chele len neda'.

**16**Nnékzelele bi bsaka' zi'a le'e. Na'a, bálele nnale goka' sina', na' len da' wen laže' bebélenla' da de chele. **17**¿Žéklele ben laže'la' le'e katen' bsel'a' benne' wbás chia' ka' gan zoale? **18**Góta'yoela' xkwide' Titon' yidbe' gan zoale, na' bsel'a' a lježjón' tzen len lebe'. ¿Žéklele ben laže'le xkwide' Titon' le'e? ¿Bi bento' tlebe kan žonto' xkwide' Titon', na' neda', na' lezka' tlebe kan nak dan' bchaljton'?

**19**¿Žéklele le'e, zí'na'do' ka', žebéj kwinto' chawé' lawle le'e? Law Dios zchajto' lo wláz Benne' Criston', na' yógo'te da' žonto' zej naken nich gakže dot li laže' yela' žejlé' chele che Benne' Criston'. **20**Zžeba' bi gakle le'e kan žénela' gakle kate' la'a

gan zoale, na' neda' bi gaka' kan žénelele le'e gaka'. Zžeba' zdílele, na' zgé'elele lježle ka', na' zža'le lježle ka', na' žliž dítjеле lježle ka', na' znnele che lježle ka', na' zka'n zen kwinle, na' žonle žo'osbé. <sup>21</sup>Kate' la'a gan zoale, cha' ki žaken chele, zžeba' gon Dios ga yedoe'ela' kan nak chele, na' gon byenen kweža' ni'a chegak benne' zan, benne' ka' béngek' dola', na' bi beyát láže'gake' kan jez nak da' kegle da' béngek', na' da' ka' wzé láže'gake' da' kegle.

**Da' gož Pablo benne' Corinto  
ka' ga ze lawte**

**13** Da' beyonne chi'i ni la'a neda' gan zoale. Nyejw le'e yiche la'y da' znnan: “Žon byenen nníta'gak chope chonne benne' ka', benne' wzóa lígake' cha' no benne' žesbage'e lježe' zia.” <sup>2</sup>Ba bchi'la' benne' ka' béngek' dola' katen' wzóalena' le'e da' bežope chi'i, na' na'a zchi'la' légake' da' yoble', na' lezka' yógo'te benne' ka' žóngake' dola', la'kze zoa' zi'to' nga, znnia': cha' la'a gan zoale da' yoble, bi gaka' gaxjw laže' katen' tílegaka' ne'. <sup>3</sup>Znnable le'e to da' gak bian' zchalja' lo wláz Benne' Criston'. Da' ka' gona' gak biá'gaken zchalja' ki. Bi zkwíde'le Benne' Criston' kate' bi da' žone' chele, san lo yela' wak zen chie' žone' bi da' žone' chele. <sup>4</sup>Da' li bde'e le'e yag kroze ka to benne' zkwíde'le', san zoe' nbane' dan' zoalen yela' wak che Dios Le'. Lezka' neto' zkwíde'lto' tzen len Le', san dan' nakto' toze len Le' zoato' nbanto', na' zoalen yela' wak che Dios neto' nich bi da' gonto' gan zoale.

<sup>5</sup>Le wia kwinle cha' žejle'le che Benne' Criston' o bi. Le si' bia' la' kwínele. čBi nnézlele zoalen Jesúš, Benne' Criston', le'e, cha' da' li žejle'le chie'? <sup>6</sup>Žxen láže'to' nnézkzelele da' li neto' žejle'to' che Benne' Criston'. <sup>7</sup>Žližto' Dios, na' znnablto'-ne' gáklenè le'e, nich bi gonle da' kegle, kege nich yežojo' chawé' neto', san nich gonle le'e da' naken chawé', la'kze géklele zchíxelto' neto'. <sup>8</sup>Bi gak wži'ito' che da' nak dot da' li, san gak góñzeto' da' naken tlebe len da' naken dot da' li. <sup>9</sup>Che len žebelto' kate' zkwíde'lto', na' le'e žak chochle. Žližtezo' Dios, na' znnablto'-ne' gone' ga gak dot li laže' kan žejle'le che Benne' Criston'. <sup>10</sup>Che len zzoja' chele le'e da' ni kate' ne zoa' zi'to' gan zoale. Naž kate' la'a gan zoale bi gon byenen wsaka' zi'a le'e, na' bi wkonla' žin yela' wnná bia' da' bde Xanžon' lo na'a, da' naken nich gon chocha' le'e, na' kege nich wžia yi'a le'e.

<sup>11</sup>Na'a, zí'na'do' ka', le gak choch. Le we' laže' gak dot li laže' kan žejle'le che Benne' Criston'. Lezka' le we' laže' da' ni da' žapa' le'e. Le gak toze len lježle ka', na' le ga'nlen lježle ka' cháwe'do'. Znnabla' Dios sóalene' le'e. Le' nži'ile' žo'o, na' zka'n zie' yichj lázdo'žo. <sup>12</sup>Le gape “Padiox” lježle ka', tole yetole, na' le cheł'a' lježle ka'. <sup>13</sup>Yógo'te lježzo ka' nníta'gake' nga žápegake' le'e “Padiox”.

<sup>14</sup>Znnabla' Dios len Xanžo Jesúš, Benne' Criston', we' laže'e le'e, na' ži'ile' le'e, na' gone' ga gakle toze len Dios Be' la'y. Ka'kze gaken.

# DIŽA' DA' BSELA' PABLO GAN NBAB GALASIA

Pablo žape' "Padiox" benách ka'  
che Jesús gan nbab Galasia

**1** <sup>1-2</sup>Neda', Pablo, žapa' le'e  
benách ka' che Benne' Cristo  
gan nbab Galasia, na' lježžo ka'  
nníta'gake' nga, žónlengake' neda'  
tzen. Neda' naka' benne' wbás che  
Benne' Criston'. Bi belsela' benách  
ka' neda'. Jesús, Benne' Criston',  
bséla'kze' neda', na' Xažo Dios,  
Bennen' besbane' Jesusen' lo yela'  
got, bénlene' Le' tzen. <sup>3</sup>Znnabla'  
Xažo Dios len Xanžo Jesús, Benne'  
Criston', gon chawe'e le'e, na' wká'n  
žie' yichj lázdo'le. <sup>4</sup>Jesús na'kze,  
Benne' Criston', bde kwine' lo yela'  
got ni'a che dola' da' wbága'žo, na'  
beslér' žo'o lo da' kegle da' žaken ža  
ni zoažo na'a. Bene' ki dan' goken  
da' gónekzele Xažo Dios. <sup>5</sup>iGa'n  
žénteze Dios! Ka'kze gaken.

Toze nak diža' chawé' kan nak  
che Jesús, Benne' Cristo

<sup>6</sup>Žebánle'ela' kan žonle le'e, dan'  
la' zká'ntele Dios. Le' bliže' le'e  
nich gakle che Leze' dan' Jesús,  
Benne' Criston', be' laže'e žo'o, san  
na'a žénelele si' lo na'le to diža'

chawé' yoble. <sup>7</sup>Da' li bi zoa yetó  
diža' chawé' san zchalja' ki dan' zej  
nnita' benne' ka' zchíxgake' lježžo  
ka', na' žénegekle' wchá'gake' diža'  
chawen' kan nak che Benne' Criston'.  
<sup>8</sup>Cha' zoa no benne' zchalje' to  
diža' chawé' da' bi naken tlebe  
len dan' bchaljto' neto' lawle le'e,  
znnabla' Dios wsaka' zí'e bennen'.  
Žala' wsaka' zí'e nedkza' cha' gona'  
ki, na' cha' to wbás che ya'abá gone'  
ki, Dios na'kze wsaka' zí'e le'. <sup>9</sup>Ba  
wnnikza' ki zga'ale, na' na'a znnia'  
ki da' yoble: cha' zoa no benne'  
zchalje' to diža' chawé' da' bi naken  
tlebe len dan' ba wzí' lo na'len,  
znnabla' Dios wsaka' zí'e bennen'.

<sup>10</sup>¿Žéklele žénela' gapple neda' ba  
la'ne kate' zchalja' ki? O'o. Žénela'  
yežoja' chawé' law Dios. ¿Žéklele  
žénela' chaz láže'gak benách ka'  
neda'? Chela' yénela' chaz láže'gak  
benách ka' neda', bi gaka' wen žin  
che Benne' Criston'.

Ka beyák Pablo benne' wbás  
che Benne' Cristo

<sup>11</sup>Na'a, žala' nnézlele da' ni,  
zí'na'do' ka'. Diža' chawen' dan'  
zchalja' bi zan' lo yichj lázdo'gak  
benách ka'. <sup>12</sup>Kege no benne' bdie'

diža' chawen' lo na'a, na' kege no benne' b<sup>sedlen'</sup> neda'. Jesús, Benne' Criston', bzejní' ikzele' neda' kan nak diža' chawe' chien'. <sup>13</sup>Ba bénkzelele kan bena' neda' zga'ale katen' nzi' lo na'a kan zka'n zengak benne' judío ka' Dios. Nnézkzelele kan bena', katen' wžia láže'li'a benách ka' che Dios, benne' ka' žejlé'gake' che Benne' Criston', na' gónela' wžia yi'a légake'. <sup>14</sup>Kan zka'n zengak benne' judío ka' Dios, benža' neda' ka yeláte'ze bdachgak lježa' benne' judío ka', benne' ka' zjake' yiz ka zeyá'a neda', dan' wzí'že lo na'a neda' ka léngake' da' bdegak xa wdé cheto' ka' lo na'to' kan bénenteze béngake'. <sup>15</sup>Ki goka' neda', san dan' nak Dios ži'i láže', wžekze' neda' zga'ale kate' bi na' galja', na' bliže' neda' nich gona' xchine'. <sup>16</sup>Naž, katen' gónekzele Dios, bene' ga bénbi'a Zi'ne', Bennen' bsele'e neda' nich chejzenla' benách zi'to' ka' diža' chawen' kan nak chie' Le'. Katen' bene' da' ni, bi bejtija' no benne' nake' benachze nich wsedle' neda', <sup>17</sup>na' bi wyá'a lo yež Jerusalén nich chejwía' benne' ka' gókgake' wbás ka' che Benne' Criston' zgá'alegake' ka neda', san wyá'a gan nbab Arabia, na' wdé na' beyá'a lo yež Damasko.

<sup>18</sup>Ka' goken, katen' ba wdé chonnie yiz wyá'a lo yež Jerusalén, na' bejwía' Bedw, na' bgá'nlena' le' xda' ža'. <sup>19</sup>Katen' wzó'a ga na' bi ble'ela' yetože benne' wbás che Benne' Criston'. Toze Jakob, biche' Xanžon' ble'ela'-ne'. <sup>20</sup>Da' ni da' zzoja' chele naken dot da' li. Nnézkzele Dios bi žon laža'a.

<sup>21</sup>Wdé na' wyá'a, na' wdía' lo yež ka' da' jez nbaben Siria, na'

da' ka' jez nbaben Silisia. <sup>22</sup>Kate' ža ka' lježžo ka' jez nake' che Benne' Criston' gan nbab Judea bi bénbia'gake' neda'. <sup>23</sup>Belyenle' toze dan' bchaljgak yezika' benách ka' kan nak chia' neda', na' wnnágake': "Bennen' wžia laže' že'o zga'ale, zze diže'e na'a che da' žejlé'žo, dan' gónele' wžia yi'e." <sup>24</sup>Ka' goken, bka'n zéngake' Dios ni'a che da' žona' neda'.

Yezika' benne' wbás ka' che  
Jesús zzi' lo ná'gake' Pablo

**2** Kate' ba gok xda' yiz, wyá'alená' Bernabé, na' belá'a lo yež Jerusalén, na' bchi'a xkwide' Tito, bin' bénlenbe' neda' tzen žin. <sup>2</sup>Wyá'a ga na' dan' bloe'el Dios neda' žala' cha'a ga na'. Katen' bla'a ga na', na' cheł'a ale bcháljlena' benne' ka' nzi' lo ná'gake' žin che Benne' Criston', na' bzenla' léngake' kan nak diža' chawen' da' zzenla' benách zi'to' ka'. Ki bema' dan' gónela' bi ga'n dáche'ze žin da' ba bema', na' žin da' žona' na'a. <sup>3</sup>La'kze xkwide' Titon', bi' lježan', bi nakbe' benne' judío, bi ben byéngake' chog lo xpéla'be' dan' nak bian' no benne' byo nzi' lo ne'e xtiža' Dios kan žónenteze žongak benne' judío ka'. <sup>4</sup>Da' li, bałe benách ka' wnnítiga'gake' ga na', benne' žilj láže' ka', na' wnnágake' jez nake' lježžo ka', gónegekle' gon byéngake' chog lo bela' che xkwide' Titon' dan' nak bian'. Benne' ki zbiga'gake' gan zoažo že'o, na' zwíagake' kan žonžo nich nnézgekle' kan belažo lo na' da' bchi'le Moisés. Belažo dan' nakžo toze len Jesús, Benne' Criston'. Gónegekle' gon byéngake' yeyakžo

da' yoble ka benne' ka'zej ndo'e lo  
na' xtiža' Moisés na'. <sup>5</sup>Nitó chí'ido'ze,  
bi be'to' légake' latje. Ki bento' nich  
gape chí'ito' da' nak dot da' li che  
diža' chawen' nich gak yebélenžon.

<sup>6</sup>Benne' ka' žeklžo nzi' lo  
ná'gake' žin che Benne' Criston' bi  
bchí'igekle' neda' nitó da' kobe. Bi  
že' laža'a kan zej nake', dan' bi  
zchi'a laže' Dios žo'o kan zchi'a  
láže'gak benách ka' žo'o. <sup>7</sup>Bi  
bchí'igekle' neda' nitó da' kobe,  
dan' gókbe'egakle' Dios bdie' lo na'a  
žin chie' da' žona', nich chejzenla'  
benách zi'to' ka' diža' chawen', tlebe  
kan bde Dios lo na' Bedon' žin chie',  
na' zzenle' benne' judío ka' diža'  
chawen'. <sup>8</sup>Dios, len yela' wak chie',  
bene' neda' wbás chie' nich wsedla'  
benách zi'to' ka', tlebe kan bene'  
Bedon' wbás chie' nich wsedle' le'  
benne' judío ka'.

<sup>9</sup>Jakob len Bedon', na' Zwa, benne'  
ka' žeklžo nzi' lo ná'gake' žin che  
Benne' Criston', gókbe'egakle' bde  
Dios lo na'a žin ni. Che len wzí'  
lo ná'gake' neda' len Bernabé, na'  
bento' toze diža' chjento' xchin Dios  
gan nníta'gak benách zi'to' ka', neda'  
len Bernabé, na' légake' góngake'  
xchin Dios gan nníta'gak benne'  
judío ka'. <sup>10</sup>Góta'yoegakle' neto' toze  
chejsá' láže'to' gáklenko' benách  
yache' ka', na' da' ni že' láže'teza'  
žona'.

### Pablo bdile' Bedw lo yež Antiokía

<sup>11</sup>Naž kate' bla' Bedon' lo yež  
Antiokía, bdila'-ne', dan' bchixle'  
kan bene'. <sup>12</sup>Ka' goken dan' zga'ale  
bdáwlene' benách zi'to' ka' tzen,  
na' bene' ki na' zejte bžingak bale  
benne' ka' zej nake' toze len Jakob.

Naž wzó lawe' žebige'e, na' biž  
bdáwlene' benách zi'to' ka' tzen dan'  
bžebé' bi da' gongak benne' ka' nzi'  
lo ná'gake' žóngake' ga chog lo bela'  
chegak benne' byo, benne' zi'to' ka',  
kan znna da' bchi'le Moisés. <sup>13</sup>Naž  
yebale benne' judío ka', benne'  
žejlé'gake' che Benne' Criston',  
bénlengake' Bedon' tzen kan žone'  
lo yela' zžeba chie', na' ka' goken  
ga bžinte lezka' bžeba Bernabé,  
na' le' bénlene' légake' tzen. <sup>14</sup>Naž  
kate' ble'ela' bi žóngake' kan znna  
da' naken dot da' li da' žsedle  
diža' chawen' žo'o, na' goža' Bedon'  
lawgak yógo'te benne' ka' che  
Benne' Criston' wnníta'gake' ga na',  
na' wnnia': "Nako' le' benne' judío,  
san žono' le' kan žongak benách  
zi'to' ka', na' kege kan žongak benne'  
judío ka'. ¿Bíz chen' žénelo' gon  
byeno' gongak benách zi'to' ka' kan  
žongak benne' judío ka'?"

Želagak benne' judío ka' dan'  
žejlé'gake' che Jesús kan  
želagak benách zi'to' ka'

<sup>15</sup>Lezka' goža' Bedon': "Žo'o nakžo  
benne' judío ka' dan' xa xna'žo ka'  
zej nake' benne' judío ka', na' kege  
nakžo benách zi'to' ka', benne' bi  
zej nónbi'e Dios. <sup>16</sup>Nnézkzelžo nitó  
benne' bi yeyake' chawé' law Dios  
dan' žone' kan znna da' bchi'le  
Moisés. Toze yeyák chawé' lawe' Le'  
no benne' žejli'e che Jesús, Benne'  
Criston'. Lezka' žo'o bejle'žo che  
Jesusen', nich beyakžo chawé' law  
Dios, na' kege dan' žonžo kan znna  
da' bchi'le Moisés na'. Bi yeyák  
nitó benne' chawé' law Dios dan'  
žone' kan znna da' bchi'le Moisés  
na'. <sup>17</sup>Na'a, žeklžo beyakžo chawé'

law Dios dan' žejeľežo che Benne' Criston', san cha' nak bia' nakžo benne' dola' kan zej nak benách zi'to' ka', čžala' nnažo žon Benne' Criston' ga žonžo dola'? O'o. <sup>18</sup> Cha' že' laža'a yechisa' da' bchi'le Moisés da' ba wdé chen, da' ni nak bian' zka'n ditja' da' znnakze Dios."

<sup>19</sup> Dan' bi gok gona' kan znnna da' bchi'le Moisés na', gok chia' ka ba nata'. Dan' naken ki, ba belá' na'a lo na' da' bchi'le Moisés nich soa' nbana', na' nich gona' kan znnakze Dios. <sup>20</sup> Nak chia' ka ba gótlena' Benne' Criston' tzen le'e yag kroze gan gote' Le'. Che len kege nedkza' zoa' nbana', san zoa nban Benne' Criston' lo yichj lázda'wa'. Kan naken, zoa' nbana' na'a, naken dan' žeji'a che Zi'n Dios, Bennen' bží'ile'ele' neda', na' bde kwine' lo yela' got lo wlaza' neda'. <sup>21</sup> Bi žénela' wzó'a chela'ale da' žonne' Dios chežo. Chela' gak to benne' yeyake' chawe' law Dios, dan' žone' da' znnna da' bchi'le Moisés na', naž dáche'ze got Benne' Criston'.

Da' znnna da' bchi'le Moisés, na'  
da' žejeľežo che Benne' Cristo

**3** iLe'e, benne' bi nnezle ka'  
iLe'e, benne' Galasia ka'  
čWzó'a no benne' bene' chele yela'  
wžá' nich biž gonle kan znnna da'  
naken dot da' li? Gaze lo de bzenlto'  
le'e da' žata' chežo dan' got Jesús,  
Benne' Criston', le'e yag kroze. <sup>2</sup> Le  
wchebe neda' da' ni. čBedjoaolen  
Dios Be' La'y le'e dan' benle kan  
znnna da' bchi'le Moisés na' o dan'  
bejle'le diža' chawen' da' bénlele?  
<sup>3</sup> čNakžke goken nakle benne' bi  
nnezle ki? Wzó lawle nakle che

Dios dan' zoažen Dios Be' La'y le'e.  
čŽéklele žakze chele gak gonle  
ga gak dot li laže' kan nakle che  
Dios? <sup>4</sup> čDáche'ze gok chele yógo'te  
dan' wzáka'le? iBi goken ki! <sup>5</sup> Kate'  
Dios zsele'e Dios Be' La'y nich  
yedjsóalene' le'e, na' žonne' le'e  
latje gonle yela' wak che ya'abá ka',  
čžone' ki dan' žonle kan znnna da'  
bchi'le Moisés na' o dan' žeji'le'zele  
diža' chawen' da' bénlele?

<sup>6</sup> Nyejw le'e yiche la'y da' znnan:  
“Bran bejli'e che Dios, na' Dios  
wnně' nake' chawe' lawe' Le'  
dan' bejli'e chie!” <sup>7</sup> Che len žala'  
nnézlele, benne' ka' žeji'le'gake'  
che Dios, légakze' jez nake' da' li  
za'só Bran na'. <sup>8</sup> Nyejw le'e yiche  
la'y, da' bla' lawn zga'ale kan gon  
Dios, dan' znnan, benne' zi'to'  
ka', benne' chejli'gake' chie' Le',  
gákgake' chawe' lawe' Le'. Che len  
Dios blo'ele' Bran na' zga'ale kan  
nak diža' chawen', na' wnně': “Lo  
na' Za'só' gon chawa'a benách ka'  
nníta'gake' dot yežlyó nga.” <sup>9</sup> Ki  
naken, Bran na' bejli'e che Dios, na'  
Dios wnně' nake' chawe'. Lezka' na'a,  
Dios žone' chawe' yógo'te benne' ka'  
žeji'le'gake' chie' Le'.

<sup>10</sup> Zej nbaga' zia benne' ka' žxen  
láže'gake' yeyákgake' chawe' law  
Dios dan' žóngake' kan znnna da'  
bchi'le Moisés. Ki naken dan' nyejw  
le'e yiche la'y da' znnan: “Zej nbaga'  
zia yógo'te benne' ka' bi žóngake'  
dot da' znnna xtiže'e.” <sup>11</sup> Na'a, nak  
bia' bi yeyák nitó benne' chawe' law  
Dios dan' žone' da' znnna xtiže'e, dan'  
nyejw le'e yiche la'y da' znnan: “Soa  
nban bennen' beyake' chawe' law  
Dios dan' žeji'le' chie' Le'.” <sup>12</sup> Kan  
žeyák chawe' law Dios no benne'

žejli'e che Benne' Criston' nžan' kan nak che benne' žxen laže'e yeyake' chawē' lawe' Le' dan' žone' kan wnnā Moisés na'. Nyejw le'e yiche la'y da' znnan: "Soa nban no benne' žone' dot da' znnna xtiže'e."

<sup>13</sup>Benne' Criston' beslē' žo'o lo na' da' zchogen chežo gatžo da' nyejwn le'e xtiža' Moisés na', dan' bi'e latje wžog chie' gate' lo wlazzō žo'o. Ki naken, dan' nyejw le'e yiche la'y da' znnan: "Zej nbaga' ūia yógo'te benne' ka'zej de'e to le'e yag." <sup>14</sup>Ka' goken che Benne' Criston' nich gak gon Dios kan bchebe laže'e gone' che Bran, katen' wnné' gon chawē' benách zi'to' ka' lo na' Jesúš, Benne' Criston', nich gak gone' ga yedjsoalen Dios Be' La'y žo'o cha' chejle'žo chie' Le', kan bchebe laže' Dios gone'.

Da' bchi'le Moisés žo'o, na' da'  
bchebe laže' Dios gone'

<sup>15</sup>Na'a, ūína'do' ka', žapa' le'e to da' ūsaka' leba', to da' žaken chežo, na' znnia': Kate' chope benne' ka' ba běngake' toze xtíža'gake', na' ba ben chóchgake' dižan', naž bi gak nitó benne' wché'en, na' bi gak no benne' wzanen'. <sup>16</sup>Dios bchebe laže'e to da' gone' che Bran, na' che ūa'sóe'. Gan nyejw le'e yiche da' ni, bi znnan: "za'sóe' ka'", da' ūchaljen chegak benne' zan, san znnan: "che ūa'sóe'." Da' ni ūchaljen che toze Benne', Benne' Criston'. <sup>17</sup>Da' ni ženela' nnia': Dios bene' toze diža' len Bran na', na' bchebe laže'e gone' kan znnna da' wnné'. Na'a, da' nyejw le'e xtiža' Dios, da' bchi'le Dios benne' judío ka' tape gaywá' chi žoa yiz wdé katen' gože' Bran na' dan', bi

gak yeká'an dan' bchebe laže' Dios gonen', na' bi gak wsolen. <sup>18</sup>Na'a, cha' žala' gonžo kan znnna xtiža' Moisés na' nich si'žo da' bchebe laže' Dios gonze', biž naken to da' bchebe laže'e gonze'. Dios žonze' ki dan' bchebe laže'e gone' ki che Bran na'.

<sup>19</sup>Cha' ki naken, čbiž chen' bchi'le Dios benách ka' da' nyejwn lo da' bzoj Moisés na'? Dios bchi'le' benách ka' ki nich gak bia' ūia da' zej nbage'e, san goken ki toze kate' bžinte ža na' bla' law ūa'só Bran na', Bennen' bchebe laže' Dios wnežjwe' chie'. Da' nyejwn lo xtiža' Dios bsele'en yežlyó nga lo na'gak wbás che ya'abá ka', na' Moisés bdie' dižan' lawgak benách ka'. <sup>20</sup>Kate' toze benne' zoa da' ūchebe laže'e gonen', bi žon byenen soa no benne' wdíe' dižan', na' Dios, toze' nake'.

Biž chen' gož Dios benách  
ka' góngake' da' zej nyejw  
lo da' bzoj Moisés

<sup>21</sup>Na'a, kan nak da' nyejwn lo xtiža' Dios, čnaken tlebe len dan' bchebe laže' Dios gone'? O'o. Chela' bchi'le Dios žo'o gonžo da' gak gonen ga soažo nbanžo to chi'ize, naž gak yeyakžo chawē' law Dios cha' gonžo kan znnna xtiže'e. <sup>22</sup>San da' nyejwn le'e yiche la'y znnan yógo'težo nbága'žo dola'. Ki naken nich gak si'žo dan' bchebe laže' Dios gata' chežo cha' chejle'žo che Jesúš, Benne' Criston'.

<sup>23</sup>Kate' bi na' žin ža gak chejle'žo che Benne' Criston', da' znnna xtiže'e bchi'len žo'o, kan zoa da' ūchi'len to benne' nyejwe' liž ya. Ka' goken na' zejte ža gok bia' gak yeyakžo chawē' law Dios cha' chejle'žo chie'

Le'. <sup>24</sup>Ki naken, da' znna xtiža' Dios bchi'len ž'o'o, na' goken chežo ka to benne' bsedle' ž'o'o na' jezte ža bloe'e law Jesúš, Benne' Criston', nich gak yeyakžo chawe' law Dios cha' chejle'žo chie' Le'. <sup>25</sup>Na'a, dan' ba bžin ža gak yeyakžo chawe' law Dios cha' chejle'žo che Benne' Criston', dan' bsdelen ž'o'o biž zchi'len ž'o'o.

<sup>26</sup>Yógo'tele le'e nakle zi'nkze Dios dan' žejle'le che Jesúš, Benne' Criston', na' ba nakle toze len Le'. <sup>27</sup>Yógo'te benne' ka', benne' bezóagake' nis nich yeyákgake' toze len Jesúš, Benne' Criston', ba beyákgake' kan nakkze' Le'. <sup>28</sup>Biž zej nžoj chople benne' judío ka' len benne' zi'to' ka', na' biž zej nžoj chople benne' ndo'w ka' len benne' ka' bi zej ndo'e, na' biž zej nžoj chople benne' byo ka' len no'le ka'. Kate' beyakle toze len Jesúš, Benne' Criston', yógo'tele lezka' beyakle toze len lježle tole yetole. <sup>29</sup>Na'a, cha' nakle che Benne' Criston', lezka' nakle za'só Bran, na' nzi'le dan' bchebe laže' Dios wnežjwe' che Bran na'.

**4** Da' ni naken da' žénela' nnia': <sup>1</sup>Kate' ne zbez to xkwide' byo ža wloé'e law xabe' ba žeyála'be' si'be' da' žala' wka'ne' chebe', ne nakbe' ka to bi' ndo'w, la'kze da' li yógo'te gaken chebe'. <sup>2</sup>Kate' nezejbe' yiz kwide' chebe', zej nnita' benne' ka' zchi'igekle' lebe', na' zkóngekle' žin da' žala' gaken chebe' na' jezte ža ba bdixjw xabe' chebe'. <sup>3</sup>Lezka' žaken chežo. Katen' gokžo ka xkwide' ka', da' žónteze žongak benách ka' che yežlyó nga bchí'igeklen ž'o'o. <sup>4</sup>Naž kate'

bza'a ža, Dios bsele'e Zi'nkze' nga. Goke' zi'in to no'le kan nakžo ž'o'o, na' da' zsédgéklen Le'. <sup>5</sup>Ka' goken chie' nich gok beslé' benne' ka' zchi'le xtiža' Moisés na' légake', nich gak yeyakžo ž'o'o zi'nkze Dios.

<sup>6</sup>Nich gak bia' ba nakle zi'nkze Dios, Le' bchize' Dios Be' La'y lo yichj lázdo'le, na' Lekze' zcháljlene' Dios lo wlazle le'e, na' znne': "Xe." <sup>7</sup>Ki naken, ba nakle zi'nkze Dios, na' biž nakle ka benne' ndo'w ka'. Na'a, dan' nakle zi'nkze' Le', Dios na'kze ba bchebe laže'le gonne' chele da' naken chie', dan' nakle toze len Benne' Criston'.

### Pablo že' laže'le benne' Galasia ka' žejlé'gake' che Jesúš

<sup>8</sup>Katen' bi na' gónbiale Dios, gokle ka benne' ndo'w ka', na' bka'n zenle lo'a ka'. Bi zej nak lo'a ka' dios ka'.

<sup>9</sup>Na'a, dan' nónbia'le Dios, o wak nnažo: dan' nonbia' Dios le'e, čbiz chen' žénelele yeyo'ole lo na' xtiža' Moisés na', da' bi žáklenen nitó benne'? Žénelele gakle da' yoble benne' ndo'w ka', nich gonle kan znna xtiže'e? <sup>10</sup>Zka'n zenle to yetó ža, na' to yetó byo', na' to yetó da' žaken, na' to yetó yiz. <sup>11</sup>Zžeba' da' gak chele. Bena' žin gan zoale le'e nich gónbiale da' naken dot da' li. Žeyák dáche'ze žin da' bena'?

<sup>12</sup>Žáta'yoela' le'e, zí'na'do' ka', gakle kan naka' neda', dan' ba belá' lo na' dan' wnná Moisés na'. Ki žala' gonle dan' beyaka' neda' kan gokle le'e. Bi be da' zia benle chia' neda'.

<sup>13</sup>Ba nnézkzelele biz chen' wzó lawa' zchalja' diža' chawen' gan zoale le'e. Bchaljan' ga na'

dan' gókli'a yižwé'. <sup>14</sup>Bi bka'nle neda' ka'ze, na' bi bzoale neda' chela'ale la'kze bgótelele ni'a che yižwé' chian'. Wdaple neda' ba la'ne, toze kan gapple ba la'ne to wbás che ya'abá, o kan gapple ba la'ne Jesúš na'kze, Benne' Criston'. <sup>15</sup>Bebéle'elete ža na'. ¿Bízkze goken chele dan' biž žaken ki chele? Da' ni gak nnia' kan goken chele: Chela' gok to da' sáke'le gonle, na' kwejle yej lawkzle, na' gonnlen chia' neda'. <sup>16</sup>Na'a, ižéklele beyaka' to benne' bi zle'ele' le'e chawe' dan' goža' le'e káteze naken?

<sup>17</sup>Benne' ka' zchíxgake' le'e že' láže'gake' le'e, san kege nich gaken chawe' chele. Ženegekle' góngake' ga kwej yichjle neto', na' we' láže'le légake'. <sup>18</sup>Na'a, chawe' naken soa no benne' že' láže'le le'e, san toze cha' naken nich gak chawe' chele. Ki že' láže'teza' le'e, na' kégeze kate' ne zóalena' le'e. <sup>19</sup>Le'e, zí'na'do' ka', kan žak che to no'le za' galj bi' že'n chie', zzáka'l'i'e, lezka' zzáka'l'i'a neda' da' yoble ni'a chele le'e kate' žinže ža gakle dot kan nak Benne' Criston'. <sup>20</sup>Žak láže'l'i'a sóalena' le'e na'a nich gak wcháljlena' le'e to diža' nža', dan' že' zedla' ni'a chele.

### Da' žsedle da' goken che Agar, na' che Sara, zo'le Bran

<sup>21</sup>Na'a, nólele le'e ženelele wdé kwinle lo na' da' bchi'le Moisés na', le wia da' ni da' nnia'. ¿Batkle bze nagle da' znnna xtiža' Moisés na'? <sup>22</sup>Lo xtiže'e znnan ki: "Wnnítá'gak chope xkwide' byo ka' che Bran. Tobe' gokbe' zí'n to no'le ndo'w, na' yetobe' gokbe' zí'n to no'le bi ndo'e. <sup>23</sup>Zí'n no'le ndo'w na' goljbe' lo ni'a

lo na' to benne' kan žaljgak yógo'te xkwide' ka', san zí'n no'le bi ndo'e na' goljbe' dan' bchebe laže' Dios gone' ga galjbe'." <sup>24</sup>Da' ni naken to da' žsaka' leben. Kan gok chegak chope no'le ki žsedlen kan zej nak chope diža' nžag, da' ka' Dios bénlene' benách ka'. To diža' nžag na' naken da' ben Dios law ya'a Sinaí, na' da' goken che Agar, no'le ndo'w che Sara zloe'elen kan naken. Benne' ka' zej nzi' diža' nžag ni zej nake' ka zí'n Agar na', na' zej nake' ka benne' ndo'w ka' lo na' diža' nžag na'. <sup>25</sup>Da' gok Agar na' lezka' zloe'elen kan nak ya'a Sinaí, dan' žen' gan nbab Arabia, na' lezka' zloe'elen kan nak yež Jerusalén dan' žen' na'a ža, dan' naken ka to benne' ndo'w tzen len benne' ka' zej nnite'e lo yežen'. <sup>26</sup>San bi ndo'gak benách ka' che Jerusalén na' da' žen' ya'abá che Dios, na' žo'o ni nakžo benách wláz ka' che yežen'. <sup>27</sup>Nyejw le'e yiche la'y da' znnan:

Bebél, no'le wbíž, bi zoa zí'no'.  
**Lo yela'** žebél chio' wžézeya'a,  
 la'kze batkle gok chio' da'  
 zzáka'l'kze to no'le  
 za' galj bi' že'n chie'.  
 Bebél la'kze nbej yichjgak  
 benách ka' le',  
 dan' Dios gone' ga yánle'eže  
 zí'no' ka'  
 ka xkwide' ka' che no'len'  
 zóalene' benne' byo chie'.

<sup>28</sup>Zí'na'do' ka', žo'o ni nakžo kan gok Isaak, zí'n Bran. Nakžo ka za'só Bran na', xkwide' ka' bchebe laže' Dios gáljgakbe' chie'. <sup>29</sup>Kate' ža ka', xkwiden' goljbe' kan žaljgak yógo'te xkwide' ka', wžia láže'be' xkwiden', bin' goljbe' ni'a che yela' wak che

Dios Be' La'y. Lezka' žaken chežo na'a, želbía láže'gak benách ka' nnít'a'gake' yežlyó nga žo'o. <sup>30</sup>Na'a, čbíz<sup>k</sup>ze znna da' nyejw le'e yiche la'y? Ki znnan: "Bebéj no'le ndo'w na' na'le tzen len zi'ne', dan' bi gak si' zi'n no'len' tzen len zi'n no'le bi ndo'e da' bchebe laže' Dios gatan' che zi'n no'le bi ndo'e na!" <sup>31</sup>Ki naken, zí'na'do' ka', bi nakžo kan gok zi'n no'le ndo'w na'. Žo'o nakžo ka zi'n no'le bi ndo'e na'.

**Le gape chi'i kwinle, nich  
ga'nle lo yela' želá**

**5** Ba belažo dan' beslá Benne' Criston' žo'o. Le soa choch cha', na' le ga'n lo yela' želá na'. Bi wzó kwinle da' yoble lo na' da' bchi'le Moisés na', nich bi gakle ka benne' ndo'w ka' chen.

<sup>2</sup>Le wzé nag da' znnia'. Neda', Pablo, žapa' le'e cha' gonnle no benne' latje choge' lo bela' chele kan znna da' bchi'le Moisés na', bi yebélenlele da' ben Benne' Criston'. <sup>3</sup>Da' yoble žénela' yapa' no benne' byo žwe'e latje no benne' choge' lo xpele'e da' ni, žon byenen gone' dot da' znna da' bchi'le Moisés na'. <sup>4</sup>Nólele le'e žékklele yeyakle chawé law Dios dan' žonle kan znna xtiža' Moisés na', ba bkwáslenle Benne' Criston'. Ba bsanle da' žonn Dios chežo. <sup>5</sup>Žo'o ni žxen láže'žo yeyakžo chawé law Dios ni'a che yela' wak che Dios Be' La'y dan' žejležo che Benne' Criston'. <sup>6</sup>Cha' nakžo toze len Jesús, Benne' Criston', bi be zaka' cha' nžog lo bela' chežo kan znna xtiža' Moisés na', o cha' bi nžog ki lo bela' chežo. Da' záka'že naken chejležo che Benne' Criston', da' gonen ga ži'ilžo lježžo ka'.

<sup>7</sup>Cháwe'do' gok kan wzó lawle žonle ža na'. čNakžkze goken bka'nle da' naken dot da' li? <sup>8</sup>Dios, Bennen' bliže' le'e, bi ben byene' benle ki. <sup>9</sup>Bi gal láže'le da' znnan: "Láte'ze kwa zichj che yet xtíl žonen ga chaž dot kwa da' nzin' kwa zichjen!". <sup>10</sup>Dan' nakžo toze len Xanžon', žxen laža'a kan nak chele, sa' láže'le tlebe kan zza' laža'a neda', na' Dios wsaka' zi'e bennen' žchixe' le'e, nóte'teze benne' nake'.

<sup>11</sup>Na'a, kan nak chia' neda', zí'na'do' ka', jez nnita' benne' ka' znnágake' žsedla' benách ka' žala' chog lo bela' chegak benne' byo ka' kan znna da' bchi'le Moisés na'. Cha' žona' ki, čbíz chen' želbía láže'gak benne' judío ka' neda'? Chela' žsedla' ki, bi ža'a nitó benne' neda' dan' zchalja' kan got Benne' Criston' le'e yag kroze. <sup>12</sup>Kan nak chegak benne' ka' zchíxgake' le'e, benne' ka' žénegekle' chog lo bela' chele, žak laža'a chóggake' to chi'ize kwíngake'.

<sup>13</sup>Kan nak chele, zí'na'do' ka', Dios bliže' le'e nich gakle benách nla ka'. Bi wkónlele žin yela' želá na' nich gonle kan zdan láže'zele, san nich gonle žin che lježle tole yetole, dan' nži'ille lježle ka'. <sup>14</sup>Yógo'te da' znna xtiža' Dios žon bennen' žone' kan znna xtiža' Dios da' znnan: "Žala' ži'il' lježo' kan nži'il kwino'." <sup>15</sup>Na'a, cha' znnle che lježle tole yetole, da' žonle naken kan žongak beko' yixe' snia ka', bia ka' žáwya'agakba', na' žáwgakba' lježgakba' ka'. Cha' ki žonle, le gape chi'i kwinle nich bi wzía yile lježle tole yetole.

**Da' žonžo žakze chežo, na' da' žon  
Dios Be' La'y lo yichj lázdo'žo**

<sup>16</sup>Da' ni žapa' le'e: le we' laže' gonle da' žénele Dios Be' La'y, na'

naž biž gonle kan žénelelo lo yela'  
benachze chele. <sup>17</sup>Da' žénelžo  
gonžo lo yela' benachze chežo bi  
naken tlebe len da' žénele Dios Be'  
La'y gonžon, na' da' žénele Dios  
Be' La'y bi naken tlebe len da' ka'  
žénelžo gonžo lo yela' benachze  
chežo. Da' chopen ki, bi zej naken  
tlebe, na' che len bi gak gonle kan  
žénekzelele. <sup>18</sup>Na'a, cha' žonle kan  
žénele Dios Be' La'y, biž yo'ole lo na'  
da' bchi'le Moisés na'.

<sup>19</sup>Zej nak bia' da' žongak benách  
ka', benne' ka' žóngake' kan žénele  
yela' benachze chégake':

Zka'n dítjgake' yela' zchag na'.  
Žóngake' da' zinnj, na' da' kegle,  
na' da' bi naken chawe'.

<sup>20</sup>Zka'n žéngake' lo'a ka', na'  
žóngake' yela' wžá'.  
Bi zlé'egekle' ljéžgake' ka' chawe',  
na' želdíl-lene' légake'.

Zg'égekle' ljéžgake' ka', na'  
želžé'e.

Zze láže'gake' da' kegle.  
Želžój chóplegake', na' zbéjgake'  
chela'ale benách ka'.

<sup>21</sup>Zdan láže'gake' yela' gape, na'  
žótgake' benách ka'.  
Želzožle', na' žáwle'egake'.

Zdetlen žóngake' da' ka' žóngake'.  
Da' zan da' ki žóngake'. Neda' zchi'la'  
le'e na'a nich bi gonle ki, kan  
bchi'la' le'e zga'ale, znnia': benne' ka'  
žóngake' ki bi gak cházgake' gan  
znnna bia' Dios.

<sup>22</sup>Na'a, nak bia' Dios Be' La'y žone'  
žin lo yichj lázdo'žo dan' žonžo ki:

Nži'ilžo lježžo ka', na' žebéle'lžo.  
Zga'n ſi yichj lázdo'žo, na'  
zbezžo zen laže'.

Že' láže'žo lježžo ka', na' nakžo  
žili laže'.

Žonžo kan znnnažo.

<sup>23</sup>Nakžo gaxjw laže', na' znnna  
bia'žo kwinžo.

Da' bchi'le Moisés ž'o bi zži'il che  
da' ki. <sup>24</sup>Benne' ka' zej nake' che  
Benne' Criston' biž žóngake' kan  
žénekzegekle', na' bi žóngake' da'  
zdanze láže'gake' lo yela' benachze  
chégake'. <sup>25</sup>Dios Be' La'y nbánlenžo.  
Lekze' žala' nna bi'e žo'o kan nak  
yógo'te da' žonžo.

<sup>26</sup>Bi žala' wká'n zen kwinžo, na'  
bi wcha'žo lježžo tožo yetožo, na' bi  
ge'elžo lježžo tožo yetožo.

### Žala' gáklenžo lježžo ka'

**6** Na'a, zí'na'do' ka', cha' lé'elele  
žon to lježle dola', naž nólele  
le'e zoālen Dios Be' La'y le'e, žala'  
gonle ga yeját laže' bennen', san  
žon byenen gonle ki lo yela' gaxjw  
laže' chele, na' le gape chi'i kwinle  
nich bi gon da' xiwe' ga bágale dola'.  
<sup>2</sup>Le gaklen lježle tole yetole kan  
nak ywa' da' nbágale. Cha' gonle ki,  
na' gonle kan znnna da' gož Benne'  
Criston' ž'o gonžo.

<sup>3</sup>Cha' zoa no benne' žekle' nake'  
benne' zen, san bi be nake', benne'  
ni žon láže'le' la' kwinze'. <sup>4</sup>To to  
benne' žala' wie' binlo da' žonkze'.  
Naž cha' yežoje' chawe', gak wká'n  
zen kwine' kan nak da' ba bene',  
na' bi gon byenen wie' kan bengak  
yezika' benách ka' cha' bene' le' da'  
nakže chawe' o bi bene' ki. <sup>5</sup>To to  
benne' žala' we'e da' besbaga' Dios  
le'.

<sup>6</sup>Cha' zoa no benne' žsedle' le'  
diža' chawen', žala' wnéžywle bennen'  
žsedle' le'e late' da' den chele.

<sup>7</sup>Bi gon laže'l kwinle, dan' bi gak  
gon láže'lele Dios. Yelaple kan nak

da' gozle. <sup>8</sup>Cha' da' žazlezej naken da' ka' žonle kan ždanze láže'le lo yela' benachze chele, na' da' yelaple gaken yela' got. Cha' da' žazlezej naken da' ka' žonle kan žaz láže' Dios Be' La'y, na' yelaple da' gonn Dios Be' La'y chele, da' naken yela' nban da' zejlí kanne. <sup>9</sup>Ki naken, bi žala' wsanžo gonžo da' naken chawe', na' cha' bi yekwasžo, žin ža yelapžon. <sup>10</sup>Che len, bátteze gata' latje chežo, žala' gonžo da' nak chawe' chegak yógo'te benách ka', na' da' naken blo, žala' gonžo ki chegak lježžo ka', benne' žejlé'gake' che Benne' Criston'.

#### **Da' bzoj Pablo kate' ze lawte**

<sup>11</sup>Le wia kato da' zen diža' ni da' zzoja' nga chele len na' kwina'. <sup>12</sup>Benne' ka' ženegekle' góngake' ga chog lo bela' chele kan znna da' bchi'le Moisés na', žóngake' ki nich yežójgake' chawe' lawgak benne' judío ka', nich bi kwia láže'gake' légake' dan' zcháljgake' kan got Benne' Criston' le'e yag kroze. <sup>13</sup>Na'a, benne' byo ka' nžog lo bela' chégake' kan znna da' bchi'le Moisés na', bi žóngake' dot kan znna da' bchi'le'. Ženegekle'

góngake' ga chog lo bela' chele nich gak wkán zen kwíngake' dan' gata' latje chégake' nna biá'gake' le'e.

<sup>14</sup>Kan nak chia' neda', wká'n zena' toze da' ben Xanžo Jesús, Benne' Criston', katen' gote' le'e yag kroze. Ni'a che da' ben Benne' Criston' le'e yag kroze, da' žen' yežlyó nga naken chia' neda' ka to da' ba naten, na' bi že' laža'an, na' neda' naka' chegak benách ka' nníta'gake' yežlyó nga ka to benne' gat, na' bi gak yekwásgake' neda'. <sup>15</sup>Cha' nakžo toze len Jesús, Benne' Criston', bi be zaka' cha' nžog lo bela' chežo kan znna xtiža' Moisés na', o cha' bi nžog ki lo bela' chežo. Da' záka'kze naken gakžo benách kobe lo yichj lázdo'žo. <sup>16</sup>Yógo'te benne' ka', benne' žóngake' kan znna da' žsedla' nga, na' yógo'te benne' ka' zej nake' che Dios, znablal' Dios wkán zie' yichj lázdo'gake', na' yeyache' laže'e' légake'.

<sup>17</sup>Na'a so law, biž gak no benne' gone' ga kwe' zedla' neda', dan' zej že' lo xpela'a yiž ka' da' zej nak bian' naka' wen žin che Xanžo Jesusen'.

<sup>18</sup>Na'a, zí'na'do' ka', znablal' Xanžo Jesús, Benne' Criston', gon chawe'e le'e. Ka'kze gaken.

# DIŽA' DA' BSELĀ' PABLO ŁO YEŽ ÉFESO

Pablo žape' "Padiox"  
benách ka' che Jesús

**1** Neda', Pablo, žapa' le'e "Padiox",  
nakle che Dios, na' žeſlē'le che  
Jesús, Benne' Criston', na' zoale Ło  
yež Éfeso. Naka' neda' wbás bselā'  
Jesús, Benne' Criston', dan' Dios  
na'kze gónele' gaka' ki. <sup>2</sup>Znnabla'  
Xažo Dios len Xanžo Jesús, Benne'  
Criston', we' laže'e le'e, na' wkán zie'  
yichj lázdo'le.

Da' żonn Dios chežo dan'  
nakžo toze len Jesús

<sup>3</sup>iGa'n zen Dios, Xa Xanžo Jesús,  
Benne' Criston'! Dan' nakžo toze  
len Benne' Criston', Dios ba benne'  
chežo yógo'te da' naken chawe' che  
ya'abá chie', dan' bsele'e Dios Be'  
La'y nich yedjsóalene' žo'o. <sup>4</sup>Zga'ale  
kate' ben Dios yežlyó nga, wžekze'  
žo'o nich gakžo che Łeze' ni'a che  
Benne' Criston', na' nich gakžo  
benách la'y chie' ka', na' nich gakžo  
chawe' lawe' Łe'. <sup>5</sup>Dios bkweze'  
zga'ale si' lo ne'e žo'o ka zi'nkze'  
ka' ni'a che da' gon Jesús, Benne'  
Criston', dan' wyáz laže'e Łe' gone'  
ki, na' dan' naken da' gónekzele'  
gone'. <sup>6</sup>Žala' wkán zéntezžo Dios  
ni'a che da' benne' chežo, dan'

bennze' chežo dan' nakžo toze  
len Zi'ne', Bennen' nži'ile'. <sup>7</sup>Benne'  
Criston' beya'we' žo'o katen' gote' Ło  
wlazžo žo'o nich gak yenít law Dios  
žo'o che doł'a' da' nbága'žo. Ki ben  
Dios dan' nži'ile'ele' žo'o. <sup>8</sup>Błoe'ele'  
law kan nži'ile' žo'o dan' benne'  
chežo yela' sina' chie', na' yela'  
żejní'il chie' <sup>9</sup>nich gak gónbia'žo  
da' bkweze' chežo, na' bło'e'ele' žo'o  
da' bgache', dan' bzoakzen' zga'ale  
gonen' Ło na' Benne' Criston'. <sup>10</sup>Dan'  
bzoakze Dios gonen' kate' žinte  
ža, naken gone' ga gakgak toze,  
na' chazgak Ło na' Benne' Criston'  
yógo'te da' de, da' ka'zej nnitan'  
ya'abá che Dios, na' da' ka'zej  
nnitan' yežlyó nga.

<sup>11</sup>Dan' nakžo toze len Benne'  
Criston', Dios wžekze' žo'o zga'ale  
nich gak chežo da' naken che Xažo  
Dios, dan' bkwezen' chežo kan nak  
da' gónekzele' Łe'. Nake' Łe' Bennen'  
žone' yógo'te kan žénekzele' Łe'.  
<sup>12</sup>Ki ben Dios nich wkán zenžo-ne'  
kan nak yela' zen chie', žo'o ni žxen  
láže'žo Benne' Criston' zgá'aležo ka  
yezika' benách ka'. <sup>13</sup>Łežka' goken  
chele le'e. Katen' bénlele diža' da'  
naken dot da' li, diža' chawen' kan  
gak yelažo, na' bejle'le che Benne'  
Criston', na' Dios bzoe' chele da'

nak bian' nakle chie', katen' bchize' Dios Be' La'y lo yichj lázdo'le. Dios Be' La'y na' nake' Bennen' bchebe laže' Dios sele'e chežo. <sup>14</sup>Dan' zoalen Dios Be' La'y ž'o'o, nak bia' gak chežo da' naken che Xažo Dios kate' yeyóz yeya'we' ž'o'o, ž'o'o na' ba nakžo chie' Le'. Ki naken nich ga'n zen yela' baní' chie'.

**Pablo znnable' Dios wzejni'ile'  
benách ka' che Jesús**

<sup>15</sup>Che len, katen' benla' kan žeje'le che Xanžo Jesusen', na' kan nží'ilele yógo'te benách ka' che Dios, na' zejte na'a ža <sup>16</sup>bi žsana' žapa' Dios: "Žóxkeno" ni'a chele. Žejsá' laža'a le'e kate' zcháljlena' Dios, <sup>17</sup>Bennen' nake' Dios che Xanžo Jesús, Benne' Criston', na' nake' Xažo, na' nape' dot yela' wak. Znnabla'-ne' sele'e Dios Be' La'y chele, nich gone' ga gónbia'le Dios dot kan nake'. Dios Be' La'y na' žonne' chežo yela' žejní'il, na' zloe'ele' ž'o'o da' nakkze Dios.

<sup>18</sup>Znnabla' Dios wzejni'ile' le'e lo yichj lázdo'le nich gak nnézlele kan nak da' žxen láže'žo, dan' bliže' le'e nich yebélenelen, na' nich nnézlele kan nak yela' wnni'a che ya'abá che Dios da' gaken chegak benne' ka' zej nake' chie' Le', <sup>19</sup>na' nich nnézlele kato da' zen nak yela' wak chie', dan' žáklenen ž'o'o, nolžo žeje'žo chie' Le'. Yela' wak zen ni naken da' bloe'el law Dios <sup>20</sup>katen' besbane' Benne' Criston' lo yela' got, na' bene' ga wži'e kwit li ža chie' Le' gan nake' blo ya'abá che Dios, <sup>21</sup>ga na' znna bi'e benne' wnná bia' ka', na' benne' ka' nzi' lo ná'gake' yela' wnná bia', na' benne' blo ka', na' benne' ka' zej

nake' xangak benách ka'. Benne' Criston' nakže' blo ka yógo'te benne' ka' nzi' lo ná'gake' yela' wnná bia' yežlyó nga, na' lo yežlyó da' zan'. <sup>22</sup>Dios bdie' lo na' Benne' Criston' yógo'te da' den nich nna bi'en, na' bzoe' Le' chegak benách chie' ka' nich gake' Xanžo lo yógo'te da' zej naken chežo. <sup>23</sup>Benách ka' che Benne' Criston' zej nake' ka bela' žen chekze', na' žake' Le' dot zen lo bela' žen chie' na'. Žonkze' Le' ga zgólegak dot chawe' yógo'te da' den.

**Belažo dan' nži'il Dios ž'o'o**

**2** Dios ba benne' yela' nban da' zejlí kanne chele, la'kze zga'ale gokle ka benne' gat ka' ni'a che dola' da' wbága'le, na' ni'a che da' zinnj da' benle. <sup>2</sup>Ža na' benle tlebe kan žongak benách ka' bi zej nake' chawe', benne' ka' nnítia'gake' yežlyó nga, na' benle kan gónele da' xiwe', dan' znna bian' lo be'ze, na' zkonlen žin benne' ka' bi žóngake' kan znna xtiža' Dios. <sup>3</sup>Lezka' gokžo yógo'težo ž'o'o, dan' benžo kan wzeze láže'žo, na' kan wyáz láže'žo lo yela' benachze chežo. Che len wbága'žo dola' law Dios, dan' žonen ga choge' chežo gatžo kan gone' chegak yezika' benách ka'. <sup>4-5</sup>Naž katen' gokžo ka benne' gat ka' ni'a che dolan' da' wbága'žo, Dios besbane' ž'o'o lo yela' got tzen len Benne' Criston' dan' beyache' láže'le' ž'o'o, na' bží'ile'ele' ž'o'o. Belale le'e dan' že' laže' Dios le'e. <sup>6</sup>Dios besbane' ž'o'o tzen len Benne' Criston' nich gone' ga kwe'žo tzen len Le' gan znna bi'e ya'abá chie' Le'. <sup>7</sup>Katen' ben Dios ki, bloe'ele' benách ka' zá'gake' kan nak yela' wnni'a

che da' bennze' chežo, katen' bsele'e Jesúš, Benne' Criston', nich gáklene' žo'o, da' nak bian' kan nží'ile'ele' žo'o. <sup>8</sup>Belale le'e dan' že' laže' Dios le'e dan' že'le'le che Benne' Criston'. Beslé' le'e, kege dan' zoa da' chawe' da' benle le'e, san dan' naken da' žonze Dios. <sup>9</sup>Bi gak nitó benne' wká'n zen kwine' dan' belé', dan' bi belé' ni'a che da' chawe' da' benkze' le'. <sup>10</sup>Da' nakžo naken da' benkze' Dios. Dan' nakžo toze len Jesúš, Benne' Criston', bzoe' žo'o nich gonžo da' naken chawe', da' bkweze' zga'ale nich gonžon.

**Že' ſi yichj lázdo'žo law Dios  
ni'a che da' ben Jesúš**

<sup>11</sup>Le chejsá' laže' kan gokle zga'ale. Gokle benách zi'to' ka', na' che len benne' judío ka', benne' želchogē' lo bela' chegak benne' byo ka' da' nak bian' nzi' lo ná'gake' xtiža' Dios, na' znnágake'zej nake' benne' nžog lo bela' chégake', znnágake' nakle le'e benne' bi nžog lo bela' chégake'. <sup>12</sup>Ža na' wzoale zi'to' gan zoa Benne' Criston'. Gokle benne' zi'to' ka' lawgak benách Israel ka', na' bi wzile da' chawe' che diža' da' ben choch Dios, dan' bchebe laže'e gata' chegak benách chie' ka'. Wzoale yežlyó nga, na' bi wzóa da' žxen laže'le, na' bi bénbia'le Dios. <sup>13</sup>Na'a, nakle toze len Jesúš, Benne' Criston'. Zga'ale wzoale zi'to' gan zoa Dios, san na'a Dios ba bnnite' le'e gawze dan' got Benne' Criston' lo wlazžo žo'o. <sup>14</sup>Benne' Cristo na'kze zka'n žie' yichj lázdo'žo law Dios. Le' bene' ga beyakgak benne' judío ka', na' benne' zi'to' ka', ka toze benách, na' bsole' yela' zža'a dan' bebejen légake'

chople, dan' goken ka to ze'e sibe. <sup>15</sup>Da' ni ben Benne' Criston' katen' gote' lo wlazžo žo'o, na' bsole' da' ka' zchi'igeklen benne' judío ka', da' ka'zej nyejwn lo da' bzoz Moisés na', na' chope kwe' benne' ka', beyone' légake' toze benách kobe, benne' ka'zej nake' toze len Lekze'. Ki bene', na' bka'n žie' yela' zža'a na'. <sup>16</sup>Dan' got Benne' Criston' le'e yag kroze, bsole' yela' zža'a na', na' chope kwe' benách ka', beyone' légake' ka toze benách, na' bzoa žie' yichj lázdo'gake' law Dios.

<sup>17</sup>Ka' goken, zí'na'do' ka', bla' law Benne' Criston', na' bchalje' diža' chawen' kan gak ga'ngak cháwe'do' yógo'te benách ka', le'e na' nakle benách zi'to' ka', na' wzoale zi'to' gan zoa Dios, na' lezka' benne' judío ka', benne' ka' nníta'gake' gawze.

<sup>18</sup>Na'a, ni'a che da' ben Benne' Criston', gak bíga'žo law Xažo Dios, dan' zóalenkze Dios Be' La'y žo'o, la'kze nakžo benne' judío ka' o benách zi'to' ka'. <sup>19</sup>Che len, le'e, benne' zi'to' ka', biž nakle ka benách zi'to' ka', na' biž zoale to yežlyó da' bi naken chele, san nbáblenle benách ka' che Dios. Ba nakle ljež Dios na'kze. <sup>20</sup>Le'e nakle ka to yo'o da' zoan to chi'ize. Nakle ka yej ka' da'zej zoan law len ze'e, da' wlo'ogak benne' wbás ka' che Benne' Criston' len benne' ka' bcháljgake' lo wláz Dios. Jesúš na'kze, Benne' Criston', nake' ka yej blo che len ze'e na'. <sup>21</sup>Dot yo'on' da' nakle le'ekze žasen law len ze'e na', dan' nakkze Benne' Criston', na' yej chen ka'zej nnita' binlo, nich gaken to yodo' la'y che Xanžon' gan zoakze' Le'. <sup>22</sup>Le'ekze nakle toze len Benne'

Criston', Bennen' bnnite' le'e nich gakle ka to yo'o gan yo'o Dios, dan' zoalen Dios Be' la'y le'e.

**Nak Pablo wen žin nich  
wchalje' diža' chawe'**

**3** Che len, neda', Pablo, nyejwa' liž ya nga dan' zchalja' che Jesúš, Benne' Criston', nich si'le le'e da' chawe' chie', le'e, benách zi'to' ka'. <sup>2</sup>Žekla' ba nnézkzelele kan ben Dios, bdie' lo na'a žin da' žona' nich yebélenlele da' žonne' chežo. <sup>3</sup>Dios bloe'ele' da' bgache' che da' žone' Le', na' bzejni'ile' neda' kan naken. Kan nak da' ni ba bzoja' chele le'e láte'do'ze. <sup>4</sup>Kate' gol-le diža' ni, na' gónbia'le da' žejni'ila' kan nak da' bgache' kan nak che Benne' Criston'. <sup>5</sup>Ža ni'te bi bzejni'il Dios nitó benne' kan nak da' bgache' na', san na'a, lo na' Dios Be' La'y, Dios ba bloe'ele' law kan naken. Bzejni'ile' benne' wbás ka', benne' ka' bebeje' cheze chie', na' lezka' benne' ka' bcháljgake' lo wlaze' Le'. <sup>6</sup>Ki znnna da' bgachen': "Ni'a che diža' chawen' si'gak benách zi'to' ka' tzen len benne' judío ka', da' ka' jez naken che Dios, na' yeýákgake' ka toze benách, na' lezka' gata' yela' žebél chégake' tzen len benne' judío ka', da' bchebe laže' Dios wnežjwe' chégake' dan' jez nake' toze len Jesúš, Benne' Criston!." <sup>7</sup>Dios, lo yela' ži'i laže' chie', bdien' lo na'a neda!. Lo yela' wak zen chie', bene' neda' wen žin chie' nich wchalja' diža' chawe' chien'. <sup>8</sup>Néxjwža' neda' ka yógo'te benách ka' che Dios, san Le' benne' neda' latje gaka' wen žin chie' nich wchalja' diža' chawen' gan nníta'gak benách

zi'to' ka' kan nak yela' wnni'a che Benne' Criston', da' záka'le'en. <sup>9</sup>Dios bdie' lo na'a gona' ga gónbia'gekle yógo'te benách ka' kan nak da' bzoakze Dios že ni'te, dan' naken to da' bgache' che Dios, Bennen' bene' yógo'te da' zle'elžo. <sup>10</sup>Ka' goken nich gónbia'gekle yógo'te benne' ka' na'a, benne' ka' znnna biá'gake' len benne' ka' nzi' lo ná'gake' yela' wnná bia' ya'abá che Dios, dot kan nak yela' žejní'il che Dios, kate' lē'egekle' kan zej nak benách ka' che Benne' Criston'. <sup>11</sup>Dios bene' da' ni katen' bene' dan' bzoakze' Le' že ni'te, dan' bene' lo na' Xanžo Jesúš, Benne' Criston'. <sup>12</sup>Dan' nakžo toze len Benne' Criston', ba nzi'žo latje bíga'žo dot láže'žo law Dios, dan' zejle'žo chie' Le'. <sup>13</sup>Che len žáta'yoela' le'e bi gak chope láže'le ni'a che da' zzaka'a neda' nich gáklena' le'e, dan' gonen ga gak chawe' chele.

**Kan nak yela' nži'il che Jesúš**

<sup>14</sup>Che len zhoa ziba' law Xa Xanžo Jesúš, Benne' Criston'. <sup>15</sup>Kan lie' Le' lezka' nzi' lagak yógo'te benách chie' ka', benne' ka' nníta'gake' ya'abá che Dios len benne' ka' nníta'gake' yežlyó nga. <sup>16</sup>Znnabla' Xažo Dios, lo yela' wnni'a da' zenle'e chie', wnežjwe' chele yela' wak che Dios Be' La'y, na' gone' ga gólele lo yichj lázdo'le. <sup>17</sup>Znnabla' Benne' Criston' sóateze' lo yichj lázdo'le dan' zejle'le chie' Le'. Znnabla' Le' gone' ga soale to chi'ize lo yela' nži'il chie', na' bi yechá' yichj lázdo'le kan nži'ilene', <sup>18</sup>nich gak chejn'iilele tzen len yógo'te benách ka' che Benne' Criston' kan nži'il<sup>e</sup>ele' žo'o gáte'teze

na' to chi'ize. <sup>19</sup>Žnnabla' Dios gone' ga gónbia'le yela' nži'il na', da' bi gak gónbia'žo dot kan naken, nich soa dot da' nakkze Dios len le'e.

<sup>20</sup>Na'a, iga'n zen Dios, Bennen' gak gónl'ež'e' kan gak nnablžo-ne' o kan gak sa' láže'žo, na' wkonle' žin yela' wak chie' lo yichj lázdo'žo! <sup>21</sup>iGa'n zénteze Dios lawgak benách ka' che Benne' Criston', na' law Jesús na'kze, na'a ža, na' yógo'te ža da' zágaken! Ka'kze gaken.

Dios Be' La'y žone' ž'o'o  
toze len lježžo ka'

**4** Na'a, neda' žáta'yoela' le'e, ne nyejwa liž ya nga dan' zzoa lia' che Benne' Criston'. Žnnabla' le'e gonle dot kan žala' gongak benne' ka' bliž Dios nich gákgake' che Leze', kan lezka' bliž' le'e. <sup>2</sup>Le gak gaxjw laže', na' ži'i laže'. Le kwez zen laže', na' le we' laže' lježle tole yetole lo yela' nži'il chele. <sup>3</sup>Le we' laže' gáktezle toze kan ba ben Dios Be' La'y le'e, na' gonle ki lo yela' zga'n cháwe'do' chele da' zóalenen le'e.

<sup>4</sup> Toze nak bela' žen che Benne' Criston' da' nžagžo ž'o'o.

Toze nak Dios Be' La'y, Bennen' zóalene' ž'o'o.

Toze nak da' žxen láže'žo, dan' bliž Dios ž'o'o nich yebélenžon.

<sup>5</sup> Toze nak Xanžon', na' toze da' žejle'žo, na' toze da' bezoažo nis.

<sup>6</sup> Toze nak Dios, Bennen' nake' Xažo yógo'težo.

Le' znna bi'e yógo'težo, na' zkonle' žin yógo'težo, na' zoakze' Le' lo yichj lázdo'žo yógo'težo.

<sup>7</sup>To tožo nzi'žo to yela' wak che Dios kan nak da' benn Benne' Criston' che chežo. <sup>8</sup>Naken ki kan nyejw le'e yiche la'y, da' znnan:

Beyepe' ya'abá che Dios, na'  
bchi'e benne' zan, benne' ka'  
beslé' lo na' da' xiwe'.

Bdise' chegak benách ka' da'  
žonnze' chégake'.

<sup>9</sup> iBizkze zejlás dan' znnan:  
"beyepe??" Žsedlen žo'o betje'  
zga'ale, na' ble'e že'le lo yežlyo  
nga. <sup>10</sup>Bennen' betje' nake' Bennen'  
beyepe' žá'teže ya'abale nich  
besché'e yógo'te len da' nakkze'  
Le'. <sup>11</sup>Benne' Criston' bennkze' che  
chežo yela' wak chie' ka':

Bi'e bale benne' ka' latje gákgake'  
wbás chie' ka'.

Bene' ga zchaljgak yebale benne'  
ka' lo wláz Dios.

Bsele'e yebale benne' ka'  
chejháljgake' diža' chawen'.  
Bnnite' yebale benne' ka' nich  
gape chí'igake' benách chie'  
ka'.

Wžíe' yebale' nich wsédgekle'  
benách chie' ka'.

<sup>12</sup>Benne' Criston' bpa'kze' benách  
chie' ka' nich gak góngake' xchine',  
nich góngake' ga gakgak dot li  
laže' benne' ka'zej nake' ka bela'  
žen chekze' Le'. <sup>13</sup>Ki gaken na'  
zejte yeyakžo toze yógo'težo kan  
žejle'žo che Benne' Criston', Zi'n  
Dios, na' kan nónbia'žo-ne'. Gakžo  
wale, na' yeyakžo dot kan nakkze  
Benne' Criston'. <sup>14</sup>Biž gakžo ka  
xkwide' ka', kanzej nak benne' ka'  
la' zchá'tegake' kan žóngake', na'  
zej nake' ka to da' zejen law nis  
yego, o ka to da' zche' bíteteze be'  
žaken, na' zzi' lo ná'gake' bíteteze

diža' da' žsedle no benne' légake', bennen' žon láže'le' légake' len yela' sina' chie', na' žone' ga zchíxgekle benách ka'. <sup>15</sup>Na'a, dan' nži'ilžo žo'o lježžo ka', žala' wchaljžo da' naken dot da' li nich gak yeyakžo dot kan nak Benne' Criston', na' gakžo toze len Le', Bennen' nake' Xane dot bela' žen chie', da' nakžo žo'o. <sup>16</sup>Benne' Criston' žonkze' ga nžag chawe' bela' žen chie', da' nakžo žo'o, na' dot bela' žen chien' nžagen tzen ni'a che da' žon toze bela' žen chien'. Kate' žonžo xchinžo to tožo žo'o, žo'o na' nžagžo bela' žen chien', na' doten zgolen, na' žaken dot li laže', kan zej žakže dot li laže' kan nži'ilžo lježžo ka'.

**Yela' nban kobe da' napžo  
dan' nakžo che Jesús**

<sup>17</sup>Lo wláz Xanžon' žapa' le'e da' ni, na' zdian' lo na'le', znnia': biž gonle kan žongak benne' ka' bi zej nónbi'e Dios, benne' ka' žóngake' kan želzá' láže'gakze', <sup>18</sup>na' zej nchol yichj lázdo'gake'. Dan' zej nake' benne' bi nnezel ka', na' zej non zižje lázdo'gake', che len bi zej nzi'e yela' nban da' žonn Dios chežo.

<sup>19</sup> Bi žedoé'egekle'.

Bde kwíngake' nich góngake' da'  
zinnj.

Dot láže'gake' žóngake' yógo'te  
da' kegle.

<sup>20</sup>Benne' ka' bsédgekle' le'e kan nak che Benne' Criston', bi bsédgekle' le'e gonle kan žongak benách ki.

<sup>21</sup>Da' naken dot da' li da' bénlele kan nak che Benne' Criston', na' da' nakle chie' Le', zsédgeklen le'e da' naken dot da' li da' zóalenen Jesusen!. <sup>22</sup>Le nna bia' yela'

benachze chele da' gokle zga'ale, dan' znitlen ni'a che yela' zze laže' chele da' kegle dan' ben láže'len le'e. <sup>23</sup>Le yeyák kobe lo yichj lázdo'le', na' lo be' nákkzele. <sup>24</sup>Le si' yela' benách kobe da' žon Dios kan nakkze' Le', dan' zla' lawn dan' žonen ga žonle da' naken chawe', na' da' naken li laže'.

<sup>25</sup>Che len, biž gon láže'le. Yógo'težo žala' wcháljlenžo lježžo ka' da' naken dot da' li, dan' nžagžo yógo'težo bela' žen che Benne' Criston'.

<sup>26</sup>Cha' ža'le, bi žala' gonle dola'. Bi ža'le scha. <sup>27</sup>Bi be gonle da' wnné xjon latje da' xiwe' nna bian' le'e.

<sup>28</sup>No benne' zbaně' žala' wsane' yela' wbán chie', na' cheje' wen žin nich gata' chie' bi da' wnejzjwe' chegak benách yache' ka'.

<sup>29</sup>Bi nne zí'le, san le nna da' naken chawe', da' gáklenen no benne' yenlen', na' gonen ga gak chawe' che bennen'. <sup>30</sup>Bi gonle nyache' laže' Dios Be' La'y, dan' nak bia' nakle che Dios dan' zoálen Dios Be' La'y na' le'e, na' žin že yeyóž yeslé' le'e lo na' dola'.

<sup>31</sup>Le kwas ládjwle le'e:

Yela' zge'el, na' yela' zža'a,  
na' yela' zze laže',  
na' yela' zdile dižá, na' yela'  
wnné zí',  
na' yógo'te da' kegle.

<sup>32</sup>Žala' gakle ží'i laže', na' yeyache' láže'lele lježle tole yetole, na' yenít lawle che lježle tole yetole, kan ben Dios, benít lawe' chele le'e dan' nakle toze len Benne' Criston'.

**Kan žala' gakgak benne'  
ka' zej nake' zí'n Dios**

**5** Dan' nakle zí'nkze Dios, na'  
le' nži'ile' le'e, le we' laže'

gakle kan nake' Le'. <sup>2</sup>Kan nak yógo'te da' žonle, žala' ū'i'lele lježle ka', kan Benne' Criston' bž'i'ile'ele' ū'o, na' bde kwine' lo yela' got lo wlazžo ū'o. Ben kwine' ka to biado' ūotžo-ba' law Dios ni'a che dola' da' nbága'žo. Lezka' goke' ka to da' zla' zix, da' ūaz laže' Dios, dan' zko'žo lo bkog la'y chie'.

<sup>3</sup>Dan' nakle che Dios, bi gonle da' sban, na' bi gonle da' kegle, na' bi dan láže'le yela' gape. Naž bi gak nitó benne' bi da' nnie' chele. <sup>4</sup>Bi nnale da' sban o da' wen laže' o diža' ka'ze, da' ka' bi žala' gonle, san gakže chawe' ye'le Dios: "Zóxkeno."  
<sup>5</sup>Ba nnézkzelele bi chaz nitó benne' gan znna bia' Benne' Criston' tzen len Dios, bennen' ūone' da' sban, o bennen' ūone' da' kegle, o bennen' zdan laže'e yela' gape. Bennen' zdan laže'e yela' gape nake' ka to benne' zka'n zene' lo'a ka'. <sup>6</sup>Bi we'le latje no benne' gon láže'le' le'e len da' bi naken dot da' li. Ni'a che dola' ki Dios gone' zia benne' ka' bi ūóngake' kan znna xtižee'. <sup>7</sup>Bi gónlenle tzen benách ki.

<sup>8</sup>Zga'ale wyo'ole le'e da' nak chol, san na'a yo'ole baní' che Dios, dan' nakle toze len Xanžon'. Le gon da' naken che banín', <sup>9</sup>dan' ūon banín' ga gakžo ū'i' laže', na' ga wchaljžo da' naken dot da' li, na' ga gakžo chawe'. <sup>10</sup>Le we' laže' nnézlele da' ūaz laže' Xanžon'. <sup>11</sup>Bi gónlenle tzen benne' ka' ūóngake' da' zinnj, dan' ūóngake' gan nak chol, san le yebéj lawe' law dan' ūóngake'. <sup>12</sup>Yedoé'elžo wchaljžo kan nak da' ūongak benne' ka' ngáche'ze. <sup>13</sup>Kate' bi da' yebéj ūaw'e' law, gak bia' yógo'te kan jez naken, dan' gon

da' nak baní' ga gak bia' yógo'ten.

<sup>14</sup>Che len nyejw le'e yiche da' znnan:

Bebán, le' na' ztaso'.

Wyase ladjuw benne' gat ka'.

Benne' Criston' wza'ni'e chio'.

<sup>15</sup>Le wia kwinle kan žonle. Bi gakle benne' bi ūejn'i'gekle', san le gak benne' ūejn'i'gekle'. <sup>16</sup>Le wkonle ūin latje da' den chele dan' ba zoažo ža bi žak chawe' chežo. <sup>17</sup>Bi gakle benne' bi nnezle ka'. Le we' laže' chejn'i'lele da' ūénele Xanžon' gonlen. <sup>18</sup>Bi sôžlele, dan' gon yela' zzožle ga nítlele to chi'ize. Le we' latje nna bia' Dios Be' La'y le'e.

<sup>19</sup>Le wchaljlen lježle tole yetole, wkónlele ūin salmo ka', na' da' ka' ūol-le che Dios, na' da' ka' ūol-le ni'a che Dios Be' La'y. Dot láže'žo žala' golžo che Dios da' wká'n ūenen Le'.

<sup>20</sup>Le wkonle ūin la Xanžo Jesúš, Benne' Criston', na' le ye' Xažo Dios: "Zóxkeno" ni'a che yógo'te da' žaken.

**Kan žala' gonžo chegak lježžo ka'**

<sup>21</sup>Le gon kan znna xtiža' lježle tole yetole nich ki wká'n ūenle Dios.

<sup>22</sup>Le'e, no'le ka', le gon kan znna xtiža'gak benne' byo che chele, kan žala' gonle kan znna xtiža' Xanžon'.

<sup>23</sup>Ki žala' gonle dan' znna bia' to benne' byo ūo'le' kan ūon Benne' Criston', znna bi'e benách chie' ka'. Benne' Criston' nake' Benne' ūeslé' benách chie' ka', benne' ka' jez nžage' bela' ūen chie' Le'. <sup>24</sup>Kan ūongak benách ka' che Benne' Criston' kan znna xtižee', lezka' žala' gongak no'le ka' kan znna xtiža'gak benne' byo che chégake' lo yógo'te da' žaken.

<sup>25</sup>Le'e, benne' byo ka', le ūi'il no'le che chele kan Benne' Criston' nži'ile'

benách chie' ka', na' bde kwine' nich gote' lo wlázgake'. <sup>26</sup>Ki got Benne' Criston' nich wnnite'e benách chie' ka' lo na' Dios, na' zej nyaže' to lo nis da' naken xtíže'e. <sup>27</sup>Got Benne' Criston' lo wlázgake' nich gak wzíe' légake' law Dios, zej nake' ka to laže' xtan, da' bi naken sban, na' bi xonjen, na' bi zoa nitó da' zhinnjen, dan' žone' ga gákgake' dot chawe', na' ga bi gak nitó benne' bi da' nnie' chégake'. <sup>28</sup>Le ží'il no'le che chele kan nži'il kwinle. No benne' byo nži'il zo'le, nži'il kwine'. <sup>29</sup>Bi zoa no benne' žon zi' kwine', san zwaw kwine', na' žape chi'i kwine', kan žon Benne' Criston' len benách chie' ka', <sup>30</sup>benne' ka' zej nžage' bela' žen chie', na' žo'o nžagžo bela' žen chien'. Nakžo žo'o ka xpele'e, na' žit chie' ka'. <sup>31</sup>Lezka' nyejw le'e yiche la'y da' znnan: "Che len benne' byo žala' wka'ne' xa xne'e nich chejsóalene' no'le chie', na' da' chope' yeyákgake' ka toze benne'." <sup>32</sup>Da' ni da' nyejwn le'e yiche zloe'elen law to da' naken dot da' li, na' neda' žekla' lezka' zchaljen kan nak che Benne' Criston', na' chegak benách chie' ka'. <sup>33</sup>Lezka' zchaljen kan nak chele. Yógo'tele le'e, benne' byo ka', žala' ží'ilele no'le che chele kan nži'il kwinle, na' le'e, no'le ka', žala' gapple ba la'ne benne' byon' che chele.

**6** Le'e, xkwide' ka', žala' gonle kan znnna xtíža'gak xa xna'le nich ki gonle kan znnna xtíža' Xanžon'. Žala' gonle da' naken chawe'. <sup>2</sup>Da' bchi'le Dios da' naken blo, dan' zchen' to da' bchebe laže'e gone', naken da' znnan: "Wdape ba la'ne xa xno'o, <sup>3</sup>na' gak chawe' chio', na' scha so' nbano' yežlyó nga."

<sup>4</sup>Le'e, benne' ka' nakle xagak xkwide' ka', bi gonle ga ža'agak zí'nle ka', san le yesgól légakbe', na' le sel-gakbe' snia, na' le wsedlegakbe' kan žaz laže' Xanžon'.

<sup>5</sup>Le'e, nólele le'e nakle benne' ndo'w ka', le gon dot láže'le kan znnna xtíža'gak xanle ka', benne' ka' nníta'gake' yežlyó nga, na' le gape-gake' ba la'ne lo yela' zžebé chele, na' le gon xchíngake' kan žala' gonle xchin Benne' Criston'. <sup>6</sup>Le gon xchíngake', kégeze kate' ne zwágake' le'e, nich yežójzele chawe' lágake', san dot láže'le le gon xchíngake' kan žaz laže' Dios, kan žala' gonle xchin Benne' Criston'. <sup>7</sup>Dot láže'le le gon xchíngake', na' ki gaken, gonle xchin Xanžon', na' kégeze xchingak benách ka'. <sup>8</sup>Nnézkzelele kan gon Xanžon'. Yebi'e che chežo kan zej nak da' chawe' da' žonžo cha' nakžo benne' ndo'w ka', o cha' bi ndo'žo.

<sup>9</sup>Le'e, benne' ka' zej yo'o benne' ndo'w ka' lo na'le, le gon chawe' chegak wen žin chele ka', na' bi wchébele légake'. Le chejsá' laže' kan nak chele, yo'ole lo na' Xanžo, Bennen' zoe' ya'abá che Dios, tlebe kan nak chégake', na' Le' bi zche'e kan žone' che to to benne' ka'.

### Dios žonne' chežo da' ka' žon chóchgaken žo'o

<sup>10</sup>Na'a, zí'na'do' ka', le gak choch dan' nakle toze len Xanžon', na' zoalen yela' wak zen chie' le'e. <sup>11</sup>Le gape chi'i kwinle, wkónlele žin da' ka' žonn Dios chežo, da' ka' žape chí'igaken žo'o, nich gak soale choch katen' yénele da' xiwe' gonen ga bága'le dola'. <sup>12</sup>Bi zdíl-lenzežo

benáčh ka', benne' jez nake' bela', na' žit, san zdíl-lénžo yela' wnná bia' chegak be' xiwe' ka', be' ka' želdán lo be'ze, na' žónlengaken tzen benne' ka' znna biá'gake', na' benne' ka' nzi' lo ná'gake' yela' wnná bia', na' benne' blo ka', be' ka' jez nnitan' yežlyó nga gan nak chol. <sup>13</sup>Che len:

Le si' yógo'te da' ka' žonn Dios chežo, da' ka' žape chí'igaken žo'o, nich kate' žin ža katen' gak da' bi naken chawe' chežo, na' gak sóelelen, na' kate' yeyóz gonle ki, na' ga'nle choch.

<sup>14</sup>Le soa choch.

Le si' da' naken dot da' li, da' gaken chele ka to yid da' nžejen le'le.

Le gak chawe', na' da' naken chawe' gape chí'in le'e kan žon to laže' žeje da' žape chí'in lcho'w to benne' žeje' lo wdile.

<sup>15</sup>Le soa ban laže' nich gak wchaljle diža' chawen' da' zka'n žin yichj lázdo'žo law Dios, kan zoa ban laže' to benne' žeje' lo wdile, na' zleje' zele' ni'e.

<sup>16</sup>Da' naken blo, yela' žejlé' chele che Benne' Criston' gaken chele ka to da' naken choch da' wzele lawle, nich bi galá' da' ka' wsé da' xiwe' le'e, da' ka' jez naken ka yag ntóche'do' ka' da' žia yi' láwe'gaken.

<sup>17</sup>Yela' žešlá gaken chele ka to lo'o ya da' gape chí'in yichjle.

Xtižá' Dios gaken chele ka to ya ntoche' da' žonn Dios Be' la'y chežo, nich wtíl-lénžon da' bi naken chawe'.

<sup>18</sup>Le gon yógo'te da' ki, na' le wchaljlen Dios, na' le nnable-ne' gáklene' le'e.

Le wcháljlenteze Dios, zoalen Dios Be' La'y le'e.

Nich gonle da' ki, žala' soale ban laže', na' bi yedó láže'le, na' nnáblele Dios gáklene' benne' ka' jez nake' chie' Le'. <sup>19</sup>Lewchaljlen Dios, na' le nnable-ne' gáklene' neda', na' wzejni'ile' neda' da' nnia' katen' žala' wchalja', na' gone' ga gaka' wechógl laže' katen' wchalja', nich gak wzejni'ila' benáčh ka' kan nak da' ngache' che diža' chawen'. <sup>20</sup>Dios bdie' lo na'a diža' chawen' nich wchaljan', na' dan' bena' ki nyejwa' liž ya nga. Le wchaljlen Dios cha', na' le nnable-ne' gone' ga gaka' wechógl laže' nich wchalja' diža' chawen', kan žala' gona'.

### Da' bchalj Pablo kate' ze lawte

<sup>21</sup>Tíkiko, lježžo na' nži'ilžo-ne', na' žone' xchin Xanžon' dot laže'e, wloe'ele' le'e dot kan žak chia' nga, na' kan žona'. <sup>22</sup>Che len, sela'a-ne' gan zoale, na' wloe'ele' le'e kan žaken cheto', na' gon choche' le'e.

<sup>23</sup>Znnabla' Xažo Dios len Xanžo Jesús, Benne' Criston', wká'n žie' yichj lázdo'le, na' gone' ga gata' chele yela' nži'il da' nžagen yela' žejlé' chele che Benne' Criston', yógo'tele na' nakle chie' Le'.

<sup>24</sup>Dios gon chawe'e le'e, yógo'tele na' nži'ilele Xanžo Jesús, Benne' Criston', na' nak li laže' yela' nži'il chele Le'. Ka'kze gaken.

# DIŽA' DA' BSELĀ' PABLO ŁO YEŽ FILIPOS

Pablo žape' "Padiox"  
benách ka' che Jesús

**1** Neda', Pablo, žapa' le'e "Padiox",  
le'e na' žejele'le che Jesús,  
Benne' Criston', na' nólele žáklenle  
benách chie' ka', na' nólele le'e žape  
chi'ile légake'. Zoale yež Filipos, na'  
nakle che Dios, na' nakle toze len  
Jesusen'. Xkwide' Timoteo žónlenbe'  
neda' tzen, na' nakto' wen žin che  
Jesusen'. <sup>2</sup>Znnabla' Xažo Dios len  
Xanžo Jesús, Benne' Criston', gon  
chaw'e le'e, na' wkán' zie' yichj  
lázdo'le.

Pablo znnable' Dios gáklene'  
benách ka' che Jesús

<sup>3</sup>Žapa' Dios: "Žóxkeno" kate'  
zza' laža'a chele le'e. <sup>4</sup>Žebela' kate'  
zcháljenia' Dios, na' znnabla'-ne'  
gáklene' le'e <sup>5</sup>dan' žejsá' laža'a kan  
bénlenle neda' tzen žin che diža'  
chawen'. Wzó lawle žonle žin na' ža  
na' bénlelen, na' žonlen na' zejte  
na'a ža. <sup>6</sup>Dios wzó lawe' žone' to  
da' naken chaw'e lo yichj lázdo'le.  
Žxen laža'a Łe' gónteze' ki na' zejte  
ža yelá' Jesús, Benne' Criston'. <sup>7</sup>Kan  
zza' laža'a chele naken kan žala'  
gona' dan' nží'ile'ela' le'e. Yógo'tele

žebélenlele da' žonn Dios chežo,  
na' lo be' nakkzle žónlenle neda'  
tzen kate' ne nyejwa' liž ya nga, na'  
ki gonle kate' žina' lawgak benne'  
yolawe' ka' nich wloe'ela' law, na'  
gon chi'a diža' chawen' che Benne'  
Criston'. <sup>8</sup>Nnézkzele Dios kan  
nží'ile'ela' le'e. Naken kan Jesús,  
Benne' Criston', nží'ile'ekzele' zo'o.  
<sup>9</sup>Znnabla' Dios gone' ga ží'ižezele  
lježle ka', na' gónnli'e yela' sına', na'  
yela' žejni'il chele, <sup>10</sup>nich gak kwele  
da' nákle'eže chaw'e'. Cha' gaken ki  
chele, na' gakle dot chaw'e', na' bi  
gak nitó benne' bi da' nnie' chele ža  
na' yelá' Benne' Criston'. <sup>11</sup>Da' nakle  
nak bian' da' naken chaw'e' da' žon  
Benne' Criston' lo yichj lázdo'le nich  
la' law yela' baní' che Dios, na' nich  
ga'n zene' Łe'.

Zoažo nbanžo nich gakžo  
kan nak Jesús

<sup>12</sup>Zí'na'do' ka', žénela' nnézlele da'  
ni: yógo'te da' goken chia' góklenen  
neda' nichgota' latje chia' bchalja'  
diža' chawen'. <sup>13</sup>Ka' goken, yógo'te  
ni'a na'gak benne' yolawe' ka' len  
yezika' benne' ka', nnézgekle'  
nyejwa' liž ya nga dan' žona' xchin  
Benne' Criston'. <sup>14</sup>Dan' nyejwa' neda'

liž ya nga, yeláte'ze ndachgak lježžo ka', benne' ka' nníta'gake' nga,zej nakž' benne' wechóg laže' ka', na' žxen láže'gake' Xanžon', na' biž zžébegake' zcháljgake' xtiža' Dios.

<sup>15</sup>Da' li bale' zcháljgake' che Benne' Criston' dan' zgé'egekle' neda', na' želdíl diž'e, san yebałe' zcháljgake' chie' dot li láže'gake'. <sup>16</sup>Benne' ka' zgé'egekle' neda' zcháljgake' che Benne' Criston' lo yela' zka'n zen kwíngake', na' kege dot li láže'gake'. Ženegekle' wsaka' zí'gake' neda' kate' ne nyejwa' liž ya nga. <sup>17</sup>Benne' dot laže' ka', lo yela' nži'il chégake' zcháljgake' chie' Le', dan' nnézgakle' Dios na'kze bdie' lo na'a žin da' žona', zchalja' diž'a chawen'. <sup>18</sup>Bi žonen ga že' zedla'. Žebela' dan' zcháljgake' che Benne' Criston' nákteze, cha' zcháljgake' dot láže'gake' o cha' bi žóngaken' ki.

Na'a, žebéžela' <sup>19</sup>dan' nnezla' yela' neda' lo da' žaken chia', nyejwa' liž ya nga, dan' znnáblele le'e Dios gaken ki, na' dan' žaklen Dios Be' La'y neda'. Nake' Le' Bennen' zsela' Jesúš, Benne' Criston', chežo. <sup>20</sup>Ki žénela', na' žxen laža'a Dios, gone' ga bi yedoe'ela', na' gone' ga gak wchalja' lo yela' wechóg laže', na' lo na'a neda' gá'nteze zen Benne' Criston' na'a ža, na' yógo'te ža da' zá'gaken, cha' gon byenen la' gattia' o cha' soa' nbana'. <sup>21</sup>Kan žekla' neda', cha' zoa' nbana', naken nich gaka' kan nak Benne' Criston', na' cha' gata', gaken to da' nakžen chawe'. <sup>22</sup>Cha' gak gona' žin da' gáklenen diž'a chawen' che Benne' Criston' cha' soaza' nbana', bi nnezla' bile žala' kwian'. <sup>23</sup>Nak zede kwian'. Žénela' gata' nich chejsóalena'

Benne' Criston', da' gakžen chawe' chia', <sup>24</sup>san žonže byenen soaza' nbana' nich gak gáklena' le'e. <sup>25</sup>Dan' nnezla' naken ki, lezka' nnezla' gá'nlena' le'e nich gáklena' le'e nich gakže li laže' kan žejle'le che Benne' Criston', na' yebéželele dan' žejle'le chie' Le'. <sup>26</sup>Ki naken, yedjsóalena' le'e da' yoble, da' gonen ga chaz láže'le Jesúš, Benne' Criston', ni'a che da' gone', gáklenen neda'.

<sup>27</sup>Le we' láže'ze gakle kan naken tlebe len diž'a chawen' che Benne' Criston'. Ki gaken, cha' yedjwía' le'e o cha' soa' zí'to', yenla' nakle choch, na' nakle toze kan žonle tzen žin che da' žejle'žo, dan' zan' chežo ni'a che diž'a chawen'. <sup>28</sup>Bi we'le latje benne' ka' bi zlé'egekle' le'e chawe' nich bi wchébegake' le'e. Da' ni wloe'elen légake' kwia yí'gake', san yelale le'e, dan' gak bia' Dios žáklenkze' le'e. <sup>29</sup>Dios žonne' le'e latje gonle xchin Benne' Criston', kégeze kan žejle'le chie', san lezka' kan zzáka'le katen' žonle xchinen'. <sup>30</sup>Na'a, gak gónlenle neda' tzen we' láže'žo wchaljžo diž'a chawen'. Blé'ekzelele kan wzaka'a katen' bena' ki zga'ale, na' žénlele kan lezka' zzaka'a na'a.

Jesús goke' gaxjw laže',  
na' wz'e yela' zen

**2** Dan' Benne' Criston' žon choche' le'e, na' lo yela' nži'il chie' žeyache' láže'le' le'e, na' nakle toze len Dios Be' La'y, na' nži'il lele lježle ka', na' žeyache' láže'lele lježle tole yetole, <sup>2</sup>le gon ga yebéle'žela'. Nich gonle ki, žala' gakle toze len lježle ka', na' gak toze kan nži'il lele lježle tole yetole. Lezka' žala' gakle

toze lo be' nákkzele, na' kan zza' láže'le. <sup>3</sup>Kan nak da' žonle, bi be žala' gonle lo yela' zdan yela' gape chele o nich wká'n zen kwinle, san cháwe'do' žala' gonle yógo'te, na' bi géklele nákzele le'e blo ka lježle ka'. <sup>4</sup>Lezka' le we' láže' gak chawé' chegak lježle ka', na' kege chele le'eze.

<sup>5</sup>Žala' gakle gaxjw láže' kan gok Jesúš, Benne' Criston', gaxjw láže'. <sup>6</sup>Le' nake' tlebe kan nak Dios na'kze, san bi gokle' žala' gon byene' ga'ne' tlebe kan nak Dios. <sup>7</sup>Bzoakze' chela'ale yógo'te da' wdape', na' ben kwine' ka to benne' ndo'w. Golje' kan žaljgak benách ka', na' goke' benách. <sup>8</sup>Katen' goke' benne', goke' gaxjw láže', na' bene' kan znna xtiža' Dios, na' gote'. Wdé'e le'e yag kroze kan žak che to benne' wen da' zinnj. <sup>9</sup>Che len Dios bechise' Le', na' bene' ga nake' blo ya'abá chie', na' bzoe' chie' to la da' zákažen ka yógo'te lagak benách ka'. <sup>10</sup>Ki ben Dios nich wzóa zibgak yógo'te benne' ka', benne' nníta'gake' ya'abá chie', na' yežlyó nga, na' lo latje chol, katen' yéngekle' la Jesusen'. <sup>11</sup>Yógo'tegake' nnágake' kwáselo nak Jesúš, Benne' Criston', Xángake' nich ga'n zen Xažo Dios.

### Žala' gakžo ka da' ka' zgó'ogaken baní' yežlyó nga

<sup>12</sup>Che len, zí'na'do' ka', kan bénlele da' wnnia' katen' wzóalena' le'e, na'a žon byenžen gonle kan znnia' kate' ne zoa' zi'to' gan zoale. Le gon xchin Xanžon' na'zejte yeyóž yeslé' le'e. Le gon ki lo yela' zžebe chele Le', na' lo yela' žzize. <sup>13</sup>Dios žonkze' žin lo yichj lázdo'le,

na' žone' ga žénelele gonle da' žaz laže'le, na' lezka' žonne' yela' wak chele nich gak gonlen.

<sup>14</sup>Le gon yógo'te da' žala' gonle, na' bi be nnele chen, na' bi til' díža'le. <sup>15</sup>Ki žala' gonle, nich bi gak nitó benne' bi da' nnie' chele, san nich gakle li laže' zí'n Dios, na' gakle dot chawé' yežlyó nga, gan zoale ladjw benách ka' bi zej nake' chawé', na' zzóagake' Dios chela'ale. Le'e zgo'le baní' ládwjgake' kan zgo'ogak belj ya'abá ka' baní' katen' nak chol nga. <sup>16</sup>Žonle ki kate' zchaljle díža' da' zbánlenžo láwgake'. Cha' ki gonle, na' gak yebéle'ela' ni'a che da' nákkzele le'e že na' yelá' Benne' Criston', dan' nnezla' kege dáche'ze wdía' gan ben zož gata', na' bénli'a žin. <sup>17</sup>Yela' žejl'é' chele che Benne' Criston' naken to da' žaz laže' Dios. Chela' gon byenen gata' neda' nich gak li laže' yela' žejl'é' chele chie' Le', yebela', na' gak da' chawé' chia' neda' tzen len yógo'tele le'e. <sup>18</sup>Lezka' žala' yebélele le'e, lježto' ka', dan' gak da' chawé' chele le'e tzen len neda'.

### Kan žongak žkwide' Timoteo, na' žkwide' Epafroditó

<sup>19</sup>Cha' ki žénele Xanžo Jesusen', žxen laža'a la' séla'tia' žkwide' Timoteo gan zoale, nich gak yebela' katen' yela'be' nga, na' yedjloé'elbe' neda' kan žaken chele. <sup>20</sup>Tozbe' lebe' zza' láže'be' kan zza' laža'a neda', na' že' láže'le'ebe' le'e. <sup>21</sup>Yógo'te benne' yezika' že' láže'gake' da' naken chégakze'. Bi že' láže'gake' xchin Benne' Criston'. <sup>22</sup>Nnézkzelele kan ben žkwide' Timoteon', bežojbe' chawé'. Bénlenbe' neda' tzen žin che

diža' chawen', na' nakbe' chia' ka to xkwide' byo, žónlenbe' xabe' tzen žin. <sup>23</sup>Sela'a xkwide' Timoteon' gan zoale katen' nnezla' bi da' gaken chia' nga, <sup>24</sup>la'kze žxen laža'a Xanžon' gone' ga la' yedjwíatia' le'e.

<sup>25</sup>Lezka' žekla' žon byenen sel'a'a bi' lježo Epaafroditu gan zoale. Xkwide' ni bénlenbe' neda' tzen žin che Benne' Criston', na' wdíl-lento' da' xiwe'. Le'e bséla'kzele-be' ga zoa' ni nich gáklenbe' neda'. <sup>26</sup>Lebe' žénekzelbe' yedjwíabe' le'e, lježto' ka', dan' že' láže'le'ebe' le'e dan' nnézlele wda'be' yižwé. <sup>27</sup>Da' li wda'be' yižwé, na' gok gatbe', san Dios beyache' láže'le'-be', na' kégeze lebe', san lezka' beyache' láže'le' neda', nich bi gakže nyache' laža'a ka naka' na'a. <sup>28</sup>Che len, gónežela' sel'a-be' gan zoale nich gak yebélele da' yoble katen' yelé'elelebe', na' biž gak nyache' laža'a neda'. <sup>29</sup>Le si' lo na'le-be' lo yela' žebél chele, dan' nakbe' bi' lježo žejle'be' che Benne' Criston'. Le gape ba la'ne yógo'te benách ka'zej nake' kan nakbe' lebe', <sup>30</sup>dan' ben zož chebe' gatbe' dan' benbe' xchin Benne' Criston', na' dan' góklenbe' neda' lo wlazle le'e.

### Da' naken dot chawe'

**3** Na'a, zí'na'do' ka', le yebél dan' nakle toze len Xanžon'. Bi že' zedla' wzoja' chele da' yoble kan nak dan' bzoja' chele zga'ale, dan' gáklenen le'e. <sup>2</sup>Le gape chi'i kwinal chegak benne' ka' žóngake' da' zinnj. Zej nake' ka bia yixe' snia ka', benne' ka' žon byéngake' chog lo bela' chegak benne' byo ka' da' nak bia' nzí'gake' xtiža' Dios. <sup>3</sup>Da' nak bian'

nzi'žo xtiža' Dios, dan' naken dot li laže', zóalenen žo'o. Dan' žejle'žo che Dios, yo'o Dios Be' La'y yichj lázdo'žo, na' žebelžo dan' nakžo toze len Jesús, Benne' Criston'. Bi žxen láže'žo to da' žiazen lo bela' žen chežo. <sup>4</sup>La'kze žxen láže'žo naken ki, lezka' neda' de chia' to da' gak wxén laža'a. Cha' zoa no benne' žekle' yelé' dan' zoa da' chawe' da' bene', neda' ba benža' ka da' ben bennen':

<sup>5</sup> Wžóg lo xpela'a dan' nak bian' katen' goka' xono' ža.

Golja' ladjw biche' ljež benne' Israel ka'.

Nbáblena' za'só Benjamín, zi'nkze Israel na'.

Xa xna'a jez nake' benne' hebreo ka'.

Goka' benne' yodo' fariseo kan bka'n zena' Dios.

<sup>6</sup>Be' láže'li'a xtiže'e ga bžinte wžia laža'a benách ka' che Benne' Criston'.

Ch'a wak to benne' gake' chawe' law Dios dan' žone' kan znna xtiža' Dios, bi gok no benne' bi da' nnie' chia'.

<sup>7</sup>Na'a, da ka' bxen laža'a zga'ale, ba bzoan' chela'ale dan' naka' che Benne' Criston'. <sup>8</sup>Kégeze da' ki, san lezka' bnnita' chela'ale yógo'te da' jez den, nich gak gónbi'a Xanžo Jesús, Benne' Criston', dan' záka'težen ka yógo'te da' ka'. Nich gónbi'a Le' bnnita' chela'ale yógo'te da' ka', na' žekla' jez naken ka bebe, nich gata' chia' da' žonn Benne' Criston' chežo, <sup>9</sup>na' nich gaka' toze len Le'. Beyaka' chawe', kege dan' žona' kan znna xtiže'e, san Dios na'kze beyone' neda' chawe' dan'

žejli'a che Benne' Criston', kan žeyone' chawe' yógo'te benne' ka' žejlé'gake' chie' Le'. <sup>10</sup>Žénezela' gónb'i'a Benne' Criston', na' soaßen yela' wak che Dios neda', dan' bkonle' žin katen' besbane' Benne' Criston' lo yela' got, na' nich gónlena' Le' tzen, saka'a neda' kan wzake'e Le', na' nich soa' gata' kan gote' Le', <sup>11</sup>dan' žxen laž'a a Dios, yesbane' neda' lo yela' got.

### **Da' žonžo nich lažo latje chežo**

<sup>12</sup>Bi znnia' ba napa' yógo'te da' ki da' gonn Dios chia', na' bi žekla' ba naka' dot chawe' lawe' Le'. Na'a, žon byena' gata' chia' yógo'te da' ka' dan' ba wzí' lo na' Jesúš, Benne' Criston', neda'. <sup>13</sup>Le'e, zí'na'do' ka', bi na' gapa' da' ki, san toze da' žon byena'. Zzal laž'a da' ba napa', na' žon byena' gata' chia' da' za'. <sup>14</sup>Žona' kan žon to benne' taría taría žitje' lo witje nich gata' chie' to da' yebélenle'. Ki žona' nich gata' chia' da' bliž Dios žo'o nich gatan' chežo ya'abá chie' dan' nakžo toze len Jesúš, Benne' Criston'.

<sup>15</sup>Ki žala' gonžo yógo'težo žo'o, nak dot li laž'e' kan žejlé'žo che Benne' Criston'. Cha' žéklele bálele žala' gonle to da' yoble, znnabla' Dios wzejni'ile' le'e. <sup>16</sup>Na'a, kan nak da' ba nzi' lo na'žo, žala' góntežon.

<sup>17</sup>Le'e, zí'na'do' ka', le gon kan žona' neda'. Ba bsedlto' le'e kan žala' gonle. Le wia kan žongak benne' ka' žóngake' kan bento' neto'. <sup>18</sup>Ba gožkza' le'e zan chi'i, na' žapa' le'e da' yoble len yela' žbeže chia', znnia': da' žongak benne' zan žonen gazej nake' ka benne' ka' bi zl'é'gekle' Benne' Criston' chawe',

dan' zzóagake' cheła'ale da' benkze' Le' le'e yag kroze. <sup>19</sup>Chjak benne' ka' žóngake' ki lo yi' gabíl dan' dios chégake' naken da' zzeze láže'gake', na' zka'n zen kwíngake' ni'a che da' žóngake', da' ka' žala' gonen ga yedoé'gekle'. Že' láže'zegake' da' de yežlyó nga, <sup>20</sup>san žo'o že' láže'žo da' de ya'abá che Dios gan nbabžo, na' žbezžo ža yelá' Xanžo Jesúš, Benne' Criston', Bennen' žeslé' žo'o, katen' yežoje' ya'abá che Dios. <sup>21</sup>Le' wché'e bela' žen chežo, da' kwia yi'kzen, na' gone' ga yeyaken kan nak bela' žen chekze' Le', da' soan to chi'ize. Ki gone' len yela' wak zen chie' da' wkonle' žin nich nna bi'e yógo'te.

### **Žala' yebétezelénlo Xanžo**

**4** Che len, zí'na'do' ka', le gak choch kan žejlé'le che Xanžon'. Nží'ile'ela' le'e, na' žénela' yedjwía' le'e. Žonle le'e ga žebela', na' nakle chia' ka to da' chawe' da' benn Dios chia'.

<sup>2</sup>Le'e, Ebodia len Síntike, žáta'yoela' le'e gakle toze kan žala' gakgak benne' ka'zej nake' che Xanžon'. <sup>3</sup>Na'a, lježa' li laž'e', žénela' gákleno' chope' ka', dan' bénlengake' neda' tzen žin, bchaljto' diža' chawen', na' bénlengak Klemente len yezika' lježa' ka', neto' tzen. Bazej nyejw lágake' ya'abá che Dios ganzej nyejw lagak benne' ka' ba de yela' nban da'zejlí kanne chégake'.

<sup>4</sup>Le yebétezelénle Xanžon'. Da' yoble, znnia': Le yebél. <sup>5</sup>Le gak ži'i laž'e' len yógo'te benách ka'. Za' yelá' Xanžon'.

<sup>6</sup>Bi kwe' zedle, san le nnable Dios da' žiažjen chele, na' le yi'e:

“Žóxkeno” ni'a che yógo'te dan' znnable. <sup>7</sup>Dios wkán' žie' yichj lázdo'le, kan zdetlen ka da' gak chejn'i gekele benách ka'. Dan' zzoa žin yichj lázdo'žo gape chi'in yichj lázdo'le, na' da' zza' láže'le, dan' nakle toze len Jesús, Benne' Criston'.

**Žala' sa' láže'žo da' naken chawe'**

<sup>8</sup>Da' žapa' le'e kate' ze lawte, zí'na'do' ka', le sa' láže'le che:  
Da' ka' zej naken chawe'.  
Da' ka' žon cháwe'gaken benách ka'.

Da' naken dot da' li.

Da' naken li láže'.

Da' žebélenlžo.

Da' naken dot láže'.

Da' naken xtan.

Da' žala' gapžon ba la'ne.

<sup>9</sup>Le gon kan bsevla' le'e, dan' wzí' lo na'le, kan bcháljlena' le'e, na' kan bena' gan zoale. Dios, Bennen' žonne' chežo da' zkán žin yichj lázdo'žo sóalene' le'e.

**Da' chawe' da' bengak benne'  
yež Filipos ka' che Pablo**

<sup>10</sup>Žebélenla' Xanžon' dan' že' láže'le le'e neda' da' yoble. Bi znnia' gol láže'le neda', san bi na' gata' latje chele gáklenle neda'. <sup>11</sup>Lezka', bi znnia' ki dan' zoa bi da' žiážjela', dan' ba nsedla' chaz laža'a da' dezen chia'. <sup>12</sup>Ba wdía' lo yela' yache', na' lo yela' wnni'a. Nsedla' soa' nákteze, cha' neljla' o zbil zdona', na' cha' de chia' da' zenle'e o zoa bi da' žiážjela'. <sup>13</sup>Yógo'te zzáke'la' dan' Benne' Criston' žon choche' neda'. <sup>14</sup>Benle le'e da' chawe' katen' góklenle neda', na' beyón zenle neda' katen' wzaka'a.

<sup>15</sup>Le'e, benne' yež Filipos ka', nnézkzele kan gok chia' ža na' katen' bezá'a gan nbab Masedonia, nich bejchalja' diža' chawen!. Ládwjgak benách ka' che Benne' Criston', bi wzóa no benne' góklenle neda', san lé'ezele góklenle neda'. Bséla'le chia' dan' bnézjwlen, dan' wzí' lo na'le da' bzenla' le'e. <sup>16</sup>Katen' wzóa' lo yež Tesalónika, to chope chi'i bséla'le dan' bnézjwlen chia' katen' byážjelan'. <sup>17</sup>Bi že' laža'a bi da' si'an, san žénela' gáta'že chele da' yebélenlelen ya'abá che Dios. <sup>18</sup>Žapa' le'e: ba wzí'a yógo'te dan' bséla'le chia', na' wdetle ka da' byážjela'. Dan' bséla'le lo na' xkwide' Epafroditon' benen ga goken ki. Dan' bnézjwlen naken ka to da' zla' zix' da' zla'ten law Dios, na' ka to da' zgo'ožon law Dios da' žaz laže'le Le'. <sup>19</sup>Dios wnežjwe' chele yógo'te da' žiážjelele, kan nak yela' wnni'a da' žen' ya'abá chie', dan' nakle toze len Jesús, Benne' Criston'. <sup>20</sup>iGa'n žénteze Xažo Dios! Ka'kze gaken.

**Benách ka' che Jesús žápegake'  
"Padiox" ljéžgake' ka'**

<sup>21</sup>Lo wlaza' neda', le gape "Padiox" benne' ka' zej nake' che Dios ga na', dan' zej nake' toze len Jesús, Benne' Criston'. Lježžo ka' nnítá'gake' nga, benne' ka' žónlengake' neda' tzen, žápegake' le'e "Padiox." <sup>22</sup>Lezka' yógo'te benne' ka' nnítá'gake' nga, benne' ka' zej nake' che Dios, žápegake' le'e "Padiox." Lezka' benne' wen žin ka' nnítá'gake' liž benne' znnia bi'e dot gan nbab Roma žápegake' le'e "Padiox."

<sup>23</sup>Znnabla' Xanžo Jesús, Benne' Criston', gon chawe'e yógo'tele le'e. Ka'kze gaken.

# DIŽA' DA' BSELĀ' PABLO ŁO YEŽ COLOSAS

Pablo žape' "Padiox"  
benách ka' che Jesús

**1** <sup>1-2</sup>Neda', Pablo, žapa' le'e  
"Padiox", nakle che Dios, na'  
nakle lježto' ka' žejele' che Benne'  
Criston', na' zoale lo yež Colosas.  
Znnabla' Xažo Dios gon chawe'e le'e,  
na' wká'n zie' yichj lázdo'le. Naka'  
wbás che Jesús, Benne' Criston',  
dan' zénele Dios gaka' ki. Bi' lježzo  
Timoteo žónlenbe' neda' tzen.

Pablo zcháljlene' Dios, na'  
zie' Le': "Žóxkeno"

<sup>3</sup>Kate' zcháljlento' Dios, Xa Xanžo  
Jesús, Benne' Criston', zé'tezto'-  
ne': "Žóxkeno" ka nak chele, na'  
znnablto'-ne' gon chawe'e le'e <sup>4</sup>dan'  
benlto' kan žejele' che Jesús, Benne'  
Criston', na' kan nží'ilele yógo'te  
benne' ka'zej nake' che Dios. <sup>5</sup>Ki  
žonle dan' žxen laže'le da' bchebe  
laže' Xanžon' gonne' chele, Bennen'  
zoe' ya'abá che Dios, dan' bénlelen  
katen' bžin chele le'e da' naken  
dot da' li che diža' chawen'. <sup>6</sup>Diža'  
chawen' bžinen chele kan zžinen  
dot yežlyó nga. Žonen žin, na' zze  
diža' chen dot yežlyó nga, tlebe  
kan žaken gan zoale le'e. Ki žaken

ža ni'te katen' bénlelen, na'zejte  
na'a ža, na' da' li bénbia'le kan žon  
chawe' Dios ž'o. <sup>7</sup>Epafras bsdle'  
le'e da' ni. Nake' benne' nži'ilžo-ne',  
na' žónlene' neto' tzen žin, na' lezka'  
nake' wen žin li laže' che Benne'  
Criston', na' žáklenе' le'e. <sup>8</sup>Benne' ni  
bzenle' neto' kan nží'ilele lježle ka',  
da' gak gonlen dan' zoalen Dios Be'  
La'y le'e.

<sup>9</sup>Che len lezka' neto', ža ni'te  
katen' gókbe'elto' da' ni, na'zejte  
na'a ža bi žsento' zcháljlento' Dios,  
na' znnablto'-ne' gáklenе' le'e, na'  
gone' ga gónbia'le dot da' zénekzele'  
Le', na' wnežjwe' chele dot yela'  
žejní'il, na' yela' sina' da' zgo'o  
Dios Be' La'y lo yichj lázdo'žo. <sup>10</sup>Ki  
znnablto'-ne' nich gak gonle kan  
žala' gongak benne' ka'zej nake'  
che Xanžon', na' nich gak gonle  
yógo'te da' žaz laže' Le', na' nich  
gak gonle yógo'te da' naken chawe',  
na' gakže li laže' kan nónbia'le Dios.  
<sup>11</sup>Znnablto'-ne' gon choche' le'e, na'  
wnežjwe' chele yela' wak chawe'  
chie', nich gak sóelele yógo'te da'  
žaken, na' nich gakle zen laže',  
na' yebéle'ele. <sup>12</sup>Ło yela' žebél  
chele le ye' Xažo Dios: "Žóxkeno"  
dan' bdie' lo na'žo gata' chežo

latje lo baní' chie', nich góñlenžo tzen benne' ka'zej nake' che Leze'.  
13 Xažo Dios na'kze beslé' žo'o lo na' da' xiwe', dan' znna bian' latje chol, na' bdie' žo'o gan znna bia' Zi'nkze', Benen' nži'ile'. 14 Zi'ne' na' beya'we' žo'o, katen' gote' lo wlazžo žo'o, na' benít lawe' chežo dola' da' wbága'žo.

**Beyakžo toze len Dios dan'  
got Jesús lo wlazžo žo'o**

15 Benne' Criston' nake' tłebe kan nak Dios na'kze, Benen' bi gak le'elžo. Wzoakze Benne' Criston' zga'ale' ka yógo'te da' ben Dios.  
16 Lo na' Benne' Criston' ben Dios yógo'te da'zej den, da'ka'zej nnitan' ya'abá, na' da'ka'zej nnitan' yežlyó nga, da'ka' zle'elžon, na' da'ka'bi gak le'elžon, da ka'zej naken latje blo ka', na' yela' wnná bia', na' da'ka' nzi' lo ná'gaken yela' zen, na' yela' wak che ya'abá che Dios, na' che yežlyó nga, Ben Dios yógo'te da'ka' lo na' Benne' Criston' nich yebélenle' Le' légaken. 17 Benne' Criston' wzoakze' zga'ale' ka yógo'te da'zej den, na' yógo'ten nnítá'gaken ni'a che yela' wak chie' Le'. 18 Benne' Criston' nake' Xangak benách chie' ka', na' znezjwe' yela' nban chégake'. Lezka' nake' Benen' nežw bebane' to chi'ize lo yela' got. Zga'ale' Le' bebane' to chi'ize lo yela' got nich gake' blo lawgak yógo'te da'zej den.  
19 Ka' goken dan' wyáz laže' Xažo Dios soa dot da' nakkze' Le' len Benne' Criston'. 20 Ni'a che da'ben Benne' Criston', Dios bene' ga gak gá'hlengak Le' chawe' yógo'te da'zej den, da'ka'zej nnitan' yežlyó nga, na' da'ka'zej nnitan' ya'abá. Beyone' légaken toze len Lekze' dan' blalj

Benne' Criston' xchene' katen' gote' le'e yag kroze.

21 Le'e, zga'ale bkwaslenle Dios, na' gokle ka benne' ka' bi zle'egekle' Dios chawe' lo yichj lázdo'le ni'a che zia da' wbága'le, san na'a ba beyone' le'e toze len Lekze'. 22 Ka' goken dan' Benne' Criston' bde kwine', na' gote' lo wlazle le'e nich gak wzíe' le'e law Dios, nakle che Leze', na' nakle dot chawe', na' bi gak nitó benne' bi da' nnie' chele. 23 Ki gaken cha' ga'nle choch kan żejle'le che Benne' Criston', na' gakle ka to yo'o da' že' lenen gže', na' cha' bi cha' lázdo'le kan žxen láže'le diža' chawen' dan' bénlele, dan' zze diža' chen dot yežlyó nga dan' ben Dios zan ya'abá. Dios bzoe' neda', Pablo, nich gaka' wen žin che diža' chawen'.

**Žin da' bde Dios lo na' Pablo**

24 Žebela' na'a ni'a che da' zzaka'a nich gáklena' le'e, na' lo bela' žen chia' zzáka'lena' Benne' Criston' tzen lo wláz bela' žen chie' Le', da' naken benách chie' ka'. 25 Dios bene' ga naka' neda' wen žin chegak benách ka' che Benne' Criston', na' žona' xchin Dios, dan' bdie' lo na'a gona' nich gáklena' le'e, na' wzenla' le'e dot kan nak xtiža' Dios. 26 Zzejni'ilá' benách ka' da' ngache', dan' bgachen' ža ni'te, na' nitó benne' bi gok góñbi'en, san na'a Dios ba bzejni'ile' benách ka'zej nake' che Leze' kan nak chen. 27 Dios gónekzele' gone' ga góñbia'gak benách zi'to'ka' kan nak yela' wnni'a che dan' bgachen'. Ki znna dan' bgachen': "Benne' Criston' nake' toze len le'e, na' nake' da'nak bian' gak chazle le'e lo baní' chie'."

**28** Zchajlto' che Benne' Criston', na' žsa'to' láže'gak yógo'te benách ka', na' žsedito' légake' len yela' žejni'il che Dios, nich gak wzeto' yógo'te benách ka' law Dios, zej nake' dot chawe' dan' zej nake' toze len Jesús, Benne' Criston'. **29** Nich gaken ki žona' žin, na' že' laža'a yejóž gona' da' ni, zkonla' žin dot yela' wak, na' yela' wnná bia', da' ka' žonn Benne' Criston' chia'.

**2** Ljéža'do' ka', žénela' nnézlele že' láže'l'i'a gona' da' gáklenen le'e len benách ka' nníta'gake' lo yež Laodisea, na' lezka' yógo'te benne' ka' bi na' l'égekple' neda'. **2** Žona' ki nich gon chocha' yógo'tele le'e nich gakle toze lo yela' nži'il, na' gata' yela' žebél chele, na' gapple dot yela' wnni'a che yela' žxen laže' da' naken li laže', da' žonn yela' žejni'il chežo. Ki žaken nich gónbial'e da' bgache' che Xažo Dios, dan' nakkzen Benne' Criston'. **3** Lo na' Benne' Criston' žebélenlžo dot yela' wnni'a che yela' žejni'il, na' yela' sina' che Dios. **4** Da' ni žapa' le'e nich bi gak no benne' gon láže'le' le'e, bennen' yénele' chejle'žo da' wen laže'. **5** La'kze zoa' zi'to' gan zoale le'e lo bela' žen chia', lo be' nakkza' žónlena' le'e toze, na' žebela' dan' ženla' že' cháwe'le, na' nakle choch kan žeje'le' che Benne' Criston'.

**6** Che len, kan wzí' lo na'le Xanžo Jesús, Benne' Criston', lezka' žala' gonle yógo'te da' gonle, zóalene' Le' le'e. **7** Kan žon to yag, zzoan lwen gže', na' lezka' kan nyas to ze'e lo lenen, le soa'len Benne' Criston'. Le soa'choch kan žeje'le' chie' Le', kan ba bsédlele. Le yé'teze Dios: "Žóxkeno!"

**Da' kobe da' nakžo dan'**  
**nakžo toze len Jesús**

**8** Le gape chi'i kwinle nich bi we'le no benne' latje gon láže'le' le'e, bennen' wkonle' žin yela' žejni'il chegak benách ka', na' diža' ka' znnázegake' zej naken dot da' li, kan nak da' žonteze žongak benách ka', na' kan nak da' žsédgakle benách ka', da' naken che yežlyó nga, na' kege da' naken xtiža' Benne' Criston'.

**9** Dot da' nakkze Dios zóalenen Benne' Criston' la'kze beyake' benách, **10** na' le'e naple dot da' nak Dios dan' nakle toze len Benne' Criston', Bennen' znnna bi'e yógo'te benne' wnná bia' ka', na' benne' ka' bi da' nzi' lo ná'gake'. **11** Nžog lo bela' chegak benne' judío, benne' byo ka', da' zloe'elen nzi' lo ná'gake' xtiža' Dios, san le'e, dan' nakle toze len Benne' Criston', zoa'len le'e da' zloe'elen Dios nzi' lo ne'e le'e, da' bi naken to da' nonen lo ni'a lo na'gak benách ka'. Benne' judío ka' zchóggake' to yiddo' chegak bi' byodo' ka', san le'e, ba nde che dot yela' benách chele da' bénlenlen dola'. Ki naken chele dan' bénlenle Benne' Criston' tzen katen' gote' le'e yag kroze. **12** Katen' bezoale le'e mis bgáche'lenle Benne' Criston' tzen lo yežw ba, na' bebánlenle-ne' tzen dan' bejle'le che Dios, len yela' wak chie' besbane' Benne' Criston' lo yela' got. **13** Zga'ale gokle le'e ka benne' gat ka' ni'a che dola' da' wbágale, na' bi wzoa'len le'e da' zloe'elen Dios nzi' lo ne'e le'e, san na'a Dios ba bene' ga zoale nbanle tzen len Benne' Criston', na' benít

lawe' chele le'e yógo'te dola' ka'  
da' wbága'le. <sup>14</sup>Dios bsole' da' ka'  
wbága'žo, da' ka' zej nyejwn le'e  
yiche lo da' bchi'le Moisés, da' ka'  
žesbága'gaken žo'o zia. Beké'e da' ka'  
wbága'žo, na' bde'en le'e yag kroze  
ka to da' wbaga' Benne' Criston'.

<sup>15</sup>Katen' got Benne' Criston' le'e  
yag krozen', beké'e yela' wnná bia'  
chegak be' xiwe' wnná bia' ka', na'  
chegak be' ka' nzi' lo ná'gaken yela'  
wak che da' xiwe', dan' bloe'ele' dan'  
zej nakkze be' xiwe' ka', na' beké'e  
yela' wnná bia' chégaken, katen'  
gote' le'e yag kroze na'.

### Žala' we' láže'žo da' naken che ya'abá che Dios

<sup>16</sup>Che len, bi we'le no benne'  
latje yesbage'e le'e zia ni'a che da'  
že'j žawle, o dan' bi žapele ža lni  
da' žápegak benne' Israel ka', da'  
žápegake' kate' zoa byo' že'n ka', na'  
ža la'y ka' chégake'. <sup>17</sup>Yógo'te da' ki  
zej naken ka to bixin che da' žala'  
gaken, na' zloé'ezegeklen da' napžo  
ni'a che Benne' Criston'. <sup>18</sup>Bi we'le  
no benne' latje gone' ga wnitle  
le'e da' žeyala' chele, bennen' žon  
byénli'e gakgak benne' ka' gaxjw  
laže', na' wka'n zéngake' wbás che  
ya'abá ka'. Znnágake' bloe'el Dios  
légake' da' ka' bi blé'egeklen', na'  
zka'n zen kwíngake' kan nak da'  
že'ze yíchjgake' lo yela' benachze  
chégake'. <sup>19</sup>No benne' žone' ki  
bi nake' toze len Benne' Criston',  
Bennen' nake' Xanžon', na' Le' zzoa  
choche' bela' žen chie', da' nakžo  
žo'o. Zwawen', na' žone' ga naken  
toze ni'a che da' zej lo žit lo bin, na'  
zgole bela' žen chie' na' kan žénele  
Dios wženen'.

<sup>20</sup>Le'e ba nátlenle Benne' Criston'  
tzen nich biž wchí'igekle da' wsedle  
ka' che yežlyó nga le'e. Biž chen'  
žonle kan ne nakle che yežlyó nga,  
na' žo'le latje zchí'igekle da' wsedle  
ka' chen le'e? <sup>21</sup>Ki znnagak da'  
wsedle ka' che yežlyó nga:

Bi wkonle žin da' ni.

Bi gawo' dan'.

Bi kano' yetó da' den.

<sup>22</sup>Yógo'te da' ki kwia yi'gaken katen'  
ba bkonlžo légaken žin. Ki zej nak  
da' ka' zchí'igekle benách ka', da'  
wsedle ka' nzi' lo ná'gake'. <sup>23</sup>Da' li,  
da' wsedle ki, žékgekle benách ka'  
zej napen yela' žejní'il. Žóngaken  
ga zloe'el kwíngake' ka benne' yodo'  
ka', na' ka benne' gaxjw laže' ka', na'  
žsaka' zí'gake' bela' žen chégake',  
san da' wsedle ki bi žáklengaken  
légake' nich gak nna biá'gake' da'  
ka' zze láže'gake' lo yela' benachze  
chégake'.

**3** Na'a, cha' le'e bebánlenle  
Benne' Criston' tzen, le we'  
laže' da' naken che ya'abá che Dios  
gan že' Benne' Criston' kwit li ža  
che Dios, gan nake' blo. <sup>2</sup>Le sa' laže'  
da' žaken ža'le, na' kege da' žaken  
yežlyó ngaze. <sup>3</sup>Naken chele ka ba  
natle, na' yela' nban chele žape chi'i  
Benne' Criston' gan zoakze Dios.  
<sup>4</sup>Le'e nbánlenle Benne' Criston' tzen.  
Kate' la' lawe' Le', naž la' lawle le'e  
tzen len Le' lo baní' chie'.

### Yela' nban gole, na' yela' nban kobe

<sup>5</sup>Che len, le gon ga kwia yi'gak da'  
zej zoažen le'e, da ka' zej naken che  
yežlyó nga, da ka' zej naken:

Da' kegle, na' da' zinnj,

na' da' zze láže'le da' kegle,

na' da' zze láže'le da' naken sban,

na' yela' zdan yela' gape.  
 Ki žala' gonle dan' no benne' zdan laže'e yela' gape nake' tlebe ka to benne' zka'n zene' lo'a ka', dan' bennen' zdan laže'en bi zdan laže'e Dios, na' bi gak wkán zene' Le' dot laže'e. <sup>6</sup>Dan' žongak benách ka' da' ki, Dios gone' zia yógo'te benne' ka' bi žóngake' kan znna xtiže'e. <sup>7</sup>Lezka' benle le'e dola' ki katen' wyo'ole lo ná'gaken. <sup>8</sup>Na'a, biž gonle da' ki:

Biž ūa'ale, na' biž gekle lježle ka' zi'.  
 Biž gonle da' zia che no benne'.  
 Biž nne xíwe'le, na' biž wchaljle da' kegle.

<sup>9</sup>Bi gon láže'le lježle tole yetole dan' ba bka'nle da' gokle zga'ale, na' da' ka' benle zga'ale. <sup>10</sup>Ba nakle le'e benách kobe ka', na' Dios žekobe' yichj lázdo'le nich yeyákžele kan nak Bennen' beyone' le'e. Ki žala' gonle nich gónbiale Le' dot kan nake' Le'. <sup>11</sup>Dan' ba nakžo toze len Benne' Criston':

Biž nakžo benne' zi'to' ka', na' benne' judío ka'.

Biž nakžo benne' ka' nžog lo bela' chégake' da' nak bian' zej nzi'e xtiža' Dios, na' benne' ka' bi nžog lo bela' chégake' dan' nak bian'.

Biž nakžo benne' ka' žejn'igekle', na' benne' ka' bi žejn'igekle'.

Biž nakžo benne' ndo'w ka', na' benne' bi zej ndo'e.

Na'a, Benne' Criston' nake' dot da' zakan', na' nake' toze len yógo'težo.

<sup>12</sup>Dios nži'il le'e, na' wžekze' le'e nich gakle che Leze'. Che len, žala': We' láže'le lježle ka', na' gakle ži'i laže', na' gaxjw laže', na' kwide' laže', na' zen laže'.

<sup>13</sup>Cha' žak diža' bizjw tole len yetole, le soele len lježle tole yetole, na' le yenít law che lježle tole yetole kan ben Benne' Criston', benít lawe' chele le'e. <sup>14</sup>Da' nakže blo ka yógo'te da' ki, žala' ži'ile yógo'te benách ka', dan' nak yela' nži'il da' žonen žo'o toze, na' li laže'. <sup>15</sup>Le we' latje da' zka'n ži yichj lázdo'žo nna bian' yichj lázdo'le. Dan' zka'n žin yichj lázdo'žo žonn Dios chežo. Che len bliže' le'e, nich gakle toze lo bela' žen che Benne' Criston'. Le ye' Dios: "Žóxkeno."

<sup>16</sup>Le si' lo na'le xtiža' Benne' Criston' da' gaken chele ka to yela' wnni'a zen. Dan' zoalen yela' žejn'i il che Dios le'e, le wsedle, na' le wzejni'ile lježle tole yetole. Dot láže'le le gol che Dios salmo ka', na' da' ka' žol-le nich we lawle Le', na' da' la'y ka' da' žol-le, na' le ye' Dios: "Žóxkeno." <sup>17</sup>Kan nak yógo'te da' žonle, da' naken da' zchaljlen o žin da' žonlen, le gon yógo'ten lo la Xanžo Jesusen', na' le ye' Xažo Dios: "Žóxkeno" dan' nak Benne' Criston' toze len le'e.

**Da' žala' gonžo che lježžo  
ka' dan' nakžo che Jesús**

<sup>18</sup>Le'e, no'le ka' nžag ná'lenle benne' byo ka', le gon kan znna xtiža'gak benne' byo che chele, kan žala' gonle, dan' nakle che Xanžon'.

<sup>19</sup>Le'e, benne' byo ka' nžag ná'lenle no'le ka', le ži'il no'le che chele, na' bi wchébele-ne'.

<sup>20</sup>Le'e, xkwide' ka', le gon kan znna yógo'te xtiža'gak xa xna'le. Da' ni žaz laže' Xanžon'.

<sup>21</sup>Le'e, nólele nakle xagak xkwide' ka', bi ttle sel-le zi'nle ka' snia, nich bi yexjw láže'gakbe.

**22** Le'e, nólele nakle benne' ndo'w ka', le gon kan znna yógo'te xtíž'a'gak benne' xanle yežlyó nga. Kégeze gonle ki katen' zwíagake' le'e kan žongak benne' ka' ženezegekle' góngake' ga chaz láže'gak benách ka', san dot láže'le le gon xchíngake' kan žala' gongak benne' ka' zžébegake' Dios.

**23** Kan nak yógo'te da' žonle, le gonen dot láže'le, dan' gaken kan žonle xchin Xanžon', na' kege kan žónzele xchingak benách ka'. **24** Ba nnézkzelele yebí'i Xanžon' chele, na' wnežjwe' chele da' ba bkwez Dios chegak benne' ka' jez nake' ka zi'nkze' ka'. Ki gaken dan' žonle xchin Xanžo Jesúš, Benne' Criston'. **25** No benne' žone' da' kegle, yebí'i Xanžon' che bennēn' kan nak da' kegle da' bene', dan' bi wchá' Dios kan žala' yebi'e che chegak benách ka'.

**4** Le'e, nólele nakle xangak benách ka', le gon da' naken chawe', na' da' naken li láže', kan zkónlele žin benne' wen žin chele ka'. Le chejsá' láže' lezka' zoa Xanle ya'abá che Dios.

**2** Le'e, yógo'tele, le wcháljlenteze Dios. Le sóateze wcháljlénle-ne', na' le yi'e: "Žóxkeno".

**3** Kate' ne zcháljlénle Dios, lezka' le nnable' gáklenle' neto', nich wnežjwe' neto' latje wchaljto' xtiža' Xanžon', nich gak wzejni'ilto' benách ka' da' ngache' kan nak che Benne' Criston'. Dan' žona' ki nyejwa' liž ya nga.

**4** lezka' le nnable Dios wnežjwe' neda' latje wzejni'ilta' benách ka' da' ngachen' kan žala' gona'.

**5** lo yela' žejní'il chele, le gon da' žonle lawgak benne' ka' bi

žejl'é'gake' che Benne' Criston'. Le wkonle binlo žin že ka' gonn Dios chele nich gonle xchine'. **6** Zala' wchaljle diža' cháwe'do' ka' nich sí'gaken benách ka', kan zží'ižo bela' zede' nich gaken dži', na' ki nnézlele kan žala' yechéble, bi da' ye'le to to benne'.

### Benách ka' che Jesús žápegake' "Padiox" ljéžgake' ka'

**7** Tíkiko wzenle' le'e da' žaken chia' nga. Nake' lježžo nži'ilžo-ne'. lezka' nake' wen žin li láže' che Xanžon', na' žónlenle' neda' tzen žin chie' le'. **8** Che len žsel'a'a-ne' gan zoale, nich wzenle' le'e da' žaken chia', na' gon choche' le'e. **9** Onésimo, lježžon' nbáblene' le'e chéjlene' le' tzen. lezka' nake' lježžo nži'ilžo-ne', na' žejli'e che Xanžon'. Chope' ki wzéngekle' le'e yógo'te da' žaken nga.

**10** Aristarko, benne' nyéjwlene' neda' tzen liž ya nga žape' le'e "Padiox." lezka' xkwide' Markos, bi' byo che no'le zan Bernabé, žápebe' le'e "Padiox." Ba goža' le'e da' žala' gonle nich gáklenle xkwide' Markos na'. Cha' la'be' gan zoale, le gape-be' ba la'ne. **11** lezka' bennen' zoe' nga, bennen' lie' Jesúš, na' zoa yetó le' Justo, žape' le'e "Padiox." Zej nnita' benne' zan, benne' judío ka', žejl'é'gake' che Benne' Criston', san chonnze' ki ladjw benne' judío ka' žónlengake' neda' tzen žin che xtiža' Dios, na' žeyón zénle'egake' neda'. **12** Epafras, bennen' nbabe' le'e, na' nake' wen žin che Benne' Criston', žape' le'e "Padiox." Dot laže' e zcháljlénle' Dios, na' žáta'yoetzele' le' gon chawe'e le'e nich gakle li

laže', na' sóatezle gonle yógo'te  
da' žénekzele Dios. <sup>13</sup>Zzoa lia' kan  
nak che Epafras na', že' laže'e le'e,  
na' lezka' benne' ka' nníta'gake' lo  
yež Laodisea, na' lo yež Hierápolis.  
<sup>14</sup> Demas žape' le'e "Padiox" na'  
lezka' Lukas, bennen' žeyone'  
benách ka', žape' le'e "Padiox" na'  
nži'ilžo-ne'.

<sup>15</sup> Le gape "Padiox" lježžo ka'  
nníta'gake' lo yež Laodisea, na'  
lezka' Ninfas len benne' ka' che  
Benne' Criston', benne' ka' zdóbgake'

liže'. <sup>16</sup>Kate' yeyóž gol-le yiche  
ni gan zoale, le gon ga gólgaken  
benách ka' che Benne' Criston'  
nníta'gake' lo yež Laodisea. Le  
gol le'e yichen' séla'gak benách  
Laodisea ka' chele. <sup>17</sup>Le ye' Arkipo:  
"Be' laže' gono' žin da' bde Xanžon'  
lo no'o."

<sup>18</sup>Neda', Pablo, zjojkza' díža'do' ni  
le'e yiche, znnia': žapa' le'e "Padiox."  
Le chejsá' laže' kan žak chia' ga  
nyejwa' liž ya ni. Znnabla' Dios gon  
chawe'e le'e. Ka'kze gaken.

# DIŽA' NEŽW DA' BSELÀ' PABLO ŁO YEŽ TESALÓNIKA

Pablo žape' "Padiox"  
benách ka' che Jesús

**1** Neda', Pablo, žapa' le'e "Padiox",  
nakle che Benne' Criston', na'  
zoale lo yež Tesalónika. Nakle toze  
len Dios, na' lezka' len Xanžo Jesúš,  
Benne' Criston'. Silbano len xkwide'  
Timoteo žón'lengake' neda' tzen.  
Znnabla' Xažo Dios, na' Xanžo Jesúš,  
Benne' Criston', gon chawee' le'e, na'  
wká'n žie' yichj lázdo'le.

**Da' nak bia' žejeľ'gak benne'**  
**Tesalónika ka' che Dios**

**2** Žé'tezto' Dios: "Žóxkeno'"  
kate' žejsá' láže'to' kan nak chele  
yógo'tele. žejsá' láže'tezto' le'e, na'  
zoa da' znnabló' Dios ni'a chele  
katen' zcháljlento'-ne'. **3** žejsá'  
láže'tezto' law Xažo Dios kan nak  
da' žonle dan' žejeľ'le che Benne'  
Criston', na' kan nak žin da' žonle  
dan' nži'ilele-ne', na' kan náktezle  
choch dan' žxen láže'le Xanžo  
Jesúš, Benne' Criston'. **4** Le'e, lježto'  
ka', Dios nži'ile' le'e, na' nnezlto'  
wžekze' Le'e le'e. **5** Ki naken dan'  
wzí' lo na'le diža' chawen', da'  
zchaljton'. Kege len diža'ze, san  
lezka' len yela' wak bžinen chele,

na' Dios Be' La'y ben chochen',  
na' dot láže'le bxen láže'len.  
Nnézkzelele kan gokto' gan zoale  
le'e dan' nži'ilto' le'e.

**6** Le'e bcha' kwinle, na' žonle  
kan žonto' neto', na' lezka' kan ben  
Xanžon', dan' wzí' lo na'le xtiže'e,  
na' la'kze wzáka'le'ele, bebelele  
dan' yo'ole Dios Be' La'y. **7** Ki naken,  
ba nakle to da' nak bian' lawgak  
yógo'te benne' ka' žejeľ'gake'  
che Benne' Criston', benne' ka'  
nníta'gake' gan nbab Masedonia,  
na' gan nbab Akaya. **8** Ki naken  
dan' wzé xtiža' Xanžon' lo na'le le'e.  
Kégeze gan nbab Masedonia, na'  
gan nbab Akaya, san lezka' yógo'te  
latje wzé diža' kan žejeľ'le che  
Dios. Ki naken, bi žon byenen bi da'  
nnato', **9** dan' la' légakze benne' ka'  
zzéngekle' neto' kan wdaple neto' ba  
la'ne, na' kan bcha' kwinle, na' wléj  
yichjle lo'a ka', na' beyakle che Dios  
nich gonle xchin Dios ban, Bennen'  
nakkze' Dios. **10** Na'a, zbezle ža yelá'  
Zi'n Dios, yežoje' ya'abá che Dios.  
Dios na'kze besbane' Le' lo yela' got.  
Benne' ni nake' Jesusen', Bennen'  
žeslé' žo'o lo dola', nich bi soa da'  
gonen ga gon Dios žo'o zia ža da'  
zan'.

**Xchin Dios da' ben Pablo  
lo yež Tesalónika**

**2** Le'e, lježto' ka', nnézkzelele žin che Dios da' benton' katen' wzóalento' le'e bi goken dáche'ze. <sup>2</sup>Nnézlele kan gok cheto' lo yež Filipos, kan wzáka'to', na' bengak benne' ka' neto' zia. Naž katen' bla'to' gan zoale le'e gokto' wechóg laže' dan' wzoalen Dios chežo neto', na' bzenlto' le'e diža' chawen' da' bde Dios lo na'to'. Ki bento' la'kze benne' wláž chele ka' bží'igake' che xtíza'to'. <sup>3</sup>Katen' bzenlto' le'e xtíza' Dios, bchaljto', kege dan' nchíxelto', na' kege dan' gónelto' si'to' bi da' den chele, na' bi ben láže'lto' le'e. <sup>4</sup>Dan' žxen laže' Dios neto', bdie' lo na'to' wchaljto' diža' chawe' chien', na' kíte'ze zchaljton'. Bi benton' nich chaz láže'gak benách ka' da' žonto' san nich chaz lažen' Dios, Bennen' zchi'a láže'e da' yo'on yichj lázdo'žo. <sup>5</sup>Nnézkzelele batkle bcháljlento' le'e da' wká'n zenen le'e, na' bi bebéj chawe' kwinto' kan žon no benne' ženele' si'e da' de chele. Nnézkzele Dios naken ki. <sup>6</sup>Bi wdiljto' yela' zen da' naken che yežlyó nga, dan' wka'nle le'e neto', na' kege da' wka'ngak benách ka' neto'. La'kze nzi' lo na'to' ye'to' le'e bi da' gonle dan' nakto' wbás ka' bsela' Benne' Criston', <sup>7</sup>wzóalento' le'e lo yela' ži'i laže', na' bento' kan žongak xna'gak bi' že'ndo' ka', no'le ka' žape chí'igake' légakbe' lo yela' ži'i laže'. <sup>8</sup>Ka' goken, bží'ile'elto' le'e, na' zejte gónelto' wdeto' lo na'le, kégeze diža' chawen' che Dios, san yeláte'ze bi goken wdekzto' lo na'le yela' nban cheto', dan' nží'i le'elto' le'e. <sup>9</sup>Žejsá'

láže'le, lježto' ka', kan goken katen' bzenlto' le'e diža' chawen' che Dios, kan béntezto' žin zede, na' lawe' ža, na' yele bento' žin nich bi wsaka' zi'to' nitole le'e.

<sup>10</sup>Le'e, lježto' ka' žejle'le che Benne' Criston', gak wzóa lile le'e kan bento', na' nnézkzele Dios kan wdálento' le'e dot kan žaz laže' Dios, na' dot cháwe'do', na' kan bi gak nitó benne' nnie' chen. <sup>11</sup>Lezka' nnézlele kan bento' kan žon to xa xkwide' ka' chegak zí'ne' ka', bcháljlento' le'e, na' ben chochto' le'e to tole. <sup>12</sup>Bsa'to' láže'le gonle kan žala' gon no benne' nake' che Dios. Lekze' bliže' le'e nich gak chazle gan znnna bi'e Le' lo baní' chie'.

<sup>13</sup>Che len lezka' že'tezto' Dios: "Žóxkeno!" Ki žonto' dan' wzí' lo na'le xtíza' Dios da' bénlele, dan' bzenlto' le'e. Wzí' lo na'len, kege ka xtíza' benachze, san kan da' li naken, xtíza' Dios naken. Xtíze'e na' žonen žin lo yichj lázdo'le le'e, le'e na' žejle'le che Benne' Criston'.

<sup>14</sup>Le'e, lježto' ka', žaken chele kan žaken chegak benách ka' che Dios, benne' ka' zej nake' che Jesúš, Benne' Criston', na' nnítalgake' gan nbab Judea. Ki naken dan' ba wzáka'le'ele lo na'gak benách wláž chele ka', tlebe kan wzáka'gake' légake' lo na'gak benách wláž chégake' ka', benne' ka' zej nake' benne' judío ka'. <sup>15</sup>Benne' judío ka' bétgake' Xanžo Jesusen', na' lezka' bétgake' benne' ka' bcháljgake' lo wláž Dios. Lezka' belbía láže'gake', na' blágkake' neto'. Bi žóngake' da' žaz laže' Dios, dan' bi zlé'egekle' chawe' yógo'te benách zí'to' ka'.

<sup>16</sup>Lezka' zséjwgake' xnezto' neto', nich bi wcháljlento' benách zi'to' ka', benne' ka' bi zej nbáblene' légake'. Ki žóngake' dan' zcháljlento' légake' nich yelágake'. Ki žaken, zzántezgake' dola' ka' da' zej nbage'e, na' ba zej nbage'e zia da' gonen ga chog Dios chégake' kwia yí'gake'.

Pablo žénele' chejwíe' lježžo  
ka' lo yež Tesalónika

<sup>17</sup>Na'a, lježto' ka', žak nyache' láže'to' kan žaken che to benne' wzebe dan' ben byene soato' zi'to' gan zoale le'e to chi'ido', san la'kze bi zle'elto' le'e, bi na' gal láže'to' le'e. Che len, žéneželto' yele'elto' le'e, dan' žak láže'le'eto' gonton'. <sup>18</sup>Che len lezka' gónelto' yidto' gan zoale, na' neda', Pablo, da' li be' laža'a yida' ga na' chope chonnie chi'i, san bsejw da' xiwe' xnezto'. <sup>19</sup>¿Bizkze da' žonen ga žxen láže'to', o da' žon ga žebelto', o da' chawe' da' žala' gapto', da' yebélenlto' law Xanžo Jesús, Benne' Criston', katen' yelé'e? ¿Kege le'ekze na'? <sup>20</sup>Le'ekze nakle da' žonen ga žak cheto' yela' ba nez zen, na' da' žonen ga žebelto'.

**3** Che len, kate' biž gok soelton', na' ben xtíza'to' ga'nto' chopto' lo yež Atenas, <sup>2</sup>na' bséla'to' bi' lježžo, Timoteo, gan zoale. Nakbe' bi' wen žin che Dios, na' zónlenbe' neda' tzen zchaljto' diža' chawen' che Benne' Criston'. Bséla'to'-be' gan zoale nich gon chochbe' le'e, na' wzejni'ilbe' le'e kan žala' chejle'le che Benne' Criston', <sup>3</sup>nich bi gak chope laže' no benne' ládjwle le'e ni'a che da' žsaka' zí'gak benách ki neto', dan' nnézkzele zoažo yežlyó nga nich soelžo da' ki.

<sup>4</sup>Lezka' katen' wzóalento' le'e, bzenlto' le'e kan za' gak chežo da' wsaka' zí'gake' ž'o kan ba goken cheto', na' nnézkzeelen. <sup>5</sup>Che len, katen' biž gok soelan', na' bsela'a xkwide' Timoteon' gan zoale nich yedjzenlbe' neda' kan nak chele, kan žeje'le che Benne' Criston', na' cha' da' xiwe', ben' žonen ga bága'gak benách ka' dola', bi bden le'e nez dola', na' cha' žin da' bentoo' gan zoale bi beyák dáche'ze.

<sup>6</sup>Kate' bezá' xkwide' Timoteon' gan zoale, na' bežinbe' ga zoato' neto' ni, bzenlbe' neto' da' chawe', dan' gožbe' neto' kan žeje'le che Benne' Criston', na' kan nží'ilele lježžo ka', na' kan lo yela' ži'i láže' chele žejsá' láže'tezle neto', na' lezka' kan žak láže'le yelé'elele neto', kan neto' lezka' žak láže'to' yele'elto' le'e. <sup>7</sup>Che len, lježto' ka', katen' wzáka'to' yógo'te da' ka', na' da' zan da' goken cheto', naž gok da' beyón zenen neto' katen' benlto' kan žeje'le le'e che Benne' Criston'. <sup>8</sup>Na'a, beyák láže'to' dan' ženlto' zoale choch lo da' žeje'le che Xanžon'. <sup>9</sup>¿Nakxkze gak ye'to' Dios: "Žóxkeno" kan žala' gonto' ni'a che yógo'te da' ka' žóngaken ga žebéle'elto' law Dios chežo ni'a che da' nakle le'e? <sup>10</sup>De chgi' žiližto' Dios, znnablto'-ne' lawe' ža, na' yele, nich gak yele'elto' le'e, nich gak wsa'to' da' žiážjelele kan nak da' žeje'le che Benne' Criston'.

<sup>11</sup>Na'a znnablto' Xažo Dios len Xanžo Jesús, Benne' Criston', ko'e neto' nez nich yidto' gan zoale.

<sup>12</sup>Lezka' znnablto' Xanžon' gone' ga gole, na' gak li laže' kan nží'ilele lježle tole yetole, na' kan nží'ilele yógo'te benách ka', kan neto' lezka'

nži'iltó' le'e. <sup>13</sup>Lezka' znnablto'-ne' gone' ga gak choch, na' dot chawé' yichj lázdo'le law Xažo Dios kan naken tlebe len da' nak la'y, na' gone' ki na' zejte ža yelá' Xanžo Jesús, Benne' Criston', tzen len benách la'y chie' ka'.

### Da' žonžo da' žaz laže' Dios

**4** Yetó da' žon byenen, lježto' ka', ni'a che Xanžo Jesusen' žáta'yoelto' le'e, na' zchí'letó' le'e nich gonle kan nak da' ba bsdelto' le'e kan žala' gonle da' žaz laže' Dios. Kan ba žonle, ka'kze žala' góntezle.

<sup>2</sup>Ba nnézkzelele da' ka' gožto' le'e gonle, dan' wnnato' lo wláz Xanžo Jesusen'. <sup>3</sup>Da' žénele Dios naken gakle che Leze', na' biž gonle da' kegle. <sup>4</sup>Nnázlele to tole kan žala' sóalenle no'le che chele kan naken tlebe len da' nak la'y, na' gapple légake' ba la'ne. <sup>5</sup>Bi žala' sóalenle no'le chele lo yela' zze laže' da' sban, kan žongak benách ka' bizej nake' che Dios, na' bizej nónbi'e Dios.

<sup>6</sup>Kan zej nak da' ki, bi žala' nitó benne' tetle gone', na' bi gon láže'le' lježe' ngáche'ze, dan' chog Xanžo na'kze chegak yógo'te benne' ka' žóngake' da' ki kwia yí'gake', dan' gone' kan ba gožto' lježto' ka', na' bzenlton' le'e. <sup>7</sup>Dios bliže' žo'o, nich biž gonžo da' kegle, na' nich gakžo dot chawé' lawe' Le'. <sup>8</sup>Ki naken, no benne' zzoe' chela'ale da' ni, kege benachze zzoe' chela'ale, san Dios na'kze zzoe' chela'ale, dan' bselá' Dios Dios Be' La'y nich sóalen'e žo'o, na' Lekze' znne' da' ni.

<sup>9</sup>Bi žon byenen wzoja' chele le'e le'e yiche kan žala' ží'ilele lježle ka',

dan' Dios na'kze ba bsdle' le'e kan žala' ží'ilele lježle tole yetole. <sup>10</sup>Da' li nži'ilele yógo'te lježžo ka', benne' ka' nnít'a'gake' gan nbab Masedonia. Na'a, žáta'yoelto' le'e, lježto' ka', nich ží'iželele yógo'te lježle ka'. <sup>11</sup>Lezka' žáta'yoelto' le'e we' láže'le kwezel cháwe'do', na' gonle da' ka' bde Dios lo na'kze, na' gonkze žin kan ba gožto' le'e žala' gonle. <sup>12</sup>Gožto' le'e ki nich gak gonle da' naken cháwe'do' lawgak benne' ka' bizej nbáblene' le'e, na' ki gaken, bi be yážjelele le'e.

### Kan gak katen' yelá' Xanžo Jesús

<sup>13</sup>Lezka', lježto' ka', žénelto' nnézlele kan nak chegak benne' gat ka', nich bi gak nyache' láže'le kan žaken chegak yezika' benách ka', benne' ka' bi žxen láže'gake' yebangak benne' gat ka'. <sup>14</sup>Cha' žeje'žo got Jesusen', na' bebane', lezka' žala' wxén láže'žo Dios, gone' ga benne' gat ka' yelá'gake' tzen len Jesusen', benne' ka' bejlé'gake' chie' Le'.

<sup>15</sup>Che len zzenlto' le'e xtiža' Xanžon' da' znnan ki: "Žo'o, benne' ka' ne zoažo nbanžo, na' nga'nžo kate' žinže ža yelá' Xanžo Jesús, Benne' Criston', bi chejchagžo Benne' Criston' zgá'aležo kate' góngaken benne' ka' ba gótgake'!" <sup>16</sup>Ki gaken dan' Xanžo na'kze žoje' ya'abá che Dios, na' yetje' nga, na' yenle chie' dan' len yela' wnná bia' wliže', na' lezka' yenle chii wbás blo che ya'abá, na' lezka' yenle lozba' na' che Dios, na' yebangak benne' ka' ba gótgake', benne' ka' bejlé'gake' che Benne' Criston'. <sup>17</sup>Naž žo'o, benne' ka' ne zoažo nbanžo, na' nga'nžo yežlyó

nga, wchise' žo'o tzen len légake' lo  
bejw ya'abá nich chejchagžo Xanžon'  
lo be'ze. Ki gaken, sóalentezžo  
Xanžon'. <sup>18</sup>Che len, le yeýón zen  
lježle tole yetole kan zej nak da' ki.

**5** Na'a, kan nak ža na' o yelen'  
katen' gakgak da' ki, bi žon  
byenen wzoja' chele le'e le'e yiche,  
lježto' ka'. <sup>2</sup>Le'e ba nnézkzelele kan  
gak ža kate' yelá' Xanžon'. Katen'  
yežine', kon yela'kze' kan zla' to  
benne' wbán žel. <sup>3</sup>Kate' nnagak  
benách ka': "Zga'n cháwe'žo, na' bi be  
gaken chežo" naž la' žinte da' wžia  
yin' légake', dan' gaken chégake' kan  
zla' da' zzaka' to no'le za' galj bi' že'n  
chie', na' bi yelá nitó benne' ladjw  
benách ka' nníta'gake' yežlyó nga  
katen' gak dan' žala' gaken. <sup>4</sup>Na'a,  
lježto' ka', bi nchol-le, na' che len  
bi žin ža na' chele ngáche'ze kan  
zla' benne' wbán. <sup>5</sup>Yógo'tele nakle  
benách ka' che baní', na' che te ža. Bi  
nakžo benách ka' che žel, na' kege  
che da' naken chol. <sup>6</sup>Che len, bi žala'  
te yele lawžo kan žak chegak benne'  
ka' bi zej nbábłene' žo'o, san žala'  
soato' ban laže', na' kwežžo cháwe'do'.  
<sup>7</sup>Benne' ka' ztágake', ztásgake'  
žel, na' benne' ka' zzóžgekle', lezka'  
zzóžgekle' žel. <sup>8</sup>Na'a, žo'o nakžo che  
te ža, na' žala' kwežžo cháwe'do',  
dan' ba nákwžo zažo da' žape chi'in  
žo'o, da' naken yela' žejlé' che Dios,  
na' yela' nži'il, na' da' žxen laže'žo  
yelažo naken ka to lapa' ya da' žape  
chi'in yichjžo. <sup>9</sup>Ki naken dan' bzoa  
Dios žo'o nga, kege nich lažo gan  
choge' chežo gatžo, san nich yelažo  
dan' žxen laže'žo Xanžo Jesús, Benne'  
Criston', <sup>10</sup>dan' got Jesusen' lo wlazzó  
žo'o nich soažo nbanžo tzen len  
Le' katen' yelé'e, la'kze ba natžo o

soažo nbanžo ža na'. <sup>11</sup>Che len žala'  
wsá' láže'le lježle tole yetole, na' gon  
chochle lježle tole yetole kan ba  
žonle.

**Pablo zzejni'ile' lježe' ka'  
žejlé'gake' che Jesús**

<sup>12</sup>Žáta'yoelto' le'e, lježto' ka', si'  
lo na'le benne' ka' žóngake' xchin  
Xanžon' gan zoale le'e, benne' ka'  
znna biá'gake' le'e lo wláz Xanžon',  
na' zzejní'igekle' le'e. <sup>13</sup>Lezka'  
žáta'yoelto' le'e, gaple légake' ba  
la'ne lo yela' nži'il chele, dan'  
žóngake' žin na'. Le ga'nlen lježle ka'  
cháwe'do' tole yetole.

<sup>14</sup>Lezka' zzejni'iltó' le'e, lježto' ka',  
nich wsá'le láže'gak benne' ka' bi  
žóngake' žin, na' gon chochle benne'  
ka' žedó láže'gake', na' gáklenle benne'  
ka' bi nak choch kan žejlé'gake' che  
Benne' Criston', na' žala' gakle gaxjw  
laže' lawgak yógo'te benách ka'.

<sup>15</sup>Le gape chi'i kwinle nich bi  
yebéj láže'le lježle ka', na' bi be  
yebí'ile che no benne' bi da' gone'  
chele, san le we' laže' góntezle da'  
naken chawé' che lježle tole yetole,  
na' chegak yógo'te benách ka'.

<sup>16</sup>Le yebétezle, <sup>17</sup>na' le  
wcháljlenteze Dios, <sup>18</sup>na' le yi'e  
Le': "Žóxkeno." Ki žala' gonle ni'a  
che yógo'te da' žaken chele, dan' zej  
nak da' ki da' žénele Dios gonle dan'  
nakle che Jesús, Benne' Criston'.

<sup>19</sup>Bi wzóa žile da' zchi'le Dios Be'  
La'y le'e, <sup>20</sup>na' bi wzoale chela'ale  
xtiža' no benne' zchaļje' lo wláz  
Dios, <sup>21</sup>san le si' bia' yógo'ten. Le si'  
lo na'le da' naken chawé', <sup>22</sup>na' bi be  
gonle da' kegle.

<sup>23</sup>Dios na'kze, Bennen' zka'n žie' yichj  
lázdo'žo, gone' ga gakle dot chawé', na'

gape chi'e be' nákkzele, na' yichj lázdo'le, na' bela' žen chele, na' bi gak nitó benne' bi da' nnie' chele ža na' yelá Xanžo Jesús, Benne' Criston'. <sup>24</sup>Dios žone' kan znné', na' nake' Bennen' bliže' le'e. Lekze' gone' da' ki.

**Pablo zgo'e lježe' ka' lo na' Dios**

<sup>25</sup>Le'e, lježto' ka', le wchaljlen Dios, na' le nnable' gáklene' neto'.

<sup>26</sup>Le gape "Padiox" yógo'te lježžo ka', na' le chela' légake' lo yela' nži'il chele.

<sup>27</sup>Ni'a che Xanžo Dios zchi'la' le'e gol-le yiche ni lawgak yógo'te lježžo ka' zej nake' che Benne' Criston'.

<sup>28</sup>Znnabla' Xanžo Jesús, Benne' Criston', gon chawe'e le'e. Ka'kze gaken.

# DIŽA' BEŽOPE DA' BSELĀ' PABLO ŁO YEŽ TESALÓNIKA

Pablo žape' "Padiox"  
benách ka' che Jesús

**1** Neda', Pablo, žapa' le'e "Padiox."  
Nakle che Xažo Dios, na' che Xanžo Jesús, Benne' Criston', na' zoale lo yež Tesalónika. Žónlengak Silbano, na' xkwide' Timoteo neda' tzen. <sup>2</sup>Znnablto' Xažo Dios len Xanžo Jesús, Benne' Criston', gon chawe' le'e, na' wká'n zie' yichj lázdo'le.

Dios choge' chegak benách  
dola' ka' gátgake'

<sup>3</sup>Žala' yé'tezto' Dios: "Žóxkeno" kan nak chele le'e, lježto' ka', na' nak chawe' gonto' ki, dan'zej žakže dot li laže' kan žeje'le che Dios, na' kan nží'ilele lježle tole yetole. <sup>4</sup>Che len, len yela' žebél zzenlto' benách ka' che Diosen' kan nak chele, dan' nakle zen laže', na' žeje'le che Dios la'kze želbía laže'gak benne' ka' le'e, na' zzáka'le'ele, san zzóelelen. <sup>5</sup>Da' ki jez nak bian' nak chawe' kan zchi'a laže' Dios benách ka'. Žwi'e latje zzáka'le le'e na'a, nich gak chazle gan znnna bi'e Le'.

<sup>6</sup>Nak chawe' kan gon Dios, yebi'e chegak benne' ka' zsaka' zí'gake'

le'e, na' gone' ga sáka'gak benne' ka'. <sup>7</sup>Yetó da' gaken, le'e zzáka'le na'a, na' yebí'i Dios chele, gone' ga yeži' laže'le tzen len neto', ža na' yelo'e law Xanžo Jesús, Benne' Criston'. Yežoje' ya'abá che Dios, na' gónlengak wbás che ya'abá ka' Le' tzen. Zej nake' ni'a ne'e ka', na' wloé'egakle' law yela' wak zen chie'. <sup>8</sup>La' law Benne' Criston' ža na' ka to yi' zen katen' yebi'e chegak benne' ka' bi zej nónbi'e Dios, na' bi žóngake' kan znnna diža' chawen' che Xanžo Jesús, Benne' Criston'. <sup>9</sup>Benách ki, yebi'e chégake', na' to chi'ize chejchó'ogake' lo yi' gabíl. To chi'ize kwásgake' law Xanžon', na' gan nla' law yela' baní' chie', na' yela' wak zen chie'. <sup>10</sup>Ki gaken ža na' katen' yelé'e, na' wká'n zengak benách la'y chie' ka' Le', na' yógo'te benne' ka' žejlé'gake' chie' Le' yebán laže'gakle chie'. Lezka' gonle le'e dan' bejle'le da' bzenlto' le'e kan nak che Jesusen'.

<sup>11</sup>Che len zcháljlentezto' Dios chežo, na' znnablto'-ne' gon chawe' le'e, na' gáklen' le'e nich sáke'lele si'le dan' bliže' le'e nich yebélenlelen. Lezka' znnablto'-ne' gone' ga gak dot li laže' yógo'te da'

že' láže'le gonle da' naken chawe', na' yógo'te žin žonle lo yela' žejlé' chele chie' Le'. Gak gonle da' ki len yela' wak che Dios. <sup>12</sup>Ki gaken, ga'n zen la Xanžo Jesúš, Benne' Criston' ni'a che da' žonle le'e, na' gak chele yela' ba nez zen ni'a che da' gone' Le'. Gaken ki dan' nž'il Dios le'e tzen len Xanžo Jesúš, Benne' Criston'.

### La' law benne' yoe'e da' xiwe'

**2** Na'a, kan nak che ža na' katen' yelá' Xanžo Jesúš, Benne' Criston', na' kan gak, yedjtobe' žo'o chie' Le', žáta'yoelto' le'e, lježto' ka', <sup>2</sup>nich bi we'le latje no benne' wchixé' le'e kan nak da' wzí' lo na'le. Bi kwek zede yichj lázdo'le ni'a che bi da' nnagak benne' wen laže'ka', cha' nnázegake' zoalen Dios Be' La'y légake', o ni'a che bi da' gon chochgak benách ka', o ni'a che bi da' nyejw to le'e yiche da' mnágake' neto' bséla'ton', cha' nnágake': "Ba wdé ža na' kate' yelá' Xanžon'." <sup>3</sup>Bi we'le latje no benne' gon láže'le' le'e, dan' bi žin ža na' kate' yelá' Jesusen' cha' bi la' lawgak benne' zan zga'ale, benne' ka' wzí'igake' che Dios, na' la' law bennen' yoe'e da' xiwe', bennen' wsé Dios lo yí' gabíl. <sup>4</sup>Bennen', lo yela' zka'n zen kwine', wszejwe' xnezzgak, na' wzí'e chegak yógo'te da'zej naken che Dios o da' zka'n zengak benách ka' lo yela' žape Dios ba la'ne chégake'. Ki gon bennen' na' zejte kwi'e ka Dios na'kze lo yodo' gan zoa latje che Dios, na' gon kwine' ka Dios.

<sup>5</sup>Bi žejsá' láže'le bzenla' le'e da' ki katen' wzóalena' le'e? <sup>6</sup>Na'a, nnézlele no Benne' žsejwe' xnez

bennen' yoe'e da' xiwe', nich bi la' lawe' zga'ale kate' žinže ža chien'. <sup>7</sup>Ba žon žin da' ngache' che da' naken che da' xiwe', san ne zoa Bennen' žsejwe' xnez bennen' yoe'e da' xiwe' ga žinže ža yekwás kwin Bennen' žsejwe' xneze'. <sup>8</sup>Naž la' law benne' yoe'e da' xiwe', na' Xanžo Jesúš, Benne' Criston', wléj wchochje' le' len be' da' zžojen žoe'e, na' wzí'a yi'e le' len yela' baní' che ža yelé'e. <sup>9</sup>Katen' la' law bennen' yoe'e da' xiwe', len yela' wak che da' xiwe' la' lawe'. Len yela' wak che da' wen laže' gone' da' zan yela' wak zen, na' da' zan da' gak biá'gaken, na' da' zan da' góngaken ga yebángekle benách ka'. <sup>10</sup>Len yela' wak che da' wen laže' gone' ki lawgak benne' ka' kwia yí'gake' dan' bi wzí' lo ná'gake' dot láže'gake' da' naken dot da' li, nich yelágake'. <sup>11</sup>Che len Dios we'e latje gaken chégake' to da' žonen yela' wak da' gon láže'len légake' nich chejlé'gake' da' wen lažen'. <sup>12</sup>Ki gaken nich bága'gak zia yógo'te benne' ka' bi bejlé'gake' da' naken dot da' li, san wyáz láže'gake' da' kegle.

### Benne' ka' wžekze Dios nich yelágake'

<sup>13</sup>Le'e, lježto' ka', na' nž'il Xanžon' le'e, žala' yé'tezto' Dios: "Žóxkeno" ni'a che da' naken chele, dan' ba wžekze Dios le'e ža ni'te nich yelale ni'a che da' žon Dios Be' La'y, nich gakle dot chawe' law Dios, dan' žejlé'le da' naken dot da' li. <sup>14</sup>Nich gaken ki chele, Dios na'kze bliže' le'e, nich gak gónlenle Xanžo Jesúš, Benne' Criston' tzen lo baní' chie'. Ki gaken ni'a che diža' chawen' da' zchajlton'.

<sup>15</sup>Che len, lježto' ka', le soa choch, na' le gape chi'i diža' da' bséidle, dan' bcháljlento' le'e, na' bzojton' chele le'e yiche. <sup>16-17</sup>Znnablto' Xanžo Jesús, Benne' Criston' len Xažo Dios, gon chawe'e le'e, na' gone' ga gakle choch kan zej nak yógo'te da' zej naken chawe', da' ka' žonle, na' kan zej nak yógo'te diža' chawen' da' zchaljle. Lekze' nži'ile' žo'o, na' benne' chežo da' žeyón žénteze žo'o, na' da' zej naken chawe' da' žxen láže'žo si'žo, da' ka' gonnze Dios chežo.

### Da' žala' nnablžo Dios

**3** Yetoze, lježto' ka', le wchaljlen Dios, na' le nnable' gákłene' neto', nich gak wchaljto' che Benne' Criston' nga, nich se xtiža' Xanžon', na' gápegak benách ka' dižan' ba la'ne, na' nich gaken nga kan goken gan zoale le'e. <sup>2</sup>Lezka' le nnable' yeslé' neto' lo na'gak benne' wen da' zinnj ka', dan' bi žežle'gak yógo'te benách ka' che Dios. <sup>3</sup>Na'a, dan' žon Xanžon' kan znnne', gon choche' le'e, na' gape chi'e le'e, nich bi cho'le le'e lo na' da' xiwe'. <sup>4</sup>Žxen láže'to' Xanžon' kan nak chele, gonle da' ki da' ba wnnablto' le'e, kan ba žonlen. <sup>5</sup>Znnablto' Xanžon' wsé'e láže'le nich žf'ižezele Dios, na' gakle zen láže' kan gok Benne' Criston'.

### Kan žon byenen gonžo žin

<sup>6</sup>Ni'a che la Xanžo Jesús, Benne' Criston', zchí'leto' le'e, lježto' ka', nich kwasle gan zej nnita' lježžo ka' kon želdaze' bi be žin žóngake'. Le gon kan nak da' bsedlto' le'e. <sup>7</sup>Nnézkzelele žala' gonle kan žonto' neto', dan' bi wdázeto' bi be žin

žonto' neto' gan zoale. <sup>8</sup>Bi bdawto' da' bénnzele cheto', san lo yela' že' zede, na' lo yela' žedó laže', bento' žin lawe' ža, na' yele, nich bi wsaka' zi'to' nitole le'e. <sup>9</sup>Ki bento' nich gakto' lawle le'e ka to da' zlo'e'elen le'e kan žala' gonle le'e, la'kze nzi' lo na'to' nnablto' le'e bi da' gonle cheto'. <sup>10</sup>Lezka' katen' wzóalento' le'e, bchi'leto' le'e ki, da' znnan: "Cha' bi žénele no benne' gone' žin, bi gonnle da' gawe!." <sup>11</sup>Kíte'ze znnato' dan' ženltó' nnítalengak benne' ka' le'e, benne' ka' kon želdaze', bi be žin žóngake'. <sup>12</sup>Ni'a che Xanžo Jesús, Benne' Criston', zchí'leto' benne' ka' žóngake' ki, na' zzejni'ilto' légake' góngake' žin lo yela' zbez chawé'do', nich gak gáwgake' da' naken chégakkze'.

<sup>13</sup>Na'a, lježto' ka', bi soa žile, góntezle da' nak chawe'. <sup>14</sup>Cha' no benne' bi gone' kan znnna xtíža'to', da' zzojto' le'e yiche ni, le gon ga gak bia' bennen', na' bi góñlenle le' tzen nich yedoe'ele'. <sup>15</sup>Bi žala' géklele nake' benne' bi zle'ele' le'e chawe', san le wsá' láže'e le'e ka lježkzle.

### Pablo znnable' Dios gon chawe'e lježe' ka'

<sup>16</sup>Znnablto' Xanžon' wká'n žíteze' yichj lázdo'le lo yógo'te da' žonle, na' sóalene' yógo'tele. Lekze' zzoa žie' yichj lázdo'žo.

<sup>17</sup>Neda', Pablo, len na'kza' zzoja' da' ni le'e yiche: žapa' le'e "Padiox" na' naken to da' nak bian' yógo'te yiche ka' žsel'a'a. Kíte'ze zzoja' le'e yiche. <sup>18</sup>Znnabla' Xanžo Jesús, Benne' Criston', gon chawe'e yógo'tele le'e. Ka'kze gaken.

# DIŽA' NEŽW DA' BSELÀ' PABLO CHE XKWIDE' TIMOTEO

Pablo ži'e "Padiox" xkwide' Timoteo

**1** <sup>1-2</sup>Neda', Pablo, Žapa' le'  
"Padiox" ljéža'do' Timoteo.  
Nako' ka zi'nkza' dan' bénleno' neda'  
tzen žin che Dios. Naka' wbás bselà'  
Jesús, Benne' Criston' dan' naken  
da' wnnakze Dios, Bennen' žesl'é'  
žo'o, na' lezka' da' wnnakze Xanžo  
Jesús, Benne' Criston', Bennen' žxen  
ljáže'žo. Znnabla' Xažo Dios len  
Xanžo Jesús, Benne' Criston', lo  
yela' ži'i laže' chie' gon chawe' le',  
na' yeyache' ljáže'le' le', na' wkán' žie'  
yichj lazdo'o.

Pablo zchalje' che da' žsédgekle  
benne' wen laže' ka'

<sup>3</sup>Žáta'yoela' le' gono' na'a kan  
góta'yoela' le' katen' wyá'a gan nbab  
Masedonia, nich ga'no' lo yež Éfeso,  
na' wchi'lo' bałe benne' ka' ga na'  
nich bi wsédgekle' to da' nyalen, <sup>4</sup>na'  
nich bi gápegake' ba la'ne diža' ka'ze  
ka', na' lagak da' zan kwe' xá xto'gak  
benách ka', da' ka' žóngaken ga že'  
ljáže'gak benách ka' da' dáche'ze. Da'  
ki bi žon chóchgaken benách ka'  
che Dios lo da' žejl'é'gake' chie' Le'.

<sup>5</sup>Da' žénela' gon da' ni da' žapa'  
le', naken nich ží'igekle lježjo ka'

ljéžgake' ka' dot láže'gake', na' gak  
chawe' da' zza' láže'gake', na' gak  
dot li laže' kan žejl'é'gake' che Dios.  
<sup>6</sup>Kan zej nak da' ki, bałe benne' ka'  
bi bezójgake' chawe', san wyó'ogake'  
nez yoble, na' nzi' lo ná'gake' da' bi  
naken da' li. <sup>7</sup>Ženegekle' wsédgekle'  
benách ka' kan zej nak da' žsadle da'  
wnnakze Dios, la'kze bi žejn'igekle'  
da' ka' znnázegake', na' da' žon  
chóchgake'.

<sup>8</sup>Žo'o nnezlžo da' wnnakze Dios  
naken chawe', cha' zkonlžon žin kan  
žala' gonžo. <sup>9</sup>Lezka' nnezlžo Dios  
bdixjwe' da' wnnakze', kege nich  
nna bian' benách chawe' ka', san  
nich nna bian' benne' ki:

Benne' ka' zží'igake' che xtiža'  
Dios,  
benne' ka' bi žóngake' da' bsedle'  
Le',  
benne' ka' zzóagake' Dios chelá'ale,  
benne' ka' žóngake' da' zinnj,  
benne' ka' bi zka'n zéngake' Dios,  
benne' ka' zká'ngake' ka'ze da'  
naken che Dios,  
benne' ka' žótgake' xá xná'gake',  
benne' ka' žótgake' benách ka',  
<sup>10</sup>benne' ka' žóngake' da' kegle,  
benne' byo ka' nníta'lengake' la'  
ljež benne' byoze' ka',

benne' ka' zbángake' xkwide' ka'  
 nich góte'gake' légakbe',  
 benne' ka' žon láže'gake',  
 benne' ka' žon chóchgake'  
xtíža'gake' kate' žon láže'gake',  
 benne' ka' zží'igake' che da'  
 chawe' da' žsedlžo.

<sup>11</sup>Nnezlžo naken ki dan' bžin  
 diža' chawen' chežo, da' benn Dios,  
 Benne' la'y, chežo lo yela' ū'i láže'  
 chie', dan' bdie' lo na'a wchaljan.

### Pablo ū'e Benne' Criston': "Žóxkeno"

<sup>12</sup>Žapa' Xanžo Jesúš, Benne'  
 Criston', Bennen' žon choche' neda':  
 "Žóxkeno" dan' bxen laže'e neda', na'  
 bzoe' neda' nich gona' xchine'. <sup>13</sup>Ki  
 bene' la'kze neda' wnné zi'a chie'  
 zga'ale, na' wžia' laža'a benách chie'  
 ka', na' da' zan da' zia bena' chégake',  
 san Benne' Criston' beyache' láže'le'  
 neda', dan' benan' lo yela' bi žejní'l  
 chia' katen' bi na' chejli'a chie' Le'.  
<sup>14</sup>Na'a, da' zenle'e nak da' bnežjw  
Xanžon' chia' lo yela' ū'i láže' chie',  
 dan' žonen ga žejle'žo chie' Le',  
 na' lezka' žonen ga nž'ilžo Jesúš,  
 Benne' Criston'.

<sup>15</sup>Diža' dot da' li da' ni, da' zakan'  
 si' lo na'gak yógo'te benách, na'  
 znnan: "Jesúš na'kze, Benne'  
 Criston', ble'e yežlyó nga nich beslé'  
 benách dola' ka'" na' beslé' neda'  
la'kze nakža' neda' benne' dola' ka'  
 yógo'te benách yezika' ka'. <sup>16</sup>Che len  
 beyache' lažel' Jesúš, Benne' Criston',  
 neda', benne' dola', na' blo'e'ele' law  
 kan nak yela' zen láže' zen chie',  
 nich gaka' to da' zloe'elen benách ka'  
 kan gata' yela' nban da' zejlí kanne  
chégake', cha' chejle'gake' chie' Le'.  
<sup>17</sup>Na'a znna': iGa'n zen Dios! iLe'  
 znna biá'teze', na' batkle te chie'! Bi

gak le'elžo-ne'. Nake' tlícha'tekze  
 Dios, Bennen' nnézkzele' yógo'te.  
 iChie' Le' gáktele yela' žape ba la'ne,  
 na' yela' zen, na'a ža, na' yógo'te ža  
 da' zá'gaken! Ka'kze gaken.

<sup>18</sup>Zí'na'do' Timoteo, zdia' lo no'o  
 le' da' ni da' žedla' nich gono' xchin  
 Dios ka to benne' dot laže'e žeje' lo  
wdile, ka zej nak da' ka' wnnagak  
 benne' ka' zga'ale kan gak chio',  
 benne' ka' bcháljgake' da' blo'e'el  
 Dios légake'. <sup>19</sup>Lo yela' žejlé' chio'  
 che Benne' Criston' žala' gono' ki,  
 nak dot chawe' yichj lazdo'o, dan'  
 ba bchíxgekle bałe benách ka',  
 benne' ka' bzóagake' da' žejle'žo  
 che Benne' Criston' cheła'ale'. <sup>20</sup>Ki  
 bengak Himeneo len Kantr, benne'  
 ka' bdia' lo na' da' xiwe' nich  
 wsédgekle' kan žala' góngake', nich  
 biž nne zí'gake' che da' naken che  
 Dios.

### Da' žedlen žo'o kan žala' wcháljlenžo Dios

**2** Che len da' naken blo da'  
zzejni'ila' benách ka' naken  
 kan žala' wcháljlenžo Dios, na' kan  
žala' gáta'yoelžo Le', na' kan žala'  
nnablžo-ne' bi da' žiáželžo, na' kan  
žala' yežo-ne': "Žóxkeno!" Da' ki žala'  
 gonžo lo wlazgak yógo'te benách  
 ka'. <sup>2</sup>Lezka' žala' gonžo lo wlazgak  
 benne' wnná bia' ka', na' lo wlazgak  
 yógo'te benne' blo ka'. Ki žala' gonžo  
 nich gak chawe' chežo, na' nich gak  
 kwežžo cháwe'do'. Žala' gonžo ki  
lo yela' žejlé' chežo che Dios, na' lo  
yela' li láže' chežo. <sup>3</sup>Da' ni naken  
 chawe', na' da' žaz láže' Dios, Bennen'  
 žeslé' žo'o. <sup>4</sup>Dios na'kze žénele'  
 yelagak yógo'te benne' ka', na' žénele'  
 gónbia'gake' da' naken dot da' li.

<sup>5</sup>Toze Benne' nake' Dios, na' toze Benne' žeyone' benách ka' toze len Dios, Jesús, Benne' Criston', Bennen' golje' benách. <sup>6</sup>Lekze' bde kwine' lo yela' got, katen' besbaga' kwine' da' zia da' wbága'gak yógo'te benách ka' ni'a che dola' da' wbága'gake'. Dios bloe'ele' law kan gok da' ni che Jesusen' katen' bžin ža chie' gote'. <sup>7</sup>Kan nak da' ni, Dios bzoe' neda' nich wchaljan', na' nich gaka' wbás bsela' Benne' Criston', nich wsedla' benách zi'to' ka' kan nak da' žejle'žo chie' Le', na' kan nak da' naken dot da' li. Zhalja' da' li, na' bi žon laža'a.

<sup>8</sup>Na'a, žénela' wcháljlengak benne' ka' Dios, na' gáta'yoegakle' Le' gáte'ze, zej nake' dot chawe', na' bi zžá'agake' ljéžgake' ka', na' bi zdil díža'gake'. <sup>9</sup>Lezka', žénela' gákwgak no'le ka' da' naken binlo. Da' zej nak xtan da' žala' wloé'egekle' law zej naken yela' gaxjw laže', na' yela' nak li laže', na' kege da' zpá'gake' yichj láwgake', na' da' ka' zej naken oro, na' bga ka', na' laže' da' záka'le'en. <sup>10</sup>Da' chawe' da' žóngake' wloé'elen da' zej nake', kan žon da' žákwgake' da' naken binlo. Ki žala' gongak no'le ka' zej nónbi'e Dios. <sup>11</sup>Žala' ga'ngak no'le ka' žize kate' no benne' byo ne žsedle' légake', na' gákgake' gaxjw laže'. <sup>12</sup>Bi žonna' no'le ka' latje wsédgekgle', na' bi nna biá'gake' benne' byo ka'. Žala' gángake' žize gan zej ndobe benách ka' che Benne' Criston'. <sup>13</sup>Ki žala' gaken dan' bzoa Dios zga'ale Adán, na' wdé na' bzoe' Eba. <sup>14</sup>Adán na', bi ben láže'le da' xiwe' le', san zo'len', ben láže'len le'. Ka' goken, bži'i no'len' che da' bchi'lekze Dios légake', <sup>15</sup>san yelá

no no'le cha' znnite'e xkwide' ka', na' cha' gónteze' kan nak tlebe len da' žejle'žo che Dios, na' gonen' len yela' nži'il, na' cha' gake' dot chawe', na' dot li laže'.

**Kan žala' gakgak benne'**  
**ka' žape chí'igake' žo'o**

**3** Nak dot da' li dižan' dan' znnan: "Cha' že' laže' to benne' gake' benne' žape chi'e benách ka' che Benne' Criston', zdan laže'e to žin chawe!." <sup>2</sup>No benne' žape chi'e benách ka' che Benne' Criston':

Žon byenen bi soa no benne' gak bi da' nnie' chie'.

Žala' soa toze zo'le.

Žala' gake' ban laže'.

Žala' gake' dot li laže'.

Žala' gake' gaxjw laže'.

Žala' wi'e latje gan ga'ngak lježžo ka' žíngake' liže'.

Žala' sáke'le' wsedle' benách ka'.

<sup>3</sup> Bi žala' gake' benne' že'je'.

Bi žala' gake' benne' snia.

Bi žala' dan láže'ze' si'e mežw.

Žala' gake' ži'i laže'.

Žala' gake' zen laže'.

Žala' gake' benne' bi zdan laže'e yela' gape.

<sup>4</sup> Žala' nna bi'e cháwe'do' benách ka' nníta'gake' liže'.

Zí'ne' ka' žala' góngakbe' kan znna xtiže'e.

Žala' gápegakbe' xágakben' ba la'ne.

<sup>5</sup>(Nakxkze gak to benne' gape chi'e benách ka' che Dios cha' bi žak nna bi'e cháwe'do' benách ka' nníta'gake' liže'?) <sup>6</sup>Bi žala' gake' benne' la' wzó lawtie' nake' tzen len Benne' Criston', nich bi tetle wkán zen kwine', na' bi gak chie' kan gok

che da' xiwe', dan' bka'n zen kwinen, na' Dios bchoge' chen kwia yin'.

<sup>7</sup> Benne' ka' bizej nbáblene' benách ka' che Benne' Criston', žala' nne cháwe'gake' chie' nich bi soa no benne' wzóe' le' chełla'ale, nich bi chejžeje' lo yelj che da' xiwe'.

### Kan gakgak benne' ka' nzi' lo ná'gake' gákłengake' žo'o

<sup>8</sup> Lezka' benne' ka' nzi' lo ná'gake' gákłengake' benách ka' che Benne' Criston':

Žala' gákłengake' dot li laže'.  
Žala' góngake' kan znnágake'.  
Žala' gákłengake' benne' bi že'j ka'.  
Žala' gákłengake' benne' ka' bi zdángake' yeła' gape.

<sup>9</sup> Žala' gape chí'igake' da' žejele'žo che Benne' Criston'.  
Žala' gak dot chawe' yichj lázdo'gake'.

<sup>10</sup> Žala' si' bia'le lęgake' zga'ale, na' naž si' lo ná'gake' gákłengake' benne' ka' gákłengake' benách ka' che Benne' Criston', cha' bi zoa no benne' gak bi da' nnie' chégake'.

<sup>11</sup> Lezka', no'le che chégake' žala' gákłengake' dot li láže'gake', na' bi gákłengake' benne' wenné che lježe'.  
Žala' gákłengake' zen laže', na' gákłengake' dot chawe' lo yógo'te da' žóngake'.

<sup>12</sup> Benne' ka' nzi' lo ná'gake' gákłengake' benách ka' che Benne' Criston':

Žala' soa toze no'le che chégake'.  
Žala' nna biá'gake' binlo zi'ngake' ka', na' benne' ka' nnita'gake' lížgake' ka'.

<sup>13</sup> Žon byenen gaken ki, dan' nzi' lo ná'gake' latje gan gápegak benách ka' xtíža'gake' ba la'ne, cha' žóngake' binlo žin da' žóngake' žákłengake'

benách ka' che Benne' Criston', na' gákłengake' benne' wechóglaze' kate' zcháljgake' kan nak da' žejele'žo che Jesús, Benne' Criston'.

### Da' bgache' che da' zka'n zenžo Dios

<sup>14</sup> Zzoja' diža' ki chio' le', la'kze žxen laža'a yedjwia' le' bayente.

<sup>15</sup> Cha' wžela', zzoja' da' ki chio' nich nnezlo' kan žala' gono' lawgak benách ka' nnita'gake' liž Dios, benne' ka' zej nake' che Dios ban, na' zej nake' choch, na' zcháljgake' da' naken dot da' li. Zej nake' ka yag ka' da' zóxgaken yo'o, na' ka da' ka' žon chóhgaken ze'e. <sup>16</sup> Da' li, zenle'e nak da' bgache' che da' zka'n zenžo Dios, kan nyejw le'e yiche da' znnan:

Dios bloe'e lawe', na' goke' benách.

Gok bia' nake' chawe' dan' wyo'e Dios Be' La'y.

Blé'egekle wbás ka' che ya'abá che Dios Le'.

Wzé diža' kan nak chie' lawgak benách zi'to' ka'.

Bejle'gak benách ka' chie' Le' lo yežlyó nga.

Dios bchise' Le' ža'le gan nake' blo.

### Benne' ka' kwej yíchjgake' da' žejele'žo che Jesús

**4** Kwáselo zchalj Dios Be' La'y, znnne': "Ža ze lawte ža ka' bale benách ka' wži'igake' che Benne' Criston!" Kwej yíchjgake' da' žejele'žo chie' Le'. Wzé nággake' xtíža'gak benne' ka' yó'ogake' be' wen laže' ka', na' wzé nággake' da' wsédgekle be' xiwe' ka'. <sup>2</sup> Wzé nággake' xtíža'gak benách ka' zloé'ezele chawe'

kwíngake', benne' ka' zcháljgake'  
da' wen laže'. Ba nzid lázdo'gake'  
nich bi yesbagan' légake' zia. <sup>3</sup>Ki  
naken, wséjwgake' xnezgak benne'  
ka' žénegekle' wchág ná'gake', na'  
wchí'igekle' benách ka' nich bi  
gáwgake' da' bnezjw Dios nich  
yebélenlzon, da' gak gawgak benne'  
ka' żejlé'gake' che Dios, benne' ka'  
zej nónbi'e da' naken dot da' li,  
na' žé'gake' Dios: "Žóxkeno" kate'  
žáwgaken'. <sup>4</sup>Chawe' jez nak yógo'te  
da' ben Dios, na' bi be žala' wzoažo  
cheła'ale cha' žežo Dios: "Žóxkeno"  
kate' žawžon. <sup>5</sup>Zsedle xtiža' Dios  
žo'o, Le' yeyone' chawe' yógo'te da'  
žala' gawžo cha' wcháljlenžo-ne', na'  
nnablžo-ne' gon chawe'e da' gawžo.

### Kan žežój chawe' benne' wen žin che Jesús

<sup>6</sup>Cha' wsedlo' lježžo ka' da' ki,  
na' yežojo' chawe', na' gako' benne'  
wen žin li laže' che Jesús, Benne'  
Criston', na' gak bia' nsedlo' binlo  
kan nak che da' żejle'žo chie' Le', na'  
kan nak da' chawe' da' zsedlžo, da'  
žape chi'on. <sup>7</sup>Bzoa cheła'ale diža'  
ka'ze ka' che yežlyó nga kan zej nak  
da' zchaljgak no'le gole ka'. Bénteze  
da' gonen ga gako' choch nich gono'  
kan žénele Dios. <sup>8</sup>Láte'ze yebélenlo'  
da' gono' da' gonen ga gakže wale'  
ni'a no'o, san da' zen da' yebélenlo'  
da' gono' nich gako' wale' lo da'  
naken che Dios. Da' ni naken da'  
yebélenlžo yežlyó nga, na' lezka' da'  
yebélenlžo ža ka' te yezažo yežlyó  
nga. <sup>9</sup>Diža' ni naken dot da' li, na'  
zakan' si' lo ná'gaken yógo'te benách  
ka'. <sup>10</sup>Che len, da' zenle'e zsaka' zi'  
kwinžo žonžo žin, dan' ž xen láže'žo  
Dios ban. Benne' Criston' gote' nich

yeslé' yógo'te benách ka'. Žeslé'  
benne' ka' żejlé'gake' chie' Le'.

<sup>11</sup>Bchi'le, na' bsedle benách ka'  
nich góngake' da' ki. <sup>12</sup>Bi žala'  
no benne' wzóe' le' cheła'ale dan'  
nako' xkwide', san žala' gono' da'  
wloe'elen benne' ka' żejlé'gake' che  
Dios žala' góngake' kan žono' le'. Ki  
wloe'elo' légake':

Len da' zchaljo', na' len da' žono',  
kan nži'ilo' lježo' ka', na' kan yo'o  
Dios Be' La'y,  
kan žono' kan znno', na' kan  
nako' dot chawe'.

<sup>13</sup>Kate' ne zbezo' na'zejte la'a neda'  
gan zo', be' láže'zeze golo' yiche la'y  
lawgak benách ka' nnít'a'gake' gan  
zo'. Bzejn'i-i-gekle' da' ni, na' bsdelen  
légake'. <sup>14</sup>Bi wdío' ka'ze da' benn  
Dios chio', dan' benne' chio' kan  
wnnagak benne' ka' bcháljgake' lo  
wláz Dios kan gaken chio', katen'  
bxoa ná'gake' le', na' benne' gole  
ka', benne' žape chí'igake' benách  
ka' che Benne' Criston', wnnábgekle'  
Dios gon chawe'e le'.

<sup>15</sup>Bénteze da' ki. Be' láže'zeze gono'  
ki, nich lé'gekle yógo'te benách ka'  
kan zej žata' chio' da' ka' zej naken  
che Benne' Criston'. <sup>16</sup>Wdape chí'i  
kwino', na' wdape chí'i da' zsedlžo.  
Bénteze da' ki, na' cha' žono' ki,  
na' yeló' le', na' yelagak benne' ka'  
yéngekle' le'.

### Kan žala' gon xkwide' Timoteo

**5** Bi tilo' benne' byo gole ka',  
san bzejn'i-i-gekle' ka xakzo'  
ka'. Bzejn'il xkwide' byo ka' ka bi'  
bíche'kzo' ka'. <sup>2</sup>Bzejn'il no'le gole  
ka' ka xna'kzo' ka'. Bzejn'il xkwide'  
no'le ka' ka bi' zankzo' ka', nak dot  
chawe' da' z za' lažo'o.

<sup>3</sup>Wdape ba la'ne no'le wzebe ka', no'le ka' da' li zej nake' no'le wzebe ka'. <sup>4</sup>Cha' zoa to no'le wzebe zej nnita' xkwide' chie' ka', o za'sóe' ka', žala' wsédgek<sup>lbe'</sup> góngak<sup>be'</sup> kan ženele Dios, na' gáklengakbe' zga'ale benách ka' nníta'gake' lížgak<sup>be'</sup> ka', na' yebí'igak<sup>be'</sup> chegak xa' xná'gakbe'. Da' ni naken chawe', na' da' žaz laže' Dios. <sup>5</sup>Na'a, no'len' da' li nake' no'le wzebe, na' nga'ne' toze', žxen laže'e Dios, na' dot ža' dot yel zcháljlene' Le', na' znnábtezle' Le' ni'a chegak benách chie' ka', <sup>6</sup>san no'le wzebe na', no'len' zone' kan nak da' zdan laže'e, nake' ka to no'le gat kate' ne zoe' nbane'. <sup>7</sup>Lezka', bchi'le benách ka' nníta'gake' gan zo', nich góngake' kan nak tlebe len da' ki, nich bi gak nitó benne' bi da' nnie' chégake'. <sup>8</sup>Cha' zoa no benne' bi zwawe' lježe' ka', na' da' nakže blo, cha' bi zwawe' benách ka' nníta'gake' liže', na' žžie' che da' žejležo che Benne' Criston', na' nbágá'ze' žia ka to benne' bi žejli'e che Dios.

<sup>9</sup>Toze no'le wzebe na', no'len' ba zejže' ka chonn<sup>lalj</sup> yiz, gak báblene' benne' ka' žáklengakle-ne', cha' bi bka'ne' benne' byo chie' nich sóalene' yetó benne' byo. <sup>10</sup>Žon byenen soa no benne' wzóa lie' kan nak che no'le wzebe na' kan nak da' chawe' da' zone'. Gáklenle-ne' cha' besgole' xkwide' ka', na' cha' zwi'e gan ga'ngak lježo ka' zá'gake' yež zi'to', na' žžíngake' liže', na' cha' znezjwe' da' ye'j gawgak benách ka' che Dios, na' cha' žáklene' benne' ka' zzák'a'gake', na' cha' žónteze' da' naken chawe'.

<sup>11</sup>No'le wzebe ka' bi na' žéjgake' chonn<sup>lalj</sup> yiz, bi žala' báblengake'

no'le ka' žáklengakle-ne', dan' góngake' kan zdan láže'zegake', na' wží'igake' che Benne' Criston', na' yénegekle' wchág ná'gake' da' yoble. <sup>12</sup>Cha' góngake' ki, na' bága'gake' dola' dan' wzóagake' chela'ale da' bejlé'gake' che Benne' Criston' zga'ale. <sup>13</sup>Lezka' gákgake' no'le ža'wed ka', na' no'le kon želdaze' bi be žin žóngake', na' kégeze gákgake' ža'wed, san lezka' gákgake' no'le wenné che ljéžgake' ka', na' gákgake' benne' wedile ka', na' nnágake' da' kegle. <sup>14</sup>Che len, žénela' wchág na'gak no'le wzebe ka' da' yoble, no'le ka' bi nápegake' zan yiz, na' yesgól<sup>gake'</sup> xkwide' ka', na' wsédgek<sup>lbe'</sup> binlo xkwide' ka' nníta'gak<sup>be'</sup> yo'o che chégake', nich bi wé'gake' latje no benne' nnie' chežo, bennen' žži'e chežo žo'o, nolžo žejležo che Benne' Criston'. <sup>15</sup>Ki žala' gaken, dan' ba beyálgake' bałe', na' žóngake' kan ženele da' xiwe'.

<sup>16</sup>Cha' zej nnita' no'le wzebe ka' liž no benne' byo o no no'le, benne' žejli'e che Benne' Criston', na' žala' gáklene' légake', nich bi wsaka' zí'gake' benách ka' che Benne' Criston'. Ki gaken, benách ka' che Benne' Criston' gak gáklengake' no'le ka' da' li zej nake' no'le wzebe ka'.

<sup>17</sup>Wdápeže ba la'ne benne' gole' ka', benne' žape chí'igake' benách ka' che Benne' Criston', na' znná biá'gake' binlo, na' wdápeže'eže ba la'ne benne' gole ka' žóngake' žin, benne' zzégake' diža' chawen', na' žségek<sup>lbe'</sup> benách ka'. <sup>18</sup>Nyejw le'e yiche la'y da' znnan: "Bi ko'o do žoa' bežen' zlejba' zoa' stribé." Lezka'

znnan: "Benne' wen žin nake' zi si'e lažjwe'."

<sup>19</sup> Bi si' lo no'o da' znnna no benne' žesbage'e zia no benne' gole, benne' žape chi'e benách ka' che Benne' Criston', cha' bi zej nnita' chope chonne benne' ka' zzoa lígake' dan' bene'. <sup>20</sup> Benne' ka' žóntezgake' dola', bdil-gake' lawgak yógo'te benách ka' che Benne' Criston' nich žébegak yezika' benne' ka' Dios. <sup>21</sup> Ni'a che Xažo Dios, na' ni'a che Xažo Jesús, Benne' Criston', na' ni'a chegak wbás che ya'abá ka', wbás ka' wžé Dios, zchi'la' le' gono' kan znnagak diža' ki. Tlebe kan žala' wchi'a lažo'o benách ka', na' bi gapo' ba la'ne toze benne'. <sup>22</sup> Bi wxoate no'o nitó benne', bi gono' le' wen žin che Benne' Criston', nich bi bago'o tzen len le' dola' ni'a che da' žone' cha' gone' dola'.

<sup>23</sup> Biž ye'jo' nisze. Dan' zdia' li'o žala' ye'jo' láte'do' xis uba wal nich ga'nen chawe'.

<sup>24</sup> Dola' ka' da' zej nbaga' bałe benách ka' la' lawgaken zga'ale kate' žíngake' gan wchi'a laže' Dios lígake', na' te na' la' law dola' da' zej nbaga' yezika' benách ka'. <sup>25</sup> Lezka', la' law žin chawe' da' bengak benách ka', na' cha' bi nla' lawn, bi gak nitó benne' wkache'e to chi'ize žin na' da' bene'.

**6** Yógo'te benne' ndo'w ka' žala' gápele'egake' ba la'ne benne' xángake' ka' nich bi gak no benne' nne xiwe' che La Dios, na' che da' bsdle' Le'. <sup>2</sup> Benne' ndo'w ka' cha' žeje'gak xángake' ka' che Benne' Criston', bi žala' wká'ngake' lígake' ka'ze dan' zej nake' ljéžgake' ka'. Žala' góngakže' binlo xchíngake'

dan' žejlé'gake' che Benne' Criston', na' yebélengekle' žin chawen', na' Benne' Cristo na'kzen' nži'ilé' lígake'. Bsedle benách ka' nnítaga'ke' ga na' kan nak da' ni, na' bzejní'i-gekle'.

**Da' zka'n zenžo Dios da' žebélenlžon**

<sup>3</sup> Cha' zoa no benne' zsedle' da' yoble, na' bi zsedle' diža' chawen' che Xažo Jesús, Benne' Criston', dan' zsedlen žo'o kan žala' gonžo kan žénele Dios, <sup>4</sup> zka'n zen kwin bennen', na' bi be nnezle'. Zdan laže'e diža' ka'ze ka' kan zej nak diža' zede ka', na' diža' bizjw ka', da' ka' žóngaken ga zgé'gekle benách ka' ljéžgake' ka', na' zdil' lengake' lígake'. Lezka' diža' ki žóngaken ga znné zí'gake' chegak ljéžgake' ka', na' zza' láž'e'gake' chégake' da' kegle. <sup>5</sup> Lezka' žóngaken ga zdil' diža'gak benách ka', benne' ka' bi žejní'igekle', na' bi nzi' lo ná'gake' da' naken dot da' li. Žékgekle' gak sí'gake' mežw zen cha' góñlengake' tzen benne' ka' zka'n zéngake' Dios. Bkwas gan zej nnita' benne' ki. <sup>6</sup> Da' zente naken da' žebélenlžon kate' len yela' zen laže' zka'n zenžo Dios. <sup>7</sup> Bi be bia'žo žo'o katen' bla'žo yežlyó nga, na' lezka', bi be yeywa'žo katen' yeza'žo yežlyó nga. <sup>8</sup> Che len, cha' de da' gawžon, na' da' gákwžon, žala' chaz láže'zon. <sup>9</sup> Benne' ka' zdan láž'e'gake' yela' gape, gak chégake' da' gonen ga bága'gake' dola', na' chéjgake' lo yelj che da' xiwe', na' lo yela' bi nnezle chégake' dan láž'e'gake' da' zan da' den, da' ka' gon dítjgaken lígake'. Da' ki wžia yí'gaken lígake', na' góngaken ga gátgake' to chi'ize. <sup>10</sup> Dan' zdan láž'e'gake' yela' gape, da' ni žonen ga žóngake' yógo'te

da' kegle. Bale benne' ka', dan' zdan láže'gaken', ba bsángake' da' bejlé'gake' che Benne' Criston', na' ba žak chégake' da' zan da' žsaka' zí'gaken légake'.

**Benne' žone' xchin Jesús nake'  
ka benne' žeje' lo wdile**

<sup>11</sup>Na'a le', benne' che Dios, bkwas gan žak da' kegle ki. Be' láže'teze gono' da' naken chawe', na' da' žénele Dios. Bejlé'teze che Benne' Criston', na' bž'il lježo' ka'. Be' laže' gako' zen laže', na' gaxjw laže'.  
<sup>12</sup>Kan žon bennen' dot laže'e žeje' lo wdile, ben žin che da' žeje'žo che Benne' Criston', na' be' laže' bi wnto' yela' nban da' zejlí kanne. Blíž Dios le' nich si'on. Chawe' gok da' bzoa lio' kan žejlí'o che Benne' Criston', dan' wnnón' lawgak benne' zan, benne' zzoa lígake' dan' wnnón'.  
<sup>13-14</sup>Ni'a che Xanžo Dios, Bennen' zej nbanlen yógo'te da' zej nnitan', na' lezka' ni'a che Jesús, Benne' Criston', Bennen' bzoa lie' da' nak chawe', da' wnné' kwáselo law Ponsio Pilato, zchi'la' le' gape chi'o da' ka' gož Benne' Criston' žo'o. Žala' gako' dot chawe', na' bi be gono' da' gonon ga no benne' nnie' chio'. Ki žala' gono' na'zejte ža la' law Xanžo Jesús, Benne' Criston'.  
<sup>15</sup>Kate' žin ža yelá' Jesusen', Dios wlo'e'ele' law Le'.  
 Dios nake' la'y. Toze' Le' yo'o lo ne'e dot yela' wnná bia', na' znnna bi'e yógo'te benne' ka' znnna biá'gake', na' nake' Xangak yógo'te benne' ka'

zej nake' xangak benách ka'.  
<sup>16</sup>Toze' Le' zóateze', na' zoe' lo baní' gan bi gak žin no benne' žakze chie'. Batkle ble'el no benne' Le', na' bi gak no benne' le'ele' Le'. Chie' Le' gáta'teze da' žeape Le' ba la'ne, na' yela' wnná bia'. Ka'kze gaken.

<sup>17</sup>Bchi'le benne' ka' zej nape' yela' wnni'a ža ni zoažo na'a, nich bi wká'n zen kwíngake', na' nich bi wxén láže'gake' yela' wnni'a na' dan' bi sóatezen. Žala' wxén láže'gake' Dios ban, Bennen' žónnlí'e yógo'te da' žebélenlžon.  
<sup>18</sup>Bchí'i-gekle' góngake' da' naken chawe', nich chanže žin chawe' da' žóngake', da' naken to yela' wnni'a li laže'. Žala' wnézjwgake' late' chegak benách yache' ka', na' we' láže'gake' légake'.  
<sup>19</sup>Cha' góngake' ki, na' wtóbake' yela' wnni'a da' naken li laže', da' yebélengekle' ža ka' da' zá'gaken, na' gata' yela' nban li laže' chégake'.

**Da' bchi'le Pablo xkwide' Timoteo**

<sup>20</sup>Ljéža'do' Timoteo, wdape chi'i da' nzi' lo no'o, na' bkwas gan zej nnita' benne' ka' zchaljgake' da' ka'ze, na' diža' ka' da' bi zej zakan', na' diža' bizjw ka', da' ka' zchaljgak benne' ka' znnázegake' žákgake' da' zenle'e, na' žon láže'gake' kan zej nak da' ka' žóngake'.  
<sup>21</sup>Bale benách ka', benne' wzí' lo ná'gake' diža' ki, bchíxgekle' kan nak da' žeje'žo che Benne' Criston'.

Znnabla' Dios gon chawe'e le'. Ka'kze gaken.

# DIŽA' BEŽOPE DA' BSELÀ' PABLO CHE XKWIDE' TIMOTEO

Pablo žape' "Padiox"  
xkwide' Timoteo

**1** <sup>1-2</sup>Neda', Pablo, žapa' le'  
"Padiox" ljéza'do' Timoteo.

Nako' ka zi'nkza' dan' bénleno' neda'  
tzen žin che Benne' Criston', na'  
nži'il'a' le'. Naka' wbás bselà' Benne'  
Criston' dan' ženele Dios gaka' ki,  
nich gak da' bchebe laže'e, wnejzjwe'  
yela' nban da' zejlí kanne chežo,  
dan' zoalen Jesús, Benne' Criston'.  
Znnabla' Xažo Dios len Xanžo Jesús,  
Benne' Criston', gon chaw'e le', na'  
yeyache' láže'le' le', na' wká'n zie'  
yichj lazdo'o.

Timoteo žala' wzóa libe' che Jesús

<sup>3</sup>Kate' zcháljlena' Dios žapa'  
Le' "žóxkeno'" kan nak chio' le'. Bi  
žsana' znnaba' ni'a chio' dot ža dot  
yel, law Dios, Bennen' žona' xchine'  
dot laža'a kan bengak xa wdé chia'  
ka'. <sup>4</sup>Kate' žejsá' laža'a kan wžežo',  
na' žak laža'a yele'ela' le', nich gak  
yebela' dot laža'a. <sup>5</sup>Žapa' Dios:  
"žóxkeno'" dan' bžin chia' diža' da'  
žonen ga žejsá' laža'a kan žejlí'o che  
Benne' Criston' dot lažo'o. Xna' golo'  
Loida, na' xno'o Eunise, bejlé'gake'  
chie' Le' zgá'alegake' ka le', na'

nnézkzela' lezka' le' žejlí'o chie' Le'  
na'a.

<sup>6</sup>Dan' naken ki, žsa'a lažo'o  
yesbano' da' benn Dios chio', dan'  
wzi'o katen' neda' bxoa na'a le', na'  
wnnabla' Dios bi da' gonne' chio'.

<sup>7</sup>Dios Be' La'y, Bennen' benn Dios  
chežo, bi nake' to be' da' gonen ga  
žébežo, san benkze' Le' Be' La'y  
chie' chežo. Dios Be' La'y na' žone'  
ga napžo yela' wak, na' ga nži'ilžo  
lježžo ka', na' ga znna bia' kwinžo.

<sup>8</sup>Che len, bi yedoe'elo' wchaljo' che  
Xanžon', na' bi yedoe'elo' kan žak  
chia' neda', nyejwa' liž ya nga dan'  
žona' xchin Xanžon', san benlen  
tzen benne' ka' zzáka'gake' dan'  
zzéngkle' benách ka' diža' chawen'.  
Dios wnejzjwe' yela' wak chio' nich  
gak gono' ki. <sup>9</sup>Dios na'kze beslé' žo'o,  
na' bliže' žo'o nich gakžo dot chawen'.  
Bi bliže' žo'o dan' zoa da' chawen'  
da' benžo žo'o, san bliže' žo'o dan'  
gónekzele' Le', na' dan' be' laže'e  
žo'o. Ža ni'te bzoe' ki chežo zga'ale  
kate' bi na' soa yežlyó nga, dan'  
nakžo che Jesús, Benne' Criston'.

<sup>10</sup>Na'a, ba bla' dan' žonn Dios chežo,  
dan' bla' law ni'a che Jesús, Benne'  
Criston', Bennen' žeslé' žo'o. Beké'e  
yela' wak che yela' got, na' bloe'ele'

law gak gópežo yela' nban da' zejlí kanne, da' bi kwia yin', dan' nápežo ni'a che diža' chawen'.

<sup>11</sup>Benne' Criston' wžie' neda' nich wchalja' diža' chawen', na' nich gaka' wbás chie' nich wsedla' benách zi'to' ka'. <sup>12</sup>Che len zzaka'a da' ka' da' žákgaken chia' nga, san bi žedoe'ela', dan' nónbi'a Bennen' žejli'a chie'. Nnézkzela' Le' nape' yela' wak nich gape chie' da' bdia' lo ne'e na'zejte ža yelé'e.

<sup>13</sup>Diža' chawen' dan' benlon', dan' bchaljan', žala' gaken chio' to da' zloe'elen kan žala' wloe'elo' benách ka' kan žeje'žo che Jesús, Benne' Criston', na' kan nži'ilžone'. <sup>14</sup>Wdape chi'i da' nak chawe', dan' nzi' lo no'o. Gak gono' ki len yela' wak che Dios Be' La'y, Bennen' zóalene' žo'o.

<sup>15</sup>Ba nnézkzelo' kan bengak yogo'te benne' ka' žejlé'gake' che Benne' Criston', benne' ka' nnita'gake' gan nbab Asia, wléj yichjgake' neda'. Fijelo, na' Hermójenes zej nbáblene' benne' ka'. <sup>16-17</sup>Znnabla' Xanžo Dios yeyache' láže'le' benne' ka' nnita'gake' liž Onesiforo, dan' ben choche' neda' zan chi'i. Katen' bla'a neda' lo yež Roma, dot láže'e beyilje' neda', na' bežel-le' neda'. Bi bedoe'ele' ni'a chia' neda' dan' nyejwa' liž ya nga, nžaja' do ya. <sup>18</sup>Znnabla' Xanžon' yeyache' láže'le' le' ža na' žine' law Dios. Ba nnézkzelo' kan góklene' žo'o, katen' wzoažo lo yež Éfeso.

Timoteo žala' gakbe' ka to  
benne' žeje' lo wdile

**2** Na'a, zí'na'do', ben choch  
lazdo'o lo da' žonn Jesús,

Benne' Criston', chio'. <sup>2</sup>Da' benlo' da' bchalja' neda' lawgak benne' zan, benne' ka' zzoa lígaken', bden lo na'gak benne' ka' žóngake' kan znnágake', benne' ka' gak wsédgekle' yezika' benách ka'.

<sup>3</sup>Žala' soelo' da' wsaka' zi'gak benách ka' le' kan zzoelen to benne' nake' che Jesús, Benne' Criston', na' dot láže'e žeje' lo wdile. <sup>4</sup>No benne' žeje' lo wdile, bi chejchaze' da' ka' žongak benách ka' nnita'gake' yežlyo' nga, nich chaz láže' bennen' wžie' le' nich gake' benne' chie' žeje' lo wdile. <sup>5</sup>Lezka', no benne' chaze' lo witje, bi be si'e cha' bi žitje' kan žala' gone'. <sup>6</sup>Benne' žaz ža'ne', zga'ale' le' si'e che da' yelape'. <sup>7</sup>Bsa' láže' da' ni da' žapa' le', na' Xanžo na'kze gone' ga chejni'ilo' yogo'ten.

<sup>8</sup>Bejsá' láže' kan goken che Jesús, Benne' Criston'. Golje', na' goke' za'só Dabí, na' wdé gote', bebane' lo yela' got. Ki znnna diža' chawen' da' zchaljan'. <sup>9</sup>Dan' zchalja' diža' chawen', zzaka'a da' žaken chia', na'zejte nyejwa' liž ya nga ka to benne' wen da' zinnj, san bi nyejw xtiža' Dios. <sup>10</sup>Che len zzoela' yogo'te da' ki dan' nži'ilä' benne' ka' wžekze Dios, nich yelágake'. Jesús na'kze, Benne' Criston', žone' ga želagak benne' ka' nich si'gake' baní' li láže' chie'.

<sup>11</sup>Naken káteze znnna da' ni:

Cha' nátlenžo Le', sóalenžo-ne'  
nbanžo.

<sup>12</sup>Cha' soelžo da' sáka'žo, nna  
biálenžo Le' tzen.

Cha' nnažo bi nónbia'žo-ne', Le'  
nne' bi nónbi'e žo'o.

<sup>13</sup>La'kze bi žonžo kan znnnažo, Le'  
žónteze' kan znnne'.

Le' bi gak wché'e da' nakkze' Le'.

**Benne' wen žin che Jesús,  
benne' žežoje' chawe'**

**14**Bsa' láže'gak benne' ka' nníta'gake' gan zo' kan zej nak da' ki, na' ni'a che Xanžo Dios bchí'i-gekle' nich bi til díža'gake' kan zej nak diža' ka'ze ka'. Diža' ki žóngaken ga kwia yi'gak benne' ka' zzi' lo ná'gake' lágaken. **15**Be' láže'teze yežojo' chawe' law Dios nich gako' benne' wen žin bi žeđoe'ele' ni'a che žin da' bene'. Žala' wkonlo' binlo žin diža' da' naken dot da' li. **16**Na'a, bkwas gan zej nnita' benne' ka' zcháljgake' da' bi zaka', na' diža' ka'ze ka', dan' žongak diža' ki ga góngakže' da' bi žénele Dios. **17**Segak diža' ka' da' zcháljgake' kan žzen yižwé' nozo' da' žlan. Himeneo len Fileto zej nbáblene' benne' ka' zcháljgake' ki. **18**Benne' ki bchíxgekle' kan nak da' naken dot da' li, dan' znnágake' ba wdé ža žala' yebangak benne' gat ka', na' bže' zédgekle' bale benách ka' na' zejte biž žejlé'gake' che Benne' Criston!. **19**Da' ben choch Dios zóatezen, na' zoa to da' nak bian', dan' znnan: "Dios nónbi'e benne' ka' zej nake' chie!" Lezka' znnan: "Le kwas gan žak da' kegle, yógo'tele le'e nakle che Benne' Criston!"

**20**To lo yo'o zen zej yo'o da' zej naken, kégeze oro, na' plat, san lezka' da' zej naken yag, na' yo. Zkonlžo balen žin kwáselo, na' yebalen ga bi nak kwáselo. **21**Nich gakžo kan zej nak da' ka' zkonlžo žin kwáselo, na' nich gak gonžo da' naken chawe', na' gakžo da' wkonle Xanžon' žin, žala' kwasžo gan žak da' kegle. Cha' gonžo ki, gakžo zi gonžo yógo'te žin chawe'.

**22**Bzoa chela'ale da' ka' žóngaken ga se laže' no benne' da' kegle kan nak da' žaken chegak xkwide' ka'. Be' laže' gako' chawe'. Ben da' žonen ga žejlí'o che Benne' Criston', na' da' žonen ga nži'ilو lježo' ka', na' da' žonen ga zgánlenžo' lježo ka' chawé'do'. Kan zej nak da' ki, benlen tzen benne' ka' zcháljlengake' Xanžon', ne nak dot chawe' yichj lázdo'gake'. **23**Na'a, lezka' bzoa chela'ale diža' ka'ze ka', na' diža' da' bi zej zakan', dan' nnézkzelo' žóngaken ga zdlí díža'gak benách ka'. **24**Benne' wen žin che Xanžon' bi žala' til díža'lene' benách ka', san žala' gake' gaxjw láže' lawgak yógo'te benách. Žala' gak wsedle' benách ka', na' gake' zen laže'. **25**Lo yela' gaxjw laže' chie' žala' wzejni'ile' benne' ka' zži'igake' che da' zchalje'. Cha' gone' ki, Dios gak wnejjwe' lágake' latje yeyát láže'gake' nich gónbia'gake' da' naken dot da' li. **26**Ki yelágake' lo yelj che da' xiwe' gan zej nžje', na' yeyákgake' chawe' nich góngake' kan žénele Dios.

**Kan gakgak benách ka'  
ža se lawte ža ka'**

**3** Lezka' žala' nnezlo' da' ni: ža se lawte ža ka' sáka'le'egak benách ka'. **2**Kate' ža ka' nníta'gak benne' ka' góngake' ki:

ži'igekle' la' kwíngakze', na' dan láže'gake' yela' gape.  
Wká'n zen kwíngake', na' gon kwíngake' benne' blo ka'.  
Nne zí'gake' che da' ka' zej naken la'y.  
Wži'igake' che xa xná'gake'.  
Gákgake' benne' bi chaz laže' ka'.

Bi góngake' kan žénele Dios.  
 3 Bi ū'i'gekle' kan žala' góngake'. Gákgake' benne' zižje laže' ka'. Nnégake' che ljéžgake' ka'.  
 Bi nna bia' kwíngake', na' gákgake' benne' ža'a ka'.  
 Bi lē'egekle' chawe' da' naken chawe'.  
 4 Gákgake' benne' wdé ljéžgake' ka', na' bi gá'ngake' chawe'. Wloé'el kwíngake' ka benne' zen ka'. Žf'igekle' da' dan láže'gakze', na' kege Dios.  
 5 Wloé'el kwíngake' ka benne' ka' zej nónbi'e Dios, san bi soa�en yela' wak che Dios lágake'.  
 Bkwas gan zej nnita' benách ka'. 6 Lezka', lo yela' wen laže' chégake' chó'ogake' yo'o ka', na' gon láže'gakle' no'le bi nnezle ka' nich si' lo na'gak no'le ka' da' žsédgekle'. No'le ka' bágagake' dola' zan, na' we' láže'gake' da' ka' dan láže'gakze', da' ka' bi zej zakan'. 7 Yéntezgekle no'le ka' diža' ka' da' wchaljgak benne' ka', san bi chejn'igekle' da' naken dot da' li. 8 Kan gokgak Janes len Jambres, benne' ka' bží'igake' che Moisés, lezka' gakgak benne' ki, wží'igake' che da' naken dot da' li. Gákgake' benne' choł laže' ka', na' chíxgekle' kan nak da' žejle'žo che Benne' Criston'. 9 Bi be sí'gakže', san gak bia' zej nake' benne' bi nnezle ka' lawgak yógo'te benách ka', na' gak chégake' kan gok chegak Janes len Jambres, benne' ka' bžia' yi' Dios.

#### Da' bsa' laže' Pablo Timoteo

10 Nnézkelo' le' kan nak da' žseda' neda' benách ka', na' da' žona'. Nnezlo'

da' že' laže'a gona', na' kan žejli'a che Benne' Criston', na' kan naka' gaxjw laže', na' kan nži'il'a' lježa' ka', na' kan zzoela' da' žak chia!. 11 Lezka' nnezlo' kan wžia láže'gak benách ka' neda', na' da' ka' wzaka'a, da' ka' gókgaken chia' lo yež Antiokía, na' lo yež Ikonio, na' lo yež Listra. Da' ka' wžia láže'gak benne' ka' neda' bzoelan', na' Xanžo Jesusen' beslé' neda' lo yógo'te da' ka'. 12 Yógo'te benne' ka', benne' žénegekle' gákgake' dot chawe' dan' zej nake' che Jesús, Benne' Criston', lezka' sáka'gake' da' ka' kwia láže'gak benách ka' lágake'.

13 Na'a, benne' wen da' zinnj ka', na' benne' wen laže' ka', góngakže' ki. Gon láže'gekle' benách ka', na' benách ka' gon láže'gekle' lágake'.

14 Na'a, wdape chi'i da' ka' nsedlo', na' da' wz' lo no'o, dan' nónbia'kzo' benne' ka' bsédgekle' le'. 15 Katen' goko' xkwide', na' zejte na'a ža, nónbi'o da' ka' zej nyejwn le'e yiche la'y, da' ka' gak wzejn'igeklen le' nich yel' dan' žejli'o che Jesús, Benne' Criston'. 16 Yógo'te da' ka' zej nyejwn le'e yiche la'y Dios bzejni'ile' benách chie' ka', benne' ka' bzójgake' da' bchalj Dios. Da' ka' zej nyejwn le'e yiche zej zakan' nich wsédgeklen žo'o, na' wloé'egeklen da' gonžo, na' yego'gaken žo'o nez chawe', na' wzejn'igeklen žo'o nich gakžo chawe'. 17 Ki žóngaken, nich gak ban laže' no benne' nake' che Dios, na' nich gak gone' yógo'te da' naken chawe'.

**4** 1-2 Ni'a che Xažo Dios len Xanžo Jesús, Benne' Criston', zchi'l'a' le' wzenlo' benách ka' xtiža' Xanžon'. Lekze' wchi'a laže' e benne' ban ka', na' benne' gat ka', ža na' katen' yel' e nich nna bi'e. Be' laže' gono' da' ni, cha' žak chawe' chio' o bi žak chawe'. Lo yela' zen laže' chio', bloe'el dan' žongak benách ka', na'

bsa' láže'gake', na' bzejn'i-i-gekle' kan nak dan' źsedlžo žo'o. <sup>3</sup>Ki žala' gono' dan' žin ža katen' bi wzé nággake' da' chawe' da' źsedlžo, san yénegekle' yéngakle' da' žaz láže'zegake'. Wtóbgake' chégake' benne' ka' wsédgekle' légake' da' zdan láže'zegake'. <sup>4</sup>Wzóagake' chela'ale da' naken dot da' li, na' si' lo ná'gake' diža' ka'ze ka'. <sup>5</sup>Na'a, žala' gako' zen láže' lo yógo'te da' žono'. Bzóel da' wsaka' zí'gake' le'. Bzenle benách ka' diža' chawen'. Dot lažo'o ben žin dan' wló'o Benne' Criston' lo no'o gono'.

<sup>6</sup>Kan nak chia' neda', ba bde kwina' lo na' Dios, na' za' gótgake' neda' dan' žona' xchin Dios, na' ža yezá'a yežlyó nga za' žinen. <sup>7</sup>Kan žon no benne' dot laže'e žeje' lo wdile, lezka' bena' neda' žin, na' ba beyóž bena' neda' dan' wló'o Benne' Criston' lo na'a gona', dan' bena' kan nak tlebe len da' žejle'žo chie' Le'. <sup>8</sup>Na'a za' si'kza' da' žala' si'gak benne' chawe' ka', dan' gonn Xanžon' chia' neda' ža na', na' nak chawe' kan zchi'a laže'e žo'o. Kege chia' nedza' gonnen', san lezka' gonnen' chegak yógo'te benne' ka' zej nži'ile' Le', na' dot láže'gake' želbeze' ža yelé'e.

### Da' bzoj Pablo kan žala' gon Timoteo

<sup>9</sup>Be' laže' yidtio' ga zoa' ni, <sup>10</sup>dan' bsan laže' Demas neda', dan' nži'ile' da' žebélenle' yežlyó nga, na' wyeje' lo yež Tesalónika. Ben byenen wyéj Cresente gan nbab Galasia, na' lezka' wyéj xkwide' Tito gan nbab Dalmasia. <sup>11</sup>Toze Lukas zóalene' neda'. Bche' xkwide' Markos nich yídlenbe' le' tzen, dan' nakbe' gónlenbe' neda' tzen xchin Benne' Criston'. <sup>12</sup>Bsel'a xkwide' Tíkiko

lo yež Éfeso. <sup>13</sup>Katen' yido', bedjwá' laže' yichan' dan' bka'na' lo yež Troas lo liž Karpo, na' lezka' bedjwá' yiche ka', na' da' nakže blo, yichen' da' naken yid.

<sup>14</sup>Kantr, benne' wen yeso' ya ka', bene' chia' da' zan da' zia. Xanžo na'kze yebí'e chie' kan nak da' bene' chia' neda'. <sup>15</sup>Wdape chi'i kwino' che bennen', dan' zží'ilí'e che da' zchaljžo.

<sup>16</sup>Kate' da' nežw chi'i bla'a neda' lawgak benne' yolawé ka', bi goklen nitó benne' neda', san bsan láže'gak yógo'te benách ka' neda'. Bi žénela' yebéj yichj Dios légake'. <sup>17</sup>Xanžon' wzóalene' neda', na' ben choche' neda' nich yeyóž wchalja' xtí'e' nich yéngeklen yógo'te benách zi'to' ka'. Ki goken, Xanžo na'kze beslé' neda'. Goken chia' ka belá' lo na'gak beže yixé' ka'. <sup>18</sup>Xanžo na'kze yeslé' neda' lo yógo'te da' kegle ka', na' gape chie' neda' kate' žintia' gan znna bi'e Le' ya'abá che Dios. iGa'n zen Le' to chi'ize! Ka'kze gaken.

### Pablo žape' "Padiox" benách ka' che Jesús

<sup>19</sup>Wdape "Padiox" Prisila len Akila, na' lezka' benách ka' nnítá'gake' liž Onesíforo. <sup>20</sup>Bga'n Erasto lo yež Korinto, na' bka'na' Trófimo gan nbab Miletó dan' žake' yižwé. <sup>21</sup>Be' laže' yido' ga zoa' ni zga'ale kate' žin byo' zag ka'. Eubulo, na' Pudente, na' Lino, na' Klaudia, na' yógo'te lježzo ka' nnítá'gake' nga, žápegake' le' "Padiox."

<sup>22</sup>Znnabla' Xanžo Jesús, Benne' Criston', sóalene' le'. Dios gon chawe'e le'. Ka'kze gaken.

# DIŽA' DA' BSELA' PABLO CHE XKWIDE' TITO

Pablo žape' "Padiox" xkwide' Tito

**1** Neda', Pablo, žapa' le' "Padiox"  
Ijéža'do' Tito. Nako' ka zí'nkza'  
dan' bénleno' neda' tzen žin che  
Benne' Criston'. Naka' wen žin che  
Dios, na' benne' wbás bsela' Jesúš,  
Benne' Criston'. Bsele'e neda' nich  
gona' ga chejle'gak benách ka' chie'  
Le', benne' ka' wžekze Dios, nich  
gónbia'gake' da' naken dot da' li kan  
žala' gon no benne' nónbi'e Dios.  
**2** Ki naka' neda' dan' žxen laža'a ba  
nzi'a yela' nban da' zejlí kanne da'  
bchebe laže' Dios wnežjwe' chežo  
žo'o že ni'te kate' bi na' gata' yógo'te  
da' zej nnitan', na' Le' žonkze' da'  
bchebe laže' e gonen'. **3** Kate' bžin ža  
chen, Dios bloe'ele' law xtiže'e, da'  
bdien' lo na'a neda' wchaljan'. Dios  
nakze gože' neda' gona' ki. Nakzze'  
Le' Benne' Weslá chežo. **4** Znnabla'  
Xažo Dios len Xanžo Jesúš, Benne'  
Criston', Bennen' beslē' žo'o, gon  
chawe'e le', na' yeŷache' láže'le' le',  
na' wká'n žie' yichj lazdo'o.

**Žin che Jesúš da' žon Tito  
lo yežlyó Creta**

**5** Bka'na' le' lo yežlyó Creta, nich  
wsó'o da' žiážjegekle benách ka'

che Benne' Criston', benne' ka'  
nnít'a'gake' ga na', nich gákgake'  
dot li laže', na' nich wnnito'o  
benne' gole ka' yógo'te yež ka',  
benne' ka' gape chí'igake' benách  
ka' che Benne' Criston', benne' ka'  
nnít'a'gake' to to yež ka', kan ba  
goža' le' gono'. **6** To benne' gole,  
benne' žape chi'e benách ka' che  
Benne' Criston':

Žala' gake' benne' bi žone' da'  
gak no benne' nnie' chen.  
Žala' soa toze zo'le'.  
Žala' chejle'gak zí'ne' ka' che  
Benne' Criston'.

(Bi žala' góngakbe' da' gak no benne'  
nnie' chen, bi nne' bi žóngakbe' žin,  
o zží'igakbe' che xa xná'gakbe').

**7** Bi žala' gone' da' gak no benne'  
nnie' chie' kan žone' xchin  
Dios.  
Bi žala' gake' benne' zide, o  
benne' ža'a,  
o benne' že'je', o benne' wedile  
diža',  
o benne' zdan laže'e yela' gape.

**8** Žala' wnežjwe' gan ga'ngak  
lježzo ka' želžine' liže'.  
Žala' dan laže'e gone' da' naken  
chawe'.  
Žala' gake' benne' žejni'ile'.

Žala' gake' benne' chawe'.  
 Žala' žebe' Dios, na' nna bia'  
 kwine'.

**9** Žala' gape chi'e diža' da' li kan ba  
 nsedle', nich gak wzejni'ile' benách  
 ka' kan naken tlebe len da' chawe'  
 da' žsedlžo, na' nich gak wzóa že'  
 benne' ka' zží'igake' chen.

**10** Ki žala' gak gone' dan' zží'igak  
 benne' zan che xtíža'žo, benne' ka'  
 zcháljgake' da' bi zakan', na' žon  
 láže'gekle' benách ka'. Benne' zan,  
 benne' žóngake' ki,zej nake' benne'  
 judío ka', benne' ka' znnágake' žon  
 byenen chog lo xpéla'gak benne'  
 byo ka' da' nak bian'zej nzi'e xtíža'  
 Dios. **11** Benne' ki, žon byenen wzóa  
 žio' légake', dan' zchíxgake' yógo'te  
 benách ka' nníta'gake' bíte'teze yo'o  
 gan želyo'e, na' žsédgake' da' bi  
 žala' wsédgakele'. Ki žóngake' nich  
 s'gakze' mežw.

**12** To benne' wbáblene' benách  
 Creta ka' gan zo', bennen' bchalje' lo  
 wláz yodo' chégake', wnné':  
 Žon láže'tezgak benne' Creta ka'.  
 Zej nake' ka beko' yixe' snia ka'.  
 Zej nake' benne' za'wed, benne'  
 wawle'e ka'.

**13** Da' ni da' bchalje' kan zej nake'  
 naken dot da' li. Che len bdíl'gake'  
 nich gak li láže' kan žejlé'gake'  
 che Benne' Criston', **14** na' nich bi  
 wzé nággake' diža' ka'ze ka' da'  
 zcháljgak benne' judío ka', na' bi  
 góngake' kan znnna benách ka' žala'  
 góngake', benne' ka' bzóagake'  
 cheła'ale da' naken dot da' li.

**15** Yógo'te da' non Dios naken  
 chawe' chegak benne' chawe' ka',  
 san chegak benne' ka' bi zej nake'  
 chawe', benne' ka' bi žejlé'gake' che  
 Dios, bi be zoalen légake' da' naken

chawe', san dot da' zej nake' naken  
 sban, na' zejte da' zzbek yíchjgake',  
 na' da' zza' láže'gake'. **16** Znnágake'  
 zej nónbi'e Dios, san da' žóngake' bi  
 naken tlebe len dan' znnágake', dan'  
 zej nake' benne' bi žaz laže' ka'. Bi  
 žóngake' kan znnágake', na' bi gak  
 góngake' nitó da' naken chawe'.

**Žala' wsedlžo da' naken chawe'**  
**2** Na'a, da' zchaljo' žala' gaken  
 tlebe len da' chawe' da'  
 žsedlžo.

**2** Bsedle benne' byo, benne' gole ka':  
 Žala' wcháljgake' diža' chawe'  
 ka'.  
 Žala' gákgake' benne' chawe' ka'.  
 Žala' gákake' benne'  
 žejní'igekle'.  
 Žala' chejlé'gake' che Benne'  
 Criston' dot láže'gake'.  
 Žala' ží'igekle' ljéžgake' ka'.  
 Žala' sóegekle' da' gak chégake'.

**3** Bsedle no'le gole ka':  
 Žala' góngake' da' žaz laže' Dios.  
 Bi žala' nnégake' che ljéžgake'  
 ka'.  
 Bi žala' yé'jgake'.  
 Da' žóngake' žala' wsedlen da'  
 nak chawe'.

**4** Bsedle xkwide' no'le ka'.  
 Žala' ží'igeklbe' benne' byo che  
 chégakbe', na' zí'ngakbe' ka'.  
**5** Žala' gákakbe' no'le žejni'ile'.  
 Žala' gákakbe' no'le chawe' ka'.  
 Žala' gape chí'igakbe' da' de  
 lížgakbe'.  
 Žala' gákgakbe' ží'i laže'.  
 Žala' gápegakbe' ba la'ne benne'  
 byo che chégakbe'.  
 Žala' bi góngakbe' da' gonen ga  
 no benne' nnie' che xtíža' Dios.  
**6** Bsedle xkwide' byo ka':

Žala' gákgakbe' xkwide' žejni'ile.  
<sup>7</sup>Žala' góntezo' da' naken chawe',  
 na' ki wloe'elo' légakbe' kan  
 žala' góngakbe'. Kan žsedlo' žala'  
 wloe'elen nako' li laže', na' gaxjw  
 laže'. <sup>8</sup>Žala' wchaljo' diža' chawe' ka'  
 nich bi soa da' gak no benne' nnie'  
 chen, nich yedoe'ele no benne' wži'e  
 chen, na' bi gak nnie' chele le'e.  
<sup>9</sup>Bsedle lježžo ka', benne' žejlé'gake'  
 che Benne' Criston', na'zej nake'  
 benne' ndo'w ka':  
 Žala' gákgake' gaxjw laže' len  
 xángake' ka'.  
 Žala' góngake' yógo'te da' žaz  
 láže'gak xángake' ka'.  
 Bi žala' wži'igake' che xángake'  
 ka'.  
<sup>10</sup>Bi žala' wkache' lángake' da'  
 naken che xángake' ka'.  
 Žala' wloé'el kwíngake' chawe'  
 lo yógo'te da' žóngake'.  
 Yógo'te da' žóngake' žala'  
 wloe'elen nak chawe' xtiža'  
 Dios, Bennen' besl' žo'o.  
<sup>11</sup>Yela' ži'i laže' che Dios ba bla'  
 lawn lawgak yógo'te benách ka'  
 nich yelágake'. <sup>12</sup>Len žsedlen žo'o  
 biž žala' gonžo da' bi žaz laže' Dios,  
 na' bi dan láže'žo da' naken che  
 yežlyó nga, san žala' gakžo zen  
 laže', na' gakžo chawe' ža ni zoažo  
 na'a, na' gonžo kan žénekzele Dios.  
<sup>13</sup>Žala' kwežžo da' žxen láže'žo  
 gonen ga gak yela' ba nez zen chežo,  
 dan' gaken ža na' katen' la' law  
 Jesúš, Benne' Criston', lo bani' zen  
 chie'. Nake' Dios zen, na' Bennen'  
 žesl' žo'o. Lekze' bchebe laže'e  
 gone' da' ni. <sup>14</sup>Lekze' bde kwine'  
 lo wlazzho žo'o, nich beya'we' žo'o  
 lo yógo'te da' bi naken chawe', na'  
 žeone' žo'o chawe' nich gakžo

benách chie' ka', na' nich yénelžo  
 gonžo da' naken chawe'.

<sup>15</sup>Bsedle da' ki, na' bzejni'ilen  
 benne' ka', na' len yela' wnná bia'  
 bdil-gake'. Bénteze ki, nich bi gak  
 no benne' wka'ne' xtižo'o ka'ze.

Da' žala' gongak benách  
 ka' žejlé'gake' che Jesúš

**3** Bsa' láže'gak lježžo ka' nich  
 góngake' kan znnagak benne'  
 ka' nzi' lo nágake' yela' wnná  
 bia', na' benne' yolawé' ka', nich  
 góngake' kan znnna xtiža'gake'. Žala'  
 sóatezgake' góngake' da' naken  
 chawe'. <sup>2</sup>Bi žala' nnégake' chegak  
 ljéžgake' ka', na' bi žala' til dža'gake'  
 len légake', san žala' gákgake' gaxjw  
 laže', na' dot li laže' lawgak yógo'te  
 benách ka'.

<sup>3</sup>Lezka' žo'o, zga'ale gokžo benne'  
 bi žejni'ile ka', na' bži'ižo che  
 Dios. Wdažo wnitlžo, na' gokžo ka  
 benne' ndo'w ka', dan' benžo da'  
 bdan láže'žo, da' bi naken chawe',  
 na' yezika' da' wyáz láže'žo. Lezka'  
 benžo žo'o da' kegle, na' bge'elžo  
 lježžo ka'. Bi blé'egekle benách  
 ka' žo'o chawe', na' žo'o bi ble'elžo  
 lježžo ka' chawe' tožo yetožo. <sup>4</sup>Naž  
 bla' law Dios, Bennen' žesl' žo'o, na'  
 nak bia' nake' dot chawe', na' nži'ile'  
 yógo'te benách ka'. <sup>5</sup>Besl' žo'o, kege  
 dan' zoa bi da' naken chawe' da'  
 benžo žo'o, san dan' beyache' láže'le'  
 žo'o. Beyone' žo'o chawe', na' bene'  
 ga nakžo benne' kobe ka'. Napžo  
 yela' nban kobe dan' zoažen Dios Be'  
 La'y žo'o. <sup>6</sup>Dios bsele'e Dios Be' La'y  
 chežo dan' nakžo che Jesúš, Benne'  
 Criston', Bennen' žesl' žo'o. <sup>7</sup>Be'  
 laže'e chežo, na' beyone' žo'o chawe'  
 nich gata' yela' nban da' zejlí kanne

chežo, dan' ž xen láže'žo gonne'  
chežo.

<sup>8</sup>Da' ni da' zzoja' chio' le' naken  
dot da' li. Žénela' wsedlo' benne' ka'  
žejlé'gake' che Dios, da' ki, nich we'  
láže'gake' góntezgake' da' naken  
chawe'. Da' ni naken chawe', na'  
záka'le'en nich si' lo na'gak yógo'te  
benách. <sup>9</sup>Na'a, bi go'o no benne'  
latje wchalje' da' bi zakan', o we'  
láže'e kan zej nak lagak da' zan kwe'  
xa xto'gak benách ka', o wchalje'  
diža' bizjw ka', o til diže'e kan nak  
che da' bchi'le Moisés. Da' ki bi  
zej zakan', na' bi gáklengaken nitó  
benne'.

<sup>10</sup>Cha' zoa no benne' ga na', benne'  
žone' chope la'a benách ka' che  
Benne' Criston', te wsó'o láže'e  
to yetó chi'i, cha' bi yenle' chio',  
na' žala' yebejle-ne' gan zdoble.  
<sup>11</sup>Nnézkzelo' to benne' žone' ki ba  
beyake' benne' bi nake' chawe', na'  
žone' dołal. Ba nbage'e žia ni'a che  
dan' žone'.

### Da' bzoj Pablo da' žala' gon Tito

<sup>12</sup>Kate' sela'a Artemas o Tíkiko  
gan zo', ben byen yido' ga zoa' ni  
lo yež Nikópolis, dan' ba besyožan'  
ga'na' nga byo' zag ka!. <sup>13</sup>Senas,  
bennen' zdie' diža' da' znna benne'  
yolawé', na' Apolo, žíngake' gan  
zoale le'e. Begó'o lágake' nez len  
yela' žaklen, nich bi be yážjegekle'.  
<sup>14</sup>Bsadle lježo ka' góntezgake'  
da' naken chawe', nich gata' bi da'  
wnézjwgake' chegak benne' ka' zoa  
bi da' žiážjegekle', nich gak bia' ki  
zej nake' che Benne' Criston'.

### Pablo len lježe' ka' zzélgake' diža' benách ka'

<sup>15</sup>Yógo'te benne' ka' nnítalengake'  
neda' žápegake' le' "Padiox." Wdape  
"Padiox" benne' ka' nnítalengake' ga  
na', benne' ka' zej nži'ile' žo'o dan'  
žejlé'gake' che Dios. Znnabla' Dios  
gon chawe'e yógo'tele le'e. Kálkze  
gaken.

# DIŽA' DA' BSELÀ' PABLO CHE FILEMÓN

## Pablo žape' "Padiox" Filemón

1-2 Neda', Pablo, žapa' le' "Padiox" Filemón. Lježžo, Timoteo žonlenbe' neda' tzen, na' nži'ilto' le'. Žono' le' xchin Benne' Criston' kan žonton' neto'. Lezka' žapa' "Padiox" zo'lo', Apia. Nake' no'le zanžo žejli'e che Benne' Criston'. Lezka' žapa' "Padiox" zi'no', Arkipo. Nakbe' che Jesús, Benne' Criston', ka to benne' žeje' lo wdile, na' žonbe' xchine' Le' kan neto' žonton'. Lezka' žapa' "Padiox" benách ka' che Benne' Criston', benne' ka' zdöbgake' lo ližo'. Nyejwa' liž ya nga dan' žona' xchin Jesús, Benne' Criston'. 3 Znnabla' Xažo Dios len Xanžo Jesús, Benne' Criston', gon chawe'e le'e, na' wká'n zie' yichj lázdo'le.

## Kan žon Filemón dan' žejli'e che Jesús

4 Žejsá' láže'teza' le' kate' zcháljlena' Dios chežo, na' žápeteza' Le': "Žóxkeno." 5 Ki žona' dan' zžin diža' ga zoa' ni kan nži'ilto' Xanžo Jesusen', na' kan žejli'o chie' Le', na' kan nži'ilto' yógo'te benách ka' ba wžie' Le'. 6 Znnabla' Dios gone' ga gona'le' žin da' zchaljo' kan nak da' žejli'o che Benne' Criston', nich

si'gak benne' ka' nníta'gake' ga na' yógo'te da' naken chawe', da' žonn Jesúš, Benne' Criston', chežo lo yela' ži'i laže' chie'. 7 Žebela', na' zzi' zena' dan' nži'ilto' lježžo ka', na' beno' le', bicha'a, ga beyák láže'gak benne' ka' žejl'é'gake' che Benne' Criston'.

## Filemón žala' yenít lawe' Onésimo, xkwide' ndo'w chie'

8 Che len, la'kze nzi' lo na'a, dan' naka' wbás bselà' Benne' Criston', wchi'la' le' kan žala' gono', 9 žáta'yoela' le' lo yela' ži'i laže' chia', na' naka' benne' gole, na' nyejwa' liž ya nga dan' žona' xchin Jesúš, Benne' Criston'. 10 Žáta'yoela' le' lo wláz xkwide' Onésimo, xkwiden' bena' ga beyakbe' che Benne' Criston', na' che len nakbe' ka zí'nkza' ga nyejwa' liž ya ni.

11 Xkwide' ni, zga'ale bi be wzáka'be' chio', san na'a záka'be' chio' le', na' lezka' chia' neda'. 12 Xkwide' ni žesela'a-be' gan zo'. Na'a, wdape-be' ba la'ne kan žapo' nedkza' ba la'ne, dan' nži'ilta'-be'. 13 Gónela' gá'nlenbe' neda' nga, nich lo wlazo' le' gonbe' xchina' kate' ne nyejwa' liž ya nga dan' zchalja' diža' chawen', 14 san bi be ženela' gona' da' bi naken da' žak laž'o le', nich

bi gon byena' gákleno' neda', san gak gákleno' neda' dan' žénekzelon'.  
**15** Bkwasljga xkwide' Onésimo gan zo' to chi'ido' nich yežinbe' to chi'ize gan zo'. **16** Na'a, biž gakbe' chio' ka to xkwide' ndo'w, san gakbe' chio' ka to bi' lježkzo', dan' nakbe' bi' lježjo žejle'be' che Benne' Criston', na' nži'ilžo-be'. Nakbe' ki chia' neda', na' žala' gákžebe' ki chio' le', kege ka lježzo', san ka bi' bicho' o žejle'be' che Xanžo Jesús, Benne' Criston'.

**17** Che len, cha' nako' toze len neda', wdape-be' ba la'ne kan žapo' nedkza' ba la'ne. **18** Cha' bi da' zia benbe' chio' o cha' bi da' nbága'be' chio', wnnáteze neda' nbaga'an.  
**19** Neda', Pablo, len na'kza' zzoja' da' ni chio', znnia': nedkza' chizjwa' bi da' nbága'be', na' kege yapa' le': lezka' nbago'o le' chia' neda' yógo'te da' napo' dan' bena' neda' ga napo' le' yela' nban da' zejlí kanne.  
**20** Ka'kze gaken, bicha'a. Cha' zoa da' yebélenlo' dan' nakžo che Xanžon',

ben da' ba góta'yoela' le' dan' naka' bicho' o žejli'a che Benne' Criston', na' nich gono' ga yeyák laža'a.

**21** Zzoja' da' ni chio', dan' žxen laža'a le', gono' kan znnna xtiža'a, na' nnezla' gono' yelate' ka da' ba góta'yoela' le'. **22** Lezka' znnabla' le' wkwezo' gan soa' ližo', dan' žxen laža'a yežoja' liž ya nga, na' la'a gan zoale le'e dan' zcháljenle Dios, na' znnáblele-ne' lo wlaza' neda'.

### Pablo zzoje' da' žápegake' “Padiox” Filemón

**23** Epafras žape' le' “Padiox.” Nyéwjlene' neda' tzen liž ya nga dan' žone' xchin Jesús, Benne' Criston'. **24** Lezka' Markos, na' Aristarko, na' Demas, na' Lukas, žápegake' le' “Padiox.” Benne' ki žónlengake' neda' tzen žin che Benne' Criston'.

**25** Znnabla' Xanžo Jesús, Benne' Criston', gon chaw'e le'e. Ka'kze gaken.

# DIŽA' DA' ZZEJNI'ILEN BENÁCH HEBREO KA'

Dios bcháljlene' žo'o lo na' Zi'nkze'

**1** Zan chi'i, na' da' zan kan ben  
Dios, bcháljlene' xa xto'žo  
ka' ža ni'te lo na'gak benne' ka'  
bcháljgake' lo wlaze' Le'. **2**Ža ni  
zoažo na'a, kate' ze lawte, Dios  
bcháljlene' žo'o lo na' Zi'nkze'. Dios  
wnnakze' gape Zi'ne' na' yógo'te da'  
zej naken chie' Le', na' lo na' Zi'ne'  
na', Dios bene' yežlyó nga. **3**Zi'ne'  
na' nake' ka to da' žsa'ní' len yela'  
baní' che Dios, na' kan nak Zi'ne' na'  
zloe'elen law dot da' nakkze Dios.  
Zi'ne' na' žonkze' ga nnita'tezgak  
yógo'te da'zej den, žkonle' žin  
da' zinne' len yela' wak zen chie'.  
Katen' beyož bene' da' žeyón žo'o  
chawe' law Dios dan' beké'e dola' da'  
nbága'žo, na' bejži'e kwit li ža che  
Dios, Bennen' ži'e znna bi'e žale.

Zi'n Dios nakže' blo ka  
wbás che ya'abá ka'

**4**Zi'n Dios nakže' blo ka wbás che  
ya'abá ka' che Dios, dan' nakže blo  
da' lie' kazej nak lagak wbás la'y  
chie' ka', kan bzoa Dios le' dan' nake'  
Zi'nkze'. **5**Dios batkle gože' to wbás  
che ya'abá chie' kan gože' Zi'ne',  
katen' wnné':

Nako' Le' Zi'na'.

Bloe'ela' law na'a naka' Xo'.

Batkle bchalje' che to wbás che  
ya'abá kan bchalje' che Zi'ne', katen'  
wnné':

Neda' naka' Xe',  
na' Le' nake' Zi'na'.

**6**Lezka', katen' Dios bzoe' Zi'nkzen'  
lo yežlyó nga, na' wnné':

Yógo'te wbás che ya'abá  
yéngkle' xtiža' Le'.

**7**Kan jez nak wbás che ya'abá chie'  
ka', wnné':

Zej nak wbás che ya'abá ka' ka  
be' da' žaken.

Zej nak wbás wen žin chia' ka'  
ka yi'.

**8**Na'a, kan nakkze Zi'ne', wnné':

Gan ži'o znna bi'o, nna biátizo',  
Dios.

Nak chawe' kan znna bi'o.

**9**Nži'iloi' da' nak chawe', na' kege  
da' bi nak chawe'.

Che len neda', Dios chio', bdia' lo  
no'o yela' wnná bia',  
na' bena' ga napžo' Le' yela'  
žebél  
ka da' napgak lježo' ka'.

**10**Lezka' wnné':

Le', Xan, katen' wzó law, beno'  
yežlyó nga,

na' len na'kzo' beno' ya'abá.

<sup>11</sup> Te chégaken, san Le', zoakzo' to chi'ize.

Yógo'te da' ka' tébgaken kan zteb  
to laže'.

<sup>12</sup> na' ka to laže' wtobo' légaken,  
na' chó'ngakon' ka to laže' teb,  
san Le', batkle wchá' kwino'  
na' batkle te chio'.

<sup>13</sup> Dios batkle gože' to wbás che  
ya'abá chie' kan gože' Zí'ne', katen'  
wnné':

Wžé' kwita' li ža  
kate' gonža' ga wzóa zibgak  
lawo'  
benne' ka' bi zlé'gegkle' Le'  
chawé'.

<sup>14</sup> Yógo'te wbás che ya'abá ka' che  
Dios zej nake' be' wen žin ka'  
che Dios, na' bsele'e légake' nich  
gáklengake' benne' ka' želágake'.

Bi žala' wzoažo chela'ale yela' žeslá

**2** Che len, žala' we' láže'le'ežo  
da' ba benlžo, nich bi wzoažo  
xtiža' Dios chela'ale. <sup>2</sup>Dižan' da'  
bžinen chežo ža ni'te lo na'gak wbás  
ka' che ya'abá che Dios, naken dot  
da' li, na' yógo'te benne' ka', benne' bi  
béngake' kan znna dižan', Dios bsaka'  
zi'e légake' kan nak tlebe len da'  
béngake'. <sup>3</sup>Lezka' bi yelažo žo'o lo  
da' wsaka' zi' Dios žo'o cha' wzoažo  
chela'ale yela' žeslá ni. Xanžo na'kze  
bchajlen' zga'ale, na' benne' ka'  
béngekle' chie' Le' bloé'gegkle' žo'o  
naken dot da' li. <sup>4</sup>Lezka' Dios na'kze  
bloé'ele' žo'o naken dot da' li, dan'  
bene' da' ka' zej nak bian', na' da' ka'  
žongaken ga žebanlžo, na' da' zan  
yela' wak zen ka', na' benne' chežo  
da' ka' zej naken che Dios Be' La'y  
kan gónekzele' Le'.

Dios bene' ga beyák Jesúš  
kan nakžo žo'o

<sup>5</sup>Dios bi bdie' lo na'gak wbás ka'  
che ya'abá chie' yežlyó da' zan', dan'  
zchaljto' chen. <sup>6</sup>Na'a, kan nak da'  
ni, nyejw le'e yiche la'y da' wnná to  
benne' bzoa lien', katen' wnné':

Dios, žebanla' dan' že' lažo'o  
benách ka'.

Žebánle'ela' dan' žákleno' légake'.

<sup>7</sup>Beno' légake' to chí'ido'ze yelate'  
gaxjw  
ka zej nak wbás ka' che ya'abá  
chio'.

Bzo' chegak benách ka' yela' zen,  
na' yela' ba la'ne.

<sup>8</sup>Bdio' lo ná'gake' yógo'te nich  
nna biá'gaken'.

Ka' naken, katen' bdie' lo ná'gake'  
yógo'te, bi be bka'ne' da' bi bdien'  
lo ná'gake', san na' zejte na'a ža, bi  
zle'elžo yo'o yógo'ten lo ná'gake'.

<sup>9</sup>Nnezlžo da' goken che Jesusen'.  
Dios bene' ga goke' to chí'ido'ze  
yelate' gaxjw ka zej nak wbás  
ka' che ya'abá chien', dan' goke'  
benachze nich gote', na' wzake'e lo  
yela' got lo wlazgak yógo'te benách  
ka', dan' be' laže' Dios žo'o nich  
goken ki. Dan' ben Jesusen' da' ni,  
Dios bene' ga nape' yela' zen, na'  
yela' ba la'ne.

<sup>10</sup>Dios bene' yógo'te da' zle'elžo, na'  
žone' ga zej nnitan'. Dios bene' kan  
žala' gone' katen' bene' ga nak bia'  
nak Benne' Criston' Benne' Weslá li  
laže' ni'a che da' wzake'e. Ki ben Dios  
che Benne' Criston', Bennen' bene'  
yela' žeslá nich gak yechi'e benne'  
zan ya'abá che Dios. <sup>11</sup>Le' žeyón  
chawé'e benách ka' nich gákgake' che  
Dios. Benne' ka' žeyón chawé' Benne'

Criston', toze nak Xágake', na' Xakze'. Che len, Zi'n Dios bi žedoe'ele' katen' znne' zej nake' biche'e ka'. <sup>12</sup>Ka nak da' ni nyejw le'e yiche la'y, da' znnan: Wcháljléna' bicha'a ka' kan nako'

Le', Dios.

Ga jez ndobe benách chio' ka'  
gola' da' we lawa' Le'.

<sup>13</sup>Lezka' wnné':

Wxén laža'a Dios.

Ga yoble wnné':

Le wia neda' len zi'na' ka',  
Benne' ka' benn Dios chia'.

<sup>14</sup>Che len, dan' jez nak zi'ne' ka'  
bela' žen, lezka' Benne' Criston' ben  
kwine' kan zej nake', na' golje' bela'  
žen. Ki bene' nich gok gote', na' ka'  
goken beké'e yela' wnná bia' che da'  
xiwe', dan' wzí' lo nan' gotten benách  
ka'. <sup>15</sup>Ki ben Benne' Criston' nich gok  
beslé' yógo'te benne' ka' gókgake' ka  
benne' ndo'w ka' kate' ne jez nnite'e  
nbángake', dan' bžébegake' yela' got.  
<sup>16</sup>Nak bia' bi bene' ki nich gáklené'  
wbás che ya'abá ka' che Dios, san  
nich góklene' benne' ka' jez nake'  
za'só Bran. <sup>17</sup>Che len, ben byenen  
gok Benne' Criston' kan zej nak lješe'  
ka', nich gake' law Dios to bxoz blo,  
benne' žone' kan znne', na' žeyache'  
láže' le' benách ka', na' lezka' nich  
gone' da' gon ga gata' lo ne'e yeké'e  
dola' da' jez nbaga' benách ka'. <sup>18</sup>Na'a,  
dan' wzáka' kze Benne' Criston', na'  
dan' ben da' xiwe' da' gónen gon  
ga bage'e Le' dola', che len nape'  
yela' wak gáklené' benne' ka', žon da'  
xiwe' da' žénen gonen ga bágágake'  
dola'.

### Jesús nakže' blo ka Moisés

**3** Che len, zi'na'do' ka', le'e na'  
nakle che Dios dan' bliže' le'e,

le wia binlo kan nak Jesús, Benne'  
Criston'. Nake' wbás bselá' Dios, na'  
lezka' bxoz blo che da' nzi' lo nažo.

<sup>2</sup>Jesusen' žone' kan znna xtiža'  
Dios, Bennen' bzoe' Le' latje chie',  
na' žone' kan ben Moisés, benne'  
bene' kan znna xtiža' Dios, da' bene'  
lawgak yógo'te benách ka' che Dios.

<sup>3</sup>Jesusen' nakže' blo ka Moisés na',  
nich ga'n zene' Le', kan nakže blo to  
benne' nak chie' to yo'o ka no benne'  
wen žin zoe' lo yo'on'. <sup>4</sup>Yógo'te yo'o,  
zoa no benne' benen', san Dios bene'  
yógo'te da' zle'elžo. <sup>5</sup>Da' li Moisés na'  
bene' kan znna xtiža' Dios lawgak  
benách ka' che Dios, san goke' ka  
to benne' wen žin, nich bdie' da' ka'  
wnnakze Dios lawgak benách ka'.

<sup>6</sup>San Benne' Criston' nake' Zi'nkze  
Dios, na' žone' kan znna xtiža' Dios.  
Na'a benách ka' che Dios jez yoe' lo  
ne'e Le'. Žo'o nakžo benách ka' che  
Dios cha' ga'nžo choch na' jezte ža  
ze lawte ža ka', kan žon chochžo  
lázdžožo, na' kan žebélenžo da'  
žxen láže'žo.

### De latje gan yezí' láže'gak benách ka' che Dios

<sup>7</sup>Che len, nyejw le'e yiche kan  
wnná Dios Be' La'y, da' znnan:

Na'a, cha' žénlele da' zchalj Dios,

<sup>8</sup>bi gonle zide lázdžo'le  
kan bengak benne' ka' bží'igake'  
che Dios

katén' gónegekle' si' biá'gake' Le'  
lo latje dach.

<sup>9</sup>Gónegekle xa xtó'le ka' si'  
biá'gake' neda'

la'kze blé'gegekle' da' ka' bena'  
choplalj yiz.

<sup>10</sup>Che len bžá'a benách ka'  
wnnítá'gake' ža na',

na' wnnia': "Zchíxtezgekle' kan  
zza' láže'gake'.

Bi žénegekle' yéngekle' da'  
žénela' góngake'."

**11** Che len bž'a'a légake', na' ben  
chocha' xtiž'a'a, na' wnnia':  
Bi chó'ogake' gan yezi' láže'gake'  
tzen len neda'.

**12** Le gape chi'i kwinle, zí'na'do'  
ka', nich bi gonle zide yichj lázdo'le  
nitole le'e, na' bi kwáslenle Dios  
ban, na' bi wsanle žejele' che  
Dios. **13** Na'a, le wzejn'il tole yetole  
yógo'te ža, kate' ne naken ža ni  
zoažo na'a, nich bi gon lažel' da'  
nak dola' le'e, na' bi gonle zide yichj  
lázdo'le nitole le'e. **14** Yógo'težo  
góñlenžo Benne' Criston' tzen cha'  
ga'nžo choch na' žeje ža ze lawte  
ža ka', kan wzó law žon chochžo  
kwinžo.

**15** Ki žala' gonžo kate' ne znna  
xtiža' Dios:

Na'a, cha' žénlele chi'i Dios,  
Bi gonle zide yichj lázdo'le,  
Kan bengak benne' ka' bž'i'gake'  
che Dios.

**16** ¿Noz benne' ka' béngekle' xtiža'  
Dios, na' bž'i'gake' chie' Le'? Yógo'te  
benne' ka' bebéj Moisés lo yežlyó  
Egipto bengake' ki. **17** ¿Noz benne'  
ka' bž'a'a Dios légake' chopalj yiz?  
Gokgak benne' ka' bengake' dola',  
na' gótgake' lo latje dach. **18** ¿Noz  
benne' ka' Dios ben choche' xtiž'e',  
na' wnné' bi chó'ogake' gan yezi'  
láže'gake' tzen len Le'? Gokgak  
benne' ka' bi bengake' kan znna  
xtiža' Dios. **19** Na'a, žákbe'elžo bi gok  
chó'ogake' ga na' dan' bi bejlé'gake'  
che Dios.

**4** Na'a, kate' ne nga'n da' bchebe  
laže' Dios, gone' ga gak

cho'ožo latje chie' gan yezi' láže'žo,  
žala' žébežo wnitžo latje cho'ožo  
ga na'. **2** Benlžo žo'o diža' chawen'  
kan béngekle' légake', san dižan'  
da' béngekle' bi góklenen légake',  
dan' bi bejlé'gake' che Dios katen'  
béngeklen'. **3** Žo'o žejele'žo che Dios,  
na' cho'ožo latje chie' gan yezi'  
láže'žo. Naken kan wnná Dios:

Che len bž'a'a légake'  
na' ben chocha' xtiž'a'a, wnnia':  
"Bi chó'ogake' gan yezi' láže'gake'  
tzen len neda'."

De latje cho'ožo gan yezi' láže'lenžo  
Dios tzen, la'kze beyóž ben Dios  
xchine' ža ni'te katen' bene' yežlyó  
nga, na' ba bezí' laže'e. **4** Nyejw le'e  
yiche la'y da' zchaljen kan nak che  
ža gaže ža, da' znna: "Bezí' laže'  
Dios ža gaže ža lo žin da' bene'."

**5** Ga yoble znna: "Bi chó'ogake'  
gan yezi' láže'gake' tzen len neda'."

**6** Benne' ka' béngekle' diža' chawen'  
zga'ale, bi wyó'gake' ga na' dan' bi  
bengake' kan znna xtiža' Dios. Che  
len, žala' cho'ogak benách yoble ka'  
ga na'. **7** Che len, lezka' bloe'el Dios  
to ža yoble, na' wnné: "na'a ža."  
Ka' goken, kate' ba wdé yiz zan, na'  
bchalj Dios lo na' Dabí, kan nyejw  
le'e yiche la'y, da' znna:

Na'a ža, cha' žénlele da' zchalj  
Dios,

bi gonle zide lázdo'le.

**8** Chela' ben Josué ga bezí' láže'gake',  
bi bchalj Dios wdé na' che yetó  
ža katen' yezi' láže'gak benách ka'  
tzen len Le'. **9** Che len, nga'n latje  
chegak benách ka' che Dios nich  
yezi' láže'lengeke' Le' tzen. **10** Benne'  
ka' chó'ogake' gan yezi' láže'gake'  
tzen len Dios, yezi' láže'gake' lo  
žin da' žóngake', kan bezí' laže'

Diosen' lo žin da' bene' Le'. <sup>11</sup>Che len, žala' we' láže'žo cho'ožo gan yezi' láže'lenžo Diosen' tzen. Bi žala' wž'ižo che xtiže'e kan bengak benne' ka' bi bejlé'gake' che Dios, na' bi wyó'ogake' ga na'.

<sup>12</sup>Xtiža' Dios nakkzen ban, na' napkzen yela' wak. Zchogžen ka žon to ya ntoche' da' ntonchen' bežope la'al. Zchogen gan zej nžag be' nakkzžo, na' da' zoa lo yichj lázdžo'žo, ka nak to da' chazen ga žinten lo žit lo bin. Žonen ga nak bia' da' zbek yichjžo, na' da' zza' láže'žo. <sup>13</sup>Bi be gak wkáche'žo gan bi gak Dios le'elen'. Yogo'te da' benkze Dios nla' lawn, na' nžojen lawe' law Dios. Lawe' Le' žon byenen wloe'lžo da' ka' da' benžo.

### Jesús nake' Bxoz Blo, Benne' zente

<sup>14</sup>Zoa chežo to Bxoz Blo, Benne' zente, Bennen' beyepe' ya'abá che Dios. Bennen' nake' Jesúš, Zi'n Dios. Che len žala' ga'nžo choch lo da' nzi' lo na'žo. <sup>15</sup>Zoa chežo to Bxoz Blo, Bennen' gak yeyache' láže'le' žo'ko kan nak da' žaken chežo, dan' ben da' xiwe' da' gónelem gon ga baga' Lekze' dol'a' dot kan žonen da' žénelen gonen ga bága'žo žo'ko dol'a', san Jesusen', bi be dol'a' bene'. <sup>16</sup>Che len, dot láže'žo žala' bíga'žo gawze gan že' znna bia' Dios, Bennen' žáklen'e' žo'o, na' nnablžone' yeyache' láže'le' žo'o, na' lo yela' žili' laže' chie', gáklen'e' žo'o kate' bi da' gaken chežo.

**5** Dios zbekze' no benne' žénele' ladjw benách ka', nich gake' bxoz blo, na' zzoe' le' nich gone' da' ka' zone' law Dios lo wlazgak benách ka', na' nich wdíe' law Dios

da' ka' znéžjwgake', na' bia yixe' ka' žótgake' lo bkog la'y ni'a che dola' da' zej nbage'e. <sup>2</sup>Bxoz blon', dan' žak chie' tlebe kan žaken chegak yógo'te benách ka', gak gake' zen láže' len benne' bi nnezle ka', benne' ka' zchíxgekle'. <sup>3</sup>Dan' nak b<sub>x</sub>oz blon' benachze, che len žala' wdíe' law Dios to bia yixe', bian' gote' lo bkog la'y, ni'a che dola' da' nbágakze' le', kan žone' ni'a che dola' da' zej nbaga' benách ka'.

<sup>4</sup>Bi gak nitó benne' gon kwine' b<sub>x</sub>oz blo, san Dios zbie' no benne' žala' gake' b<sub>x</sub>oz blo, kan wžié' Aarón, bennen' goke' b<sub>x</sub>oz blo nežw. <sup>5</sup>Lezka' goken che Benne' Criston', bi ben kwine' Bxoz Blo, san Dios bzoe' Le' Bxoz Blo. Kan nak da' ni, Dios gože' Le':

Le' nako' Zi'na'!

Bzoa' Le' na'a.

<sup>6</sup>Lezka' gože' Le' kan nyejw ga yoble, katen' wnné':

Le' nákteto' Bxoz,  
kan gok Melkisedek b<sub>x</sub>oz.

<sup>7</sup>Benne' Criston', katen' wzoakze' yežlyó nga, bcháljlene' Dios, na' góta'yoee' Le'. Wžézeyi'e, na' wžeze' law Dios, Bennen' gok yeslé' Le' lo yela' got, na' Dios benle' chie' dan' bžebé' Dios dot laže'e. <sup>8</sup>La'kze goke' Zi'n Dios, bsedle' gone' kan znna xtiža' Dios ni'a che da' ka' gókgaken chie', da' ka' wzake'e. <sup>9</sup>Katen' ba gok Benne' Criston' dot kan žala' gak Bxoz Blo, na' Dios bene' Le' Benne' žeslé' to chi'ize yógo'te benne' ka' žóngake' kan znna xtiže'e. <sup>10</sup>Naž Dios bzoe' Le' Bxoz Blo kan gok Melkisedek na' b<sub>x</sub>oz blo.

### Žon zož chežo wž'ižo che Benne' Cristo

<sup>11</sup>Kan nak da' ni, žala' wcháljlento' le'e da' zan, dan' naken zede

wzejni' ilto' le'e, dan' bi na' chejn'i'ilele. <sup>12</sup>Ba wdé že žala' gak wséidlele le'e benále ka' xtiža' Dios, dan' ba bénlele scha, san žon byenen no benne' wsedle' le'e da' yoble da' bi naken zede dan' ba nzi' lo na' no benne' zzo lawe' ţejli'e che Benne' Criston'. Nga'le ka to xkwide' ţe'ndo', bi'don' ne žáze'be' niže', na' bi gak gawbe' yela' waw choch. <sup>13</sup>No benne' žon byenen soa no benne' wsedle' le' da' bi naken zede, nake' ka to xkwide' ne žáze'be' niže'. Bi nsedle' kan nak tlebe len da' naken chawe'. <sup>14</sup>Yela' waw choch naken da' ţawgak benne' ka' ba zej nake' benne' wale ka', benne' ka' žónbia'gakle' da' naken chawe', na' da' bi naken chawe', dan' ba bkóngekle' žin yela' ţejni' il chégake'.

**6** Che len, bi žala' wsédtelzho da' ka' ba bsedlžo katen' wzó lawžo ženlžo kan nak che Benne' Criston'. Žala' góložeo lo yichj lázdo'žo nich gakžo dot li laže' benále chie' ka'. Bi žon byenen wsedlžo da' yoble da' ka' bi zej naken zede:

kan žala' yeyát láže'žo, na'  
kan biž žala' gonžo da' kegle ka',  
na'  
kan žala' chejle'žo che Dios, na'  
<sup>2</sup> da' ka' ţsedlžo kan žala' yezoažo  
nis, na'  
kan žala' xoa na'žo benále ka'  
žejlé'gake' che Benne' Criston',  
na'  
kan yebangak benne' gat ka', na'  
kan chog Dios chegak benne'  
wen da' zinnj ka' gátgake' to  
chi'ize.

Cha' ba nsedlžo yogo'te da' ki bi žon byenen wsédtelzho. <sup>3</sup>Ki gonžo cha' Dios gonne' žo'o latje.

**4-6** ¿Wak gonžo ga yeyát láže'gak da' yoble benne' ka' ţebéj yichjgake' Dios, na' zží'igake' chie' Le'? Cha' bžin baní che Dios lo yichj lázdo'gake', na' cha' wzí'gake' da' znezjw Dios, na' gókgake' toze len Dios Be' La'y, na' cha' wzí'gake' diža' chawen' che Dios, na' yela' wak che da' za', na' cha' naž yebéj yichjgake' Dios, na' wzí'igake' chie' Le', bi gak gonžo ga yeyát láže'gake' da' yoble, dan' gaken kan wdá'gake' Zi'n Dios le'e yag kroze da' yoble, na' gon dítjekle' Le' lawgak yogo'te benále ka'. <sup>7</sup>Benne' ka' žóngake' ki zej nake' ka yežlyón' da' zzin' nis yejw da' zbižen lawlen zan chi'i. Cha' yežlyón' znezjwn da' yebélengekle benne' ka' žá'ngaken', na' Dios žaz laže'en, <sup>8</sup>san cha' zzoazen lba yeche', na' bisgá', na' nga'n ditjen, na' nbaga'n zia, na' ba naken da' wzeyžon.

### Da' žxen láže'žo da' žonen ga zga'nžo choch

<sup>9</sup>La'kze zchaljto' ki, lježto' ka', nži'ilto' le'e, na' ţeklto' nakle ka yežlyón' da' znezjwle'en, na' ţebélenlele yela' weslá da' ba nzi'le. <sup>10</sup>Dios nake' chawe', na' bi gal laže'e žin chawe' da' benle, na' da' ka' benle dan' nži'ilele-ne', na' kan góklenle benne' ka' che Dios, na' zej žáklenle légake'. <sup>11</sup>Na'a, žénelto' we' láže'le lježle tole yetole, na' gonle ki na' zejte ža ze lawte ža ka', nich gata' chele dot da' žxen láže'le. <sup>12</sup>Žénelto' bi gakle za'wed, san gonle kan žongak benne' ka' žejlé'gake' che Dios, na' kwezle zen láže', na' si'le da' ka' bchebe laže' Dios gonne' chežo.

<sup>13</sup>Ki naken dan' ben choch Dios xtiže'e katen' bchebe laže'e bi da' wnezejwe' che Bran. Dan' bi zoa no benne' nakže' blo ka Dios, che len ben choche' xtiže'e ni'a che la' kwinze'.

<sup>14</sup>Ki wnná Dios: "Da' li gon chawa'a le', na' gona' ga chanle'e za'só' ka'." <sup>15</sup>Bran na' wleze' zen laže', na' gota' chie' da' bchebe laže'e Dios wnezejwe' chie'.

<sup>16</sup>Kate' to benne' žon choche' xtiže'e, žon chochen' ni'a che to benne' nakže' blo ka le', na' da' ni zzoa žin yógo'te diža' bizjw, dan' ben choche' xtiže'e.

<sup>17</sup>Che len katen' Dios ben choche' da' bchebe laže'e gone', ben chochen' ni'a che la' kwinze'. Bene' ki dan' gónele' wloe'ele' benne' ka' žala' sí'gake' da' bchebe laže'e wnezejwe' chégake', nakkzen, na' to chi'ize že' da' bzoa lawe' gone'. <sup>18</sup>Dan' bchebe laže' Dios, na' dan' ben chochen', da' chopen ki batkle chá'gaken, na' kan nak chegak da' chopen ki, bi gak gon laže' Dios. Ki ben Dios nich gakkzen chežo to da' yeyón zen žo'o. Žxen láže'žo Le', gata' chežo da' zbez láže'žo dan' bzoen' chežo. <sup>19</sup>Dan' ūxen láže'žon zzoa chóchtezen yichj lázdo'žo, na' naken ka to do ya da' zzoa žin to barkw zen. Dan' ūxen láže'žon žape chi'i Benne' Criston' ni'a chežo gan zoa Dios ya'abá, na' žen' lo latje la'y dan' zoan zkóže'le laže' da' nałan' lo yodon' da' zoan ya'abá che Dios. <sup>20</sup>Wy'o' Jesusen' lo wlazžo žo'o gan zoa Dios ka to benne' zloe'ele' žo'o nez, na' Dios bzoe' Le' Bxoz Blo to chi'ize kan gok Melkisedek bxoz blo.

### Jesús nake' Bxoz Blo kan gok Melkisedek

**7** Melkisedek goke' benne' wnná bi'e lo yež Salem, na' lezka'

goke' bxoz che Dios, Bennen' zente. Kate' ne zezá' Bran, zeyeje' wdé gok wdile katen' blej bchochje' benne' wnná bia' ka', na' bžoj Melkisedek na', na' bejchage' Bran na', na' wnnable' Dios gon chawe'e Bran na'. <sup>2</sup>Bran na' bnezejwe' Melkisedek na' to kwe' che to chi kwe' che yógo'te da' wzi'e lo wdilen'. Da' zejlás la Melkisedek na' znnan len diža' xiža: "Benne' Wnná Bia' Chawe'" na' lezka' nake' benne' znnan bi'e lo yež Salem, da' znnan len diža' xiža: "Benne' Wnná Bia' Zka'n Žie.'" <sup>3</sup>Bi nyejw le'e yiche da' znnan wnnita'gak xa xne'e, o xa xta'we' ka', na' bi nyejw ža golje' o ža gote', san nake' kan nak Zi'n Dios dan' nake' to chi'ize bxoz blo.

<sup>4</sup>Le wia nga, kan gok Melkisedek na' zen, dan' xažo Bran na'kze bnezejwe' chie' to kwe' che to chi kwe' che da' wlejen' lo na'gak benne' wnná bia' ka', benne' ka' blej bchochje' lo wdilen'. <sup>5</sup>Lo da' bžoj Moisés, Dios wnné' benne' ka' zej nake' za'só Lebí, benne' ka' zej nake' bxoz ka', sí'gake' to kwe' che to chi kwe' che da' zzi'gak benách Israel ka', la'kze zej nake' ljéžgake' ka', dan' yógo'tegake' zej nake' za'só Bran na'. <sup>6</sup>Melkisedek na' bi nake' ljéžgake', san wzi'e to kwe' che to chi kwe' lo na' Bran na', bennen' wzi'e da' ka' bchebe laže' Dios wnezejwe' chie'. Lezka' Melkisedek na' wnnable' Dios gon chawe'e Bran na', <sup>7</sup>na' bi gak nitó benne' wži'e che da' znnan: "Bennen' nakže' blo law Dios znnable' Dios gon chawe'e bennen' nakže' gaxjw."

<sup>8</sup>Na'a, ža ni zoažo na'a, benne' ka' zzi'gake' to kwe' che to chi kwe' lo na'gak benách ka' lezka' zej nake' benách žátgakkze', san Melkisedek

na', zoa da' znnan kan nak chie', da' znnan zoe' nbane'. <sup>9</sup>Na'a, gak nnažo kan nak che Lebí, na' chegak za'soe' ka', benne' ka' zzí'gake' to kwe' che to chi kwe' lo na'gak benách ka', lezka' wdízjwgake' to kwe' che to chi kwe' katen' Melkisedek na' wzí'e to kwe' che to chi kwe' lo na' Bran na', xa gole wdé chégake'. <sup>10</sup>Ki naken dan' gak nnažo Bran na' ne noe' Lebín', na' za'soe' ka' li'e katen' Melkisedek na' bejchage' le', dan' bi na' gáljgake'.

<sup>11</sup>Benách Israel ka' zzí'gake' xtiža' Moisés lo na'gak bxoz ka', benne' ka'zej nake' za'só Lebín', gan lezka' nbab Aarón, bennen' goke' bxoz blo nežw. Na'a, chela' gak yeyakgak benách ka' dot chawe' law Dios dan' žóngake' kan znnna da' bchi'le Moisés na', bi gon byenen soa yetó bxoz kan gok Melkisedek na', na' kege kan gok Aarón na'. <sup>12</sup>Cha' bcha' Dios kan žala' gak bxoz, na' žon byenen wch'é'e da' zchi'le benách ka'. <sup>13</sup>Xanžon', Bennen' nyejw le'e yiche da' ki kan nak chie', nbabe' yetó kwe' za'só Israel ka naken da' nbab Lebín', na' che kwe' za'só ka' gan nbab Xanžon', nitó benne' goke' bxoz law Dios. <sup>14</sup>Naken ki dan' nak bia' golj Xanžon' lo kwe' ljež ka' Judá, na' Moisés na' bi bchalje' che Judá na' katen' bchalje' chegak benne' ka' žala' gókgake' bxoz ka'.

<sup>15</sup>Nak bia' da' ni ni'a che da' žaken na'a. Kan gok Melkisedek na' bxoz, ba bloe'e law yetó BXoz, Jesusen'.

<sup>16</sup>Benne' ni, bi nake' BXoz dan' znnna da' bsedle Moisés na' kanzej nak lježe' ka', san nake' BXoz dan' nape' yela' wak che yela' nban da' batkle yeyožen. <sup>17</sup>Nyejw le'e yiche la'y da' zzoa lin chie' Le', da' znnan:

To chi'ize nako' Le' BXoz  
kan gok Melkisedek bxoz.

<sup>18</sup>Na'a, ba wdé che diža' goleñ' ka žala' gak bxoz, dan' bi wdapkzen yela' wak, na' bi be gok gonen.

<sup>19</sup>Dan' bchi'le Moisés bi gok yeyonen dot chawe' benách ka' law Dios. Na'a, ba wy'o to da' žxen láže'žo da' nakžen chawe', da' žonen ga gak bígážo law Dios.

<sup>20</sup>Katen' ben Dios ga nak Jesusen' BXoz, ben choche' xtiže'e. <sup>21</sup>Bi ben choch Dios xtiže'e katen' wzí'e benne' ka' nich gókgake' bxoz ka', san katen' wzí'e Jesusen' nich gake' BXoz, na' ben choche' xtiže'e, na' wnné'e:

Ben chocha' xtiža'a neda', Xano', wnnía':

"Bi wchá'a kan gona'.

To chi'ize nako' Le' BXoz  
kan gok Melkisedek bxoz."

<sup>22</sup>Che len, Benne' Criston' nake' Bennen' žone' ga nakkze dižan' da' zka'n chawe' dan' nakžen chawe' ka gok da' nežwn'. <sup>23</sup>BXoz ka' gókgake' benne' zan, dan' bi gok góngake' nga dan' gótgake', <sup>24</sup>san dan' zóateze Jesusen', to chi'ize nake' BXoz, na' batkle gon byenen chaz no benne' latje chie' nich gake' bxoz. <sup>25</sup>Che len, to chi'ize gak Jesusen' yeslé' benne' ka' zbigá'gake' law Dios, ni'a che la Jesusen', dan' zóateze' nbane', na' znnne chawe' lo wlázgake' law Diosen'.

<sup>26</sup>Ben byenen soa to BXoz Blo ki chežo. Nake' la'y, na' dot chawe', na' bi žónlene' benne' dola' ka' tzen, san nakže' zen ka yógo'te da' žen' ya'abá che Dios. <sup>27</sup>Jesusen' bi nake' kanzej nak bxoz blo ka', benne' ka' nnítá'gake' yežlyó nga, dan' ben

byenen wdégake' žen law Dios tža tža. Bétgake' bia yixe' ka' lawe' Le' ni'a che dola' da'zej nbága'kze', na' wdé na' tlebe bengake' ni'a che dola' da'zej nbaga' benách ka'. Na'a, Jesusen', toze chi'i bdie' žen law Dios, katen' bde kwine' law Dios, na' blalje' xchenkze' ni'a che dola' da'zej nbaga' yógo'te benách ka'. <sup>28</sup>Lo da' bchi'le Moisés, benách ka' bizej nake' dot chawe',zej nake' bxoz, san wdé bžin da' bchi'le Moisés ga ni, Dios ben choche' xtiž'e, na' bene' ga nak Zi'nkze' Bxoz Blo, dan' nake' dot chawe' kan žala' gak to bxoz che Dios.

### Jesús nake' Bxoz Blo chežo

**8** Na'a, kan nak da' ba wnnia', znnan ki: zoa to Bxoz Blo ki chežo, Bennen' wži'e kwit li ža che Dios gan ži'e, znnna bi'e ya'abá. <sup>2</sup>Le' žone' žin ka Bxoz Blo lo latjen' dan' naken dot la'y, dan' naken yodon' dan' bchis Xanžo Dios, na' kege benne' ka'. <sup>3</sup>Dios zbie' yógo'te bxoz blo ka' nich wdégake' lawe' Le' da' ka' znezjwgak benách ka', na' lezka' xchengak bia yixe' ka'. Che len ben byenen soa da' wdé Benne' Criston' law Dios. <sup>4</sup>Chela' zoe' yežlyó nga, bi gake' bxoz, dan'zej nnita'teze bxoz ka' nga, benne' ka' zdégake' law Dios da' ka' znezjwgak benách ka' kan znnna da' bchi'le Moisés. <sup>5</sup>Bxoz ki žongake' žin che to da' zloé'ezelen, dan' naken ka to bxin che dan' zoan ya'abá che Dios. Ki naken dan' wnná Dios katen' gože' Moisés gone' yo'o yiddon', na' wnné': "Bwia nga, ben yógo'te dot kan nak dan' bloe'ela' le' law ya'a na'." <sup>6</sup>Na'a, Bxoz Blo chežo ni, žone' žin che da'

záka'žen, na' ni'a che da' bene' Le' zoa chežo to diža' da' zka'n chawe' da' záka'žen, dan' zchaljen che to da' záka'žen, dan' bchebe laže' Dios gatan' chežo.

<sup>7</sup>Chela' wdape dižan' da' zka'n chawe' da' nežwn' dot yela' wak, bi ben byenen soa to diža' bežope da' zka'n chawen!. <sup>8</sup>Na'a, Dios zloe'ele' bi beyakgak benne' ka' dot chawe' lawe' Le' katen' bchalje' dan' nyejw le'e yiche la'y, da' znnán:

Le wia nga, znnna Xanžo Dios:  
"Za'gak ža ka'  
katen' wzóa' to diža' kobe da'  
wkán chawen',  
dan' góñlena' benne' Israel ka',  
na' benne' Judá ka'.

<sup>9</sup>Bi gaken kan gok dižan' da'  
zka'n chawen',  
dan' bénlena' xa xtó'gake' ka',  
ža na' bežwa' nágake',  
na' bebéjgaka'-ne' lo yežlyó Egipto.

Dan' wléj yichjgake' diža' chia'  
da' zka'n chawen',  
neda' wléj yichjgaka'-ne'." Ki znnna Xanžo Dios:

<sup>10</sup>"Che len, ki gak diža' da' wkán chawen'  
dan' góñlena' benách Israel ka'  
te ža ki." Ki znnna Xanžo Dios:  
"Wchiza' lo yichj lázdo'gake' da'  
wchi'la'  
na' wzojan' lo yichj lázdo'gake'.  
Naž gaka' Dios chégake'  
na' lágake' gákgake' benách chia'  
ka'.

<sup>11</sup>Bi gon byenen no benne' wsedle'  
lježle', na' nne':  
Benbia' Xanžo Dios.  
Ki gaken dan' góñbia'gake'  
yógo'tegake' neda',

gan so law no benne' nake'  
gaxjw,  
na' zejte no benne' nake' blo.

<sup>12</sup> Yeyache' láže'la' légake',  
na' yenít lawa' da' kegle da'  
béngake',  
na' biž chejsá' laža'a dola' da' zej  
nbage'e."

<sup>13</sup> Katen' bchalj Dios che to diža'  
kobe da' zka'n chawen', naken dan'  
ba bgole diža' nežwn', na' za' te che  
dan' ba ngolen, na' ba naken da' ba  
wdén.

**Latj la'y da' žen' ngaze, na'**  
**Latj La'y da' žen' ya'abá**

**9** Na'a, kan nak dižan' da' zka'n  
chawe' da' nežwn', wnníta'gak  
da' zchi'l ka' kan žala' wká'n zenžo  
Dios, da' ka' bžággaken dižan'. Latje  
la'y, da' bžagen dižan', goken che  
yežlyó nga. <sup>2</sup>Ki gok yo'o la'y na' da'  
goken yid. Lo latjen' da' wžén' lawle,  
dan' nzin' latje la'y, wnníta'gak da'  
ka' nwá'gaken yi', na' bkog la'y gan  
bkwá'gake' yet xtildo' ka' law Dios.  
<sup>3</sup> Xkóž'e'le laže' bežope dan' nalan'  
lo yo'on', wzóa latjen' da' nzin' latje  
la'yte, <sup>4</sup>na' lo latjen' wzóa to bkog  
da' goken oro gan bzéygake' yale,  
na' lezka' wzóa to kak ga'na', gan  
wyó'o dižan' da' zka'n chawen', na'  
gokw kak na' oro, na' loe'ele kak  
na' wnníta'gak zíga'don' da' goken  
oro, gan wyó'o yet xtildo' da' nzin'  
maná', len bar che Aarón, dan'  
beyeklen ni'a ne'ndo', na' lezka' yej  
blag ka', gan nyejw dižan' da' zka'n  
chawen'. <sup>5-6</sup>Law kak na' wnníta'gak  
chope wbás che ya'abá ka', da' ka'  
gókgaken oro, na' zej nzin' kerubín  
che latje gan blo'e' law Dios, na'  
zoagak xílgaken lawle latje gan bde

bxoz blo žen che to zíla'do' ni'a che  
dola'. Ki bnnita' cháwe'gake' da' ki.  
Žáztezgak bxoz ka' lo latjen' da' žen'  
lawle, gan žóngake' žin chégake'  
che da' zka'n zéngake' Dios. Bi gak  
wchalja' na'a dot kan gokgak da' ki.

<sup>7</sup>Lo latje bežopen', toze bxoz  
blo wyo'é'e toze chi'i twiz twiz,  
na' bi'e žen, da' bdien' law Dios  
ni'a che dola' da' nbágakze' le', na'  
lezka' ni'a che dola' da' zej nbaga'  
benách ka', dola' ka' béngake' da'  
bi gókbe'gegklen'. <sup>8</sup>Dios Be' La'y  
zzejni'ile' žo'o bi gok lažo law Dios  
na'kze kate' ne zkóngekle' žin lo  
latje la'yen' da' žen' lawle lo yo'o  
la'y da' goken yid, da' bžagen diža'  
nežwn' da' zka'n chawen'. <sup>9</sup>Da' ki  
zej naken to da' zloé'ezelen da'  
žaken na'a ža. Da' ka' bdégake'  
law Dios len žen chegak bia yixe'  
ka', bia ka' bétgake' law Dios, bi  
gok yeyóngaken yichj lázdo'gak  
benne' ka' dot chawe', benne' ka'  
bka'n zéngake' Dios ki. <sup>10</sup>Da' ki  
bloé'ezegklen kan nak chegak da'  
we'j bdáwgake', na' kan žala' gon  
chawe' kwíngake', na' che da' bsedle  
Dios kan žala' gak che bela' žen  
chégake'. Dios bnnite' da' ki chégake'  
na' zejte ža žala' wché'e yógo'te da'  
ka'.

<sup>11</sup>Na'a, ba bedjlá' law Benne'  
Criston', Bennen' nake' Bxoz Blo  
che da' naken dot chawe', dan' bla'  
lawn ni'a che da' bene' Le'. Latje  
La'y gan wyo'é'e Le' naken blo, na'  
naken dot chawe', na' bi naken da'  
bengak benách ka', na' bi naken che  
yežlyó nga. <sup>12</sup>Na'a, ba wyó'o Benne'  
Criston' lo Latje La'yen', da' žen'  
ža'le, kege len xchengak bežod' ka',  
na' xchengak chibo ka', san len žen

chekze'. Toze chi'i wyoé'e lo Latje Ła'yten', na' ka' goken, bene' ga belažo to ch'i<sup>ze</sup>. <sup>13</sup>Da' li, xchengak beže ka', na' chibo ka', na' de chegak beždo' ka', bia bzéygake'-ba' law Dios, da' ka' bchébgake' lo yichjgak benne' ka'zej nbage'e dola', gok yeká'gaken dola' ka' da'zej nbaga' benách ka' nich yeyóngaken légake' chawe' lo bela' žen chégake' kan nak che yela' yodo' chégake'. <sup>14</sup>Na'a, xchen Benne' Criston' gónle'ežen ki, dan' bde kwine' law Dios, na' goke' dot chawe', na' Dios Be' La'y, Bennen' zóateze', wzóalene' Le'. Na'a, xchen Benne' Criston' žeyonen yichj lázdó'žo dot chawe' lo da' ka' wbága'žo, da' ka' žóngaken ga gatgak benách ka'. Ki bene' nich gak bígá'žo nich gonžo žin law Dios ban.

<sup>15</sup>Che len Jesús, Benne' Criston', nake' Bennen' ben choche' diža' kobern' da' zka'n chawé', dan' gote' Le', na' beké'e dola' da' wbága'gak benách ka' kate' ne zoa diža' nežwn' da' zka'n chawen'. Lezka' gote' nich gak sí'gake' da' ka' bchebe laže' Dios wnežjwe' chegak benne' ka' wžie', da' ka' zóatezgaken. <sup>16</sup>Kate' žat to benne', na' cha' ba bzoje' le'e yiche kan žala' chísgake' da' ka' wdape', žon byenen gak bia' ba nat bennen' nich gak góngake' kan znna dan' bzojen'. <sup>17</sup>Kate' ba nat bennen', naž gak góngake' kan znna dižan', san kate' ne zoe' nbane', bi gak góngake' kan znna. <sup>18</sup>Che len, diža' nežwn' da' zka'n chawen' wzakan' dan' gok chochen ni'a che žen, da' zloe'elen zoa no benne' gote'. <sup>19</sup>Katen' Moisés bloe'ele' benne' ka' kan zej nak yógo'te xtiža' Dios, na' bexwe' žen chegak beždo' ka', na' chegak chibo

ka', dan' nchixen nis, na' bexwe' to yíxe'do' da' nzin' hisopo, na' yicha' zila' da' ne'jen xna, na' len da' ki bxite' žen dan' nchixen nisen' law yiche gan nyejw xtiže'e, na' lezka' lawgak benách ka'. <sup>20</sup>Naž gože' lágake': "Da' ni naken žen da' žon chochen dižan' da' zka'n chawe' da' bchi'le Dios žo'o gonžo kan znna." <sup>21</sup>Lezka' Moisés bxite' žen na' lo latje la'y da' goken yid, na' lawgak yógo'te da' bkóngekle' žin lo latje la'y nich bka'n zéngake' Dios. <sup>22</sup>Kan znna xtiža' Dios, yeláte'ze ka dachgak yógo'te žala' yeyón žen légaken chawe', na' cha' bi wlálgake' žen, bi yegá'a dola'.

### Xchen Jesús, Benne' Cristo, žeká'an dola'

<sup>23</sup>Ki naken, ben byenen wzóá da' beyonen chawe' yodo' da' žen' yežlyó nga da' naken to da' zloé'ezelen kan nak dan' žen' ya'abá che Dios, san kan nak dan' žen' ya'abá che Dios, ben byenen soa to da' yeyonen chawe' benne' ka' chó'ogake' ga na', dan' záka'žen ka xchengak bia beždo' ka'. <sup>24</sup>Bi wyó'o Benne' Criston' lo latje la'yen' da' bengak benách ka', dan' naken to da' zloé'ezelen kan nak dan' naken dot li laže', san wyoé'e Le' ya'abá na'kze nich gak la' lawe' na'a law Dios lo wlázko žo'o. <sup>25</sup>Bxzoblo, bennen' zoe' yežlyó nga, žoe' latje la'yte twiz twiz len žen chegak bia beže ka', san bi žon byenen cho'o Benne' Criston' zan chi'i nich got kwine' law Dios. <sup>26</sup>Chela' goken ki, na' gon byenen saka' Benne' Criston', na' gate' zan chi'i ža ni'te kate' ne žata' yežlyó, na' zejte na'a ža, san na'a, kate' nak ža

ze lawte že ka', toze chi'i bla' lawe', na' to chi'ize bde kwine' law Dios, na' gote' nich beké'e dola' chežo.

<sup>27</sup>Kan žon byenen gatgak yógo'te benách ka' toze chi'i, na' te na' Dios wchi'a laže'e légake', <sup>28</sup>lezka', toze chi'i got Benne' Criston', na' bde kwine' law Dios nich beké'e dola' da' jez nbaga' benne' zan. Na'a, la' lawe' da' bežope chi'i, kege nich yeké'e dola', san nich yeslé' to chi'ize benne' ka' zbézgake' Le'.

**10** Da' bchi'le Moisés žo'o goken to da' zloéezelen kan nak da' chawe' da' zan', na' bi goken dot kan naken. Che len, dan' bchi'le Moisés góngake' bi gok yeyonen benne' ka' dot chawe', benne' ka' bla'gake' law Dios twiz twiz, na' biá'gake' žen chegak bia bežod' ka', dan' bdétezegaken' law Dios. <sup>2</sup>Chela' gok yeyonen légake' dot chawe', na' bi bdétezgake' žen na' law Dios, dan' benne' ka' ba beyákgake' dot chawe' biž gákbe'gekle' jez nbage'e dola'. <sup>3</sup>Žen na' da' bdégake' law Dios twiz twiz benen ga bejsá' láže'gake' jez nbage'e dola'. <sup>4</sup>Ka' goken dan' xchengak beže ka', na' chibo ka', bi gok yeká'an dola'.

<sup>5</sup>Che len, kate' bla' Benne' Criston' yežlyó nga, gože' Dios kan nyejw le'e yiche la'y, da' znnan:

Bi žénelo' wdé no benne' žen chegak bia beže ka' lawo' Le', san beno' ga naka' neda' benachze.

<sup>6</sup>Bi žaz lažo' wzéy no benne' bia beže ka' lawo', o wdé no benne' xchéngakba' lawo' ni'a che dola'.

<sup>7</sup>Naž wnnia': "Zoa' neda' nga nich gona' kan žénelo' Le', Dios.

Naken kan nyejw le'e yiche la'y kan gaken chia'."

<sup>8</sup>Dan' nyejw zga'ale znnan: "Bi žénele Dios wdé no benne' žen chegak bia beže ka' lawe' Le'." Da' ni zloéelen žo'o biž žaz laže' Dios da' ni, la'kze lo da' bchi'le Moisés gož Dios légake' góngake' ki. <sup>9</sup>Wdé na' znnan: "Zoa' neda' nga nich gona' kan žénelo' Le', Dios." Da' ni zloéelen žo'o žeká' Dios dan' bdégake' lawe' Le' zga'ale, na' zzoe' latje chen da' bde Zi'nkze' lawe'.

<sup>10</sup>Na'a, Dios zeyone' žo'o dot chawe' dan' ben Benne' Criston' kan žénele Dios katen' bde kwine' lawe' Le' lo wlazzožo žo'o, na' gote' toze chi'i.

<sup>11</sup>Da' li yógo'te bxoz ka', benne' ka' nníta'gake' yežlyó nga, zzégake' tža tža, na' žóngake' xchíngake', na' tlebe kan žóngake', na' zan chi'i zdégake' xchengak bia beže ka' law Dios, dan' bi gak yeká'an dola'. <sup>12</sup>Na'a, Benne' Criston', toze chi'i, to da' bdie' to chi'ize law Dios ni'a che dola', na' naž bejži'e kwit li že che Dios, <sup>13</sup>ga na' zbeze' že gon Dios ga benne' ka' bi zlé'gekle' Le' chawe' wzóa zíbgake' lawe' Le'. <sup>14</sup>Ni'a che toze da' bdie' law Dios, to chi'ize bene' ga jez nak benne' chie' ka' dot chawe', na' bdie' légake' lo na' Dios. <sup>15</sup>Lezka' Dios Be' La'y zzoa lie' da' wnné' zga'ale, na' nyejwn le'e yiche, znnne':

<sup>16</sup>Ki gak dižan' da' wká'n chawen' da' gónlena' légake' Te že ki. Znna Xanžo Dios: "Wchiza' xtiža'a lo yichj láždo'gake', na' wzojan' lo yichj láždo'gake'."

<sup>17</sup>Wdé na' wnné':

Biž chejsá' laža'a dola' da' wbága'gake',

na' zia da' bengake'.

<sup>18</sup>Che len, cha' ba begá'a dola', biž žon byenen bi da' wdežo law Dios ni'a che dola'.

### Gak bíga'žo law Dios

<sup>19</sup>Na'a, zí'na'do' ka', gak bíga'žo law Dios dot láže'žo ni'a che xchen Jesúš, Benne' Criston'. <sup>20</sup>Chéjlenžo to nez kobe, da' naken li laže', dan' bzoa Benne' Criston', dan' zžinen xkóže'le lažen' da' bsejwen gan gak chó'ogake' latjen' da' nakten la'y, dan' nnažo, nezen' dan' bsaljwe' chežo dan' bdie' bela' žen chekze'. <sup>21</sup>Jesusen' nake' Bxoz zente chežo, na' znna bi'e benách ka' che Dios. <sup>22</sup>Che len gak bíga'žo law Dios dot láže'žo, na' lo yela' žxen laže' chežo, dan' žejele'žo che Benne' Criston', dan' ba beyone' yichj lázdo'žo dot chawe', nich bi yesbaga' lázdo'žo žo'o zia, na' beyone' bela' žen chežo dot chawe' len to nis da' záka'le'en. <sup>23</sup>Žala' soa chochžo, na' bi gak chope láže'žo kan nak da' žxen láže'žo che da' nzi' lo na'žo, da' bchebe láže' Dioš gonne' chežo, na' Le' žone' kan znne'. <sup>24</sup>Žala' gon chochžo tožo yetožo, na' gonžo ga ži'ilžo lježo ka', na' gonžo da' naken chawe'. <sup>25</sup>Bale benách biž zdóblengake' žo'o. Bi žala' gonžo žo'o kan žongak benách ka', san žala' gon chochžo tožo yetožo, na' górněžo ki dan' zle'elžo za' žin ža yelá' Xanžon'.

<sup>26</sup>Cha' zéjlenžo žonžo dola' kate' ba nónbia'žo da' naken dot da' li, bi be zoa da' gak wdežo law Dios da' yeká'an dolan'. <sup>27</sup>Benne' ka' žóngake' ki, lo yela' zžebe chégake' želbeze' ža chog Dios chégake' chó'ogake' lo

yi' gabíl, dan' wzéytezen benne' ka' zží'igake' che Dios. <sup>28</sup>Kate' to benne' bzoe' chela'ale da' bchi'le Moisés, bétgake' le' cha' chope chonne benne' ka' bzoa lígake' da' bene', na' nitó benne' beyache' láže'le' le'. <sup>29</sup>Na'a, cha' no benne' wzóe' chela'ale Zi'n Dios, wzóe' chela'ale xchene' da' žon chochen dižan' da' zka'n chawen', dan' žeyonen žo'o chawe', na' bága'že' zia. No benne' gone' ki wka'ne' ka'ze Dios Be' La'y, Bennen' žonne' chežo da' žiážjelžo. <sup>30</sup>Ki gaken dan' nónbia'žo Dios, Bennen' wnné': "Chia' neda' nak yela' žezi' wzón. Neda' yebi'a chegak benách ka'." Ki wnná Xanžo Dios. Lézka' wnné': "Xanžon' wchi'a laže'e benách chie' ka'." <sup>31</sup>Žala' žebe no benne' žala' wsaka' zi'i Dios ban le'.

<sup>32</sup>Le chejsá' laže' ža ka' da' ba wdégaken katen' za' bžin baní' chele, na' bzóelele da' zan da' bsaka' zí'gake' le'e. <sup>33</sup>Bliž zí'gak benách ka' le'e, na' besbága'gake' le'e zia lawgak benách ka', na' le'e bénlenle tzen benne' ka' wzáka'gake' ki.

<sup>34</sup>Ka' goken dan' beyache' láže'lele benne' ka'zej nyejwe' liž ya, na' lo yela' žebél chele bzóelele benne' ka' wléjgake' ližle da' ka'gota' chele. Ki benle dan' nnézlele da'nakžen chawe', na' da' zóatezen ya'abá che Dioszej naken chele. <sup>35</sup>Na'a, bi wka'nle dan' žxen láže'le, dan' noan to da' zen da' yebí'i Dios chele.

<sup>36</sup>Žon byenen kwezle zen laže', nich kate' ba benle kan žénele Dioš gonle, na' si'le da' bchebe láže'le gonne' chele, kan nyejw le'e yiche la'y, kan wnná Dios, da' znnan:

<sup>37</sup>Yetó chí'ido'ze  
la' Bennen' žala' yide',

na' bi že<sub>le</sub>'.

- 38** Naž no benne' nake' chawe' lawa'  
neda',  
yelá bennen' dan' že<sub>li</sub>'e chia'  
neda'.  
Cha' yekwase', na' wzóe' neda'  
che<sub>la</sub>'ale,  
biž chaz laža'a-ne'.

**39** Na'a, žo'o ni bi nakžo ka benne'  
ka' zkwašgake', na' zzóagake' Dios  
che<sub>la</sub>'ale, na' kwia yí'gake', san  
že<sub>le</sub>'žo che Benne' Criston', na' ba  
nzi'žo yela' žeslá.

### Kan žała' chejle'žo che Dios

**11** Na'a, dan' že<sub>le</sub>'žo che  
Dios, nnezlžo si'žo da' žxen  
láže'žo, na' nak bia' da' bi na' le'elžo.  
**2** Ki bejle'gak xa wdé chežo ka' che  
Dios, na' che len nyejw le'e yiche  
la'y kan goken chégake', da' znnan:  
"Bežójgake' chawe' law Dios."

**3** Dan' že<sub>le</sub>'žo che Dios, nnezlžo  
bene' Le' yežlyó nga len to díža'ze.  
Lezka', katen' ben Dios yógo'te da'  
zle'elžo, bkonle' žin da' bi na' soan.

**4** Dan' bejlé' Abel, zi'n Adán, che  
Dios, na' bdie' žen che bia yíxe'do'  
ka' law Dios, to da' záka'žen ka da'  
bde Kaín, bi' bíche'be' Abel na' law  
Dios, na' che len Dios bchalje' che  
Abel na', na' wnné' nake' chawe',  
na' wdape' ba la'ne dan' bdie' lawe'  
Le'. La'kze ba nat Abel na', na'zejte  
na'a ža, naken kan ne zchalje', dan'  
bejli'e che Dios.

**5** Dan' bejlé' Enok, za'só Adán  
na' che Dios, wdí'e ya'abá che  
Dios, na' bi gote', na' biž blé'gekle'  
le', dan' Dios bechi'e le', na' nyejw  
le'e yiche la'y kan nak chie', da'  
znnan: "Zga'ale kate' Dios bechi'e  
le', Enok na' bene' da' žaz laže' Dios."

**6** Na'a, cha' bi že<sub>le</sub>'žo che Dios, bi  
gak gonžo da' žaz laže'e Le', na'  
nich bíga'žo law Dios, žon byenen  
chejle'žo zoakze' Le', na' žechebe'  
che no benne' znnable' Le' gáklen'e  
le'.

**7** Katen' Dios bzejni'ile' Noé kan  
žala' gakgak da' bi na' gekle Noé  
na', dan' bejli'e che Dios, ben Noé  
na' kan zna xtiža' Dios, na' bene'  
barkw žen na' da' nzin' Arka, na' lo  
barkwn' belagak lježe' ka' tzen len  
le'. Dan' bejli'e che Dios, bene' ga  
nak bia' nžog chegak benách ka'  
nnít'a'gake' yežlyó nga gátgake', na'  
belé' lo nisen' dan' bejli'e che Dios.

**8** Katen' Dios bliže' Bran, dan' bejlé'  
Bran na' che Dios, na' bene' kan  
zna xtiža' Dios na', na' bezé'e laže'  
nich cheje' lo latjen' da' žala' si'e  
ka to da' gaken chie' to chi'ize, na'  
bžoje' laže' la'kze bi wnezel' gan  
žala' cheje'. **9** Dan' bejlé' Bran na'  
che Dios, goke' ka to benne' zi'to'  
lo yežlyón' da' bchebe laže' Dios  
wnežjwe' chie'. Wzóe' to lo yo'o  
láže'do', na' lezka' ben Isaak, zi'n  
Bran na', na' lezka' ben Jakob, za'só  
Bran na', benne' ka' bchebe laže'  
Dios wnežjwe' chégake' dan' bchebe  
laže' wnežjwe' che Bran na'. **10** Ki  
ben Bran na', dan' bxeñ laže'e gata'  
chie' yežen' da' zoan to chi'ize len  
ze'e chen, dan' ben Dios.

**11** Lezka' Sara, zo'le Bran na', la'kze  
goke' no'le wbíž, bejli'e che Dios, na'  
Le' bnežjwe' chie' yela' wak nich  
golj to bi' že'n chie'. Golj to xkwide'  
byodo' chie' la'kze ba wdé yiz chie',  
dan' bejli'e che Dios gone' kan  
zna xtiže'e da' bchebe laže'e chie'.  
**12** Che len, la'kze Bran na' ba bgól  
li'e, goljgak zanle'e za'sóe' ka', na'

gókgake' kan zej nak belj ya'abá ka', na' kan že' yož žoa'a to yego zen, na' nitó benne' bi gak wlabe' légake'.

<sup>13</sup> Yógo'te benne' ki gótgake', na' bi wzí'gake' dan' bchebe laže' Dios wnežjwe' chégake', san bejlé'gake' che Dios, na' zí'to'ze blé'egekle' dan' žala' sí'gake'. Bejlé'gake' che Dios, na' bcháljgake' chen. Ka' goken, bloé'egekle' zej nake' ka benne' zi'to' ka', benne' ka' želdaze' yežlyó nga. <sup>14</sup> Benne' ka' zcháljgake' ki, zloé'egekle' želyilje' to latje da' gaken lážgake'. <sup>15</sup> Chela' belzá' láže'gake' ki che yežlyó gan bžójgake', na' gok yeyéjgake' ga na', <sup>16</sup> san belzá' láže'gake' che to yežlyó da' nakžen chawe', dan' zoan ya'abá che Dios. Che len bi žedo'el Dios kate' znnágake' nake' Le' Dios chégake', na' ba bkweze' to yež chégake'.

<sup>17</sup> Dan' bejlé' Bran na' che Dios, katen' Dios wzí' bi'e le', bdie' xkwide' Isaak chie' law Dios kan zdégake' bia ka' žotgake'-ba' lawe' Le'. Ba wzóa Bran na' wdíe' xkwide' byo nežw chie' law Dios la'kze nakbe' xkwiden' bchebe laže' Dios wnežjwe' chie'. <sup>18</sup> Ki bene' la'kze Dios gože' le', na' wnné': "Lona' xkwide' Isaak chio' gona' ga nníta'gak za'só' ka!" <sup>19</sup> Ki ben Bran na' dan' gókb'e'ele' nap Dios yela' wak yesbane'-be' lo yela' got, na' ka to da' žsaka' lebžo, wak nnažo bezi'e-be' lo yela' got la'kze bi gotbe'.

<sup>20</sup> Dan' bejlé' Isaak na' che Dios, wnnable' Dios gon chawe' xkwide' Jakob, na' xkwide' Esaú, kan zej nak da' sí'gakbe' ža ka' da' zá'gaken. <sup>21</sup> Dan' bejlé' Jakob na' che Dios, katen' za' gate' wnnable' Dios gon

chawe' to to zi'n Jwsé, na' bka'n zene' Dios, kate' ne nyechwe' lo bar chie'. <sup>22</sup> Dan' bejlé' Jwsén' che Dios, katen' za' gate', bchalje' che ža katen' za'só Israel yežójgake' lo yežlyó Egipto, na' gože' légake' kan žala' chjwá'gake' žit chie' lo yežlyón' gan chejnníta'gake'.

<sup>23</sup> Dan' bejle'gak xa xna' xkwide' Moisés che Dios, katen' golj xkwiden', na' bkáche'gake' be' chonhe byo', dan' blé'egekle' xkwide' byodon' nakbe' xtan, na' bi bžébegake' bennen' znna bi'e lo yežlyó Egipto, bennen' gože' légake' gótgake' xkwide' byodo' ka'. <sup>24</sup> Dan' bejlé' Moisés na' che Dios, kate' bgolbe', biž be'be' latje wzóagake' labe' xkwide' byo che zi'n no'le Benne' Faraón, bennen' wnná bi'e lo yežlyó Egipto na'. <sup>25</sup> Ki benbe' dan' goklbe' gakže chawe' sáka'be' tzen len benách ka' che Dios ka yebélenlbe' to chí'ido'ze da' ka' žebélengekle benne' ka' žóngake' dola'. <sup>26</sup> Goklbe' záka'že wlíž zi'gak benách ka' lebe', kan gok che Benne' Criston', ka gata' chebe' yela' wnni'a chegak benách Egipto ka', dan' wzá' láže'be' che da' yebí'i Dios chebe'. <sup>27</sup> Wdé na', dan' bejlé' Moisés na' che Dios, bžoje' lo yežlyó Egipto, na' bi bžebe' yela' zža'a che bennen' wnná bi'e lo yežlyó Egipto na', na' bzoele' kan žon to benne' zle'ele' Dios, Bennen' bi gak le'elžo-ne'.

<sup>28</sup> Dan' bejlé' Moisés na' che Dios, bene' Lni Pasko' kan gož Diosen' le' gone', na' btope' žen gan žó'gake' lížgake' ka', nich teze wbás che ya'abá ga na', bennen' žala' gote' xkwide' byo nežw ka' chegak benách Egipto ka', na' bi

gote' zi'ngak benne' Israel ka'. <sup>29</sup>Dan' bejle'gak benne' Israel ka' che Dios, wdégake' lo yo biž gachje láwe'le nisdo' da' nzin' Nisdo' Xna. Katen' gónegekle benne' Egipto ka' tégake' ga na', na' gótgake' lo nisen'.

<sup>30</sup>Dan' bejle'gak benne' Israel ka' che Dios, kate' beyóz wdégake' dot kwit yež Jerikó tža tža gaže ža, na' byinnj ze'e da' wdape ch'i'in yežen'.

<sup>31</sup>Dan' bejlé' Rahab che Dios, no'len bnežjwe' benách ka' latje, bi gote' tzen len benách Jerikó ka', benne' ka' bi béngek' kan znnna xtiža' Dios. Ka' goken chie' dan' wdape' ba la'ne benne' Israel ka', benne' ka' bedjwíalangake' da' žáklenen benách Jerikó ka'.

<sup>32</sup>¿Bízaže žala' nnia'? Žiažje latje wchalja' kan bengak Jedeón, na' Barak, na' Sansón, na' Jefté, na' Dabí, na' Samuel, na' benne' ka' bcháljgake' lo wláz Dios.

<sup>33</sup>Dan' bejlé'gake' che Dios, blej bchóchgake' da' zan yež zen ka', na' béngek' da' naken chawe', na' wzí'gake' da' ka' bchebe laže' Dios wnežjwe' chégake'. Bséjwgake' žoá'agak beže yixe' ka'. <sup>34</sup>Belágake' lo yi' zen ka'. Belágake' lo na'gak benne' ka' gónegekle' gótgake' légake' len ya ntoche' ka'. Dios beyón choche' légake' kate' bedó láže'gake', na' beyák chóchgake' lo wdile. Blággake' benne' zan chegak yež zi'to' ka', benne' ka' žjake' lo wdile. <sup>35</sup>No'le chégake', no'le ka' wnnita'gake' ža ka', bezí'gake' xkwide' ka' che chégake' katen' bebángakbe' lo yela' got.

Yebale benne' ka' gótgake' lo na'gak benne' ka' bsaka' zí'gake' légake', na' dan' bi gónegekle'

kwásłengake' Dios, bi wzí'gake' latje wsangak benách ka' légake', nich gata' yela' yebán lo yela' got chégake', dan' gókgekle' záka'žen.

<sup>36</sup>Yebale' bzóegekle' yela' žon ditjle, na' yela' zi' che yid, na' byéjwgake' liž ya, gan bžéjgake' do ya. <sup>37</sup>Bžé'egak benách ka' bałe' yej, na' bchéza'gake' yebale'. Bsaka' zí'gake' légake', na' bétgake' bałe' len ya ntoche'. Wdégake' nile na'le, na' gókgake' yid žagak zila' ka', na' chibo ka'. Gókgake' benne' yache', na' belzáka'li'e, na' besbága'gak benách ka' légake' zia. <sup>38</sup>Ki gokgak benne' ka', na' benách ka' wnnita'gake' yežlyó nga bi gókgake' zi sí'gake' yela' ba nez zen chégake'. Wdágakze' lo latje dach ka', na' law ya'a ka', na' wnnita'gakze' lo bloj ka', na' lo yežw ka' zan yo.

<sup>39</sup>Yógo'tegake' bežójgake' chawe' law Dios dan' bejlé'gake' chie' Le', la'kze bi wzí'gake' yežlyón' da' bchebe laže' Dios wnežjwe' chégake'. <sup>40</sup>Ka' goken, dan' ba bkwez Dios chežo to da' nakžen chawe' nich katen' yeyone' légake' dot chawe', žo'o ni gónlenžo légake' tzen.

### Žala' wíažo Benne' Cristo

**12** Lezka' žo'o, dan'zej nnita' dot kwitžo benne' zanle'e, benne' ka' zloé'egekle' kan žejlé'gake' che Dios, che len žala' wzaožo chela'ale yógo'te da' kegle ka' da'zej naken ka to da' nak zi'i da' nwa'žo, na' lezka' yógo'te dol'a' ka' da' nzéngaken žo'o, na' lo yela' zbez zen laže' chežo, žala' gonžo xchin Dios, da' naken ka sále'ežo lo witje gan nyazzžo. <sup>2</sup>Žala' wíažo Jesúš, Bennen' žone' ga gak chejle'žo che Dios, na'

žone' ga žak dot li laže' yela' žejlé' chežo. Jesusen' wzake'e le'e yag kroze, na' bzoele' yela' žedoé'l chen, dan' gónele' si'e yela' žebél da' gata' chie', na' bejži'e kwit li ža che Dios, gan ži'e znna bi'e.

<sup>3</sup>Le wia Jesusen', kan wzáka'l i'e katen' bsaka' zí'gak benne' dola' ka' Le', nich bi yedó láže'le, na' nich bi gak chope láže'le. <sup>4</sup>Na' zejte na'a ža, bi na' sóelete na' zejte no benne' gone' le'e we' dan' zdíl-lensle da' naken dola'. <sup>5</sup>¿Gol láže'le dan' zzejni'il Dios le'e? Nakle ka zí'nkze' ka', dan' nyejw le'e yiche da' wnné:

Zi'na', bi wzó' chela'ale da' gon

Xano' Dios,

katen' wsedle wzejni'ile' le', na' bi yebéj yichjo' Le' katen' sele' le' snia.

<sup>6</sup>Xanžo Dios zzele' snia no benne' nži'ile', na' ūsedle zzejni'ile' yógo'te benne' ka' nzi' lo ne'e gákgake' zi'nkze' ka'.

<sup>7</sup>Zala' sóelete da' sel Dios le'e snia, dan' žone' ki chele dan' nakle zi'nkze' ka'. Bi zoa to xkwide' bi sel xabe' lebe' snia. <sup>8</sup>Na'a, cha' bi zzel Dios le'e snia, kan žone' chegak yógo'te zi'nkze' ka', naž nakle ka zi'n zi' ka', na' bi nakle zi'nkze' Dios. <sup>9</sup>Yetó, katen' gokžo xkwide' ka' wnníta'gak xa xna'žo yežlyó nga, na' bzélgake' žo'o snia, san žapžo légake' ba la'ne. Ki naken, žala' góñzežo kan znna xtiža' Xažo Dios, Bennen' zoe' ya'abá, nich soažo nbanžo. <sup>10</sup>Xa xna'žo ka' bzélgake' žo'o snia to chí'ido'ze ka da' gókgakle' naken chawé, san kate' Dios zzele' žo'o snia, naken to da' gáklernen žo'o, nich gakžo la'y kan

nakkze' Le'. <sup>11</sup>Da' li bi nla' law na'a da' chawé' da' sí'žon che da' zzele' žo'o snia, san žonen ga gak nyache' láže'žo. Cha' we'žo latje da' zzele' žo'o snia wsedlen žo'o, na' gonen ga gakžo zen laže', na' ga gakžo chawé'.

### De zož chežo cha' bi wzé nagžo che Dios

<sup>12</sup>Che len le yeyón choch na'le ka' na' zible ka', nich gakle choch gonle da' naken chawé'. <sup>13</sup>Le cho'o to nez chawé', na' bi gonle ga wká'n no benne' nezen', benne' žedó laže'le, san le gon ga yeyák choche'.

<sup>14</sup>Le we' laže' gánlensle yógo'te benách ka' chawé', na' gakle li laže' zi'nkze' Xanžo Dios. Cha' bi gakle chawé' law Xanžon', bi gak lé'elele-ne'. <sup>15</sup>Le gape chi'i kwinle nich bi wsán no benne' da' žonnze Dios chežo, na' nich bi gak no benne' ka to yixe' sła', da' wká'n ditjen le'e, nich bi gone' ga bi gakle chawé'.

<sup>16</sup>Le gape chi'i kwinle nich bi gonle nitole le'e da' bi naken chawé' o da' zka'n ka'ze da' naken la'y, kan ben Esaú, zi'n Israel, bennen' nich si'e to da' gawze' bete'e da' žala' si' lo ne'e dan' goke' xkwide' byo wale che xabe'. <sup>17</sup>Ba nnézkzelele kan gok che Esaú na' wdé na' katen' gónele' gata' chie' da' nnab xágake' law Dios nich gon chawé'e le'. Beyache' laže'le xe' le', san bi gota' latje yeyát laže' Esaú na' la'kze wnnaben' len yela' zbeže chie'.

<sup>18</sup>Kan žak chele bi naken kan gok chegak benne' Israel ka'. Wbíga'gake' légake' zanle to ya'a da' gak kanžo, da' wyeyen, na' beyák chol te ža dan' wžé' bejw gasj, na' gokle'e be'. <sup>19</sup>Béngakle' belbežo lozba'

ka', na' lezka' chi'i Dios, Bennen' bchalje'. Katen' béngekle' da' ki, na' góta'yoegakle' Moisés biž wchaljlen Dios légake'. <sup>20</sup>Ki bengake' dan' bi gok sóegekle' da' gož Dios légake', katen' wnné: "Cha' chejléj to bia yíxe'do'ze ya'a nga, žala' wžé'egake'-ba' yej, o wdégake'-ba' yag ntoche'." <sup>21</sup>Dan' blé'egekle' bcheble'en légake', na' Moisés wnné: "Zžébel'i'a, na' žzízel'i'a."

<sup>22</sup>Na'a, žala' žébežele le'e dan' zbíga'le zanle to ya'a da' nzin' Sión, na' gan zoa laž Dios ban, dan' nzin' Jerusalén che ya'abá, gan zej nnita' wbás zanle'e che Dios. <sup>23</sup>Zbíga'le gawze gan zej ndobe zi'nkze Dios, benne' ka' zej nyejw lágake' le'e yiche da' zoan ya'abá che Dios, na' lezka' gan zoa Dios, Bennen' zchi'a laže'e yógo'te benách ka', na' gan zej nnita' be' ka', be' gókgakkzen benne' chawe' ka', benne' ka' Dios beyone' légake' chawe'. <sup>24</sup>Zbíga'le law Jesúš, Bennen' ben choche' diža' koben' da' zka'n chawen', na' lezka' gan bde Jesusen' žen chie' da' žonen ga ženít law Dios žo'o, da' nakžen chawe' ka da' ben xchen Abel, zi'n Adán, dan' ben ga bzoa Dios Kaín, bi' bíche'be' Abel na' chela'ale.

<sup>25</sup>Che len, le gape chi'i kwinle nich bi wzoale chela'ale Bennen' zchalje'. Bi belagak benne' ka' bží'igake' che bennen' blíže' légake' lo yežlyó nga. Lezka' gaken chežo, bi yelažo cha' wží'ižo che Bennen' žlíže' žo'o, Bennen' zoe' ya'abá che Dios. <sup>26</sup>Ža na' wzíz yežlyó nga dan' benle chi'i Dios, san na'a ba bchebe laže'e, na' wnné: "Yetoze chi'i, na' kege yežlyoze wxiza', san lezka' ya'abá wxiza'." <sup>27</sup>Katen' wnné:

"Yetoze chi'i" da' ni žsedlen žo'o žala' yega'agak da' ka' gak zízegaken, da' ka' zej žen' yežlyó nga, na' ga'ngak da' ka' bi gak zízegaken, da' ka' zej žen' ya'abá che Dios. <sup>28</sup>Che len, dan' žala' gata' to latje chežo gan nna bia'žo, da' bi zizen, žala' yežo Dios: "Žóxkeno" na' lo yela' zen laže', na' lo yela' zžebe Le' žala' wká'n zenžone' kan žaz laže'e Le', <sup>29</sup>dan' nak Dios chežo ka to yi' da' wzía yin' da' kegle.

Da' žala' gonžo dan' žaz laže' Dios

**13** Žala' ží'itezlele lježle tole yetole. <sup>2</sup>Le chejsá' laže' žala' wzoale ližle no benne' lježle, benne' zi'ton' le'e gan zoale. Kate' bałe benách ka' bengake' ki, bnníta'gake' wbás che ya'abá ka' lížgake', la'kze bi gókbe'egekle' gókgake' wbás che ya'abá ka'.

<sup>3</sup>Le we' laže' benne' ka' zej nyejwe' liž ya ka žónlenle légake' tzen, na' gekle lezka' nyéwjle liž yan'. Le we' laže' benne' ka' želbía láže'gak benách ka' légake', kan zzáka'le le'e tzen len légake'.

<sup>4</sup>Žala' gapple ba la'ne yela' zchag na', na' benne' byo lo yela' li laže' chie' žala' sóalene' zo'le', dan' chog Dios chegak benne' ka' žóngake' da' kegle gátgake' to chi'ize, na' lezka' gone' chegak benne' ka' zka'n dítjgake' yela' zchag na'.

<sup>5</sup>Bi dan láže'le yela' gape, san le chaz laže' ka da' den chele na'a, dan' ba wnná Dios: "Batkle wka'na' le', na' bi kwej yichja' le'." <sup>6</sup>Ka' naken, gak nnažo dot láže'žo dan' znnan:

Xanžo Dios nake' Bennen'  
žáklene' neda'.

Bi žeba' bi da' gak gon no benne'  
chia'.

<sup>7</sup>Le we' laže' benne' ka' žape chí'igake' le'e, benne' ka' zsédgakle' le'e xtiža' Dios. Le wia da' chawe' da' žóngake', na' le gon kan žongake' lo yela' žejlé' chégake'.

<sup>8</sup>Toze kan nak Jesús, Benne' Criston', neje, na' na'a, na' to chí'ize. <sup>9</sup>Bi we'le latje benne' ka' zsédgakle' da' yoble, na' da' nžan' ka da' ba nzi' lo na'le, nich bi ché'gake' le'e ga yoble. Nak chawe' gon chochle yichj lázdo'le kan nak da' žonnze Dios chele, na' kege da' zsédgakle' kan zej nak da' že'j žawžo, da' bi gáklenen benne' ka' že' láže'gaken'.

<sup>10</sup>Zoa to bkog la'y chežo, gan bi de latje benne' ka' žóngake' žin che bkogen' da' zoalen diža' nežwn' da' zka'n chawe' dan' błan' zga'ale. <sup>11</sup>Bxoz blo che yo'o la'y na' bdie' xchengak bia beže ka' lo latje la'yte ni'a che dola', san bzéygake' belá' ka'ze chégakba' gan nak na'le žoa'a yež. <sup>12</sup>L<sup>ezka'</sup> wzaka' Jesusen' na'le žoa'a yež nich beyone' benách ka' chawe' len xchenkze'. <sup>13</sup>Le cho'o chjénlenžo Jesusen' tzen, la'kze kwejgak benách ka' žo'o lo yež, na' si'žo tzen len Le' dan' ben dítjgakle benách ka' Le'. <sup>14</sup>Bi zoa to yež chežo lo yežlyó nga da' zoan to chí'ize, san zbezzo to da' zan!. <sup>15</sup>Che len, žala' wká'n žéntezžo Dios, na' wkonlžo žin la Jesús, Benne' Criston'. Da' zka'n zenžo Dios naken ka to da' zdežo lawe' Le'. Žala' yežo Dios: "Žóxkeno" ni'a che da' nake' Le'. <sup>16</sup>Bi gal laže' gonle da' naken chawe', na' gáklenle lježle tole yetole, dan' nak da' ni ka to da' zdežo law Dios da' žaz laže'e Le'.

<sup>17</sup>Le gon kan znna xtiža'gak lježžo ka', benne' ka' žape chí'igake' le'e, na' le we' latje wchí'igakle' le'e, dan' žape chí'igake' yichj lázdo'le, kan žongak

benne' ka' žala' wloé'egekle' law Dios da' béngeke'. Le gon ki nich góngake' žin na' lo yela' žebél chégake', na' kege lo yela' nyache' laže' chégake', dan' bi yebélenlele žin da' góngake' lo yela' nyache' laže' chégake'.

<sup>18</sup>Le wchajljen Dios, na' le nnable' gáklenle' neto', dan' žxen láže'to' soa ži yichj lázdo'to', na' bi yesbagán' neto' zia, na' že' láže'to' góntezto' da' naken chawe'. <sup>19</sup>Da' nakže blo, žáta'yoela' le'e nnáblele Dios yegoé'e neda' to nez nich yelá'a gan zoale bayenže.

Dios žonne' chežo da' gáklenen žo'o

<sup>20</sup>Na'a, zcháljlento' Dios, Bennen' zka'n chawe' e žo'o, na' nake' Bennen' besbane' Xanžo Jesús, Benne' Criston' lo yela' got, Bennen' nake' Benne' Blo Wia Žila', dan' blalje' žen chie', da' žon chochen dižan' da' zka'n chawen', da' zoan to chí'ize. <sup>21</sup>Znnabloto'-ne' gone' ga gakle dot chawe' nich gak góntezle da' naken chawe', na' gonle kan žénele' Le', nich gone' ga gakle kan žénele' Le', dan' nakle che Jesús, Benne' Criston'. iGá'nteze žen Benne' Criston! Ka'kze gaken.

<sup>22</sup>Žáta'yoela' le'e, zí'na'do' ka', si' lo na'le diža' ni da' zzejni'ilen le'e, dan' láte'do'ze nak da' ni da' zzoja' chele. <sup>23</sup>Žala' nnézlele ba bežój zkwidé' Timoteo, bi' lježžon', liž ya, na' cha' lá'tebe' ga zoa' ni, na' gónlenbe' neda' tzen yedjwíato' le'e.

<sup>24</sup>Le gape "Padiox" lježžo ka' žape chí'igake' le'e, na' lezka' yógo'te benne' ka' Dios ba bebeje' che Leze'. Benne' ka' nníta'gake' yežlyó Italia nga, na' žejlé'gake' che Benne' Criston', žápegake' le'e "Padiox."

<sup>25</sup>Znnabla' Dios gon chawe' e yógo'tele le'e. Ka'kze gaken.

# DIŽA' DA' BZOJ ŽEDW

Žedw žape' "Padiox" benne'  
judío ka' žej nake' che Jesús

**1** Neda', Žedw, žapa' le'e "Padiox."  
Le'e na' nbáblenle chežinno  
kwe' lježgak benách Israel ka', na'  
náslasle dot yežlyó nga. Naka' wen  
žin che Dios, na' che Xanžo Jesúš,  
Benne' Criston'.

Dios žonne' yela' žejni'il chežo

<sup>2</sup>Zí'na'do' ka', kate' gak bi da'  
gaken chele dan' si' bian' le'e,  
žala' yebélele dot láže'le <sup>3</sup>dan'  
nnézkzelele, kate' bi da' žaken  
chele da' zzi' bian' le'e kan žeje'le  
che Benne' Criston', da' ni žsedlen  
le'e gakle zen láže' kate' zzáka'le.  
<sup>4</sup>Le we' láže' gak dot li láže' yela'  
zen láže' chele, nich gakle benne'  
žejni'igekle', na' bi be yáželele che  
da' ki.

<sup>5</sup>Cha' zoa no benne' ládjwle  
le'e, benne' bi žejni'ile' da' ki,  
žala' nnable' Dios, na' Dios na'kze  
wnežjwe' yela' žejni'il chie', dan'  
znežjwe' dot láže' chegak yógo'te  
benách ka', na' bi žek zi'le' gonnén'  
chežo. <sup>6</sup>Na'a, no benne' bi da'  
znnable' Dios, žon byenen chejli'e  
chie' Le', na' bi gak chope láže'e. No  
benne' žak chope láže'e, žaken chie'

kan žak che bebe da' zejzen law  
nisdo' katen' žak be' da' ztan nisen',  
na' nisen' zchen' nile na'le. <sup>7</sup>No  
benne' žaken chie' ki bi gak wxeén  
láže'le bi da' si'e da' wnežjw Xanžon'  
chie'. <sup>8</sup>Bennen' zda láže'le bi zžel-le'  
nakle gone'.

<sup>9</sup>Cha' zoa no benne' lježžo, benne'  
žejli'e che Benne' Criston', na' no  
no nake' yežlyó nga, žala' yebéle'  
dan' ba nake' benne' zaka' law Dios.  
<sup>10</sup>Benne' lježžon', benne' nape' yela'  
wnni'a, žala' yebéle' kate' žon Dios  
ga biž žxen láže'le dan' nape'. No  
benne' žxen láže'le yela' wnni'a  
chie', gak chie' kan žak che yeje  
yíxe'do', la' zdete chen. <sup>11</sup>Ki naken,  
dan' gak che bennen' kan žak che  
yeje yíxe'don', katen' zla' wbíž, na'  
zzeyle'en, na' la' zbižte yixen', na'  
zyinnj yéjedo' chen, na' znitile yela'  
xtan chen. Lezka' gaken che bennen'  
nape' yela' wnni'a, nitle' kate' ne  
žone' žin žilje' yela' wnni'a na'.

## Da' zzi' bia' žo'o

<sup>12</sup>Ba nez zen gaken che bennen'  
zzeole' da' zzi' bia' le'. Kate' ba  
bežoje' chawé', na' gata' yela' nban  
da' zejlí kanne chie', da' bchebe  
láže'le Dios wnežjwe' chegak benne'  
ka' zej nži'ile' Le'. <sup>13</sup>Kate' bi da' žak

chežo da' žonen ga yénelžo gonžo da' kegle, bi žala' nnažo: "Dios zzi' bi'e ž'o nich gonžo da' kegle." Dios bi zzi' bi'e nitó benne' nich gone' da' kegle. <sup>14</sup>Na'a, cha' no benne' zoa bi da' žak chie' da' zzi' bian' le' nich gone' da' kegle, žaken ki dan' zze laže'e da' kegle, na' da' ni benen ga gónele' gone' da' kegle. <sup>15</sup>Da' zze láže'žo da' kegle žonen ga žonžo dola', na' kate' ba benžo dolan', la' dola' na'ze žesbagan' ž'o zia, da' gonen ga gatžo.

<sup>16</sup>Zi'na'do' ka', bi gon laže'l kwinle. <sup>17</sup>Yógo'te da' naken chawe', na' yógo'te da' naken dot da' li, da' ka' zzi'žo, zá'gaken zaka' žale, na' zžójgaken gan zoa Xažo Dios, Bennen' bene' da' ka' želyép yes ya'abá, da' ka' zchá'gaken, san Le' bi zcha' kwine', na' bi zche'e kan žone', na' zónnteze' da' naken chawe' chežo. <sup>18</sup>Kan žénekzele Dios, bene' ga nakžo benách kobe chie' ka'. Bkonle' žin diža' chien' da' naken dot da' li, nich gakžo ka to weláp nežw chie' ladjw yógo'te benne' ka' benkze' Le'.

### Da' zka'n zenžo Dios da' naken dot li laže'

<sup>19</sup>Che len žapa' le'e, zí'na'do' ka', yógo'tele žala' soale yénlele, san bi žala' nnétele, na' bi žá'atele. <sup>20</sup>Bennen' la' zžá'at'ie' bi žone' da' naken chawe' law Dios. <sup>21</sup>Che len, le wzóa chela'ale yógo'te da' bi naken chawe', na' yógo'te da' kegle da' nyanle'en yežlyó nga, na' lo yela' gaxjw laže' le gon choch dižan' da' yo'on lo yichj lázdo'le, dan' gak gonen ga yelale.

<sup>22</sup>Na'a, le gon kan znna diža' ni, na' kege chejzé nágzelen. Cha'

yénzelele diža' ni, la' kwínzele gon láže'lele. <sup>23</sup>No benne' žénele' diža' ni, na' bi žone' kan znnan, benne' ni nake' ka to benne' zwie' lawe' lo yej wan, <sup>24</sup>dan' zwia kwine', na' zeyeje', na' la' žal láže'tie' kan znnne'e. <sup>25</sup>Na'a, no benne' bi žal láže'e da' ženle', san zzi' lo ne'e da' wnnakze Dios da' naken dot da' li, da' gak gonen ga yelažo, na' cha' ga'ne' choch, na' gónteze' kan znnna xtiža' Dios na', gak chawé' che bennen' lo yógo'te da' žone'.

<sup>26</sup>Cha' no benne' ládjwle le'e žekle' nak li laže' kan zka'n zene' Dios, san cha' bi žape chie' lože'e nich bi nnaze' ka', bennen' žon laže'l kwine', na' bi žaz laže' Dios kan zka'n zen bennen' Le'. <sup>27</sup>Da' zka'n zenžo Dios, da' naken dot da' li, na' da' naken li laže', naken gáklenžo xkwide' wzebe ka', na' no'le wzebe ka', katen' želzaka' benne' ka', na' nich bi gakžo toze len da' kegle da' naken che yežlyó nga.

### Žala' gak tlebe kan gapžo benách ka' ba la'ne

**2** Zi'na'do' ka', cha' žeje'le' che Xažo Jesús, Benne' Criston', Benne' zente, bi žala' wchale kan gaple ba la'ne to to benne'. <sup>2</sup>Cha' chaz to benne' gan ndoble le'e, na' ngo'e xben ne'e da' naken oro, na' nakwe' laže' da' záka'le'en, na' cha' chaz yetó benne' yáche'do', na' nakwe' laže' ka'ze, <sup>3</sup>na' cha' gaple ba la'ne bennen' nakwe' laže' da' záka'le'en, na' ye'le-ne': "Wže'len neto' ga nak chawe' ni" san ye'le benne' yáche'don': "Na'ze wzé" o ye'le-ne': "Wžé' lo yo nga." <sup>4</sup>Cha' ki gonle, na' wcha'le kan žaple ba la'ne

to to lježle, na' gon kwinle ka to benne' zchi'a laže'e lježe' ka', na' bi gak chawe' kan sa' láže'le.

<sup>5</sup>Zí'na'do' ka', le wzé nag da' ni. Dios wžekze' benne' ka'zej nake' yache' yežlyó nga, nich gata' yela' wnni'a chégake' lawe' Le' dan' žejlé'gake' che Benne' Criston', na' gata' latje chégake' gan znna bi'e Le'. Gata' chégake' dan' bchebe laže' Dios wnežjwe' chegak benne' ka'zej nži'ile' Le'. <sup>6</sup>Le'e zka'nle benách yache' ka' ka'ze, na' žaple ba la'ne benne' wnni'a ka'. Benne' wnni'a ka' ūsaka' zí'gake' le'e, na' zkon'gekle' le'e žin. Lezka' zdégake' le'e lo na'gak benne' yolawé' ka'. <sup>7</sup>Benne' wnni'a ka' lezka' znne zí'gake' che la Jesúš, Benne' Criston', dan' záka'le'en, na' kan nzi' le' Zí'in Dios lezka' le'e nzi' lale zí'in Dios dan' nakle toze len Le'.

<sup>8</sup>Žonle da' chawe' cha' žonle dot kan nak da' bchi'le Dios zo'o da' naken blo, dan' nyejwn le'e yiche, na' znnan: "Žala' zí'ilō lježo' kan nzi'il kwino!." <sup>9</sup>Na'a, cha' zcha'le kan žaple ba la'ne to to benne', žonle dola', na' nbága'le zia lo xtiža' Dios, dan' bi žonle kan znna xtiže'e. <sup>10</sup>Cha' žon to benne' dot kan znna xtiža' Dios, san cha' wchixle' kan nak toze da' znna xtiže'e, ba nbage'e zia che dot da' znna xtiže'e. <sup>11</sup>Dios na'kze wnné': "Bi gono' dola' da' zka'n ditjen yela' zchag na'" na' lezka' wnné': "Bi goto' benách ka'." Na'a, cha' bi žono' dola' da' zka'n ditjen yela' zchag na', san žoto' benách ka', nbago'o zia che dot da' wnnakze Dios. <sup>12</sup>Kan nnale, na' kan gonle, žala' gonle dot kan žala' gongak benne' ka' wchi'a laže' Dios

légake' kan znna xtiže'e, da' bchalje' nich yelažo. <sup>13</sup>Benne' ka' bi žeyache' láže'gekle' ljéžgake' ka', wchi'a laže' Dios légake', na' bi yeyache' láže'le' légake', san benne' ka' žeyache' láže'gekle' ljéžgake' ka' yežójgake' chawe' kate' Dios wchi'a laže'e légake'.

### Da' žala' gonžo dan' žejle'žo che Jesúš

<sup>14</sup>Zí'na'do' ka', bi be zaka' cha' to benne' nnaze': "Žejli'a che Benne' Criston'" san bi žone' da' naken chawe'. Bi gak yelá bennen' cha' nnaze' žejli'e chie' Le'. <sup>15</sup>Cha' zej nnita' lježžo ka' žejlē'gake' che Benne' Criston', na' cha' bi de da' gákwgake', na' bi de da' gáwgake', <sup>16</sup>na' cha' to benne' ladjwle le'e ye'ze' légake': "Binlo le yeyéj ližle; ba beljle" san cha' bi be wnežjwe' chégake' dan' želyázjele', bi góklene' légake'. <sup>17</sup>Lezka' žaken che no benne' znna' žejli'e che Benne' Criston'. Cha' bi žone' da' zej nak bian' nak li laže' kan žejli'e chie' Le', bi be zaka' yela' žejlē' chien'.

<sup>18</sup>Wak no benne' yi'e lježe': "Le' znno' žejli'o che Benne' Criston', na' neda' žona' da' naken chawe'. Bi gak wloe'elo' neda' žejli'o che Benne' Criston' cha' bi zoa da' naken chawe' da' žona'." <sup>19</sup>Le' znno' žejli'o zoa toze Dios. Nak chawe' dan' znno'. Lezka' žejle'gak be' xiwe' ka' zoe' Le', na' žzízegaken dan' zžébegaken Le'. <sup>20</sup>Le', benne' bi be nnezlo'. Žala' nnézkzel' cha' zoa no benne' znna' žejli'e che Benne' Criston', san bi žone' da' naken chawe', bi be zaka' yela' žejlē' chien'. <sup>21</sup>Nak bia'

Bran, xažo wdé, bežoje' chawe' law  
 Dios ni'a che da' bene', katen' bdie'  
kwide' Isaak chien' law Dios. Bdie'-  
 be' kan žongak benáčh ka' zdégake'  
 da' zzéygake' law Dios, la'kze bi  
 bzeye'-be'. <sup>22</sup>Na'a gak nnézlele kan  
 goken che Bran na'. Dan' bene' gok  
 bian' bejli'e che Dios. Che len nak  
 bia' gok li laže' kan bejli'e che Dios  
 ni'a che dan' bene'. <sup>23</sup>Ki goken, na'  
 nyejw le'e yiche la'y da' znnan:  
 "Bran bejli'e che Dios, na' Dios  
ble'ele' da' bene' ka to da' benen ga  
 beyake' chawe' lawe' Le'." Che len  
wzí' le' "Ljež Dios."

<sup>24</sup>Na'a, zlé'ekzelele nak bia' žežój  
 chawe' to benne' ni'a che da' žone',  
 na' kege dan' znnaze' žejli'e che  
 Dios. <sup>25</sup>Lezka' goken che Rahab,  
 no'len' bi'e benáčh ka' latje. Lezka'  
 nak bia' bežoje' chawe' dan' wzóa  
 to da' chawe' da' bene', dan' bene'  
 katen' wdape' ba la'ne benne'  
 wíálan ka', na' góklene' légake' nich  
 beyéjgake' nez yoble. <sup>26</sup>Kan žak che  
bela' žen chežo cha' bi yo'on be', ba  
 naten, lezka' nak che da' žežle'žo  
 che Benne' Criston' cha' bi zoa da'  
 žonen, bi be zakan'.

### Da' znnna lóže'žo

**3** Zí'na'do' ka', bi gonte kwinle  
 benne' wsedle ka', dan' ba  
 nnézkzelele wchi'a laže' Dios žo'o  
zí'le'eže, nolžo zsedlžo benáčh  
 ka' cha' bi gonžo kan žala' gonžo.  
<sup>2</sup>Yógo'težo žonžo da' zan da'  
zchíxelžon. Cha' bi zchixle no  
 benne' lo da' zchalje', nake' dot  
 chawe', na' gak nna bia' kwine' lo  
 yógo'te da' žone'. <sup>3</sup>Kate' zgo'ožo  
 ya žoá'agak bia ka' nich gonžo ga  
 góngakba' kan žénelžo, gak nna

bia'žo légakba' nich góngakba'  
žin chežo. <sup>4</sup>Le wia lezka' kan žak  
 chegak barkw ka'. La'kze nakle'e  
zen to barkw, na' žakle'e be' da'  
zzejen barkwn', san to da' kwíde'ze  
 nak xne'e yag barkwn' da' zzechjen  
 barkwn' nich chejen gáte'teze  
 žénele bennen' žse'en. <sup>5</sup>Lezka' nak  
lóže'žo. La'kze to da' do'ze naken,  
da' zen naken da' znnna lóže'žon'. Le  
wia nga kan žon to yi'. La'kze to  
yí'do'ze zbibžo, wak wzeyen to ya'a  
zen. <sup>6</sup>Lezka' lóže'žon' naken ka to  
yi'. Yógo'te da' bi naken chawe' da'  
žaken yežlyó nga znnna lóže'žon', na'  
dan' naken toze len bela' žen chežo,  
che len žonen ga zbaga' zia dot da'  
nakžo. Naken ka zbek yi' da' znnna  
lóže'žo, na' wak gonen ga nbágážo  
zia lo yógo'te da' žonžo, na' dan'  
ki znnna lóže'žon', naken kan žala'  
yi' da' bxeñ da' xiwe'. <sup>7</sup>Yógo'te bia  
yixe' ka', bia zdágakba' lo yo, na' bia  
ka' zoa xílgakba', na' bia ka' žzobe  
kwíngakba' lo yo, na' lezka' yógo'te  
bia ka' nnítá'gakba' lo nisdo', gak  
nna bia'gak benáčh yežlyó nga  
légakba', <sup>8</sup>san bi gak nitó benne'  
nna bi'e lože'e, dan' znnna lóže'žo da'  
kegle, na' bi gak no benne' wsejwe'  
xnezen, na' znnale'e lóže'žon' da'  
naken ka nis snia che bele snia ka'.  
<sup>9</sup>Len la' lóže'žo na'ze žliž cháwe'žo  
Xažo Dios, na' lezka' žliž ditjžo  
benáčh ka', benne' ka' ben Dios  
kan nakkze' Le'. <sup>10</sup>Ki naken, len la'  
lóže'žon' žliž cháwe'žo benne' ka', na'  
žliž ditjžo benne' ka'. Zí'na'do' ka',  
bi žala' gonžo ki. <sup>11</sup>Cha' zoa to ga  
žal nis dzi', bi žal nis zene' la' na'ze.  
<sup>12</sup>Zí'na'do' ka', to yag higo bi gak  
kwian da' zbia yag olibo, na' lezka',  
to lba uba bi gak kwian da' zbia yag

higon'. Lezka', bi gak gal nis zene', na' nis dzi' nitó gan žal nis.

**Yela' ſejn'il da' naken dot li laže'**

<sup>13</sup> Cha' zoa to benne' ládjwle le'e, benne' žake' da' zenle'e, na' ſejn'il le'e, lo yela' gaxjw laže' chie' žala' wloe'e' nake' ki ni'a che da' chawe' da' žone'. <sup>14</sup> Na'a, cha' zgē'elele lježle ka', na' žonle žin nich wká'n zengak benách ka' le'e, bi žala' wká'n zen kwinle kan nak yela' ſejn'il chelen'. No benne' žone' ki žon laže'e, na' bi žone' da' naken dot da' li. <sup>15</sup> Yela' ſejn'il ki bi naken da' znezjw Dios, san che yežlyó nga naken, na' che benách ka' nníta'gake' yežlyó nga, na' che da' xiwe'. <sup>16</sup> Benne' ka' zgē'egekle ljéžgake' ka', na' ženegekle' wká'n zengak benách ka' légake', lezka' želdíl diže'e, na' žongake' yógo'te da' kegle ka'.

<sup>17</sup> Benne' ka' jez nape' yela' ſejn'il da' znezjw Dios:

Žongake' da' naken dot chawe', na' želbeze' chawe'do'.

Zej nake' zen laže', na' jez nake' gaxjw laže'.

Žeyache' laže'gekle' benách ka', na' jez nake' ži'i laže'.

Nak tlebe kan zchi'a laže'gake' ljéžgake' ka'.

Bi znnégake' chegak ljéžgake' ka'.

<sup>18</sup> Benne' ka' že' laže'gake' wká'n chawe'gake' da' žaken, zgá'ngake' chawe'do', nich gak chawe' dot da' jez nake'.

**Benne' ka' zdan láže'gake' yela' gape**

**4** <sup>č</sup>Biz chen' zdil-le, na' zdil dížale? Ki žaken chele dan' zdan láže'le da' zan da' zdan láže'le

to tole, na' che len zdíl-lenle lježle ka'. <sup>2</sup> Da' zan da' ženele, na' dan' bi zzi'len, che len žotle benách ka'. Zze láže'le da' jez nap lježle ka', na' dan' bi zzi'len, che len zdíl dížale, na' zdíl-le. Bi zzi'le da' ženele, dan' bi znnablen law Dios. <sup>3</sup> La'kze zoa bi da' znnable, bi be zzi'le, dan' bi nak chawe' kan znnablen, dan' ženele da' znnablen nich wkónlelen žin kan žaz láže'zele. <sup>4</sup> Le'e, benne' ka' ba wléj yichjle Dios, čBi nnézlele cha' žka'n zenle da' ka' jez nnitan' yežlyó nga, ba beyakle ka to benne' bi zle'ele' Dios chawe'? No benne' žka'n zene' da' ka' jez nnitan' yežlyó nga, bi gak wká'n zene' Dios, na' ba beyake' ka to benne' bi zle'ele' Dios chawe'. <sup>5</sup> Bi znnaze da' nyejw le'e yiche la'y, da' znnan: "Dios bene' be' da' nakkžo nich gak ži'ilžo Le', na' žekle' chežo cha' zbej yichjžo-ne!"

<sup>6</sup> Na'a, da' žonn Dios chežo nakle'en zen, dan' nyejw le'e yiche la'y, da' znnan: "Dios žejwe' xnežgak benne' ka' žka'n zen kwíngake', san dot laže' e žon chawe' benne' ka' jez nake' gaxjw laže'." <sup>7</sup> Che len:

Le soa gaxjw laže' law Dios.

Le tile da' xiwe', na' wzonnen gan zoale.

<sup>8</sup> Le we' laže' sóalenle Dios, na' Le' yedjsóalene' le'e.

Le'e, benne' dola' ka', le gak chawe', na' biž gonle dola'.

Le'e, nólele le'e žak chóplele, na' chope da' nži'ile, le gon chawe' yichj lázdole.

<sup>9</sup> Le gak nyache' laže', na' le kwež, na' le kwež nyache'.

Na'a žžízele san žala' kwéžele. Žebélele san žala' gak nyache' láže'le.

**10** Le gak gaxjw laže' law Xanžon',  
na' Le' le'ele' le'e chawe'.

### Bi žala' nnežo che lježžo ka'

**11** Zí'na'do' ka', bi nnele che lježle tole yetole. No benne' znnie' che lježe', na' zbej bi'e da' žone', benne' ni znnie' che xtiža' Dios, na' znnie' che da' wnnakze' Le'. Na'a, cha' zži'le che xtiža' Dios, žon kwino' benne' zchi'a laže'en', na' bi žono' kan znnna xtiže'e'. **12** Na'a, toze nak Dios, Bennen' bchalje' xtiže'e', na' lezka' nake' Bennen' zchi'a laže'e da' žonžo. Lekze' gak yeslē' benách ka' o wžia' yi'e benne' ka'. Na'a, čnožkze žon kwino', zbej bi'o lježo'?

### Bi nnežlžo da' gak wxé wižj

**13** Na'a, le wzé nag, nôlele znnale: "Wxé wižj chejto' yežen', na' soato' ga na' to yiz, na' da' zan da' gá'wto', na' góte'to', na' ki gáta'le'e mežw cheto!" **14** Bi nnézlele da' gak wxé wižj. ¿Nakxkze nak chežo, kan zoažo yežlyó nga? Nakžo ka bichlá da' zlan' to chí'ido'ze, na' la' ženitten. **15** Che len, ki žala' nnale: "Cha' yénele Xanžon', soažo nbanžo, na' to yetó da' gonžon." **16** Na'a, le'e, lo yela' zka'n zen kwin chele zza' laže'le da' zen da' gonle. Yógo' te da' ki da' žonlen zej naken da' kegle ka'. **17** Cha' nnežlžo da' naken chawe' da' žala' gonžon, na' cha' bi gonžon, žonžo doł'a'.

### Žedw žse'e laže'gak benne' wnni'a ka'

**5** Le'e, benne' wnni'a ka', le kwež, na' le kwéžeya'a, dan' za' ža lé'elele yela' yache'. **2** Ba nbia yi' yela' wnni'a chele, na' beldo' ka' che laže' ba btégakba' da' žákwlé.

**3** Ba nak che mežw oro, na' mežw plat chele kan nak che ya da' ba wzén xche'en, na' xche'e na' naken ka to da' žesbaga' le'e zia, na' gaken chele ka to yi' da' wzia' yin' le'e. Ki gaken chele dan' bsa' btoble chezle yela' wnni'a da' yesbagan' le'e zia že ze lawte že kate' wchi'a laže' Dios le'e. **4** Le wia nga. Benne' wen žin ka', benne' belápgake' yez chele, znnab yóžgekle' lázjwgake' dan' bi wdízjwle légake', na' dan' znnabgak benne' wen žin ka' ba ženlen law Xanžon', na' Le' zchi'e ni'a ne'e zan ka'. **5** Bkónlele žin yela' wnni'a chele lo yežlyó nga, na' we'j bdáwtiezle da' znnaze chele. Ben zen kwinle, san za' žin že kwia yi'le. Gak chele kan žak che beže, bia ženne', ba bžin že gotžo-ba'. **6** Zchogle chegak benne' chawe' ka' gátgake', na' légake' bi zži'igake' chele le'e katen' žotle légake'.

### žala' gakžo zen laže' na' wcháljlenžo Dios

**7** Na'a, zí'na'do' ka', le gak zen laže' na' jezte že yelá' Xanžon'. Le wia kan žon benne' žaz že'ne'. Lo yela' zen laže' zbeze' yéjwsio', na' yejw che byo' yejw, na' te na' yelape', na' yez zan yetobe'. **8** Lezka', zí'na'do' ka', le'e na' žejle' che Benne' Criston', le gak zen laže', na' le gon choch kwinle, dan' za' gawze že yelá' Xanžon'. **9** Zí'na'do' ka', bi nnele che lježle tole yetole, nich bi bágale zia. Le wia nga. Za' žin že yelá' Xanžon', Bennen' wchi'a laže'e da' žonle. **10** Zí'na'do' ka', le wia kan gok chegak benne' ka' bcháljgake' lo wláz Xanžo Dios. Zej nake' ka to da' zloe'elen žo'o kan žala' gakžo zen

laže' la'kze sáka'žo. <sup>11</sup>Na'a, znnažo chégake'zej nake' benne' ka' gok yela' ba nez zen chégake', benne' ka' wzák'a'gake'. Ba bénlele kan gok che Job. Goke' zen laže' la'kze wzák'a'l'i'e, na' nnézlele da' ben Xanžo Dios chie' wdé na'. Xanžo Dios zeyache' láže'le'ele' žo'o, na' že' laže'e žo'o.

<sup>12</sup>Zí'na'do' ka', da' ni da' žapa' le'e naken to da' zenle'en, da' znnan: bi gon chochle xtíža'le ni'a che Bennen' zoe' ya'abá che Dios, na' kege ni'a che da' zej nnita' yežlyó nga, na' kege ni'a che bíteteze da' žon chochle xtíža'le ni'a chen. Kate' nnale: "o" žala' nnázele: "o." Kate' nnale: "o" žala' nnázele: "o.o." Ki žala' gonle, nich bi bága'le zia law Dios.

<sup>13</sup>Cha' zzaka' no benne' nake' toze len le'e, žala' wcháljlene' Dios. Cha' zoa no benne' žebele', žala' gole' da' žoe lawn Dios. <sup>14</sup>Cha' no benne' žake' yižwé', benne' nake' toze len le'e, žala' wliže' benne' gole ka', benne' žape chí'igake' benách ka' che Benne' Criston', nich wcháljlengake' Dios, na' nnábgekle' Le' yeyone' benne' yižwén!. Žala' chébgake' le' set, na' wcháljlengake' Dios lo la Xanžon.

<sup>15</sup>Kate' wcháljlengake' Dios, na' žejlé'gake' yeyón Benne' Criston' benne' yižwén', naž gon Xanžon' ga yeyase', na' cha' bene' dola', yenít lawe' le'. <sup>16</sup>Che len, cha' nbág'a'le dola' le yexóalapan' tole len yetole, na' le nnab lo wláz lježle tole yetole law Dios nich yeyone' le'e, na' yežój yižwén' da' žakle. Da' zchaljlen benne' chawé' Dios, dan' žone' dot laže'e, záka'le'en. <sup>17</sup>Lías, bennen' bchalje' lo wláz Dios že ni'te, goke' benne' che yežlyó nga kan nakžo žo'o, san katen' bcháljlene' Dios, na' wnnable' Le' nich bi gak yejw, na' bi gok yejw lo yežlyón' chonne yiz yo'o gachje. <sup>18</sup>Wdé na' bcháljlene' Dios da' yoble, na' beyák yejw, na' bnežjw da' gozgak benne' ka' wnníta'gake' že ka'.

<sup>19</sup>Zí'na'do' ka', da' ni žala' nnézlele. Cha' chixle to benne' nake' toze len lježžo ka', benne' nónbi'e da' naken dot da' li, na' cha' zoa no benne' gone' ga yeyát laže'e, <sup>20</sup>na' bennen' bene' ga beyát laže' benne' dolan', bennen' wdié' ga yoble, yeslé' benne' dolan' lo yela' got, na' gone' ga yenít law Dios dola' zan da' wbaga' bennen'. Ka'kze gaken.

# DIŽA' NEŽW DA' BZOJ BEDW

Bedw žape' "Padiox"  
benne' ka' che Jesús

**1** Neda' Bedw, naka' wbás bsela'  
Jesús, Benne' Criston'. Zzoja'  
chele le'e yiche ni, le'e náslasle z'i'to'  
gan že' lažle, na' zoale gan nbab  
Ponto, na' gan nbab Galasia, na' gan  
nbab Kapadosia, na' gan nbab Asia,  
na' gan nbab Bitinia. <sup>2</sup>Xažo Dios  
wžekze' le'e lo na' Dios Be' La'y kan  
wnnakze' gone' že na' nich gakle  
che Leze', na' nich gonle kan znna  
xtiža' Benne' Criston', na' gakle dot  
chawe' ni'a che xchene'. Znnabla'  
Dios gon chawe'e le'e, na' wká'n zie'  
yichj lázdo'le.

## Da' žxen láže'tezžo

<sup>3</sup>iGa'n zen Dios, Xa Xanžo Jesús,  
Benne' Criston'. Lo yela' žeyache'  
láže' zen chie' bnežjwe' yela' nban  
kobe chežo. Dan' besbane' Jesusen'  
lo yela' got žxen láže'tezžo Le',  
<sup>4</sup>nich gata' chežo da' žape chi'i Dios  
chežo ya'abá chie'. Dan' žape chi'i  
Dios, dan' wnežjwe' chegak benách  
chie' ka', bi nitlen, na' bi žan', na' bi  
yeyožen. <sup>5</sup>Dan' žejle'le che Dios, lo  
yela' wak zen chie' gape chi'e le'e  
na' jezje že na' yebélenlele yela'  
žeslá da' naken dot li láže', dan' ba

bkweze' chežo, na' dan' wloe'ele' law  
ža ze lawte že na'.

<sup>6</sup>Che len žebéle'elele, la'kze na'a  
zzáka'le to chi'ido' dan' nníta'gak da'  
zan da' žsaka' zí'gaken le'e. <sup>7</sup>Dan'  
zzóelele da' zan da' žsaka' zí'gaken  
le'e, nak bia' nak dot li laže' kan  
žejle'le che Benne' Criston'. Ki žon  
cháwe'žo oro, da' nitlen, na' žon  
cháwe'žon lo yi'. Che len, kate'  
ba nzi' bia' yela' žejle' chele, da'  
záka'žen ka oro na', na' gak yela'  
zen, na' yela' ba la'ne chele že na'  
wloe'le law Jesús, Benne' Criston'.

<sup>8</sup>Le'e nží'iilele Benne' Criston'  
la'kze batkle blé'elele-ne'. Žejle'le  
chie' Le' la'kze bi zlé'elele-ne' na'a,  
na' žebéle'elele. Yela' žebél chele  
da' nakžen zen ka gak wloe'elžo,  
naken dot li laže'. <sup>9</sup>Ki naken dan'  
žebélenlele yela' žeslá che be'  
nákkzele dan' den chele dan' žejle'le  
che Benne' Criston'.

<sup>10</sup>Ža ni'te benne' ka', benne'  
bcháljgake' lo wláz Dios, bsédgekle'  
dot kan nak yela' žeslá na', dan'  
den chežo na'a, na' bcháljgake'  
kan nak da' chawe' da' žonn Dios  
chežo. <sup>11</sup>Dios Be' La'y, Benne' nake'  
toze len Benne' Criston', bzejni'iile'  
zga'ale benne' ka' bcháljgake' lo  
wláz Dios, na' bloe'ele' légake' kan

žał'a' saka' Benne' Criston', na' lezka' kan gak yela' zen chie' te na'. Che len be' láže'gake' nnézgekle' batx gaken, na' noz benne' gak chie' dan' bloe'el Ben' nake' toze len Benne' Criston' légake'. <sup>12</sup>Dios bloe'ele' benne' ka' bcháljgake' lo wlaze' Le', bi naken to da' lé'egekle' légake', san žo'o ni le'elžo dan' bcháljgake' chen, na' le'e žénlele na'a kan nak chen. Benne' ka', benne' zzoa lígake' diža' chawen', zcháljgake' che da' ni, na' yela' wak che Dios Be' La'y zóalenen légake'. Dios chežo, Bennen' zoe' ya'abá, žsele'e Dios Be' La'y na' chežo. Ženegekle wbás che ya'abá ka' nnézgekle' kan nak dan' bcháljgake' ža ni'te.

### Dios žliže' žo'o nich gakžo la'y

<sup>13</sup>Che len, le gak ban laže' na' le kwézteze cháwe'do'. Dot láže'le le wxén laže' Dios gon'ne' da' chawé' chele ža na' kate' yelá' Jesús, Benne' Criston'. <sup>14</sup>Le gon kan znnna xtiža' Dios, na' bi we'le latje da' zdan láže'le chen' le'e ga yoble, kan benle kate' bi na' gónbia'le Dios. <sup>15</sup>Žała' gakle la'y lo yógo'te da' žonle, kan la'y nak Dios, Bennen' bliże' le'e nich gakle chie' Le'. <sup>16</sup>Lezka' nyejw le'e yiche la'y, kan wnnakze Dios, da' znnan: "Le gak la'y, dan' naka' neda' la'y."

<sup>17</sup>Znnale: "Xato" kate' zcháljlenle Dios, na' Le', nak tlebe kan zchi'a laže'e to to benne' kan nak da' ben to to benne' ka'. Che len žała' žébele Le' kate' ne zoale yežlyó nga, da' bi nakkzen lažle. <sup>18</sup>Dios beslē' le'e lo da' gokle ža na' katen' benle kan zej nak da' ka'ze ka' da' bdegak xa xto'le ka' lo na'le. Nnézkzelele

beya'we' le'e, kege len to da' kwia yin' kan zej nak oro, na' plat, <sup>19</sup>san len xchen Jesús, Benne' Criston', da' záka'le'en, dan' bde kwine', na' goke' ka to zila' dot chawé', bian' žótgake'-ba' law Dios nich yegá'a dola'. <sup>20</sup>Dios wžekze' Benne' Criston' zga'ale kate' bi na' gone' yežlyó nga, na' ža ni zoažo na'a bene' ga bloe'e lawe' nich gak gon chawé'e le'e. <sup>21</sup>Ni'a che da' ben Benne' Criston' žejele'le che Dios, Bennen' besbane' Le' lo yela' got, na' bene' ga nake' blo. Ka' naken, žejele'le che Dios, na' žxen láže'le Le'.

<sup>22</sup>Na'a, ba beyakle chawé' dan' žonle kan znna da' naken dot da' li, na' naken dot li laže' kan nží'ilele lježle ka', benne' ka' žejlé'gake' che Benne' Criston'. Che len, dot láže'le žała' ží'ilele lježle tole yetole. <sup>23</sup>Ba naple yela' nban kobe, kege dan' bnníta'gak benách ka' le'e, benne' ka' žatgakkze', san Bennen' zoakze' bnnite'e le'e, na' naljle ni'a che xtiža' Dios, da' naken ban, na' da' zoan to chi'ize. <sup>24</sup>Ki naken, dan' nyejw le'e yiche la'y da' znnan:

Yógo'te benách zej nake' kan  
nak yixe'.

Yela' xtan chégake' naken ka to  
yeje che yixen'.

Zbiž yixen', na' zbia yi' yejen'.

<sup>25</sup>San xtiža' Dios zoan to chi'ize. Diža' ni bžin chele ni'a che diža' chawen' da' zzenlto' le'e.

**2** Che len le wkán yógo'te da' kegle. Biž gon láže'le, na' bi wloé'ezele kwinle ka benne' chawé' ka' lawgak benách ka'. Biž gé'elele, na' bi nnele che lježle ka'. <sup>2</sup>Žala' dan láže'le da' naken che Dios Be' La'y nich gólele kan žongak bi' že'ndo'

ka', bi' ka' zdan láže'gakbe' niže'. Ki žala' gonle na'zejte ža yelale, <sup>3</sup>cha' žákbe'elele nak Xanžon' ž'i' laže'.

### **Benne' Cristo nake' ka to yej xe ban**

<sup>4</sup>Le biga' law Xanžon', Bennen' nake' ka to yej xe ban. Nake' ka to yej da' bzoagak benách ka' chela'ale, san naken to da' wžekze Dios da' zakan!. <sup>5</sup>Lezka', le'e nakle ka yej ban ka'. Le we' latje wkonle Dios le'e žin, nich gone' ga gakle ka to yodo' gan soakze Dios Be' La'y. Lo yodon' gakle ka bxoz ka', benne' zej nake' che Dios, na' lo na' Jesús, Benne' Criston', gak wdele da' ka' žonle law Dios, da' ka' žonle len yela' wak che Dios Be' La'y, dan' žaz laže' Dios.

<sup>6</sup>Che len nyejw le'e yiche la'y da' znnan:

Zgo'a to yej blo lo ze'e che yež

Sión,  
dan' wžekza' neda', na' dan'  
zakan!.

No benne' žejli'e chie' Le', bi  
chixle'.

<sup>7</sup>Lježto' ka', žejele' che Benne' Criston', na' nak yej ni chele to da' záka'le'en, san chegak benne' ka' bi žejlē'gake' che Benne' Criston', naken kan nyejw le'e yiche la'y, da' znnan:

Yej na' dan' bzoagak benne' wen  
ze'e ka' chela'ale,

na' gókgekle' ka'ze naken,  
yej ni ba naken yej blo lo ze'e.

<sup>8</sup>Lezka' nyejw le'e yiche la'y da'  
znnan:

Yej na' gonen ga chejchégwgak  
benách ka',

na' gonen ga chejbíxjgake'.

Da' li bejchégo'gak benne' ka' bi  
bejlē'gake' che Benne' Criston',

dan' bchíxgekle' katen' bzóagake'  
xtiža' Dios chela'ale. Dios wnnakze'  
góngake' ki.

### **No benne' ka' zej nake' che Dios**

<sup>9</sup>Le'e nakle benách ka' wžekze Dios. Yógo'tele nakle bxoz ka' che Benne' Wnná Bia' La'y. Nakle ka to yež da' naken che Dios na'kze. Nakle benne' chie' ka'. Ki nakle nich gak wzele diža' che da' zen ka' da' ben Dios, Bennen' blíže' le'e nich yežojle gan nak chol, na' chazle lo baní' chawe' chie'. <sup>10</sup>Zga'ale bi gokle benách ka' che Dios, san na'a ba nakle benách chie' ka'. Zga'ale bi beyache' laže'l nitó benne' le'e, san na'a Dios na'kze žeyache' láže'le' le'e.

### **Zoažo nbanžo nich gonžo kan žénele Dios**

<sup>11</sup>Zí'na'do' ka', nakle ka benne' zi'to' ka', zdázele yežlyó nga. Che len, žáta'yoela' le'e, bi we'le latje da' zdan láže'zele chen' le'e, dan' zdíl'-lenen be' nákkzele. <sup>12</sup>Le gon da' naken chawe' lawgak benách ka' bi zej nónbi'e Dios. Ki gaken, cha' yesbága'gake' le'e zia, na' cha' nnágake' nakle benne' wetw benách ka', gak lé'egkle yezika' benách ka' da' chawe' da' žonle, na' ža yelá' Xanžon' wkán zéngake' Dios ni'a che da' nákkzele le'e.

<sup>13</sup>Dan' nakle che Xanžon' le gape ba la'ne yógo'te benne' yolawe' ka', cha' nak benne' znna bi'e dot yežlyó nga, dan' nake' benne' wnná bia' blo,

<sup>14</sup>o cha' nak benne' znna bi'e to yež, bennen' bzoa benne' wnná bia' blo na' latje chie' nich sele' benne' ka' snia, benne' žóngake' da' zinnj, na' gape' ba la'ne benne' ka' žóngake'

da' naken chawe'. <sup>15</sup>Ki žénele Dios gonle nich wzóa žile benne' bi nneze ka', na' benne' ka' zej nchixle', kate' lē'egekle' da' naken chawe' da' žonle, na' bi be gak nnégake' chele.

<sup>16</sup>Le gak ka benne' ka' ba belágake', san bi wkónlele žin yela' nla chele nich gonle da' kegle. Ki žala' gonle:

Le gak ka benne' ndo'w ka' che Dios.

<sup>17</sup>Le gape ba la'ne yógo'te benách ka'.

Le žil'l lježle ka', na' le žebe Dios.

Le gape ba la'ne bennen' znna bi'e dot yežlyó nga.

**Da' wzaka' Jesúš zzejni'ilen  
žo'o kan gak chežo**

<sup>18</sup>Nólele lē'e nakle benne' ndo'w ka', le žebe benne' xanle ka', na' le gape-gake' ba la'ne, kégeze gaple ba la'ne benne' xanle ka', benne' zej nake' chawe', na' že' láže'gake' lē'e, san lezka' le gape ba la'ne benne' xanle ka', benne' zsaka' zí'gake' lē'e, lo žin da' žonle chégake'. <sup>19</sup>Cha' sáka'le, na' bi zoa biz'chen', na' cha' sóelelen dan' žéklele naken da' žénele Dios, naž yežojle chawe' law Dios. <sup>20</sup>Na'a, cha' žonle da' kegle, na' sel benne' yolaw' lē'e snia, znakxkze yebélenlelen la'kze len yela' zen laže' chele sóelele dan' gaken chele? San cha' nakle zen laže', na' zzóelele da' zzákale', dan' benle da' chawe', naž yežojle chawe' law Dios. <sup>21</sup>Dios bliže' lē'e nich sáka'le ki dan' wzáka'kze Benne' Criston' lo wlazle lē'e, na' bzoe' chele to da' zloe'elen lē'e kan žala' gonle. Žala' sóelele da' sáka'le kan bzoele' lē'e dan' wzake'e.

<sup>22</sup>Benne' Criston' bi be dola' bene', na' batkle ben laže'e.

<sup>23</sup>Katen' wnné dítjgake' chie' Le', bi beži'e chégake'.

Katen' bsaka' zí'gake' Le', bi btíl diže'e légake', san bde kwine' lo na' Dios, Bennen' zchi'a laže'e da' žonžo lo da' nak da' li.

<sup>24</sup>Benne' Criston' wzí'kze' dola' chežo lo bel'a' žen chie' katen' gote' lē'e yag kroze, nich gakžo žo'o ka benne' gat ka', na' biž gonžo dola', san soažo nbanžo nich gonžo da' chawe'. Le' goke' yižwé' lo wlazžo žo'o nich yeyakžo žo'o chawe' law Dios. <sup>25</sup>Gokle ka zila' ka' zdágakba' zej nnitlba', san na'a beyakle che Benne' Criston', Bennen' zwie' lē'e, na' žape chi'e be' nákkzele, na' nake' chele ka to benne' žape chi'e zila' ka'.

**Kan žala' gongak benne'  
ka' zej nžag ne'e**

**3** <sup>1-2</sup>lē'e, no'le ka', žala' gaple ba la'ne benne' byo che chele, na' cha' bi zejlē'gake' che xtiža' Benne' Criston', na' chejlē'gake' chie' Le' kate' lē'egekle' da' nak chawe' da' žonle, na' kan nakle gaxjw laže', na' kan žaple légake' ba la'ne, la'kze bi be že'le légake' kan nak che Benne' Criston'. <sup>3</sup>Yela' xtan chele bi naken da' zoan lázwele, kan zpa'le yichjle, na' kan zej nak da' ka' zej naken oro da' zkónlele žin, na' laže' da' záka'le'en da' nákwle. <sup>4</sup>Yela' xtan chele žala' gaken da' yo'on lo yichj lázdo'le. Yela' xtan da' zóatezen naken yela' gaxjw laže', na' yela' li laže', da' ka' záka'le'egaken law Dios. <sup>5</sup>Lezka' gok yela' xtan chegak no'le

ka' wnníta'gake' ža ni'te, no'le ka'  
bka'n zéngake' Dios. Bxen láže'gake'  
Le', na' wdápegake' ba la'ne benne'  
byo che chégake'. <sup>6</sup>Ki ben Sara.  
Bene' kan znna xtiža' Bran, benne'  
byo chien', na' bliže' le', na' wnné':  
"xan." Lezka' le'e gónlenle Sara na'  
tzen cha' gonle da' naken chawe', na'  
bi be žébele.

<sup>7</sup>L'e'e, benne' byo ka', žala' we'  
láže'le no'le che chele. Le gape-gake'  
ba la'ne, kégeze dan' bizej nape'  
kan nak yela' wale chele, san dan'  
lezka'zej nape' yela' nban na', da'  
žonn Dios chežo, da' naken tlebe  
ka da' den chele. Le gon ki, nich  
bi wsejw da' xiwe' xnezle katen'  
wcháljenle Dios.

### Sáka'žo la'kze žonžo da' naken chawe'

- <sup>8</sup>Da' žapa' le'e kate' ze lawte:  
Le gak toze tole len yetole  
yógo'tele.  
Le we' laže' lježle tole yetole.  
Le gak ži'i laže', na' zen laže'.  
<sup>9</sup>Bi yeži'ile che lježle.  
Bi gonle da' zia che no benne'  
gone' da' zia chele.  
Bi nne ditjle che no benne' znne  
ditje' chele.  
Ki žala' yecheble, nnáblele Dios gon  
chawe'e bennen', dan' bliž Dios le'e  
nich gak chawe' chele. <sup>10</sup>Ki naken  
dan' nyejw le'e yiche la'y da' znnan:  
No benne' žénele' yebélenle'  
yela' nban chie', na' kweze'  
cháwe'do',  
žala' wka'ne' diža' zi' ka', na' biž  
gon laže'e.  
<sup>11</sup>Žala' wka'ne' da' kegle, na' gone'  
da' naken chawe'.  
Žala' we' laže'e gánlene' lježe' ka'  
chawe', na' gónteze' ki.

<sup>12</sup>Xanžo žape chi'e benne' chawe'  
ka',  
na' zze nage' da' zcháljenle  
Le',  
san žsejwe' xnezgak benne' ka'  
žóngake' da' kegle.

<sup>13</sup>¿Nožkze benne' gone' le'e da' zia  
cha' že' láže'le góntezle da' naken  
chawe'? <sup>14</sup>La'kze sáka'le katen'  
žonle da' naken chawe', gak yela' ba  
nez zen chele. Bi žébele nitó benne',  
na' bi kwe' zéidlele, <sup>15</sup>san le wxén  
laže' Benne' Criston', na' le we'e  
latje nna bi'e lo yichj lázdo'le. Le  
sóateze nich gak wzejní'ilele yógo'te  
benne' ka', benne' nnábgekle' le'e biz  
chen' žxen láže'le Benne' Criston',  
na' žala' gonle da' ni lo yela' gaxjw  
laže' chele, na' lo yela' žape ba la'ne  
benne' ka'. <sup>16</sup>Le góntezle da' naken  
chawe' law Dios, na' cha'zej nnita'  
benne' ka' znnégake' che da' naken  
chawe' da' žonle dan' žeje'le che  
Benne' Criston', naž yedoé'gekle'  
ni'a che da' wnnégake' chele. <sup>17</sup>Cha'  
sáka'le, gakže chawe' cha' naken  
dan' žonle da' naken chawe', na'  
kege dan' žonle da' kegle, cha' Dios  
žénele' gaken ki chele.

<sup>18</sup>Wzáka'kze Benne' Criston', na'  
gote' lo wlazžo žo'o nich beké'e to  
chi'ize dola' da' wbága'žo. Le' nake'  
chawe' san gote' lo wlazžo žo'o,  
benne' dola' ka'. Ki bene', na' beyone'  
žo'o toze len Dios. Lo bela' žen  
chie' gote', san lo be' nakkze' ne zoe'  
nbane' to lo bela' žen kobe. <sup>19</sup>Lo be'  
nakkze' wyeje', na' bcháljenle' be' ka'  
gókgakkze benne' ka', na' nyéjwgake'  
lo latje chol. <sup>20</sup>Benne' ki bži'igake'  
che xtiža' Dios ža ni'te, ža na' wzóa  
Noé, katen' wléz Dios lo yela' zen  
laže' chie', na' bi bžia yi'e légake',

ꝝakte ben Noén' barkw zen na'. Lo barkwn' belagak babze benne' ka' lo nisen', xóno'gake', benne' byo ka' len no'le ka'. <sup>21</sup>Nisen' naken to da' zloe'elen kan nak nis gan yezoažo nis, dan' nak bian' belažo lo yela' got dan' bebán Jesús, Benne' Criston', lo yela' got. Dan' žezoažo nis bi naken to da' žon chawen' da' nakžo lágwazele, san zloe'elen že' láže'žo gak yichj lázdo'žo chawe' law Dios. <sup>22</sup>Jesús, Benne' Criston', bebene' ya'abá che Dios, na' bejži'e kwit li že che Dios, na' znna bi'e wbás che ya'abá ka', na' benne' wnná bia' ka', na' benne' blo ka'.

**Žala' gonžo xchin Jesús  
len yela' wak che Dios**

**4** Che len kan wzaka' Benne' Criston' lo bela' žen chie', lezka' le'e žala' soale sáka'le. Bennen' zzake'e dan' žone' da' naken chawe' ba bka'ne' dola'. <sup>2</sup>Na'a so law, žala' góntezle kan žénele Dios, na' kege kan zdan láže'zele lo yela' benách chele. <sup>3</sup>Schale'e benle kan žongak benne' ka' bizej nónbi'e Dios. Ža ni'te benle da' bi žala' gonle. Wzé láže'le da' kegle ka'. Wzózlele. Wej bdáwl'e na' bka'n zen lo'a ka' da' bi ž'o o laže' Dios. <sup>4</sup>Na'a, žebángekle benne' ka' žóngake' ki dan' biž žónlenle légake' tzen katen' žóngake' da' kegle ki, na' che len znnégake' chele. <sup>5</sup>Žon byenen wloé'el kwíngake' law Dios, Bennen' za' wchi'a laže'le benne' ban ka', na' benne' gat ka'. <sup>6</sup>Che len bchaj Benne' Criston' diža' chawen' lawgak benne' gat ka', benne' ka' Dios bchi'a laže'le légake' katen' wnnít'a'gake' yežlyó nga, kan zchi'a

laže'e yógo'te benách ka'. Bchaj Benne' Criston' légake' nich nnít'a'gake' lo yela' nban lo be' zej nakkze', kan zoakze Dios lo yela' nban.

<sup>7</sup>Za' žin že yeyóz che yógo'te da' zej nnitan'. Che len, le gák lazdo' yaž, na' le soa wcháljlenle Dios. <sup>8</sup>Da' žon byenžen, le ž'il lježle tole yetole, dan' cha' nakle toze lo yela' nži'il, soale yenít lawle chegak lježle, benne' ka' béngake' chele da' zia. <sup>9</sup>Le we' latje lježle ka' gá'ngake' ližle, na' bi nnele chégake'. <sup>10</sup>Žala' wkónlele binlo žin da' ka' benn Dios chele, nich gáklenle lježle tole yetole. <sup>11</sup>No benne' zzoa lie' che Dios, žala' wchalje' xtiža' Dios, na' bennen' žone' xchin Benne' Criston' žala' wkonle' žin yela' waken' da' žonn Dios chie'. Lo yógo'te da' žonle, žala' ga'n zen Dios ni'a che da' ben Jesús, Benne' Criston'. iGákteze che Dios yela' zen, na' yela' wnná bia'! Ka'kze gaken.

**Sáka'gak benne' ka' che Jesús**

<sup>12</sup>Zí'na'do' ka', bi yebánlele dan' žsaka' zí'le'egak benách ka' le'e. Bi naken da' bi zej nonbia' benách ka' che Dios. <sup>13</sup>Le yebél dan' de latje chele góñlenle Benne' Criston' tzen lo da' zzake'e Le' nich gak yebélele že na' yelé'e Le', katen' lé'elele yela' baní' chie'. <sup>14</sup>Cha' nnegak benách ka' chele dan' nakle toze len Benne' Criston', yela' ba nez zen gaken chele, dan' gak bian' zoalen Dios Be' La'y le'e, Bennen' ze'e ya'abá che Dios. Benách ki znnégake' chie' Le', san le'e žaple-ne' ba la'ne'. <sup>15</sup>Cha' saka' no benne' nake' toze len le'e, žala' gaken dan' nake' toze len Benne' Criston', na' kege dan' nake'

benne' wetw benách ka', o benne' wbán, o benne' wen da' kegle, o dan' žliz chie' ga yoble. <sup>16</sup>Na'a, cha' nólele le'e sáka'le dan' nakle toze len Benne' Criston', bi žala' yedoé'elele, san le wká'n zen Dios dan' nzi' lale benne' ka' che Benne' Criston'.

<sup>17</sup>Ba bžin ža so law Dios wchi'a laže'e benách ka' zej nake' che Leze'. Cha' so lawe' wchi'a laže'e žo'o, žnakxkze gaken chegak benne' ka' bi žóngake' kan znna diža' chawen' chie' Le'? <sup>18</sup>Cha' nak zede yelagak benne' ka' žóngake' da' naken chawe', žnakxkze gaken chegak benne' ka' zži'igake' che Dios, na' žóngake' dola'? <sup>19</sup>Ki naken, benne' ka' zzáka'gake' dan' ženele Dios gaken ki, žala' góntezgake' da' naken chawe', na' wdégake' be' zej nakkze lo na' Dios, Bennen' benkze' légake', na' žone' Le' kan znna xtíze'e.

### Bedw zzejni'ile' benne' ka' che Jesús

**5** Na'a, zzejni'ila' benne' gole ka', benne' žape chí'igake' le'e, le'e na' nakle che Benne' Criston', dan' lezka' naka' neda' benne' gole kan zej nake' légake', na' ble'ela' da' wzaka' Benne' Criston', na' lezka' gónlena' légake' tzen, si'to' yela' baní' da' la' lawn. <sup>2</sup>Le'e, benne' gole ka', le gak ka benne' wape zila' ka' kan žape chi'ile benách ka' bde Dios lo na'le. Le gon ki dot láže'le kan ženele Dios, na' kege dan' žon byenen gonlen, o dan' zdan láže'le yela' gape. Le gon xchinle dan' žaz láže'le gonlen, <sup>3</sup>na' kege dan' ženelele nna biá'zele benne' ka' ndégake' lo na'le. Le we' laže' gakle

to da' zloe'elen kan žala' gakgak benne' ka' žape chi'ile. <sup>4</sup>Ki gaken, katen' yelá' Benne' Criston', Bennen' blo wape zila' ka', naž si'le to da' yebélenlelen da' batkle te chen.

<sup>5</sup>Lezka' le'e, xkwide' ka', le gon kan znnagak benne' gole ka'. Yógo'tele žala' gapple ba la'ne lježle, tole yetole, lo yela' gaxjw laže' chele, dan' nyejw le'e yiche la'y da' znnan: Dios žsejwe' xnezgak benne' ka' zka'n zen kwíngake' san žáklené' benne' gaxjw laže' ka'.

<sup>6</sup>Le gak gaxjw laže' lo na' Dios, na' Le' gone' le'e benne' wale ka' kate' žin ža chen. <sup>7</sup>Le wdé lo na' Dios yógo'te da' žonen ga že' zédelele dan' Le' že' laže'le le'e.

<sup>8</sup>Le gak lazdo' yaž, na' le soa ban laže', dan' zoa da' xiwe', dan' bi zle'elen le'e chawe', na' zdan dot gawze, na' naken ka to beže yixe' zbebézya'aba', na' žiljba' no benne' gawba'. <sup>9</sup>Le soa choch kan jejle'le che Benne' Criston', na' le wsejw xnez da' xiwe', dan' nnézlele zzáka'gak lježle ka', benne' ka' nníta'gake' dot yežlyó nga, kan zzáka'le le'e. <sup>10</sup>Naž kate' ba wzáka'le to chí'ido'ze, Dios gone' ga gakle dot chawe', na' ga gakle choch, na' ga gólele, na' ga soale nbanle to chi'ize. Dios na'kze žonne' chežo yógo'te da' žebélenlžon, na' bliž'e žo'o nich yebélenžo yela' baní' chie' da' zoan to chi'ize, dan' nakžo toze len Jesúš, Benne' Criston'. <sup>11</sup>iGa'n žénteze Dios, na' gákteze chie' yela' wnná bia! Ka'kze gaken.

### Bedw zzele' diža' benne' ka' che Jesús

<sup>12</sup>Díža'do' ni zzoja' chele lo na' Silbano, na' žekla' nake' to lježo

dot li laže'. Žénela' gon chocha' le'e,  
 na' zzoa lia' che da' ka' benn Dios  
 chežo, da' zej nak bian' da' li nž'i'ile'  
 žo'o. Le gak choch dan' zoalen yela'  
 nž'i'il chie' le'e.

<sup>13</sup>Benne' ka' che Benne' Criston',  
 benne' nníta'gake' Babilonia,  
 žápegake' le'e "Padiox." Dios  
 wžekze' légake' kan wžíe' le'e. Lezka'

xkwide' Markos, xkwiden' nakbe' ka  
 zí'nkza', žapbe' le'e "Padiox." <sup>14</sup>Le  
 gape "Padiox" lježle tole yetole, na'  
 le chela' lježle tole yetole lo yela'  
 nž'i'il chele.

Znnabla' Dios wká'n žie' yichj  
 lázdo'le, yógo'tele na' nakle che  
 Jesús, Benne' Criston'. Ka'kze  
 gaken.

# DIŽA' BEŽOPE DA' BZOJ BEDW

Bedw žape' "Padiox"  
benne' ka' che Jesús

**1** Neda', Smon Bedw, žapa' le'e "Padiox", le'e na' žejele'le che Jesús, Benne' Criston'. Naka' wen žin che Jesusen', na' wbás bsele'e Lekze'. Nak tlebe da' zaka' yela' žejlé' chele chie' Le', ka zaka' yela' žejlé' cheto' chie' Le'. Dios bene' ga žejele'le chie' Le' dan' nakkze' chawe', na' dan' lezka' Xanžo Jesús, Benne' Criston', Bennen' žeslé' žo'o, nake' chawe'. <sup>2</sup>Znnabla' Dios gon chawe' le'e, na' wzóa žie' yichj lázdo'le dan' nónbia'le Dios, na' Xanžo Jesusen'.

Kazej nak benne' ka' che Jesús

<sup>3</sup>Dios, len yela' wak zen chie', ba benne' chežo yógo'te da' žon byenen gapžon nich gata' yela' nban da' žejlí kanne chežo, na' nich gakžo lazdo' yaž, dan' nónbia'žo Bennen' bliž' žo'o nich gak si'žo yela' baní chie' Le', na' da' nak chawe' chie'. <sup>4</sup>Dan' žone' ki, bene' ga gak si'žo da' zen ka', na' da' naken chawe' da' bchebe laže'e gonne' chežo, na' dan' naken ki, ba belažo lo da' bi naken chawe' da' žaken yežlyó nga dan' zdan láže'gak benách ka' da' kegle, nich gak gakžo kan nak Dios na'kze.

<sup>5</sup>Che len, cha' žejele'le che Benne' Criston', le we' laže' gakle ži'i laže'. Kate' ba nakle ži'i laže', le we' laže' gata' yela' žejn' il chele. <sup>6</sup>Kate' ba naple yela' žejn' il, le we' laže' nna bia' kwinle, na' kate' ba znna bia' kwinle, le gak zen laže', na' kate' ba nakle zen laže', le gak lazdo' yaž. <sup>7</sup>Kate' ba nakle lazdo' yaž, le ži'il lježle ka', na' kate' ba nží'ilele lježle ka', lezka' le ži'il yógo'te benách ka'.

<sup>8</sup>Cha' ki žonle, na' zej žakže dot li laže' kan žonle da' ki, na' da' ki góngaken ga bi gak dáche'ze yela' žejlé' chele, na' chej gakže li laže' kan nónbia'le Xanžo Jesús, Benne' Criston'. <sup>9</sup>No benne' bi že' laže'e gone' ki, nake' ka to benne' lo chole, benne' nitle', dan' ba gol laže'e beyón Benne' Criston' le' chawe', na' beké'e dola' ka' da' wbage'e zga'ale. <sup>10</sup>Che len, zí'na'do' ka', žala' chejsá' laže'le bliž' Dios le'e, na' wžekze' le'e. Cha' gonle ki, bi chíxlele. <sup>11</sup>Ki gaken, Dios dot laže'e gonne' le'e latje chazle gan znna biá'teze Xanžo Jesús, Benne' Criston', Bennen' žeslé' žo'o.

<sup>12</sup>Che len gónteza' ga chejsá' laže'le da' ki la'kze ba nnézkzelelen, na' ba nzi' lo na'le da' naken dot da' li, na' zkónlelen žin. <sup>13</sup>Žekla' neda'

žala' yesá'a láže'le kan zej nak da' ki xakte ne zoa' nbana'. <sup>14</sup>Žala' gona' ki dan' nnezla' za' žin že gata' neda'. Xanžo Jesúš, Benne' Criston', ba gožkze' neda' gaken chia' ki. <sup>15</sup>Che len že' láže'li'a gona' ga chejsá' láže'tezle da' ki te gata'.

No benne' ka' blé'egekle'  
yela' baní' che Jesúš

<sup>16</sup>Bi bcháljlento' le'e to da' dáche'ze katen' bzejni'ilto' le'e kan žin že yelá' Xanžo Jesúš, Benne' Criston', Bennen' nape' dot yela' wnná bia'. Neto' blé'ekzelto' yela' baní' zen chien'. <sup>17</sup>Ble'elto' Le' katen' Xažo Dios wdape' Le' ba la'ne, na' bka'n zene' Le', na' benlto' chi'i Dios, dan' bžojen latje baní' chie', na' wnné': "Benne' ni nake' Zi'na'. Nži'ilal' Le', na' žaz láža'a Le'." <sup>18</sup>Neto' bénkzelto' chi'i na', dan' bžojen ya'abá che Dios katen' wzóalento' Xanžon' law ya'a la'y na'.

<sup>19</sup>Dan' goken nak bian' nak dot da' li da' wnnagak benne' ka' bcháljgake' lo wláz Dios že ni'te, na' žala' we' láže'le dižan', dan' naken ka to yi' da' zza'ní' gan nak choł ni, na' zejte že yelá' Bennen' nake' ka belj xsile chežo, na' zza'nín' lo yichj láždo'le. <sup>20</sup>Da' ni žon byenle'en chejní'ilele, dan' znnan: "Bi gak nitó benne', žakze chie', chejni'ile' da' wnná no benne' bchajle' lo wláz Dios." <sup>21</sup>Da' wnnagak benne' ka' bcháljgake' lo wláz Dios, bi bcháljgaken' dan' gónekzegekle', san bcháljgake' lo wláz Dios da' bchiz Dios Be' La'y lo yichj láždo'gake'.

No benne' ka' žsédgekle' da' wen láže'  
**2** Lezka' wnnítá'gak benne'  
wen láže' ka', benne' ka'

wnnázegake' bcháljgake' lo wláz Dios, benne' ka' wnnítá'lengake' benách Israel ka'. Lezka' sóalengak benne' wen láže' ka' le'e, na' wsédgekle' le'e da' wen láže'. Lo yela' wen láže' chégake' wsédgekle' le'e da' naken chégakze', dan' gonen ga gon zož chele yebéj yichjle da' naken dot da' li. <sup>2</sup>Zží'igake' che Xanžo, Bennen' beslé' ž'o. Dan' góngake' gonen ga wžia yi' Dios légake'. <sup>2</sup>Zanle le'e gónlenle légake' tzen lo da' kegle da' góngake', na' dan' gonle bálele ki, na' nnegak benách ka' che diža' chawen' da' naken dot da' li. <sup>3</sup>Dan' dan láže'gake' yela' gape, wsédgekle' le'e da' wen láže', nich sí'gake' da' naple. Ba nžog chegak benne' ka' kwia yi'gake' to chi'ize, na' za' žin že na'.

<sup>4</sup>Dios bi benít lawe' wbás che ya'abá chie' ka' katen' bzóagake' chela'ale xtiže'e, san bsejwe' légake' latje chol, gan zej nžej' do ya, na' želbeze' že na' katen' wžia yi' Dios légake'. <sup>5</sup>Lezka', bi benít law Dios benne' ka' wnnítá'gake' že ni'te katen' bsele'e nis yejw da' bchinnjen yežlyó nga, na' bžia yi'e benne' wen da' zinnj ka', san beslé' Noé lo nisen', bennen' bzoa lie' che da' naken chawe'. Lezka' Dios beslé' yegaže ljež Noé na' lo nisen'. <sup>6</sup>Lezka', Dios bchoge' chegak benne' ka' wnnítá'gake' lo yež Sodoma, na' lo yež Gomorra, na' bžia yi'e légake' len yi', na' beyákake' de. Da' goken chégake' naken to da' zcheblen benne' ka' žóngake' da' kegle. <sup>7</sup>Katen' Dios bchinnje' yež ka', na' beslé' Lot, benne' chawen', lo yi' na'. Lot na' gok nyache' láže'li'e ni'a che da' kegle da' bengak benne'

wen da' zinnj ka'. <sup>8</sup>Ka' goken dan' Lot, benne' chawen', wzóalene' légake', na' ble'ele', na' benle' da' bi naken chawe' da' bengake', na' dan' goke' lazdo' yaž, che len gok nyache' láže'lí'e yógo'te ža ni'a che da' kegle da' bengake'. <sup>9</sup>Ki naken, Xanžon' nneze' yeslé' benne' ka' zžébegake' Le' lo na' da' xiwe', dan' žonen ga cho'ogak benách ka' nez dola', san zkweze' yela' zi' da' gone' benne' wen da' zinnj ka' na' zejté ža choge' chégake' gátgake' to chi'ize.

<sup>10</sup>Gon zi'že' benne' ki, benne' zóngake' da' kegle da' zdan láže'gake', na' zží'igake' che yela' wnná bia' che Xanžon'. Zej nake' benne' wechóg láže' ka', na' zižje láže'. Bi zžébegake' nnégake' chegak wbás che ya'abá ka', wbás ka' zdágake' lo baní'. <sup>11</sup>Wbás che ya'abá ka' náple'ežegake' yela' wnná bia', na' yela' wak ka benne' ka', san wbás che ya'abá ka' bi žechóg láže'gake' yesbága'gake' no benne' zia law Xanžon'.

<sup>12</sup>Benne' ki zej nake' ka bia yixe' ka', bia bi be žejni'igeklba', san náljgakba' nich no benne' sene' légakba', na' gote' légakba'. Znnégake' che da' bi žejni'igekle', na' kwia yí'gake' to chi'ize kan žak chegak bia yixe' ka'. <sup>13</sup>Dios yebi'e chégake' da' sáka'gake', dan' bsaka' zí'gake' benách ka'. Žékgekle' da' žak na'a ža naken da' yebélengekle'. Zej nake' ka to yižwé' nožo', na' to da' zchinjen, katen' žawlengake' le'e tzen, na' žebégekle' dan' žon láže'gekle' le'e.

<sup>14</sup>Len yela' zze láže' chégake' zwágake' no'le ka'. Bi nníta'gake' žize zóngake' dola'. Žóngake' ga

zchíxgekle benne' ka' bi zej nake' choch kan žejlé'gake' che Benne' Criston'. Žíljtezgake' da' zdan láže'gake'. Dios ba bchoge' chégake' kwia yí'gake'. <sup>15</sup>Wléj yichjgake' da' naken dot da' li, na' nchol yichj lázdo'gake'. Žóngake' kan ben Balaam, zi'n Beor, bennen' bdan láželi'e yela' gape, na' bene' da' kegle dan' bdízjwgake' le'. <sup>16</sup>Dios bdíl diže'e Balaam na' dan' bene' da' keglen'. To búrrodo' bcháljlenba' le' kan zchaljgak benne' ka', na' bséjwba' xnez Balaam na' gan zeje' lo yela' zží'i che Dios.

<sup>17</sup>Zej nak benne' ki ka to bdoa nis da' ba nbiž, na' ležka' ka to bejw da' zche' be' wale. Ba nkweze Dios latje chégake' lo latje chol. <sup>18</sup>Ki zej nake' dan' zcháljgake' da' zenle'e lo yela' bi nneze chégake', na' zkóngekle' žin da' zdan láže'gak benách ka', na' zóngake' ga zchíxgekle benne' ka', benne' ba belágake' ladjw benne' ka' nchólgekle'. <sup>19</sup>Zchebe láže'gake' gata' yela' žeslá chegak yezika' benách ka', san légakkze' zej njeje', na' žontezgake' da' kegle. Zej njej yógo'te benne' ka' lo na' da' zchen' yichj lázdo'gake'. <sup>20</sup>Cha' belágake' lo da' bi naken chawe' da' den yežlyó nga dan' bénbia'gake' Xanžo Jesús, Benne' Criston', Bennen' žeslé' žo'o, na' naž sen da' kegle légake' da' yoble, dan' chen' légake', na' da' li bága'žegake' zia kate' se lawte ka da' wbága'gake' zga'ale. <sup>21</sup>Gakže chawe' chégake' chela' batkle gónbia'gake' Bennen' zzoe' žo'o nez chawe' chien' ka da' gak chégake' cha' bénbia'gake' Le', na' naž wléj yichjgake' diža' la'y da' bsedle Dios légake'. <sup>22</sup>Ba gok chégake' da' znnan:

Žeyéchj beko', žeyawba' da'  
beyebba'.  
Žeyáz koch lo gona', bian' za'  
bwazjžo.

### Nnezlžo yelá' Xanžo

**3** Diža' ni naken da' bežopen' da'  
zzojan' chele, ljéža'do' ka'. Ło  
da' žópeten že' laža'a yesá'a láže'le  
kanzej nak da' ki. <sup>2</sup>Le chejsá' laže'  
da' bchaljgak benne' la'y ka' ža  
ni'te, benne' ka' bcháljgake' lo wláz  
Dios. Lezka' le chejsá' laže' da' wnná  
Xanžon', Bennen' žeslē' žo'o, dan'  
bsédgekle benne' wbás ka' bsele'e  
Le'.

<sup>3</sup>Da' nak blo da' žala' chejsá' láže'le,  
znnan ki: "Ža se lawte ža ka' la'gak  
benne' ka' góngake' da' kegle dan'  
żdan láže'gake!". <sup>4</sup>Gon dítjegkle'  
xtiža' Jesusen', na' nnágake': "¿Bizkze  
gok che dan' bchebe laže' Benne'  
Criston'? Wnné': Yelá'a da' yoble. Ža  
ni'te katen' gotgak xa xtožo ka', na'  
zejte na'a ža, yógo'te žaken tlebe kan  
goken katen' wzó law žata' yežlyó  
nga na'zejte na'a ža." <sup>5</sup>Zzóagake'  
cheła'ale da' goken ža ni'te. Bchalj  
Dios, na' wzó law nníta'gak ya'abá,  
na' yežlyó nga. Bžoj yežlyón' lo  
nis, na' wzén' gachje láwe'le nisen.  
<sup>6</sup>Lezka' len nis Dios bchinnej' yežlyó  
nga ža ni'te katen' bsele'e nis yejw  
da' bžia yin' benách dola' ka'. <sup>7</sup>Ya'abá,  
na' yežlyó nga, da' ka'zej nnitan' na'a  
ža, Dios zkweze' légaken na'zejte ža  
wchinnej' légaken lo yi'. Ki gaken,  
kan nak da' wnnakze Dios chégaken.  
Wzeye' légaken ža na' choge' chegak  
benách ka', benne' bizej nake'  
chawe', kwia yí'gake'.

<sup>8</sup>Bi gal láže'le le'e da' ni, zí'na'do'  
ka'. To ža naken law Xanžon' ka'

zan gaywá' yiz ka', na' zan gaywá'  
yiz ka'zej naken lawe' Le' ka to  
žaze. <sup>9</sup>Bi zžele Xanžon' gone' da'  
bchebe laže'e gone'. Žékgekle bałe  
benách zžele', san zbeze' zen laže',  
na' zzoele' žo'o dan' bi ženele' kwia  
yi' nitó benne', san ženele' yeyát  
láže'gak yógo'te benách ka'.

<sup>10</sup>Kon yežinkze ža yelá' Xanžon'  
kan zla' to benne' wbán žel. Kate'  
žin ža na' te che ya'abá len to żaxto'  
zen. Kwia yi'gak yógo'te da' jez  
nnitan' to lo yi' zen. Chey yežlyó  
nga, tzen len da' ka'zej nnitan'  
yežlyó nga.

<sup>11</sup>Cha' kwia yi'gak yógo'te da' ki,  
čnakxkze žala' gonle? Žala' gakle  
lazdo' yaž, na' wdé kwinle lo na'  
Dios. <sup>12</sup>Žala' kwezle ža yelá' Xanžon',  
na' we' láže'le gonle ga žinte ža na'  
katen' ya'abá, na' da' ka'zej nnita'  
kwia yí'gaken lo yin'. Lezka' chey  
dot yežlyó nga. <sup>13</sup>Ki gaken, san žo'o  
zbezžo da' bchebe laže' Dios, gone'  
to ya'abá kobe, na' to yežlyó kobe  
gan gak da' naken chawe'.

<sup>14</sup>Che len, zí'na'do' ka', kate' ne  
zbezle da' ki, le we' laže' gakle  
dot chawe' law Dios, nich bi gak  
nitó benne' bi da' nnie' chele, na'  
kwezle cháwe'do' na'zejte ža na'.  
<sup>15</sup>Žala' nnézlele zbez Dios zen laže'  
nich gata' latje chegak benách ka'  
yelágake', kan lezka' wnná lježzo  
Pablo, dan' bzoje' chele le'e yiche,  
na' wdape' yela' žejn'i'il da' bnežjw  
Xanžon' chie'. <sup>16</sup>Le'e yógo'te yiche  
da' zzoje', zchalje' kanzej nak da' ki,  
la'kze nwá'gaken da' ka'zej naken  
zede chejnj'iilžon. Benne' bi nnezle  
ka', na' benne' ka' bizej nake' dot  
li laže', zchíxgake' diža' ki. Lezka'  
žóngake' chegak yezika' da'zej

nyejwn le'e yiche la'y, dan' gonen ga  
wžia yi' Dios légake'.

17 Ba nnézkzelele da' ki, zí'na'do'  
ka'. Che len le gape chi'i kwinle,  
nich benách ka' bizej nake'  
chawe' bi gon láže'gekle' le'e, na'  
bi ža' yichj lázdo'le kan žejele'le

che Benne' Criston'. <sup>18</sup>Le we' laže'  
gakže dot li laže' kan nónbia'le  
Xanžo Jesús, Benne' Criston',  
Bennen' žeslé' žo'o, na' nich  
ží'iželetele Le'. iGa'n zene' Le' na'a,  
na' yógo'te ža da' zá'gaken! Ka'kze  
gaken.

# DIŽA' NEŽW DA' BZOJ ZWA

## Diža' da' nbánlenžon

**1** Zzojto' chele kan nak che Bennen' ba wzoakze' kate' bi na' soa yežlyó nga, na' kan nak da' benlto' da' bchalje', na' kan nak da' ble'elto' da' bene'. Bwíato' Bennen', na' wdanto'-ne'. Bennen' nake' Jesúis, Bennen' nake' Diža' da' zej nbanlen benách ka'. <sup>2</sup>Bennen' zej nbanlen benách ka' bloe' lawe', na' ble'elto'-ne'. Zzoa lito' chie' Le', na' zzenltó' le'e kan nak che Bennen' nbánlenžo. Bennen' wzálene' Xažo Dios, na' bedjlöe' lawe' ga zoažo ni. <sup>3</sup>Dan' ble'elton', na' dan' benlton', zzenltó' le'e nich gakle le'e toze len neto'. Da' li yela' toze chežo naken len Xažo Dios, na' len Jesúis, Benne' Criston', Zi'n Dios. <sup>4</sup>Zzojto' chele da' ki nich gak yebelžo dot láže'žo.

## Dios nake' baní

<sup>5</sup>Da' ni naken da' benlto' da' bchalj Jesusen', na' naken da' zzenltó' le'e na'a. Ki znnan: "Dios nake' baní", na' bi zoa nitó da' naken chol len Le'." <sup>6</sup>Cha' nnažo: "Nakžo toze len Diosen" na' cha' žonžo da' naken che da' chol, da' ni nak bian' žon láže'žo, na' bi žonžo da' naken dot da' li. <sup>7</sup>Na'a, cha' žonžo

da' naken chawé', zdažo lo baní' kan Le' nake' chawé', na' zoe' lo baní', na' nakžo toze tožo len yetožo, na' xchen Jesúis, Benne' Criston', Zi'n Dios, žeyonen žo'o chawé', na' žeká'n yógo'te dola' da' nbága'žo.

<sup>8</sup>Cha' znnnažo: "Bi be dola' nbága'žo" žon láže'lžo la' kwínzežo, na' bi nzi' lo nažo da' naken dot da' li. <sup>9</sup>Cha' yexóalapažo law Dios dola' da' nbága'žo, Le' žone' kan znnne', na' nake' chawé'. Yenít lawe' dola' da' nbága'žo, na' yeyone' žo'o chawé', na' yeké'e yógo'te da' zia da' nbága'žo.

<sup>10</sup>Cha' nnažo: "Bi be dola' nbága'žo" gaken kan nnažo: "Dios žon láže'e" na' bi žonžo kan znnna xtiže'e.

## Benne' Cristo zdie' xtiža'žo law Dios

**2** Le'e, zí'na'do' ka', zzoja' da' ki chele, nich bi gonle dola'. Na'a, cha' no benne' gone' dola', zoa to Benne' znnnable' ni'a chežo law Xažo Dios, Bennen' lie' Jesúis, Benne' Criston', Benne' chawen'. <sup>2</sup>Nakkze' Le' Bennen' bde kwine', na' gote' nich beké'e dola' da' wbága'žo žo'o law Dios. Gote' Le', kégeze nich beké'e dola' da' wbága'žo žo'o, san lezka' nich beké'e dola' da' zej nbaga' benách ka' nníta'gake' dot yežlyó nga.

<sup>3</sup>Cha' žonžo kan nak da' bchi'le' žo'o, nnezlžo ba nónbia'žo Le'. <sup>4</sup>No benne' znne': "Neda' nónbi'a Dios" san cha' bi žone' kan znna da' wnnakze' Le', benne' ni žon laže'e, na' bi žone' da' naken dot da' li. <sup>5</sup>No benne' žone' kan znna xtiža' Dios, da' li benne' ni nži'ile' Dios kan žala' gonžo. Cha' žonžo ki, nnezlžo nakžo che Dios. <sup>6</sup>Lezka', no benne' znne': "Neda' naka' che Benne' Criston" žala' gake' kan gok Benne' Criston' katen' wdé' yežlyó nga.

### Bchi'le Benne' Cristo žo'o ži'ilžo lježzo ka'

<sup>7</sup>Zí'na'do' ka', zzoja' chele da' bchi'le Criston' žo'o. Bi naken to da' kobe, san dan' wnnakze Dios ža ni'te, dan' wzí' lo na'le ža ni'te. Dan' wnné' ža ni'te naken da' ba benl-le. <sup>8</sup>Lezka' naken ka zzoja' chele to da' kobe, dan' ben Jesusen' dot kan znnan, na' lezka' žonle le'e kan znnan. Ki naken dan' ba žde che da' naken chol, na' baní' li laže' ba zza'nín.

<sup>9</sup>No benne' znne': "Zoa' lo baní'" san cha' bi zle'ele' lježe' chawé', benne' ni ne žone' da' naken che da' chol. <sup>10</sup>No benne' nži'ile' lježe' zoe' lo baní', na' da' žonen ga chixle no benne' bi be gak gonen chie' le'. <sup>11</sup>No benne' bi de lježe' chawé', žone' da' naken che da' chol, na' zde' lo da' chol. Bi nnezle' gan zeje', dan' žon da' naken chol ga nchol yichj lázda'we'.

<sup>12</sup>Zzoja' chele, zí'na'do' ka', dan' ba benít law Dios dola' da' wbága'le. Ki bene' dan' žone' da' bchebe laže'e gonen'.

<sup>13</sup>Zzoja' chele, le'e nakle ka xagak xkwide' ka', dan' nónbia'le Bennen' zoakze' kate' bi na' soa yežlyó.

Zzoja' chele, le'e nakle ka xkwide' ka', dan' ba belale lo na' da' xiwe'.

<sup>14</sup>Ba bzoja' chele, zí'na'do' ka', dan' nónbia'le Xažo Dios.

Ba bzoja' chele le'e, nakle ka xagak xkwide' ka', dan' nónbia'le Bennen' zoakze' kate' bi na' soa yežlyó.

Ba bzoja' chele le'e, nakle ka xkwide' ka', dan' nakle wale, na' nzi' lo na'le xtiža' Dios, na' ba belale lo na' da' xiwe'.

<sup>15</sup>Bi zí'ilele yežlyó nga, na' kege da' de yežlyó nga. Cha' zoa no benne' nži'ile' dan' den yežlyó nga, bi nži'ile' Xažo Dios. <sup>16</sup>Ki naken, dan' žongak benne' ka' nnita'gake' yežlyó nga da' bi žénele Xažo Dios, san žóngake' da' zdan laže'gake'.

Žóngake' da' zdan laže' bela' žen chégake'.

Žóngake' da' zdan laže' yej láwgake'.

Zka'n zen kwíngake' ni'a che da' jez nape'.

Ki jez nak da' kegle ka' da' žóngake'.

<sup>17</sup>Te che yežlyó nga, na' che da' zdan laže'gak benách ka', san no benne' žone' kan žénele Dios soe' to chi'ize.

### Bennen' zchalje' da' li, na' bennen' žon laže'

<sup>18</sup>Zí'na'do' ka', ba zoažo ža ze lawte ža ka' che yežlyó nga. Ba bénlele la' bennen' zži'e che Benne' Criston', na' na'a ba wzó law zej nnita' benne' zan, benne' zží'igake' che Benne' Criston'. Che len nnezlžo ba zoažo ža ze lawte ža ka'. <sup>19</sup>Benne' ki bežójgake' ládžwžo žo'o, san bi gókgake' toze len žo'o. Chela' gókgake' toze len žo'o, gá'ntezgake'

len žo'o. Na'a, bežójgake', nich gak bia' bizej nake' yógo'tegake' toze len žo'o.

<sup>20</sup>Na'a, Dios Be' La'y zóalene' le'e, na' nnézkzelele da' naken dot da' li. <sup>21</sup>Zzoja' chele dan' ba nnézlele da' naken dot da' li, na' kege dan' bi nnézlelen. Lezka' nnézlele bi žon laže' no benne' nnezle' da' naken dot da' li.

<sup>22</sup>¿Nožkze bennen' žon laže'e? Žon laže' bennen' znne' bi nak Jesús Benne' bsela' Dios. Benne' ni nake' bennen' zži'e che Benne' Criston', dan' znne' bi nak Dios Xa Jesusen', na' lezka' znne' bi nak Jesusen' Zi'n Dios. <sup>23</sup>No benne' zži'e che Zi'n Dios, bi zoalen Xažo Dios le'. No benne' znne' kwáselo Jesusen' nake' Zi'n Dios, lezka' Xažo Dios zóalene' bennen'.

<sup>24</sup>Na'a, le we' laže' gá'nteze da' bénlele ža ni'te len le'e. Cha' gá'nteze da' bénlele ža ni'te len le'e, lezka' le'e gá'nteze len Zi'n Dios, na' lezka' len Xažo Dios. <sup>25</sup>Da' ni naken da' bchebe laže' Dios, wnné' gonne' yela' nban da' zejlí kanne chežo.

<sup>26</sup>Zzoja' chele da' ni kan nak chegak benne' ka' ženegekle' gon láže'gekle' le'e. <sup>27</sup>Na'a, Dios Be' La'y zóalene' le'e. Benne' Criston' bséla'kze' Le' chele, na' Lekze' zóalenteze' le'e. Che len bi žon byenen wsedle no benne' le'e, dan' Be' La'y na' žesdle' le'e. Zóalene' le'e, na' zchalje' da' li, na' bi žon laže'e. Kan ba bsdle' le'e, le gá'nteze len Benne' Criston'.

<sup>28</sup>Na'a, zí'na'do' ka', le gá'nteze len Benne' Criston' nich katen' yelé'e Le', na' gak wxén láže'žo Le', na' bi yedoé'elžo kate' žinžo lawe'

Le' katen' yelé'e. <sup>29</sup>Cha' nnézlele le'e Dios nake' chawe', lezka' žala' nnézlele yógo'te benne' ka' žóngake' da' naken chawe' zej nake' zi'n Dios.

### No benne' ka' zej nake' zi'n Dios

**3** Le wia kan nží'ile'l Xažo Dios žo'o, dan' bene' ga ležo zi'n Dios na'kze. Che len benne' ka' nnítá'gake' yežlyó nga bi nónbia'gake' da' nakžo, dan' bi beyónbia'gake' da' nak Jesusen'. <sup>2</sup>Zí'na'do' ka', na'a ba nakžo zi'n Dios, na' bi na' la' law da' gakžo. Nnezlžo kate' wloé'e law Jesusen', gakžo kan nake' Le', dan' le'elžo-ne' kan nakkze' Le'. <sup>3</sup>No benne' žxen laže'e gake' kan nak Jesusen', že' laže'e gake' chawe' kan nak Jesusen' chawe'.

<sup>4</sup>No benne' žone' dola' zži'e che xtiža' Dios, dan' nak dola' da' zži'in in che xtiža' Dios. <sup>5</sup>Nnézlele bloe'e law Jesusen' nich beké'e dola' da' wbága'žo, na' bi be dola' žone' Le'. <sup>6</sup>No benne' nake' toze len Jesusen' bi žone' dola'. No benne' žone' dola' batkle ble'ele' Le', na' bi nónbi'e Le'. <sup>7</sup>Zí'na'do' ka', le gape chi'i kwinle nich bi gon láže'le no benne' le'e. No benne' žone' da' naken chawe', nake' chawe' kan nak Jesusen' chawe'. <sup>8</sup>No benne' žónteze' dola' nake' che da' xiwe', dan' žónteze da' xiwen' dola' kate' bi na' soa Adán. Che len bedjloé'e law Zi'n Dios, nich wsejwe' xnez da' xiwen' nich bi be gak gonen chežo.

<sup>9</sup>No benne' nake' zi'n Dios bi žónteze' dola', dan' zóateze Be' La'y che Dios len le', na' bi žone' dola' dan' nake' zi'n Dios. <sup>10</sup>Ki zej nak bia' benne' ka' zej nake' zi'n Dios, na'

benne' ka'zej nake' zi'n da' xiwe'. No benne' bi žone' da' naken chawe', na' bi nži'ilе' lježe', bi nake' che Dios.

**Žala' ſi'ilžo lježžo ka'zej  
nake' che Jesúſ**

<sup>11</sup>Da' ni naken da' ba benl-le ža ni'te, da' znnan: "Žala' ſi'ilžo lježžo tožo yetožo." <sup>12</sup>Bi žala' gonžo kan ben Kaín, zi'n Adán. Gok Kaín na' che da' xiwe', na' betbe' bi' bíche'be'. ¿Bíz chen' betbe' bi' bíche'be'? Betbe' lebe' dan' ben Kaín na' da' bi goken chawe' law Dios, san da' ben bi' bíche'ben' goken chawe'.

<sup>13</sup>Zí'na'do' ka', bi yebánlele cha' benáčh ka' nníta'gake' yežlyó nga bi jez de le'e chawe'. <sup>14</sup>Nnezlžo ba wdežo lo yela' got, na' ba napžo yela' nban da'zejlí kanne dan' nži'ilžo lježžo ka'. No benne' bi nži'ilе' lježe' ka', ba nakkze' ka to benne' gat. <sup>15</sup>No benne' bi zle'ele' lježe' chawe', nake' ka to benne' wetw benáčh ka', na' nnézlele nitó benne' wetw benáčh ka' bi nape' yela' nban da'zejlí kanne. <sup>16</sup>Ki nónbia'žo yela' nži'il da' naken li laže', dan' bde Jesusen' yela' nban chie', na' gote' lo wlazžo žo'o. Lezka' žo'o žala' wdežo yela' nban chežo, nich gáklenžo lježžo ka'. <sup>17</sup>Na'a, no benne' de yela' wnni'a chie', dan' naken che yežlyó nga, na' zle'ele' lježe', zoa bi da' žiažjèle', na' cha' bi žeyache' laže'le' le', bi da' wnežjwe' chie', įwak nnažo zoalen yela' nži'il che Dios bennen'? <sup>18</sup>Zí'na'do' ka', žala' ſi'ilžo lježžo ka', kege len díža'ze o lo yela' znnaze chežo, san dot láže'žo, na' len dot yela' žon chežo žala' ſi'ilžo lježžo ka'.

**Da' žxen láže'žo law Dios**

<sup>19-20</sup>Cha' ki nži'ilžo lježžo ka', nnezlžo nakžo che Bennen' nakkze' da' li, na' law Dios gak kwe' ži yichj lázdo'žo katen' zchebe lázdo'žo žo'o, dan' nakže da' li da' znnna Dios ka da' znnna lázdo'žo, na' Le' nnézkzele' yógo'te. <sup>21</sup>Zí'na'do' ka', cha' bi zchebe lázdo'žo žo'o, zoa da' žxen láže'žo law Dios, <sup>22</sup>dan' nnezlžo gonne' chežo bíte'ze da' nnablžo Le'. Ki naken dan' žonžo kan znnna da' bchi'le' žo'o, na' da' žaz laže'le' Le'. <sup>23</sup>Ki nak da' bchi'le Dios, wnné' žala' chejle'žo che Jesúſ, Benne' Criston', Zí'ne', na' ſi'ilžo lježžo ka' kan lezka' bchi'le Zí'ne' žo'o. <sup>24</sup>Benne' ka' žóngake' da' bchi'le Dios zóalengake' Le', na' Dios na'kze zóalene' benne' ka'. Ki nnezlžo Le' zóalenteze' žo'o, dan' ba bsele'le Dios Be' La'y nich bedjsóalene' žo'o.

**Da' nak bia' zoalen Dios Be' La'y žo'o**

**4** Zí'na'do' ka', bi chejle'le che no benne' znnaze' Dios Be' La'y zóalene' le', san le si' bia' bennen', cha' Dios Be' La'y zóalene' le', dan' zdagak benne' zan yežlyó nga, benne' ka' žon laže'gake', na' znnágake' zcháljgake' lo wláz Dios. <sup>2</sup>Ki gónbiale no benne' zoalen Dios Be' La'y le'. Bennen' znné' kwáselo kan bla' Jesúſ, Benne' Criston', na' znné' nake' Bennen' bselá' Dios, na' golje' benáčh, nak bennen' che Dios. <sup>3</sup>Lezka', no benne' bi znné' kwáselo kan bla' Jesúſ, Benne' Criston', na' znné' bi golje' benáčh, bi nake' che Dios. Benne' ni nake' che bennen' zži'e che Benne' Criston', bennen' ba

bénlele yide', na' na'a ba zde' yežlyó nga.

<sup>4</sup>Zí'na'do' ka', nakle che Dios, na' nápzele yela' wak ka benne' ka' žon láže'gake', dan' Bennen' zóalene' le' napže' yela' wak ka bennen' zde' yežlyó nga. <sup>5</sup>Légake'zej nakze' benách ka' nníta'gake' yežlyó nga. Che len zcháljgake' che da' naken che yežlyó nga, na' benách ka' nníta'gake' yežlyó nga zze nággake' chégake'. <sup>6</sup>Nakžo žo'o che Dios. No benne' nónbi'e Dios zze nage' chežo. No benne' bi nake' che Dios bi zze nage' chežo. Ki nónbia'žo no bennen' yoe'e Dios Be' La'y, Ben' zchalje' da' li, na' lezka' bennen' yoe'e ben' da' žon lažen'.

### Yela' nži'il li laže' zá'zen lo na' Dios

<sup>7</sup>Zí'na'do' ka', žala' ži'ilžo lježžo ka', dan' yela' nži'il zan' lo na' Dios, na' no benne' nži'ile' lježe' ka' nalje' ni'a che Dios Be' La'y, na' nónbi'e Dios. <sup>8</sup>No benne' bi nži'ile' lježe' ka', bi nónbi'e Dios, dan' yela' nži'il zan' lo na' Dios. <sup>9</sup>Ki bla' law kan nži'il Dios žo'o. Bsele'e tlícha'tekze Zi'ne' yežlyó nga, nich gata' yela' nban da' zejlí kanne chežo ni'a chie' Le'. <sup>10</sup>Ki nak bia' yela' nži'il da' naken li laže', kege kan nži'ilžo Dios, san kan Le' bží'ile'ele' žo'o, na' bsele'e Zi'nkze' nich bi'e dola' da' wbágážo žo'o, na' Le' gote' ni'a chen.

<sup>11</sup>Zí'na'do' ka', cha' ki bží'ile'ele' Dios žo'o, žala' ži'ilžo lježžo ka'.

<sup>12</sup>Batkle ble'el no benne' Dios, san cha' nži'ilžo lježžo ka', Dios na'kze zóalene' žo'o, na' na'a nži'ilžo Diosen' dot láže'žo. <sup>13</sup>Nnezlžo zóalenzžo Dios, na' Le' zóalene' žo'o, dan' bsele'e Dios Be' La'y, nich

bedjsóalene' žo'o. <sup>14</sup>Neto' ble'elto' da' ben Xažo Dios, na' zhoa liton'. Le' bsele'e Zi'nkze', Bennen' žeslé' benách ka' nníta'gake' yežlyó nga. <sup>15</sup>No benne' znné kwáselo Jesusen' nake' Zi'in Dios, Dios na'kze zóalene' bennen', na' le' zóalene' Diosen'.

<sup>16</sup>Žo'o nnezlžo, na' žejle'žo nži'il Dios žo'o. Yela' nži'il zan' lo na' Dios, na' no benne' nži'ile' lježe' ka' zóalene' Diosen', na' Dios na'kze zóalene' le'. <sup>17</sup>Ki žon žin yela' nži'il lo yichj lázdo'žo. Žonen ga biž zžébežo že chog Dios chegak benách ka' gátgake'. Kan nak Jesusen', lezka' nakžo žo'o yežlyó nga. <sup>18</sup>Cha' nnezlžo nži'il Dios žo'o, bi be zžébežo. Kate' nnezlžo nži'il Dios žo'o, žone' Le' ga bi zžébežo. No benne' zžébe' da' sake' bi nnezle' nži'il Dios le'.

<sup>19</sup>Žo'o nži'ilžo Dios, dan' Le' bží'ikzele' žo'o zga'ale'. <sup>20</sup>Cha' no benne' znné: "Neda' nži'ilä' Dios" san cha' bi nape' lježe' ka' chawé', benne' ni žon laže'e. No benne' bi nži'ile' lježe' ka', benne' ka' zle'ele', čnakxkze gak ži'ile' Dios, na' batkle ble'ele' Le'? <sup>21</sup>Ki bchi'le Jesusen' žo'o, na' wnné: "No benne' nži'ile' Dios, žala' ži'ile' lježe' ka'."

### Wak soelžo da' žak chežo yežlyó nga

**5** No benne' žejli'e nak Jesús Benne' Criston', Bennen' bsela' Dios, benne' ni nake' zi'n Dios, na' no benne' nži'ile' Dios, Bennen' bzoe' le', lezka' žala' ži'ile' lježe', bennen' lezka' nake' zi'n Dios. <sup>2</sup>Ki žákbe'elžo nži'ilžo benne' ka'zej nake' zi'n Dios. Naken ki cha' nži'ilžo Dios, na' žonžo kan znná xtiže'e. <sup>3</sup>Ki nak bia' nži'ilžo Dios. Naken ki cha' žonžo kan znná

xtiže'e, na' bi nak zede dan' bchi'le' žo'o gonžo. <sup>4</sup>No benne' nake' Ži'n Dios zzoele' da' žak chie' yežlyó nga. Ba bzoelžo da' žak chežo yežlyó nga dan' žeje'žo che Jesús, Benne' Criston'. <sup>5</sup>¿Nož bennen' zzoele' da' žak chie' yežlyó nga? Bennen' žeji'le' Jesusen' nake' Ži'n Dios žone' ki.

### Dios Be' La'y zzoa lie' che Benne' Cristo

<sup>6</sup>Ki bloe'e law Jesús, Benne' Criston'. Golje', na' bezó'e nis, na' blalje' xchene', na' kégeze bezó'e nis, san lezka' blalje' xchene'. Dios Be' La'y nake' Bennen' zzoa lie' che Ži'n Dios, dan' nak dot da' li da' zchalj Dios Be' La'y. <sup>7</sup>Chonne benne' ka' nníta'gake' ya'abá che Dios, benne' ka' zzoa lígake' che Jesusen'. Zej nake' Xažo Dios, na' Ži'n Dios, Bennen' lie' Diža', na' Dios Be' La'y. Chonne' ki, toze zej nake'. <sup>8</sup>Lezka', chonne da' ka' zzoa lígaken chie' yežlyó nga, Dios Be' La'y, na' da' bezó'a Benne' Criston' nis, na' žen da' blalje' le'e yag kroze, na' da' chonne ki, toze kan znnágaken. <sup>9</sup>Cha' si' lo nažo da' zzoa ligak benách ka' kan nak Jesusen', da' zzoa likze Dios záka'le'ežen. Da' bzoa li Dios naken da' wnné' kan nak che Jesusen', katen' wnné' nake' Ži'nkze'. <sup>10</sup>No benne' žeji'le' che Ži'n Dios, nzi' lo ne'e da' bzoa li Dios. Cha' no benne' bi žeji'le' da' wnnakze Dios, na' wak nnažo: znnia bennen': "Dios žon laže'e." Ki naken dan' bi bejli'e da' bzoa li Dios che Ži'ne'. <sup>11</sup>Da' ni naken da' bzoa li Dios. Wnné' ba benne' yela' nban da' zejlí kanne chežo, na' Ži'ne' na' nake' Benne' žonne' chežo yela' nban na'. <sup>12</sup>No benne' zoalen Ži'n Dios le', nape' yela' nban da' zejlí kanne. No benne' bi zoalen Ži'n Dios le', bi nape' yela' nban na'.

### Nnezlžo napžo yela' nban da' zejlí kanne

<sup>13</sup>Zi'na'do' ka', le'e na' žeje'le' che Ži'n Dios, zzoja' chele da' ni nich nnézlele ba naple yela' nban da' zejlí kanne, na' ki gaken, gak li laže' kan žeje'le' che Ži'n Dios na'.

<sup>14</sup>Da' ni naken da' žxen láže'žo Le'. Cha' bi da' nnablžo-ne' kan žénele' Le', Le' ženle' chežo žo'o. <sup>15</sup>Cha' nnezlžo ženle' chežo kan nak bi da' znnablžo-ne', lezka' nnezlžo ba napžo da' znnablžo-ne'.

<sup>16</sup>Cha' no benne' le'ele' lježe' žone' dola' da' bi žonen ga gate', wak nnable' Dios lo wláz bennen', na' Le' wnežjwe' yela' nban chie'. Ki znnia: wak nnáblele lo wláz benne' ka' žóngake' dola' da' bi žonen ga gatgak benne' ka'. Zoa dola' da' žonen ga gat no benne'. Bi znnia' nnáblele lo wláz no benne' žone' dola' ki. <sup>17</sup>Yógo'te da' kegle naken dola', san zoa dola' da' bi žonen ga gat no benne' žonen'. <sup>18</sup>Nnezlžo no benne' nake' Ži'n Dios bi žónteze' dola' dan' Ži'nkze Dios žape chi'e bennen', na' da' xiwe' bi be gak gonen chie'.

<sup>19</sup>Nnezlžo yo'ožo lo na' Dios, na' yógo'te benách ka', benne' ka' že' láže'gake' da' de yežlyó nga, zej yoe'le lo na' da' xiwe'.

<sup>20</sup>Na'a, nnezlžo ba bla' Ži'n Dios nga, na' benne' yela' žejn' il chežo, nich gónbialžo Bennen' nake' dot da' li. Zóalenžo Bennen' nake' dot da' li dan' zóalenžo Jesús, Benne' Criston', Ži'n Dios. Benne' ni nake' Dios da' li, na' Bennen' žonne' yela' nban da' zejlí kanne chežo. <sup>21</sup>Zi'na'do' ka', le gape chi'i kwinle nich bi wká'n ženle lo'a ka'. Ka'kze gaken.

# DIŽA' BEŽOPE DA' BZOJ ZWA

Benne' nake' dot da' li, na' yeļa' nži'il

<sup>1</sup>Neda', Žwa, žapa' le' "Padiox", no'le wžekze Dios, na' žapa' "Padiox" yógo'te zí'no' ka'. Nži'ilā' le'e dan' nónbiažo Benne' nake' dot da' li, na' kege nedza', san ̄lezka' yógo'te benne' ka', benne' zej nzi'e xtiža' Dios da' naken dot da' li, zej nži'ilē' le'e. Naka' benne' gole, žape chi'a benáčh ka' che Benne' Criston'.

<sup>2</sup>Nži'ilto' le'e dan' yo'o lo yichj lázdo'žo xtiža' Dios da' naken dot da' li, na' sóalentezen žo'o. <sup>3</sup>Znnabla' Xažo Dios len Xanžo Jesús, Benne' Criston', Zi'nkze Diosen', gon chawē'e le'e, na' yeyache' láže'le' le'e, na' wká'n zie' yichj lázdo'le dan' nak dot da' li xtiže'e, na' nži'ilē' le'e.

<sup>4</sup>Bebéle'ela' katen' benla' žongak zi'no' ka' kan znna xtiža' Dios da' naken dot da' li, dan' žóngake' kan bchi'le Xažo Dios žo'o. <sup>5</sup>Na'a, žáta'yoela' le', nó'ledo', gono' kan znna da' bchi'le Jesusen'. Bi zzoja' chio' to da' kobe. Žzoja' da' bchi'le Jesusen' žo'o ža ni'te, katen' wnné' žala' ži'ilžo lježžo ka'. <sup>6</sup>Ki nak bia' nži'ilžo Dios. Naken ki cha' žonžo kan bchi'le' žo'o. Dan' bchi'le' naken nich ži'ilžo lježžo ka' kan ba bénlele le'e ža ni'te.

No benne' ka' žon láže'gkile' žo'o

<sup>7</sup>Da' ni žapa' le'e: dan' ba zdagak benne' zan yežlyó nga, benne' ka' žon láže'gake', na' bi nzi' lo ná'gake' kan bla' Jesúš, Benne' Criston', golje' benáčh. No benne' žone' ki, nake' benne' wen laže', na' zži'e che Benne' Criston'. <sup>8</sup>Le gape chi'i kwinle nich bi wnitle da' ba naple dan' žonle xchin Benne' Criston', san le we' laže' gata' chele dot da' žala' si'le lo na' Dios.

<sup>9</sup>No benne' wsedle' le'e da' nža' kan nak dan' bsedle Benne' Criston', bi zoažen Dios bennen'. Xažo Dios len Zi'nen' zóalene' no benne' žónteze' ka znna xtiža' Benne' Criston'. <sup>10</sup>Cha' no benne' ze'e gan zoale, na' žsadle' to da' yoble, bi wléblele bennen' ližle, na' bi ye'le-ne': "Dios gon chawē'e le'." <sup>11</sup>No benne' ži'e le': "Dios gon chawē'e le'", žónlene' le' tzen da' kegle da' žone'.

Žwa žxen laže'e le'ele' lježe' ka'

<sup>12</sup>La'kze žala' yapa' le'e da' zan, bi žénela' wzoja' yógo'ten le'e yiche. Žxen laža'a la'a gan zoale, na' wchaljžo kwáselo, nich gak yebelžo dot láže'žo.

<sup>13</sup>Xkwide' ka' che no'le bilo', no'len' wžekze Dios, žápegake' le' "Padiox." Ka'kze gaken.

# DIŽA' BEYONNE DA' BZOJ ŽWA

**Da' chawe' da' žon benne' lie' Gayo**

<sup>1</sup>Neda', Žwa, žapa' le' "Padiox",  
Gayo, benne' ži'i laže'. Naka' benne'  
gole, žape chi'a benách ka' che  
Benne' Criston'. Nži'il'a' le' dot laža'a.

<sup>2</sup>Ljéža'do', znnabla' Dios gon  
chawe'e le' lo yógo'te da' žono', na'  
lezka' so' chawe', kan že' chawe'  
be' nakkzo'. <sup>3</sup>Žebela' dan' zla'gak  
lježjo ka' ga zoa' ni, na' zzoa lígake'  
kan nako', na' znnágake' nako' li  
laže', na' žono' kan znnna xtiža'  
Dios, da' naken dot da' li. <sup>4</sup>Bi be  
zoo da' žonžen ga žebela' ka da' ni,  
kate' ženla' benne' ka' zej nake' ka  
xkwide' chekza' ka' žongake' kan  
znnna da' naken dot da' li.

<sup>5</sup>Ljéža'do', žono' da' naken dot  
chawe' kate' žákleno' lježjo ka',  
la'kze bi na' gónbi'o yógo'tegake'.

<sup>6</sup>Lježjo ki zzoa lígake' kan nak chio'  
le' lawgak benách ka' che Benne'  
Criston', benne' ka' nníta'gake' nga,  
na' zzéngekle' neto' kan nži'il'o'  
légake'. Žono' da' nak chawe' kate'  
žeg'o légake' nez, na' žákleno'  
légake' kan žala' gono' chegak  
benne' ka' žongake' xchin Dios, nich  
yeýogake' binlo nez. <sup>7</sup>Légake'  
bžójgake' nga dan' zej nži'ile' Jesúš,  
na' bi be zzi'gake' lo na'gak benne'

ka' bi zej nake' toze len Benne'  
Criston'. <sup>8</sup>Che len žala' gapžo ba  
la'ne benne' ka' žongake' ki, nich  
gónlenžo légake' tzen žin che da'  
naken dot da' li.

**Da' kegle da' žon benne' lie' Diótrefes**

<sup>9</sup>Ba bzoja' da' wzejni'ilen benách  
ka' che Benne' Criston', benne' ka'  
nníta'gake' ga na', san Diótrefes,  
bennen' zdan laže'e gake' blo  
ládjwgake', bi žape' neto' ba la'ne.

<sup>10</sup>Che len, cha' yida' gan zoale, wsá'a  
láže'le kan zej nak da' žone' le' katen'  
dobžo. Znnie' cheto' da' wen laže'. Bi  
žaz laže'e da' nize, san lezka' bi žape'  
ba la'ne lježjo ka' zžíngake' ga na', na'  
žejwe' xnezgak benne' ka' žénegekle'  
gópegake' benne' ka' ba la'ne, na'  
žebeje' légake' ladžw benách ka' che  
Benne' Criston'.

<sup>11</sup>Ljéža'do', bi gono' kan žongak benne'  
ka' žongake' da' kegle, san kan žongak  
benne' ka' žongake' da' naken chawe'  
žala' gono'. No benne' žone' da' naken  
chawe' nake' che Dios, san no benne'  
žone' da' kegle batkle bénbi'e Dios.

**Da' chawe' da' žon benne'  
lie' Demetrio**

<sup>12</sup>Yógo'te lježjo ka' zzoa lígake'  
che Demetrio, dan' nak bia' žone'

da' naken dot da' li. Lezka' neto'  
zzoa lito' chie', na' nnezlo' da'  
zchaljto' kan nak chie' le' naken  
dot da' li.

**Da' znnab Zwa law Dios**

<sup>13</sup>Gónela' wzoja' chio' da' zanže,  
san bi žénela' wzojan' le'e yichze.

<sup>14</sup>Na'a, žxen laža'a lé'etela' le', na'  
wchajžo kwáselo.

<sup>15</sup>Znnabla' Dios wká'n žie' yichj  
laždo'o. Benne' ka'zej nnite'e nga,  
benne' ka'zej nži'ile' žo'o, žápegake'  
le' "Padiox." Lezka' le', wdape  
"Padiox" to to benne' ka'zej nži'ile'  
žo'o. Ka'kze gaken.

# DIŽA' DA' BZOJ JUDAS

## Judas žape' "Padiox" benne' ka' wžekze Dios

<sup>1</sup>Neda', Judas, žapa' le'e "Padiox", nakle benne' ka' bliž Xažo Dios le'e, na' nži'ilе' le'e, na' žape chi'e le'e dan' nakle toze len Jesús. Naka' benne' gole, na' wen žin che Jesusen', Benne' Criston', na' lezka' naka' ljež Jakob. <sup>2</sup>Znnabla' Dios yeyache' láže'le' le'e, na' zí'ilе'ele' le'e, na' wká'n zie' yichj lázdo'le.

## Benne' wen laže' ka'

<sup>3</sup>Zí'na'do' ka', gok láže'li'a wzoja' chele kan nak yela' žeslá da' napžon, san žon byenen wzejni'ila' le'e nich dot láže'le' tít-lenle benne' ka' zží'igake' che da' žeje'žo che Dios, dan' bde Dios to chi'ize lo na'gak benne' ka'zej nave' che Leze' nich wzégake' dižan' lawgak yógo'te benách ka'. <sup>4</sup>Ki žon byenen gona' dan' bale' benne' ba wyázlengake' žo'o bagáche'ze, benne' ka' Dios bzoe' chégake' ža ni'te choge' chégake' gátgake' to chi'ize. Benne' ka' bi žka'n zéngake' Dios. Dan' že' laže' Dios žo'o, žékgakle' bi bága'gake' zia cha' góngake' da' kegle. Zží'igake' che Xanžo Jesús, Benne' Criston'. Toze' Le' znna bi'e žo'o.

<sup>5</sup>Ba nnézkzelele da' ki, san žénela' wsá'a láže'le kan ben Xanžo Dios. La'kze beslé' benách Israel ka' katen' bebeje' légake' lo yežlyó Egipto, wdé na' bžia yi'e benne' ka' wnníta'gake' ládjwgake', benne' ka' bi bejlé'gake' chie' Le'. <sup>6</sup>Lezka', Dios bsejwe' wbás che ya'abá chie' ka' lo latje chol, wbás ka' bi bengake' xchíngake', san bká'ngake' latje chégake'. To chi'ize zej nžeje' ga na', na' zejté ža wchínnj Dios yežlyó nga. <sup>7</sup>Lezka' goken chegak yež Sodoma, na' yež Gomorra, na' chegak yež ka' bdílegaken yež ki. Kan bengak wbás che ya'abá ka', bží'igake' che Dios, lezka' bengak benne' ka' wnníta'gake' lo yež ka'. Bde kwíngake' nich bengake' da' bi naken chawé', na' da' wzé láže'gake', dan' žonen ga žedoe'elžo. Na'a, dan' bsaka' zi' Dios légake' lo yi' da' bi yeyolen, dan' goken chégake' naken to da' zcheblen yógo'težo, nich bi gonžo kan bengak benách ka'. <sup>8</sup>La'kze gokgak da' ki, lezka' žongak benne' ki, benne' ka' žóngake' kan znnégekle' yele. Žka'n dítjgake' bela' žen chégake'. Zží'igake' che da' bchi'le Dios žo'o, na' znnégake' chegak benne' wnná bia' ka' nníta'gake' ya'abá che Dios.

<sup>9</sup>Migel na'kze, wbás blo che ya'abá, katen' bdíl-lene' da' xiwe' nich gak yeké'e belžen che Moisés, bi bežogle' wžié' da' xiwe' zia, san gožen': "Xanžo Dios tile' le'." <sup>10</sup>San benne' ki znnégake' chegak da' ka' žon Dios, da' ka' bi žejni'igekle', na' da' ka' žejni'igekle' žakze chégake' kan žongak bia yixe' ka', bia ka' bi žejni'igeklba', da' ki zkóngekle' žin, na' zžia kwíngake' zia.

<sup>11</sup>Da' nyáche'le'e gaken chégake' dan' ba béngeake' dola' kan ben Kaín, na' lo yela' zdan laže' chégake' ba bchíxgakle' kan bchixle Balaam nich si'e mežw, na' ba nžog chégake' gátgake' kan got Koré katen' bži'e che Moisés. <sup>12</sup>Benne' ki žáwgake' tzen len le'e kate' žawle yela' waw ka' lo yela' nži'il chele. Žóngake' ga zchíxgakle benne' ka'zej nake' toze len le'e, dan' že'j žáwgakze'. Zej nake' ka benne' ka' žala' wáwgake' zila' ka', san zwaw kwíngakze'. Zej nake' ka to bejw ya'abá da' bi nwan' nis, na' be' zchen' légaken nile na'le. Lezka' zej nake' ka yag ka' ba bžin ža bi da' kwíagaken san bi be želbían, na' lezka' zej nake' ka to yag da' ba wbížen dot lwen, na' ba nlažon'. <sup>13</sup>Lezka' zej nake' ka nisdo' katen' zgó'anen, na' nwan' bebe lawlen, da' zloe'elen kan nak yela' sto' da' žóngake'. Zej nake' ka belj ya'abá ka', da' ka' wdégakba' chela'ale. Dios ba bchoge' chégake' byéjwgake' to chi'ize lo latje chol.

<sup>14</sup>Kan nak chégake' bchalj Enok, bennen' wbáblene' da' gaže kwe' za'só Adán, katen' bchalje' lo wláz Dios, na' wnne': "Le wia nga, za' Xanžon' len zan gaywa' benách ka' žónlengake' Le' tzen, benne' ka'

zej nake' che Leze'. <sup>15</sup>Ze'e Le' nich wsaka' zi'e yógo'te benne' ka', na' choge' chegak yógo'te benne' ka' žóngake' da' kegle gátgake'." Ki gone' ni'a che yógo'te diža' zi' da' wnnegak benne' dola' ka' chie' Le'. <sup>16</sup>Benne' ki znnégake' chie' Le', na' žon dítjekle' Le', na' žóngake' kan nak da' zdan láže'gakze'. Zcháljgake' lo yela' zka'n zen kwíngake', na' nich ká'gake' yela' wnni'a chegak benách ka', zka'n zéngake' légake'.

Judas žse'e láže'gak benne' ka' che Jesús

<sup>17</sup>Na'a, zí'na'do' ka', le chejsá' laže' da' bchaljgak benne' wbás ka' che Xanžo Jesús, Benne' Criston', ža ni'te. <sup>18</sup>Benne' ka' belyi'e le'e: "Ža se lawte ža ka' wloé'e lawgak benne' ka' gon dítjekle' da' ka'zej naken la'y, na' góngake' da' kegle da' zdan láže'gake'." <sup>19</sup>Benne' ki zlá'agake' lažle. Zcháljgake' lo yela' benachze chégake', na' Dios Be' La'y bi zóalene' légake'.

<sup>20</sup>Na'a, zí'na'do' ka', le soa choch kan nak yela' žejlé' chele, da' naken la'y. Le wchaljlen Dios, wkónlele žin yela' wak che Dios Be' La'y. <sup>21</sup>Le ga'nlen Dios, Bennen' nži'il' žo'o, na' le kwez ža na' wloé'e law Xanžo Jesús, Benne' Criston', Bennen' žeýache' láže'le' žo'o, nich gata' yela' nban da'zej lí kanne chežo.

<sup>22</sup>Le gon choch benne' ka' žak chope láže'gake'. <sup>23</sup>Le gon ga yelágake', da' gaken kan yebejle légake' lo yi'. Lo yela' zžebe chele le yeýache' láže'l yezika' benách ka'. Le gape chi'i kwinle, nich bi gónlenle légake' tzen da' kegle da' žóngake'.

Da' zka'n zen Dios

<sup>24-25</sup>Dios tlichal, Bennen' nnézkzele' yógo'te, Bennen' besl' žo'o ni'a che

da' ben Xanžo Jesús, Benne' Criston',  
nape' yela' wak gape chi'e le'e, nich bi  
wchíxelele, na' nich wzíe' le'e lawe' Le'  
gan zoe' lo baní' li laže'. Gone' le'e dot  
chawe', na' ga yebéle'elele.

iGakkze che Dios yela' ba,  
na' yela' zen, na' yela' nak blo,  
na' yela' wnná bia', na'a ža, na'  
yógo'te ža da' zá'gaken! Ka'kze  
gaken.

## DA' BLOE'EL DIOS ZWA

Da' b<sub>ł</sub>oe'el Dios Zwa  
kan nak che Jesús

**1** Da' ni naken to da' b<sub>ł</sub>oe'e law  
Jesús, Benne' Criston', da' benn  
Dios Le' latje w<sub>ł</sub>oe'ele' benne' wen  
žin chie' ka' kan zej nak da' ka' žon  
byenen la' gáktegaken. Jesusen'  
bsele'e to wbás che ya'abá chie',  
wbasen' bjezni'ile' neda', Zwa, benne'  
wen žin che Benne' Criston'. Wbás  
che ya'abán' b<sub>ł</sub>oe'ele' neda' kan zej  
nak da' ki. <sup>2</sup>Neda', Zwa, zzoja' da' ni  
da' naken dot da' li kan nak yógo'te  
da' b<sub>ł</sub>e'ela', na' zzoa lia' che xtiža'  
Dios, na' che da' naken dot da' li da'  
b<sub>ł</sub>oe'el Jesús, Benne' Criston', neda'.

<sup>3</sup>Ba nez zen gaken che no benne'  
gole' da' ni, na' ba nez zen gaken  
chegak benne' ka' wzé nágkake' che  
no benne' gole' xtiža' Dios ni, na'  
góngake' kan znnna da' ni, dan' za'  
gaken.

Da' že' Jesús gaže kwe'  
benách chie' ka'

<sup>4</sup>Neda', Zwa, zzoja' da' že' Jesusen'  
gaže kwe' benách chie' ka', benne'  
ka' nnítal'gake' gan nbab Asia. Dios,  
Bennen' zoakze', na' wzóateze', na'  
za' yide', znnabla'-ne' gon chawé'e  
le'e, na' wká'n zie' yichj lázdo'le.

Žónlengak gaže be' che ya'abá Le'  
tzen, be' ka' zej nnitan' lawe' Le'  
gan ži'e, znnna bi'e. <sup>5</sup>Lezka' žonlen  
Jesús, Benne' Criston', Le' tzen.  
Jesusen' naked' Bennen' žone' kan  
znnne', na' zzoa lie' che Dios. Zga'ale'  
Le' bebane' to chi'ize lo yela' got, na'  
znnna bi'e benne' ka' znnna biá'gake'  
ya'abá. Le' nži'ile' žo'o, na' beké'e  
dola' da' wbága'žo, na' beyón  
chawé'e žo'o len xchene' da' blalje'  
le'e yag kroze, katen' gote' lo wlazzo  
žo'o. <sup>6</sup>Jesusen' bene' ga znnna bia'žo,  
na' ga nakžo bxoz ka', nich wká'n  
zenžo Dios, Xa Jesusen'. iGa'n zen  
Dios, na' gópteze' yela' wnná bia'!  
Ka'kze gaken.

<sup>7</sup>Le wia nga. Za' Benne' Criston'  
lo bejw ya'abá.  
Lé'egekle yógo'te benne' ka' Le',  
na' lezka' benne' ka' bétgake' Le'.  
Kwežé nyáché'gak yógo'te  
benách yežlyó nga,  
benne' ka' lé'egekle' Le'.

iKa' gakten! Ka'kze gaken.

<sup>8</sup>Ki wnnakze Jesusen': "Neda'  
naka' Bennen' zoe' zga'ale', na' lezka'  
Bennen' zeje' zante kan nak da' zzo  
law, na' da' ze lawten." Ki wnná  
Xanžon', Bennen' napkze' dot yela'  
wak. iZoakze' Le', na' wzóateze', na'  
za' yide'!

**Zla' law yela' zen che Jesús**

**9** Neda', Zwa, naka' lježle, na' zzáka'lena' le'e tzen, na' tzen len le'e žebélenla' yela' wnná bia' che Dios, na' napa' yela' zen laže' da' žonn Jesúš, Benne' Criston', chežo. Nyejwa' to yežlyó gachje láwe'le nisdo' nga, dan' nzin' Patmos. Nyejwa' dan' bzoa lia' che xtiža' Dios, na' che Jesúš, Benne' Criston'. **10** Lo ža zen che Xanžon', wzóa Dios Be' La'y toze len neda', na' benla' chi'i to benne' znnie' zižje xkóže'la' neda'. Benle chi'e kan zbeže loz bia yixe!. **11** Bennen' gože' neda': "Neda' naka' Bennen' zoe' zga'ale', na' Bennen' zeje' zante kan nak da' zzo law, na' da' ze lawten. Bzoy le'e yiche da' zle'elo', na' bsejan' chegak gaže kwe' benách chia' ka', benne' ka' nníta'gake' gan nbab Asia, benne' ka' nníta'gake':

lo yež Éfeso, na' lo yež Esmirna, na' lo yež Pérgamo, na' lo yež

Tiatira,  
na' lo yež Sardis, na' lo yež Filadelfia,  
na' lo yež Laodisea."

**12** Beyechja' nich le'ela' bennen' zcháljlene' neda'. Katen' beyechja', ble'ela' gaže da' ka'zej nwan' yi', da' ka'zej naken ya oro. **13** Ládjwgak da' ka'zej nwan' yi' ble'ela' to Benne' znn'e kan znnna' to benne' byo. Nakwe' to laže' tonn da' zžinen xni'e, na' nzie' to bayw lcho'e da' naken ya oro. **14** Zila'do'ze nak yicha' yichje' kan nak zila' o kan znnna' bege', na' žákti'te yej lawe' ka yi'. **15** Žákti'te ni'e ka ya bronse ba'a, da' nlale'en lo yi' ka bo' yalje. Zižje benle chi'e kan ženle to yegw zen. **16** Lo ne'e li

ža nwe'e gaže belj baní', na' lo žoe'e zžoj diža' da' naken ka to ya ntoche' da' ntochen' žop la'ate. Žákti'te lawe' ka wbíž katen' znná'le'en.

**17** Kate' ble'ela' Le', wbixa' xni'e ka to benne' gat. Naž Le' bxoaa ne'e neda' len ne'e li ža, na' gože' neda': "Bi žebo'. Neda' naka' Bennen' zoe' zga'ale', na' Bennen' zeje' zante.

**18** Naka' Bennen' zoakze' nbane'. Gota', na' na'a zóateza' nbana'. Nzi' lo na'a nna bi'a yela' got, na' lezka' latje chegak benne' gat ka'. **19** Bzoy le'e yiche dan' ba ble'elo', na' da' žak na'a, na' lezka' da' žala' gak te na'a.

**20** Da' ni naken da' ngache' kan nak chegak gaže belj baní' ka', da' ka' ble'elo' noa'a lo na'a li ža, na' kan zej nak da' gaže da' zej nwan' yi' da' zej naken ya oro. Gaže belj baní' ka' zej nakba' da' žsaka' leben gaže wbás chegak gaže kwe' benách chia' ka', na' da' gaže da' zej nwan' yi' zej naken da' žsaka' leben gaže kwe' benách chia' ka'!"

**Diža' da' bsela' Jesúš lo yež Éfeso**

**2** Lezka' wnná Bennen': "Bzoy le'e yiche diža' ni da' selo'o che wbás chia', bennen' zóalene' benách chia' ka' lo yež Éfeso. Ki wzojo': Zchalj Bennen' noe'e gaže belj baní' ka' lo ne'e li ža, na' zde' gachje láwe'le da' gaže da' zej nwan' yi', da' ka' zej naken ya oro. **2** Ki znn'e: Neda' nnezla' da' žonle, na' kan žónle'ele xchina'. Nnezla' zbezle zen laže', na' bi gak gakle zen laže' len benne' ka' žóngake' da' bi naken chawé'. Nnezla' ba wzí' bia'le benne' ka', benne' znnágake' zej nake' wbás chia' ka', san bi zej nake', na' na'a nnézlele žon láže'gake'. **3** Zbezle zen

laže', na' ba wzáka'le dan' nakle toze len neda', san bi bsan láže'le neda'. <sup>4</sup>Na'a, zoa to da' žesbaga'a le'e zia. Biž nží'ilele neda' kan bží'ilele neda' zga'ale. <sup>5</sup>Che len, le chejsá' laže' kan benle zga'ale, dan' bsanle, na' na'a, le yeyát laže', na' le gon kan benle zga'ale. Cha' bi yeyát láže'le, la' yidtia' gan zoale, na' yeká'a dan' nwan' yi' chele lo latje chen. <sup>6</sup>Na'a, zoa to da' žáklenen le'e. Bi zlé'elele chawe' da' žongak benne' nikolaíta ka', benne' ka' zka'n zéngake' lo'a ka', na' zóngake' da' kegle, dan' bi napa' neda' chawe'. <sup>7</sup>No benne' ženle' žala' wzé nage' da' ni da' znna Dios Be' La'y, dan' ží'e yógo'te kwe' benách ka' chia' neda', Benne' Cristo, znne': Benne' ka' sóegekle' lo da' žak yežlyó nga, gona' ga gáwgake' da' žbia yagen' dan' zoan gachje láwe'le yežlyó xtan che Dios, dan' gonen ga sóagake' nbángake' to chi'ize."

### Diža' da' bselá' Jesúš lo yež Esmirna

<sup>8</sup>Lezka' wnné': "Bzoj le'e yiche diža' ni da' selo'o che wbás chia', bennen' zóalene' benách chia' ka' lo yež Esmirna. Ki wzojo': Zchalj Bennen' zoe' zga'ale', na' lezka' nake' Bennen' zeje' zante, Bennen' gote', na' bebane' to chi'ize. <sup>9</sup>Ki znne': Neda' nnezla' da' žonle, na' kan zzáka'le. Nnezla' nakle benne' yache' ka', san da' li naple yela' wnni'a da' naken li laže'. Lezka' nnezla' kan žongak benne' ka' znnágake' zej nake' benne' judío ka', benne' ka' zej nake' che Dios, san bi zej nake', na' znne zí'gake' chele. Benne' ki zej nake' che da' xiwe'. <sup>10</sup>Bi žébele da' sáka'le. Da' xiwen' gonen ga

yéjwle bálele liž ya. Ki wsaka' zin' le'e, na' sáka'le ka chi ža. Le chejlé' chia' neda' na' zejte gatle, na' neda' gonna' yela' nban da' zejlí kanne chele. <sup>11</sup>No benne' ženle' žala' wzé nage' da' ni da' znna Dios Be' La'y, dan' ží'e yógo'te kwe' benách ka' chia' neda', Benne' Cristo, znne': Benne' ka' sóegekle' da' žak yežlyó nga, yela' got da' gaken da' bežope chi'i chegak benne' ka' cházgake' lo yi' gabíl bi be gonen chégake'."

### Diža' da' bselá' Jesúš lo yež Pérgamo

<sup>12</sup>Lezka' wnné': "Bzoj le'e yiche diža' ni da' selo'o che wbás chia', bennen' zóalene' benách chia' ka' lo yež Pérgamo. Ki wzojo': Zchalj Bennen' noe'e ya ntoche', da' ntochen' žop la'ate. <sup>13</sup>Neda' nnezla' da' žonle. Nnezla' zoale gan znna bia' da' xiwe', san ne žxen láže'le neda'. Bi bsanle kan zejle'le chia' neda'. Bi bsanlen katen' bétgake' Antipas gan zoale, bennen' bzoa líteze' chia', na' gote' ga na' že' da' xiwe'. <sup>14</sup>Na'a, zej nnita' to chope da' žesbaga'a le'e zia. Nzi' lo na'le benách ka' lo yež Pérgamo, benne' ka' nzi' lo ná'gake' da' bsedle Balaam, bennen' bsdle' Balak gone' ga chíxgekle benách Israel ka', na' che len bdáwgake' bia beždo' ka', bia ka' bétgake'-ba' lawgak lo'a ka', na' béngeake' da' kegle.

<sup>15</sup>Lezka' žónlengak benne' ka' le'e tzen, benne' ka' nzi' lo ná'gake' da' žségekle benne' nikolaíta ka', dan' bi zlé'ela' neda' chawe'. <sup>16</sup>Che len, le yeyát laže' na'a. Cha' bi yeyát láže'le, la' yidtia' gan zoale, na' tíl-lena' légake' len diža' da' zžojen žoa'a, dan' naken ka to ya ntoche'.

<sup>17</sup>No benne' ženle', žala' wzé nage' da' ni da' znna Dios Be' La'y, dan' ži'e yógo'te kwe' benách chia' neda', Benne' Cristo, znne': Benne' ka' sőegekle' da' žak yežlyó nga, wáwgaka'-ne' yet maná da' ngache'. Lezka' wnejzjwa' to yej chíchedo' chégake', na' lo yej na' nyejw to la kobe, da' bi nonbia' nitó benne', san toze bennen' si'en."

### Diža' da' bsela' Jesúš lo yež Tiatira

<sup>18</sup>Lezka' wnné': "Bzoz le'e yiche diža' ni da' selo'o che wbás chia', bennen' zóalene' benách chia' ka' lo yež Tiatira. Ki wzojo': Zchalj Zi'n Dios, Bennen' žia yej lawe' dan'zej naken ka yi', na' ni'ezej naken ka ya bronse ba'a. <sup>19</sup>Ki znne': Neda' nnezla' da' žonle. Nnezla' kan nží'ilele neda', na' kan žejele'le chia' neda'. Lezka' nnezla' kan žonle xchina' lo yela' zbez zen laže' chele. Nnezla' nakže li laže' kan žonle da' ki ka benle zga'ale. <sup>20</sup>Zej nnita' to chope da' žesbaga'a le'e zia. Žwe'ele latje no'len' lie' Jesabel, no'len' znne' zchalje' lo wláz Dios, na' len da' žesdle' žon láže'le' benne' ka', benne' žóngake' xchina'. Žesdle' légake' da' žonen ga žóngake' da' kegle dan' žáwgake' bia beždo' ka', bia ka' žotgake'-ba' lawgak lo'a ka'. <sup>21</sup>Neda' bi'a-ne' latje yeyát laže'e, san bi žénele' wka'ne' da' kegle da' žone'. <sup>22</sup>Che len cho'na'-ne' ga gate'e, gan sake'e to yižwé' zen tzen len benne' ka' žónlengake' le' tzen da' kegle. Ki gona' na'a cha' bi yeyát láže'gake' nich biž góngake' dola'. <sup>23</sup>Gona' ga gatgak zí'ngake' ka'. Ki gaken, gákbe'gekla yógo'te kwe' benách chia' ka' zwia' neda'

da' zbek yichjgak benách ka', na' da' zza' láže'gake', na' yebi'a chele kan nak da' žonle. <sup>24</sup>Yezíka'le le'e zoale lo yež Tiatira, nôlele le'e bi nzi' lo na'le dan' žesdle', na' bi wzí' lo na'le dan' znnagak benne' ka' naple'en yela' žejni'il, san da' li naken che da' xiwe', žapa' le'e: bi yesbaga'a le'e yetó da' žala' gonle. <sup>25</sup>Na'a, dan' ba nzi' lo na'le, le gape chi'in na' zejte yelá' neda'. <sup>26</sup>Benne' ka' sőegekle' da' žak yežlyó nga, na' góngake' kan žénela' neda' na' zejte ža na', neda' gona' ga nna biá'gake' benách ka' nníta'gake' dot yežlyó nga. <sup>27</sup>Kan Xažo Dios bdie' lo na'a yela' wnná bia', lezka' neda' gona' ga nna biá'gake' yež ka', na' gata' lo ná'gake' to bar ya, na' wzózjgake' benách ka' kan žon to benne' zzozje' to yeso' da' naken yo. <sup>28</sup>Lezka' gonna' légake' latje gákake' toze len neda'. Naka' ka belj xsile chegak benách chia' ka'. <sup>29</sup>No benne' ženle' žala' wzé nage' da' ni da' znna Dios Be' La'y, dan' ži'e yógo'te kwe' benách chia' neda', Benne' Cristo."

### Diža' da' bsela' Jesúš lo yež Sardis

**3** Lezka' wnné': "Bzoz le'e yiche diža' ni da' selo'o che wbás chia', bennen' zóalene' benách chia' ka' lo yež Sardis. Ki wzojo': Zchalj Bennen' nníta'lengak gaže be' ka' Le', na' noe'e da' gaže belj baní' ka' lo ne'e li ža. Ki znne': Neda' nnezla' da' bi nak chawé' da' žonle, na' nnezla' ba natkzle la'kze žékgekla benách ka' zoale nbanle. <sup>2</sup>Le soa ban laže'. Le gon choch da' ka' nníta'lengaken le'e, da' ka' za' gátgaken, dan' žonle da' bi naken chawé' law Dios. <sup>3</sup>Le chejsá' laže' na'a xtiža' Dios da'

bénlele, dan' wzí' lo na'le. Le gon kan znna xtiže'e na', na' le yeyát laže'. Cha' bi gak ban láže'le, kon yela'kza' gan zoale kan zla' benne' wbán, na' bi nnézlele biz ža na' la'a gan zoale. <sup>4</sup>Bale benne', benne' ka' nnítalengake' le'e lo yež Sardis, zej nake' chawe'. Benne' ka' tálengake' neda', nákwgake' laže' zíla'do'ze da' zloe'elen ba beyákgake' dot chawe' dan' zej nake' zi gaken ki chégake'. <sup>5</sup>Benne' ka' sóegekle' da' žak yežlyó nga wakwa' lágake' laže' zíla'do'ze, na' bi wsola' lágake' da' ba zej nyejwn gan zej nyejw lagak benne' ka' zej nape' yela' nban da' zejlí kanne. Si' lo na'a benne' ki law Xažo Dios, na' lawgak wbás che ya'abá chie' ka'. <sup>6</sup>No benne' ženle' žala' wzé nage' da' ni da' znna Dios Be' La'y, dan' ži'e yógo'te kwe' benách ka' chia' neda', Benne' Cristo."

### Diža' da' bseļa' Jesúš lo yež Filadelfia

<sup>7</sup>Lezka' wnné': "Bzoj le'e yiche diža' ni da' selo'o che wbás chia', bennen' zóalene' benách chia' ka' lo yež Filadelfia. Ki wzojo': Zchalj Benne' La'y, Bennen' znne' da' naken dot da' li, na' yo'o lo ne'e zi'n ya che Dabí, bennen' wnná bi'e, na' žsaljwe' gan žo'ogak benách ka', na' bi gak no benne' wsejwen', na' žsejwe', na' bi gak no benne' wsaljwen'.

<sup>8</sup>Benne' ni znne': Neda' nnezla' da' žonle. Nnezla' naple láte'ze yela' wak, san žonle kan znna xtiža'a, na' bi žedoé'elele znnale nakle chia' neda'. Che len ba bzoa' lawle to gan gak cho'ole da' nyaljwn, na' bi gak no benne' wsejwen'. <sup>9</sup>Le wia nga, benne' ka' zej nake' toze len da' xiwe', na' žon láže'gake', na'

znnágake' zej nake' benne' judío ka', benne' ka' zka'n zéngake' Dios, san bi zej nake' ki, neda' gona' ga lá'gake' lawle le'e, na' wzóa zíbgake' xni'ale. Naž gákbe'egekle' nži'ilä' le'e.

<sup>10</sup>Dan' benle le'e kan znna xtiža'a, na' gokle zen laže', neda' gape chi'a le'e ža na' sáka'gak yógo'te benách ka', benne' ka' nnítalengake' yežlyó nga, da' gaken nich si' bian' lágake'. <sup>11</sup>Za' yelá'a. Che len le gape chi'i da' naple, nich bi gak no benne' gone' ga bi si'le dan' žala' gonna' chele.

<sup>12</sup>Nólele le'e sóelele da' žak yežlyó nga, neda' gona' ga gakle choch kan zej nak yag ka' da' žóxe'gaken yo'o, na' soale lo yodo' gan zoakze Dios, na' batkle yežojle ga na'. Wdá'a lawle le'e La Dios chia', na' lezka' kan nzi' yež che Dios da' naken yež Jerusalén kobe, da' žojen ya'abá che Dios lo na' Dios. Lezka' wdá'a lawle le'e la' kobe. <sup>13</sup>No benne' ženle' žala' wzé nage' da' ni da' znna Dios Be' La'y, dan' ži'e yógo'te kwe' benách ka' chia' neda', Benne' Cristo."

### Diža' da' bseļa' Jesúš lo yež Laodisea

<sup>14</sup>Lezka' wnné': "Bzoj le'e yiche diža' ni da' selo'o che wbás chia', bennen' zóalene' benách chia' ka' lo yež Laodisea. Ki wzojo': Zchalj Bennen' zoe' to chi'ize, Bennen' žone' kan znne', na' zchalje' da' li, Bennen' bla' lo ne'e Le' yógo'te da' ben Dios. <sup>15</sup>Ki znne': Neda' nnezla' da' žonle. Kan žonle naken ka nis da' bi naken zag dan' bi zka'tle neda' to chi'ize, na' bi naken ka nis la dan' bi žonle xchina' dot láže'le. Gakže chawe' gakle ka nis zag o ka nis la. <sup>16</sup>Na'a dan' nakle ka nis ža'do', na' bi nakle ka nis zag, na' bi

nakle ka nis la, cho'na' le'e kan žon bennen' žeyebe' nis ža'do' na'. <sup>17</sup>Le'e zniale naple yela' wnni'a, na' žak da' chawe' chele, na' bi be žiažjen chele, san bi žákbe'elele kan nakle. Nakle benne' yache' ka'. Že' zédlele. Nak nyache' láže'le, na' nak chol yichj lázdo'le, na' zdale gal yídzele. <sup>18</sup>Che len, neda' zzejni'ilá le'e nich gá'wle lo na'a neda' da' naken ka ya oro da' ben chawa'a lo yí', nich gata' yela' wnni'a li laže' chele. Lezka' žala' gá'wle lo na'a laže' chich da' gákwle, nich gache' yela' gal yidze chele da' žonen ga žedoe'ele no benne'. Lezka' žala' gá'wle lo na'a da' yeyonen yej lawle nich gak lé'ele. <sup>19</sup>Neda' zdila', na' zzela' snia yógo'te benne' ka' nži'ilá cha' bi žóngake' da' naken chawe'. Che len, le yeyát laže', na' le gon xchina' dot lázhe'le. <sup>20</sup>Le wia nga, nedkza' zia' ža yo'o, na' žliža'. Cha' no benne' yenle' chia', na' saljwe' chia', na' choa'a, na' gáwlena' bennen', na' le' gáwlene' neda'. <sup>21</sup>Nólele sóelele da' žak yežlyó nga, neda' gona' ga kwé'lenle neda' tzen gan ži'a znna bi'a, kan ben Xa' chia' neda'. Bzoela' da' gok chia', na' wžé'lena' Xa' tzen gan ži'e znna bi'e. <sup>22</sup>No benne' ženle', žala' wzé nage' da' ni da' znna Dios Be' La'y, dan' ži'e yógo'te kwe' benách ka' chia' neda', Benne' Cristo."

### Žolgake' da' žka'n zenen Dios ya'abá chie'

**4** Wdé gokgak da' ki, bwia' na' ble'ela' to gan žo'ogak benách da' nyaljwn ya'abá che Dios. Lezka' benla' chi'i bennen' dan' benla' zga'ale, na' wnnié' zižje kan zbež loz bia yixe'. Chi'i na' wnnén neda',

na' wnnán: "Da ža'le nga, na' neda' wloe'ela' le' da' ka' žon byenen gákgaken te na'a."

<sup>2</sup>Ka' gaze Dios Be' La'y bchi'e neda', na' ble'ela' to latje ya'abá che Dios gan že' Bennen' znna bi'e, na' lezka' ble'ela' Bennen' ži'e latjen'. <sup>3</sup>Bennen' ži'e latjen' žákti'te', kan žákti'te yej jaspe, na' yej kornalina, yej ka' záka'le'egaken. Gachje láwe'le latjen' zoa pita' ya'a da' naken xtan kan nak yej esmeralda, da' žeple'en yes baní'. <sup>4</sup>Dot gawze latjen' zej nnita' yetáp žoa latje ka' gan želbé' tap žoa benne' gole ka', benne' ka' zej nape' yela' wnnábia', na' zej nakwe' laže' zíla'do'ze, na' žiagak yíchjgake' da' ka' zej naken ya oro. <sup>5</sup>Lo latje blo gan že' Bennen', želžój yes ka', na' wzió' znnen, na' žaxto' zen znnen. Lawle latjen' zza'ni'gak gaže da' ka' zgó'ogaken baní', da' ka' zej naken gaže be' ka' žónlengaken Dios tzen. <sup>6</sup>Gan nak law latjen' zoa to kan nak to nisdo' da' žepen yes baní' ka yej jese.

Dot gawze latjen', chelá'a weje zej nnita' tape benne' ban, na' yej láwgake' zan žíagaken zaka' xkóžel'gake', na' láwlegake'. <sup>7</sup>Benne' nežw ladjw tape' ki znnel'e kan znna' beže yixe'. Benne' bežopen' znnel'e kan znna' beže, na' benne' beyonnen' znna' lawe' kan nak law to benne', na' benne' bedapen' znnel'e kan znna' to bsia, bia zlaba'. <sup>8</sup>Dapte benne' ki, žiagak xope xílgake', na' láwlegaken, na' lél'gaken, yej law zan žíagaken. Dot ža' dot yele, bi žsángake' znnágake':

iLa'y, la'y, la'y nak Xanžo Dios, Bennen' napkze' dot yela' wak!

iWzoakze', na' zoakze', na' za'  
yela'kze'!

<sup>9</sup> Benne' ban ka' zka'n zéngake'  
Bennen' ži'e znna bi'e, na' zóateze'  
nbane'. Žápegake' Bennen' ba la'ne,  
na' žé'gake' Le': "Žóxkeno!" Yógo'te  
chi'i žongak dapte benne' ban ka' ki,  
<sup>10</sup> na' tap žoa benne' gole ka' zzechw  
láwgake' lo yo law Bennen', na'  
zka'n zéngake' Le', Bennen' zóateze',  
na' žeká'gake' da' ka' zej naken oro  
da' žíagaken yíchjgake', na' zdégake'  
da' ka' lawle latjen' gan že' znna bia'  
Bennen', na' znnágake':

<sup>11</sup> iXanto' Dios, nako' Le' zi wká'n  
zento' Le',  
na' gapto' Le' ba la'ne, na' gata'  
chio' yela' wnná bia'  
dan' beno' yógo'te da' zej den!  
Kan žénekzel' zej den, na' wzó  
law zej den.

### To yiche, na' Bennen' nake' Zíla'do'

**5** Naž ble'ela' to yiche lo na' li  
ža che Bennen' ži'e latje blon'.  
Yichen' naken to yiche ndoben, na'  
zej žian diža' žope la'alen. Nyejwn  
yichen' len gaže da' zej nak bian'.  
<sup>2</sup> Ble'ela' to wbás blo che ya'abá, na'  
wnníe' zižje, na' wnné': "¿Noz benne'  
nake' zi choge' da' ka' zej nak bian'  
da' zej noxen yichen', na' saljwen??"

<sup>3</sup> Bi gok nitó benne' saljwe' yichen',  
na' bi gok no benne' wien', nitó  
benne' zoe' ya'abá che Dios, na' nitó  
benne' zoe' yežlyó, na' nitó benne'  
zoe' zanle yežlyó. <sup>4</sup> Naž wžeža' neda'  
dan' bi bžel-le no benne' nake' zi  
saljwe' yichen', na' nitó benne' nake'  
zi gołen', na' nitó' nake' zi wien'.  
<sup>5</sup> Naž to benne' gołen' gože' neda',  
na' wnné': "Bi kwežo'. Bennen' nake'  
ka to beže yixe', Bennen' nbáblene'

za'só Judá, na' nake' za'só Dabí. Le'  
ba bzoele' yógo'te da' gókgaken  
chie'. Lekze' nake' zi choge' da' ka'  
zej noxen yichen', na' wsaljwen!."

<sup>6</sup> Naž ble'ela' Bennen' nake' Zíla'do'  
che Dios, na' zie' law Bennen' ži'e latje  
blon', da' zoan gachje láwe'le gan zej  
nnita' benne' ban ka', na' benne' gole  
ka'. Žíagak Zíla'don' we' kan žíagak to  
zila', bian' bétgake'-ba' law Dios, na'  
žíagak gaže lozba', na' gaže yej lawba',  
da' ka' zloé'geklen kan zej nak gaže  
be' ka' žónlengaken Dios tzen, be'  
ka' zsele'e dot yežlyó. <sup>7</sup> Wdé Bennen'  
nake' Zíla'do', na' bexwe' yichen' da'  
žian lo na' li ža che Bennen' ži'e latje  
blon'. <sup>8</sup> Kate' bexwe' yichen', na' tape  
benne' ban ka' len tape žoa benne'  
gole ka' bzoa zíbgake' law Bennen'  
nake' Zíla'do'. To to benne' gole ka' zej  
noe'e to da' zgólgake', da' ka' zej nzin'  
arpa, na' lezka' zej noe'e bégado' ka'  
da' zej naken oro, na' yóžgaken yale,  
dan' zloe'elen yela' zchajlen Dios  
chegak benne' chie' ka'. <sup>9</sup> Žólgake'  
to da' kobe da' zka'n zenen Zíla'don',  
dan' znnan ki:

Nako' Le' zi goxo' yichen',  
na' chogo' da' ka' zej noxen',  
dan' bi'o latje benne' ka' bétgake'  
Le',  
na' len xcheno' beya'o benách ka'  
nich gákake' che Dios,  
zej nake' benách ka' nnít'a'gake'  
dot yežlyó,  
benách ka' zcháljgake' yógo'te  
diža' yoble ka',  
na' zej nbabe' yógo'te yež ka' zej  
nnitan' dot yežlyó.

<sup>10</sup> Beno' ga zej nake' benne' wnná  
bia' ka',  
na' ga zej nake' bxoz ka' che  
Dios chežo.

Beno' ga ȝnna biá'gake' yežlyó.

<sup>11</sup>Naž bwia', na' benla' chi'igak wbás zan che ya'abá. Wbás zan gole kwis nníta'gake'. Zégake' kwit latje blon' tzen ȝen benne' ban ka', na' ȝezka' ȝen benne' gole ka'. <sup>12</sup>Wnnégake' zižje yógo'tegake', na' wnnágake':

iBennen' nake' Zíla'do', bian' bétgake'-ba',  
nake' zi si' ȝo ne'e yela' wnná bia',  
na' yela' wnni'a, na' yela' žejni'il,  
na' yela' wak!

iNake' zi gapžo-ne' ba la'ne,  
na' chejle'žo chie', na' wkán  
zenžo-ne'!

<sup>13</sup>Naž benla' žolgak yógo'te da'  
ben Dios, da' ka'zej nnitan' ya'abá  
chie', na' ȝo yežlyó, na' zanle yežlyó,  
na' ȝo nisdo'. Žolgak yógo'te da'zej  
nnitan' latje ka', na' wnnágaken:

iGa'n zen Bennen' žie' latje blon',  
na' ȝezka' Bennen' nake' Zíla'do'!  
iGápetezžo-ne' ba la'ne, na'  
wkán zenžo-ne'!

iNna biá'teze' Le'!

<sup>14</sup>Tape benne' ban ka' wnnágake':  
"iKa'kze gaken!"

Naž tap žoa benne' gole ka'  
bzechw lágake' ȝo yote, na' bka'n  
zéngake' Bennen' zóateze'.

### Da' ka'zej noxen yichen'

**6** Naž ble'ela' Bennen' nake'  
Zíla'do', na' bchoge' to da'  
noxen yichen', na' benla' che to  
benne' zoe' ladjw tap benne' ban ka',  
na' benle chi'e kan ȝnne wzió', na'  
wnné: "Da wio!"

<sup>2</sup>Bwia', na' ble'ela' to bia chich, na'  
bennen' žie'-ba' noxe' to da' žsen yag  
ntóche'do' ka'. Bnázjwgake' le' to da'  
naken oro da' bžie' yichje', na' bžoje'

ka to benne' blo, benne' wnná bia',  
nich wléj wchochje' benne' ka' žjake'  
lo wdile.

<sup>3</sup>Kate' Bennen' nake' Zíla'do'  
bchoge' da' bežope da' noxen yichen',  
na' benla' che benne' ban bežope',  
na' wnné: "Da wio!"

<sup>4</sup>Naž bžoj to bia xna. Bdégake' lo  
na' bennen' žie'-ba' yela' wnná bia'  
nich yekwase' yela' zga'n cháwe'do'  
chegak benách ka', na' nich gone' ga  
gógtake' ljéžgake' ka'. Bnázjwgake'  
le' to ya ntocio' zen.

<sup>5</sup>Kate' Bennen' nake' Zíla'do'  
bchoge' da' beyonne da' noxen  
yichen', na' benla' che benne' ban  
beyonne', na' wnné: "Da wio!"

Bwia', na' ble'ela' to bia gasj, na'  
bennen' žie'-ba' noxé' to zgons. <sup>6</sup>Benla'  
chi'i to benne' zchalje' gachje láwe'le  
tape benne' ban ka', na' wnné: "Chope  
ya zoa' stribe naken lazjw to benne'  
che to ža wen žin dan' gak wbín, na'  
xope ya zoa' sebada naken lazjwe' che  
to ža wen žin, san bi gono' ga yažje  
set, na' bi be gono' che xis uba wal."

<sup>7</sup>Kate' Bennen' nake' Zíla'do'  
bchoge' da' bedape da' noxen  
yichen', na' benla' bchalj bennen'  
ban bedape', na' wnné: "Da wio!"

<sup>8</sup>Bwia', na' ble'ela' to bia gache,  
na' bennen' žie'-ba' lie' Yela' Got, na'  
bennen' lie' Latje Chol Che Benne'  
Gat Ka' žónlene' le' tzen. Bdégake' lo  
na' bennen' lie' Yela' Got yela' wnná  
bia' nich nna bi'e gachje da' gachje  
benách ka' nníta'gake' yežlyó, nich  
gógtake' lágake' ȝen ya ntocio', na'  
ȝen yela' zdón, na' ȝen yižwé' ka', na'  
ȝo žoá'agak bia yixé' snia, bia ka'  
nníta'gakba' yežlyó.

<sup>9</sup>Kate' Bennen' nake' Zíla'do'  
bchoge' da' gayo' da' noxen yichen',

na' ble'ela' zan bkog da' žen' ya'abá che Dios zej nnita' be' ka' gókgakkze benne' ka' bétgake' légake' dan' bzégake' xtiža' Dios. <sup>10</sup>Be' ki wnnegak zižje, na' wnnágaken: "Xanto' la'y, žono' kan znnno'. ¿Batxkze wchi'a lažo'o neto', na' chogo' chegak benne' ka' nníta'gake' yežlyó gátgake' dan' bétgake' neto'?"

<sup>11</sup>Bwákwgake' légake' laže' zíla'do'ze, na' belyi'e légake': "Le yezi' laže' yetó chí'ido'ze, xak la'gak yógo'te lježle nga, benne' wen žin ka' che Benne' Criston', benne' ka' gotgak benách ka' légake' kan bétgake' le'e."

<sup>12</sup>Kate' Bennen' nake' Zíla'do' bchoge' da' xop da' noxen yichen', na' bwia', na' ble'ela' wzó' yežlyó. Na' wbíž beyaken gasj, na' goken ka to laže' yicha' gasj, na' byo' beyaken xna kan nak žen. <sup>13</sup>Belyínnj belj ya'abá ka' lo yo, na' goken kan žak che to yag higo, želyínnj da' zbian kate' zta be' wale' yagen'.

<sup>14</sup>Wdé che ya'abá, na' gok chen kan žak che to da'a kate' no benne' ztoben'. Bkwasgak yógo'te ya'ado', na' yógo'te yo biž lo nisdo' ka' gan wžé'gaken. <sup>15</sup>Naž benne' ka' znnna biá'gake' lo yežlyó len benne' ka' zché'gake' benne' ka' žjake' lo wdile, na' benne' ka' nzi' lo ná'gake' yela' wnná bia', na' yógo'te benne'zej ndo'w ka', na' yógo'te benne' bizej ndo'e, na' benne' blo ka', na' benne' wnni'a ka', bkache' kwíngake' gan nak zan bloj ka', na' gan nak le'e ya'ado' ka'. <sup>16</sup>Blížgake' ya'ado' ka', na' le'e yej ka', na' wnnágake': "Le yedjbaga' neto', na' le wkache' neto', nich bi le'el Bennen' ži'e latje blon' neto', na' nich bi yedjzén neto' yela'

zža'a che Bennen' nake' Zíla'do'.

<sup>17</sup>Ba bžin ža la' law yela' zža'a chégake', na' čnozkze benne' gak soelen'?"

### To gaywá' tape yon mil benne'

**7** Wdé gokgak da' ki, na' ble'ela' tape wbás che ya'abá zégake' dape la'ale yežlyó, na' žséjwgake' xnezgak da' tape be', da' ka' žákgaken chelá'a weje lo yežlyó. Ki bengake' nich bi gak be' lo yežlyó, na' nich bi gak be' law nisdo', na' nich bi wtán yag ka'. <sup>2</sup>Lezka' ble'ela' yetó wbás che ya'abá ze'e zaka' gan zla' wbíž, na' noe'e to da' wdé'e benne' ka'zej nake' che Dios ban, dan' gak bian' légake'. Wnnié' zižje, na' bliže' tape wbás che ya'abá, wbás ka' nzi' lo ná'gake' yela' wnná bia' nich wchínnjgake' yežlyó, na' nisdo'. <sup>3</sup>Wbás ni gože' yetape' ka', na' wnné: "Bi wchinnjle yežlyó, na' nisdo', na' yag ka' na'zejte wda'to' to da' gak bian' lo xgagak benne' wen žin ka' che Dios chežo."

<sup>4</sup>Benla' kanzej nak benne' ka' da' légake' dan' nak bian', na'zej nake' to gaywá' tape yon mile' ládjwgak da' chežinno kwe' lježgak za'só Israel. <sup>5</sup>Benne' ka' da' légake' dan' nak bian'zej nake':

Chežinno mil lježgak za'só Judá.

Chežinno mil lježgak za'só

Rubén.

Chežinno mil lježgak za'só Gad.

<sup>6</sup>Chežinno mil lježgak za'só Aser.

Chežinno mil lježgak za'só

Neftalí.

Chežinno mil lježgak za'só

Manasés.

<sup>7</sup>Chežinno mil lježgak za'só Smon.

Chežinno mil lježgak za'só Lebí.

Chežinno mil lježgak za'só  
Isakar.

<sup>8</sup> Chežinno mil lježgak za'só  
Sabulón.

Chežinno mil lježgak za'só Jwsé.  
Chežinno mil lježgak za'só  
Benjamín.

**Benne' ka'zej nakwe' laže' zíla'do'ze**

<sup>9</sup> Wdé gok da' ni bwia', na' ble'ela'  
benne' zan, na' bi gak nitó benne'  
wlabe' légake'. Zej nbabe' yógo'te yež  
benne' ka' zcháljgake' diža' yoble  
ka', benne' ka' nníta'gake' dot yežlyó.  
Zégake' law Bennen' ži'e latje blon'  
gan že' Bennen' nake' Zíla'do', na'  
zej nakwe' laže' zíla'do'ze, na'zej  
noxe' zin ka'. <sup>10</sup> Wnnégake' zižje  
yógo'tegake', na' wnnágake':

iYela' žeslá zan' lo na' Dios  
chežo, Bennen' ži'e latje blo,  
na' lezka' zan' lo na' Bennen'  
nake' Zíla'do'!

<sup>11</sup> Yógo'te wbás che ya'abá zégake'  
dot gawze latje blon', gan naken dot  
gawze gan zej nnita' benne' gole ka',  
na' gan zej nnita' tape benne' ban  
ka', na' bzechw láwgake' lo yote law  
latje blon', na' bka'n zéngake' Dios,  
<sup>12</sup> na' wnnágake':

iKa'kze gaken!

iGa'n zen Dios chežo!

Napo' yela' zen, na' yela' žejni'il.  
Že'to' Le': "Žóxkeno" na' zka'n  
zento' Le'.

Napkzo' yela' wnná bia', na' dot  
yela' wak.

iGákteze ki chio', Dios cheto'  
Ka'kze gaken.

<sup>13</sup> Naž to benne' ladjw benne' gole  
ka' wnnable' neda', na' wnné': "Noz  
benne' ka'zej nakwe' laže' zíla'do'ze,  
na' ga benne' légake'?"

<sup>14</sup> Neda' goža'-ne': "Xan, le'  
nnézkzelo'."

Le' gože' neda': "Benné' ki  
belzáka'li'e lo na'gak benne' ka'  
bétgake' légake'. Naken ka belyibe'  
laže' da'zej nakwe', na' beyóngaken'  
zíla'do'ze len zen che Bennen' nake'  
Zíla'do'. <sup>15</sup> Che len nníta'gake' law  
latje blon' gan že' Dios, znnna bi'e,  
na' žóngake' žin lawe' Le' dot ža  
dot yele lo yodo' chie'. Bennen' ži'e  
latje blon' gape chi'e légake' dan'  
zóalenteze' légake'. <sup>16</sup> Biž tóngake',  
na' biž bílegake' nis, na' biž wzéy  
wbíž légake', na' biž gékgekle' da' la,  
<sup>17</sup> dan' Bennen' nake' Zíla'do', Benne'  
zoe' gachje láwe'le latje blon', gape  
chi'e légake' ka to benne' žape chi'e  
zíla' ka'. Chi'e légake' gan žal nis da'  
žonnen yela' nban, na' Dios yesbiže'  
yej láwgake' nis želbeže'!"

**Da' gaže da' noxen yichen'**

**8** Kate' Bennen' nake' Zíla'do'  
bchoge' da' gaže da' noxen  
yichen', na' wžé' ži ya'abá che Dios  
xtido'. <sup>2</sup> Naž ble'ela' gaže wbás  
che ya'abá, wbás ka' zégake' law  
Dios, na' bdégake' lo ná'gake' gaže  
lozgak bia ka'. <sup>3</sup> Naž bla' yetó wbás  
che ya'abá, na' noe'e to že'n yale  
da' naken ya oro, na' wzíe' žoe'e  
bkog da' žen' ya'abá che Dios.  
Bnézjwgake' le' yale zen nich gonen'  
toze len yela' zcháljlen Dios chegak  
yógo'te benách ka' che Benné'  
Criston', na' bzeyen' lo bkogen' da'  
naken ya oro, da' den law latje  
blon'. <sup>4</sup> Wžén žen che yalen' da' žen'  
lo na' wbás che ya'abán', na' goken  
toze len yela' zcháljlen Dios chegak  
benách ka' che Benné' Criston', na'  
bžinen gan že' Dios. <sup>5</sup> Naž wbás

che ya'abán' bexwe' ye'n yalen', na' besche'en bzio' yi' da' žian lo bkogen', na' blatjen' lo yežlyó. Wzío' wnnén zižje, na' wyép yes, na' wzó' yežlyón'.

### Zkwéžgake' lozgak bia ka'

<sup>6</sup>Naž gaže wbás che ya'abá, wbás ka' jez noxe' gaže lozgak bia ka', wzóagake' wkwežgaken'.

<sup>7</sup>Wbás nežw che ya'abá bkweže' lozba' chien', na' wžé' yej nis ži'a len yi', na' žen che we', dan' byinnjen lo yo. Wyéy to kwe' che chonne kwe' yežlyón', na' lezka' wyéy to kwe' che chonne kwe' yag ka'. Lezka' wyeygak yógo'te yixe' ya'a.

<sup>8</sup>Wbás bežope che ya'abá bkweže' lozba' chien', na' wbixé to da' naken ka to ya'a zen da' žeyen lo nisdon', na' yelate' ka gachje da' gachje nisdon' beyaken žen. <sup>9</sup>Got to kwe' che chonne kwe' da' jez nban da' jez mitan' lo nisdon', na' wžia' yi' to kwe' che chonne kwe' barkw ka'.

<sup>10</sup>Wbás beyonne che ya'abá bkweže' lozba' chien', na' to belj ya'abá da' žeyen ka yeže žala' wbixen gan de nis yegw ka', na' gan žal nis, na' goken ki che yelate' ka gachje da' gachje nis da' žen' dot yežlyó. <sup>11</sup>Beljen' nzin' Ajenjo, da' naken to da' sla', na' yelate' ka gachje da' gachje nisen' beyaken sla' kan nak ajenjon', na' gotgak benne' zan ni'a che nisen' da' beyaken sla'.

<sup>12</sup>Wbás bedáp che ya'abá bkweže' lozba' chien', na' yelate' ka gachje da' gachje wbíž beyaken chol', na' lezka' goken che byo', na' to kwe' che chonne kwe' belj ka' beyaken chol'. Ka' goken, bi bza'ní' wbíž yelate' ka gachje ža, na'

bi wza'ni'gak belj ka' len byo' yelate' ka gachje da' gachje yele.

<sup>13</sup>Naž bwia', na' benla' znne zižje to wbás che ya'abá, wbás na' zdie' gachje lawe'le zan ya'abá, na' wnné': "Da' nyáche'le'e gaken chele le'e. Da' nyáche'le'e gaken chele le'e, zoale yežlyó katen' wkwežgak yechonne wbás che ya'abá ka' lózgakba' ka'."

**9** Wbás gayo' che ya'abá bkweže' lozba' chien', na' ble'ela' to benne' ya'abá, benne' znnee ka to belj ya'abá da' bexjwn lo yežlyó, na' bnézjwgake' le' zi'n ya che latje chol'. <sup>2</sup>Bsaljwe' latje cholén', na' wžén žen che da' žeyen lo latje cholén', na' goken ka žen da' zžojen gan zzéygake' bzodo' ka', na' bechól wbíž len ya'abá ni'a che žen na'. <sup>3</sup>Lo žen na' bžojgak biche' zo ka', na' belzoaba' dot yežlyó, na' Dios bi'e légakba' latje gádo'gakba' benách ka' kan žongak goxjní' ka', bia ka' žé'gakba' yežlyó. <sup>4</sup>Le' góžgake'-ba' bi yé lengakba' yixe' dan' de yežlyón', na' lezka' yag ka', san wak gádo'gakba' benne' ka' bi da' lo xgágake' dan' nak bian' jez nake' che Dios. <sup>5</sup>Bi bi'e légakba' latje gótgakba' benách ka', san wsaka' zí'zegakba' légake' gayo' byo'. Zlále'e gan žádo'gakba' kan zla gan žádo'gak goxjní' ka'. <sup>6</sup>Lo ža ka' yénegekle benách ka' got kwíngake', san bi gákgake'. Yénegekle' gátgake' san wkache' kwin yela' got.

<sup>7</sup>Znna'gak biche' zo ka' kan znna'gak bia ka' jez nákwba' da' naken ya, nich chjakba' lo wdile. Žiagak yíchjgakba' da' ka' jez naken ka da' ka' jez naken oro. Znna' láwgakba' kan znna' lawgak benách

ka'. <sup>8</sup>Znna' yicha' yichjgakba' kan znna' yicha' yichj to no'le. Zej nak láye'gakba' kan zej nak laye' beže yixe'. <sup>9</sup>Zej nakw lchó'gakba' da' naken ya. Žongak xílgakba' žaxto' kan žongak karret ka' žzobgak bia ka' kate' zjakba' taríaze lo wdile. <sup>10</sup>Zej nak xbángakba' kan nak xban goxjní', gan zej žia lí'gakba'. Lo xbángakba' ka' zej žia da' zdíl-lengakba', nich gon zí'gakba' benách ka' gayo' byo' ka'. <sup>11</sup>Zoa to benne' znna bi'e légakba', bennen' nake' wbás xiwe' che latje chol. Wbasen' lie' len diža' hebreo: Abadón, da' znnan len diža' griego: Apolión, na' len diža' xiža': Da' Zchinnjen.

<sup>12</sup>Ba wdé da' nežw da' zžia yin' benách ka', san za'gak yechóp da' ka' wžia yin' légake'.

<sup>13</sup>Wbás xope che ya'abá bkweže' lozba' chien', na' benla' chi'i to benne' zchalje' gachje láwe'le da' tape da' zej naken ka loz beže, da' ka' dágaken dape la'ate bkogen' da' naken ya oro, da' žen' law Dios. <sup>14</sup>Bennen' zcháljlene' wbás xopen' che ya'abá, wbasen' bkweže' lozba' chien'. Bchalje', na' wnné: "Beseže tape wbás xiwe' ka' zej nžejen žoa'a yegw Éufrates."

<sup>15</sup>Naž beseže' tape wbás xiwe' ka', wbás ka' bkwez Dios che ža na'ze, da' naken ža na', na' byo' na', na' yiz na', nich gótgaken to kwe' che chonne kwe' benách ka' nníta'gake' yežlyó. <sup>16</sup>Benla' kan nbabgak benne' ka' žjake' lo wdile, benne' ka' žíagake' bia ka', na' zjáklene' tape wbás xiwe' ka'. Zej nake' chope gaywá' mil mile'.

<sup>17</sup>Ble'e dáwe'la' bia ka', na' benne' ka' zej žíagake'-ba' zej nakw

lchó'gake' da' naken xna gole, na' ya'a ka ya'abá, na' gache. Zej nak yichjgak bia ka' ka yichjgak beže yixe' ka', na' lo žoá'agakba' želžój yi', na' žen che yin', na' to da' zzeyle'en, da' nzin' sufre. <sup>18</sup>Da' ka' želžojen žoá'agakba' bétgaken to kwe' che chonne kwe' benách ka' nníta'gake' yežlyó, da' ka' zej naken yi', na' žen chen, na' dan' zzeyle'en. <sup>19</sup>Da' ka' zdíl-lengak bia ka' želžojen žoá'agakba', na' lezka' da' zej žian lo xbángakba' dan' zej nak xbángakba' ka bele snia ka', na' žiagak yichjgakba' da' zdíl-lengakban'.

<sup>20</sup>Yezíka'gak benách ka', benne' ka' bi gótgake' lo da' chope ki da' zžia yí'gaken, bi beyát láže'gake' nich biž góngake' kan žónteze žóngake', na' bi bsángake' zka'n zéngake' be' xiwe' ka', na' lo'a ka', da' ka' bi zlé'egeklen, na' bi žéngeklen, na' bi zzá'gaken. <sup>21</sup>Bi beyát láže'gake' nich biž gótgake' benách ka', na' nich biž góngake' yela' wžá' chégake', na' da' zia da' žóngake', na' yela' zban chégake'.

Wbás che ya'abá, wbasen' noxe' to yichdo' lo ne'e

**10** Naž ble'ela' yetó wbás wale che ya'abá, wbasen' bžoje' ya'abá che Dios, na' betje' lo yo, na' nakwe' bejw ya'abá, na' zoa to pita' ya'a yichjle'. Žákti'te lawe' kan znna' wbíž, na' zej nak ni'e ka yag wale ka' da' želyeyen. <sup>2</sup>Noxe' to yichdo' nyaljwn lo ne'e, na' len ni'e li ža bleje' lo nisdo', na' len ni'e yegle bleje' lo yo biž. <sup>3</sup>Naž wnníe' zižje, na' benle chi'e kan nenle kate' zbežya'a beže yixe', na' katen' beyóž wnníe' zižje, na' wnnegak gaže wzió' ka'. <sup>4</sup>Wdé

wnnegak wzió' ka', neda' za' wzoja' le'e yiche, san benla' che to benne' zchalje' ya'abá che Dios, na' gože' neda': "Bkáche'ze da' wnnagak gaže wzió' ka'. Bi wzojon' le'e yiche."

<sup>5</sup>Naž wbás che ya'abán', wbasen' ble'ela' zie' lo nisdo', na' lo yo biž, bchis ne'e li že zaka' li ya'abale, <sup>6</sup>na' ben choch xtiže'e ni'a che Bennen' zoakze', Bennen' bene' ya'abá, na' yežlyó, na' nisdo', na' da' ka'zej den to to latje ka', na' wnné: "Biž želen, <sup>7</sup>san kate' wbás gaže che ya'abá wkweže' lozba' chien', na' yeyóž gon Dios da' ngache' chie', dan' bloe'ele' benne' wen žin chie' ka', benne' ka' bcháljgake' lo wlaze' Le'."

<sup>8</sup>Naž bennen' benla' chie' bchalje' ya'abá che Dios bcháljlene' neda' da' yoble, na' wnné: "Wyéj, bejxí' yichdo' nyaljwn', dan' zoan lo na' wbás che ya'abán', wbasen' žleje' lo nisdo', na' lo yo biž."

<sup>9</sup>Wyá'a gan zoa wbás che ya'abán', na' wnnabla'-ne' gonne' yichdon' chia'. Wbás che ya'abán' gože' neda', na' wnné: "Wzín', bdawn'. Lo žo'o gaken zix kan nak china' bez, san lo li'o yeyaken sla'."

<sup>10</sup>Wzí'a yichdon' dan' zoan lo ne'e, na' bdawan'. Lo žoa'a goken zix kan nak china' bez, san katen' beyóž bdawan', na' beyaken sla' lo li'a.

<sup>11</sup>Naž gože' neda': "Žala' wchaljo' da' yoble lo wláz Dios lawgak zan kwe' benách zi'to' ka', na' gan zej nnita' yež zante ka', na' gan zcháljgake' da' zan diža' yoble ka', na' lawgak benne' zan, benne' wnná bia' ka'."

### Chope benne' zzoa lígake'

**11** Naž bla' to benne', na' benne' neda' to ya xtil da'

naken ka to da' zžíxlenžo, na' gože' neda': "Wzó ža', na' bžix yodo' che Dios. Lezka' bžix bkog la'y chen, na' blab benne' ka' nnít'a'gake' ga na', benne' ka' zka'n zéngake' Dios. <sup>2</sup>Bi wžixo' li'a yodon' dan' den na'le, dan' nden lo na'gak benách zi'to' ka', na' wléjgake' yež la'y chope-yeýón byo!"

<sup>3</sup>Lezka' gože' neda': "Sela'a chope benne' nich wzóa lígake' chia' neda', na' wcháljgake' lo wlaza' neda' chežinno gaywá' chonnlaj ža, na' gákwgake' laže' zeche!." <sup>4</sup>Benne' chope ki, benne' zzoa lígake', zej nake' chope yag olibo, yag ka' nyejw le'e yiche la'y kan nak chégaken, na' lezka' zej nake' chope da' zej nwa' yi', da' ka' zej žen' law Dios, Xan yežlyó nga. <sup>5</sup>Cha' yénele no benne' gone' chégake' da' zia, na' žoj yi' lo žoá'gake' da' wzeyen bennen', na' gotten le', na' lezka' gotten benne' ka' zží'igake' chégake'. <sup>6</sup>Chope benne' ki nzi' lo ná'gake' wséjwgake' xnez nis yejw che ya'abá, nich bi gak yejw kate' ža ka' žalá' wcháljgake' lo wláz Dios, na' lezka' nzi' lo ná'gake' góngake' ga yeyál nis žen, na' góngake' ga galj yižwé' yežlyó nga, na' ki góngake' bale chí'iteze yénegekle!. <sup>7</sup>Kate' yeyóž wzóa lígake' chia' neda', na' žoj bia snia lo latje chol, na' tíl-lenba' légake', na' wléj wchochjba' légake', na' gotba' légake'. <sup>8</sup>Bela' žen chégake' xóagaken lo nez blo che yež zen, gan wdá' Xanžon' le'e yag kroze, na' kan žsaka' lebžo, lezka' nzin' Sodoma, na' lezka' Egipto. <sup>9</sup>Benách yógo'te yež ka', na' yógo'te benách zi'to' ka', na' yógo'te benách ka' zcháljgake' da' zan diža' yoble ka', na' benách ka' nnít'a'gake' yógo'te yežlyó ka', le'gekle' bela'

žen chégake', na' chonne ža yo'o gachje bi gónnage' latje no benne' wkache'e légake' lo yežw ba. <sup>10</sup> Chaz láže'le'legak benne' ka', benne' nnita'gake' yežlyó nga dan' gotgak chope benne' ki, benne' bcháljgake' lo wláz Dios, dan' bsaka' zí'gake' benách ka' nnita'gake' yežlyó nga, na' lo yela' žebél chégake' séla'gake' da' wnézjwzegake' ljéžgake' toe' yetoe'.

<sup>11</sup> Naž kate' ba bza'a chonne ža yo'o gachje ka', Dios besbane' légake', na' belyase' belzíe', na' bžébegak yógo'te benách ka', benne' ka' blé'egekle' légake'. <sup>12</sup> Naž benle chi'i to benne' wnníe' zižje ya'abá che Dios, na' gože' légake': "Le kwen nga."

Belbene' lo bejw ya'abá zaka' li ya'abale, na' benne' ka' bží'igake' chégake' blé'egeklen'. <sup>13</sup> Ka' gaze wzó' yežlyó, na' byinnj to kwe' che chi kwe' yo'o ka' wžé'gaken lo yežen', na' katen' wzó', gotgak gaže mil benách ka'. Bžébegak benne' ka' jez nga'ne', na' bka'n zéngake' Dios, Bennen' zoe' ya'abá.

<sup>14</sup> Ba wdé da' bežope da' zžia yin' benách ka', na' za' gak da' beyonne da' wzía yin' légake'.

### Wbás gaže che ya'abá žkwež'e lozba' chien'

<sup>15</sup> Wbás gaže che ya'abá bkwež'e lozba' chien', na' benne' ka' nnita'gake' ya'abá che Dios wnnégake' zižje, na' wnnágake':

iGan wnnábia'gak benách ka' lo yežlyó  
zej nden lo na' Xanžo Dios, na'  
lo na' Benne' Criston'  
iL'e nna biá'teze'

<sup>16</sup> Naž tap žoa benne' gole ka', benne' žé'gake' gan zej nape' yela' wnnábia' law Dios, bzechw láwgake' lo yo, na' bka'n zéngake' Dios. <sup>17</sup> Na' wnnágake':

iXanto' Dios, napkzo' dot yela'  
wak!

Wzoakzo', na' zoakzo', na' za'  
yidkzo'.

Žóxkeno', dan' ba bkonlo' žin  
yela' wak žen chio',  
na' zzo lawo' znnna bi'o.

<sup>18</sup> Belžá'a benách yež ka' san ba  
bžin ža gon zí'gako'-ne'.

Naken ža wchi'a lažo'o benne'  
gat ka'.

Yebi'o chegak wen žin chio'  
ka', benne' ka' bcháljgake' lo  
wlazo' Le', benne' ka' jez nake'  
chezo',

benne' ka' wdápegake' Lo' ba  
la'ne,  
benne' gaxjw ka', na' benne'  
zaka' ka'.

Ba bžin ža wzía yi'o benne' ka'  
bchínnjgake' yežlyó.

<sup>19</sup> Naž byaljw yodo' che Dios da'  
žen' ya'abá, ga na' nla' law kak la'y  
gan yo'o diža' da' zka'n chawen',  
dan' ben Dios. Wyép yes yežlyó, na'  
benle žaxto' žen, na' wnné wzió'.  
Wzó' yežlyón', na' wžé' jez nis ži'a.

### To no'le, na' to bele žen sniale'e

**12** Naž bla' law to da' žen da'  
nak bian' lo ya'abá che Dios.  
Bla' law to no'le nakwe' da' naken  
ka wbíž, na' zoa zan ni'e da' naken  
ka byo'. Žia yichje' to da' naken  
oro gan žiagak chežinno da' ka' jez  
naken ka belj baní' ka'. <sup>2</sup>No'len' za'  
galj bi' že'n chie', na' zbežyi'e dan'  
ždia' li'e, na' zzáka'li'e dan' žalj to

xkwide' chie'. 3Naž bla' law yetó da' nak bian' lo ya'abá che Dios. Bla' law to bele zen sniale'e, bia znna'ba' xna gole, na' žiagak gaže yichjba', na' chi lozba', na' žia to da' naken oro to to yichjba' ka'. 4Len xbanba' wzobba' to kwe' che chonnie kwe' belj ka'zej nla' ya'abá, na' bžo'nba' légaken lo yežlyó. Wzé bele zen sniale'e na' law no'len' ba žalj xkwide' chie', na' wzoaba' gawba' xkwide' chien' kate' ba naljbe'. 5No'len' bzoe' to Xkwide' byodo', Bin' žala' nna bia'be' yógo'te yež ka' len yela' wak zen. Dios la' bkwastie' Xwidēn' che no'len', na' bchise'-be' gan zoakze' Le', lo latje blon' gan ži'e znna bi'e. 6Bzonnj no'len', na' wyeje' lo latje dach, gan ba bkwez Dios to latje che no'len'. Wáwgake' le' ga na' chežinno gaywá' chonn<sup>lalj</sup> ža ka'.

7Wdé gokgak da' ki, na' gokle'e wdile lo ya'abá che Dios. Migel, wbás blo che ya'abá len wbás ka' žónlengake' le' tzen, beldíl lene' bele zen sniale'e na', na' beldile' bele zen na', na' wbás xiwe' ka' žónlengaken leba' tzen, 8san bi be wzéke'lba' lo wdilen'. Che len biž bžélgekle' latje chégaken ya'abá che Dios. 9Ka' goken, belžo'ne' bele zen sniale'e na' na'le, belen' wzoaba' ža ni'te, na' nzin' Da' Xiwe', na' Satanás, dan' žon láže'len yógo'te benách ka' nníta'gake' yežlyó nga. Belžo'ne' da' xiwe' lo yežlyó nga, tzen len wbás xiwe' ka', be' ka' žónlengaken da' xiwen' tzen.

10Naž benla' chi'i to benne' wnnié' zižje ya'abá che Dios, na' wnné':

Na'a ba bžin ža la' law yela' žeslá da' ben Dios,

na' yela' wak chie', na' yela' wnná bia' chie', na' lezka' yela' wnná bia' che Benne' Criston', dan' ba bžo'ngake' da' xiwe' na'le, dan' besbagan' lježžo ka' zia dot ža dot yele, dan' benen law Dios chežo.

11Bežojgak lježžo ka' chawe', dan' bkóngekle' žin xchen Bennen' nake' Zíla'do' che Dios, na' dan' bkóngekle' žin xtiža' Dios da' bcháljgaken'. Bi be' láže'gake' yela' nban chégake', san gótgake'.

12Che len gak yela' žebél ya'abá che Dios.

iLe yebél le'e, zoale ga na'! Da' nyáche' le'e gaken chele le'e zoale yežlyó, na' lo nisdo', dan' ba betj da' xiwe', na' blan' gan zoale.

Zža'le'e da' xiwen' dan' nnezlen yetó chíido'ze de latje chen.

13Katen' gókb'e'ele bele zen sniale'e na' ba bžo'ngake' -ba' lo yežlyó, naž wžia láže'ba' no'len' bzoe' Xkwide' byodo' chien'. 14Naž Dios bnežjwe' no'len' chope xil bsia ži'a nich gak le' lo be'ze, na' wkwase' gan zoa bele zen sniale'e na', nich zine' latje chie' lo latje dach.

Wáwgake' le' ga na' chonnie yiz yo'o gachje ka'. 15Naž bele zen sniale'e na' beyeba' nis zil zaka' xkóže'le', da' goken ka to nis yegw, na' gónelba' wa'ten no'len'. 16Naž yežlyó góklernen no'len', na' wyaljw lo yo, na' we'jen nis yegon' dan' beyéb bele zen sniale'e na'. 17Naž bele zen sniale'e na' bžá'ale'eba' no'len', na' wyejba', na' bejtíl-lénba' za'sóe' ka' zej nga'ne', benne' ka' žóngake' kan

nak da' wnná Dios, na' dot láze'gake'  
žóngake' kan znna xtiža' Jesúš,  
 Benne' Criston'.

### Chope bia snia

**13** Wzía' neda' lo yox žoa'a  
 nisdo', na' ble'ela' to bia snia,  
 bia žiagak gaže yichjba', na' chi  
 lozba', na' zbenba' zžojoba' lo nisdon'.  
 Žiagak chi da' naken oro lo yichjba'  
 ka'. To to lozba' žia to da' naken oro,  
 na' to to lo xgaba' ka' nyejw to la da'  
 naken xiwe' dan' bi de Dios chawé'.  
<sup>2</sup>Bia snia na' ble'ela' znna'ba' kan  
znna' bežto', na' nak ní'aba' kan nak  
 ni'a oso, na' žoá'aba' naken kan nak  
žoa'a beže yixe'. Bele zen sniale'e  
 na' bdeba' yela' wak cheba' lo na'  
 bia snia ni tzen len latje cheba' gan  
znna bia'ba', na' lezka' yela' wnná  
 bia' zen cheba'. <sup>3</sup>Zia we' to yichj bia  
 snia na', da' naken da' gotten leba',  
 san beyák wen', na' bebángekle  
 yógo'te benách ka' mníta'gake'  
 yežlyó nga, na' bén lengake' bia snia  
 na' tzen. <sup>4</sup>Lezka' bka'n žéngake'  
 bele zen sniale'e na' dan' bdeba'  
yela' wnná bia' cheba' lo na' bia  
 snia na'. Lezka' bka'n žéngake' bia  
 snia na', na' wnnágake': "¿Nožkze  
 benne' nake' zen kan nak zen bia  
 snia na', na' nožkze benne' sáke'le'  
tíl-lene'-ba?"

<sup>5</sup>Lezka' bia snia na' wzí' lo na'ba'  
žchaljba' da' zka'n zen kwinba',  
 na' diža' xiwe' da' znneba' che  
 Dios. Chope-yon byo' gota' lo na'ba'  
yela' wnná bia' na!. <sup>6</sup>Wzó lawba'  
znneba' che Dios, na' wnné zi'ba'  
 che La Dios, na' che latje la'y chie',  
 na' chegak benne' ka' nníta'gake'  
 ya'abá che Dios. <sup>7</sup>Lezka' wzí' lo  
 na'ba' tíl-lenba' benne' ka' zej nake'

che Dios, na' zejte wléj wchochjba'  
légake'. Lezka' wzí' lo na'ba' nna  
 bia'ba' yógo'te benách zí'to', benách  
 ka' nníta'gake' yógo'te yež ka', na'  
 yógo'te benách ka' žcháljgake' diža'  
 yoble ka', na' benách ka' nníta'gake'  
 dot yežlyó nga. <sup>8</sup>Yógo'te benách  
 ka' nníta'gake' yežlyó nga bka'n  
žéngake' bia snia na', benne' ka' bi  
 zej nyejw lágake' le'e yiche che yela'  
 nban, yichen' bzoj Bennen' nake'  
Zíla'do' che Dios katen' bi na' gata'  
 yežlyó nga, na' wnnakze Dios gat  
 Bennen' nake' Zíla'do' ni'a chegak  
 benách chie' ka'.

<sup>9</sup>Cha' zoa no benne' ženle', žala'  
 wzé nage'.

<sup>10</sup>Benne' ka' Dios wnnakze'  
 žéjgake' do ya,  
 žala' žéjgake' do ya,  
 na' benne' ka' Dios wnnakze'  
 gátgake' lo ya ntoche',  
lo ya ntoche' gátgake'.

Che len, benne' ka' zej nake' che  
 Dios žala' kwez zen láže'gake' na'  
 chejžé'gake' chie' Le'.

<sup>11</sup>Wdé na' ble'ela' yetó bia snia,  
 bian' bžobja' lo yo. Žiagak chope  
 lozba' kan zej nak loz zila', na'  
žchaljba' kan žchalj bele zen  
 sniale'e na'. <sup>12</sup>Bia snia ni wzí' lo  
 na'ba' dot yela' wnná bia' che  
 bia snia nežwn', katen' zóalenba'  
 leba'. Bia snia bežopen' žonba' ga  
 zka'n žengak yógo'te benách ka'  
nníta'gake' yežlyó nga bia snia  
 nežwn', bian' beyák wen' da' gotten  
 leba'. <sup>13</sup>Lezka' bia bežopen' žonba'  
 da' ka' zej nak bian' na' zejte  
 žonba' ga žetj yi' da' zan' ya'abá,  
 na' zyinnjen lo yo lawgak yógo'te  
 benách ka'. <sup>14</sup>Žon láze'lba' benách  
 ka' nníta'gake' yežlyó nga len da'

ka'zej nak bian' dan' nzi' lo na'ba' žonba' law bia snia nežwn'. Gožba' benách ka' nníta'gake' yežlyó nga góngake' to lo'a bia snia na', bian' gok we' lo ya ntoche', na' zoaba' nbanba'. <sup>15</sup>Nzi' lo na'ba' žonba' ga soa nban lo'a bia snia nežwn', na' gak wchaljen, na' gonen ga gatgak yógo'te benne' ka' bi wká'n zéngaken'. <sup>16</sup>Benba' ga wdá' yógo'te benách ka' to da' nak bian'zej nake' toze len leba', benne' gaxjw ka', na' benne' zaka' ka', benne' wnni'a ka', na' benne' yache' ka', benne' ka' bi jez ndo'e, na' benne' ndo'w ka'. Bda'ba' da' nak bian' lo ná'gake' li ža o lo xgágake'. <sup>17</sup>Bi gok nitó benne' bi da' ga'we' o bi da' gote'e cha' bi de'e da' nak bian', o cha' bi de'e la bia snia na', o kan nbab laba'. <sup>18</sup>Na'a žala' gata' chio' yela' žejn'il. No benne' nape' yela' žejn'il žala' wlabe' kan nbab la bia snia na', da' naken tlebe kan nbab la benne', na' kan nbab laba' naken xope gaywá' chonnlaj xope.

**Da' žolgak to gaywá' tape  
yon mil benne' byo**

**14** Wdé na' bwia', na' ble'ela' Bennen' nake' Zíla'do', na' zie' law ya'adon' da' nzin' Sión. Žónlengak to gaywá' tape yon mil benne' byo ka' Le' tzen, na' nyejw le'e xgágake' La Bennen' nake' Zíla'do', na' lezka' La Xe'. <sup>2</sup>Naž benla' to da' zgo'on žaxto' ya'abá che Dios, da' zne zížjen kan zne to yegw zen o kan zne wzió'. Benla' da' ženle kate' no benne' žinne' to da' žolen da' žian do zan. <sup>3</sup>Žolgake' to da' kobe, na' nníta'gake' law latje blon', na' lezka' law gan jez nnita'

tape benne' ban ka' len benne' gole ka'. Bi gak nitó benne' gole' da' žolgak benne' ki, san légakze to gaywá' tape yon mil benne' byo ka', benne' ka' Benne' Criston' beya'we' ladwj benách ka' nníta'gake' yežlyó nga. <sup>4</sup>Benne' byo ka' jez nake' li laže' dan' bi wnníta' lengake' no no'le, na' jez nake' benne' kwíde'ze. Žjáklene' Bennen' nake' Zíla'do' gáte' teze gan zeje'. Benne' Cristo na'kze beya'we' légake' ládjwgak benách ka', na' jez nake' benne' nežw ka' bde kwíngake' lo na' Dios, na' lo na' Bennen' nake' Zíla'do'. <sup>5</sup>Batkle ben láže'gake', na' bi gak nitó benne' bi da' nnie' chégake' gan nníta'gake' law latje blon' gan že' Dios.

**Da' bchaljgak chonne  
wbás che ya'abá**

<sup>6</sup>Naž ble'ela' yetó wbás che ya'abá, na' wdíe' lo be'ze zan ya'abá, na' noe'e diža' chawen' da' zoan to chi'ize nich wzenlen' benách ka' nníta'gake' dot yežlyó nga, benne' ka' jez nbabe' yógo'te yež ka', na' yógo'te benách zi'to' ka', na' yógo'te benne' ka' zcháljgake' diža' yoble ka', na' benne' yógo'te yežlyó ka'. <sup>7</sup>Wnné zížje wbasen', na' wnné':

Le žebe Dios, na' le gol' da' zka'n zen Le', dan' za' wchi'a laže'e benách ka'. iLe wká'n zen Dios! Lekze' bene' ya'abá, na' yežlyó, na' nisdo', na' gan žal nis.

<sup>8</sup>Yetó wbás che ya'abá bejnawe' wbás nežwn' che ya'abá, na' wnné': "Ba beyóž che yež Babilonia. Ba beyóž che yež zen na'. Ka' goken chen dan' bengak benne' ka' nníta'gake' lo yežen' ga wzí' lo

na'gak benne' yógo'te yež ka'  
góngake' kan zej nak da' sban da'  
zdan láž'gake!'"

<sup>9</sup> Yetó wbás che ya'abá bejnawe'  
wbás bežopen' che ya'abá, na'  
wnnié' zižje, na' wnné': "Cha' no  
benne' wká'n ūze' bia snia, na'  
ló'aba', na' cha' we'e latje ta' xge' o  
lo ne'e dan' nak bia' nake' toze len  
leba', <sup>10</sup>Dios wsaka' zi'e le' lo yela'  
zž'a' chie'. Sáka'le'e bennen' lo yi',  
na' lo dan' zzyle'en, lawgak wbás  
che ya'abá ka', na' law Bennen' nake'  
Zíla'do'. <sup>11</sup>Kwénteze žen che yin' gan  
sáka'gak benne' ka'. Dot ža dot yele  
sáka'gak benne' ka' bka'n zéngake'  
bia snia na', na' ló'aba', na' batkle  
gata' latje yezi' láže'gake', na' bi yezi'  
láže'gak benne' ka' bě'gake' latje ta'  
laba' légake'. <sup>12</sup>Che len žala' kwez  
zen láže'gak benne' ka' zej nake' che  
Dios, na' góngake' kan wnnakze' Le',  
benne' ka' žejlé'gake' che Jesusen!"

<sup>13</sup>Naž benla' chi'i to benne'  
zchajle' ya'abá che Dios, na' gože'  
neda', na' wnné': "Bzoj da' ni le'e  
yiche: ba nez ūzen gaken chegak  
benne' ka' gátgake' na'a so law,  
benne' ka' žejlé'gake' che Xanžon!"

Dios Be' La'y wnné': "Ka'kze gaken.  
Yezi' láže'gake' lo žin da' žóngake',  
na' gata' yela' žebél chégake' da'  
naken tlebe len da' béngeake!"

### Žezi'gake' linn che yežlyó

<sup>14</sup>Naž bwia', na' ble'ela' to bejw  
ya'abá da' naken zíla'do'ze, na' lo  
bejw na' že' to Benne' znné'e kan  
znná' Bennen' Golje' Benách, na' žia  
to da' naken oro yichje', na' lo ne'e  
noxe' to ya ntoche'. <sup>15</sup>Bzoj to wbás  
che ya'abá lo yodo', na' wnnié' zižje,  
na' gože' Bennen' ži'e lo bejwn', na'

wnné': "Bkonle žin ya ntoche' chio',  
na' bchog bisto zoa' stribé dan' ba  
bžin ža chogon'. Ba nbiž bisto chen,  
da' ka' zej den yežlyó."

<sup>16</sup>Naž Bennen' ži'e lo bejwn'  
bkonle' žin ya ntochen' dot yežlyó,  
na' bchoge' da' blan' lo yo.

<sup>17</sup>Naž bžoj yetó wbás che ya'abá  
lo yodon' da' žen' ya'abá che Dios.  
Lezka' noe'e to ya ntoche'. <sup>18</sup>Bžoj  
yetó wbás che ya'abá žoa'a bkogen',  
na' nzi' lo ne'e wkonle' žin yi', na'  
wnnié' zižje, na' bliž'e wbás nežwn'  
che ya'abá, wbasen' noe'e ya  
ntochen', na' wnné': "Bkonle žin ya  
ntoche' chion', na' btob da' želbía  
lba uba ka', da' zej žen' yežlyó, dan'  
ba na da' želbía lba uba ka'."

<sup>19</sup>Naž wbás ni che ya'abá bkonle'  
žin ya ntochen' dot yežlyó, na' btobe'  
da' želbía lba uba ka', da' zej žen'  
yežlyó, na' bejžo'nen' to lo bloj ūzen  
gan zzi xis uba. Da' ni zloe'elen kan  
gon Dios, wsaka' zi'e benách ka'  
nníta'gake' yežlyó nga. <sup>20</sup>Bleje' da'  
želbía lba uba ka' lo blojen', da' zoan  
žoa'a yež na'le, na' lo blojen' bžoj  
žen, da' wyepen ga bžinten žoá'agak  
bia ka', na' wdé žen na' dot gan gak  
sažo gaže ža.

Gaže yižwé' ka' da' zej nwa'  
gaže wbás che ya'abá

**15** Ble'ela' yetó da' ūzen ya'abá  
che Dios da' nak bian', da'  
žonen ga žebanlžo. Bžojgak gaže  
wbás che ya'abá, na' zej noxe' gaže  
yižwé' ka' da' ze láwtégaken, da' ka'  
Dios wkonle' žin nich yeyóž wsaka'  
zi'e benách ka' nníta'gake' yežlyó  
nga.

<sup>2</sup>Lezka' ble'ela' to da' naken ka  
to nisdo' da' žepen yes baní' ka yej

jesé da' yo'on yi'. Benne' ka', benne' belágake' lo na' bia snia, na' lo na' ló'aba', na' bi wzí'gake' laba', zégake' lawle da' naken ka to nisdo', na' zej noxe' da' ka' zgólgake', da' ka' bnezwjw Dios légake'. <sup>3</sup>Žólgake' da' bel Moisés, bennen' goke' wen žin che Dios ža ni'te, na' naken da' žólgake' che Bennen' nake' Zíla'do'. Wnnágake':

Le', Xanto' Dios, napkzo' dot yela' wak.

Zenle'ezej nak yógo'te da' beno', da' ka' žóngaken ga žebanltó'.

Znna bi'o Le' yógo'te yež ka'.

Dot chawe', na' li laže' naken da' žono'.

<sup>4</sup>¿Zoa no benne' bi žebe' Le', Xanto'?

¿Zoa no benne' bi wká'n zene' Le'?

Tozo' Le' nako' la'y.

La'gak benách yógo'te yež ka' gan zo',

na' wká'n zéngake' Le'

dan' zlé'gekle' nak chawe' yógo'te da' žono'.

<sup>5</sup>Wdé gok da' ni, bwia', na' ble'ela' byaljw yodon' da' žen' ya'abá che

Dios gan de latje la'y da' nak bian'

Dios zólène' benách chie' ka'.

<sup>6</sup>Gaže wbás che ya'abá bžójgake' lo latje la'y na', na' zej noxe' gaže yížwé' ka'.

Zej nakwe' laže' da' záka'le'en, na' žákti'ten, na' zej nžej bayw ka' da' zej naken ya oro lchó'gake'. <sup>7</sup>Naž to benne' ladjw tape benne' ban ka' bnezwjwe' che chegak gaže wbás che ya'abá ka' gaže zíga'do' da' zej naken ya oro, na' zej nžan' da' zloe'elen yela' zž'a' che Dios, Bennen' zoakze'. <sup>8</sup>Lo latje la'y na' wžé' žen che yi', dan' zej

že' yela' baní', na' yela' wak zen che Dios ga na'. Bi gak nitó benne' choe'e lo latje la'y na' kate' téžegak gaže yížwé' ka' da' zej nwa' gaže wbás che ya'abá ka'.

Zíga'do' ka' da' zloé'geklen  
yela' zž'a' che Dios

**16** Naž benla' chi'i to benne' wnnié' zížje lo latje la'y na', na' gože' gaže wbás che ya'abá ka', na' wnnié': "Le chej, na' le bejljalje gaže zíga'do' ka' lo yežlyó, da' ka' zej nžan' da' zlo'e'elen yela' zž'a' che Dios."

<sup>2</sup>Wyéj wbás nežw che ya'abá, na' bejljalje' da' nžan' zíga'don' da' noe'e lo yežlyó. Da' nžan' zíga'don' benen ga wžía we' da' zla'le'en lo bela' žen chegak benne' ka' zej de'e da' nak bia' zej nake' toze len bia snia na', na' lezka' lo bela' žen chegak benne' ka' zka'n zéngake' ló'aba'.

<sup>3</sup>Naž wyéj wbás bežope' che ya'abá, na' bejljalje' da' nža' zíga'don' da' noe'e lo nisdo', na' nisen' beyaken žen kan nak žen che to benne' gat, na' gotgak yógo'te da' ka' zej yo'on lo nisdon'.

<sup>4</sup>Wyéj wbás beyonne' che ya'abá, na' bejljalje' da' nža' zíga'don' da' noe'e gan zej de yegw ka', na' gan žal nis, na' yógo'te nis ka' beyákgaken žen.

<sup>5</sup>Naž benla' zchalj wbás che ya'abán', wbasen' nzi' lo ne'e zkonle' žin nis, na' wnnié': "Xanto' Dios La'y. Zoakzo', na' wzoakzo'. Chawe' nako' dan' zchogo' chegak benách sáka'gake' ki, <sup>6</sup>dan' bláljgake' žen chegak benne' ka' zej nake' chio' Le', na' žen chegak benne' ka' bcháljgake' lo wlazo' Le'. Na'a, žono' Le' ga yé'jgake' žen dan' ki žala' gaken chégake'."

<sup>7</sup>Naž benla' bchalj to benne' wzóe' žoa'a bkogen' da' žen' ya'abá che Dios, na' wnné: "Ka'kze gaken, Xanto' Dios, napkzo' dot yela' wnná bia'. Dot da' li, na' chawe' nak kan zchogo' chegak benách sáka'gake'."

<sup>8</sup>Wyéj wbás bedape' che ya'abá, na' bejlalje' da' nža' zíga'don' da' noe'e lo wbíž, na' Dios bi'e wbižen' latje bzeyle'en benne' ka' len yi' chen. <sup>9</sup>Wyeygak yógo'te benách ka' dan' bzey wbíž lágake', san bi beyát láže'gake', na' bi bka'n zéngake' Dios. Wnné zí'gake' che Dios, Bennen' yo'o lo na'kze' sele'e da' ki da' žsaka' zí'gaken benách ka'.

<sup>10</sup>Wyéj wbás gayo' che ya'abá, na' bejlalje' da' nža' zíga'don' da' noe'e lo latje che bia snia gan znnna bia'ba', na' wžé' choł ga na'. Naž, benách ka' bdáwya'agake' lóže'gake' dan' wzákala'le'egake', <sup>11</sup>san bi beyát láže'gake' nich biž góongake' da' zia da' žóngake'. Wnné zí'gake' che Dios, Bennen' zoe' ya'abá dan' zzáka'le'egake' ni'a che wen' da' zíagake'.

<sup>12</sup>Wyéj wbás xope che ya'abá, na' bejlalje' da' nža' zíga'don' da' noe'e lo yegw zen da' nzin' Eufrates, na' bebíž nis yegon' nich yaljw nez gan tegak benne' wnná bia' ka' žójgake' zaka' gan zla' wbíž.

<sup>13</sup>Naž ble'ela' bele zen sniale'e na', na' bia snia na', na' bennen' zchalje' lo wlázgakba', na' bžojgak chonne be' xiwe' lo žoá'agakba', da' ka' zžia yí'gaken benách ka', na' znná'gaken kan znnna'gak blož ka'. <sup>14</sup>Chonne be' ki jez naken be' ka' che da' xiwe', be' ka' žóngaken da' jez nak bian' da' góongaken ga yebángekle benách ka'. Yjak be' xiwe' ka' dot yežlyó nga,

na' bejtóbgaken benne' wnná bia' ka' nich chjake' lo wdilen' da' gaken lo žen che Dios, Bennen' napkze' dot yela' wnná bia'. <sup>15</sup>Ki wnná Dios: "Le wia nga. La'a neda' cholze kan zla' to benne' wbán. Ba nez zen gaken che no benne' nake' ban laže', na' žape chi'e da' nakwe', nich bi gon byenen te' gal yidze', na' bi yedoe'ele' lawgak benách ka'." <sup>16</sup>Be' xiwe' ka' betóbgaken benne' wnná bia' ka', na' bdóbgake' to latje da' nzin' len diža' hebreo: Armajedón.

<sup>17</sup>Wyéj wbás gaž' che ya'abá, na' bejlalje' da' nža' zíga'don' da' noe'e lo be'ze, na' to benne' wnnié' zižje lo latje la'y da' žen' ya'abá che Dios gan de latje blon', na' wnné: "Ba naken."

<sup>18</sup>Naž wyép yes, na' gokle'e žaxto', na' wnné wzio'. Wzó' yežlyó, da' wzo'zen ka ba wzó' kate' ne zej nnita' benách ka' lo yežlyó nga.

<sup>19</sup>Yež žen na' bžojen chonne kwe'le, na' wzia yi'gak yež ka' zej žen' dot yežlyó nga. Dios bejsá' laže'e che da' zia da' bengak benách ka' nnita'gake' lo yež žen na' da' nzin' Babilonia, na' lo yela' zža' chie' bsaka' zí'e benne' ka' nnita'gake' yežen'. <sup>20</sup>Belgache' yežlyodo' ka' da' zej žen' gachje lawle nisdo', na' biž wžé'gak ya'a ka'. <sup>21</sup>Lezka' byinnj yej nis ži'a, da' zan' ya'abá, na' bexjwn lo yichjgak benách ka', na' yej nisen' nále'len ka to gaywá' ya to ton. Yógo'te benách ka' wnné zí'gake' che Dios ni'a che yej nisen', dan' bsaka' zil'le'en lágake'.

Dios zchoge' che yež žen kwia yin'  
**17** Naž bla' to wbás che ya'abá gan zoa', wbasen' nbabe' gažé wbás ka' biá'gake' gažé zíga'do'

ka' da' zej naken ya oro. Bcháljlene' neda', na' wnné: "Da nga, na' wloe'ela' le' kan gon Dios, wchinnej' yež zen na' da' naken ka to no'le le'e, na' žen' lo nisdo' ka'. <sup>2</sup>Benne' wnná bia' ka', benne' ka' bénłengake' no'len' da' sban, na' benne' ka' nnít'a'gake' yežlyó nga, wzóžgekle' ni'a che da' sban da' žon no'len'."

<sup>3</sup>Naž yetó da' bloe'el Dios Be' La'y neda'; wbás che ya'abán' bchi'e neda' to latje dach, na' ble'ela' to no'le, na' to bia snia, na' no'len' žie'-ba'. Bia snia na' znna'ba' xnałe'e. Žiagak gaže yichjba', na' chi lozba', na' zej da'ba' diža' ka' da' žon dítjeklen Dios. <sup>4</sup>No'len' žie'-ba' nakwe' laže' xna, na' laže' xnałe'e. Žiagak da' xtan ka' le' da' zej naken ya oro, na' yej zaka' ka', na' bga ka'. Lo ne'e noxe' to zíga'do' da' naken ya oro, dan' nžan' da' sban che da' sban da' žone'. <sup>5</sup>Lo xge' zej nyejw kan lie', da' ka' zlöe'geklen to da' ngache', na' ki zej naken: "Yež Babilonia, Yež Blo" na' "Xna'gak No'le Le'e Ka" na' "Xna' Da' Sban Da' Den Yežlyó." <sup>6</sup>Gókbe'ela' nzožle no'len' dan' bene' ga blalj žen chegak benne' ka' zej nake' che Dios, na' žen chegak benne' ka' betgak benách ka' légake' dan' bzoa lígake' che Jesusen'.

Kate' ble'ela' no'len', bebánle'ela'. <sup>7</sup>Wbás che ya'abán' gože' neda', na' wnné: "¿Biž chen' žebanlo'? Wzejni'ila' le' da' ngache', dan' zlöe'el no'len', na' dan' zlöe'el bia snia na' žie'-ba', bian' žiagak gaže yichjba', na' chi lozba'. <sup>8</sup>Bia snia na' dan' ble'elo' wzoaba' zga'ale san bi zoaba' na'a, na' za' žojba' latje chol che benne' gat ka', na' chejba' gan kwia yi'ba' to chi'ize. Benne' ka'

nnít'a'gake' yežlyó, na' bi zej nyejw lágake' le'e yiche che yela' nban da' bzoj Dios že ni'te katen' bi na' gone' yežlyó, yebángekle' katen' l'égekle' yebán bia snia na', bian' wzoaba' zga'ale san bi zoaba' na'a. <sup>9</sup>Da' ni naken to da' wzejni'ilen no benne' gak chejni'ilen': Gaže yichjba' ka' zejlásnak gaže ya'ado' gan že' no'len'. <sup>10</sup>Lezka', gaže yichjba' ka' zejlásnak gaže benne' wnná bia'. Gayo' benne' ka' ba wdé chégake'. Toe' ne znna bi'e na'a, na' yetóe' bi na' le'e, san kate' yide', na' nna bi'e to chí'ido'ze. <sup>11</sup>Bia snia na', bian' wzoaba' san bi zoaba' na'a, zejlásba' kan nak benne' xono', benne' nna bi'e. Gónlene' benne' gaže ka' tzen, na' te na' kwia yi'e to chí'ize. <sup>12</sup>Chi lozba' ka' da' ble'elo' zejlásnak chi benne' wnná bia'. Bi na' sí'gake' yela' wnná bia', san sí'gaken' to chí'ido'ze, na' nna biá'gake' tzen len bia snia na'. <sup>13</sup>Chi benne' ka', toze gákgeke', na' wdégake' yela' wnná bia' chégake' len da' nzi' lo ná'gake', lo na' bia snia na'. <sup>14</sup>Tíl-lengake' Bennen' nake' Zíla'do', san Le' wléj wchochje' lágake' dan' nake' Xangak yógo'te benne' ka' zej nake' xangak benách ka', na' znna bi'e yógo'te benne' wnná bia' ka'. Benne' ka' bliž Dios légake', na' wžie' légake', chjáklengake' Le', na' to chí'ize gónlengake' Le' tzen."

<sup>15</sup>Wbás che ya'abán' lezka' gože' neda', na' wnné: "Nisdo' ka' da' ble'elo' gan že' no'le le'e na', zejlásnak benách yež ka', na' benách zi'to' ka', na' benách ka' zcháljgake' diža' yoble ka', na' benách ka' nnít'a'gake' yógo'te yežlyó ka'. <sup>16</sup>Chi loz bia snia na' da'

ka' ble'elo' zejlásgaken chi benne' wnná bia' ka', benne' ka' bi dégake' chawé' no'le le'e na', na' wká'ngake' le' ka'ze, na' gal yidze'. Da' góngake' chie' nakan ka gáwgake' bela' žen chie', na' wzéygake' le' lo yi'. <sup>17</sup>Dios wzóe' lo yichj lázdo'gak chi benne' ka' da' gonen ga góngake' ka žénekzele' Le', na' góngake' toze diža' wdégake' yela' wnná bia' chégake' lo na' bia snia na', na ki gak kan znna xtiža' Dios. <sup>18</sup>No'len' ble'elo' zejlase' yež zen na' da' znna bian' benne' ka' znna biá'gake' yežlyó nga."

### Zbia yi' yež Babilonia

**18** Wdé na' ble'ela' betj yeto' wbás che ya'abá, wbasen' bžoje' ya'abá che Dios, na' nzi' lo ne'e yela' wnná bia' zen, na' wyép yes baní' lo yežlyó ni'a che yela' zen che wbasen'. <sup>2</sup>Wbás che ya'abán' wnnié' zižje, na' wnné':

Ba wžia yi'. Ba wžia yi'

Babilonia, yež zen na'.

Ba beyaken latje che da' xiwe', na' chegak be' xiwe' ka'.

Byinne sniale'e ka' len byinne sban ka', ba bengakba' xó'ngakba' ga na'.

<sup>3</sup>Ka' goken ni'a che da' bengak benne' ka' che yežen'.

Yógo'te benne' yež yoble ka' bengake' tzen len légake' da' wzé láže'gake'.

Benne' wnná bia' ka' bengake' tzen len légake' da' sban.

Yógo'te benne' ža'w žote' ka' gota' yela' wnni'a chégake',

dan' bdan láže'gak benne' wláž ka' da' záka'le'en.

<sup>4</sup>Naž benla' zchalj yetó benne' zoe' ya'abá che Dios, na' wnné':

Le žoj lo yežen', le'e nakle chia' neda',

nich bi gonle dola' tzen len légake',

na' nich bi gak chele da' saka' zi'le tzen len légake'.

<sup>5</sup>Nyanle'e dola' da'zej nbage'e, na' ba néntelen ya'abá, san Dios žejsá' laže'e da' kegle da' bengake'.

<sup>6</sup>Le yebí'i chégake' kan bengake' chele.

Le yebí'i chégake' chope kwe' ka da' bengake'.

Le yebí'i chégake' chope kwe' ka da' zia da' bengake' chele.

<sup>7</sup>Le gon ga sáka'le'egake', na' kwež nyáche'gake'

kan zej nak yela' ba la'ne, na' yela' zen da' bka'n kwíngake'.

Wzá' láže'gake', na' wnnágake': "Že'to' nga, na' znna bia'to'.

Bi nakto' wzebe, na' batkle kwež nyáche'to'."

<sup>8</sup>Che len, to žaze žingak da' ka' wsaka' zí'gaken légake', yela' got, na' yela' zbeže nyache', na' yela' zdón.

Chéygake' lo yi'.

Xanžo Dios, Bennen' bchoge' chégake' ki, napkze' dot yela' wak zen.

<sup>9</sup>Naž wnné: "Kwežgak benne' ka' znna biá'gake' yežlyó nga, benne' ka' bengake' da' kegle tzen len légake', na' bebélengekle' da'zej nakan chégake', na' kwež nyáche'gake' katen' l'égekle' žen che yež zen na' da' žeyen. <sup>10</sup>Zí'to'le yelnnite'e dan' zžébegake' da' wsaka' zi' Dios benne' yežen', na' nnágake':

Da' nyáche'le'e žaken che Babilonia, yež zen nga.

Gokle'e Babilonia yež blo, na' to žaze bžia yin'.

<sup>11</sup>'Lezka' kwežgak benne' ža'w žote' ka', benne' ka' nnít'a'gake' yežlyó nga, na' kwež nyáche'gake' ni'a che yežen', dan' biž soa no benne' ga'we' da' góte'gake' ga na'.  
<sup>12</sup>Biž soa no benne' ga na', benne' ga'we'

da' naken ya oro, na' ya plat, na' yej zaka' ka', na' bga ka', na' laže' da' záka'le'en, na' laže' xna, na' laže' cháwe'do', na' laže' xna\_le'e, na' yag da' zla' zix, na' da' naken žit da' záka'le'en, na' da' naken yag da' záka'le'en, na' da' naken ya kobre, na' da' naken ya, na' da' naken yej jese.

<sup>13</sup>'Biž soa no benne' ga na', benne' ga'we' kanel, na' da' ka' zla' zix, na' yale, na' da' zla' zix che mirra, na' che yeje olíbano, na' xis uba wal, na' set zix, na' yezje cháwe'do', na' zoa' stribé, na' búrrodo' ka', na' zila' ka', na' bia ka', na' karret ka', na' benne' wen žin ka', na' yebałe benách ka'.

<sup>14</sup>'Benne' ža'w žote' ka' yé'gake' lágake', na' nnágake': Ba begá'a da' ka' wdán láže'le. Ba wdé chegak yela' wnni'a ka', na' da' ka' jez naken xtan chele, na' biž si'le da' ka'.  
<sup>15</sup>'Kwežgak benne' ža'w žote' ka', benne' ka'gota' chégake' yela' wnni'a dan' béte'gake' lo yežen', na'

gá'ngake' zí'to'le dan' chébegake' kan gak zia da' gaken che yežen', na' kwež nyáche'gake', <sup>16</sup>na' nnágake':

Da' nyáche'le'e žaken che yež zen nga. Goken ka to no'le nakwe' laže' da' záka'le'en, na' laže' xna, na' laže' xna gole, na' wžiagak da' xtan ka' chie' da' zej naken ya oro, na' yej zaka' ka', na' bga ka'.  
<sup>17</sup>To žaze wžia yi' yela' wnni'a che yež nga.

'Yógo'te benne' xan barkw ka', na' benne' ka' žóngake' žin lo barkw ka', na' benne' ka' žsá'gake' barkw ka', na' benne' ka' žóngake' žin lo nisdo', wzégake' zí'to'le, <sup>18</sup>na' kate' blé'egekle' žen che yežen' da' žeyen, na' wžéžegake', na' wnnágake': ¿Biz yež yoble goken zen kan gok yež ni?

<sup>19</sup>'Bžiagake' bixte yo yichjgake', na' wžéžegake', na' wžéž nyáche'gake', na' wnnágake':

Da' nyáche'le'e žaken che yež ni da' goken zen.

Yela' wnni'a che yež ni benen ga gota' yela' wnni'a chegak yógo'te benne' zej nake' xan barkw lo nisdo'.

To žaze wžia yi' yež zen ni.

<sup>20</sup>Le yebél ni'a che da' goken che yež zen ni, le'e zoale ya'abá. Le yebél, le'e nakle che Dios, na' le'e, benne' wbás chie' ka', na' le'e, benne' zchaljle lo wlaze' Le'. Le yebél dan' ba bchog Dios che yež nga kwia yin' ni'a che da' bsáka'gak benne' yež nga le'e.'

<sup>21</sup>Naž to wbás wale che ya'abá bchise' to yej zen da' žoten, na' bžo'nen' lo nisdo', na' wnné':

- La' kikze gaken chio', yež  
Babilonia,  
yež zen da' naken yež blo.  
Biž le'el nitó benne' le'.
- <sup>22</sup> Biž yéngakle benách cha' zoa no  
benne' lo yež nga,  
nitó benne' žinne' le'e da' žolen,  
na' nitó benne' zkweže' bžejw,  
na' nitó benne' zkweže' loz bia  
yixe',  
na' biž žel-le nitó benne' wen žin  
ga na',  
na' biž yéngakle' žaxto' da' žon  
yej da' žoten ga na'.
- <sup>23</sup> Biž wza'ní' nitó yi' lo yežen',  
na' bi yéngakle' chi'i no benne'  
zchag ne'e ga na',  
na' bi yéngakle' chi'i to xkwide'  
no'le zchag na'be'.  
Ki gaken la'kze gokle benne'  
zaka' ka', le'e na' žá'wle, na'  
žote'le lo yež ni,  
na' ben lá'že'lele benách ka' dot  
yežlyó nga, len yela' wžá'  
chele.
- <sup>24</sup> Naž wnné: "Blalj xchengak benne'  
ka' lo yež ni, benne' ka' bcháljgake'  
lo wláz Dios, na' xchengak benne'  
ka' zej nake' che Dios, na' lezka'  
xchengak yógo'te benách ka'  
wnnít'a'gake' yežlyó nga, benne' ka'  
betgak benne' wláz ka' légake'!"
- 19** Wdé na' benla' benne' zan  
wnnégake' zižje, benne'  
ka' nnít'a'gake' ya'abá che Dios, na'  
wnnágake':  
iGa'n zen Dios! iYela' weslá,  
na' yela' zen, na' yela' wnná bia'  
zá'gaken lo na' Dios chežo'!
- <sup>2</sup> Kan zchi'a la'že'e naken dot da' li,  
na' chawé'.
- Le' bchoge' che yežen' kwia yin',  
yežen' goken ka to no'le le'e.
- Bchoge' chegak benne' ka' che  
yežen' gátgake',  
dan' bžia yi'gake' benách ka' dot  
yežlyó nga,  
len da' zia da' béngeake'.  
Dios bezi'e légake' wzón  
dan' bétgake' benne' wen žin  
chie' ka'.
- <sup>3</sup> Da' yoble wnnagak benne' zan ka':  
iGa'n zen Dios!  
Kwénteze žen gan žey yežen'.
- <sup>4</sup> Tap žoa benne' gole ka' len tape  
benne' ban ka' bchag láwgake' lo yo,  
na' bka'n zéngake' Dios, gan ži'e lo  
latje blo chien'. Wnnágake': "iKa'kze  
gaken! iGa'n zen Dios!"
- <sup>5</sup> Naž benla' zchalj to benne' zoe'  
latje blon', na' wnné':  
iLe wká'n zen Dios chežo  
yógo'tele le'e, žonle xchine',  
le'e na' zžébele-ne',  
le'e, benne' gaxjw ka', na' benne'  
zaka' ka'!
- Lni che yela' zchag na' che  
Benne' nake' Zíla'do'
- <sup>6</sup> Lezka' benla' to benne' wnné'  
zižje, na' benlen kan ženlen kate'  
zchaljgak benne' zan, na' kan  
ženlen gan zde to yegw zen, o kan  
ženlen kate' znne wzió', na' wnné':  
iGa'n zen Dios! iZzo lawe' znna  
bi'e!
- iNapkze' dot yela' wak zen!
- <sup>7</sup> Žala' yebelžo na' lo yela' žebél  
chežo wká'n zenžo-ne'  
dan' ba bžin ža lni che yela'  
zchag na' che Bennen' nake'  
Zíla'do'.  
Si' lo na' Benne' Criston' benne'  
ka' zej nake' chie'.
- Ba zbézgake' ka to xkwide' no'le  
wchág ná'lénbe' Le'e.

<sup>8</sup> Dios we'e-be' latje gákwbé'  
laže' da' záka'le'en, da' naken  
zíla'do'ze, na' žákti'ten.  
(Lažen' da' záka'le'en zejlasen da'  
naken chawe' da' žongak benne' ka'  
zej nake' che Dios.)

<sup>9</sup> Naž wbás che ya'abán' gože'  
neda', na' wnné': "Bzoj da' ni le'e  
yiche: Ba nez zen gaken chegak  
benne' ka' Dios bliže' légake' nich  
gónlengake' Lé' tzen lni che yela'  
zchag na' che Bennen' nake' Zíla'do'."  
Lezka' gože' neda': "Diža' dot da' li  
da' ni da' zchalj Dios na'kze."

<sup>10</sup> Bzoa ziba' law wbás che ya'abán'  
nich wká'n zena' le', san le' gože'  
neda': "Bi gono' ki. Lezka' neda'  
naka' wen žin che Dios kan nako' le',  
na' kan zej nak lježo', benne' ka' nzi'  
lo ná'gake' da' naken dot da' li kan  
nak che Jesusen'. iBka'n zen Dios!"

Benne' ka' zcháljgake' lo wláz  
Dios, zzoa lígake' che Jesusen'.

### Benne' žie' bia chich

<sup>11</sup> Naž ble'ela' nyaljw ya'abá, na'  
bla' to bia chich, na' Benne' žie'-  
ba' lie' Benne' Žone' Kan Znne', na'  
lezka' Benne' Znne' Da' Li. Ki lie'  
dan' zchi'a laže'e kan nak da' naken  
dot da' li, na' lezka' cheje' lo wdile.  
<sup>12</sup> Žákti'te yej lawe' ka yi', na' da'  
zan da' naken oro žíagaken yichje'.  
Da' lawe' to da' lie', dan' bi nnezlen  
nitó benne', san toze' Lé' nnezlen'.

<sup>13</sup> Nakwe' to laže' da' ne'jen žen, na'  
lezka' lie' Benne' Nake' Xtiža' Dios.

<sup>14</sup> Ni'a ne'e zan zejnáwgake' Lé',  
benne' ka' nníta'gake' ya'abá che  
Dios, na' žíagake' bia chich ka', na'  
zej nakwe' laže' da' záka'le'en, dan'  
naken zíla'do'ze, na' dan' bi naken  
sban. <sup>15</sup> Zjoj da' naken ka to ya

ntoche' lo žoe'e, dan' wkonle' žin  
nich wsaka' zí'lenen' benách yež  
ka'. Nna bi'e légake' len yela' wak  
zen, na' wsaka' zí'li'e légake', na'  
gak chégake' kan žak che da' zbia  
lba uba, katen' zlejžon. Gone' ga  
yéjgake' xis uban' da' zejlasen yela'  
zža'a che Dios, Bennen' napkze' dot  
yela' wnná bia'. <sup>16</sup> Nyejw kan lie'  
le'e laže' da' nakwe', na' le'e lsine'e,  
Benne' Znna Bi'e Benne' Wnná Bia'  
Ka', na' lezka' Benne' Nake' Xangak  
Benne' Xan Ka'.

<sup>17</sup> Naž ble'ela' to wbás che ya'abá,  
wbasen' zie' lo wbíž, na' wnné' zíjje,  
na' gože' bia ka' zlágakba' ya'abá, na'  
wnné': "Le da, le dobe gan gawle  
lo lni zen che Dios. <sup>18</sup> Gawle bela'  
chegak benne' wnná bia' ka', na'  
bela' chegak benne' ka' zché'gake'  
benne' ka' žjake' lo wdile, na' bela'  
chegak benne' wale ka', na' bela'  
chegak bia ka', na' bela' chegak  
benne' ka' žíagake' légakba', na' bela'  
chegak yógo'te benách ka', benne'  
ka' bi zej ndo'e, na' benne' ndo'w ka',  
benne' gaxjw ka', na' benne' zaka'  
ka'."

<sup>19</sup> Naž ble'ela' bia snia na', na'  
benne' ka' znnna biá'gake' yežlyó  
nga, na' benne' zanle'e ka' chégake',  
benne' ka' žjake' lo wdile. Benne' ka'  
zej ndobe' nich til-lengake' Bennen'  
žie' bia chichen', na' len ni'a ne'e  
zanle'e, benne' ka' zónlengake' Lé'  
tzen. <sup>20</sup> Blej bchóchgake' bia snia  
na', na' lezka' bennen' bchalje' lo  
wlazba', bennen' bene' da' ka' zej  
nak bia' gan zoaba', na' ben láže'le'  
benne' ka' bě'gake' latje wdá' légake'  
da' nak bia' zej nake' toze len leba',  
na' bka'n zéngake' ló'aba'. Bia snia  
na' len bennen' bchalje' lo wlazba',

belžo'ne' légake'zej nbane' lo yi'  
zen gan žey da' zzéyle'en, dan' nzin'  
sufr. <sup>21</sup>Bennen' žie' bia chichen'  
bete' yógo'te benne' ka' bénlengake'  
légake' tzen len da' naken ka to ya  
ntochen' dan' zžojen lo žoe'e, na'  
yógo'te bia ka' zlágakba' ya'abá  
bdáwgakba' bela' žen chégake', na'  
bélgeklba'.

### To mil yiz

**20** Wdé na' ble'ela' žetj to  
wbás che ya'abá, na' noxe'  
zi'n ya che latje chol, na' noe'e to do  
ya wale. <sup>2</sup>Wzene' bele zen sniale'e  
na', belen' wzoaba' ža ni'te, na' leba'  
da' xiwe', na' lezka' Satanás, na'  
bcheje'-ba', na' bka'ne'-ba' nžejba' to  
mil yiz. <sup>3</sup>Wžo'ne'-ba' latje chol che  
benne' gat ka', na' bsejwe' latjen',  
na' bde'e to da' nak bian' da' žsejwn  
latjen' nich biž gon láže'lba' benách  
yež ka' kate' téžegak to mil yiz ka',  
na' te na' yeyežba' to chi'ido'.

<sup>4</sup>Naž ble'ela' latje ka' gan že'gak  
benne' ka' nzi' lo ná'gake' wchi'a  
láže'gake'. Lezka' ble'ela' be' ka'  
gókgakkze benne' chawe' ka', benne'  
ka' wžoggak yéngake' lo na'gak  
benne' wen da' zinnj ka' dan' bzoa  
ligak benne' chawe' ka' che Jesusen',  
na' dan' bcháljgake' xtiža' Dios.  
Benne' ki bi bka'n zéngake' bia snia  
na', na' ló'aba', na' bi bé'gake' latje  
wzój lo xgágake', o lo ná'gake' da'  
nak bian' zej nake' toze len leba'.  
Bebangak benne' ki lo yela' got,  
na' wnná biá'gake' tzen len Benne'  
Criston' to mil yiz ka'. <sup>5</sup>Yezika'  
benne' gat ka' bi bebángake'.  
Kate' téžegak to mil yiz ka', naž  
yebángake'. Yela' yebán lo yela' got  
da' goken ni naken da' gaken da'

nežw. <sup>6</sup>Ba nez zen gaken chegak  
benne' ka' yebángake' lo yela' žebán  
nežw da' gaken, dan' gákgake' che  
Dios na'kze. Yela' got bežope da'  
gaken bi be gak gonen chégake', san  
gákgake' bxoz ka' che Dios, na' che  
Benne' Criston', na' nna biá'gake'  
tzen len Le' to mil yiz ka'.

### Žlej zchóchjgake' da' xiwe'

<sup>7</sup>Kate' téžegak to mil yiz ka', naž  
yeséžgake' da' xiwe' gan nžejen.

<sup>8</sup>Yežój da' xiwe', na' gon láže'len  
benách yež ka' da' zej zen dap la'ate  
yežlyó nga. Lezka' gon láže'len  
benách ka' che yež Gog, na' benách  
ka' che yež Magog, na' wtoben  
légake' lo wdile. Benne' ka' zej  
nake' benne' zan kan nak yož da'  
žen' žoa'a to yegw zen. <sup>9</sup>Benne'  
zanle'e ka' bžójgake' dot yežlyó  
nga, na' wnnáta'gake' la' lí'ale latjen'  
gan zej nnita' benách ka' zej nake'  
toze len Benne' Criston', da' naken  
yežen' da' nži'il Dios. Naž ben Dios  
ga bežjw yi' da' bžojen ya'abá, na'  
bzeyen légake'. <sup>10</sup>Da' xiwe', dan' ben  
láže'len légake', wžó'ngaken' gan že'  
yi' zen che da' zzéyle'en, gan ba zoa  
bia snia na' len bennen' bchalje' lo  
wlazba'. Sáka'le'gake' ga na' dot ža  
dot yele yógo'te yiz ka' da' zá'gaken.

### Zla'gak benách ka' law Dios gan ži'e zchi'a laže'e

<sup>11</sup>Naž ble'ela' to latje blo da'  
chich, na' lezka' ble'ela' Benne'  
ži'e zchi'a laže'e lo latjen'. Gan že'  
Benne' wžia yi'gak yežlyó nga,  
na' ya'abá, na' biž bežél-le latje  
chégaken. <sup>12</sup>Lezka' ble'ela' benne'  
gat ka', benne' zaka' ka' len benne'  
gaxjw ka', na' zéngake' law Dios.

Byáljwgak yiche ka', na' byaljw yetó yiche gan zej nyejw lagak benne' ka' zej nape' yela' nban da' zejlí kanne. Dios wchi'a laže'e benne' gat ka' kan zej nak da' ka' zej nyejwn le'e yiche ka', da' ka' béngeake'.

<sup>13</sup>Bežojgak benne' gat ka' lo nisdo', benne' ka' bgáche'gake' lo nisdon'. Lezka' bežojgak benne' gat ka' lo yela' got, na' lo latje chol, benne' ka' wnníta'gake' ga na', na' Dios wchi'a laže'e to tógake' kan zej nak da' ka' da' béngeake'. <sup>14</sup>Naž bžó'ngake' yela' got, na' latje chol che benne' gat ka', lo latjen' gan že' yi' zen da' naken latje che yela' got bežopen'. <sup>15</sup>Benne' ka' bi zej nyejw lágake' le'e yiche ya'abá, benne' ka' bi zej nape' yela' nban da' zejlí kanne, bejcházgake' latjen' gan že' yi' zen na'.

### To ya'abá kobe, na' to yežlyó kobe

**21** Wdé na' ble'ela' to ya'abá kobe, na' to yežlyó kobe, dan' ba wdé chegak ya'abá na', na' yežlyón', da' ka' wnníta'gaken zgá'alegaken. Biž zej de nisdo' ka'.

<sup>2</sup>Neda', Žwa, ble'ela' yež la'y na', da' naken Jerusalén kobe. Bžojen ya'abá gan zoa Dios, na' betjen lo yežlyó, na' zoan lez kan zoa lez to xkwide' no'le za' wchág ná'lenbe' benne' byo chebe'.

<sup>3</sup>Benla' che to benne' zchalje' ya'abá che Dios, na' wnné: "Le wia nga. Gan zoa Dios zóalenen benách ka'. Sóalene' légake', na' légake' gákgake' benne' chie' ka'. Dios na'kze sóalene' légake', na' gake' Dios chégake'.

<sup>4</sup>Dios wzíe' nis zbéžgake' da' žian yej láwgake'. Biž gat nitó benne', na' biž kwež nitóe', na' biž kwež nyache' nitóe', na' biž saka' nitóe', dan' ba wdé chegak da' ka' gókgaken zga'ale'.

<sup>5</sup>Naž Bennen' ži'e latje blon' wnné: "Bwia nga. Žekoba' yógo'te."

Lezka' gože' neda': "Bzoz le'e yiche da' ni da' naken dot da' li, na' za' gakkzen."

<sup>6</sup>Naž gože' neda': "Ba nakkzen. Neda' naka' Bennen' zoe' zga'ale', na' lezka' Bennen' sóateze' kan nak da' zzo lawn, na' da' ze lawten. No benne' zbole', neda' gona' ga ye'je' nisen' da' wnezjwn yela' nban, na' bi be chizjwe'. <sup>7</sup>Benne' ka' sőegekle' lo da' žak yežlyó, yógo'te da' ki gáta'gaken chégake'. Neda' gaka' Dios chégake', na' légake' gákgake' zí'nkza' ka', <sup>8</sup>san benne' ka' zžébegake', na' benne' ka' bi žejlé'gake' chia' neda', na' benne' ka' bi zej nake' chawé', na' yógo'te benne' wetw benách ka', na' benne' ka' žóngake' da' kegle, na' benne' wžá' ka', na' benne' ka' zka'n zéngake' lo'a ka', na' yógo'te benne' wen laže' ka', ba de latje chégake' lo yi' zen che da' zzéyle'en, da' naken yela' got bežopen'."

### Yež Jerusalén kobe

<sup>9</sup>Naž to wbás che ya'abá, wbases' nbáblene' gaže wbás ka' biá'gake' gaže zíga'do' ka' da' nžá'gaken gaže yižwé', da' ka' ze lawten, ble'e gan zoa'. Gože' neda': "Da nga. Neda' wloe'ela' le' xkwide' no'len' za' bchag ná'lenbe' Bennen' nake' Zíla'do'!"

<sup>10</sup>Dios Be' La'y wzóalene' neda', na' wbás che ya'abán' bchi'e neda' to law ya'a sibe, na' bloe'ele' neda' yež la'y, yež Jerusalén kobe, da' zžojen ya'abá gan zoa Dios, na' žetjen yežlyó. <sup>11</sup>Yežen' žákti'ten dan' yela' baní' che Dios zóalenen yežen'. Žákti'ten kan žákti'te to yej da'

záka'le'en kan nak yej xna gole da' nzin' jaspe. Yani'do' nak yežen' kan nak yej jese. <sup>12</sup>Zoa to ze'e žeje, na' sibe, kwe'j xkóže'le yežen'. Le'e ze'e na' jez nnita' chežinno gan žo'ogak benách ka'. Žoa'a gan žo'ogake' jez nnita' chežinno wbás che ya'abá, wbás ka' žape chí'igaken'. To to gan žo'ogake' nyejw to to lagak chežinno kwe' ljež za'só Israel.

<sup>13</sup>Le'e ze'e da' žen' zaka' gan zla' wbíž zej nnita' chonne gan žo'ogake', na' zaka' gan za' be' zag zej nnita' yechonne gan žo'ogake', na' zaka' chelá'a gan zde wbíž byo' zag ka' zej nnita' yechonne gan žo'ogake', na' zaka' gan žen wbíž zej nnita' yechonne gan žo'ogake'. <sup>14</sup>Zan ze'e che yežen' zej nnita' chežinno len ze'e, na' lé'egaken zej nyejw lagak benne' chežínnote benne' wbás ka' che Bennen' nake' Zíla'do'.

<sup>15</sup>Wbás che ya'abán', bennen' zcháljlene' neda', noe'e to yag wžíx da' naken ya oro nich wžíxe' kan nak yežen', na' kan zej nak gan žo'ogake', na' kan nak ze'e chen. <sup>16</sup>Yežen', tlebe zej nak da' tape la'a ka'. Tlebe nak yela' tonne chen, na' yela' blaga' chen. Len yagen' bžíxe' kan nak yežen', na' naken kan gak sa'žo dot chežinno ža, na' tlebe zej nak yela' tonne chen, na' yela' sibe chen, na' yela' blaga' chen. <sup>17</sup>Lezka' bžíxe' yela' žeje che ze'e na', na' naken to gaywá' tape yon žit na' benne'. Wbás che ya'abán' bkonle' žin yag wžíx na' nich bžíxe' yežen'.

<sup>18</sup>Ze'e na' naken yej jaspe, na' yežen' naken ya óroteze, da' naken yaní'do' kan nak yej jese. <sup>19</sup>Len ze'e ka' che yežen' zej nzin' da' xtan ka' da' zej naken yej ka' da' záka'le'egaken.

Len ze'e nežw naken yej jaspe.  
Da' bežopen naken yej safiro.  
Da' beyonnen naken yej ágata.  
Da' tapen naken yej esmeralda.

<sup>20</sup>Da' gayon' naken yej ónise.  
Da' xopen naken yej kornalina.  
Da' gažen naken yej crisólito.  
Da' xonon' naken yej berilo.  
Da' gan naken yej topasio.  
Da' chin naken yej crisoprasa.  
Da' chinéjen naken yej jasinto.  
Da' chežinnon naken yej amatista.

<sup>21</sup>Da' chežinno ka' da' zej nbagan' gan žo'ogake' jez naken chežinno bga ka'. To to da' ka' gan žo'ogake' nbagan' len toze bga. Nez blo che yežen' naken ya óroteze da' naken yaní'do' kan nak yej jese.

<sup>22</sup>Bi ble'ela' nitó yodo' lo yežen' dan' Dios, Bennen' napkze' dot yela' wnná bia', nake' yodo' chen, na' lezka' nak Bennen' nake' Zíla'do'.

<sup>23</sup>Bi žon byenen wza'ni'gak wbíž, na' byo', lo yežen' dan' zza'ni' yela' baní' che Dios lo yežen', na' lezka' Benne' nake' Zíla'do' zza'ni'e ga na'. <sup>24</sup>Benne' wláž ka' che yežen', benne' ka' belágake', tágake' lo baní' che yežen', na' žingak benne' ka' znna biá'gake' yežlyó nga, zej noe'e yela' wnni'a chégake' ga na'. <sup>25</sup>Batkle wséjwgake' gan žo'ogake' lo yežen' te ža, na' batkle gak žel ga na'. <sup>26</sup>Benách che yógo'te yež yedjwá'gake' da' zaka' ka', na' yela' wnni'a chégake' ga na'.

<sup>27</sup>Nitó da' bi naken chawé', na' nitó da' zinnj, na' nitó benne' žon laže'e, bi chó'ogake' ga na', san benne' ka' zej nyejw lágake' le'e yiche che Bennen' nake' Zíla'do', gan zej nyejw lagak benne' ka' zej nape' yela' nban, chó'ogake' ga na'.

**22** Naž wbás che ya'abán' bloe'ele' neda' to yegw yani'do', da' naken nis yegw da' znezjwn yela' nban. Žákti'te yegon' kan žákti'te yej jese. Žžoj yegon' lo latje blo gan že' Dios, na' lezka' gan že' Bennen' nake' Žíla'do'. <sup>2</sup>Zza' yegon' gachje láwe'le nez blo che yežen'. Chelá'a weje žoa'a yegon' zoa to yag da' žbian da' znezjwn yela' nban, na' želbían chežinno chi'i to yiz. To byo' to byo' želbía yag ka'. Xlágagak yag ka' zej naken da' žeyóngaken benne' ka' che yežen'. <sup>3</sup>Bi soa nitó da' žesbaga' benách ka' zia ga na'. Zoa latje blo gan že' Dios lo yežen', na' lezka' gan že' Bennen' nake' Žíla'do', na' benne' wen žin chie' ka' wká'n zéngake' Le'. <sup>4</sup>Légekle' lawe' Le', na' kan lie' nyejwn lo xgágake'. <sup>5</sup>Bi gak žel ga na', na' bi yažje to da' wsa'ní', na' bi yážgegekle benne' ka' nníta'gake' ga na' baní' che wbíž, dan' gak Xanžo Dios baní' chégake'. To chi'ize nna biá'tezgak benne' ka' nníta'gake' ga na'.

### Za' yelá' Benne' Cristo

<sup>6</sup>Naž wbás che ya'abán' gože' neda', na' wnné': "Diža' ni naken dot da' li, na' nakkzen. Xanžo Dios, Bennen' žchize' Dios Be' La'y chie' lo yichj lázdó'gak benne' ka' zcháljgake' lowlaze' Le', ba bsele'e wbás che ya'abá chie' nich wloe'ele' benne' wen žin chie' ka' da' žala' gakten." <sup>7</sup>Ki wnná Jesús, Benne' Criston: "Za' yelá'a. Ba nez zen gaken che no benne' žone' kan žnna da' zchálja' lo wláz Dios, da' nyejwn le'e yiche ni."

<sup>8</sup>Neda', Žwa, benla', na' ble'ela' da' ki. Wdé benlan', na' ble'elan', na'

bzoa žiba' xni'a wbás che ya'abán', bennen' bloe'ele' neda' da' ki, nich wkán Žena' le'. <sup>9</sup>Naž le' gože' neda': "Bi gono' ki, dan' naka' neda' wen žin che Dios kan nako' le', na' kan zej nak lježo' ka', benne' ka' zcháljgake' lo wláz Dios, na' lezka' kan zej nak yógo'te benne' ka' žóngake' kan žnna da' nyejw le'e yiche ni. iBka'n zen Dios!"

<sup>10</sup>Lezka' gože' neda': "Bi wkacho'o xtiža' Dios ni, da' zchálja' lo wlaze' Le', na' nyejwn le'e yiche ni, dan' za' gakgak da' ki. <sup>11</sup>No benne' žone' da' zinnj gónteze' da' zinnj. No benne' žone' da' kegle gónteze' da' kegle. No benne' žone' da' naken chawé', gónteze' da' naken chawé', na' no benne' nake' che Dios, gákete' che Leze'." <sup>12</sup>Znna Jesusen: "Za' yelá'a. Noa'a lo na'a da' wnežjwa' chegak benne' ka', na' yebi'a che chégake' kan zej nak da' béngeake'. <sup>13</sup>Neda' naka' Benne' zoa' zga'ala', na' lezka' Benne' ze lawte, kan nak da' zzo lawn, na' da' žesyožten. Lezka' naka' Benne' žone' ga so lawn, na' Benne' žone' ga žeyožen. <sup>14</sup>Ba nez zen gaken chegak benne' ka' nyaže da' nákwgake', benne' ka' žóngake' da' naken chawé'. Zej nzi'e latje gáwgake' da' zbia yagen' da' znezjwn yela' nban, na' gak chó'ogake' gan žo'ogak benách ka' lo yežen'. <sup>15</sup>Benne' ka' bi zej nake' chawé', na' benne' wžá' ka', na' benne' ka' žóngake' da' kegle, na' benne' ka' žótgake' benách ka', na' benne' ka' Žka'n zéngake' lo'a ka', na' benne' ka' žaz láže'gake' žon láže'gake', gá'ngake' na'le lo yežen'. <sup>16</sup>Neda', Jesús, bsel'a'a wbás chia', wbás che ya'abá, na' bloe'ele' le'

da' ki, le'e na' nbable to kwe' to kwe'  
benách chia' ka'. Neda' naka' ljež  
Dabí, na' lezka' za'sóe'. Lezka' naka'  
belj xsile."

<sup>17</sup>Zchaljgak Dios Be' La'y, na'  
xkwide' no'le, xkwiden' wchág  
ná'lenbe' Benne' nake' Zíla'do', na'  
znnágake': "Le da."

No benne' ženle' diža' ni žala' nne':  
"Le da."

No benne' zbile', na' no benne'  
zdan laže'en, žala' yídgake', na'  
yé'jgake' nisen', da' znezjwn yela'  
nban.

<sup>18</sup>Neda', Zwa, zzejni'ila' benne'  
ka' želenle' diža' ni da' zchalja' lo  
wláz Dios, na' nyejwn le'e yiche ni,  
na' znnia': cha' no benne' wzane'

kan zej nak diža' ki, na' Dios yebi'e  
chie', na' wsaka' zi'e le' kan zej  
nak da' zej nyejwn le'e yiche ni.

<sup>19</sup>Lezka', cha' no benne' yekwase'  
bíteteze diža' ni da' zchalja' lo  
wláz Dios, da' nyejwn le'e yiche ni,  
Dios yekwase' latje che bennen' le'e  
yichen' gan zej nyejw lagak benne'  
ka' zej nape' yela' nban da' zejlí  
kanne, na' lezka' yekwase' latje  
chie' lo yež la'y, kan nyejw chegak  
benne' ki le'e yiche ni.

<sup>20</sup>Xanžom', Bennen' zzoa lie' kan  
zej nak da' ki znne': "O'. Za' yelá'a."

iKa'kze gaken! iDa, Xanto' Jesúš!

<sup>21</sup>Znnabla' Xanžo Jesúš, Benne'  
Criston', gon chawé'e yógo'tele le'e.  
Ka'kze gaken.